



The New Testament

Mandeali Language



ULB Version-1

**THE
NEW TESTAMENT
OF OUR
LORD AND SAVIOUR
JESUS CHRIST**

हमारे
उद्धारकर्ता प्रभु
यीशु मसीह
का
नया नियम

The New Testament

Mandeali

Community Version -1 (Draft-4) 2016

Made available under :

Creative Commons Attribution-ShareAlike 4.0 License

<https://creativecommons.org/licenses/by-sa/4.0/>



For limited circulation only

Published By :

Mandeali Community



[Download Android App, Read Online, Download PDF](#)

www.mandeali.com

Checking Status

Local Church	✓	Local Community	✓	Local Consultant	✓	Local Church Network	✓
--------------	---	-----------------	---	------------------	---	----------------------	---

मत्ती

1 ¹अब्राहमा रे बच्चे, दाऊदा रे बच्चे, यीसू मसिहा रा खानदान । ²अब्राहमा ले इसहाक जम्या; इसहाका ले याकूब जम्या; होर याकूबा ले यहूदा होर तेसरे भाई जम्मे । ³होर यहूदा ले फिरिस, होर यहूदा होर तामारा ले जोरह जम्मे, होर फिरिसा ले हिस्नोन जम्या; होर हिस्नोना ले एराम जम्या । ⁴होर एरामा ले अम्मीनादाब जम्या; होर अम्मीनादाबा ले नहसोन होर नहसोना ले सलमोन जम्या । ⁵होर सलमोन होर राहबा ले बोअज जम्या, होर बोअज होर रुता ले ओबेद जम्या; होर ओबेदा ले यिसै जम्या । ⁶होर यिसै ले दाऊद राजा जम्या । ⁷होर दाऊदा ले सुलेमान तेस्सा जनानी ले जम्या; जेहडी जे पैहले उरिय्याहा री लाडी थी । ⁸होर सुलेमाना ले रहबाम जम्या, रहबामा ले अबिय्याह जम्या; होर अबिय्याहा ले आसा जम्या । होर आसा ले यहोसाफात जम्या, होर यहोसाफाता ले योराम जम्या, होर योरामा ले उज्जियाह जम्या । ⁹होर उज्जियाहा ले योताम जम्या; होर योतामा ले आहाज जम्या; होर आहाजा ले हिजकिय्याह जम्या । ¹⁰होर हिजकियाहा ले मनसिस्ह जम्या, मनसिस्हा ले आमोन जम्या; होर आमोना ले योसिय्याह जम्या । ¹¹होर बंदी हुई किन्हें बेबीलोन जाणे रे टैमा मन्झ, योसिय्याहा ले यकुन्याहा, होर तेसरे भाई जम्मे । ¹²बंदी हुई किन्हें बेबीलोन पुज्जाये जाणे ले बाद यकुन्याहा ले सालतिएल जम्या; होर सालतिएला ले जरुब्बाबिल जम्या । ¹³होर जरुब्बाबिला ले अबीहूद जम्या, होर अबीहूदा ले इल्याकीम जम्या; होर इल्याकीमा ले अजोर जम्या । ¹⁴होर अजोरा ले सदोक जम्या; होर सदोका ले अखीम जम्या; होर अखीमा ले इलीहूद जम्या । ¹⁵होर इलीहूदा ले इलीयाजार जम्या; होर इलीयाजारा ले मत्तान जम्या; होर मत्ताना ले याकूब जम्या । ¹⁶होर याकूबा ले युसुफ जम्या; जेहडा मरियमा रा लाडा था; होर तेस ले यीसू जेस जो जे मसीह बोल्हा ऐ, जम्या । ¹⁷इहां करी किन्हें अब्राहामा ले दाऊदा तक सारी चौदा पीढिया हुई, होर दाऊदा ले बेबीलोना जो बंदी हुई किन्हें पंहुचाई जाणे तक चौदा पीढी, होर बंदी हुई किन्हें बेबीलोना जो पौहचाई जाणे रे टैमा ले मसीह तक चौदा पीढिया हुई । ¹⁸18 एबे यीसू मसीहा रा जन्म इहां करी किन्हें हुआ, कि जेबे तेसरी माऊ मरियमा री मांगणी युसुफा साऊगी हुई गई, ता तिन्हारे कठे हूणे ले पैहले से पवित्र आत्मा री तरफा ले गर्भवती पाई गई । ¹⁹होर तेस्सा रे लाडे युसुफे जो धर्मी था होर तेस्सा जो बदनाम नी करणा चाहन्दा था, तिने तेस्सा जो चुपचाप छाडणे रा विचार कित्या । ²⁰जेबे से इन्हा गल्ला जो सोचदा लगिरा

था, ता प्रभुरे स्वर्गदूते तेस जो सुपणे मंझ सुइही किन्हें बोल्या; हे युसुफ दाऊदा री सन्तान, तू आपनी लाडी मरियमा जो आपणे एथी ल्याऊणे ले मत डर; क्योकि जो तेस्सा रे गर्भा मंझा आ, से पवीत्र आत्मा री तरफा ले आ । ²¹तेस्सा म्हठा जणना होर तू तेसरा नांऊ यीसू रख्या; क्योकि तेस आपणे लोका रा तिन्हा रे पापा ले छुटकारा देणा । ²²ये सब कुछ इधी कठे हुआ कि जो वचन प्रभुरे नबिया रे ज्रीए बोलिरा था; से पूरा हो । ²³कि देखा एक कुआरी गर्भवती हुणी होर तेस्सा एक म्हठे जो जन्म देणा होर तेसरा नांऊ इम्मानुएल रख्या जाणा जेसरा मतलब आ, "परमेसर आस्सा साउगी" । ²⁴तेबे युसुफ निंद्रा ले जागी गया होर से प्रभुरे दुता रे हुक्मा रे मुताबक आपणी लाडी जो आपणे वाले लई आया । ²⁵होर जेबे तक तेस्से म्हठे जो जन्म नी दितेया तेबे तक से तेस्सा वाले नी गया: होर तिने तेसरा नांऊ यीशु रख्या ।

2 ¹हेरोदेस राजे रे टैमा मन्झ जेबे यहूदिया रे बैतलैहमा मंझ जेबे यीसू रा जन्म हुआ, ता देखा पूर्व देसा ले कई जोत्सी यरुस्लेमा मन्झ आई किन्हें पुछदे लगे । ²कि यहूदियो रा राजा जेस रा जन्म हुईरा, से केथिया? क्योकि आस्से पूर्व देसा मन्झ तेसरा तारा देखिरा होर तेस जो प्रणाम करदे आइरे । ³ये सुणी किन्हें हेरोदेस राजा होर तेस साउगी सारा यरुस्लेम डरी गया । ⁴होर तिने लोका रे सभ माहयाजक होर सास्त्रिया जो कठा करी किन्हें तिन्हा ले पूछेया, कि मसीहा रा जन्म केथी हुणा चहिए? ⁵तेबे तिन्हें तेस किन्हें बोल्या, यहूदिया रे बैतलैहमा मन्झ; क्योकि नबिया रे ज्रीए एहडा लिखिरा । ⁶हे बैतलैहम, तू जो यहूदा रे देसा मंझा आ, तू केसी भी तरीके ले यहूदा रे अधिकरिया मंझा ले सभी ले छोटा नी आ; क्योकि तुध मंझा ले एक राजा निकळणा, जेस मेरी प्रजा इस्राएला री रखवाळी करणी । ⁷तेबे हेरोदेसे जोत्सी चुपचाप सादे होर तिन्हा ले पूछेया, कि तारा ठीक केस टैम सुइहेया था । ⁸होर तिने ये बोली किन्हें स्यों बैतलैहम भेजे, कि जाई किन्हें तेस बाल्का रे बारे मन्झ ठीक ठाक पता करा होर जेबे से मिली जाए ता मुंजो भी खबर करेया कि हांऊ भी आई किन्हें तेसरी जै जै कार करी सकूं । ⁹स्यों राजे री गल सुणी किन्हें चली गये, होर देखा, जो तारा तिन्हें पूर्वा मन्झ देखिरा था, से तिन्हारे अगे अगे चल्या । होर जेथी से बालक था । से तारा तेस जगह रे ऊपर पूजी किन्हें रुकी गया । ¹⁰तेस तारे जो देखी किन्हें स्यों बौहत खुस हुई गए । ¹¹होर तिन्हे तेस घरा मन्झ पूजी किन्हें तेस बाल्का जो तेसरी माऊ मरियमा साऊगी देख्या, होर मुंहा रे भारे पई

किन्हें तिन्हे तेसरी जै जै कार किती; होर तिन्हे आपणा-आपणा झोळा खोल्ही किन्हें तेसजो सोना, होर लोहबान, होर गन्धरसा रा दान चढाया।¹² होर तिन्हे सुपणे मन्झ ये च्तौनी पाई कि हेरोदेसा वाले दबारा देख्या जांदे, होर स्यों दूजे रस्ते ले हुई किन्हें आपणे देसा जो चली गये।¹³ तिन्हारे चले जाणे ले बाद देखा, प्रभु रे एक दूते सुपणे मन्झ युसुफा जो बोल्या, उठ; तेस बालका जो होर तेसरी माऊआ जो लई किन्हें मिस्र देसा जो चली जा; होर जेबे तक हांऊ तुजो नी बोलूं, तेबे तक तू तेथी रह्या; क्योंकि हेरोदेस एस बच्चे जो टोळ्या करहा ताकि से एस जो मारी दे।¹⁴ तेबे से राती ऊठी किन्हें तेस बालका होर तेसरी माऊ मरियमा जो लई किन्हें मिस्र देसा जो चली गया।¹⁵ तेबे से हेरोदेसा रे मरणे तक तेथी रह्या; इधी कठे कि से वचन जो प्रभुए नबिया रे ज्रीए बोलिरा था कि मैं आपणे म्हठे जो मिस्रा ले सादया, पूरा हो।¹⁶ जेबे हेरोदेसे देख्या कि जोत्सिये मेरा मजाक बणाया, ता से गुस्से किन्हें भहरी गया; होर तिने जोत्सिया वाले लोक भेजे होर तिने तिन्हा ले ठीक ठीक पूछी किन्हें बैतलैहम होर तेसरे ओरली – परली जगहा रे सभ म्हठे जो, जो दो साला रे, या तेता ले छोटे थे, स्यों सभ मरिवाई दिते।¹⁷ तेबे जो वचन यिर्मयाह नबिया रे ज्रीए बोल्या गईरा गया था, से पूरा हुई गया।¹⁸ रामाह मन्झ एक रोणे कर्लाणे री अवाज सुणह्या करहा ई, बड़ा भारी रोण होर पीटण, होर बड़ा विलाप हुएया करहा, राहेल आपणे म्हठे रे कठे रोया करहा ई थी, होर स्यों सांत नी हूणा चाहंदी थी, क्योंकि स्यों एबे नी रहे।¹⁹ हेरोदेसा रे मरणे रे बाद देखा, प्रभु रे दुते मिस्रा मन्झ युसुफा जो सुपणे मन्झ बोल्या।²⁰ उठ, बालका होर तेसरी माऊआ जो लई किन्हें इस्राएला रे देसा जो चली जा क्योंकि जो बालका री जान लैणा चाहें थे, स्यों मरी गये।²¹ से ऊठया, होर बालक होर तेसरी माऊआ जो साऊगी लई किन्हें इस्राएला रे देसा मन्झ आया।²² पर ये सुणी किन्हें कि अरिखलाऊस आपणे बापू हेरोदेसा रे जगहा यहूदिया पर राज करेया करहा, से तेथी जाणे ले डरया; होर सुपणे मन्झ परमेसरा ले च्तौनी पाई किन्हें गलील देसा मंझ चली गया।²³ होर से नासरत नांऊआं रे नगरा मन्झ रहन्दा लग्या; ताकि से वचन पूरा हुई जाए, जेहडा नबिया रे ज्रीए बोल्या गईरा था, कि तेस जो नासरी बोल्या जाणा।

3¹ तिन्हा ध्याडे मंझा यहूना बपतिस्मा देणे वाळा आई किन्हें यहूदिया रे जंगला मन्झ एहडा प्रचार करदा लग्या; ² 'मन फिराऊआ; क्योंकि स्वर्गा रा राज नेडे आई गईरा। ³ ये से ई आ जेसरी चर्चा यसायाह नबी रे ज्रीए कितिरी कि जंगला मन्झ एक हाका पाणे वाळ्या री अवाज सुणह्या करहा ई, कि प्रभु रा पैडा त्यार करा, होर तेसरी सडका सीधी करा।" ⁴ ये यहूना ता ऊन्टा रे वाळा रे कपडे पैहना था, होर आपणी कमरा मन्झ चामडे रा पटका बान्ही रख्हा था, होर तेसरा खाणा

टिड्डीया होर जंगली म्बीर था।⁵ तेबे यरूस्लेमा रे होर सारे यहूदिया रे, होर यरदना रे ओरले परले सारे देसा रे लोक तेस वाले आए।⁶ होर तिन्हे आपणे-आपणे पापा जो मनी किन्हें यरदन नदी मन्झ बपतिस्मा लया।⁷ जेबे तिने बौहत फरीसी होर सदुकी जो बपतिस्मा लेणे रे कठे आपणे वाले आउंदे देख्या, तेबे तिने तिन्हा किन्हें बोल्या, कि हे सांपा रे बच्चेयो तुस्सा जो कुने दस्सी दितेया, कि तुस्से आऊणे वाळे गुस्से ले भगा? ⁸ इधी कठे मन फिराऊआ रे लायक फल ल्याऊआ।⁹ होर फेरी आपणे-आपणे मना मन्झ एहडा मत सोचा, कि आस्सा रा बापू अब्राहम आ; क्योंकि हांऊ तुस्सा किन्हें बोल्हा, कि परमेसर इन्हा पात्थरा ले अब्राहमा रे कठे बच्चे पैदा करी सकहा।¹⁰ होर एबे ता छहू डाळा री जडा पर रखी दितीरा, इधी कठे जो जो डाळ खरा फल नी देंदा तेस जो काटी किन्हें आगी मन्झ पाई किन्हें फुकी देहां ऐं।¹¹ हांऊ ता तुस्सा जो पाणी ले मन फिराऊआ रा बपतिस्मा देहां; पर से जे मेरे बाद आऊणे वाळा आ, से मेरे ले भी ज्यादा सक्तिसाली आ; हांऊ ता तेसरे जूते चकणे रे लायक नी हाया; तेस तुस्सा जो पवित्र आत्मा होर आगी किन्हें बपतिस्मा देणा।¹² तेसरा सूप तेसरे हाथा मन्झ आ, होर तेस आपणा खलिहान ठीक ढंगा किन्हें साफ करणा, होर आपणी गाही री कणक ता तेस आपणे गोदामा मन्झ कठी करणी, पर भूह तेस आगी मन्झ फुकी देणा जो बूझणे वाळी नी ई।¹³ तेस टैम यीसू गलीला ले यरदना रे बाहडे यहूना ले बपतिस्मा लेणे रे कठे आया।¹⁴ पर यहूना तेस जो ये बोली किन्हें रोक्दा लग्या, कि मुंजो ता तेरे हाथा ले बपतिस्मा लैणे री जरूरत ई, होर तू मेरे वाले आईरा।¹⁵ यीसूए तेस जो ये जबाब दितेया, कि एबे ता तू एहडा ई हुणे दे, क्योंकि आस्सा जो इहां करी किन्हें सब धार्मिकता पूरी करणी ठीक रहणी, तेबे तिने तेसरी गल मनी लई।¹⁶ होर यीसू बपतिस्मा लई किन्हें झटपट पाणी ले बहार आया, होर देखा, कि तेसरे कठे सर्ग खुल्ही गया, होर तिने परमेसरा री आत्मा जो कबुतरा साहीं उतरदे होर आपणे ऊपर आउंदे देख्या।¹⁷ होर देखा, ये अकासवाणी हुई, कि ये मेरा लाडला म्हठा आ, जेसले हांऊ बडा भारी खुस आ।

4¹ तेबे आत्मा यीसू जो जंगला मन्झ लई गया ताकि सैताना ले तेसरी परखणी हो।² से चाळी ध्याडे, होर चाळी रात, भूखा रह्या, बादा मन्झ तेस जो भूख लगी।³ तेबे परखणेवाळे तेस वाले आई किन्हें तेस किन्हें बोल्या, अगर तू परमेसरा म्हठा आ, ता बोलिदे, कि ये पात्थर रोटीया बणी जाये।⁴ यीसूए जबाब दितेया: ये लिखीरा कि माहणु सिर्फ रोटीया ले ई नी; पर हर एक वचना ले जो परमेसरा रे मुंहा ले निकळहा जिउंदा रहणा।⁵ तेबे सैतान तेस जो पवित्र नगरा मंझा लई गया होर तेस जो मन्दिरा रे कंगुरे पर खडा करी दितेया।⁶ होर तिने तेस किन्हें बोल्या अगर तू परमेसरा रा म्हठा आ, ता आपणे

आपा जो थाले सटी दे; क्योंकि लिखिरा, कि तेस तेरे बारे मन्झ आपणे स्वर्गदूता जो हुक्म देणा; होर तेस तुस्से हाथो-हाथ चकी देणे; केते एहडा नी हो कि तेरे पैरा जो पात्थरा ले चोट लगे । 7 यीसूए तेस किन्हें बोल्या; ये भी लिखिरा आ, कि तू प्रभु आपणे परमेसरा री परीक्षा ना कर । 8 फेरी सैतान तेस जो एक उचे पाहडा पर लई गया होर तेस जो सारे संसारा रे राज पाट होर चमक दमक दसी किन्हें । 9 तेस किन्हें बोल्या, "कि अगर तू पई किन्हें मेरी पूजा करे, ता मां ये सब कुछ तुजो देई देणा ।" 10 तेबे यीसूए तेस किन्हें बोल्या; हे सैतान दूर हुई जा, क्योंकि लिखिरा, कि तू प्रभु आपणे परमेसरा री आराधना कर, होर सिर्फ तेसरी उपासना कर । 11 तेबे सैतान तेस वाले ले चली गया होर देखा, स्वर्गदूते आई किन्हें तेसरी सेऊवा करदे लगे । 12 जेबे तिने ये सुणेया कि यहुन्ने जो बंदी बणाई जाई चुकिरा, ता से गलीला जो चली गया । 13 होर से नासरता जो छाडी किन्हें कफरनहुमा मन्झ जो झीला रे बाहडे जबूलून होर नत्तली रे देसा मन्झ आ, जाई किन्हें रैहंदा लग्या । 14 ताकि जेहडा जे यसायाह नबी रे ज्रीए बोल्या गईरा था, से पूरा हो । 15 कि जबूलून होर नत्तली रे देस, झीला रे पैडे मन्झ यरदन रे पारा वखा जो होरी जातिया रा गलील । 16 जो लोक न्ह्यारे मन्झ बैठी रे थे तिन्हें बडी ज्योति देखी; होर जेहडे मौता रे देसा होर छांऊआं मन्झ बैठी रे थे, तिन्हा पर प्रयासा चमक्या । 17 तेस टैमा ले यीसूए प्रचार करणा होर ये बोलणा सुहरू कितेया कि मन फिराऊआ क्योंकि स्वर्गा रा राज नेडे आई गईरा । 18 गलीला री झीला रे बाहडे घुम्दे हुए दो भाईया जो यानि स्मौना जो जेस जो जे पतरस भी बोल्ला ऐ, होर तेसरे भाई अन्द्रियासा जो झीला मन्झ जाल पान्दे देख्या; क्योंकि स्यों मच्छी पकड़णे वाले थे । 19 होर तिने तिन्हा किन्हें बोल्या, मेरे पीछे आउआ, ता मां तुस्से माहणु पकड़णेवाळे बनाणे । 20 होर स्यों झटपट जाल छाडी किन्हें तेसरे पीछे चली पये । 21 होर तेथी ले अगे जाई किन्हें, तिने होर दो भाइया जो यानि जब्दी रे म्हठे याकूब होर तेसरे भाई यहुन्ना जो तेसरे बापू साउगी जाला जो ठीक करदे देख्या; होर तिने स्यों भी सादे । 22 स्यों झटपट किस्ती होर आपणा बाबा जो छाडी किन्हें तेसरे पीछे चली पये । 23 होर यीसू सारे गलीला मन्झ घुम्दा हुआ तिन्हारी सभा मन्झ उपदेस करदा होर राजा रा सुसमाचार प्रचार करदा, होर लोका जो हर किस्मा री बमारी होर कम्जोरी जो दूर करदा रैह्या । 24 होर सारे सीरिया देसा मन्झ तेसरा नांऊ फैल्ही गया; होर लोक सारी बमारियां जो, जो कई किस्मा री बीमारिया होर दुःखा मन्झ जख्हडी रे थे, होर जिन्हा मन्झ दुष्टात्मा थी होर मिर्गीवाळे होर लकवे रे रोगी जो तेस वाले लई आए होर तिने स्यों ठीक करी किते । 25 होर गलील होर दिकापुलिस, यरूस्लेम होर, यहूदिया ले,

होर यरदना रे पारा वखा री भीडा री भीड तेसरे पीछे हुई गई ।

5¹ से एस्सा भीडा जो देखी किन्हें, पहाडा पर चढी गया; होर जेबे से बैठी गया ता तेसरे चेले तेस वाले आये । 2 होर से आपणा मुंह खोल्ही किन्हें तिन्हा जो ये उपदेस देंदा लग्या, 3 भागा वाळे ऐ स्यों, जो मना रे भोळे ऐ, क्योंकि स्वर्गा रा राज तिन्हारा आ । 4 भागा वाळे ऐ स्यों, जो दुःखी हुहां ऐं, क्योंकि तिन्हा सान्ति पाणी । 5 भागा वाळे ऐ स्यों, जो दीन ऐ, क्योंकि तिन्हा धरती रे उत्तराधिकारी बणना । 6 भागा वाळे ऐ स्यों, जो धर्मा रे भूखे होर सोखे ऐ, तिन्हा रजी जाणा । 7 भागा वाळे ऐ स्यों, जो दयाळू ऐ, क्योंकि तिन्हा पर दया किती जाणी । 8 भागा वाळे ऐ स्यों, जिन्हारे मन शुद्ध ऐ, क्योंकि तिन्हा परमेसर देखणा । 9 भागा वाळे ऐ स्यों, जो मेल करवाणे वाळे ऐ; क्योंकि तिन्हा जो परमेसरा रे पुत्र बोल्या जाणा । 10 भागा वाळे ऐ स्यों, जो धार्मिकता री वजहा ले स्ताए जाहें; क्योंकि स्वर्गा रा राज तिन्हारा आ । 11 भागा वाळे ऐ, तुस्से, जेबे माहणु मेरी वजहा ले तुस्सा री निन्दा करे होर स्ताये होर झूठ बोली बोली किन्हें तुस्सा रे खलाफ कई किस्मा री बुरी गल्ला बोले । 12 तेबे खुस होर मगन हुएया क्योंकि तुस्सा रे कठे स्वर्गा मन्झ बौहत बडा फल रखीरा इधी कठे कि, जो तुस्सा ले पैहले नबी थे तिन्हे स्यों भी इहां करी किन्हें, स्ताये थे । 13 तुस्से धरती रे लूण ऐ; अगर लूणा रा स्वाद बिगडी जाए, ता से फेरी केस चीजा किन्हें लूणा कितेया जाणा? फेरी से केसी कामा रा नी आ; सिर्फ एता रे कि तेस जो बाहर सटी दितेया जाए होर माहणु रे पैरा हेठ जिकी दितेया जाए । 14 तुस्से संसारा री ज्योति ऐ; जेहडा नगर रे पहाडा पर बसिरा से नी ल्हुखी सकदा 15 होर लोक दीया भ्खाई किन्हें पैमाने (टोकर) रे थाले नी रखे पर केसी चीजा रे ऊपर रख्हा ऐ, तेबे तेता ले तेस घरा रे सारे लोका जो प्रयासा पुज्हा । 16 इहां करी किन्हें तुस्सा रा प्रयासा माहणु रे साम्हणे चम्के ताकि से तुस्सा रे भले कामा जो देखी किन्हें तुस्सा रे बापु री जो स्वर्गा मन्झ आ; जै जै करे । 17 ये ना समझा, कि हांऊ व्यवस्था या नबिया री क्ताबा जो नास करदा आईरा, नास करणे रे कठे नी, पर पूरा करदे आईरा । 18 क्योंकि हांऊ तुस्सा किन्हें सच सच बोल्ला, जेबे तक सर्ग होर धरती टळी नी जाए, तेबे तक व्यवस्था ले एक मात्रा या एक बिंदु भी बगैर पुरे हुई किन्हें नी टलणा । 19 इधी कठे जो कोई इन्हा छोटे ले छोटे हुक्मा जो केसी एकी जो भी तोड़ी दे होर तेहडा ई होरी लोका जो भी स्वाए ता तेस जो स्वर्गा रे राजा मन्झ सभी ले छोटा बोल्ला जाणा, पर जो कोई इन्हा हुक्मा जो मन्घा होर तिन्हा जो स्वाहन्घा, तेस जो ई स्वर्गा रे राजा मन्झ बडा बोल्ला जाणा । 20 क्योंकि हांऊ तुस्सा किन्हें बोल्ला, कि अगर तुस्सा री धार्मिकता साखी होर फरीसिया री

धार्मिकता ले बढी किन्हें नी हो, ता तुस्सा स्वर्गा रे राजा मन्झ कधी नी भी पूजणा । 21 तुस्से सुणी चुकिरे, कि पैह्लके जमाने रे लोका किन्हें बोलिरा था कि हत्या देख्या करदे, होर जेहडा कोई हत्या करघा तेस कच्छरी मन्झ सजा रे लायक बणना । 22 पर हांऊ तुस्सा किन्हें बोल्हा; कि जेहडा कोई आपणे भाई पर गुस्सा करघा, ता तेस कच्छरी मन्झ सजा रे लायक हुणा: होर जेहडा कोई आपणे भाई जो निकम्मा बोल्हगा तेस सभा मन्झ सजा रे लायक हुणा; होर जो कोई आपणे भाई जो “बेकार” बोले तेस नरका री आगा री सजा रे लायक हुणा । 23 इधी कठे अगर तू आपणा दान बेदी पर ल्याए, होर तेथी तुजो याद आए, कि मेरे भाईया रे मना मन्झ मेरी तरफा ले कुछ सिकायत ई, ता तेथी आपणा दान बेदी रे साम्हणे छाडी दे । 24 होर जाई किन्हें पैहले आपणे भाई किन्हें मेल मिलाप करी ले; तेबे आई किन्हें आपणा दान चढा । 25 जेबे तक तू आपणे ब्रोधी साउगी पैडे मन्झ आ, तेस साउगी झटपट मेल मिलाप करी ले केते एहडा नी हो कि ब्रोधी तुजो हाक्मा जो सौंपी दे होर हाक्म तुजो सिपाहिया जो सौंपी दे होर तुजो जेहला अन्दर पाई दितेया जाए । 26 हांऊ तुस्सा किन्हें सच बोल्हा कि जेबे तक तू एक एक पैसा चुकाई नी दे तेबे तक तूध तेथी ले नी छुटणा । 27 तुस्से सुणी चुकिरे थे कि बोल्या गईरा था, कि व्यभिचार नी करणा । 28 पर हांऊ तुस्सा किन्हें ये बोल्हा, कि जो कोई केसी जनानी पर बुरी नजर पाए से आपणे मना मन्झ तेस्सा किन्हें व्यभिचार करी चुक्या । 29 अगर तेरी दाई हाख तेरे कठे तेरी ठोकरा री वजहा बणे, ता तेता जो काहडी किन्हें आपणे वाले ले सटी दे; क्योंकि तेरे कठे ये ठीक आ, कि तेरे अंगा मन्झा ले एक नास हुई जाये होर तेरा सारा सरीर नरका मन्झ नी पाया जाए । 30 होर अगर तेरा दायाँ हाथ तेरे कठे तेरी ठोकरा री वजहा बणे, ता तू तेता जो काटी किन्हें आपणे वाले ले सटी दे, क्योंकि तेरे कठे ये ई ठीक आ कि तेरे अंगा मन्झ एक नास हुई जाए होर तेरा सारा सरीर नरका मन्झ नी पाया जाए । 31 ये भी बोल्या गईरा था, कि जो कोई आपणी लाडी जो छाडे से तेस्सा जो त्याग पत्र दे । 32 पर हांऊ तुस्सा किन्हें बोल्हा कि जो कोई आपणी लाडी जो व्यभिचारा रे अलावा केसी होर वजहा ले छाडी देहां, ता तू तेस्सा ले व्यभिचार करवाहां; होर जो कोई तेस्सा छाडी गईरी किन्हें ब्याह करे, से व्यभिचार करहा । 33 फेरी तुस्से सुणी चुकिरे, कि पुराणे जमाने रे लोका किन्हें बोल्या गईरा था कि झूठी कसम देख्या खांदे, पर प्रभु कठे आपणी कसम पूरी करेया । 34 पर हांऊ तुस्सा किन्हें बोल्हा, कि कधी भी कसम देख्या खांदे; ना ता स्वर्गा री, क्योंकि से ता परमेसरा री राजगद्दी ई । 35 ना ता धरती री, क्योंकि से तेसरे पैरा री चौकी ई; होर ना यरूस्लेमा री, क्योंकि से महाराजा रा नगर आ । 36 होर आपणे मूंडा री कसम भी देख्या खान्दे क्योंकि तू एक बाळा

जो ना चीटा, ना काळा करी सकहा । 37 पर तुस्सा री गल हां री हां हो; या ना री ना हो; क्योंकि जो कुछ ऐता ले ज्यादा बढी किन्हें हुहां, से बुराई ले हुहां । 38 तुस्से सुणी चुकिरे, कि बोल्या गईरा था, कि हाखिया रे बदले हाख, होर दाँन्दा रे बदले दाँन्द । 39 पर हांऊ तुस्सा किन्हें ये बोल्हा, कि बुरे रा साम्हणा नी करणा; पर अगर कोई तेरे चेहरे री दाई तरफ तुजो चाडां मारे, ता तेस वखा जो आपणे चेहरे रा दूजा पासा भी फेरी दे । 40 होर अगर कोई कानूनी कारवाई करी किन्हें तेरा कुरता लैणा चाहे, ता तेस जो आपणी दोहर भी लैणे ले नी रोक । 41 होर जो कोई तुजो मजबूर करी किन्हें एक मील लई जाए ता तेस साउगी दो मील चली जा । 42 जो कोई तुध ले मांगे, तेस जो दे; होर जो तुध ले उधार लैणा चाहे, तेस जो नाह नी कर । 43 तुस्से सुणी चुकिरे, कि बोल्या गईरा था; कि आपणे पडोसी किन्हें प्यार रखणा, होर आपणे बैरी किन्हें बैर । 44 पर हांऊ तुस्सा किन्हें ये बोल्हा, कि आपणे बैरी किन्हें प्यार रखा होर आपणे सताणेवाळे रे कठे प्रार्थना करा । 45 जेस ले तुस्सा आपणे स्वर्गीय बापु री सन्तान बणना क्योंकि से खरे होर बुरे दुहींयां पर आपणा सूरज उदय करहा । होर धर्मी होर पापी दुहीं पर आपणी बरखा देहां । 46 क्योंकि अगर तु आपणे प्यार रखणे वाळे किन्हें ई प्यार रख्हा, ता एता ले तुस्सा जो क्या फ़ायद हुआ? क्या चुंगी लेणेवाळे भी एहडा नी करदे? 47 होर अगर तुस्से आपणे भाइया जो ही नमस्ते करघे, ता कुण जे बडा काम करहा ऐ? क्या होरी जातिया रे लोक भी एहडा नी करदे? 48 इधी कठे कि तुस्से सिद्ध बणी सको, जेहडा तुस्सा रा स्वर्गीय बापु सिद्ध आ ।

6 1 सावधान रहूआ! तुस्से माहणु जो दसणे रे कठे आपणे धर्मा रे काम नी करा, नी ता तुस्सा आपणे स्वर्गीय बापू ले कुछ भी फल नी पाणा । 2 इधी कठे जेबे तू दान करे, ता आपणे अगे बाजा मत बजवा, जेहडा कपटी बैठका होर गळिया मंझ करहा ऐ, ताकि लोक तिन्हा री बडाई करे, हांऊ तुस्सा किन्हें सच बोल्हा आ; कि स्यों आपणा फल पाई चुके । 3 पर जेबे तू दान करे, ता जो तेरा दायाँ हाथ करहा, तेता रा पता तेरे बायें हाथा जो नी चलणे पाए । 4 ताकि तेरा दान परदे मन्झ रहे; होर तेबे तेरा बापू जेहडा परदे मन्झ देख्हा, तुजो इनाम देणा । 5 होर जेबे तू प्रार्थना करे, ता पाखंडीया साहीं देख्या करदे क्योंकि लोका जो दसणे रे कठे मन्द्रा मन्झ होर सडका रे मोडा पर खडे हुई किन्हें तिन्हा जो प्रार्थना करणा बांका लघ्हा । हांऊ तुस्सा किन्हें सच बोल्हा; कि स्यों आपणा फल पाई चुकिरे । 6 पर जेबे तू प्रार्थना करे, तेबे आपणे कमरे मन्झ जा; होर दरवाजा बंद करी किन्हें आपणे बापू किन्हें जो परदे मन्झ आ प्रार्थना कर; तेबे तेरा बापू जो परदे मन्झ देख्हा, तुजो इनाम देणा । 7 होर प्रार्थना करणे रे टैम होरी लोका साहीं बक

बक नी करा; क्योंकि तिन्हारी ये समझ बणी गईरी कि तिन्हा रे ज्यादा बोलणे ले तिन्हा री सुणी जाणी । 8 इधी कठे तुस्से तिन्हा साहीं नी बणा, क्योंकि तुस्सा रा बापू तुस्सा रे मांगणे ले पैहले जाणा आ, कि तुस्सा री क्या क्या जरूरत ई । 9 इधी कठे तुस्से इहां करी किन्हें प्रार्थना करेया करा; "हे आस्सा रे पिता जी, तुस्से जो स्वर्गा मन्झ ऐ; तुस्सा रा नांऊ पवित्र मन्या जाये । 10 तुस्सा रा राज आये; जेहडी तुस्सा री इच्छा स्वर्गा मन्झ पूरी हुहां ई, तिहां धरती पर भी पूरी हो । 11 आस्सा री आजकी ध्याडी भरा री रोटी आज आस्सा जो दे । 12 होर जिहां आस्से आपणे गुन्हेगारा जो माफ़ करहा ऐ, तिहां ई तू भी आस्सा रे पापा जो माफ़ कर । 13 होर आस्सा री परखणी नी हुणे दे, पर आस्सा जो तेस दुष्टा ले बचा; क्योंकि राज होर सक्ति होर महिमा हमेसा तुस्सा रे ही हाये ।" आमीन । 14 इधी कठे अगर तुस्से माहणु रे पाप माफ़ करघे, ता तुस्सा रे स्वर्गीय बापूआ भी तुस्सा रे पाप माफ़ करी देणे । 15 होर अगर तुस्से माहणु रे पाप माफ़ नी करघे, ता तुस्सा रे बापूआ भी तुस्सा रे पाप माफ़ नी करणे । 16 जेबे तुस्से उपवास करो, ता पाखंडीया साहीं तुस्सा रे मुंहा पर दुआसी नी हुणी चहिए, क्योंकि स्यों आपणा मुंह फुलाई रख्हा ऐ, ताकि लोक तिन्हा जो उपवासी जाणें; हांऊ तुस्सा किन्हें सच बोल्हा, कि स्यों आपणा फल पाई चुकिरे । 17 पर जेबे तू प्रार्थना करे ता आपणे मुंडा पर तेल मळ होर मुंह धोई ले । 18 ताकि लोक नी पर तेरा बापू जो परदे मन्झ आ, से तुस्सा जो उपवासी जाणी किन्हें, तेरा बापु जो परदे मन्झ देख्हा, तुजो इनाम देणा । 19 आपणे कठे धरती पर ढब्बे कठे मत करा; जेथी कीडा होर जंग नास करी देहां ऐं; होर जेथी चोर चोरी री ताका मन्झ रैहयां ऐं । 20 पर आपणे वास्ते स्वर्गा मन्झ ढब्बे कठे करा, जेथी ना ता कीडा, होर ना जंग खराब करहा, होर जेथी ना ता चोर चोरी री ताका मन्झ रहे । 21 क्योंकि जेथी तेरे ढब्बे ऐ तेथी तेरा मन भी लगी रैहणा । 22 सरीरा रा दीया हाखिया ई; इधी कठे अगर तेरी हाखिया साफ हो, ता तेरे सारे सरीरा भी चमकदार हूणा । 23 पर अगर तेरी हाखिया खराब हुन्धी, ता तेरे सारा सरीर भी न्ह्यारे मन्झ पई जाणा; इधी कठे से ज्योति जो तुध मन्झ ई अगर से न्ह्यारी हुई जाए, तेबे से न्ह्यारा कितणा बडा हुणा । 24 कोई माहणु दो माल्का री सेउवा नी करी सक्दा, क्योंकि तेस एकी किन्हें दुसमणी होर दुजे किन्हें प्यार रखणा, या तेस एकी किन्हें मिली किन्हें रैहणा होर दूजे जो तेस घटिया समझणा; "तू परमेसरा री होर ढब्बे री दुहीं चीजा री सेउवा नी करी सक्दे" । 25 इधी कठे हांऊ तुस्सा किन्हें सच बोल्हा, कि आपणे प्राणा रे कठे फिकर मत करा कि आस्सा क्या खाणा? होर क्या पीणा? होर ना आपणे सरीरा रे कठे कि क्या पैहनणा? क्या प्राण खाणे ले, होर सरीर कपड़े ले बढी किन्हें नी हाया? 26 सर्गा रे चिडूआ जो देखा! स्यों

ना ता बान्हदे, होर ना काट्हा ऐ, होर ना पेडूआ मन्झ कठा करहा ऐ; फेरी भी तुस्सा रा स्वर्गीय बापू तिन्हा जो खुआहां; क्या तुस्से तिन्हा ले ज्यादा कीमत नी रख्दे । 27 तुस्सा मन्झा ले एहडा कुण आ, जेहडा फिकर करी किन्हें आपणी उम्रा मन्झा ले एक घडी भी बढाई सक्हा ऐं? 28 होर कपड़े रे कठे किधियो फिकर करहा ऐ? जंगली फूला पर ध्यान देआ, कि स्यों किहां बढहा ऐ, स्यों ना ता मैहनत करहा ऐ, ना काट्हा ऐ । 29 फेरी भी हांऊ तुस्सा किन्हें बोल्हा, कि सुलेमाने भी, आपणे सारे राजपाटा मन्झ तिन्हा मंझा ले केसी साहीं भी कपड़े नी पैहनीरे थे । 30 इधी कठे जेबे परमेसरा मैदाना रा घाह, जो आज हाया, होर जो काला आगी मन्झ फुकी देणा, एहडे कपड़े पन्ह्याहां, ता हे कम विस्वास रखणे वाळे विश्वसियो, ता तेस तुस्सा जो एता ले बढी किन्हें कपड़े की नी पन्ह्याणे? 31 इधी कठे तुस्से फिकर करी किन्हें एहडा देख्या बोल्दे, कि आस्सा क्या खाणा, या क्या पीणा या क्या पैहनणा? 32 क्योंकि होर सारे लोक इन्हा सभ चीजा जो तोपदे रैहयां ऐं, होर तुस्सा रा स्वर्गीय बापू जाणहां, कि तुस्सा जो केस चीजा री जरूरत ई । 33 इधी कठे पैहले तुस्से परमेसरा रे राजा री होर धर्मा री खोज करा ता ये सारी चीजा तुस्सा जो मिली जाणी । 34 इधी कठे काला री फिकर मत करा, क्योंकि काल्के ध्याड़ेया आपणी फिकर आपणे आप करी लेणी; आज्के कठे आज्का दुःख बौहत आ ।

7 ¹ दोष मत लगाऊआ, ताकि तुस्सा पर भी दोष नी ल्गाया जाए । ² क्योंकि जिहां तुस्से दोष ल्गाहें, तिहां ई तुस्सा पर भी दोष लगाया जाणा; होर जेस नापा ले तुस्से नाप्टा ऐ, तेता ले ई तुस्सा रे कठे भी नाप्या जाणा । ³ तू किधियो आपणे भाई री हाखिया रे आहले जो देखा, होर आपणी हाखिया रा आहला तुजो नी सुद्धदा? ⁴ होर जेबे तेरे ही हाखिया मन्झ ई आहला आ, ता तू आपणे भाई जो किधियो बोल्हा, कि ल्याऊ हांऊ तेरे हाखिया रा आहला काहडी दूँ । ⁵ ओ कपटी, पैहले आपणी हाखिया रा आहला काहड, तेबे तुध आपणे भाई री हाखिया रा आहला ठीक ढन्गा के देखी किन्हें काहडणा । ⁶ पवित्र चीजा कुत्तेया जो नी देआ, होर आपणे मोती सुअरा रे अगे मत पाऊआ; एहडा नी हो कि स्यों तिन्हा जो पैरा थाले जिके होर पलटवार करी किन्हें तुस्सा जो फाडी दे । ⁷ मान्धगे, ता तुस्सा जो दितेया जाणा; तोपहगे ता तुस्सा पाणा; खटखटान्धे, ता तुस्सा रे कठे खोल्ही दितेया जाणा । ⁸ क्योंकि जो कोई मान्ह्हा, तेस जो मिल्हा; होर जो तोप्टा, से पाहां? होर जो खटखटाहां, तेसरे कठे खोल्या जाणा । ⁹ तुस्सा मन्झ एहडा कुण माहणु हूणा, कि अगर तेसरा म्हुठा तेस ले रोटी मांगे, ता से तेस जो पात्थर दे? ¹⁰ या मच्छी मांगे, होर तेस जो सांप दे? ¹¹ जेबकी तुस्से बुरे हुई किन्हें, आपणे बच्चे जो खरी चीजा देणा जाणहां ऐं, ता तुस्सा रा स्वर्गीय बापू आपणे मांगणे वाळे जो खरी चीजा कि नी देणी?

12 इधी कठे जो कुछ तुस्से चाहें, कि माहणु तुस्सा साउगी करे; तुस्से भी तिन्हा साउगी तेहड़ा ई करा; क्योंकि व्यवस्था होर नबिया री शिक्षा ये ई। 13 संगड़े पैडे ले हुई किन्हें तुस्से अंदर जाऊआ, क्योंकि चौड़ा आ से फाटक होर असान आ से पैंडा जो बरबादी री वखा जो लई जाहां; होर बौहत एहडे ऐ जो तेता ले हुई किन्हें अंदर जाहें। 14 क्योंकि संगड़ा आ से फाटक होर संगड़ा आ से पैंडा जो जिंदगी री तरफ लई जाहां, होर थोहड़े ई हाए जो तेता जो पाई लैहा ऐं। 15 झूठे नबिया ले सावधान रहूआ, जो भेडा री भेषा मन्झ तुस्सा वाले आहूँआं ऐं; पर अन्दरा ले स्यों फाड़नेवाळे भेड़िये ऐ। 16 तिन्हा रे फला ले तुस्सा स्यों पछ्याणी लैणे क्या झाड़िया ले अंगूर, या कांडे ले अंजीर तोड़हा ऐ? 17 एथी तक कि हरेक डाळ खरा फल ल्याहूँआं होर बेकार डाळ गन्दा फल ल्याहूँआं। 18 खरा डाळ गन्दा फल नी ल्याई सकदा, होर ना बेकार डाळ खरा फल ल्याई सकदा। 19 जो जो डाळ खरा फल नी ल्याऊन्दा, तेस जो काट्या होर आगा मंझा पाई दितेया जाहां। 20 इधी कठे तिन्हा रे फला ले तुस्सा स्यों पछ्याणी लैणे। 21 जो मेरे ले, हे प्रभु, हे प्रभु बोलहा, तिन्हा मंझा ले हर एकीया स्वर्गा रे राजा रे अंदर नी जाणा, पर सिर्फ तेस ई जो मेरी इच्छा पर चल्हा। 22 तेस ध्याड़े बौहत लोका मेरे किन्हें बोलणा; हे प्रभु, हे प्रभु, क्या आस्से तेरे नाऊआं ले भविष्यवाणी नी किती, होर तेरे नाऊआं ले दुष्टात्मा नी काहडी, होर तेरे नाऊआं ले बौहत बडे काम नी किते? 23 तेबे मां तिन्हा किन्हें खुल्ही किन्हें बोली देणा कि हांऊ तुस्सा नी जाणदा, हे गन्दे काम करणेवाळयो; मेरे वाले ले चली जाऊआ। 24 इधी कठे जो कोई मेरी ये गल्ला सुणी किन्हें तिन्हा जो मन्हां तेस, तेस बुद्धिमान माहणु साहीं बणना जिने जे आपणा घर चटाना पर बणाया। 25 होर बरखा हुई होर बाढ़ आई; होर आंधी चली; होर तेस घरा पर टक्कर लगी; पर से नी पया, क्योंकि तेस री नींव चटाना पर पाई गईरी थी। 26 पर जो कोई मेरी ये गल्ला सुणहां होर तिन्हा पर नी चल्दा तेस, तेस वेवकूफ माहणु साहीं बणना जिने जे आपणा घर रेता प्र्याहले बणाया। 27 होर बरखा हुई, होर बाढ़ आई; होर आन्धी चली; होर तेस घरा किन्हें टक्कराई होर से पई किन्हें सत्यनाश हुई गया। 28 जेबे यीसू ये गल्ला बोली चुक्या, ता ऐहड़ा हुआ कि भीड़ तेसरे उपदेस सुणी किन्हें हरान हुई गई। 29 क्योंकि से तिन्हा रे साख्नी साहीं नी पर अधिकारी साहीं उपदेश देहां था।

8 1 जेबे से तेस पहाड़ा ले उतरेया, ता एक बडी भारी भीड़ तेसरे पीछे हुई गई। 2 होर देखा, एक कोठी तेस वाले आई किन्हें तेस जो नमस्ते किती होर बोल्या; कि हे प्रभु अगर तू चाहे, ता तू मुंजो ठीक/सुद्ध करी सकहा। 3 यीसूए हाथ अगे करी किन्हें से छुही लया, होर बोल्या, हांऊ चाहां; कि तू सुद्ध हुई जा होर से तिहां ई कोढहा ले सुद्ध हुई गया। 4 यीसूए तेस किन्हें

बोल्या; देख, केसी किन्हें देख्या बोलदा पर जाई किन्हें आपणे आपा जो याजका जो दस होर जो चढ़ावा मूसे तय कितिरा से चढ़ा, ताकि तिन्हा रे कठे गुआही हो। 5 होर जेबे से कफरनहुमा मन्झ आया ता एक सूबेदारे तेस वाले आई किन्हें तेस ले प्रार्थना किती। 6 कि हे प्रभु, मेरा दास घरा मन्झ लकवे री वजहा ले बड़ा भारी दुःखी होर पीड़ा रा मारी रा। 7 तिने तेस किन्हें बोल्या; मां आई किन्हें से ठीक करी देणा। 8 सुबेदारे जबाब दितेया; कि हे प्रभु हांऊ एस लायक नी हाया; कि तू आस्सा रे घरा आये, पर सिर्फ आपणे मुंहा ले बोली दे ता मेरे सेवका ठीक हुई जाणा। 9 क्योंकि हांऊ भी एक दूजे रे अधीन रहणे बाळा माहणु आ; होर स्पाही मेरे हाथा मन्झ ऐ, होर जेबे हांऊ एकी किन्हें बोलहा, जा, ता से चली जाहां; होर दूजे जो बोलहा कि आऊ, ता से आहूँआं; होर आपणे सेवादारा जो बोलहा, कि ये कर, होर से एता जो करहा। 10 ये सुणी किन्हें यीसू जो हरानी हुई, होर जो तेसरे पीछे आऊन्दे लगीरे थे, तिने तिन्हा किन्हें बोल्या; हांऊ तुध किन्हें सच बोलहा, एथी कि मैं इस्राएला मन्झ भी एहड़ा विश्वास नी देख्या। 11 होर हांऊ तुस्सा किन्हें बोलहा, कि पूर्व होर पश्चिमा ले कई लोका आई किन्हें अब्राहम होर इसहाक होर याकूबा साउगी स्वर्गा रे राजा मन्झ बैठणा। 12 पर राज्या री सन्तान बाहर न्ह्यारे मन्झ पाई दिते जाणी: तेथी तिन्हा रोणा पीटणा होर दांद किर्डणे। 13 होर यीसूए सूबेदारा किन्हें बोल्या, जा; जेहड़ा तेरा विश्वास आ, तेहड़ा ई तेरे कठे हुई जाए; होर तेसरा सेवादार तेस ई टैम ठीक हुई गया। 14 होर जेबे यीसू पतरसा रे घरा आया तेबे तिने तेसरी सास बुखारा मंझ पईरी देखी। 15 तिने तेस्सा रा हाथ छुहेआ होर तेस्सा रा बुखार उतरी गया; होर से उठी किन्हें तेसरी सेउआ करदी लगी। 16 जेबे सांझ हुई तेबे तिन्हे कई दुष्टात्मा रे स्ताए बौहत सारे लोक तेस वाले ल्यांदे होर तिने स्यों आपणे वचना रे ज़ीए काढी दिती, होर सभ बमार ठीक करी दिते। 17 ताकि जो वचन यसायाह नबिया रे ज़ीए बोल्या गईरा था से पूरी हो: कि तिने आपणे आप आस्सा री कम्जोरीया लई ली होर आस्सा री बमारीया उठाई दिती। 18 होर जेबे यीसूए आपणे चारो चंहु पासे एक बडी भारी भीड़ देखी ता तिने झीला पार जाणे रा हुक्म दितेया। 19 तेबे एक साख्नीये तेस वाले आई किन्हें बोल्या, हे गुरु, जेथी केथी तुध जाणा, मां तेरे पीछे आऊणा। 20 यीसूए तेस किन्हें बोल्या, लोमड़ीया रे डुआर होर सर्गा रे चिड़ूआ रे कोहल हुहां ऐं; पर माहणु रे पुत्रा रे कठे मूंड रखणे री भी जगह नी हाई। 21 एकी होरी चले तेस किन्हें बोल्या, हे प्रभु, मुंजो पैहले जाणे दे, कि हांऊ आपणे बापू जो दबाई आंऊ। 22 यीसू ये तेस किन्हें बोल्या, तू मेरे पीछे आई जा; होर मुर्देया जो आपणे मुर्दे दबाणे दे। 23 जेबे से किस्ती पर चढ़ी गया, ता तेसरे चले तेसरे पीछे चली गये। 24 होर देखा, झीला मन्झ एक एहड़ा बड़ा तूफान आया

कि किस्ती लैहरा किन्हें ढख्दी लगी; होर से निद्रा मन्झ था ।
 25 तेबे तिन्हे चेले तेस वाले आई किन्हें से जगाया, होर बोल्या,
 हे प्रभु, आस्सा जो बचा, आस्से मरण वाळे ऐ । 26 तिने तिन्हा
 किन्हें बोल्या; हे कम विस्वास रखणे वाळे लोको, तुस्से किधियो
 डरहा ऐ? तेबे तिने उठी किन्हें तूफान पाणी झिडक्या, होर तेथी
 सभ कुछ सांत हुई गया । 27 होर लोक हरान हुई किन्हें बोल्दे
 लगे रे कि ये केहड़ा माहणु आं, कि आन्धी होर पाणी भी तेसरा
 हुक्म मन्हां ऐं । 28 होर जेबे से तेस पार गदरेनियां रे देसा मंझ
 पूजी गया, ता दो माहणु जिन्हा मन्झ जे दुष्टात्मा थी कब्रा ले
 निकळदे हुए तेस जो मिले, जो इतने प्रचण्ड थे, कि कोई भी तेस
 पेंडे ले हुई किन्हें नी जाई सकदा था । 29 होर देखा, स्यों चिल्लाई
 किन्हें बोल्दे लगे; हे परमेसरा रे पुत्र, आस्सा जो तेरे किन्हें क्या
 काम आ? क्या तू आस्सा जो टैमा ले पैहले दुःख देणे रे कठे
 येथी आईरा? 30 होर तिन्हा ले थोहड़ी दूर एक सुअरा रा झुंड
 चरया करहा था । 31 दुष्टात्मे तेस किन्हें ये बोली किन्हें अरज
 किती, जे अगर तू आस्सा जो काढणा चाहां, ता तू आस्सा जो
 सुरा रे झुंडा मन्झ भेजी दे । 32 तिने तेस किन्हें बोल्या, जाऊआ
 होर स्यों निकळी किन्हें सुअरा रे अन्दर चली गई, होर देखा,
 पूरा झुण्ड झप्पटी किन्हें द्राऊआ मन्झ पई गया होर डूबी किन्हें
 मरी गया । 33 तिन्हा रे चरवाहे भगी गए होर नगरा मन्झ जाई
 किन्हें तिन्हे ये सारी गल्ला होर जिन्हा मन्झ जे दुष्टात्मा थी
 तिन्हा रा सारा हाल सुणाया । 34 होर देखा, सारे नगरा रे लोक
 निकळी किन्हें यीसू किन्हें मिले आये होर तेस जो देखी किन्हें
 तिन्हे अरज किती, कि आस्सा रे लाके ले बाहार चली जा ।

9 1 से किस्ती पर बैठी किन्हें पार चली गया; होर से आपणे
 नगरा जो आई गया । 2 होर देखा, कुछ लोके एक लकवे
 रा मरीज मांजे प्र्याहले रखी किन्हें तेस वाले ल्यांदेआ; यीसूए
 तिन्हारा विस्वास देखी किन्हें लकवे रे मरीजा किन्हें बोल्या; हे
 "मेरे बच्चे, हिम्मत रख तेरे पाप माफ़ हुई गये" 3 होर देखा, कई
 सास्त्रिये सोच्या, कि ये ता परमेसरा री बेज्जती करहा । 4 यीसूए
 तिन्हा री मना री गल्ला जाणी किन्हें बोल्या, कि तुस्से लोक
 आपणे आपणे मना मन्झ बुरा विचार किधियो करेया करहा
 ऐ? 5 क्योंकि असान क्या आ, ये बोलणा, कि तेरे पाप क्षमा हुई
 गए; या ये बोलणा कि उठ होर चल्दा फिरदा लगी जा । 6 पर
 इधी कठे कि तू जाणी ले कि माहणु रे पुत्रा जो धरती पर पाप
 माफ़ करणे रा हक मिलिरा । "तेबे तिने तेस लकवे रे रोगी किन्हें
 बोल्या, "उठ आपणा मांजा चक, होर आपणे घरा जो चली जा ।"
 7 से उठी किन्हें आपणे घरा जो चली गया । 8 लोक ये देखी किन्हें
 डरी गये होर परमेसरा री महिमा करदे लगे, जिने माहणुआ
 जो एहड़ा हक दितिरा । 9 तेथी ले अगे बड़ी किन्हें यीसूए मन्ती
 नांऊआं रे एक माहणु जो, चुंगी री चौकी पर बैठीरे देख्या, होर
 तिने तेस किन्हें बोल्या, मेरे पीछे आऊ । से उठी किन्हें तेसरे पीछे

चली पया । 10 फेरी एहड़ा हुआ जेबे से घरा मन्झ खाणा खांदे
 बेठिरा था, ता देखा बौहत चुंगी लैणे वाळे होर पापी आई किन्हें
 यीसू होर तेसरे चेले साउगी खाणा खांदे लगे । 11 ये देखी किन्हें
 फरीसिये तेसरे चेले किन्हें बोल्या; तुस्सा रा गुरू चुंगी लैणेवाळे
 होर पापिया साऊगी किधियो खाहां? 12 तिने ये सुणी किन्हें
 तिन्हा किन्हें बोल्या, बैदा री जरूरत भले चंगे जो नी हुन्दी पर
 तिन्हा जो हुहां ई स्यों जे बमार ऐ । 13 इधी कठे तुस्से जाई
 किन्हें एता रा मतलब सीखी लऊआ, कि हांऊ बलिदान नी पर
 दया चाहां; क्योंकि हांऊ धर्मिया जो नी पर पापिया जो साददे
 आईरा । 14 तेबे यहुन्ना रे चेले तेस वाले आई किन्हें बोल्या; क्या
 वजहा ई कि आस्से होर फरीसी उपवास करहा ऐ, पर तेरे चेले
 उपवास नी करदे? 15 यीसूए तिन्हा किन्हें बोल्या; क्या बराती,
 जेबे तक लाड़ा तिन्हा साउगी आ दुःखी हुई सकहा ऐ? पर स्यों
 ध्याडे आऊणे जेबे लाड़ा तिन्हा ले दूर कितेया जाणा, तेस टैम
 तिन्हा उपवास करणा । 16 नंऊऐं कपडे री टाहली पूराणे कपडे
 पर कोई नी लगान्दा क्योंकि से टाहली तेस कपडे मंझा ले कुछ
 ना कुछ खिन्जी लैंहां ई होर से होर ज्यादा फटी जाहां । 17 होर
 नऊआं दाखरस पुराणी मस्का मन्झ नी भरदे; क्योंकि एहड़ा
 करणे ले मस्का फटी जाहीं; होर दाखरस खिंडही जाहां होर
 मस्का टूटी जाहां ई, पर नऊआं दाखरस नौई मस्का मन्झ भरहा
 ऐ होर स्यों दुहें बची रहीं । 18 से तिन्हा किन्हें यूँआं गल्ला करेया
 ई करहा था, कि देखा, एक मुखिए आई किन्हें तेस जो प्रणाम
 कितेया होर बोल्या, मेरी म्हठी एभे मरी; पर तुस्से चली किन्हें
 आपणा हाथ तेस्सा पर रखी दे, ता तेस्सा जिउंदे हुई जाणा ।
 19 यीसू उठी किन्हें आपणे चेले साउगी तेसरे पीछे चली पया ।
 20 होर देखा, एक जनाने जेस्सा जो जे बारा साला ले खून बैहणे
 री बमारी थी, तेस्से तेसरे पीछे आई किन्हें तेसरे कपडे छुही लये
 । 21 से आपणी मना मन्झ बोल्हा ई थी कि अगर हांऊ सिर्फ तेसरे
 कपडे जो छुही लैहन्धी ता मां ठीक हुई जाणा । 22 यीसूए मुडी
 किन्हें तेस्सा जो देखी किन्हें बोल्या; म्हठीए हिम्मत रख; तेरे
 विस्वासे तू ठीक करी दिती । होर से जनाने तेस ई टैम ठीक
 हुई गई । 23 जेबे यीसू तेस मुखिए रे घरा पूज्या ता तिने बौसरी
 बजाणे वाळे होर भीड़ा जो हाला पांदे देख्या । 24 तेबे तिने तेस्सा
 किन्हें बोल्या, हटी जाऊआ, म्हठी नी मरीरी; पर सुत्तिरी; ये
 सुणी किन्हें स्यों हास्दे लगे । 25 पर जेबे भीड़ बाहर निखळी
 गई, ता तिने अन्दर जाई किन्हें म्हठी रा हाथ पकड़ेया, होर से
 जिउंदी हुई गई । 26 ये गल सारे देसा मन्झ फैल्ही गई । 27 जेबे
 यीसू तेथी ले अगे बढ़ेया, ता दो काणे तेसरे पीछे ये बोल्दे हुए
 चले, कि हे दाऊदा री सन्तान, आस्सा पर दया कर । 28 जेबे
 से घरा पूजी गया, ता स्यों काणे तेस वाले आये; होर यीसूए
 तिन्हा किन्हें बोल्या क्या तुस्सा जो विस्वास आ, कि हांऊ ये
 करी सकहा? तिन्हे तेस किन्हें किन्हें बोल्या; हां प्रभु । 29 तेबे

तिने तिन्हारी हाखिया छुही किन्हें बोल्या, तुस्सा रा विस्वासा रे मुताबक तुस्सा रे कठे हुई जाए।³⁰ होर तिन्हा री हाखिया खुलही गई होर यीसूए तिन्हा जो खबरदार करी किन्हें बोल्या; खबरदार, केसी जे एस गल्ला रे बारे मन्झ पता नी चले।³¹ पर तिन्हे निकळी किन्हें सारे देसा मन्झ तेसरा नांऊ फैल्हाई दितेया।³² जेबे स्यों बाहर जाया करहा ऐ थे, ता देखा, लोक एक गूंगे जो जेस मन्झ जे दुष्टात्मा थी तेस वाले लई आए।³³ होर जेबे दुष्टात्मा काढही दिती गई, ता गूंगा बोलदा लगी गया; होर भीड़ हरान हुई किन्हें बोलदी लगी कि इस्राएला मन्झ कधी एहड़ा नी देख्या गया।³⁴ पर फरीसिये बोल्या, ये ता दुष्टात्मा रे मुखिया रे ज्रीए दुष्टात्मा जो काढहा।³⁵ होर यीसू सारे नगरा होर गांऊआं मन्झ फिरदा रैहया होर तिन्हा री बैठका मन्झ उपदेस करदा, होर राजा रा सुसमाचार प्रचार करदा, होर कई किस्मा री ब्मारी होर कम्जोरी जो दूर करदा रैहया।³⁶ जेबे तिने भीड़ देखी ता तेबे तेस जो लोका पर तरस आया, क्योकि स्यों तिन्हा भेडा साहीं थे जिन्हा रा जे कोई रखवाळा नी हो, स्यों दुःखी होर भटकीरे थे।³⁷ तेबे तिने आपणे चेल्या किन्हें बोल्या, पक्किरी डोहरिया ता बौहत ई पर काम करणे वाले मजदूर थोहड़े ऐ।³⁸ इधी कठे डोहरिया रे माल्का ले बिनती करा कि स्यों फसल कटाई रे कठे मजदूर भेजी दे।

10 ¹ तेबे यीसूए आपणे बारा चले आपु वाले सादे, होर तिने तिन्हा जो बुरी आत्मा काढणे रा हक दितेया, कि तिन्हा जो काढहे होर हर किस्मा री ब्मारिया होर कम्जोरिया जो ठीक करे।² होर बारा प्रेरिता रे नांऊ एहड़े ऐ; पैहला समौन, जेस जो जे पतरस भी बोल्ला ऐ, होर तेसरा भाई अन्द्रियास; जब्दी रा म्हठा याकूब, होर तेसरा भाई यहूना; ³ फिलिप्पुस होर बर-तुल्मै थोमा होर चुंगी लैणे वाळा मत्ती, हल्फई रा म्हठा याकूब होर तद्दे। ⁴ समौन कनानी, होर यहूदा इस्करियोति, जिने जे से पकड़वाई भी दितेया।⁵ इन्हा बारा प्रेरिता जो यीसूए ये हुक्म देई किन्हें भेज्या कि अन्यजातिया री तरफ देख्या जांदे, होर ना सामरिया रे केसी भी नगरा रे अंदर देख्या जांदे।⁶ पर इस्राएला रे घराने री गुआही री भेडा वाले चली जाया।⁷ होर जांदे जांदे एहड़ा प्रचार करा कि स्वर्गा रा राज नेडे आई गईरा।⁸ रोगिया जो ठीक करा; मुर्देया जो जिउंदा करा; कोढीया जो सुद्ध करा: दुष्टात्माओ जो काढहा; तुस्सा जो मुफ्त मिलिरा, तुस्से भी मुफ्त देया।⁹ आपणे बटुए मन्झ ना ता सोना, ना चाँदी, होर ना तांबा रखणा।¹⁰ रस्ते रे कठे ना ता झोळा रखा, ना दो कुरते, ना बूट ना डंडा, मजदूरा जो आपणा खाणा मिलणा चहिए।¹¹ जेस केसी नगरा या गांऊआं मन्झ तुस्से जाहन्वे ता पता करा कि तेथी कुण इज्जतदार माहणु आ? होर जेबे तक तेथी ले नी जाओ, तेसरे घरा ई रैहया।¹² होर घरा अंदर जांदे हुए तेस जो आशीष देया।¹³ अगर तेस घरा रे लोक लायक हुन्वे ता

तुस्सा री सांति घरा पर बणी रैहणी पर अगर स्यों एस लायक नी हो ता तुस्सा री सांति तुस्सा वाले वाप्स पूजी जाणी।¹⁴ होर जो कोई तुस्सा जो नी मन्ने, होर तुस्सा री गल्ला नी सुणें ता तेस घरा या तेस नगरा ले निकळदे हुए आपणे पैरा री धूल झाड़ी देया।¹⁵ हांऊ तुस्सा किन्हें सच बोल्ला, कि न्याय रे ध्याडे तेस नगरा री हालत सदोम होर अमोरा रे देसा री हालता ले ज्यादा सैहणे लायक हुणी।¹⁶ देखा, हांऊ तुस्सा जो भेडा साहीं भेड़िया रे बीचा मन्झ भेज्हा, सांपा साहीं बुदिमान होर कबूतरा साहीं भोळे बणा।¹⁷ पर लोका ले सावधान रैहया, क्योकि तिन्हा तुस्से महासभा मन्झ लई जाणे, होर आपणी पंचायता मन्झ तुस्सा जो कोड़े मारणे।¹⁸ तुस्से मेरे कठे हाक्मा होर राजा रे साम्हणे तिन्हा पर, होर अन्यजातिया पर गवाह हूणे कठे पौहुन्चाये जाणे।¹⁹ जेबे स्यों तुस्सा जो पकड़वाये ता ये फिकर मत करदे, कि आस्सा किहां होर क्या बोलणा: क्योकि जो कुछ तुस्सा जो बोलणा हुन्हा, से तेस ई टैम तुस्सा जो दसी दितेया जाणा।²⁰ क्योकि बोलणेवाळे तुस्से नी ऐ पर तुस्सा रे पिता री आत्मा तुस्सा मन्झ हुई किन्हें बोल्ला ई।²¹ भाईया, भाई जो होर बाबा बच्चेया जो, मारणे रे कठे सौंपी देणे, होर बाल बच्चेया माऊ बाबा रे विरोधा मन्झ उठी किन्हें स्यों मरवाई देणे।²² मेरे नांऊआं री वजहा ले सभ लोका तुस्सा किन्हें बैर रखणा, पर जो आखरी तक सब्र रखघा तेसरा ई उद्धार हूणा।²³ जेबे स्यों तुस्सा जो एक नगरा मन्झ स्ताए, ता दूजे नगरा जो भगी जाया। हांऊ तुस्सा किन्हें सच बोल्ला, तुस्सा इस्राएला रे सारे नगरा मन्झ घूमणा पूरा नी करी पाणा कि माहणु रे पुत्रा आई जाणा।²⁴ चेला आपणे गुरु ले बड़ा नी हुंदा; होर ना दास आपणे स्वामी ले।²⁵ चले रा गुरु रे, होर दासा रे स्वामी रे बराबर हूणा ई बौहत आ; जेबे तिन्हे घरा रे स्वामी जो सैतान बोल्ला ता तेसरे घरवाळेया जो क्या कुछ नी बोलणा? ²⁶ इधी कठे तिन्हा ले मत डरणा, क्योकि कुछ ढखिरा नी आ; जो खोल्ला नी जाणा; होर ना कुछ छिपीरा, जेसरा पता नी चली पाणा।²⁷ जो हांऊ तुस्सा किन्हें न्ह्यारे मन्झ बोल्ला, तुस्से तेता जो प्रयासे मन्झ बोला; होर जो तुस्से कानो कान सुणहां ऐं, तेता जो छता प्रयाहले ले प्रचार करा।²⁸ जो सरीरा जो मारहा ऐ, पर आत्मा जो नी मारी सकदे, तिन्हा ले मत डरदे; पर तेस ले डरा, जो आत्मा होर सरीर दुहीं जो नरका मन्झ नास करी सकहा।²⁹ क्या एक पैसे मन्झ दो चिड़िया नी बिकदी? तेबे भी तुस्सा रे पिता री इच्छा रे बगैर तिन्हा मंझा ले एक भी जमीना पर नी पई सकदी।³⁰ तुस्सा रे मूंदा रे बाळ भी सारे गिणीरे।³¹ इधी कठे, डरा नी; तुस्से बौहत चिड़िया ले बढी किन्हें ऐ।³² जो कोई माहणु रे साम्हणे मुंजो मन्नी लैहन्वा से मां भी आपणे स्वर्गीय पिता रे साम्हणे मन्नी लैणा।³³ पर जो कोई माहणु रे साम्हणे मेरा इनकार करघा ता मां भी आपणे स्वर्गीया पिता

रे साम्हणे तेसरा इनकार करणा । ³⁴ ये नी समझा, कि हांऊ धरती पर मिलाप करणे रे कठे आईरा; हांऊ मिलाप करणे रे कठे नी; पर तलवार चलाणे रे कठे आईरा । ³⁵ हांऊ ता आईरा; कि माहणु जो तेसरे बाबा ले, होर म्हठी जो तेस्सा री माऊआ ले, होर बुहआ जो तेस्सा री सासा ले लग करी दूं । ³⁶ माहणु रे दुस्मण तेसरे घरा रे ई लोक हुणे । ³⁷ जो माऊ या बाबा जो मेरे ले ज्यादा प्यारा जाणहां, से मेरे लायक नी आ होर जो म्हठे या म्हठी जो मेरे ले ज्यादा प्यारा जाणहां, से मेरे लायक नी हाया । ³⁸ होर जो आपणा क्रूस लई किन्हें मेरे पीछे नी चले से मेरे लायक नी आ । ³⁹ जो आपणा प्राण बचाहां, से तेस गुआई देणा; होर जो मेरी वजहा ले आपणा प्राण गुआहां; से तेस जो मिलणा । ⁴⁰ जो तुस्सा जो ग्रहण करहा, से मुंजो ग्रहण करहा; होर जो मुंजो ग्रहण करहा, से मेरे भेजणे वाळे जो ग्रहण करहा । ⁴¹ जो नबिया जो नबी जाणी किन्हें ग्रहण करे, तेस नबी रा फल पाणा; होर जो धर्मी जाणी किन्हें धर्मी जो ग्रहण करे, तेस धर्मी रा फल पाणा । ⁴² जो कोई इन्हा छोटेया मंझा ले एकी जो मेरा चेला जाणी किन्हें सिर्फ एक कटोरा ठंडा पाणी पियाए, हांऊ तुस्सा किन्हें सच बोल्हा; तेस केसी भी तरीके ले आपणा फल नी गुआणा ।

11 ¹ जेबे यीसू आपणे बारा चेले जो हुक्म देई चुक्या, ता से तिन्हा रे नगरा मन्झ उपदेस होर प्रचार करणे रे कठे तेथी ले चली गया । ² यहुन्ने जेहला मन्झ मसीहा रे कामा रा सुसमाचार सुणी किन्हें आपणे चेले जो तेस ले ये पूछणे रे कठे भेज्या । ³ कि क्या आऊणेवाळा तू ई आ: या आस्से केसी होरी रा इंतजार करे? ⁴ यीसूए जबाब दितेया, कि जो कुछ तुस्से सुणहां ऐं होर देख्हा ऐ, से सभ जाई किन्हें यहुन्ने किन्हें बोली देआ । ⁵ कि काणे देख्हा ऐ होर लंगडें चल्हा फिरहा ऐ; कोढी सुद्ध किते जाहें होर टौणे सुणहां ऐं, मुर्देया जो जिउंदा कितेया जाहां; होर गरीबा जो सुसमाचार सुणाया जाहां । ⁶ होर भागा वाळे ऐ स्यों, जो मेरी वजहा ले ठोकर नी खाये । ⁷ जेबे स्यों तेथी ले चली गये, ता यीसू यहुन्ना रे बारे मन्झ लोका किन्हें बोल्दा लग्या; तुस्से जंगल्ला मन्झ क्या देख्दे गईरे थे? क्या हवा किन्हें हल्दे लगीरे सरकंडे जो । ⁸ फेरी तुस्से क्या देख्दे गईरे थे? देखा, जो नरम कपडे पैन्हां ऐं, स्यों राजभवना मन्झ रैहयां ऐं । ⁹ ता फेरी किधियो गईरे थे? क्या केसी नबी जो देखणे रे कठे? हां; हांऊ तुस्सा किन्हें बोल्हा, कि एक नबी ले भी बडे जो । ¹⁰ ये से ई आ, जेसरे बारे मन्झ लिखिरा, कि देख, हांऊ आपणे दूता जो तेरे अगे भेज्हा, जेस तेरे अगे तेरे कठे पैंडा त्यार करणा । ¹¹ हांऊ तुस्सा किन्हें सच बोल्हा, कि जो जनानिया ले जम्मिरे; तिन्हा मंझा ले यहुन्ना बपतिस्मा देणेवाळे ले कोई बडा नी हुआ; पर जो स्वर्गा रे राजा मन्झ छोटे ले छोटा आ से तेस ले बडा आ । ¹² यहुन्ना बपतिस्मा देणेवाळे रे ध्याड़े ले एबे

तक स्वर्ग रे राजा पर जोर हुन्दा रैहया, होर ताकतवर तेता जो जबरदस्ती करी किन्हें लई लैहां ऐं । ¹³ यहुन्ना तक सारे नबी होर व्यवस्था भविष्यवाणी करदे रहे । ¹⁴ होर चाहे तुस्से मना, एलिय्याह जो आऊणेवाळा था, से ये ई आ । ¹⁵ जेसरे सुणने रे कान हो; से सुणी ले । ¹⁶ हांऊ एस्सा पीढी रे लोका री तुलना केस किन्हें करूं? स्यों तिन्हा बालका साहीं ऐं, जो बजारा मन्झ बैठी किन्हें एक दूजे किन्हें बोल्हा ऐ । ¹⁷ कि आस्से तुस्सा रे कठे बाँसरी बजाई, और तुस्से नी नाचे; आस्से रोये होर तुस्से छाती नी पिटी । ¹⁸ क्योंकि यहुन्ना ना खान्दा आया होर ना पीन्दा, होर स्यों बोल्हा ऐ कि तेस मन्झ दुष्टात्मा ई । ¹⁹ माहणु रा पुत्र खांदा पीन्दा आया, होर स्यों बोल्हा ऐ कि देखा, पेटू होर पियक्कड़ माहणु, चुंगी लैणेवाळा होर पापिया रा दोस्त; पर बुद्धि आपणे कामा मन्झ सच्ची ठैहराई गईरी । ²⁰ तेबे से तिन्हा नगरा जो धिकारदा लग्या, जिन्हा मन्झ तिने भतेरे सामर्था रे काम कितरे थे; क्योंकि तिन्हे आपणा मन नी फिराई रा था । ²¹ हाय, खुराजीन; हाय, बैतसैदा; जो सामर्था रे काम तुस्सा मन्झ किते गए । अगर स्यों सुर होर सैदा मन्झ किते जांदे, ता स्यों टाट ढखी किन्हें, होर सुआही मन्झ बैठी किन्हें, स्यों केभ्के मन फिराई लैंदे । ²² पर हांऊ तुस्सा किन्हें बोल्हा; कि न्याया रे ध्याड़े तुस्सा री दसा सूर होर सैदा री दसा ले ज्यादा सैहणे लायक हुणी । ²³ हे कफरनहूम, क्या तू स्वर्गा तक ऊंचा कितेया जाणा? तू ता अधोलोका तक निचे कितेया जाणा; जो सामर्था रे काम तुस्सा मन्झ किते गईरे, अगर सदोमा मन्झ किते जांदे, ता से आज तक स्वामत बणी रैहन्दा ²⁴ पर हांऊ तुस्सा किन्हें बोल्हा; कि न्याया रे ध्याड़े तेरी दसा ले सदोमा रे देसा री दसा ज्यादा सैहणे लायक हुणी । ²⁵ तेस ई टैम यीसूए बोल्या, हे पिता, स्वर्गा होर धरती रे प्रभु; हांऊ तेरा धन्यवाद करहा ; कि तुस्से यूँआं गल्ला ज्ञानीयां होर समझदारा ले ल्कोई किन्हें रखी, होर बालका पर जाहिर किती । ²⁶ हां; हे पिता, क्योंकि तुस्सा जो ये ई खरा लग्या । ²⁷ मेरे पिते मुंजो सब कुछ दितीरा, होर कोई पुत्रा जो नी जाणदा, सिर्फ पिता; होर कोई पिता जो नी जाणदा, सिर्फ पुत्र होर से जेस पर पुत्र तेस जो जाहिर करणा चाहे । ²⁸ हे सभ मैहनत करणे वाळो होर बोझा किन्हें दभीरे लोकों, मेरे वाले आऊआ; मां तुस्सा जो अराम देणा । ²⁹ मेरा जुआ आपणे ऊपर चकी लऊआ; होर मेरे ले सिखा; क्योंकि हांऊ नम्र होर मना मन्झ दीन आ; होर तुस्सा आपणे मना मन्झ अराम पाणा । ³⁰ क्योंकि मेरा जुआ असान होर मेरा बोझ हल्का आ ।

12 ¹ तेस टैम यीसू सब्ता रे ध्याड़े डोहरीया मंझा ले हुई किन्हें जाया करहा था, होर तेसरे चेले जो भूख लगी, इधी कठे स्यों बाला तोडी तोंडी किन्हें खांदे लगे । ² फरीसिये ये देखी किन्हें तेस किन्हें बोल्या, देख तेरे चेले एहडा काम करेया करहा ऐ, जो सब्ता रे ध्याड़े करणा ठीक नी आ । ³ तिने तिन्हा

किन्हें बोल्यो; क्या तुस्से नी पढ़ेया, कि दाऊदे, जेबे से होर तेसरे दोस्त भूखे थे तिन्हे क्या कितेया? 4 से परमेसरा रे घरा किधियो गया, होर चढ़ाई री रोटिया खाहदी, तिन्हा जो खाणा ना ता तेसरे कठे होर ना तेसरे दोस्ता रे कठे, पर सिर्फ याज्का रे कठे ठीक था? 5 या तुस्से व्यवस्था मन्झ नी पढ़ेया, कि याजक सब्ता रे ध्याड़े मन्झा मन्झ सब्ता रे ध्याड़े री विधि जो तोड़णे पर भी निर्दोष ठैहरा ऐ। 6 पर हांऊ तुस्सा किन्हें सच बोल्ला, कि येथी से आ, जो मन्झा ले भी बड़ा आ। 7 अगर तुस्से एता रा मतलब जाणदे कि हांऊ दया ले खुस आ, बलि ले नी, ता तुस्से निर्दोषा जो दोषी नी ठैहरांदे। 8 माहणु रा पुत्र ता सब्ता रे ध्याड़े रा भी प्रभु आ। 9 तेथी ले चली किन्हें से तिन्हा री सभा रे घरा मन्झ आया। 10 होर देखा, एक माहणु था, जेस रा हाथ सुकिरा था; होर तिन्हे तेस पर दोष लगाणे रे कठे तेस ले पूछेया, कि क्या सब्ता रे ध्याड़े ठीक करणा सही आ? 11 तिने तिन्हा किन्हें बोल्यो; तुस्सा मन्झ एहड़ा कुणहां, जेस री जे एक भेड हो, होर से सब्ता रे ध्याड़े गढ़े पई जाए, होर से तेस्सा जो पकड़ी किन्हें बाहर नी काढ़े? 12 भला, माहणु री कीमत भेडा ले कितनी बड़ी किन्हें ई; इधी कठे सब्ता रे ध्याड़े भलाई करणा ठीक आ; तेबे तिने तेस माहणु किन्हें बोल्यो, आपणा हाथ अगे कर। 13 तिने आपणा हाथ अगे कितेया, होर से हाथ दूजे हाथा साहीं खरा हुई गया। 14 तेबे फरीसिये बाहर जाई किन्हें तेसरे ब्रोधा मन्झ सलाह किती, कि तेस जो किहां खत्म करे। 15 ये जाणी किन्हें यीसू तेथी ले चली गया; होर बौहत लोक तेसरे पीछे हुई गये; होर तिने सभ ठीक करी दिते। 16 होर तिने स्यों खबरदार किते, कि स्यों तेस जो जाहिर नी करे। 17 कि जो वचन यसायाह नबी रे ज्रीए बोल्यो गईरा था, से पूरा हो। 18 कि देखा, ये मेरा दास आ, जो मैं चुणिरा; मेरा प्यारा, जेस ले मेरा मन खुस आ: मां आपणा आत्मा तेस अंदर पाई देणा; होर तेस अन्यजातिया जो न्याया रा समाचार देणा। 19 तेस ना झगडा करणा, होर ना धूम मचाणी; होर ना बजारा मन्झ केसिया तेसरी अवाज सुणनी। 20 तेस कुल्ली रे सरकंडे नी तोड़णे; होर धुँआ छाडदी हुई बती नी बुझाणी, जेबे तक न्याय प्रबल नी हुई जाए। 21 होर अन्यजातिया तेसरे नांऊआं पर आस रखणी। 22 तेबे लोके एक काणे होर टाटे जो जेस मन्झ जे दुष्टात्मा थी, तेस वाले ल्यान्देया; होर तिने से ठीक कितेया; होर से टाटा बोल्ला होर देख्दा लग्या। 23 एता पर सभ लोक हरान हुई किन्हें बोल्ले लगे, क्या ये दाऊदा री सन्तान ई? 24 पर फरीसिये ये सुणी किन्हें बोल्यो, ये ता दुष्टात्मा रे मुखिया री सहायता रे बगैर दुष्टात्मा जो नी काढ़ा। 25 तिने तिन्हारे मना री गल्ला जाणी किन्हें तिन्हा किन्हें बोल्यो; जेस केसी राजा मन्झ फूट पई जाहीं, से उजड़ी जाहां, होर जेस केसी नगरा या घराने मन्झ फूट पई जाहीं, तेस नी टिकणा। 26 होर अगर सैतान ई सैताना जों काढ़े, ता

से आपणा ही ब्रोधी विरोधी हुई गया; फेरी तेसरा राज किहां बणी रही सक्हा। 27 भला, अगर हांऊ सैताना री सहायता ले दुष्टात्मा जो काढ़हा, ता तुस्सा रे वंस केस री सहायता ले काढ़हा ऐ? इधी कठे तिन्हा ई तुस्सा रा न्याय करणा। 28 पर अगर हांऊ परमेसरा री आत्मा री सहायता ले दुष्टात्मा जो काढ़हा, ता परमेसरा रा राज तुस्सा रे बीचा मन्झ आई पुजीरा। 29 या किहां कोई माहणु केसी ताकवर माहणु रे घरा मन्झ घुसी किन्हें तेसरी चीजा लुटी सक्हा जेबे तक कि पैहले तेस ताकवरा जो नी बान्ही ले? होर तेबे तेस तेसरा घरा लुटी लैणा। 30 जो मेरे साउगी नी आ, से मेरे ब्रोधा मन्झ आ; होर जो मेरे साउगी कठा नी करदा, से खिंडहा। 31 इधी कठे हांऊ तुस्सा किन्हें बोल्ला; कि माहणु रा सब किस्मा रा पाप होर बेज्जती माफ किती जाणी, पर आत्मा री बेज्जती माफ नी किती जाणी। 32 जो कोई माहणु रे पुत्रा रे ब्रोधा मन्झ कोई गल बोल्लगा, तेसरा ये आपराध माफ कितेया जाणा, पर जो कोई पवित्र आत्मा रे ब्रोधा मन्झ कुछ बोल्लगा, तेसरा आपराध ना ता एस लोका मन्झ होर ना परलोका मन्झ माफ कितेया जाणा। 33 अगर डाळा जो खरा बोलो, ता तेसरे फला जो भी खरा बोला; या डाळा जो निकम्मा बोलो; ता तेसरे फला जो भी बुरा बोला; क्योकि डाळ फला ले ई पछ्याणा जाहां। 34 हे सांपा रे बच्चेयो; तुस्से बुरे हुई किन्हें किहां खरी गल्ला बोली सक्हा ऐ? क्योकि जो मना मन्झ भहरी रा, से ई मुंहा पर आई जाहां। 35 खरा, माहणु आपणे मना रे खरे भण्डार ले खरी गल्ला काढ़हा; होर बुरा माहणु आपणे बुरे भण्डार ले बुरी गल्ला काढ़हा। 36 होर हांऊ तुस्सा किन्हें बोल्ला; कि जो जो निकम्मी गल्ला माहणु बोल्लगे, न्याय रे ध्याड़े तिन्हा हर एक गल्ला रा लेखा देणा। 37 क्योकि तूध आपणी गल्ला री वजहा ले ई निर्दोष होर आपणी गल्ला री वजहा ले ई दोषी बणना। 38 एता पर कितने सास्त्रिये होर फरीसिये तेस किन्हें बोल्यो, हे गुरू, आस्से तुस्सा ले एक चिन्ह या चमत्कार देखणा चाहें। 39 तिने तिन्हा जो जबाब दितेया, कि एस युगा रे बुरे होर व्यभिचारी लोक चिन्ह या चमत्कार तोप्ला ऐ; पर योना नबी रे चिन्हा जो छाडी किन्हें कोई होर चिन्ह तिन्हा जो नी दितेया जाणा। 40 योना तीन रात होर तीन ध्याड़े मछली रे पेटा मन्झ रह्या, तीहां ई माहणु रे पुत्रा तीन रात होर तीन ध्याड़े धरती रे अंदर रहणा। 41 नीनवे रे लोका न्याय रे ध्याड़े एस्सा पीढ़ी रे लोका साउगी उठी किन्हें स्यों दोषी ठैहराणे, क्योकि तिन्हे योना रा प्रचार सुणी किन्हें, मन फिराया होर देखा, ऐथी से आ जो योना ले बडा आ। 42 दक्षिणा री राणीया न्याय रे ध्याड़े एस्सा पीढ़ी रे लोका साउगी उठी किन्हें स्यों दोषी ठैहराणे, क्योकि से सुलैमाना रा ज्ञान सुणने रे कठे धरती री छोरा ले आई, होर देखा, एथी से आ जो सुलैमाना ले भी बडा आ। 43 जेबे बुरी आत्मा माहणु मन्झा ले निकळी जाहीं,

ता सुकी जगहा मन्झ अराम टोल्हा ई, होर पांदी नी।⁴⁴ तेबे से बोल्हा ई, कि मां आपणे तेस घरा मन्झ जेथी ले हांऊ निकळी री थी, वाप्स चली जाणा, होर से आई किन्हें तेस जो खाली, झाडा- बुहारा होर सजा सजाया पाहीं।⁴⁵ तेबे से जाई किन्हें आपणे ले होर बुरी सात आत्मा जो आपणे साउगी लई आहूँआं ई, होर से तेस अंदर आई किन्हें तेथी रैहयां ई, होर तेस माहणु री पिछली दसा पैहले ले भी बुरी हुई जाहीं; एस्सा पीढी रे बुरे लोका री दसा भी एहडी ई हुणी।⁴⁶ जेबे से भीडा किन्हें गल्ला करदा ई लगीरा था, ता देखा, तेसरी माऊ होर भाई बाहर खहड़ी रे थे, होर तेस किन्हें गलबात करणा चाहें थे।⁴⁷ केसीए तेस किन्हें बोल्या; देख तेरी माऊ होर तेरे भाई बाहर खहड़ी रे, होर तेरे किन्हें ले गलबात करणा चाहें।⁴⁸ ये सुणी किन्हें तिने तेस बोलणे वाळे जो जबाब दितेया; कुण ई मेरी माऊ? ⁴⁹होर कुणहें मेरे भाई? होर तिने आपणे चेले वखा जो आपणे हाथ करी किन्हें बोल्या; देखा, मेरी माऊ होर मेरे भाई ता यूँआं ऐं।⁵⁰ क्योंकि जो कोई मेरे स्वर्गीय पिता री इच्छा पर चले, से ई मेरा भाई होर बैहण होर माऊ ई।

13 ¹तेस ई ध्याडे यीसू घरा ले निकळी किन्हें झीला रे बाहडे जाई किन्हें बैठी गया।² होर तेस वाले इतनी भीड़ कठी हुई कि से किस्ती पर सवार हुई गया, होर सारी भीड़ बाहडे खहड़ी री रही।³ होर तिने तिन्हा किन्हें दृष्टान्ता मन्झ बौहत गल्ला बोली, कि देखा, एक बाहणे वाळा बेजा बाहणे रे कठे निकळेया।⁴ बाहन्दे टैम कुछ बीज पेंडे रे बाहडे पये होर चिड़ूए आई किन्हें स्यों चुगी लये।⁵ कुछ गट्टे वाळी जमीना पर पये, जेथी तिन्हा जो भरपुर माटा नी मिल्या होर गैहराई मन्झ माटा नी मिलणे री वजहा ले स्यों जल्दी जम्मी गये।⁶ पर सूरज निकळदे ही स्यों भुर्हर्डी गये, होर जड नी पकड़णे री वजहा ले स्यों सुकी गये।⁷ कुछ झाड़िया मन्झ पई गये, होर झाड़िये बढी किन्हें स्यों दबाई दिते।⁸ पर कुछ बांकी जमीना पर पये, होर फल दिते, केसीए सौ गुणा, केसीए साठ गुणा, केसीए तीह गुणा।⁹ जेस रे कान हो से सुणी ले।¹⁰ होर चले तेस वाले आई किन्हें तेस किन्हें बोल्या, तू तिन्हा किन्हें दृष्टान्ता मन्झ किधियो गल्ला करहा ?¹¹ तिने जबाब दितेया, कि तुस्सा जो स्वर्गा रे राजा रे भेदा री समझ दितरी, पर तिन्हा जो नी।¹² क्योंकि जेस वाले हाया, तेस जो दितेया जाणा; होर तेस वाले बौहत हुई जाणा; पर जेस वाले जे कुछ नी हाया, तेस ले से भी लई लैणा जो कुछ तेस वाले हाया,¹³ हांऊ तिन्हा किन्हें दृष्टान्तो मन्झ इधी कठे गल्ला करहा ; क्योंकि स्यों देख्दे हुये नी देख्दे; होर सुणदे हुये नी सुणदे; होर नी समझ्दे।¹⁴ होर तिन्हा रे बारे मन्झ यसायाहा री ये भविष्यवाणी पूरी हुहां ई, कि तुस्सा काना ले ता सुणना, पर समझणा नी; होर हाखिया ले ता देखणा, पर तुस्सा जो नी सूझणा।¹⁵ क्योंकि इन्हा लोका

रा मन मोटा हुई गईरा, होर स्यों काना ले ऊँचा सुणहां ऐं होर तिन्हे आपणी हाखिया बन्द करी लईरी; केथी एहडा नी हो कि स्यों हाखिया ले देखे; होर काना ले सुणे होर मना ले समझे, होर फिरी जाए; होर हांऊ तिन्हा जो ठीक करी देऊं।¹⁶ पर भागा वाळी ई तुस्सा री हाखिया, कि स्यों देख्हा ई; होर तुस्सा रे कान, कि स्यों सुणहां ऐं।¹⁷ क्योंकि हांऊ तुस्सा किन्हें सच बोल्हा, कि बौहत से नबी होर धर्मिए चाहेया कि स्यों गल्ला देखे जो गल्ला तुस्से देख्हा ऐ, पर नी देखी सके; होर स्यों गल्ला सुणें जो गल्ला तुस्से सुणहां ऐं, पर नी सुणी सके।¹⁸ एता रे कठे तुस्से बाहणे वालो रा दृष्टान्त सुणा।¹⁹ जो कोई राज्या रा वचन सुणी किन्हें नी समझ्दा, तेसरे मना मन्झ जो कुछ बाहिरा था, तेता जो से दुष्ट आई किन्हें छुड़ाई लैहां; ये से ई आ, जो पेंडे रे बाहडे बाहिरा था।²⁰ होर गट्टे वाळी जमीना रे स्यों ऐं, जेबे स्यों सुणहा ऐं, ता बचना जो खुसी किन्हें मन्हा ऐं,²¹ पर आपणे भीतर जड नी पकड़णने री वजहा ले स्यों थोहडे ही ध्याडे तक विस्वास रख्हा ऐ; होर स्तावा रे टैमा स्यों ठोकर खाहें।²² होर जो झाड़िया मन्झ बाहिरे थे, यूँ स्यों ऐं जिन्हें जे बचन सुणेया, होर एस संसारा री चिन्ता, पैसे रा धोखा वचना जो दबाई देहां, होर से फल नी ल्याउन्दा।²³ पर बढिया जमीना रा से, जो बचना जो सुणी किन्हें समझ्हा, होर फल ल्याहुआं, कोई सौ गुणा, कोई साठ गुणा, कोई तीह गुणा।²⁴ तिने तिन्हा जो एक होर दृष्टान्त दितेया कि स्वर्गा रा राज तेस माहणु साहीं आं जिने आपणी डोहरीया मन्झ बढिया बेजा बाहया।²⁵ पर जेबे लोक सया करहा ऐ थे ता तेसरा दुस्मन आई किन्हें कणका रे बेजे मन्झ जंगली बेजा बाही किन्हें चली गया।²⁶ जेबे बेजे मन्झा ले टुए फूटे होर बालें लगी, ता जंगली दाणे भी सुझ्हे।²⁷ एता पर घर माल्का रे दासे आई किन्हें तेस किन्हें बोल्या, हे स्वामी, क्या तुस्से आपणी डोहरीया मन्झ बढिया बेजा नी बाहिरा था? फेरी जंगली दाणे रे डाळ तेता मन्झ केथी ले आये? ²⁸ तिने तिन्हा किन्हें बोल्या, ये केसी दुस्मना रा काम आ। दासे तेस किन्हें बोल्या क्या तुस्सा री इच्छा ई, कि आस्से जाई किन्हें तिन्हा जो कठा करी ले? ²⁹ तिने बोल्या, एहडा नी आ; केते एहडा नी हो कि जंगली दाणे रे डाळ कठे करदे हुए तिन्हा साउगी कणक भी पठी जाए।³⁰ कटाई तक दुहीं जो साउगी साउगी बढने देआ, होर कटाई रे टैम मां कटाई करणे वाळे किन्हें बोलणा; पैहले जंगली दाणे रे डाळ कठे करी किन्हें फुकणे रे कठे तिन्हा रे भारे बान्ही लऊआ, होर कणका जो मेरे गोदामा मन्झ कठा करा।³¹ तिने तिन्हा जो एक होर दृष्टान्त दितेया; कि स्वर्गा रा राज राई रे एक दाणे साहीं आं, जेस जो केसी माहणुए लई किन्हें आपणी डोहरीया मन्झ बाही दितेया।³² से सभ बेजे ले छोट्टा ता हाया पर जेबे से बढी जाहां तेबे से सभ सागपाता ले बडा हुई जाहां, होर एहडा डाळ बणी जाहां,

कि सर्गा रे चिडू आई किन्हें तेता रे पांगे पर बसेरा करहा ऐ।
 33 तिने एक होर दृष्टान्त तिन्हा जो सुणाया; कि स्वर्गा रा राज
 खमीरा साहीं आं जेस जो केसी जनानीये लई किन्हें तीन पसेरी
 आटे मन्झ मिलाई दितेया होर हुंदे हुंदे से सभ खमीरा हुई गया
 । 34 ये सब गल्ला यीसूए दृष्टान्ता मन्झ लोका किन्हें बोली, होर
 बगैर दृष्टान्त से तिन्हा किन्हें कुछ नी बोल्दा था। 35 कि जो
 वचन नबी रे ज़ीए बोल्या गईरा था, से पूरा हो कि मां दृष्टान्त
 बोलणे रे कठे आपणा मुंह खोलणा: मां स्यों गल्ला जो संसारा
 री सुरुआता ले लुख्ही री रही स्यों जाहिर करणी। 36 तेबे से
 भीड़ा जो छाडी किन्हें घरा जो आया, होर तेसरे चेले तेस वाले
 आई किन्हें बोल्या, डोहरीया रे जंगली दाणे रा दृष्टान्त आस्सा
 जो समझाई दे। 37 तिने तिन्हा जो जबाब दितेया, कि खरे बेजे
 रा बाहणे वाळा माहणु रा पुत्र आ। 38 डोहरीया संसार ई,
 खरा बेजा राज्या री सन्तान, होर जंगली बेजा दुष्टा री सन्तान
 ई। 39 जिने बैरिये जे स्यों बाहे से सैतान आ; कटाई संसारा
 रा अन्त आ: होर काटणे वाळे स्वर्गदूत ऐ। 40 इधी कठे जिहां
 जंगली दाणे कठे किते जाहें होर फुकी दिते जाहें तिहां ई संसारा
 रे अन्ता मन्झ हुणा। 41 माहणु रा पुत्रा आपणे स्वर्गदूत भेजणे,
 होर तिन्हा तेसरे राजा मंझा ले सभ ठोकरा रे कारण होर कुकर्म
 करणेवाळे कठे करणे। 42 होर स्यों आगी रे कुंडा मन्झ पाई देणे,
 तेथी रोणा होर दांत पिसणा हुणा। 43 तेस टैम धर्मी माहणुआ
 आपणे पिता रे राजा मन्झ सुरजा साहीं चमकणा; जेस रे कान
 हो से सुणी ले। 44 फेरी, स्वर्गा रा राज केसी डोहरी मन्झ ल्कोई
 रे खजाने साहीं आं, जेस जो केसी माहणुए पाई किन्हें ल्कोई
 दितेया, होर खुसी रे मारे जाई किन्हें होर आपणा सब कुछ
 बेची किन्हें से डोहरी खरीदी लई। 45 फेरी स्वर्गा रा राज एक
 वपारी साहीं आं जो खरे मोतिया री टोळा मन्झ था। 46 तेबे तेस
 जो एक कीमती मोती मिल्या ता तिने जाई किन्हें आपणा सब
 कुछ बेची दितेया, होर से मोती खरीदी लया। 47 फेरी स्वर्गा रा
 राज तेस बडे जाला साहीं आं, जो समुद्रा मन्झ पाईरा था होर
 हर एक किस्मा री मछिया कठा करी किन्हें लई आया। 48 होर
 जेबे से जाल भहरी गया, ता स्यों जाल खिन्जी किन्हें बाहडे लई
 आये, होर तिन्हे बैठी किन्हें खरी खरी मछिया ता भांडे मन्झ
 कठी कित्ती, होर बेकार, बेकार सटी दिती। 49 संसारा रे अंता
 मन्झ एहडा ही हुणा: स्वर्गदूता आई किन्हें दुष्ट धर्मिया ले लग
 करणे, होर स्यों आगी रे कुंडा मन्झ पाई देणे। 50 तेथी रोणा
 होर दांत पिसणा हुणा। 51 क्या तुस्से ये सब गल्ला समझी?
 52 तिन्हे तेस किन्हें बोल्या, हां; तिने तिन्हा किन्हें बोल्या, इधी
 कठे हर एक साख्खी जो स्वर्गा रे राजा रा चेला बणी गईरा,
 से तेस घर माल्का साहीं आं जो आपणे भण्डारा ले नौई होर
 पुराणी चीजा काढहा। 53 जेबे यीसू सभ दृष्टान्त बोली चुक्या,
 ता से तेथी ले चली गया। 54 होर आपणे देसा मन्झ आई किन्हें

तिन्हा री बैठका मन्झ तिन्हा जो एहडा उपदेस देंदा लग्या; कि
 स्यों हरान हुई किन्हें बोल्दे लगे; कि एस जो ये ज्ञान होर समर्था
 रे काम केथी ले मिले? 55 क्या ये तरखाणा रा म्हठा नी आ?
 होर क्या एस री माऊआ रा नाऊ मरियम होर एस रे भाईया रा
 नाऊ याकूब होर यूसुफ होर समौन होर यहूदा नी आ? 56 होर
 क्या एस री सभ बैहणियां आस्सा रे बीचा मन्झ नी नी रैहन्दी?
 फेरी एस जो ये सभ केथी ले मिल्या? 57 इधी कठे तिन्हे तेसरी
 वजहा ले ठोकर खाहदी, पर यीसूए तिन्हा किन्हें बोल्या, नबी
 आपणे देस होर आपणे घरा जो छाडी किन्हें होर केथी बेज्जत
 नी हुंदा। 58 होर तिने तेथी तिन्हा रे अविस्वासा री वजहा ले
 बौहत सामर्था रे काम नी किते।

14 1 तेस टैम चौथाई देसा रे राजे हेरोदेसे यीसू री चर्चा
 सुणी। 2 होर आपणे दासा किन्हें बोल्या, ये यहुन्ना
 बपतिस्मा देणेवाळा आ: से मरिरे मंझा ले जीउंदा हुई गईरा,
 इधी कठे तेस ले सामर्था रे काम जाहिर हुहां ऐं। 3 क्योंकि
 हेरोदेसे आपणे भाई फिलिप्पुसा री लाडी हेरोदियासा री वजहा
 ले, यहुन्ने जो पकड़ी किन्हें बान्ही दितेया, होर तेस जो जेहला
 मन्झ पाई दितेया। 4 क्योंकि यहुन्ने तेस किन्हें बोल्या था, कि
 एस्सा जो रखणा तेरे कठे ठीक नी आ। 5 होर से तेस जो मारी
 देणा चाहं था, पर से लोका ले डरहा था, क्योंकि स्यों तेस
 जो नबी मन्हां ऐं थे। 6 पर जेबे हेरोदसा रा जन्म ध्याडे आया,
 ता हेरोदियासा री म्हठीए समारोहा मन्झ नाच दसी किन्हें
 हेरोदेसा जो खुस करी दितेया। 7 इधी कठे तिने कसम खाई
 किन्हें वचन दितेया, कि जो कुछ तू मांगधी, मां तुजो देणा।
 8 आपणी माऊआ री स्लाह मनी किन्हें तेस्से बोल्या, यहुन्ना
 बपतिस्मा देणेवाळे रा मूंड थाळी मन्झ ऐथी मेरे वाले मंगवाई
 देआ। 9 राजा दुखी हुआ, पर आपणी कसमा री वजहा ले, होर
 साउगी बैठणे वाळे री वजहा ले, हुक्म दितेया, कि देई दितेया
 जाये। 10 होर जेहला मन्झ लोका जो भेजी किन्हें यहुन्ना रा
 मूंड कटवाई दितेया। 11 होर तेसरा मूंड थाळी मन्झ ल्यान्देया,
 होर म्हठी जो देई दितेया; होर से तेस जो आपणी माऊआ वाले
 लई गई। 12 होर तेसरे चेले आई किन्हें होर तेसरी ल्हास लई
 जाई किन्हें दबाई दिती होर जाई किन्हें यीसू जो खबर दिती
 । 13 जेबे यीसूए ये सुणया, ता से किस्ती पर सवार हुई किन्हें
 तेथी ले केसी सुनसान जगह मन्झ चली गया; होर लोक ये सुणी
 किन्हें नगर नगरा ले पैदल चली किन्हें तेसरे पीछे चली पये।
 14 तिने निकळी किन्हें बडी भीड देखी; होर तिन्हा पर तरस
 खाध्या; होर तिने तिन्हा रे रोगी ठीक किते। 15 जेबे सांझ हुई,
 ता तेसरे चेले तेस वाले आई किन्हें बोल्दे लगे; ये ता सुनसान
 जगह ई होर देर हुएया करहा ई, लोका जो भेजी देआ कि स्यों
 बस्तिया मन्झ जाई किन्हें आपणे कठे खाणा खरीदी ले। 16 यीसू
 ये तिन्हा किन्हें बोल्या तिन्हा रा जाणा जरुरी नी आ! तुस्से

ई इन्हा जो खाणे जो देआ । 17 तिने तेस किन्हें बोल्या; एथी आस्सा वाले पांज रोटी होर दो मछिया जो छाडी किन्हें होर कुछ नी हाया । 18 होर तिने बोल्या, तिन्हा जो एथी मेरे वाले लई आऊआ । 19 तेबे तिने लोका जो घाहा प्र्याहले बैठणे जो बोल्या, होर तिन्हारी पांज रोटिया होर दो मछिया लई ली; होर स्वर्गा वखा जो देखी किन्हें धन्यवाद कितेया होर रोटिया तोडी तोडी किन्हें चेल्या जो दिती; होर चले लोका जो । 20 होर सब खाई किन्हें रजी गये, होर तिन्हे बची रे टुकड़े री भहरी री बारा टोकरिया चकी । 21 होर तेथी खाणेवाळे जनानिया होर बाल्का जो छाडी किन्हें लगभग पांज हजार मर्ध थे । 22 होर तिने तिहां ई आपणे चले जबरदस्ती किस्ती पर चढाये, कि स्यों तेस ले पैहले पार चली जाये; जेबे तक कि से लोका जो भेजी दे । 23 तिने लोका जो भेजणे ले बाद, से प्रार्थना करणे रे कठे लग जे पाहड़ा पर चढी गया; होर जेबे सांझ हुई, ता से तेथी कल्हा था । 24 तेस टैम किस्ती झीला रे बीच लैहरा मन्झ डगमगाया करहा ई थी, क्योंकि हवा रा जोर तिन्हा वखा जो था । 25 होर से रात के चोथे पैहर झीला पर चल्दे हुए तिन्हा वाले आया । 26 चले तेस जो झीला पर चल्दे हुए देखी किन्हें डरी गए! होर बोल्दे लगे, कि से भूत आ; होर डरा रे मारे स्यों चिंगा पान्दे लगे । 27 यीसूए झटपट तिन्हा किन्हें गल्ला किती, होर बोल्या; हिम्मत रखा; ये हांऊ आं; डरा मत । 28 पतरसे तेस जो जबाब दितेया, हे प्रभु, अगर ये तुस्से ऐ, ता मुंजो आपणे वाले पाणी पर चली किन्हें आऊणे रा हुक्म देआ । 29 तिने बोल्या, आऊ: तेबे पतरस किस्ती ले उतरी किन्हें यीसू वाले जाणे रे कठे पाणी पर चल्दा लग्या । 30 पर से हवा जो देखी किन्हें डरी गया, होर जेबे डूबदा लग्या, ता चिल्लाई किन्हें बोल्या; हे प्रभु, मुंजो बचाई ले । 31 यीसूए झटपट आपणा हाथ बढाई किन्हें से पकड़ी लया, होर तेस किन्हें बोल्या, हे कम विस्वास करणे वाळे, तैं किधियो सक कितेया? 32 जेबे स्यों किस्ती पर सवार हुई गये, ता हवा रुकी गई । 33 होर जो किस्ती पर थे, तिन्हें तेस जो दण्डवत करी किन्हें बोल्या; सच्चे तू परमेसरा रा पुत्र आ । 34 होर से पार उतरी किन्हें गन्नेसरत देसा मन्झ पूजी गया । 35 होर तेथी रे लोके तेस जो पछ्याणी किन्हें ओरले परले सारे देसा मन्झ खबर किती, होर सभ रोगी तेस वाले ल्यांदे । 36 होर स्यों तेस ले अरज करदे लगे, कि से तिन्हा आपणे कपड़े रा पूहंग छुणहें दे: होर जितणे से छुहेया, स्यों ठीक हुई गये ।

15 1 तेबे यरूशलेमा ले कई फरीसी होर सास्त्री यीसू वाले आई किन्हें बोल्दे लगे । 2 तुस्सा रे चले पुरनिया रे रवाजा जो किधियो टाळहा ऐ; क्योंकि स्यों बगैर हाथ धोए रोटी खाहें? 3 तिने तिन्हा जो जबाब दितेया, कि तुस्से भी आपणे रवाजा रे मुताबक परमेसरा रे हुक्मा जो किधियो टाळहा ऐ? 4 क्योंकि परमेसरे बोलिरा था, कि आपणे बापू होर

आपणी माऊआ रा आदर करणा: होर जो कोई बापू या माऊआ जो बुरा बोले, से मारी दितेया जाए । 5 पर तुस्से बोल्हा ऐ, कि अगर कोई आपणे बापू या माऊआ किन्हें बोले, कि जो कुछ तुजो मेरे ले फायदा पूजी सकहा था, से परमेसरा जो भेंट चढाई जाई चुकिरा । 6 इधी कठे तेस जो आपणे बापू रा आदर करणे री जरूरत नी हाई, ता तुस्से आपणे रवाजा री वजहा ले परमेसरा रा वचना जो टाळी देहां ऐं । 7 हे कपटियो; यसायाह नबिये तुसारे बारे मन्झ ये भविष्यवाणी ठीक किती । 8 कि ये लोक आपणे होठा किन्हें ता मेरा आदर करहा ऐ; पर तिन्हा रा मन मेरे ले दूर रैंहयां । 9 होर ये बेकार मेरी अराधना करहा ऐ; क्योंकि ये माहणु री विधिया जो धर्मा रा उपदेस करी किन्हें स्वाहें । 10 होर तिने लोका जो आपणे वाले सादी किन्हें तिन्हा किन्हें बोल्या, सुणा; होर समझा । 11 जो मुंहा मन्झ जाहां, से माहणु जो असुद्ध नी करदा, पर जो मुंहा ले निकळहा, से ई माहणु जो असुद्ध करहा । 12 तेबे चले आई किन्हें तेस किन्हें बोल्या, क्या तू जाणहां कि फरीसिये ये वचन सुणी किन्हें ठोकर खाहदी? 13 तिने जबाब दितेया, हर डाळ जो मेरे स्वर्गीय पिते नी लगाया, से पटी दितेया जाणा । 14 तिन्हा जो जाणे देआ; स्यों काणा पैंडा दसणे वाळे ऐ: होर अगर काणा काणे जो पैंडा दसे, ता दुहींआं गढे मन्झ पई जाणा । 15 ये सुणी किन्हें, पतरसे तेस किन्हें बोल्या ये दृष्टान्त आस्सा जो समझाई दे । 16 तिने बोल्या, क्या तुस्से भी हल्ली तक नी समझे? 17 क्या तुस्से नी समझदे, कि जो कुछ मुंहा मन्झ जाहां, से पेटा मन्झ चली जाहां, होर संडासा ले हुई किन्हें निकळी जाहां? 18 पर जो कुछ मुंहा ले निकळहा, से मना ले निकळहा, होर से ई माहणु जो असुद्ध करहा । 19 क्योंकि बुरे बुरे विचार, हत्या, परस्त्रीगमन, व्यभिचार, चोरी, झूठी गुआही होर निन्दा मना ले ई निकळहा ई । 20 ये ई चीजा ई जो माहणु जो असुद्ध करहा ई, पर बगैर हाथ धोए खाणा खाणा माहणु जो असुद्ध नी करदा । 21 यीसू तेथी ले निकळी किन्हें, सुर होर सैदा रे देसा री तरफ चली गया । 22 होर देखा, तेस देसा ले एक कनानी जनानी निकळी, होर से चिल्लाई किन्हें बोल्दी लगी; हे प्रभु दाउदा री सन्तान, मुंजो पर दया कर, मेरी म्हठी जो दुष्टात्मा बडी भारी तंग करेया करहा ई । 23 पर तिने तेस्सा जो कोई जबाब नी दितेया, होर तेसरे चले आई किन्हें तेस किन्हें अरज करी किन्हें बोल्या; क्योंकि से आस्सा रे पीछे चिलान्दी हुई आहूँआं ई । 24 तिने जबाब दितेया, कि इस्राएला रे घराने री गुआही री भेडा जो छाडी किन्हें मुंजो केसी वाले नी भेज्या गईरा । 25 पर से आई, होर तेसरी आराधना करी किन्हें बोल्दी लगी; हे प्रभु, मेरी मदद करा । 26 तिने जबाब दितेया, कि बच्चेया री रोटी लई किन्हें कुत्ते रे अगे सटणा ठीक नी आ । 27 पर तेस्से बोल्या, ये गल सच ई प्रभु; पर कुत्ते भी से चूरचार खाहें, जो तिन्हा रे माल्का

री मेजा ले पहुँआं ऐं।²⁸ एता पर यीसूए तेस्सा जो जबाब देई किन्हें बोल्या, कि हे जनाने, तेरा विस्वास बडा आ: जेहडा तू चाहीं, तेरे कठे तेहडा ई हो; होर तेस्सा री म्हठी तेस ई टैम ठीक हुई गई।²⁹ यीसू तेथी ले चली किन्हें, गलीला री झीला वाले आई गया, होर पाहडा पर चढी किन्हें तेथी बैठी गया।³⁰ होर तेस वाले बौहत भीड़ कठी हुई गई, लंगडे, काणे, गूगे, टुंडे होर बौहत सारे तेस वाले आये; होर तिन्हे स्यों तेसरे पैरा वाले ल्यांदे, होर तिने स्यों ठीक करी दिते।³¹ जेबे लोके देख्या, कि गूगे बोल्ला ऐ होर टूण्डे ठीक हुहां ऐं होर लंगडे चल्हा ऐ होर काणे देख्हा ऐ, ता तिन्हे हरान हुई किन्हें इस्राएला रे परमेसरा री जै जै कार किती।³² यीसूए आपणे चेले जो सादी किन्हें बोल्या, मुंजो एस्सा भीड़ा पर तरस आहूँआं; क्योंकि स्यों तीन ध्याड़े ले मेरे साउगी ऐ होर तिन्हा वाले कुछ खाणे जो नी हाया; होर हांऊ तिन्हा जो भूखा नी भेजणा चाहन्दा; केते एहडा नी हो कि स्यों पैंडे मन्झ थकी किन्हें रही जाए।³³ चेले तेस किन्हें बोल्या, आस्सा जो जगंला मन्झ केथी ले इतनी रोटी मिलणी कि आस्से इतनी बडी भीड़ा जो खुआई सके? ³⁴ यीसूए तिन्हा ले पूछेया, तुस्सा वाले कितनी रोटिया ई? तिन्हे बोल्या; सात होर थोड़ी मछिया भी।³⁵ तेबे तिने लोका जो जमीना पर बैठणे रा हुक्म दितेया।³⁶ होर तिने सात रोटिया होर मछिया लई होर धन्यवाद करी किन्हें तोड़ी होर आपणे चेला जो देंदा गया; होर चेले लोका जो।³⁷ सारे खाई किन्हें रजी गये होर तिन्हे बचिरे टुकड़े री सात टोकरीया चकी।³⁸ होर खाणे वाळे जनानिया होर बच्चे रे अलावा लगभग चार हजार मर्ध थे।³⁹ तेबे से भीड़ा जो भेजी किन्हें किस्ती पर चढी गया, होर मगदन देसा री सीमा तक आई गया।

16¹ एता पर पतरस तेस जो लग जे लई जाई किन्हें झिडकदा लग्या कि हे प्रभु, परमेसरा नी करे; तेरे साउगी एहडा कधी नी हो।² तिने तिन्हा जो जबाब दितेया, कि जेबे सांझ हुहां ई जो तुस्से बोल्ला ऐ कि आज मौसम साफ रहणा क्योंकि सर्ग आ।³ होर भ्याग हुंदे बोल्ला ऐ, कि आज आंधी आऊणी क्योंकि आकाश लाल होर धुंधला आ; तुस्से सर्गा रा लक्षण देखी किन्हें भेद दसी सकहा ऐ पर टैमा रे चिन्हा रा भेद नी दसी सकदे? ⁴ एस युगा रे बुरे होर व्यभिचारी लोक चिन्ह तोप्ला ऐ पर योना रे चिन्हा जो छाडी किन्हें कोई होर चिन्ह तिन्हा नी दितेया जाणा, होर से तिन्हा जो छाडी किन्हें चली गया।⁵ होर जेबे चेले दूजे कनारे पर पूजी गए ता स्यों रोटि ल्याऊणा भूली गईरे थे।⁶ यीसू ए तिन्हा किन्हें बोल्या देखा; फरीसिया होर सदुकिया रे खमीरा ले सावधान रहूआ।⁷ स्यों आपु मन्झ सोच विचार करदे लगे, कि आस्से ता रोटि नी ल्यान्दी।⁸ ये जाणी किन्हें यीसूए तिन्हा किन्हें बोल्या, हे कम विस्वास रखणे वाळे लोको; तुस्से आपु मन्झ सोच विचार

किधियो करेया करहा ऐ कि आस्सा रे वाले रोटि नी हाई? ⁹ क्या तुस्से हल्ली तक नी समझे? होर तिन्हा पांज हजारा री पांज रोटि जो याद नी करदे, होर ना ये कि कितनी टोकरीया चकी थी? ¹⁰ होर तिन्हा चार हजारा री सात रोटि जो याद नी करदे; होर ना ये कि कितनी टोकरीया चकी थी? ¹¹ तुस्से कि नी समझे कि मैं तुस्सा किन्हें रोटिया रे बारे मन्झ नी बोल्या? पर फरीसिया होर सदुकिया रे खमीरा ले सावधान रहूआ।¹² तेबे तिन्हा जो समझ आई गया, कि तिने रोटि रे खमीरा ले नी; पर फरीसिया होर सदुकिया री शिक्षा ले सावधान रहण जो बोल्या था।¹³ यीसू कैसरिया फिलिप्पी रे देसा मन्झ आई किन्हें आपणे चेले ले पूछदा लग्या, कि लोक माहणु रे पुत्रा जो क्या बोल्ला ऐ? ¹⁴ तिन्हे बोल्या, कई ता यहुन्ना बपतिस्मा देणे वाळा बोल्ला ऐ होर कई एलिय्याह, होर कई यिर्मयाह या नबिया मंझा ले कोई एक बोल्ला ऐ।¹⁵ तिने तिन्हा किन्हें बोल्या; पर तुस्से मुंजो क्या बोल्ला ऐ? ¹⁶ समौन पतरसे जबाब दितेया, कि तू जिउंदे परमेसरा रा पुत्र मसीह आ।¹⁷ यीसूए तेस जो जबाब दितेया, कि हे समौन योना रे म्हठे, तू भागा वाळा आ; क्योंकि मांस होर लहए नी; पर मेरे पिते जो स्वर्गा मंझा आ, ये गल तुध पर जाहिर किती।¹⁸ होर हांऊ भी तुध किन्हें बोल्ला; कि तू पतरस आ; होर मां एस पात्थरा पर आपणी कलीसिया बनाणी: होर अधोलोका रे फाटक तेस पर प्रबल ना हूणे।¹⁹ मां तुजो स्वर्गा रे राजा री चाबिया देणी: होर जो कुछ तू धरती पर बान्हगा, से स्वर्गा मन्झ बन्धी जाणा; होर जो कुछ तू धरती पर खोल्लगा, से स्वर्गा मन्झ खुलणा।²⁰ तेबे तिने चेले जो खबरदार कितेया, कि केली किन्हें देख्या बोल्ले! कि हांऊ मसीह आ।²¹ तेस टैमा ले यीसू आपणे चेले जो दस्दा लग्या, कि मेरा यरूस्लेमा जो जाणा जरुरी आ; होर पुरनिया होर महायाजका होर साख्नीया रे हाथा ले बौहत दुःख उठाऊँ; होर मारी दितेया जाऊँ; होर वीजे ध्याड़े जिउन्दा हुई जाऊँ।²² एता पर पतरस तेस जो लग जे लई जाई किन्हें झिडकदा लग्या कि हे प्रभु, परमेसरा नी करे; तेरे साउगी एहडा कधी नी हो।²³ तिने मुडी किन्हें पतरसा किन्हें बोल्या, हे सैतान, मेरे साम्हणे ले दूर हुई जा: तू मेरे कठे ठोकरा का कारण आ; क्योंकि तू परमेसरा री गल्ला पर नी, पर माहणु री गल्ला पर मन ल्याहां।²⁴ तेबे यीसूए आपणे चेले किन्हें बोल्या; अगर कोई मेरे पीछे आऊणा चाहे, ता आपणे आपा रा इनकार करे होर आपणा कूस चके, होर मेरे पीछे चले।²⁵ क्योंकि जो कोई आपणा प्राण बचाणा चाहे, तेस से गुआई देणा; होर जो कोई मेरे कठे आपणा प्राण गुआई देहन्गा, तेस से पाई लैणा।²⁶ अगर माहणु सारे संसारा जो पाई ले, होर आपणे प्राणा जो गुआई दे, ता तेस जो क्या फायदा हूणा? या माहणुआ आपणे प्राणा रे बदले मन्झ क्या देणा? ²⁷ माहणु रा पुत्रा आपणे स्वर्गदूता साउगी आपणे पिता री महिमा मन्झ आउणा, होर

तेस टैम तेस हर एकी जो तेसरे कामा रे मुताबक अनुसार फल देणा । ²⁸ हांऊ तुस्सा किन्हें सच बोल्ला, कि जो एथी खहड़ी रे; तिन्हा मन्झ कितने एहडे ऐ; कि जेबे तक माहणु रे पुत्रा जो तेसरे राजा मन्झ आऊन्दे हुये नी देखी ले, तेबे तक तिन्हा मौता रा स्वाद नी चखणा ।

17 ¹ छेह ध्याडे ले बाद यीसू पतरस होर याकूब होर तेसरे भाई यहून्ना जो आपणे साउगी लई गया, होर से तिन्हा जो बीयावान जगहा मन्झ केसी ऊचें पहाड़ा पर लई गया । ² होर तिन्हा रे साम्हणे तेसरा रूप बधली गया होर तेसरा मुंह सुरजा साहीं चमक्या होर तेसरे कपडे प्रयासे साहीं चीटे हुई गए । ³ होर देखा, मूसा होर एलिय्याह तेस साउगी गल्ला करदे हुये तिन्हा जो सुद्धे । ⁴ एता पर पतरसे यीसू किन्हें बोल्ला, हे प्रभु, आस्सा रा एथी रैहणा ठीक आ; अगर तेरी इच्छा हो ता मां एथी तीन मण्डप बनाणे; एक तुस्सा रे कठे, एक मूसा रे कठे, होर एक एलिय्याह रे कठे । ⁵ से बोल्ला ई करहा था, कि देखा, एक उजले बादले स्यों ढखी दिते, होर देखा; तेस बादला मन्झा ले ये अवाज आई, कि ये मेरा प्यारा पुत्र आ, जेस ले हांऊ खुस आ; एसरी सुणां । ⁶ चेले ये सुणी किन्हें मुंहा रे भारे पई गये होर बौहत डरी गए । ⁷ यीसूए तिन्हा वाले आई किन्हें स्यों छुही लये, होर बोल्ला, उठा; डरा मत । ⁸ तेबे तिन्हे आपणी हाखिया ले यीसू रे अलावा केसी होरी जो नी देख्या । ⁹ होर जेबे स्यों पाहड़ा ले उतरेया करहा ऐ थे तेबे यीसूए तिन्हा जो ये हुक्म दितेया; कि जेबे तक माहणु रा पुत्र मरीरे मंझा ले जिउंदा नी हुई जाए तेबे तक जो कुछ तैं देखिरा केसी किन्हें देख्या बोल्ला । ¹⁰ होर तेसरे चेले तेस ले पूछेया, फेरी सास्त्री किधियो बोल्ला ऐ, कि एलिय्याहा रा पैहले आउणा जरूरी आ? ¹¹ तिने जबाब दितेया, कि एलिय्याहा ता आऊणा: होर तेस सब कुछ सुधारी देणा । ¹² पर हांऊ तुस्सा किन्हें बोल्ला; कि एलिय्याह ता आई चुकिरा; होर तिन्हे से नी पछ्याणेया; पर जो चाहेया तेहड़ा ई तेस साउगी कितेया: इहाँ करी किन्हें माहणु रे पुत्रा भी तिन्हा रे हाथा ले दुःख उठाणा । ¹³ तेबे चेले समझ्या कि तिने आस्सा किन्हें यहून्ना बपतिस्मा देणेवाळे रे बारे मन्झ बोल्ला । ¹⁴ जेबे स्यों भीड़ा वाले पूजे, ता एक माहणु तेस वाले आया, होर घुटणे टेकी किन्हें बोल्ला लग्या । ¹⁵ हे प्रभु, मेरे म्हठे पर दया कर; क्योंकि तेस जो मिर्गी आहूँआं ई: होर से बौहत दुःख सैहन करेया करहा ; होर से घड़ी घड़ी आगी मन्झ होर घड़ी घड़ी पाणी मन्झ पई जाहां । ¹⁶ होर मैं से तुस्सा रे चेले वाले ल्यान्दरा था, पर स्यों तेस जो ठीक नी करी सके । ¹⁷ यीसू ये जबाब दितेया, कि हे अविस्वासी होर जिद्दी लोको मां कधी तक तुस्सा साउगी रैहणा? होर कधी तक तुस्सा री सैहन करदे रैहणा? तेस जो एथी मेरे वाले लई आऊआ । ¹⁸ तेबे यीसूए से दुष्टात्मा झिडकी, होर दुष्टात्मा तेस मंझा ले निकळी गई; होर म्हठा तेस

ई टैम ठीक हुई गया । ¹⁹ तेबे चेले कल्हे जे यीसू वाले आई किन्हें बोल्ला; आस्से एता जो कि नी काढही सके? ²⁰ तिने तिन्हा किन्हें बोल्ला आपणे विस्वासा री कमी री वजहा ले: क्योंकि हांऊ तुस्सा किन्हें सच बोल्ला, अगर तुस्सा रा विस्वास राई रे दाणे रे बराबर भी हो, ता तुस्सा एस पहाड़ा किन्हें बोलणा, कि एथी ले खिसकी किन्हें तेथी चली जा, ता तेस चली जाणा; होर कोई गल तुस्सा रे कठे असम्भव नी हुणी । ²¹ जेबे स्यों गलीला ले थे, ता यीसूए तिन्हा किन्हें बोल्ला; माहणु रा पुत्र माहणुआ रे हाथा मन्झ पकड़वाया जाणा । ²² होर तिन्हा से मारी देणा, होर तेस त्रीजे ध्याडे जिउंदे हुई जाणा । ²³ ये सुणी किन्हें स्यों बौहत दुःखी हुए । ²⁴ जेबे स्यों कफरनहूमा मन्झ पूजी गए, ता मन्द्रा रे कठे चुंगी लैणेवाळे पतरसा वाले आई किन्हें पूछेया, कि क्या तुस्सा रा गुरु मन्द्रा रे कठे चुंगी नी देंदा? तिने बोल्ला, हां देहां । ²⁵ जेबे से घरा पुज्या, ता यीसूए तेस रे पूछणे ले पैहले तेस किन्हें बोल्ला, हे स्मौन तू क्या समझ्हा? धरती रे राजा महसूल या चुंगी केस ले लेंहां ऐं? आपणे म्हठे ले या बगाने ले? पतरसे तिन्हा किन्हें बोल्ला, बगाने ले । ²⁶ यीसूए तेस किन्हें बोल्ला ता म्हठे बची गये । ²⁷ तेबे भी इधी कठे कि आस्से तिन्हा जो ठोकर नी खुआए; तू झीला रे बाहडे जाई किन्हें कांडा पाई दे, होर जो मछी पैहले निकळे, तेता जो लई किन्हें; तेस्सा मछिया रा मुंह खोल्ली किन्हें तुजो एक सिक्का मिलणा, तेता जो लई किन्हें मेरे होर आपणे बदले तिन्हा जो देई देआ ।

18 ¹ तेस ई टैम चेले यीसू वाले आई किन्हें पुछदे लगे, कि स्वर्गा रे राजा मन्झ बडा कुण आ? ² एता पर तिने एक बालक आपणे वाले सादेया होर तेस जो तिने तिन्हा रे मन्झ भर खड़ा करी दितेया । ³ होर बोल्ला, हांऊ तुस्सा किन्हें सच बोल्ला, अगर तुस्से नी बध्लगे होर एस बालका साहीं नी बणघे, ता स्वर्गा रे राजा मन्झ तुस्सा दाखल नी करी पाणा । ⁴ जो कोई आपणे आपा जो एस बालका साहीं छोटा करघा, तेस स्वर्गा रे राजा मन्झ बडा हूणा । ⁵ होर जो कोई मेरे नांऊआं ले एक एहडे म्हठे जो ग्रहण करहा से मुंजो ग्रहण करहा । ⁶ पर जो कोई इन्हा छोटे मन्झा ले केसी जो जो मुंजो पर विस्वास करहा ऐ केसी एकी जो ठोकर खुआए, तेसरे कठे ये खरा हुंदा, कि बड़ी चक्की रा पूड़ तेसरे गले मन्झ लटकाया जांदा, होर तेस जो डूधे समुद्रा मन्झ डुवाई दितेया जान्दा । ⁷ ठोकरा री वजहा ले संसारा पर हाय! ठोकर लगणी ता जरूरी ई; पर हाय तेस माहणु पर जेस रे ज़ीए जे ठोकर लच्छा ई । ⁸ अगर तेरा हाथ या तेरा पैर तुजो ठोकर खुआए, ता तेता जो काटी किन्हें सटी दे; कि दो हाथ या दो पैर रैहन्दे हुए तूजो अनन्त आगी मन्झ पाणे ले ता तेरे कठे ये खरा आ, कि तू टूण्डा या लगड़ा हुई किन्हें जीवना मन्झ प्रवेस करे । ⁹ होर अगर तेरी हाखी तुजो ठोकर खुआए, ता तेता जो काढही दे । ¹⁰ काणा हुई किन्हें जीवना मन्झ प्रवेस करणा तेरे

कठे एता ले खरा आ, कि दो हाखिया हुंदे हुए तूजो नरका री आगा मन्झ पाई दितेया जाए।¹¹ देखा, तुस्से इन्हा छोटे मंझा ले केसी जो तुच्छ देख्या जाणदे; क्योंकि हांऊ तुस्सा किन्हें सच बोल्हा, कि स्वर्गा मन्झ तिन्हा रे दूत मेरे स्वर्गीय बापू रा मुंह हमेसा देख्हा ऐ।¹² तुस्से क्या समझ्हा ऐ? अगर केसी माहणु री सौ भेडा हो, होर तिन्हा मंझा ले एक गुआही जाये, ता क्या तिन्हा नडीन्नूएँ जो छाडी किन्हें, होर पहाडा पर जाई किन्हें, तेस से गुआही री भेड नी तोष्णी? ¹³ होर अगर एहडा हुई जाए कि से तेस जो मिली जाए, ता हांऊ तुस्सा किन्हें सच बोल्हा; कि तेस तिन्हा नडीन्नूएँ भेडा रे कठे जो भटकीरी नी थी इतना खुस नी हुणा, जितना कि एस्सा भेडा रे कठे खुस हुणा। ¹⁴ एहडा ई तुस्सा रे पिता री जो स्वर्गा मन्झ आ ये इच्छा नी ई, कि इन्हा छोटे मंझा ले एक भी नास हो। ¹⁵ अगर तेरा भाई तेरे खिलाफ गुनाह करे, ता जा होर कल्हे जे गलबात करी किन्हें तेस जो समझाई दे; अगर से तेरी सुणी ले ता तैं आपणे भाई जो पाई लया। ¹⁶ होर अगर से तेरी नी सुणे, ता एक दो जणा जो आपणे साउगी लई जा, कि हर एक गल दो या तीन गवाहा रे मुंहा ले ठैहराई जाए। ¹⁷ अगर से तिन्हा री भी नी सुणे, ता कलीसिया किन्हें बोली दे, पर अगर से कलीसिया री भी नी सुणे, ता तू तेस जो अन्यजाति होर चुंगी लैणेवाळा मन्नी ले। ¹⁸ हांऊ तुस्सा किन्हें सच बोल्हा, जो कुछ तुस्से धरती पर बान्ह्हे, तेस स्वर्गा मन्झ बन्नी जाणा होर जो कुछ तुस्से धरती पर खोल्ह्गे, तेस स्वर्गा मन्झ खुल्ही जाणा। ¹⁹ फेरी हांऊ तुस्सा किन्हें बोल्हा, अगर तुस्सा मंझा ले दो जण धरती पर केसी गल्ला जो एक मन हुई किन्हें मांगे, ता से मेरे पिता री तरफा ले जो स्वर्गा मन्झ आ तिन्हा रे कठे हुई जाणी। ²⁰ क्योंकि जेथी केथी दो या तीन मेरे नांऊआं पर कठे हुंहां ऐं तेथी हांऊ तिन्हा रे बीचा मंझ हुंहां। ²¹ तेबे पतरसे नेडे आई किन्हें, तेस किन्हें बोल्या, हे प्रभु, अगर मेरा भाई गुनाह करदा रहे, ता हांऊ कितनी बारी तेस जो माफ करूं; क्या सात बारी? ²² यीसूए तेस किन्हें बोल्या, हांऊ तुध किन्हें ये नी बोल्दा, कि सात बारी, पर साता रे सत्तर गुणा तक। ²³ इधी कठे स्वर्गा रा राज तेस राजे साहीं आं, जिने आपणे दासा ले लेखा लैणा चाहेया। ²⁴ जेबे से लेखा लैंदा लग्या, ता एक जण तेसरे साम्हणे ल्यान्देया जेस पर दस हजार तोडे कर्ज था। ²⁵ जेबकी चूकाणे रे कठे तेस वाले कुछ नी था, ता तेसरे स्वामी ऐ हुकम दितेया कि तेस दासा जो, तेस री लाडी होर बाल बच्चे जो होर तेस रा सभ कुछ बेची दितेया जाए, होर से कर्जा चुकाई दितेया जाए। ²⁶ तेबे तेसरे दासे तेसरे पैरा पर पई किन्हें तेस जो प्रणाम कितेया, होर बोल्या हे स्वामी, सब्र रख, मां सब कुछ चुकाई देणा। ²⁷ तेबे तेस दासा रे स्वामीये तेस पर तरस खाई किन्हें से छाडी दितेया, होर तेसरा कर्जा माफ करी दितेया। ²⁸ पर जेबे से दास बाहर निकळेया, ता तेसरे

संगी दासा मंझा ले एक तेस जो मिल्या, जो तेसरा सौ दीनारा रा कर्जदार था; तिने तेस जो पकड़ी किन्हें तेसरा गळा घुटेया, होर बोल्या; जो कुछ लईरा से मुंजो देई दे। ²⁹ एता पर तेसरा संगी दास झुकी किन्हें, तेस ले बिनती करदा लग्या; कि सब्र रख मां सभ चुकाई भरी देणा। ³⁰ पर से नी मन्या, पर तिने जाई किन्हें से जेहला मन्झ पाई दितेया; कि जेबे तक से कर्जा नी चुकाए; तेबे तक से एथी रहे। ³¹ तेसरे संगी दास ये देखी किन्हें बौहत उदास हुए, होर तिने जाई किन्हें आपणे स्वामी जो पूरा हाल दसी दितेया। ³² तेबे तेसरे स्वामीये तेस जो सादी किन्हें तेस किन्हें बोल्या, हे दुष्ट दास, तैं मेरे ले बिनती किती, होर मैं तेरा पूरा कर्जा माफ करी दितेया। ³³ इधी कठे जिहां मैं तेरे पर दया किती, तिहां ई क्या तुजो भी आपणे संगी दासा पर दया नी करणी चहिए थी? ³⁴ होर तेसरे स्वामीये गुस्से मन्झ आई किन्हें तेस जो सजा देणे वाळे रे हाथा मन्झ सौंपी दितेया, कि जेबे तक से सारा कर्जा चुकाई नी दे, तेबे तक से तिन्हा रे हाथा रहे। ³⁵ इहां ई अगर तुस्सा मंझा ले हर एक आपणे भाई जो मना ले माफ नी करघा, ता मेरे पिता जो स्वर्गा मन्झ आ, तेस तुस्सा साउगी भी एहडा ही करणा।

19 ¹ जेबे यीसू ये गल्ला बोली चुक्या, ता से गलीला ले चली गया; होर यहूदिया रे देसा मन्झ यरदना रे पार आया। ² होर बौहत बडी भीड़ तेसरे पीछे हुई गई, होर तिने स्यों ठीक करी दिते। ³ तेबे फरीसी तेस री परीक्षा करणे रे कठे तेस वाले आई किन्हें बोल्दे लगे, क्या हर एक वजहा ले आपणी लाडी जो छाडणा ठीक आ? ⁴ तिने जबाब दितेया, क्या तुस्से नी पढेया, कि जिने जे स्यों बणाये, तिने सुहरू ले नर होर नारी बणाई किन्हें बोल्या। ⁵ होर एस वजहा ले माहणुआं आपणे माऊ बाबा ले लग हुई किन्हें आपणी लाडी साउगी रैहणा होर तिन्हा एक सरीर हुणा। ⁶ इधी कठे एबे तिन्हा दो नी, पर एक सरीर हुणा: इधी कठे जिन्हा जो परमेसरे जोडीरा, तिन्हा जो माहणु लग ना करे। ⁷ तिन्हें तेस किन्हें बोल्या, फेरी मुस्से ये किधियो तय कितेया, कि त्यागपत्र देई किन्हें तेस्सा जो छाडी दे? ⁸ तिने तिन्हा किन्हें बोल्या, मुस्से तुस्सा रे मना री कठोरता री वजहा ले तुस्सा जो आपणी लाडी जो छाडणे रा हुकम दितेया, पर सुरुआता मन्झ एहडा नी था। ⁹ होर हांऊ तुस्सा किन्हें बोल्हा, कि जो कोई व्यभिचारा जो छाडी किन्हें होर केसी वजहा ले आपणी लाडी जो छाडी किन्हें, दूजी किन्हें ब्याह करे, से भी व्यभिचार करहा। ¹⁰ चेले तेस किन्हें बोल्या, अगर मर्धा रा जनाने साउगी एहडा रिस्ता आ, ता ब्याह करणा ठीक नी आ। ¹¹ तिने तिन्हा किन्हें बोल्या, सभ ये वचन ग्रैहण नी करी सक्दे, सिर्फ स्यों जिन्हा जो ये दान दितिरा। ¹² क्यूंकि कुछ नपुंसक एहडे ऐ जो माऊआ रे गर्भा ले ई एहडे जम्मे, होर कुछ नपुंसक एहडे, जिन्हा जो माहणुए नपुंसक बणाया: होर कुछ नपुंसक

एहडे ऐ, जिन्हें स्वर्गा रे राजा रे कठे आपणे आपा जो नपुंसक बणाई दितेया, जो एता ग्रैहण करी सकहा, से ग्रैहण करे।¹³ तेवे लोक बालका जो तेस वाले लई आये, कि से तिन्हा पर हाथ रखे होर प्रार्थना करे; पर चेले स्यों बच्चे डांटे।¹⁴ यीसुए बोल्या, बालका जो मेरे वाले आऊणे देआ: होर इन्हा जो नाह नी करा, क्यूंकि स्वर्गा रा राज एहडेया रा ई आ।¹⁵ होर से तिन्हा पर हाथ रखी किन्हें, तेथी ले चली गया।¹⁶ होर देखा, एक माहणुए नेडे आई किन्हें तेस किन्हें बोल्या, हे गुरु हांऊ कुण जे भला काम करूँ, ताकि अनंत जिदंगी मिले।¹⁷ तिने तेस किन्हें बोल्या, तू मेरे ले भलाई रे बारे मन्झ कि पूछहा? भला ता एक ई आ; पर अगर तू जीवना मन्झ दाखल हूणा चाहं, ता हुकम मन्या कर।¹⁸ तिने तेस किन्हें बोल्या, केहडे हुकम? यीसुए बोल्या, ये कि हत्या नी करणा, व्यभिचार न करणा, चोरी नी करणा, झूठी गुआही नी देणा।¹⁹ आपणे माऊ बाबा री इज्जत करणा, होर आपणे पडोसी किन्हें आपणे बराबर प्यार रखणा।²⁰ तिने जुआने यीसू किन्हें बोल्या, ये सभ हुकम ता हांऊ मन्हा, एबे मेरे अंदर क्या कमी ई? ²¹ यीसुए तेस किन्हें बोल्या, अगर तू सिद्ध हूणा चाहं; तो जा, आपणा सभ कुछ बेची किन्हें गरीबा जो बांडी दे; होर तू जो स्वर्गा मन्झ धन मिलणा; होर आई किन्हें मेरे पीछे हुई ले।²² पर से जुआन ये गल सुणी किन्हें उदास हुई किन्हें चली गया, क्यूंकि से बौहत अमीर था।²³ तेवे यीसुए आपणे चेले किन्हें बोल्या, हांऊ तुस्सा किन्हें सच बोल्हा, कि अमीरा रा स्वर्गा रे राजा मन्झ दाखल हूणा कठिन आ।²⁴ हांऊ तुस्सा किन्हें दबारा बोल्हा, कि परमेसरा रे राजा मन्झ अमीरा रे दाखल हूणे ले ऊंटा रा सुई रे नाके ले निकळना असान आ।²⁵ ये सुणी किन्हें, चेले बौहत हैरान हुई किन्हें बोल्या, फेरी केसरा उद्धार हुई सकहा? ²⁶ यीसुए तिन्हा वखा जो देखी किन्हें, बोल्या, माहणुआ ले ता ये हुई नी सकदा, पर परमेसरा ले सभ कुछ हुई सकहा ²⁷ एता पर पतरसे तेस किन्हें बोल्या, कि देख, आस्से ता सभ कुछ छाडी किन्हें तेरे पीछे हुई गईरे; ता आस्सा जो क्या मिलणा? ²⁸ यीसुए तिन्हा किन्हें बोल्या, हांऊ तुस्सा किन्हें सच बोल्हा, कि नौई उत्पति ले जेबे माहणु रे पुत्रा आपणी म्हीमा रे सिंहासना पर बैठणा, होर तुस्से भी जो मेरे पीछे हुई गईरे, तुस्सा बारा सिंहासना पर बैठी किन्हें इस्राएला रे बारा गोत्रा रा न्याय करणा।²⁹ होर जेस केसीए घरबार या भाई वैहण या माऊ बाब या बाल बच्चे या खेत खलिहान मेरे नांऊआं रे कठे छाडी दितेरे, तिन्हा जो सौ गुणा मिलणा: होर तेस अनंत जिंदगी रा अधिकारी हूणा।³⁰ पर कई जो पैहले ले ए, तिन्हा पिछले हूणा, होर जो पिछले ए तिन्हा पैहले हूणा।

20¹ स्वर्गा रा राज केसी घर मालका साहीं आं, जो भ्यागा बाहर निकळेया, कि आपणे दाखा री बारी मन्झ मजदूर लगाए।² होर तिने मजदूरा री मजदूरी जो एक दीनार

तय किती, होर तिने स्यों आपणे दाखा री बारी मन्झ भेजे।³ होर से लगभग त्रीजे पैहर बाहर गया, होर होरी जो बजारा मन्झ बेकार खहड़ी रे देख्या।⁴ होर तिने तिन्हा किन्हें बोल्या, तुस्से भी दाखा री बारी मन्झ जाऊआ, होर जो कुछ ठीक आ, मां तुस्सा जो देणा: होर स्यों भी गये।⁵ फेरी तिने दूजे होर त्रीजे पैहरा रे नेडे बाहर निकळी किन्हें तेहडा ई कितेया।⁶ फेरी एक घंटा बाकी बचणे पर से दबारा बाहर निकळेया होर होरी जो भी खहड़ी रे देख्या, होर तिने तिन्हा किन्हें बोल्या; तूस्से पुरे ध्याडे एथी बेकार किधियो खहड़ी रे रहे? तिन्हें तेस किन्हें बोल्या, इधी कठे, कि आस्सा जो केसीए मजदूरी पर नी ल्याया।⁷ तिने तिन्हा किन्हें बोल्या, तुस्से भी अंगूरा रे बगीचे मन्झ जाऊआ।⁸ सान्झके टैमा अंगूरा रे बगीचे रे मालके आपणे भण्डारी किन्हें बोल्या, मजदूरा जो सादी किन्हें पैहले ले लई किन्हें बादा तक तिन्हा जो मजदूरी देआ।⁹ होर जिन्हा जो एक घंटे भरा रे कठे मजदूरी पर ल्वाईरा था, जेबे स्यों आये, ता तिन्हा हर एकी जो एक एक दीनार मिल्या।¹⁰ जो पैहले आईरे थे, तिन्हें ये समझ्या, कि आस्सा जो ज्यादा मिलणा; पर तिन्हा जो भी एक ई दीनार मिल्या।¹¹ होर जेबे तिन्हा जो दीनार मिली गए, ता स्यों घर मालका रे खिलाफ कुडकुडान्दे लगे।¹² कि इन्हें जो सभी ले बादा मन्झ आए, इन्हें सिर्फ एक ई घंटा काम कितेया, होर तुस्से तिन्हा जो आस्सा रे बराबर करी दितेया, जिन्हें जे पूरी ध्याडी रा भरा चक्या होर झुलसाणे वाळी गर्मी सैहन किती।¹³ पर तिने तिन्हा मंझा ले एकी जो जबाब दितेया, कि हे दोस्त, हांऊ तेरे प्रति कोई अन्याय नी करेया करदा; क्या तैं मेरे साउगी एक दीनार मजदूरी तय नी किती? ¹⁴ जो तेरा आ, तेता जो उठाई ले, होर चली जा; मेरी इच्छा ये ई कि जितनी मजदूरी मैं तुजो दिती, तितनी ई मजदूरी मां तेस सभी ले बादा मन्झ काम करणे वाळे जो भी दूँ।¹⁵ क्या ये ठीक नी आ, कि हांऊ आपणी चीजा किन्हें जेहडा चाहूँ तेहडा करूँ? क्या तू मेरे खरेपना जो बुरी नजरा किन्हें देख्हा? ¹⁶ इधी कठे जो पिछले ए, तिन्हा पैहले हूणां, होर जो पैहले ए, तिन्हा पिछले हूणा।¹⁷ यीसू यरुस्लेमा जो जाणे रे टैमा बारा चलेया जो एकांत जगहा मन्झ लई गया, होर रस्ते मन्झ तिन्हा किन्हें बोल्दा लगेया।¹⁸ कि देखा, आस्से यरुस्लेम जाया करहा ए; होर माहणु रा पुत्र माहयाजक होर सास्त्रिया रे हाथ पकड़वाया जाणा होर तिन्हा से मारे जाणे रे लायक ठेहराणा।¹⁹ होर तिन्हा से अन्य जातिया रे हाथा मन्झ सौंपणां, ताकि स्यों तेसरा मजाक उड़ाए, होर तेस जो कोड़े मारे जाए, होर तेस जो कूसा पर चढ़ाए, होर से त्रीजे ध्याडे तेस जी उठणा।²⁰ होर जब्दी रे पुत्रा री माऊए आपणे पुत्रा साउगी तेस वाले आई किन्हें प्रणाम कितेया, होर तेस ले कुछ मांगदी लगी।²¹ तिने तेस्सा किन्हें बोल्या, तू क्या चाहीं? तेस्से तेस किन्हें बोल्या, ये बोल,

कि मेरे ये दो पुत्र तेरे राज्या मन्झ एक तेरे दाई वखा जो होर एक तेरे बाई वखा जो बैठे।²² यीसुए जबाब दितेया, तुस्से नी जाणदे कि क्या मान्धहा ऐ? जो कटोरा हांऊ पीणे पर आ, क्या तुस्से भी पी सकहा ऐ? तिन्हें तेस किन्हें बोल्या, पी सकहा ऐ।²³ तिने तिन्हा किन्हें बोल्या, तुस्सा मेरा कटोरा पीणा पर तुस्सा जो आपणे दाएं बाएँ बैठाणा मेरा काम नी आ, पर जिन्हा रे कठे से त्यार कितेया गईरा, से तिन्हारे कठे आ।²⁴ ये सुणी किन्हें, दसा रे दस चले तिन्हा दुहीं भाईया पर गुस्सा हुए।²⁵ यीसुए तिन्हा जो नेडे सादी किन्हें बोल्या, तुस्से जाणहां ऐं, कि अन्य जातिया रे हाकम तिन्हा पर राज करहा ऐ; होर जो बड़े ऐ, स्यों तिन्हा पर हक ज्ताहें।²⁶ पर तुस्सा मन्झ एहड़ा नी हूणां; पर जो कोई तुस्सा मन्झ बड़ा हूणां चाहं, से तुस्सा रा सेवक बणें।²⁷ होर जो तुस्सा मन्झ प्रधान हूणां चाहं, से तुस्सा रा दास बणें।²⁸ जिहां कि माहणु रा पुत्र, से इधी कठे नी आया, कि तेसरी सेवा टैहल किती जाए, पर से इधी कठे आया कि से आपु आस्सा री सेवा टैहल करे होर से कईया रे छुटकारे रे कठे आपणे प्राण दे।²⁹ जेबे स्यों यरीहो ले निकल्या करहा ऐ थे, ता एक बडी भीड़ तेसरे पीछे चली पई।³⁰ होर देखा, दो काणे, जो सड़का रे बाढे बैठी रे थे, तिन्हें ये सुणी किन्हें कि यीसू जाया करहा, स्यों चिल्लाई किन्हें बोल्दे लगे; कि हे प्रभु, दाऊदा री सन्तान, आस्सा पर दया कर।³¹ लोके स्यों डांटे, कि चुप रहो, पर स्यों होर भी ज्यादा चिल्लाई किन्हें बोले, हे प्रभु, दाऊदा री सन्तान, आस्सा पर दया कर।³² तेबे यीसुए खड़े हुई किन्हें, तिन्हा स्यों सादे, होर बोल्या; ³³ तुस्से क्या चाहें कि हांऊ तुस्सा रे कठे क्या करूँ? तिन्हें तेस किन्हें बोल्या, हे प्रभु; ये कि आस्सा री हाखिया खुल्ही जाए।³⁴ यीसुए तरस खाई किन्हें तिन्हारी हाखिया छुही, होर स्यों झटपट देखे लगे; होर स्यों तेसरे पीछे चली पए।

21 ¹ जेबे स्यों यरूस्लेमा रे नेडे पूजे होर जैतून पाहड़ा पर बैतफगे रे नेडे आए, तेबे यीसूए दो चले जो ये ग्लाई किन्हें भेज्या।² कि आपणे साम्हणे रे गांऊआं मन्झ जाऊआ, तेथी पुज्दे ई तुस्सा जो एक गध्ही होर तेस्सा रा एक बच्चा बझिरा मिलणा; तिन्हा जो खोल्ही किन्हें, मेरे वाले लई आऊआ।³ अगर तुस्सा मंझा ले कोई कुछ बोले, ता तुस्से बोल्या, कि प्रभु जो इन्हा री जरूरत ई: तेबे तेस स्यों तिहां ई भेजी देणे।⁴ ये इधी कठे हुआ, कि जो वचन नबिया रे ज्रीए बोल्या गईरा था, से पूरा हो; ⁵ कि सिय्योना री बेटी किन्हें बोला, देख, तेरा राजा तेरे वाले आहूँआं: से नम्र आ होर गधे पर बैठिरा; बल्कि लादू रे बच्चे पर।⁶ चले जाई किन्हें, जो यीसूए तिन्हा किन्हें ग्लाईरा था, तेहड़ा ई कितेया।⁷ होर गदही होर बच्चे जो ल्याई किन्हें, तिन्हा पर आपणे कपड़े रखे, होर से तिन्हा पर बैठी गया।⁸ होर बौहत लोके आपणे कपड़े रस्ते मन्झ बिछाए, होर लोके डाळा

रे पांगे काटी किन्हें रस्ते मन्झ बिछाए।⁹ होर जो भीड़ तेसरे अगे अगे चल्या करहा ई थी होर पीछे पीछे आया करहा ई थी, चिल्लाई चिल्लाई किन्हें बोल्हा ई थी, कि दाउदा री सन्ताना री होसन्ना; भागा वाळा आ से जो प्रभु रे नाऊआं ले आहूँआं, सर्गा मन्झ होसन्ना।¹⁰ जेबे से यरूस्लेमा मन्झ दाखल हुआ, ता सारे नगरा मन्झ हलचल मची गयी; होर लोक ग्लान्दे लगे, ये कुण आं? ¹¹ लोके बोल्या, ये गलील रे नासरता रा नबी यीसू आ।¹² यीसूए परमेसरा रे मन्दरा मन्झ जाई किन्हें, तिन्हा सभी जो, जो मन्दरा मन्झ लेण देण करेया करहा ऐ थे, काढी दिते; लेण देण करणे वाळैया रे बैठकु उल्दी दिते होर कबूतर बेचणेवाळे री चौकिया उलट दिती।¹³ होर तिने तिन्हा किन्हें बोल्या, ये लिखिरा आ, कि मेरा घरा जो प्रार्थना रा घर बोल्या जाणा; पर तुस्से ता ये डाकुआ रा डुआर बणाई दितिरा।¹⁴ होर काणे होर लंगड़े, मन्दरा मन्झ तेस वाले आए, होर तिने स्यों ठीक किते।¹⁵ पर जेबे महायाजके होर साखिये इन्हा नौखे कामा जो, जो तिने किते, होर म्हुटे जो मन्दरा मन्झ दाऊदा री सन्ताना जो होसन्ना बोल्दे हुए देख्या, ता गुस्सा हुई किन्हें तेस किन्हें ग्लान्दे लगे, क्या तू सुणहां कि ये क्या ग्लाहें? ¹⁶ यीसू ये तिन्हा किन्हें बोल्या, हां; क्या तुस्से ये कधी नी पढेया, कि बालका होर दूध पिन्दे बच्चे रे मुंहा ले तैं स्तुति करवाई? ¹⁷ तेबे से तिन्हा जो छाडी किन्हें नगरा रे बाहर बैतनिय्याहा जो गया, होर तेथी रात काटी।¹⁸ भ्यागा जेबे से नगरा जो वाप्स आया, ता तेस जो भूख लगी।¹⁹ होर अंजीरा रे डाळ पैंडे रे बाहडे देखी किन्हें से तेस वाले गया, होर पातरा जो छाडी किन्हें तेस मन्झ होर कुछ ना पाई किन्हें तेस किन्हें बोल्या, एभे ले तुध मन्झ फेरी कधी फल नी लगे; होर अंजीरा रा डाळ झटपट सुकी गया।²⁰ ये देखी किन्हें चले जो हरानी हुई, होर बोल्या, ये अंजीरा रा डाळ झटपट किहां सुकी गया? ²¹ यीसूए तिन्हा जो जबाब दितेया, कि हांऊ तुस्सा किन्हें सच बोल्हा; अगर तुस्से विश्वास रखो, होर सक नी करो; ता ना सिर्फ ये करणा, जो एस अंजीरा रे डाळा किन्हें कितेया; पर अगर तुस्से एस पहाड़ा किन्हें भी ग्लान्दगे, कि पठी जा; होर समुद्रा मन्झ जाई पइ जा, ता ये हुई जाणा।²² होर जो कुछ तुस्से प्रार्थना मन्झ विस्वास करी किन्हें मान्धहगे से सभ तुस्सा जो मिलणा।²³ से मन्दरा जाई किन्हें उपदेस करेया करहा था, कि महायाजके होर लोका रे पुरनियें तेस वाले आई किन्हें पुछेया, तू ये काम केस हका ले करहा ? होर तुजो ये हक कुने दितेया? ²⁴ यीसूए तिन्हा जो जबाब दितेया, कि हांऊ भी तुस्सा ले एक गल पूछहा; अगर से तुस्से मुंजो दस्ये, ता मां भी तुस्सा जो दसणा, कि ये काम हांऊ केस हका ले करहा।²⁵ यहुन्ना रा बपतिस्मा केथी ले था? स्वर्गा वखा ले या माहणु वखा ले था? तेबे स्यों आपु मन्झ बैहस करदे लगे, कि आगर आस्से बोले कि स्वर्गा वखा ले, ता तेस आस्सा

किन्हें बोलना, फेरी तुस्से तेस रा विस्वास कि नी कितेया? 26 होर अगर आस्से बोले कि माहणु री वखा ले ता आस्सा जो भीडा रा डर आ; क्योंकि स्यों सभ यहुन्ना जो नबी मन्हां ऐं थे । 27 होर तिन्हे यीसू जो जबाब दितेया, कि आस्से नी जाणदे; तिने भी तिन्हा किन्हें बोल्या, ता मां भी तुस्सा जो नी दसणा, कि ये काम हांऊ केस हका ले करहा । 28 तुस्से क्या समझ्हा ऐ? केसी माहणु रे दो म्हठे थे; तिने पैहले माहणु रे वाले जाई किन्हें बोल्या; म्हठेया आज अंगूरा रे बगीचे मन्झ जाई किन्हें काम कर । 29 तिने जबाब दितेया, मां नी जाणा, पर बादा मन्झ से पछताई किन्हें चली गया । 30 फेरी दूजे माहणु वाले जाई किन्हें तिने तेहडा ई बोल्या, तिने जबाब दितेया, ठीक आ, हांऊ जाहां; पर से नी गया । 31 इन्हा दुहीं मंझा ले कुने बापू री इच्छा पूरी किती? तिन्हे बोल्या, पैहले माहणुए: यीसूए तिन्हा किन्हें बोल्या, हांऊ तुस्सा किन्हें सच बोल्ला; कि चुंगी लैणे वाळे होर वेश्या तुस्सा ले पैहले परमेसरा रे राजा मन्झ दाखल हूणा । 32 क्योंकि यहुन्ना धर्मा रे रस्ते ले हुई किन्हें तुस्सा वाले आया, होर तुस्से तेसरा विस्वास नी कितेया: पर वेश्या होर चुंगी लैणे वाळे तेसरा विस्वास कितेया: होर तुस्से ये देखी किन्हें बादा मन्झ भी नी पछताये कि तेसरा विस्वास करी लैंदे । 33 एक होर दृष्टान्त सुणा: एक घर माल्क था, जिने अंगूरा रा बगीचा ल्याया; होर तेता रे चहुँ पासे बाड ल्याया; होर तेस बगीचे मन्झ रसा रा कुडं खणेयां; होर एक गुम्मट बणाया; होर किसाना जो तेता रा ठेका देई किन्हें से परदेसा जो चली गया । 34 जेबे फला रा टैम नेडे आया, ता तिने आपणे फल लेणे रे कठे आपणे दास किसाना वाले भेजे । 35 पर किसाने तेसरे दास पकड़े, कोई पिते, होर कोई मारी दिते; होर केसी जो पात्थर मारे । 36 फेरी तिने होर दास भेजे, जो पैहले ले ज्यादा थे; होर तिन्हे तिन्हा साउगी भी तेहडा ई कितेया । 37 पर बादा मन्झ तिने आपणे म्हठे जो तिन्हा वाले ये ग्लाई किन्हें भेजया, कि तिन्हा मेरे म्हठे री इज्जत करणी । 38 पर किसाने पुत्रा जो देखी किन्हें आपु मन्झ बोल्या ये ता वारिस आ, आऊआ, आस्से एस जो मारी देई ऐ: होर एस री मीरास लई लैंहां ऐं । 39 होर तिन्हें से पकड़ेया होर अंगूरा रे बगीचे ले बाहर काढी किन्हें मारी दितेया । 40 इधी कठे जेबे अंगूरा रे बगीचे रा माल्क आया, ता तेस तिन्हा किसाना साउगी क्या करणा? 41 तिन्हे तेस किन्हें बोल्या, तेस स्यों बुरे लोक बुरी तरहा ले नास करी देणे; होर अंगूरा रे बगीचा रे ठेका होरी किसाना जो देई देणा, जिन्हा टैमा पर तेस जो फल देया करणा । 42 यीसूए तिन्हा किन्हें बोल्या, क्या तुस्से कधी पवित्र शास्त्रा मन्झ ये नी पढेया, कि जेस पत्थरा जो राज्यमिस्त्रिये बेकार बोलिरा था, से ई कुणे रे सिरा रा पात्थर हुई गया? 43 ये प्रभु री तरफा ले हुएआ, होर ये आस्सा री नजरा मन्झ अदभुत आ, इधी कठे हांऊ तुस्सा किन्हें बोल्ला, कि परमेसरा रा राज तुस्सा

मंझा ले दूर करी दितेया जाणा; होर एहडी जाति जो दितेया जाणा जो तेता रा फल ल्याए । 44 होर जेस एस पात्थरा पर पऊणा, तेस चकानाचूर हुई जाणा: होर जेस पर तेस पऊणा, तेस से पिसी देणा । 45 महायाजक होर फरीसी तेसरे दृष्टान्ता जो सुणी किन्हें समझी गए, कि से आस्सा रे बारे मन्झ बोल्ला । 46 होर तिन्हें से पकड़वाणा चाहेया, पर स्यों लोका ले डरी गए क्योंकि स्यों तेस जो नबी रे रूपा मन्झ जाणहां ऐं थे ।

22 ¹ एता पर यीसू दबारा तिन्हा किन्हें दृष्टान्ता मन्झ बोल्दा लग्या । ² स्वर्गा रा राज तेस राजे साहीं आं, जिने आपणे म्हठे रा ब्याह कितेया । ³ होर तिने आपणे दास भेजे, कि स्यों सादिरे लोका जो ब्याहा री दावता मन्झ सादे; पर तिन्हे आऊणा नी चाहेया । ⁴ फेरी तिने होर कई दासा जो ये बोली किन्हें भेजया, कि सादिरे लोका किन्हें बोला, देखा; हांऊ दावत त्यार करी चुकिरा, होर मेरे बकरे होर पाळी रे पसु काटी जाई चुकिरे: होर सभ कुछ त्यार आ; ब्याह री दावता मन्झ आऊ आ । ⁵ पर स्यों लापरवाही करी किन्हें चली गये: कोई आपणी डोहरीया जो, कोई आपणे कामा जो । ⁶ होर बाकि बचिरे लोके राजे रे दासा जो पकड़ी किन्हें तिन्हा री बेज्जती किती होर स्यों मारी दिते । ⁷ राजे जो गुस्सा आया, होर तिने आपणी सेना भेजी किन्हें तिन्हा हत्यारे रा नास करी दितेया, होर तिन्हा रे नगर फूकी दिते । ⁸ तेबे तिने आपणे दासा किन्हें बोल्या, ब्याहा रा खाणा ता त्यार आ, पर सादिरे रे लोक लायक नी ठैहरे । ⁹ इधी कठे चौराहे पर जाऊआ, होर जितने लोक तुस्सा जो मिले; सभी जो ब्याह री दावता मन्झ सादा । ¹⁰ तेबे तिन्हे दासे सडका पर जाई किन्हें क्या बुरे, क्या खरे, जितने मिले, सभ कठ किते; होर ब्याहा रा घर मैहमाना किन्हें भहरी गया । ¹¹ जेबे राजा मैहमाना जो देखणे रे कठे अंदर आया; ता तिने तेथी एक माहणु देख्या, जिने जे ब्याहा रे कपड़े नी पैहनीरे थे । ¹² तिने तेस ले पुछेया हे दोस्त; तू ब्याहा रे कपड़े पैहने बगैर एथी किधियो आईरा? होर तेसरा मुंह बन्द हुई गया । ¹³ तेबे राजे दासा किन्हें बोल्या, एस रे हाथ पैर बान्ही किन्हें एस जो बाहर न्ह्यारे मन्झ सट्टी देआ, तेथी रोणा होर दांत पिसणा पऊणे । ¹⁴ क्योंकि सादे गईरे ता बौहत ऐ पर चुनिरे थोहडे ऐ । ¹⁵ तेबे फरीसिये जाई किन्हें आपु मन्झ स्लाह किती, कि तेस जो किहां गल्ला मन्झ फसाए । ¹⁶ होर तिन्हें आपणे चेले जो हेरोदिया साउगी तेस वाले ये बोलणे रे कठे भेज्या, कि हे गुरु, आस्से जाणहां ऐं; कि तू सच्चा आ; होर परमेसरा रा पैंडा सच्चाई किन्हें स्वाहां; होर केसी री परवाह नी करदा, क्योंकि तू माहणु रा मुंह देखी किन्हें गल्ला नी करदा । ¹⁷ इधी कठे तू आस्सा जो दस कि तू क्या समझ्हा? कैसरा जो कर देणा ठीक आ, कि नी । ¹⁸ यीसू ये तिन्हा री दुष्टता जाणी किन्हें बोल्या, हे कपटियो, तुस्से मेरी परखणी किधियो करहा ऐ? ¹⁹ कर देणे रा सिक्का मुंजो दसा:

तेबे स्यों तेस वाले एक दीनार लई आए।²⁰ तिने, तिन्हा किन्हें बोल्यो, ये मूर्ति होर नांऊ केस रा? ²¹ तिन्हें तेस किन्हें बोल्यो कैसरा रा; तेबे तिने, तिन्हा किन्हें बोल्यो; जो कैसरा रा आ, से कैसरा जो; होर जो परमेसरा रा आ, से परमेसरा जो देआ। ²² ये सुणी किन्हें स्यों हरान हुए, होर स्यों तेस जो छाडी किन्हें चली गये। ²³ तेस ई ध्याड़े, जेहड़ा स्टुकी बोल्ला ऐ कि मरिरे रा पुनरुत्थान नी हाया तेस वाले आये, होर तेस ले पुछेया। ²⁴ कि हे गुरु; मुसे बोलीरा था, कि अगर कोई बगैर सन्तान मरी जाए, ता तेसरा भाई तेस री लाडी जो ब्याही किन्हें आपणे भाई रे कठे वंस पैदा करे। ²⁵ आस्सा रे सात भाई थे; पैहला ब्याह करी किन्हें मरी गया; होर सन्तान नी हुणे री वजहा ले से आपणी लाडी जो आपणे भाई रे कठे छाडी गया। ²⁶ इहां ई दूजे होर त्रीजे भी कितेया, होर साता रे सात भाईया तक एहड़ा ई हुआ। ²⁷ सभी ले बाद से जनाने भी मरी गई। ²⁸ पुनरुत्थाना रे टैम, से तिन्हा साता मन्झा ले केस री लाडी हुणी? ²⁹ यीसूए तिन्हा जो जबाब दितेया, कि तुस्से पवित्र शास्त्र होर परमेसरा री सामर्थ नी जाणदे; इधी कठे तुस्से धोखे मन्झ ऐ। ³⁰ क्योंकि पुनरुत्थान हुणे पर ब्याह सादी ना हुणी; पर तिन्हा स्वर्गा मन्झ परमेसरा रे दूता साहीं हुणां। ³¹ पर मरीरे पुनरुत्थाना रे बारे मन्झ क्या तुस्से ये वचन नी पढेया जो परमेसरे तुस्सा किन्हें बोल्यो। ³² कि हांऊ अब्राहमा रा परमेसर, होर इसहाका रा परमेसर, होर याकुबा रा परमेसर आ? से मुर्देया रा परमेसर नी आ; पर जिउंदेया रा परमेसर आ। ³³ ये सुणी किन्हें लोक तेसरे उपदेसा ले हरान हुए। ³⁴ जेबे फरीसिये सुणेया, कि तिने सदुकिया रा मुंह बन्द करी दितेया; ता स्यों कठे हुये। ³⁵ होर तिन्हा मंझा ले एकी व्यवस्थापके परखणे रे कठे, तेस ले पुछेया। ³⁶ हे गुरु; व्यवस्था मन्झ कुण जे हुकम बडा आ? ³⁷ तिने तेस किन्हें बोल्यो, तू परमेसर आपणे प्रभु साउगी आपणे सारे मन होर आपणे सारे प्राण होर आपणे सारी बुद्धि किन्हें प्यार रख। ³⁸ बडा होर खास हुकम ता ये ई आ। ³⁹ होर तेस साहीं ये दूजा हुकम भी हाया, कि तू आपणे पड़ोसी किन्हें आपणे साहीं प्यार रख। ⁴⁰ ये ई दो हुकम सारी व्यवस्था होर नबिया रा आधार आ। ⁴¹ जेबे फरीसी कठे थे, यीसूए तिन्हा ले पुछेया। ⁴² कि मसीह रे बारे मन्झ तुस्से क्या समझा ऐ? से केस री सन्तान ई? तिन्हें तेस किन्हें बोल्यो दाऊदा री सन्तान। ⁴³ तिने तिन्हा ले पुछेया, ता दाऊद आत्मा मन्झ हुई किन्हें तेस जो प्रभु कि बोल्ला आ? ⁴⁴ कि प्रभुए, मेरे प्रभु किन्हें बोल्यो; मेरे दाई तरफ बैठ, जेबे तक कि हांऊ तेरे दुस्मना जो तेरे पैरा रे थाले नी करी देंऊ। ⁴⁵ जेबे दाऊद तेस जो प्रभु बोल्ला, ता से तेसरा म्हठा किहां बणेयां? ⁴⁶ तेसरे जबाबा मन्झ कोई भी एक गल नी बोली सक्या; पर तेस ध्याड़े ले केसी जो दबारा तेस ले कुछ पूछणे री हिम्मत नी हुई।

23 ¹ तेबे यीसूए भीड़ा होर आपणे चेले किन्हें बोल्यो। ² साखी होर फरीसी मुसा री गद्दी पर बैठीरे। ³ इधी कठे स्यों तुस्सा किन्हें जो कुछ बोले तेहड़ा ई करेया, होर मन्या; पर तिन्हा साहीं काम देख्या करदे; क्योंकि स्यों बोल्ला ऐ ता जरूर ऐ पर करदे नी। ⁴ स्यों एक एहड़े भारी बोझा जो जिन्हा जो चकणा मुशकिल आ, बान्ही किन्हें तिन्हा माहणु रे खऊआ पर रख्हा ऐ; पर आपु तिन्हा जो आपणी गुठी किन्हें सरकाणा नी चाहन्दे। ⁵ स्यों आपणे सारे काम लोका जो दसणे रे कठे करहा ऐ: स्यों आपणे ताबीजा जो चौड़े करहा ऐ, होर आपणे कपड़े री झालरा बडी करहा ऐ। ⁶ होर दावता मन्झ खास खास जगह, होर सभा मन्झ खास खास आसन। ⁷ होर बजारा मन्झ नमस्कार होर माहणु रे बीचा मन्झ रब्बी कैहलाणा तिन्हा जो खरा लघ्हा। ⁸ पर, तुस्से रब्बी देख्या कैहलांदे; क्योंकि तुस्सा रा एक ई गुरु आ: होर तुस्से सारे भाई ऐ। ⁹ होर धरती पर केसी जो आपणा बापू देख्या बोल्दे, क्योंकि तुस्सा रा एक ई बापू आ, जो स्वर्गा मन्झ आ। ¹⁰ होर स्वामी भी देख्या कैहलांदे, क्योंकि तुस्सा रा एक ई स्वामी आ, यानि मसीह। ¹¹ जो तुस्सा मन्झ बडा हो, से तुस्सा रा सेवक बणे। ¹² जो कोई आपणे आपा जो बडा बणाए, से छोटा कितेया जाणा: होर जो कोई आपणे आपा जो छोटा बणाहंगा, से बडा कितेया जाणा। ¹³ हे कपटी साखियो होर फरीसियो तुस्सा पर हाय! ¹⁴ तुस्से माहणु रे खिलाफ स्वर्गा रे राजे रे दरवाजे बन्द करहा, ना ता आपु ई तेस मन्झ दाखल हुहां ऐं होर ना तेस मन्झ दाखल हुणे वाळे जो दाखल हुणा देहां ऐं। ¹⁵ हे कपटी साखियो होर फरीसियो तुस्सा पर हाय! तुस्से एक आदमी जो आपणे पन्था मन्झ ल्याऊणे रे कठे सारे जल होर थला मंझा फिरहा ऐ, होर जेबे से तेस पन्था मन्झ आई जाहां, ता तुस्से तेस जो आपणे ले दो गुणा नरकीय बणाई देहां ऐं। ¹⁶ हे काणे अगुवो, तुस्सा पर हाय, जो बोल्ला ऐ कि अगर कोई मन्दरा री कसम खाये ता कुछ नी आ; पर अगर कोई मन्दरा रे सोने री कसम खाए ता तेस कस्मा रा पालन करणा जरूरी आ। ¹⁷ हे मूर्खो, होर काणेयो, कुण बडा आ, सोना या से मन्दरा जेस ले सोना पवित्र हुहां? ¹⁸ फेरी बोल्ला ऐ कि अगर कोई वेदी री कसम खाए ता कुछ नी आ, पर जो भेंट तेता पर ई, अगर कोई तेता री कसम खाए ता से आपणी कस्मा किन्हें बन्धी गया। ¹⁹ हे काणेयो, कुण बडा आ, भेंट ता वेदी: जेस ले भेंट पवित्र हुहां ई? ²⁰ इधी कठे जो वेदी री कसम खाहां, से तेस्सा वेदी री, होर तेता पर रखी री चीजा री कसम खाहां। ²¹ होर जो मन्दरा री कसम खाहां, से तेस्सा वेदी री, होर तेता मन्झ रैहणे वाळी चीजा री भी कसम खाहां। ²² होर जो स्वर्गा री कसम खाहां, से परमेसरा री राजगद्दी री होर तेता पर बैठणेवाळे री भी कसम खाहां। ²³ हे कपटी साखियो, होर फरीसियो, तुस्सा पर हाय; तुस्से पदीने होर सूफ होर

जीरे रा दसवां अंश देहां ऐं, पर तुस्से व्यवस्था री जरूरी गल्ला यानि न्याय, दया होर विस्वास छाडी दितीरा, चाहिए था कि इन्हा जो भी करदे रहन्दे, होर तिन्हा जो भी ना छाडदे । 24 हे काणे अगुवो, तुस्से मच्छरा जो ता छाणी देहां ऐं, पर ऊंटा जो निगळी जाहें । 25 हे कपटी शास्त्रियो, होर फरीसियो, तुस्सा पर हाय, तुस्से कौली होर थाळू जो ऊपरा ऊपरा ले ता मांज्हा ऐ, पर स्यों अन्दरा ले लालच होर असंयमा किन्हें भहरी रे । 26 हे काणे फरीसियो, पैहले कौली होर थाळू जो अन्दरा ले मांजा कि स्यों बाहरा ले भी साफ हो । 27 हे कपटी सास्त्रियो, होर फरीसियो, तुस्सा पर हाय; तुस्से चुना कितरी कब्रा साहीं ऐं जो ऊपरा ले ता खरे सुद्धा ऐ; पर अन्दरा ले मुर्दे री हड्डीया होर सभ किस्मा री मलिनता किन्हें भहरी री । 28 इहां ई तुस्सा भी ऊपरा ले ता माहणु जो धर्मी सुद्धा ऐ, पर अन्दरा ले कपट होर अधर्मा किन्हें भहरी रे । 29 हे कपटी सास्त्रियो, होर फरीसियो, तुस्सा पर हाय; तुस्से नबिया री कब्रा सजाहें होर धर्मियों री कब्र बणाहें । 30 होर बोल्हा ऐ, कि अगर आस्से आपणे बापदादा रे टैमा मन्झ हुन्दे ता नबिया री हत्या मन्झ तिन्हा रे साझीदार नी हुन्दे । 31 एता ले ता तुस्से आपणे आपा पर आपु ई गुआही देहां ऐं, कि तुस्से तिन्हा री संतान ऐ जिन्हें जे नबिया री हत्या किती । 32 ता तुस्से आपणे बापदादा रे पापा रा घडा भरा । 33 हे सांपो, हे सांपा रे बच्चेयो, तुस्से नरका रे दण्डा ले किहाँ बचणा? 34 इधी कठे देखा, मां तुस्सा वाले नबी होर बुद्धिमान होर सास्त्री भेजणे; होर तुस्सा तिन्हा मंझा ले कितने मारी देणे, होर कुसा पर चढा; होर कितने जो आपणी सभा मन्झ कोडे मारणे, होर एक नगरा ले दूजे नगरा तक तिन्हारा पीछा करदे रहणा । 35 जेस ले धर्मी हाबिला ले लई किन्हें विरिक्वाहा रे म्हठे जकरयाहा तक, जेस जो तुस्से मन्दरा होर वेदी रे बीचा मन्झ मारी दितीरा था, जितने धर्मिया रा खून धरती पर बहाया गईरा, से सब तुस्सा रे मूंडा पर पई जाणा । 36 हांऊ तुस्सा किन्हें सच बोल्हा, ये सब गल्ला एस्सा पीढी रे लोका पर आई जाणी । 37 हे यरुस्लेम, हे यरुस्लेम; तू जो नबिया जो मारी देहां, होर जो तेरे वाले भेजे गए, तिन्हा जो पत्थरवाह करहा, कितनी बारी मैं चाहेया कि जिहां मुर्गी आपणे बच्चेया जो आपणे फान्खा थाले कट्टा करहा ई, तिहां ई हांऊ भी तेरे बच्चे जो कट्टा करूं; पर तुस्से नी चाहेया । 38 देखा, तुस्सा रा घर तुस्सा रे कठे पूरी तरहा ले उजाडी जाणा । 39 इधी कठे हांऊ तुस्सा किन्हें बोल्हा; कि एभे ले जेबे तक तुस्सा नी बोलणा, कि भागा वाळा आ से, जो प्रभु रे नांऊआं ले आहूँआं, तेबे तक तुस्सा हांऊ दबारा नी देखणा ।

24 1 जेबे यीसू मन्दरा ले निकळी किन्हें जाया करहा था, ता तेसरे चेले तेस जो मन्दरा री रचना दसणे रे कठे तेस वाले आये । 2 तिने तिन्हा किन्हें बोल्या, क्या तुस्से ये सभ नी देखदे? हांऊ तुस्सा किन्हें सच बोल्हा; एथी पात्थरा पर पात्थर

भी नी छुटणा, जो ढाया नी जाणा । 3 होर जेबे से जैतूना रे पहाडा पर बैठी रा था, ता चेले लग जे तेस वाले आई किन्हें बोल्या, आस्सा किन्हें बोल कि ये गल्ला कधी हुणी? होर तुस्सा रे आऊणे रा, होर संसारा रे अन्ता रा क्या चिन्ह हुणा? 4 यीसू ऐ तिन्हा जो जबाब दितेया, सावधान रहा! कोई तुस्सा जो ना भरमाए । 5 क्योंकि कई एहडे हुणे जिन्हा मेरे नांऊआं ले आई किन्हें बोलणा, कि हांऊ मसीह आ: होर कई भरमाणे । 6 तुस्सा लडाइया होर लडाइया री चर्चा सुणनी; देखा डरदे देखा क्योंकि इन्हा रा हुणा जरूरी आ, पर तेस टैम अन्त नी हुणा । 7 क्योंकि जाति पर जाति, होर राज्या पर राज्या चढाई करणी, होर जगहा जगहा अकाल पऊणे, होर हिलण हुणे । 8 ये सभ गल्ला पीडा री सुरुआत हुणी । 9 तेबे तिन्हा तुस्सा जो दुःख देणे रे कठे पकड़वाणा, होर तुस्से मारी देणे होर मेरे नांऊआं री वजहा ले सब जातिया रे लोका तुस्सा किन्हें बैर रखणा । 10 होर तेबे कईया ठोकर खाणी, होर एक दूजे किन्हें बैर रखणा । 11 होर कई झूठे नबी उठ खडे हुणे, होर कई भरमाणे । 12 होर पाप बढने ले कईया रा प्यार ठंडा हुई जाणा । 13 पर जो अन्ता तक धीरज रखगा, तेसरा ई उद्धार हुणा । 14 होर राज्या रा ये सुसमाचार सारे संसारा मन्झ प्रचार कितेया जाणा, कि सब जातिया पर गुआही हो, तेबे अन्त आई जाणा । 15 इधी कठे जेबे तुस्से लोक तेस्सा उजाडणेवाली घृणित चीजा जो जेस री चर्चा दानियल नबी रे ज्रीए हुई री थी, पवित्र स्थाना मन्झ खहडी रे देखो, (जो पढे, से समझी जाए) । 16 तेबे जो यहूदिया मन्झ हो स्यों पाहडा पर भगी जाए । 17 जो छता पर हो, स्यों आपणे घरा मन्झ स्मान लेणे रे कठे नी उतरे । 18 होर जो डोहरीया मन्झ हो, स्यों आपणा कपडा लेणे रे कठे पीछे ना मुडे । 19 तिन्हा ध्याडे मन्झ जो गर्भवती होर दूध पिआंदी हुणी, तिन्हा रे कठे हाय, हाय । 20 होर प्रार्थना करा; कि तुस्सा जो सर्दी मन्झ या सब्ता रे ध्याडे भगणा नी पई जाए । 21 क्योंकि तेस टैम एहडा भारी दुःख हुणा, जो संसारा ले एबे तक ना ता हुआ, होर ना कधी हुणा । 22 होर अगर स्यों ध्याडे नी घटाए जांदे, ता कोई प्राणी नी बचदा; पर चुणीरे लोका री वजहा ले स्यों ध्याडे घटाये जाणे । 23 तेस टैम अगर कोई तुस्सा किन्हें बोले, कि देखा, मसीहा एथी आ । या तेथी आ ता विस्वास देख्या करदे । 24 क्योंकि झूठे मसीह होर झूठे नबी पैदा हुई जाणे, होर बडे चिन्ह होर अदभुत काम दसणे, कि अगर हुई सके ता चुणी रे जो भी भरमाई दे । 25 देखा, मैं पैहले ई तुस्सा किन्हें ये सब कुछ बोली दितीरा । 26 इधी कठे अगर स्यों तुस्सा किन्हें बोले, देखा, से जंगला मन्झ आ, ता बाहर देख्या चली जांदे, देखा, से छता ऊपर आ; ता विस्वास देख्या करदे । 27 क्योंकि जिहां बिजली पूर्वा ले निकळी किन्हें पश्चिमा तक चमकहा ई, तेहडा ई माहणु रे पुत्रा रा भी आऊणा हुणा । 28 जेथी ल्हास हो, तेथी गिद्ध कट्टे हुणे । 29 तिन्हा ध्याडे क्लेसा

(दुःखा) ले बाद एकदम सूरज काळा (न्ह्यारा) हुई जाणा, होर चान्दा रा प्रयासा चली जाणा, होर तारे सर्गा ले पई (टिरी) जाणे होर सर्गा री सक्तिया हिलाई जाणी । 30 तेबे माहणु रे पुत्रा रा चिन्ह सर्गा मन्झ सुझणा, होर तेबे धरती रे सभ कुला रे लोका छाती पिठणी; होर माहणु रे पुत्रा जो बड़ी सामर्थ होर म्हीमा साउगी सर्गा रे बादला पर आऊन्दे देखणा । 31 होर तेस तुरही री अवाजा साउगी, आपणे दूत भेजणे, होर तिन्हा एस पुन्हा ले लई किन्हें तेस पुन्हा तक, चार दिसा ले तेसरे चुणी रे कठे करणे । 32 अंजीरा रे डाळा ले ये दृष्टान्त सिखा: जेबे तेस री डाळी नरम हुई जाहीं होर पातर निकळदे लघ्हा ऐ; ता तुस्से जाणी लैंहां ऐं, कि गर्मी रा टैम नेडे आ । 33 इधी कठे जेबे तुस्से इन्हा गल्ला जो हुंदे देखो, ता जाणी लया, कि से नेडे आ, बल्कि दरवाजे वाले आ । 34 हांऊ तुस्सा किन्हें सच बोल्हा, कि जेबे तक ये सभ गल्ला पूरी नी हुई ले, तेबे तक ये पीढी नी जाणी । 35 सर्ग होर धरती टळी जाणे, पर मेरी गल्ला कधी ना टळणी । 36 तेस ध्याडे होर तेस घडी रे बारे मन्झ कोई नी जाणदा, ना स्वर्गा रे दूत, होर ना पुत्र, पर सिर्फ पिता । 37 जिहां नूहा रे ध्याडे थे, तिहां माहणु रे पुत्रा रा आऊणा भी हुणा । 38 क्योंकि जिहां जल-प्रलया रे टैमा मन्झ पैहले, जेस ध्याडे तक कि नूह जहाजा पर नी चढेया, तेस ध्याडे तक लोक खांदे पींदे रहे, होर तिन्हा मन्झ ब्याह सादी हुन्दी रही । 39 होर जेबे तक जल-प्रलय तिन्हा सारेया जो बहाई किन्हें नी लई गया, तेबे तक तिन्हा जो कुछ भी पत्ता नी लग्या; तिहां ई माहणु रे पुत्रा रा आऊणा भी हुणा । 40 तेस टैम दो जण डोहरीया मन्झ हुणे, एक लई लैणा होर दूजा छाडी दितेया देणा । 41 दो जनानियां चक्की पिसदी हुणी, एक लई जाणी होर दूजी छाडी दिती जाणी । 42 इधी कठे जागदे रहो, क्योंकि तुस्से नी जाणदे कि तुस्सा रा प्रभु केस ध्याडे आउणा । 43 पर ये जाणी लो कि अगर घरा रा स्वामी जाणदा हुन्दा कि चोर केस टैम आऊणा, ता से जागदा रहैन्दा; होर आपणे घरा मन्झ सेंघ लगणे नी देंदा । 44 इधी कठे तुस्से भी त्यार रहा, क्योंकि जेस टैमा रे बारे मन्झ तुस्से सोच्दे भी नी, तेस ई टैम माहणु रा पुत्र आई जाणा । 45 से भरोसे रे लायक होर बुद्धिमान दास कुण आ, जेस जो स्वामीये आपणे नौकर चाकरा पर मुखिया नियुक्त करणा, कि से तिन्हा जो टैमा पर खाणा दे? 46 भागा वाळा आ, से दास, जेस जो तेसरा स्वामी आई किन्हें एहडा ई करदे पाये । 47 हांऊ तुस्सा किन्हें सच बोल्हा; तेस से आपणी सारी धन दौलता पर मुखिया नियुक्त करणा । 48 पर अगर से दुष्ट दास सोच्दा लगे, कि आस्सा रे स्वामी रे आऊणे मन्झ हली देर ई । 49 होर आपणे साथी दासा जो मारदा पिटदे लगे, होर दारु पीणे वाळे लोका साउगी खाए पीए । 50 ता तेस दासा रा स्वामी एहडे ध्याडे आउणा, जेबे से तेस रा इंतजार नी करदा हो । 51 होर एहडे टैमा मन्झ आऊणा जो से नी जाणदा

हो, होर तेस जो बड़ी भारी ताडना देई किन्हें, तेसरा भाग कपटिया साउगी ठैहराणा: तेथी रोणा होर दांत पिसणा हुणा ।

25 ¹ तेबे स्वर्गा रा राज तिन्हा दस कुआरिया साहीं आं जो आपणी मशालें लई किन्हें लाडे किन्हें मिलणे रे कठे निकळी । ² तिन्हा मन्झा ले पांज मुख होर पांज समझकार थी । ³ मूर्ख आपणी मशालें ता लई ली, पर आपणे साऊगी तेल नी लया । ⁴ पर समझकारे आपणी मशाला साऊगी आपणी कुप्पिया मन्झ तेल भी भरी लया । ⁵ जेबे लाडे रे आऊणे मन्झ देर हुई गई, ता स्यों सभ निंद्रा रे मारे उन्चदी लगी; होर सई गई । ⁶ आधी राती हाल्ला पया, कि देखा, लाडा आया करहा , तेस किन्हें मिलणे रे कठे चला । ⁷ तेबे स्यों सभ कुआरिया उठी किन्हें आपणी आपणी मशाला ठीक करदे लगी । ⁸ होर मूर्ख समझदारा किन्हें बोल्या आपणे तेल मन्झा ले कुछ आस्सा जो भी दे, क्योंकि आस्सा री मशाला बुझी जाया करहा ई । ⁹ पर समझकारे जबाब दितेया कि हुई सकहा कि आस्सा रे होर तुस्सा रे कठे ये तेल पूरा नी हो; खरा ता ये आ, कि तुस्से बेचणेवाळे वाले जाई किन्हें आपणे कठे तेल मूल्ले लई आऊआ । ¹⁰ जेबे स्यों तेल मुल्ले लैणे रे कठे जाया करहा ई थी, ता लाडा पूजी गया, होर जो त्यार थी, स्यों तेस साऊगी ब्याह रे घरा मन्झ चली गई होर दरवाजा बन्द करी दितेया गया । ¹¹ एता ले बाद स्यों दूजी कुआरिया भी आई किन्हें बोल्दी लगी, हे स्वामी, हे स्वामी, आस्सा रे कठे दरवाजा खोल्ही देआ । ¹² तिने जबाब दितेया, कि हांऊ तुस्सा किन्हें सच सच बोल्हा; हांऊ तुस्सा जो नी जाणदा । ¹³ इधी कठे जागदे रहा, क्योंकि तुस्से ना ता तेस ध्याडे जो जाणहां ऐं, ना तेस्सा घडी जो । ¹⁴ क्योंकि ये तेस माहणु री दसा साहीं आं जिने जे परदेसा जो जाणे रे टैमा आपणे दास सादी किन्हें, आपणी संपत्ति तिन्हा जो सौंपी दिती । ¹⁵ होर तिने एकी जो पांज तोडे, होर दूजे जो दो, होर त्रीजे जो एक: यानि हर एकी जो तेस री सामर्था रे मुताबक दितेया, होर तेबे से परदेसा जो चली गया । ¹⁶ तेबे जेस जो पांज तोडे मिले थे, तिने झटपट जाई किन्हें तिन्हा किन्हें लेण देण कितेया, होर पांज तोडे होर कमाए । ¹⁷ इहां ई जेस जो दो मिलीरे थे, तिने भी दो होर कमाए । ¹⁸ पर जेस जो एक मिलिरा था, तिने जाई किन्हें माटा खणेया, होर आपणे स्वामी रे ढब्बे ल्कोई दिते । ¹⁹ बौहत ध्याडे ले बाद तिन्हा दासा रा स्वामी आई किन्हें तिन्हा ले लेखा लैंदा लग्या । ²⁰ जेस जो पांज तोडे मिलीरे थे, तिने पांज तोडे होर ल्याई किन्हें बोल्या हे स्वामी, तुस्से मुन्जो पांज तोडे सौंपी रे थे, देख मैं पांज तोडे होर कमाए । ²¹ तेसरे स्वामीये तेस्स किन्हें बोल्या, बौहत बढिया, हे खरे होर भरोसे रे लायक दास, तू थोहडे मन्झ भरोसे रे लायक रहैया, मां तू बौहत चीजा रा अधिकारी बनाणा आपणे स्वामी री खुसी मन्झ भागीदार बण । ²² होर जेस जो दो तोडे मिलिरे थे, तिने भी आई किन्हें बोल्या; हे स्वामी तुस्से

मुंजो दो तोड़े सौंपिरे थे, देखा, मैं भी दो तोड़े होर क्माए ।
 23 तेसरे स्वामीये तेस किन्हें बोल्या, बौहत बढिया खरे होर
 भरोसे रे लायक दास, तू थोहडे मन्झ भरोसे रे लायक रहैया,
 मां तू बौहत सारी चीजा रा अधिकारी बनाणा आपणे स्वामी री
 खुसी मन्झ भागीदार बण । 24 तेबे जेस जो एक तोड़ा मिलिरा
 था, तिने आई किन्हें बोल्या; हे स्वामी, हांऊ तुजो जाणहां था,
 कि तू कठोर माहणु आ, होर जेथी तू बाहन्दा नी तेथी तू करहा
 । 25 इधी कठे हांऊ डरी गया होर जाई किन्हें तुस्सा रा तोड़ा
 माटे मन्झ ल्कोई दितेया; देखा, जो तुस्सा रा आ, से ये आ ।
 26 तेसरे स्वामीये तेस जो जबाब दितेया, कि हे दुष्ट होर आलसी
 दास; जेबे तू ये जाणहां था, कि जेथी मैं नी बाहेया तेथी हांऊ
 काट्हा; होर जेथी मैं बेजा नी बाहेया नी तेथी हांऊ कठा करहा
 । 27 ता तुजो मेरा पैसा सौहकारा वाले जम्हा करवाणा चाहिए
 था, ताकि हांऊ आई किन्हें आपणा पैसा ब्याजा समेत लई लैंदा
 । 28 इधी कठे से तोड़ा तेस ले लई लऊआ, होर जेस वाले दस
 तोड़े ऐ, तेस जो देई देआ । 29 क्योंकि जेस केसी वाले हाया, तेस
 जो होर दितेया जाणा, होर तेस वाले बौहत हुई जाणा: पर जेस
 वाले नी आ, तेस ले से भी लई लैणा जो तेस वाले आ । 30 होर
 एस नकम्मे दासा जो बाहर न्ह्यारे मन्झ सट्टी देआ, जेथी रोणा
 होर दांत पिसणा हुणा । 31 जेबे माहणु रे पुत्रा आपणी म्हीमा
 मन्झ आउणा, होर सारे स्वर्गदूत तेस साऊगी आऊणे ता तेस
 आपणी म्हीमा री राजगद्दी पर विराजमान हुणा । 32 होर सारी
 जातिया तेसरे साम्हणे कठी किती जाणी; होर जिहां पुहाल
 भेडा जो बकरिया ले लग करहा, तिहां ई तेस स्यों एक दूजे ले
 लग करणे । 33 होर तेस भेडा आपणी दाई वखा होर बकरिया
 बाई वखा खड़ी करणी । 34 तेबे राजे आपणी दाई वखा वाळी
 किन्हें बोल्या, हे मेरे पिता रे धन्य लोको, आऊआ, तेस राज्या रे
 आधिकारी हुई जाऊआ, जो संसारा री सुरुआता ले तुस्सा रे कठे
 त्यार कितीरा । 35 क्योंकि हांऊ भूखा था, होर तुस्से मुंजो खाणे
 जो दितेया; हांऊ सोख्हा था, होर तुस्से मुंजो पाणी प्याया,
 हांऊ परदेसी था, होर तुस्से हांऊ आपणे घरा मन्झ नी ठैहराया
 । 36 हांऊ नांगा था, तुस्से मुंजो कपड़े पन्ह्याए; हांऊ बमार था,
 तुस्से मेरी खैर खबर लई, हांऊ जेहला मन्झ था, तुस्से मेरे किन्हें
 मिल्दे आए । 37 तेबे धर्मीया तेस जो जबाब देणा कि हे प्रभु,
 आस्से केभे तुस्से भूखे देखे होर तुस्सा जो खाणा खुआया? या
 सोख्हा देख्या, होर पाणी प्याया? 38 आस्से केभे तुस्से परदेसी
 देखे होर आपणे घरा मन्झ ठैहराया या नांगे देखे, होर कपड़े
 पन्ह्याए? 39 आस्से केभे तुस्से बमार या जेहला मन्झ देख्या होर
 तेरे किन्हें मिल्दे आए? 40 तेबे तेस राजे तिन्हा जो जबाब देणा;
 हांऊ तुस्सा किन्हें सच बोल्हा; कि तुस्से जो मेरे इन्हा छोटे ले
 छोटे भाइया मंझा ले केसी एकी साऊगी कितेया, से मेरे साउगी
 कितेया । 41 तेबे तेस बाई वखा वाळी किन्हें बोलणा, हे श्रापित

लोको, मेरे साम्हणे ले तेस अनन्त आगा मन्झ चली जाऊआ, जो
 सैतान होर तेसरे दूता रे कठे त्यार किती गईरी । 42 क्योंकि हांऊ
 भूखा था, होर तुस्से मुंजो खाणे जो नी दितेया, हांऊ सोख्हा था,
 होर तुस्से मुंजो पाणी नी प्याया । 43 हांऊ परदेशी था, होर तुस्से
 मुंजो आपणे घरा मन्झ नी ठैहराया; हांऊ नांगा था, होर तुस्से
 मुंजो कपड़े नी पन्ह्याए; हांऊ बमार होर जेहला मन्झ था, होर
 तुस्से मेरी खैर खबर नी लई । 44 तेबे तिन्हा जबाब देणा, कि
 हे प्रभु, आस्से तुस्से केभे भूखे, या सोख्हे, या परदेशी, या नांगे,
 या बमार, या जेहला मन्झ देखे, होर तुस्सा री सेवा टैहल नी
 किती? 45 तेबे तेस तिन्हा जो जबाब देणा, हांऊ तुस्सा किन्हें
 सच बोल्हा, कि तुस्से जो इन्हा छोटे ले छोटे मंझा ले केसी एकी
 किन्हें नी कितेया, से मेरे किन्हें भी नी कितेया । 46 होर इन्हा
 अनन्त दण्ड भोगणा पर धर्मीया अनन्त जिंदगी मन्झ दाखल
 हुणा ।

26 ¹जेबे यीसु ये सभ गल्ला बोली बैठ्या, ता से आपणे
 चले किन्हें बोल्दा लग्या । ²तुस्से जाणहां ऐं कि दो
 ध्याडे बाद फसहा रा साजा आ होर माहणुआ रा पुत्र कूसा पर
 चढाणे रे कठे पकड़ाया जाणा । ³तेबे महायाजक होर प्रजा रे
 पुरनिये काइफा नांऊआं रे महायाजका रे दरबारा मन्झ कठा
 हुए । ⁴होर स्यों आपु मन्झ सोच विचार करदे लगे कि यीशु जो
 धोखे किन्हें पकड़ाई किन्हें मारी दे । ⁵पर स्यों बोल्हा ऐ थे, कि
 साजे रे ध्याडे नी; केते एहडा नी हो कि लोका मन्झ हाल्ला पई
 जाए । ⁶जेबे यीशु बैतनिय्याहा मन्झ समौन कोढी रे घरा मन्झ
 था । ⁷तेबे एक जनाने सगंमरमरा रे भांडे मन्झ कीमती इत्र
 लई किन्हें तेस वाले आई, होर जेबे से खाणा खांदे बैठी रा था,
 ता तेसरे मुण्डा पर दली दितेया । ⁸ये देखी किन्हें, तेसरे चले
 जहळी किन्हें बोल्दे लगे, ये इत्र किधियो बर्बाद करी दितेया?
⁹ये इत्र ता खरी कीमता मन्झ बेची किन्हें गरीबा जो बांडी
 सक्हा ऐ थे । ¹⁰ये जाणी किन्हें यीसूए तिन्हा किन्हें बोल्या,
 तुस्से एस्सा जनानिया जो किधियो परेसान करहा ऐ? तेस्से मेरे
 किन्हें भलाई किती । ¹¹गरीब ता तुस्सा साउगी हमेसा रैंहां ऐं,
 पर मां तुस्सा किन्हें हमेसा साउगी नी रहणा । ¹²तेसे मेरे सरीरा
 पर जो इत्र छिड़क्या, तेस्से ये मेरे दफनाये जाणे रे कठे कितेया
 । ¹³हांऊ तुस्सा किन्हें सच बोल्हा, कि सारे संसारा मन्झ जेथी
 केथी ये सुसमाचार प्रचार कितेया जाणा, तेथी तेस्सा रे एस
 कामा रा बखान भी तेस्सा री यादा मन्झ कितेया जाणा । ¹⁴तेबे
 यहूदा इस्करियोतीए जो बारा चले मंझा ले एक था, तिने प्रधान
 याजका वाले जाई किन्हें बोल्या । ¹⁵अगर हांऊ तेस जो तुस्सा
 रे हाथा मन्झ पकड़वाई दूँ; ता तुस्सा मुंजो क्या देणा? तिने तेस
 जो तीह चांदी रे सिक्के तोली किन्हें देई दिते । ¹⁶होर से तेस ई
 टैमा ले तेस जो पकड़वाणे रा मौका तोपदा लग्या । ¹⁷अखमीरी
 रोटी रे साजे रे पैहले ध्याडे चले यीसू वाले आई किन्हें पुछदे लगे,

"तू क्या चाहाना कि आस्से तेरे कठे फसह खाणे री तयारी करे? 18 तिने बोल्या, नगरा मन्झ फलाणे माहणु वाले जाई किन्हें तेस किन्हें बोला, कि गुरु बोल्ला, कि मेरा टैम नेडे आ, मां तेरे घरा आपणे चले साउगी साजा मनाणा।" 19 होर चले यीसू रा हुक्म मन्या होर फसहा री तयारी किती। 20 जेबे साहन्ज हुई, ता से बारा चले साउगी खाणा खांदे बैठ्या। 21 जेबे स्यों खाणा खाया करहा ऐ थे, तेबे तिने बोल्या, हांऊ तुस्सा किन्हें सच बोल्ला, कि तुस्सा मंझा ले एकिया हांऊ पकड़वाणा। 22 होर एता पर स्यों दुःखी हुई गये होर हर एक तेस ले पुछद लग्या, हे गुरु, क्या से हांऊ आं? 23 तिने जबाब दित्या, कि जिने मेरे साउगी थाळी मन्झ हाथ पाईरा। 24 माहणु रा पुत्रा ता जेहडा तेसरे बारे मन्झ लिखीरा, तेहडा ई हूणा; पर हाय तेस माहणु पर जेस री वजहा ले माहणु रा पुत्र पकड़वाया जाहां: अगर तेस माहणु रा जन्म नी हुन्दा ता तेस रे कठे ये खरा हुन्दा। 25 तेबे तेसरे पकड़वाणे वाळे यहूदा इस्करयोतिऐ बोल्या, हे रब्बी, क्या से हांऊ आं? 26 तिने तेस किन्हें बोल्या, तैं बोली दितेया: जेबे स्यों खाया करहा ऐ थे तेबे यीसूए रोटी लई, होर आसीष मांगी किन्हें तोडी, होर चले जो देई किन्हें बोल्या, लऊआ, खाऊआ ये मेरा सरीर आ। 27 फेरी तिने कटोरा लई किन्हें, धन्यवाद कितेया, होर तिन्हा जो देई किन्हें बोल्या, तुस्से सारे एता मन्झा ले पीया। 28 क्योंकि ये वाचा रा मेरा से खून आ, जो सभी रे पापा री माफी रे कठे बहाया जाहां। 29 हांऊ तुस्सा किन्हें बोल्ला, कि अंगूरा रा ये रस मां तेस ध्याडे तक कधी नी पीणा, जेबे तक तुस्सा साउगी आपणे पिता रे राजा मन्झ नऊआं नी पिंऊ। 30 फेरी स्यों भजन गाई किन्हें जैतूना रे पहाड़ा पर गये। 31 तेबे यीसूए तिन्हा किन्हें बोल्या, तुस्सा सभीया आज राती मेरे बारे मन्झ ठोकर खाणी; क्योंकि लिखीरा, कि मां चरवाहा मारणा; होर झुण्डा री भेडा तितर बितर हुई जाणी। 32 पर मां आपणे जी उठणे ले बाद तुस्सा ले पैहले गलीला जो जाणा। 33 एता पर पतरसे तेस किन्हें बोल्या, अगर सब तेरे बारे मन्झ ठोकर खाए ता खाए, पर मां कधी भी ठोकर नी खाणी। 34 यीसूए तेस किन्हें बोल्या, हांऊ तेरे किन्हें सच बोल्ला, कि आज राती ई कुक्कडा रे झांग देणे ले पैहले, तुध तीन बारी मुखरी जाणा। 35 पतरसे तेस किन्हें बोल्या, अगर मुंजो तेरे साउगी मरणा भी पई जाए, तेबे भी, मां कधी नी मुखरणा: होर एहडा ई सभ चले भी बोल्या। 36 तेबे यीसू आपणे चले साउगी गतसमनी नांऊआं री जगह मन्झ आया होर आपणे चले किन्हें बोल्ला लग्या, एथी बैठी रह्या, जेबे तक कि हांऊ तेथी जाई किन्हें प्राथना नी करूं। 37 होर से पतरस होर जब्दी रे दुंहें म्हेठे जो आपणे साउगी लई गया, होर उदास होर परेसान हुंदा लग्या। 38 तेबे तिने तिन्हा किन्हें बोल्या; मेरा जीऊ बौहत उदास आ, एथी तक कि मेरा प्राण निकळणे तक तुस्से एथी रुका, होर मेरे साउगी

जागदे रहा। 39 फेरी से थोहडा जे अगे जाई किन्हें मुंहा रे भारे पई गया, होर ये प्रार्थना करदा लग्या, कि हे मेरे पिता, अगर हुई सके, ता ये कटोरा मेरे ले टळी जाये; तेबे भी जेहडा हांऊ चाहाना तेहडा नी, पर जेहडा तू चाहाना तेहडा ई हो। 40 फेरी से चले वाले आया होर तिने स्यों सुतिरे देखे, होर तिने पतरसा किन्हें बोल्या, क्या तुस्से मेरे साउगी एक घडी भी जागी नी सके? 41 जागदे रहा होर प्रार्थना करा कि तुस्से परीक्षा मन्झ नी पओ; आत्मा ता तयार ई, पर सरीर कमजोर आ। 42 फेरी तिने दूजी बारी जाई किन्हें ये प्रार्थना किती, के हे मेरे पिता, अगर ये मेरे पीये बगैर नी हटी सकदा ता तेरी इच्छा पूरी हो। 43 तेबे तिने आई किन्हें स्यों दबारा सुतिरे देखे, क्योंकि तिन्हा री हाखिया निंद्रा किन्हें भहरी री थी। 44 होर से तिन्हा जो छाडी किन्हें दबारा चली गया, होर से ई गल बोली किन्हें, तिने त्रीजी बारी प्रार्थना किती। 45 तेबे तिने चले वाले आई किन्हें बोल्या, ऐबे सौउंदे रहा, होर अराम करा; देखा से टैम आई गईरा होर माहणु रा पुत्र पापिया रे हाथा पकड़वाया जाहां। 46 उठा, चला; देखा, मेरा पकड़वाणेवाळा नेडे आई गईरा। 47 से एहडा बोल्ला ही लगिरा था, कि देखा यहूदा जो बारा मन्झा ले एक था, आया, होर तेस साउगी महायाजक होर लोका रे पुरनियें री तरफा ले बडी भीड़, तलवार होर डंडे लई किन्हें आये। 48 तेसरे पकड़वाणे वाळे तिन्हा जो ये दसी दितीरा था कि जेस जो हांऊ चुम्बन करूं से ई यीसू हूणा; तेस जो पकड़ी लया। 49 होर तिने झट पट यीसू वाले आई किन्हें बोल्या; हे रब्बी नमस्ते; होर तिने तेसरा चुम्बन लया। 50 यीसूए तिन्हा किन्हें बोल्या, हे दोस्त, जेस कामा रे कठे तू आईरा, तेता जो करी ले। तेबे तिन्हे तेस वाले आई किन्हें यीसू जो पकड़ी किन्हें गिरफ्तार करी लया। 51 होर देखा, यीसू रे साथिया मंझा ले एकीये हाथ बढ़ाई किन्हें आपणी तलवार खिन्जी होर महायाजका रे दासा पर चलाई किन्हें तेसरा कान काटी दितेया। 52 तेबे यीसूए तेस किन्हें बोल्या; आपणी तलवार म्याना मन्झ रखी ले क्योंकि जो तलवार चलाहें; स्यों सभ तलवारा किन्हें नास किते जाणे। 53 क्या तू नी समझदा, कि हांऊ आपणे बापू ले बिनती करी सकहा; होर तेस स्वर्गदूता री बारा पलटना ले भी ज्यादा मेरे वाले एभे हाजर करी देणे? 54 पर पवित्र सास्त्रा री गल्ला किहां पूरी हुणी, जिहां इन्हा रा हूणा जरूरी आ? 55 तेस टैम यीसूए भीड़ा किन्हें बोल्या; क्या तुस्से तलवार होर डंडे लई किन्हें मुंजो डाकू साहीं समझी किन्हें पकड़णे रे कठे निकळी रे? हांऊ हर ध्याडे मंदरा मन्झ बैठी किन्हें उपदेस देहां था, होर तुस्से हांऊ नी पकड़ेया। 56 ये सभ इधी कठे हुआ कि नबी रे बचन पुरे हो: तेबे सभ चले तेस जो छाडी किन्हें भगी गये। 57 तेबे यीसू रे पकड़ने वाळे तेस जो काईफा नांऊआं रे महायाजका वाले लई गए, जेथी सास्त्री होर पुरनियें कठा हुई रे थे। 58 होर

पतरस दूरा ले तेसरे पीछे-पीछे महायाजका रे आन्घणा तक गया, होर अंदर जाई किन्हें अन्त देखणे रे कठे पैहरेदारा किन्हें बैठी गया।⁵⁹ महायाजक होर सारी महासभा यीसू जो मारणे रे कठे झूठी गुआहा रे खोजा मन्झ थे⁶⁰ पर टोळी नी पाए जेबकी कई झूठे गुआहे अगे आई किन्हें झूठ बोल्या।⁶¹ अंता मन्झ दो जणे आये, होर बोल्दे लगे कि इने बोलिरा; कि हांऊ परमेसरा रा मंदर तीन ध्याडे मन्झ ढाई सकहा होर एस जो तीन ध्याडे मन्झ बणाई सकहा।⁶² तेबे महायाजके खडे हुई किन्हें तेस किन्हें बोल्या, क्या तू कोई जबाब नी देंदा? ये लोक तेरे खलाफ क्या गुआही देहां ऐं।⁶³ पर यीसू चुप रहे: तेबे महायाजके तेस किन्हें बोल्या, हांऊ तुजो जिन्दे परमेसरा री कसम देहां, कि अगर तू परमेसरा रा पुत्र आ ता तू आस्सा किन्हें बोली दे।⁶⁴ यीसूए तेस किन्हें बोल्या; तैं आण्डुए बोली दितेया: पर हांऊ तुस्सा किन्हें ये भी बोल्हा, कि एभे ले तूस्सा माहणु रे पुत्रा जो सर्वसक्तिमान परमेसरा रे दाई तरफ बैठीरे, होर सर्गा रे बादला पर आउन्दे देखणा।⁶⁵ तेबे महायाजके आपणे कपडे छेकी किन्हें बोल्या, इने परमेसर रा बेज्जती किती, एबे आस्सा जो गुआहा री क्या जरूरत ई? ⁶⁶ देखा तुस्से एभे ये निन्दा आण्डुए सुणी लई! तुस्से क्या सोच्हा ऐ? तिन्हे जबाब दितेया, ये मारे जाणे लायक आ।⁶⁷ तेबे तिन्हे तेसरे मुंहा पर थुक्या, होर तेस जो मुक्के मारे, होरिये थप्पड मारी किन्हें बोल्या।⁶⁸ हे मसीह, भविष्यबणी करी किन्हें बोल: कि तू कुने मारेया? ⁶⁹ होर पतरस बाहर आंघणा मन्झ बैठी रा था: कि एक नौकराणी तेस वाले आई होर बोल्या; तू भी यीसू गलीली साउगी था।⁷⁰ तिने सभे रे साम्हणे ये बोली किन्हें नाह किती, होर बोल्या, हांऊ नी जाणदा तू क्या लगरी बोल्दी।⁷¹ जेबे से डेहळी ले बाहर चली गया, ता दूजीए तेस जो देखी किन्हें तिन्हा किन्हें जो तेथी थे बोल्या; ये भी ता यीसू नासरी साउगी था।⁷² तिने कसम खाई किन्हें दबारा नाह किती कि हांऊ तेस आदमी जो नी जाणदा।⁷³ थोहडी देरा ले बाद, जो तेथी खहडी रे थे, तिन्हे पतरसा वाले आई किन्हें बोल्या, सच्चे तू भी तिन्हा मन्झा ले एक आ; क्योंकि तेरी बोली तेरा भेद खोली देहां ई।⁷⁴ तेबे से धिक्कार देणे होर कसम खांदा लग्या, कि हांऊ तेस माहणु जो नी जाणदा; होर तेभे कुकडे झांग दिती।⁷⁵ तेबे पतरसा जो यीसू री बोलिरी गल याद आई, कि कुक्कडा रे झांग देणे ले पैहले तुध तीन बारी मेरी नाह करणी होर से बाहर जाई किन्हें जोरा-जोरा किन्हें रोंदा लग्या।

27 ¹जेबे भ्याग हुई, ता सारे महायाजके होर लोका रे पुरनियें यीसू जो मारणे री स्लाह किती ²तिने से बान्हया होर लई जाई किन्हें पिलातुस हाक्मा रे हाथा मन्झ सौपी दितेया। ³जेबे तेस जो पकड़वाणे वाळे यहूदे देख्या कि तेस जो दोषी ठैहराई जाई चुकिरा ता से पछताया होर तिने

स्यों चांदी रे तीह सिक्के महायाजका होर पुरनिया जो वाप्स करी दिते।⁴ होर तिने बोल्या, मैं एक निर्दोष माहणु जो मारणे रे कठे पकड़वाई किन्हें पाप कितया। एता पर तिन्हे लोके बोल्या, आस्सा जो क्या? तू ई जाण।⁵ तेबे से तिन्हा सिक्के जो मंदरा मन्झ सट्टी किन्हें चली गया, होर जाई किन्हें आपणे आपा जो फांसी देई दीती।⁶ महायाजके स्यों सिक्के लई किन्हें बोल्या, इन्हा जो भण्डारा मन्झ रखणा ठीक नी आ, क्योंकि इन्हा रा इस्तेमाल केसी जो मरवाणे रे कठे कितेया गईरा।⁷ फेरी तिन्हे स्लाह करी किन्हें तिन्हा सिक्के किन्हें परदेसीया जो दफनाणे रे कठे कुम्हारा रा खेत मूल्ले लई लया।⁸ एस वजहा ले तेस खेता जो आज तक खूना रा खेत बोल्या जाहां।⁹ तेबे जो बचन यिर्मयाह नबी रे ज्रीए बोल्या गईरा था से पूरा हुआ; कि तिन्हे स्यों तीह सिक्के यानि से तय कितिरी कीमत लई ली। (जो इस्राएला री संताना मंझा ले कईए तय कितिरी थी।)¹⁰ होर प्रभु रे हुक्मा रे मुताबक तेता किन्हें मैं कुम्हारा रा खेत मुल्ले लई लया।¹¹ जेबे यीसू हाक्मा रे साम्हणे खहडी रा था ता हाक्मे तेस ले पूछ्या; कि क्या तू यहूदिया रा राजा आ? यीसूए तेस किन्हें बोल्या, तू आण्डुए बोल्या करहा।¹² जेबे महायाजक होर पुरनिये तेस पर दोष ल्याया करहा ऐ थे, ता तिने कोई जबाब नी दितया।¹³ एता पर पिलातुसे तेस किन्हें बोल्या, क्या तू नी सुणदा, कि ये तेरे त्रोध्रा मन्झ कई गुआहियाँ देया करहा ऐ? ¹⁴ परन्तु तिने तेस जो एक भी गल्ला रा जबाब नी दितया, एथि तक कि हाक्मा जो बौहत हरानी हुई।¹⁵ होर हाक्मा रा ये रवाज था, कि तेस साजे मन्झ लोका रे कठे केसी एक कैदी जो जेस जो स्यों चाहें थे, छाडी देहां था।¹⁶ तेस टैम तिन्हा मंझ एक बरअब्बा नांऊआं रा नामी कैदी था।¹⁷ इधी कठे जेबे स्यों कठे हुए ता पिलातुसे तिन्हा किन्हें बोल्या, तुस्से केस जो चाहें कि हांऊ तुस्सा रे कठे तेस जो छाडी देऊं? बरअब्बा जो, या यीसू जो, जेस जो मसीह बोल्हा? ¹⁸ क्योंकि से जाणहां था कि तिन्हे से जळनी री वजहा ले पकड़वाईरा।¹⁹ जेबे से न्याया री गद्दी पर बैठी रा था ता तेसरी लाडीए तेस वाले एक खबर भेजी, कि तू तेस धर्मी रे मामले मन्झ हाथ देख्या पांदा, क्योंकि मैं आज सुपणे मन्झ तेसरी वजहा ले बौहत दुःख सैहन कितेया।²⁰ महायाजके होर पुरनिये लोक उभारे, कि स्यों बरअब्बा जो मांगी ले, होर यीसू रा नास कराये।²¹ हाक्मे तिन्हा ले पूछ्या, कि इन्हा दुहीं मंझा ले तुस्से केस जो चाहें कि हांऊ तुस्सा रे कठे छाडी देऊं? तिन्हे बोल्या, बरअब्बा जो।²² पिलातुसे तिन्हा ले पूछ्या, फेरी यीसू जो, जेस जो मसीह बोल्या जाहां, क्या करूं? सभिए तेस किन्हें बोल्या, एस जो कूसा पर चढाई दितेया जाये।²³ हाक्मे बोल्या, किधियो तिने क्या बुराई कितीरी? पर स्यों होर भी चिंगी चिंगी किन्हें बोल्दे लगे, एस जो कूसा पर चढाई दितेया जाए।²⁴ जेबे पिलातुसे देख्या कि कुछ नी लग्या

बणदा पर उल्टा हुल्लड़ हुएआ करहा। ता तिने पाणी लई किन्हें भीड़ा रे साम्हणे आपणे हाथ धोये होर बोल्या, हांऊ एस धर्मी रे खूना ले निर्दोष आ; तुस्से ई जाणां।²⁵ सभ लोके जबाब दितेया, एस रा खून आस्सा पर होर आस्सा रे वंसा पर हो।²⁶ तेबे तिने बरअब्बा तिन्हा रे कठे छाडी दीतेया, होर यीसू जो कोड़े लगवाई किन्हें सौंपी दितेया, कि तेस जो कूसा पर चढाई दितेया जाए।²⁷ तेबे हाकमा रे स्पाहीये यीसू जो किले मन्झ लई जाई किन्हें सारी पलटन तेसरे चहुँ वखा जो कट्टा करी दिती।²⁸ होर तेसरे कपड़े तुआरी किन्हें तेस जो चमकीले लाल रंगा रे कपड़े पन्हाये।²⁹ होर कांडे रा मुकट बुणी किन्हें तेसरे मुंडा पर रख्या; होर तेसरे दायें हाथा मन्झ सरकंडा थम्हाई दितया होर तेसरे अगे घुटणे टेकी किन्हें तेस जो ठट्टे मन्झ उड़ान्दे लगे होर बोल्या, हे यहूदिया रे राजा, नमस्कार।³⁰ होर तेस पर थुकया, होर से ई सरकंडा लई किन्हें तेसरे मुंडा पर मारदे लगे।³¹ जेबे स्यों तेसरा मजाक बणाई चुके ता तिन्हे से बागा तेस परा ले तुआरी किन्हें तेसरे कपड़े तेस जो पन्हाई दिते, होर तेस जो कूसा पर चढाणे रे कठे लई चले।³² बाहर जांदे हुए तिन्हा जो स्मौन नांऊआं रा एक कुरेनी माहणु मिलया, तिन्हे से बेगारी मन्झ पकड़ेया कि तेसरा कूस चकी किन्हें लई चले।³³ तेस जगह पर जो गुलगुता नांऊआं री जगहा यानि जेस जगहा जो खोपडी री जगह बोल्या जाहां, तेथी पौहंची किन्हें।³⁴ तिने पित मिललाईरा दाखरस तेस जो पीणे जो दितया, पर तिने से चखी किन्हें नी पितेया।³⁵ तेबे तिन्हे से कूसा पर चढाया; होर चिट्टिया पाई किन्हें तेसरे कपड़े आपु मन्झ बांडी लये।³⁶ होर तेथी बैठी किन्हें तेसरा पैहरा देंदे लगे।³⁷ होर तेसरा दोषपत्र तेसरे मुंडा ऊपर ल्गाया, कि, "ये यहूदिया रा राजा यीसू आ"।³⁸ तेबे तेस साउगी कूसा पर दो डाकू एक दाई वखा जो होर एक बाई वखा जो चढाये।³⁹ होर आऊणे जाणे वाळे मूंड हिलाई हिलाई किन्हें तेसरी बेज्जती करहा ऐ थे।⁴⁰ होर ये बोल्हा थे, कि हे मन्द्रा जो ढाणे वाळे होर तीन ध्याड़े मन्झ बनाणे वाळे, आपणे आपा जो बचा; अगर तू परमेसरा रा म्हठा आ, ता कूसा परा ले उतरी जा।⁴¹ इहां ई महायाजक धर्मसात्री होर पुरनिये ये बोली किन्हें मजाक उड़ाया करहा ऐ थे। इने होर बचाए, होर एबे ये आपणे आपा जो नी बचाई सकदा? ⁴² ये ता "इसत्राल रा राजा आ" ये एभे कूसा परा ले उतरी जाए, तेबे आस्सा एस पर विस्वास करणा।⁴³ इने परमेसरा पर भरोसा रखीरा, अगर से एस जो चाहां, ता एबे एस जो छुड़ाई ले, क्योंकि इने बोलिरा था, कि " हांऊ परमेसरा रा म्हठा आ "।⁴⁴ इहां ई डाकू भी जो तेसरे साउगी कूसा पर चढाई रे थे तेस री बेज्जती करेया करहा ऐ थे।⁴⁵ दोपहरा ले लई किन्हें त्रीजे पैहरा तक सारे देसा मन्झ न्याहरा हुई गया।⁴⁶ त्रीजे पैहरा रे नेडे यीसुए जोरा किन्हें बोल्या, एली, एली, लमा शबक्तनी? हे मेरे परमेसर, हे

मेरे परमेसर, तुस्से हांऊ किधियो छाडी दितेया? ⁴⁷ जो तेथी खहडी रे थे, तिन्हा मंझा ले कईए ये सुणी किन्हें बोल्या, ये ता एलियाह जो सादेया करहा।⁴⁸ तिन्हा मन्झा ले एक झटपट दोड़ेया, होर स्पंज लई किन्हें सिरके मन्झ डुबोया, होर सरकंडे पर रखी किन्हें तेस जो चुसाया।⁴⁹ होरिये बोल्या, रुका रुका, देखा, एलियाह तेस जो बचाणे रे कठे आहूँआं कि नी।⁵⁰ तेबे यीसुए दबारा जोरा किन्हें चिल्लाई किन्हें प्राण छाडी दिते।⁵¹ होर देखा मन्दरा रा परदा ऊपरा ले हेठा तक फटी किन्हें दो टुकड़े हुई गया; होर धरती हिली गई होर चट्टाना मन्झ दरार पई गई।⁵² होर कब्रा खुल्ही गई; होर सुत्तिरे पवित्र लोका री कई ल्हासा जिउंदी हुई गई।⁵³ होर तेसरे जी उठणे ले बाद स्यों कब्रा मन्झा ले निकळी किन्हें पवित्र नगरा मन्झ गये, होर कईया जो सुज्हे।⁵⁴ तेबे सूबेदार होर जो तेस साउगी यीसू रा पैहरा देंदे लगिरे थे, हिलण होर जो कुछ हुआ था, तेता जो देखी किन्हें स्यों बौहत ज्यादा डरी गये, होर बोल्या, " सच्चे ये ता परमेसरा रा म्हठा था "।⁵⁵ तेथी बौहत सारी जनाने जो गलीला ले यीसू री सेऊआ करदी हुई तेस साउगी आई री थी, स्यों दूरा ले देख्या करहा ई थी।⁵⁶ तिन्हा मन्झ मरियम मगदलीनी, होर याकूब होर योसेसा री माऊ मरियम, होर जब्दी रे म्हठे री माऊ थी।⁵⁷ जेबे साँझ हुई ता युसूफ नांऊ अरिमतियाहा रा एक सेठ माहणु जो आण्हुए यीसू रा चेला था आया।⁵⁸ तिने पिलातुसा वाले जाई किन्हें यीसू री ल्हास मांगी तेबे पिलातुसे हुकम दितेया कि ल्हास तेस जो देई दिती जाए।⁵⁹ युसूफे ल्हास लई होर तेस जो साफ चादरा मन्झ लपेटी लया।⁶⁰ होर तिने से अपणी नौई कब्र मन्झ रख्या, जो तिने चट्टाना मंझ खणी री थी, होर कब्रा रे दरवाजे पर बड्डा पात्थर लुढकाई किन्हें चली गया।⁶¹ मरियम मगदलीनी होर दूजी मरियम तेथी कब्र रे साम्हणे बैठीरी थी।⁶² दूजे ध्याड़े जो त्यारी रे ध्याड़े रे बाद रा ध्याड़े था, महायाजके होर फरीसिये पिलातुसा वाले कट्टा हुई किन्हें बोल्या।⁶³ हे महाराज, आस्सा जो याद आ कि तिने भरमाणे वाळे आपणे जिन्दे जी बोलिरा था, कि मां तीन ध्याड़े ले बाद जी उठणा।⁶⁴ इधी कठे हुकम दे कि त्रीजे ध्याड़े तक कब्रा री रखवाली किती जाये, एहड़ा नि हो कि तेसरे चले आई किन्हें तेस जो चोरी किन्हें लई जाये, होर लोका किन्हें बोल्दे लगे, कि से मरिरे मन्झा ले जीउन्दा हुई गया: तेबे पिछला धोखा पैहल्के ले भी बुरा हूणा।⁶⁵ पिलातुसे तिन्हा किन्हें बोल्या, तुस्सा वाले रखवाले ता हाए जाउआ, आपणी समझा रे मुताबक रखवाली करा।⁶⁶ इधी कठे स्यों रखवाले जो साउगी लई किन्हें गये, होर पात्थर पर मोहर ल्गाई किन्हें कब्र री रखवाली किती।

28 ¹ सन्ता रे ध्याड़े ले बाद हप्ते रे पैहले ध्याड़े भ्याग हुंदे ई मरियमा मगदलीनी होर दूजी मरियम कब्रा जो देखदी आई।² होर देखा एक बौहत बडा हिलण हुआ, क्योंकि

प्रभु रा एक दूत स्वर्गा ले उतरेया, होर नेडे आई किन्हें तिने पात्थर लुढकाई दितेया, होर तेस पर बैठी गया।³ तेसरा रूप बिजली साहीं होर तेसरा कपड़ा बर्फा साहीं चीटे था।⁴ स्यों स्पाही जो कब्रा री रखवाळी करेया करहा ऐ थे स्यों डरा री वजहा ले काम्मी गए, होर मरी रे साहीं हुई गये।⁵ स्वर्गदूते जनाने किन्हें बोल्या, कि तुस्से मत डरा: हांऊ जाणहां कि तुस्से यीसू जो, जो क्रुसा पर चढाई गइरा था तोपहा ई।⁶ से एथी नी आ, पर आपणे वचणा रे मुताबक जिउंदा हुई गईरा: आऊआ, ये जगहा देखा, जेथी प्रभु पइरा था।⁷ होर जल्दी जाई किन्हें तेसरे चेले किन्हें बोला, कि से मुर्दे मंझा ले जिउंदा हुई गईरा; होर देखा तेस तुस्सा ले पैहले गलील जो जाणा, तेथी तेसरा दर्सन पाणा, देखा, मैं तुस्सा किन्हें बोली दितेया।⁸ होर स्यों डर होर बड़ी खुसी किन्हें कब्रा ले जल्दी वाप्स आई किन्हें तेसरे चेले जो खबर देणे रे कठे दोड़ी गई।⁹ होर देखा, यीसू तिन्हा जो मिलेया होर बोल्या; नमस्ते होर तिन्हें नेडे आई किन्हें होर तेसरे पैर पकड़ी किन्हें तेस जो प्रणाम कितेया।¹⁰ तेबे यीसूए तिन्हा किन्हें बोल्या, मत डरा, मेरे भाईया साउगी जाई किन्हें बोला, कि गलीला जो चली जाये होर तिन्हा हांऊ तेथी देखणा।¹¹ जेबे स्यों जाया करहा ई थी, कि देखा, रखवाले मंझा ले कई

नगरा मन्झ आई किन्हें सारा हाल महायाजका साउगी बोली दितेया।¹² तेबे तिन्हे पुरानिया साउगी कट्टे हुई किन्हें सलाह किती, होर स्पाहीया जो बौहत चान्दी देई किन्हें बोल्या।¹³ कि ये बोलणा, कि राती जेबे आस्से सभ सया करहा ऐ थे, ता तेसरे चेले आई किन्हें तेस जो चोरी किन्हें लई गये।¹⁴ होर अगर ये गल हाक्मा रे काना तक पुज्धी, ता आस्सा से समझाई लैणा होर तुस्से खतरे ले बचाई लैणे।¹⁵ ता तिन्हे पैसे लई किन्हें तेहडा ई कितेया, जेहडा तिन्हा जो स्वाईरा था; होर ये गल आज्ञा तक यहूदिया मन्झ मसहूर ई।¹⁶ होर ग्यारा चेले गलीला मन्झ तेस पहाडा पर गये, जो यीसूए तिन्हा जो दस्सिरा था।¹⁷ होर तिन्हें तेसरे दर्सन पाई किन्हें तेस जो प्रणाम कितेया, पर केसी केसी जो सक हुआ।¹⁸ यीसूए तिन्हा वाले आई किन्हें बोल्या, कि स्वर्ग होर धरती रा सारा अधिकार मुंजो दितिरा।¹⁹ इधी कठे तुस्से जाई किन्हें सारे जातिया रे लोका जो चेला बणाऊआ होर तिन्हा जो पिता पुत्र होर पवित्र आत्मा रे नांऊआं ले बपतिस्मा देआ।²⁰ होर तिन्हा जो सारी गल्ला जिन्हा रा मैं तुस्सा जो हुक्म दितीरा, मनणा सिखाऊआ: होर देखा, हांऊ संसारा रे अन्ता तक हमेसा तुस्सा साउगी आ।

मरकुस

1 परमेसरा रे पुत्र यीसू मसीहा रे सुसमाचारा री सुरुआत
12 जिहाँ यसायाह नबी री क्ताबा मन्झ लिखीरा कि देखा;
हांऊ आपणे दूता जो तेरे अगे अगे भेज्हा, जेस तेरे कठे पैंडा ठीक
करणा । 3 जंगला मन्झ एक चिल्लाणे वाळे री अवाज सुणेया
करहा ई । कि प्रभु रा पैंडा बणाउवा, होर तेसरी सड़का सीधी
करा । 4 यहुन्ना आया, जो जंगला मन्झ बसिस्मा, होर पापा री
माफ़ी रे कठे मन फिराऊवा रे बपतिस्मे रा प्रचार करहा था
। 5 होर सारे यहूदिया देसा रे, होर यरुस्लेमा मन्झ सभ रैहणे
वाळे निकळी किन्हें तेस वाले गये, होर आपणे पापा जो मनी
लया होर यर्दन नदी मन्झ बसिस्मा लया । 6 यहुन्ना ऊंटा रे बाळा
रे बणी रे कपड़े पैहन्ना था; होर अपणी कमरा मन्झ चामड़े रा
पट्टा बान्ही रख्हा था, होर टिड्डियां होर जंगली मखीर खाहां
था । 7 होर ये प्रचार करहा था, कि मेरे बाद से आउणे वाळा आ,
जो मेरे ले भी सक्तिमान आ; हांऊ येस लायक नी आ कि झुकी
किन्हें तेस रे बूटा रे तस्मे खोल्ही सकूं । 8 मैं ता तुस्सा जो पाणी
किन्हें बसिस्मा दितेया । पर तेस तुस्सा जो पवित्र आत्मा किन्हें
बसिस्मा देणा । 9 तिन्हा ध्याड़े एहड़ा हुआ कि यीसूए गलीला
रे नासरता ले आई किन्हें, यर्दना मन्झ यहुन्ना ले बसिस्मा लया
। 10 होर जेबे से पाणी ले निकळी किन्हें ऊपर आया, ता तेबे
ई तिने सर्गा जो खुल्हदे होर आत्मा जो कबूतरा साहीं आपणे
ऊपर उतरदे देख्या । 11 होर ये आकासवाणी हुई, कि तू मेरा
प्यारा पुत्र आ, हांऊ तेरे किन्हें बौहत खुस आ । 12 तेबे ई आत्मे
झटपट तेस जो बियावान जंगला मन्झ जाणे जो बोल्या । 13 होर
बियावान जंगला मन्झ चाळी ध्याड़े तक सैताने तेसरी परीक्षा
किती; होर से जंगली जानवरा साउगी रैहया; होर स्वर्गदूत
तेसरी सेऊआ करदे रहे । 14 यहुन्ना री गिरफ्तारी जो ले बाद
यीसूए गलीला मंझ आई किन्हें परमेसरा रे राजा रा सुसमाचार
प्रचार कितेया । 15 होर बोल्या, टैम पूरा हुई गया, होर परमेसरा
रा राज नेडे आई गईरा । मन फिराऊवा होर सुसमाचारा पर
बिस्वास करा । 16 गलीला री झीला रे बाहडे बाहडे जांदे जांदे
तिने स्मौन होर तेसरे भाई अन्द्रियासा जो झीला मन्झ जाल
पांदे देख्या; क्यूंकि स्यों मछवारे थे । 17 होर यीसूए तिन्हा किन्हें
बोल्या; मेरे पीछे आऊआ; मां तुस्से माहणुआ रे मछवारे बनाणे
। 18 स्यों तेबे ई आपणे जाला जो छाडी किन्हें तेसरे पीछे चली
पये । 19 फेरी तिने थोहड़ा अगे जाई किन्हें, जब्दी रे म्हटे याकूब
होर तेसरे भाई यहुन्ना जो किस्तिया मंझ जाला जो ठीक करदे
देख्या । 20 तिने झटपट स्यों सादे, होर स्यों अपणे बाबा जब्दी
जो मजदूरा साउगी किस्तिया मन्झ छाडी किन्हें, तेसरे पीछे
चली पये । 21 होर स्यों कफरनहूमा मन्झ आये, होर से तिहां ई

सब्ता रे ध्याड़े प्रार्थना घरा मंझ जाई किन्हें उपदेस देंदा लग्या ।
22 होर लोक तेसरे उपदेस सुणी किन्हें हरान हुई गये; क्यूंकि से
तिन्हा जो पंडता साहीं नी; पर एक अधिकारी साहीं उपदेस देहां
था । 23 होर तेस ई टैम, तिन्हारी प्रार्थना सभा मन्झ एक माहणु
था, जेस अन्दर दुष्ट आत्मा थी, तिने चिल्लाई किन्हें बोल्या ।
24 हे यीसू नासरी, आस्सा जो तुध किन्हें क्या काम आ? क्या
तू आस्सा जो नास करने रे कठे आईरा? हांऊ तुजो जाणहां ,
तू कुणहां? परमेसरा रा पवित्र जन! 25 यीसूए तेस जो झिड़की
किन्हें बोल्या, चुप रैह, होर एस मन्झा ले निकळी जा । 26 तेबे
दुष्ट आत्मा तेस जो मरोड़ी किन्हें, होर बड़े जोरा किन्हें चिल्लाई
किन्हें तेस मंझा ले निकळी गयी । 27 एस गला पर सभ लोक
हरान हुई गये, इतने हरान हुई गये कि स्यों आपु मन्झ बैहस
करदे लगे कि ये क्या गल ई? ये ता कोई नंऊआं उपदेस आ!
से अधिकारा किन्हें दुष्ट आत्मा जो भी हुकम देहां, होर स्यों
तेसरा हुकम मन्हा ई । 28 होर तेसरा नांऊ जल्दी ई गलीला रे
ओरे परे सारे देसा मन्झ फैल्ही गया । 29 होर से झटपट प्रार्थना
घरा मंझा ले निकळी किन्हें, याकूब होर यहुन्ना साउगी समौना
होर अन्द्रियासा रे घर जो चली गया । 30 होर समौना री सास
बुखारा किन्हें तड़फया करहा ई थी, होर तिन्हे झटपट तेस्सा
रे बारे मंझ तेस किन्हें बोल्या । 31 तेबे तिने तेस्सा वाले जाई
किन्हें तेस्सा रा हाथ पकड़ेया होर से ऊपर ठुआळी दिती; होर
तेस्सा रा बुखार उतरी गया, होर से उठी किन्हें तिन्हारी सेउआ
टैहळ करदी लगी । 32 साहंज के टैमा जेबे जे सूरज डूबी गया;
ता लोक सब बमारा जो, होर तिन्हा जो जिन्हा मन्झ जे दुष्ट
आत्मा थी, तेस वाले लई आये । 33 सारा सैहर तेसरे दरवाजे
वाले आई किन्हें कठा हुई गया । 34 होर तिने बौहती लोका जो
जेहडे कई किस्मा री बमारीया किन्हें दुःखी थे, स्यों ठीक किते;
होर बौहत दुष्ट आत्मा काळी; होर दुष्ट आत्मा जो बोलणा नी
दितेया, क्यूंकि स्यों तेस जो जाणहां ई थी । 35 होर भ्यागा ई
ध्याड़ा सुहरु हुणे ले पैहले, से उठी किन्हें बाहार चली गया होर
एकांत जगहा जाई किन्हें प्रार्थना करदा लग्या । 36 तेबे समौन
होर तेसरे साथी तेस जो टोल्दे लगे । 37 जेबे से तिन्हा जो मिली
गया, ता तिन्हे तेस किन्हें बोल्या; सब लोक तुजो टोळैया करहा
ऐ । 38 तिने तिन्हा किन्हें बोल्या, आऊवा, आस्से होर दूजे नगरा
जो चली जाहें, ताकि हांऊ तेथी भी प्रचार करी सकूं, क्यूंकि
हांऊ इधी कठे आईरा । 39 होर से सारे गलीला मन्झ तिन्हारी
सभा मन्झ जाई जाई किन्हें प्रचार करदा होर दुष्ट आत्मा काढ़दा
रैहया । 40 होर एक कोळीये तेस वाले आई किन्हें अरज किती,
होर तेसरे साम्हणे घुटने टेकी किन्हें, तेस किन्हें बोल्या; अगर तू

चाहे ता मुंजो सुद्ध करी सक्हा । 41 तिने तेस पर दया करी किन्हें आपणा हाथ बढाया होर तेस जो छुही किन्हें बोल्या; हांऊ चाहां कि तू सुद्ध हुई जाए । 42 होर तेबे ई तेसरा कोड चली गया होर से सुद्ध हुई गया । 43 तेबे तिने से खबरदार कितेया होर भेजी दितेया । 44 होर तेस किन्हें ये बोल्या, देख, केसी किन्हें कुछ देख्या बोल्दा, पर जाई किन्हें अपणे आपा जो याजका जो दस, होर अपणे सुद्ध हुणे रे बारे मंझ जो कुछ मुसे हुकुम दितीरा, से चढा, कि तिन्हा पर गुआही हो । 45 पर से बाहर जाई किन्हें एस गल्ला रा बौहत प्रचार करदा होर एथी तक फैल्हान्दा लग्या, कि यीसू दबारा खुल्लही किन्हें तेस नगर मंझ नी जाई सक्या, पर बाहर जंगला मंझ रह्या; होर चारो तरफा ले लोक तेस वाले आउंदे रहे ।

2 1 कई ध्याडे ले बाद से फेरी दबारा कफरनूहमा मंझ आया होर ये सुणने मंझ आया, कि से घरा अन्दर आ । 2 फेरी इतने लोक कठे हुए, कि दरवाजे वाले भी जगह नी मिली; होर तिने तिन्हा जो वचन सुणाया । 3 होर एक लकवे रा मरीज चार माहणुएँ चकी किन्हें तेस वाले ल्यान्देया । 4 पर बौहत भीडा री बजहा ले स्यों तेस वाले नी पूजी सके, तेबे तिन्हे तेस घर रा छापरे घ्वाड़ेया जेथी जे से था, होर जेबे स्यों छापरे घ्वाडी बैठे, ता तिन्हे से मांजा लटकाई दितेया जेस पर जे लकवे रा मरीज था । 5 यीसूए तिन्हारा बिस्वास देखी किन्हें, तेस लकवे रे मरीजा किन्हें बोल्या; हे पुत्र, तेरे पाप माफ हुई गये । 6 तेबे कई सास्त्री जो तेथी बैठीरे थे, अपणे मना मंझ सोच विचार करदे लगे । 7 कि ये आदमी एहडा किधियो बोल्हा? ये ता परमेसरा री बेज्जती करहा, परमेसरा जो छाडी किन्हें कोई होर पापा जो माफ नी करी सक्दा । 8 यीसूए झटपट आपणी आत्मा मंझ जाणी लया, कि स्यों आपणे आपणे मना मंझ एहडा सोच विचार करेया करहा ऐ, होर तिने तिन्हा किन्हें बोल्या, तुस्से आपणे आपणे मना मंझ ये विचार किधियो करेया करहा ऐ? 9 असान क्या आ? एस लकवे रे मरीजा जो ये बोलणा कि तेरे पाप माफ हुई गये, या ये बोलणा कि उठ आपणा बिस्तरा चक होर हांडदा लग? 10 ताकि तुस्से जाणी सको कि माहणु रे पुत्रा जो धरती पर पाप माफ करणे रा हक आ (तिने तेस लकवे रे मरीजा किन्हें बोल्या ।) 11 हांऊ तुध किन्हें बोल्हा; उठ, आपणा बिस्तरा चक होर आपणे घरा जो चली जा । 12 होर से उठेया, होर झटपट आपणा बिस्तरा चकी किन्हें होर सभी रे साम्हणे निकळी किन्हें चली गया, एता पर स्यों बौहत हरान हुए, होर परमेसरा री बडाई करी किन्हें बोल्दे लगे, कि आस्से एहडा कधी नी देख्या । 13 होर से फेरी निकळी किन्हें झीला रे बाहडे गया, होर सारी भीड तेसरे पीछे चली, होर से तिन्हा जो उपदेस देंदा लग्या । 14 जांदे हुए तिने हलफई रे म्हेठे जो चुंगी लैणे री चौकी पर बैठीरे देख्या, होर तेस किन्हें बोल्या; मेरे पीछे आऊ, होर से

उठी किन्हें, तेसरे पीछे चली पया । 15 होर जेबे से तेसरे घरा मंझ खाणा खांदे बैठीरे था; ता कई पापी होर चुंगी लैणे वाळे यीसू साउगी होर तेसरे चेले साउगी खाणा खांदे बैठे क्युंकि स्यों बौहत थे, होर तेसरे पीछे हुई गईरे थे । 16 होर सास्त्रिये होर फरीसिये ये देखी किन्हें, कि से ता पापिया होर चुंगी लैणे वाळेया साउगी खाणा खाया करहा, तिन्हे तेसरे चेले किन्हें बोल्या; से ता चुंगी लैणे वाळे होर पापिया साउगी खाहां पीहां । 17 यीसूए ये सुणी किन्हें, तिन्हा किन्हें बोल्या, भले चंगेया जो डाक्टरा री जरूरत नी ई, पर बमारा जो ई; हांऊ धर्मिया जो नी, पर पापिया जो सादणे रे कठे आईरा । 18 यहुन्ना रे चेले, होर फरीसी उपवास करहा ऐ थे; इधी कठे तिन्हे आई किन्हें तेस किन्हें ये बोल्या; कि यहुन्ना रे चेले होर फरिसीया रे चेले उपवास किधियो रख्हा ऐ? पर तेरे चेले उपवास कि नी रखदे । 19 होर यीसूए तिन्हा किन्हें बोल्या, जेबे तक दुल्हा बरातिया साउगी रह्या ता स्यों उपवास नी रखदे, इधी कठे कि जेबे तक दुल्हा तिन्हा साउगी आ, तेबे तक तिन्हा जो उपवास रखणे री जरूरत नी ई । 20 पर एहडे ध्याडे आऊणे, कि लाडा तिन्हा ले लग कितेया जाणा, तेस टैम तिन्हा उपवास रखणा । 21 नऊए कपडे री टाहली पुराणे कपडे पर कोई नी ल्यान्दा नी ता तेस्सा टाहलीया तेता मंझा ले कुछ ना कुछ खींजी लैणा, यानि नऊआं पुराणे मंझा ले, होर तेस होर भी फटी जाणा । 22 नऊएँ दाखा रे रसा जो पुराणी मशका मंझ कोई नी रख्दा, नी ता दाखा रे रसा मशका फाडी देणी, होर दाखा रा रस होर मशका दुहींआ बर्बाद हुई जाणा; पर दाखा रा नऊआं रस नौई मशका मंझ भरेया जाहां । 23 होर एहडा हुआ कि से सब्ता रे ध्याडे डोहरीया मंझा ले हुई किन्हें जाया करहा था; होर तेसरे चेले चल्दे चल्दे अनाजा री बाला तोडदे लगे । 24 तेबे फरीसिये तेस किन्हें बोल्या, देख; यों सब्ता रे ध्याडे एहडा काम किधियो करहा ऐ, जो ठीक नी आ? 25 तिने तिन्हा किन्हें बोल्या, क्या तुस्से कधी नी पढ़ेया, कि जेबे दाऊदा जो जरूरत थी होर जेबे से होर तेसरे साथी भूखे थे, तेबे तिने क्या कितेया था । 26 तिने अबियातार महायाजका रे टैमा परमेसरा रे मंदरा मंझ जाई किन्हें चढाई री रोटीया किधियो खाध्ही? जिन्हा रोटीया जो याजका जो छाडी किन्हें कोई होर नी खाई सक्दा था, होर तिने आपणे साथिया जो भी रोटीया दीती । 27 होर तिने तिन्हा किन्हें बोल्या; सब्ता रा ध्याडा माहणु रे कठे बणाईरा ना कि माहणु सब्ता रे ध्याडे रे कठे । 28 इधी कठे माहणु रा पुत्र सब्ता रे ध्याडे रा भी मालक आ ।

3 1 होर से अराधना सभा मंझ दबारा गया; होर तेथी एक माहणु था, जेसरा जे हाथ सुकी गईरा था यानि तेसरा हाथ बेजान हुई चुकिया था । 2 होर स्यों तेस पर दोष ल्याणे रे कठे नजर रख्हा ऐ थे, ताकि देखी सको कि से सब्ता रे ध्याडे

तेस जो ठीक करहा, कि नी।³ तिने सुकी रे यानि बेजान हाथा वाळे किन्हें बोल्या; मंझ भर खडा हुई जा।⁴ होर तिने तिन्हा किन्हें बोल्या; क्या सब्ता रे ध्याड़े भला करणा ठीक आ या बुरा; प्राण बचाणा या मारणा? पर स्यों चुप रहे।⁵ होर तिने तिन्हारी मना री कठोरता ले उदास हुई किन्हें, तिन्हा जो गुस्से किन्हें चारों तरफ देख्या, होर तेस माहणु किन्हें बोल्या, आपणा हाथ अगे कर, तिने अगे कितेया, होर तेसरा हाथ ठीक हुई गया।⁶ होर फरिसिये बाहर जाई किन्हें झटपट हेरोदिया साउगी मिली किन्हें यीसू रे ब्रोध्दा मन्झ षडयंत्र करदे लगे, कि तेसरा किहां नास करिए।⁷ होर यीसू अपने चेल्या साउगी झीला बखा जो चली गया; होर गलीला ले एक बडी भीड़ तेसरे पीछे हुई गई।⁸ होर यहूदिया, होर यरूशलेम होर इदुमिया ले, होर यर्दना ले पार, होर सुर होर सैदा रे नेडे ले एक बडी भीड़ ये सुणी किन्हें तेसरे पीछे आई, कि से किहां नौखे नौखे काम करहा।⁹ होर तिने आपणे चेल्या किन्हें बोल्या, भीड़ा री वजहा ले एक छोटी किस्ती मेरे कठे तयार रखणा ताकि स्यों मुंजो दबाई नी सको।¹⁰ क्यूंकि तिने बौहत ठीक कितिरे थे; इधी कठे जितने भी लोक बमारिया मन्झ थे, तेस जो छूहणे रे कठे तेस पर पई जाया करहा ऐ थे।¹¹ होर बुरी आत्माएं भी जेबे तेस जो देख्हा ई थी, ता तेसरे अगे पई जाहीं थी, होर चिल्लाई किन्हें बोल्हा ई थी, कि तू परमेसरा रा पुत्र आ।¹² होर तिने स्यों बौहत खबरदार किते, कि मेरे बारे मन्झ केसियो देख्या दसदे।¹³ फेरी से पहाड़ा पर चढी गया, होर जिन्हा जो से चाहां था स्यों तिने आपणे वाले सादे; होर स्यों तेस वाले चली गये।¹⁴ तेबे तिन्हे बारा मर्धा जो नियुक्त कितेया, कि स्यों तेसरे साउगी साउगी रही सको, होर से तिन्हा जो प्रचार करणे रे कठे भेजी सको।¹⁵ होर दुष्ट आत्मा जो काढणे रा हक रखी सको।¹⁶ होर स्यों ये ऐ; समौन जेसरा नाऊ तिने पतरस रख्या।¹⁷ होर जब्दी रा म्हठा याकूब, याकूबा रा भाई यहून्ना, जेसरा नाऊ तिने बूअनरगिस, मतलब गर्जना रा म्हठा रख्या।¹⁸ होर अन्द्रियास, होर फिलिप्पुस, होर बरतुलमै, होर मत्ती, होर थोमा, होर हलफई रा म्हठा याकूब; होर तद्दी, होर समौन कनानी।¹⁹ होर यहूदा इस्करियोती, जिने जे अगे चली किन्हें से पकड़वाया।²⁰ होर से घरा आया; होर इतनी भीड़ कठी हुई गयी, कि स्यों रोटी भी नी खाई सके।²¹ जेबे तेसरे घरा वाळे ये सुणेया, ता स्यों तेस जो पकड़णने रे कठे निकळी गये; क्यूंकि तिन्हारा ऐहडा बोलणा था कि तेसरा मन ठिकाणे नी आ।²² होर साख्री, जो यरूस्लेमा ले आईरे थे, ये बोल्हा ऐ थे, कि तेस मन्झ सैतान आ, होर ये भी बोल्हा ऐ थे, कि से दुष्ट आत्मा री सहायता किन्हें दुष्ट आत्मा जो काढहा।²³ होर से तिन्हा जो आपु वाले सादी किन्हें, तिन्हा किन्हें दृष्टान्ता मन्झ बोल्हा लग्या; सैतान किहां सैताना जो काढी सकहा? ²⁴ होर अगर केसी राजा मन्झ फूट पई जाए, ता से राज किहां बणी

रही सकहा? ²⁵ होर अगर केसी घरा मन्झ फूट पई जाए, ता से किहां बणी रही सकहा? ²⁶ होर अगर सैतान आपणा ही ब्रोध्दी हुई किन्हें फूट पाई दे, ता से किहां बणी रही सकहा? तेसरा ता खात्मा हुई जाणा।²⁷ पर कोई आदमी केसी पैहलवाना रे घरा मन्झ बडी किन्हें तेसरी चीज़ा नी चोरी सकदा, जेबे तक कि से पैहले तेस पैहलवाना जो बान्ही नी ले; होर तेबे से तेसरे घरा जो लुटी सकहा।²⁸ हांऊ तुस्सा किन्हें सच सच बोल्हा; कि माहणु री संताना रे सब पाप होर बेज्जती जो स्यों करहा ऐ, माफ हुई जाणे।²⁹ पर जो कोई पवित्र आत्मा रे खलाफ बेज्जती करघा, से कधी माफ नी कितेया जाणा; पर तेस अनंत पापा रा अपराधी बणना।³⁰ क्यूंकि स्यों ऐहडा बोल्हा ऐ थे, कि तेस अन्दर दुष्ट आत्मा ई।³¹ होर तेसरी माऊ होर तेसरे भाई आये, होर बाहर खहड़ी रहे, तिन्हे तेसरे कठे बुलावा भेज्या।³² होर भीड़ तेसरे ओरे परे बैठी री थी, होर तिन्हे तेस किन्हें बोल्हा; देख तेरी माऊ होर तेरे भाई बाहार तुजो टोळैया करहा ऐ।³³ तिने तिन्हा जो जबाब दितेया, कि मेरी माऊ होर मेरे भाई कुण ऐ? ³⁴ होर जो तेसरे ओरे परे बैठीरे थे, तिन्हा जो देखी किन्हें तिने बोल्हा; देखा, मेरी माऊ होर मेरे भाई ये ऐ।³⁵ क्यूंकि जो कोई परमेसरा री इच्छा पर चल्हा, से ई मेरा भाई, होर मेरी बैहण होर मेरी माऊ ई।

4 ¹ फेरी से झीला रे बाहडे उपदेस देंदा लग्या; होर एहड़ी बडी भीड़ तेस वाले कठी हुई गयी, कि से झीला पर रखीरी एक किस्तिया पर चढी किन्हें बैठी गया, होर सारी भीड़ धरती पर झीला रे बाहडे खहड़ी री रही।² होर से तिन्हा जो दृष्टान्ता मन्झ बौहत सारी गल्ला स्वान्दा लगेया, होर अपने उपदेसा मंझ तिन्हा किन्हें बोल्या।³ सुणा, देखा, एक बेजा ल्गाणे वाळा, बेजा ल्गाणे रे कठे निकळेया।⁴ होर बाहणे रे टैमा कुछ बेजा पैडे रे बाहडे पया होर चीडुऐ आई किन्हें से चुगी लया।⁵ होर कुछ पात्थरा वाळी जमीना पर पया, जेथी तेस जो जो पूरा माटा नी मिल्या होर एस वजहा ले से छोडे ई जम्मी गया।⁶ होर जेबे सूरज निकळेया, ता स्यों फुख्ही गये, होर जड नी पकड़णने री वजहा ले से सुकी गये।⁷ होर कुछ ता झाड़ीया मंझ पये, होर झाड़ीये बढी किन्हें स्यों दबाई दिते, होर फळी नी पाए।⁸ पर कुछ बढिया जमीना पर पये; होर स्यों जम्मे, होर बढी किन्हें बौहत फले; होर कोई तीह गुणा, कोई साठ गुणा होर कोई सौ गुणा फल्या।⁹ होर तिने बोल्हा; जेस वाले सुणने रे कठे कान हो, से सुणे।¹⁰ जेबे से कल्हा रही गया, ता तेसरे साथिये तिन्हे बारा चेले, तेसले इन्हा दृष्टान्ता रे बारे मन्झ पुछेया।¹¹ तिने तिन्हा किन्हें बोल्या; तुस्सा जो ता परमेसरा रे राजा रे भेदा री समझ दितीरी, पर बाहर वाळे रे कठे सब गल्ला दृष्टान्ता मन्झ हुहां ई।¹² इधी कठे कि स्यों देखे हुए देखे, होर तिन्हा जो कुछ नी सूझे होर सुणदे हुए सुणे, होर

ना समझे; एहड़ा नी हो कि स्यों फिरी जाए होर माफ किते जाये।¹³ फेरी तिने तिन्हा किन्हें बोल्या; क्या तुस्से ये दृष्टान्त नी समझे? ता फेरी होर बाकि सभ दृष्टान्त किहां समझणे? ¹⁴ बेजा ल्याणे वाळा बचन बाहां। ¹⁵ पैंडे रे बाहडे रे स्यों ऐं, जेथी जे बचन बाह्या जाहां, यूं स्यों ऐं, कि जेबे तिन्हे सुणेया, ता सैताने झटपट आई किन्हें बचना जो जेहड़ा तिन्हा मन्झ बाहिरा था, चकी के लई जाहां। ¹⁶ होर तिहां ई जो पाथरा वाळी जमीना पर बाहे गये; यूं स्यों ऐं, जो बचना जो सुणी किन्हें झटपट खुसी किन्हें मन्हा ऐ। ¹⁷ पर आपणे भीतर जड़ नी पकड़णने री वजहा ले स्यों थोहड़े ही ध्याड़े तक रैंहें; एता ले बाद जेबे बचना री वजहा ले तिन्हा पर क्लेस होर सताव हुहां, ता स्यों ठोकर खाहें। ¹⁸ होर जो झाड़ीया मंझ बाहिरे यूं स्यों ऐं, जिन्हें जे बचन सुणेया। ¹⁹ होर संसारा री चिन्ता, पैसे रा धोखा, होर चीजा रा लोभ तिन्हा मंझ स्माई किन्हें बचना जो दबाई देहां; होर से निष्फल रही जाहां। ²⁰ होर जो खरी जमीना मन्झ बाहे गये, यूं स्यों ऐं, जो बचना जो सुणी किन्हें मनी लैहें होर फल ल्याहुआं ऐं, कोई तीह गुणा, कोई साठ गुणा, होर कोई सौ गुणा। ²¹ होर तिने तेस किन्हें बोल्या, क्या बत्ती इधी कठे भ्खाहें कि तेता जो मांजे हेठ रखे? क्या इधी कठे नी कि दीवटा पर रख्या जाए? ²² क्यूंकि कुछ भी छुपिरा नी आ, जो प्रगट नी हुणा, होर कोई रहस्य एहड़ा नी आ, जो प्रयासे मंझ नी आऊणा। ²³ अगर केसी रे सुणने रे कान हो, ता से सुणी ले। ²⁴ फेरी तिने तिन्हा किन्हें बोल्या; सावधान रहूआ, क्या सुणहां ऐं? जेस नापा किन्हें तुस्से नापहा ऐ, तेस ई नापा किन्हें तुस्सा रे कठे भी नाप्या जाणा, होर तुस्सा जो होर ज्यादा दितेया जाणा। ²⁵ क्यूंकि जेस वाले जे हाया, तेस जो होर दितेया जाणा; पर जेस वाले जे नी हाया, तेस ले से भी जो तेस वाले आ, लई लैणा। ²⁶ फेरी तिने बोल्या; परमेसरा रा राज एहड़ा आ, जीहां कोई माहणु जमीना पर बेजा खिंडहा। ²⁷ होर राती सई जाए, होर ध्याड़ी जागी जाये, होर से बेजा एहड़ा जम्मे होर बधे, कि तेस जो पता नी चले कि ये सभ किहां हुएआ करहा। ²⁸ धरती आपणे आपा ले फल ल्याहुआं ई, पैहले टुए, फेरी बालें होर फेरी बाला मन्झ त्यार दाणा। ²⁹ पर जेबे दाणा पकी जाहां, ता से झटपट दराटी ल्याहां, क्यूंकि कटाई रा टैम आई गईरा। ³⁰ फेरी तिने बोल्या, आस्से परमेसरा रे राजा री तुलणा केस किन्हें करे, होर केस दृष्टान्ता किन्हें तेसरा बखान करे। ³¹ से राई रे दाणे साहीं आं; कि जेबे तेस जो जमीना मंझ बाह्या जाहां ता धरती पर सब बेजे मंझा ले से सभी ले छोटा हुहां। ³² पर जेबे तेस जो बाह्या जाहां, ता जम्मी किन्हें से सभी सागा ले भी बडा हुई जाहां, होर तेसरी एहड़ी बडी डाळीया निकळहा ई, कि सर्गा रे चीड़ तेता री छांऊवा मंझ बसेरा करी सकहा ऐं। ³³ होर से तिन्हा जो एस तरीके रे बौहत सारे उदाहरण देई देई किन्हें तिन्हारी

समझा रे मुताबक बचन सुणाहां था। ³⁴ होर बगैर उदाहरण बोले तिन्हा किन्हें होर कुछ नी बोल्दा था; पर कल्हे से अपणे चेल्या जो सब गल्ला रा मतलब दस्हा था। ³⁵ तेस ऐ ध्याड़े जेबे साहंज हुई, ता तिने तिन्हा किन्हें बोल्या; आऊआ, आस्से पारा वखा जो चल्हा ऐ। ³⁶ होर स्यों भीड़ा जो छाडी किन्हें जीहां से था, तिहां ई तेस जो किस्तिया मंझ साउगी लई गये; होर तेस साउगी, होर भी किस्तिया थी। ³⁷ तेबे बड़ा तूफान आया, होर लैहरा किस्तिया पर टकरांदी लगी; होर किस्ती पाणी किन्हें भरदी लगी। ³⁸ होर से आपु पीछे गददी पर सया करहा था; तेबे तिन्हे चले तेस जो जगाई किन्हें बोल्या, हे गुरु, क्या तुजो चिन्ता नी ई, कि आस्से नास हुएया करहा ऐ। ³⁹ तेबे तिने उठी किन्हें तूफाना जो झिड़केया होर लैहरा जो बोल्या; सांत रह, रुकी जा, होर तूफान रुकी गया होर बड़ी चुपी छाई गयी। ⁴⁰ होर तिने तिन्हा किन्हें बोल्या; तुस्से किधियो डरहा ऐ? क्या हल्ली तक तुस्सा जो बिस्वास नी आ? ⁴¹ होर स्यों बौहत ई डरी गईरे थे होर तिन्हे आपु मंझ बोल्या; ये कुणहां, कि तूफान होर पाणी भी एसरा हुक्म मन्हा ऐं?

5 ¹ होर स्यों झील री दूजी तरफ गिरासेनियो रे देसा मन्झ पौहंची गये। ² होर जेबे से किस्तिया ले उतरेया ता झटपट एक माहणु जेस मंझ जे दुष्ट आत्मा थी कबरा ले निकळी किन्हें तेस किन्हें मिल्या। ³ से कबरा मंझ रैंहयां था। होर कोई भी तेस जो सांगळा किन्हें नी बान्ही सकदा था। ⁴ क्यूंकि तेस जो बार बार बेडिया होर सांगळा किन्हें बान्हीरा हुहां था, पर तिने सांगळ त्रोडी दिते होर बेडिया रे टोटे टोटे करी दिते, होर कोई तेस जो आपणे बसा मंझ नी करी सकदा था। ⁵ से लगातार राती ध्याड़ी कबरा होर पहाड़ा मन्झ चिन्गहा था, होर अपणे आपा जो पाथरा किन्हें मारहा था। ⁶ से यीसू जो दूरा ले ई देखी किन्हें दोडेया, होर तेस जो प्रणाम कितेया। ⁷ होर जोरे जोरे चिंगी किन्हें बोल्या; हे यीसू परम प्रधान परमेसरा रे पुत्र, मुंजो तेरे किन्हें क्या काम आ? हांऊ तुजो परमेसरा री कसम देहां, कि मुंजो पीड़ा नी दे। ⁸ क्यूंकि तिने तेस किन्हें बोल्या था, हे असुध आत्मा, एस माहणु मंझा ले निकळी जा। ⁹ यीसुए तेस ले पुछेया; तेरा नांऊ क्या आ? तिने तेस किन्हें बोल्या; मेरा नांऊ सेना आ; क्यूंकि आस्से बौहत ऐ। ¹⁰ होर तिने तेस ले बौहत अरज किती, आस्सा जो एस देसा ले बाहर नी भेज। ¹¹ तेथी पहाड़ा पर सुअरा रा एक बडा झुण्ड चरेया करहा था। ¹² होर तिन्हे तेसले अरज करी किन्हें बोल्या, कि आस्सा जो इन्हा सुअरा मन्झ भेजी दे, कि आस्से तिन्हा अन्दर जाई सकिये। ¹³ होर तिने तिन्हा जो हुकम दितेया होर अशुद्ध आत्मा निकळी किन्हें सुअरा मंझ चली गयी, होर तेस झुंडा मंझ करीब दो झार सुअर थे, से झुंड प्रचण्ड हुई किन्हें ढलाना परा ले लुढकदे लुढकदे झीला मन्झ पई गया, होर डूबी मरेया। ¹⁴ होर तिन्हारे पुहाले भगी किन्हें नगर होर

गाऊंआ मन्झ जाई किन्हें ये खबर दीती, होर जो कुछ हुऐआ था, तेता जो देखणे रे कठे लोक आये।¹⁵ होर स्यों यीसू वाले आये, होर देखा, जेस मंझ जे सेना समाईरी थी; तेस जो कपड़े पैहिनीरे होर सचेत हुई किन्हें बैठीरे देख्या, होर स्यों ये देखी किन्हें डरी गए।¹⁶ होर देखणे वाळे तेसरा, जेस मंझ जे दुष्ट आत्मा थी, होर सुअरा रा पूरी हाल तिन्हा जो दस्सेया।¹⁷ होर स्यों तेस वाले आई किन्हें अरज करदे लगे, कि आस्सा रे लाके ले चली जा।¹⁸ होर जेबे से किस्ती पर चढ़दा लग्या, ता से जेस मंझ जे पैहले दुष्ट आत्मा थी, से तेस ले अरज करदा लग्या, कि मुंजो आपणे साउगी रैहणे दे।¹⁹ पर यीसुए तेस जो ईजाजत नी दीती, होर तेस किन्हें बोल्या, आपणे घरा जाई किन्हें आपणे लोका जो दस, कि तेरे पर दया करी किन्हें प्रभुए तेरे कठे केहड़े बडे बडे काम कीते।²⁰ से जाई किन्हें दिकपुलिसा मन्झ एस गल्ला रा प्रचार करदा लग्या, कि यीसुए मेरे कठे केहड़े बडे बडे काम कीते, होर सभ हरान हुए।²¹ जेबे यीसू दबारा किस्तीया मन्झ झीला री दूजी तरफा गया ता, एक बडी भीड़ तेसरे साम्हणे खहड़ी गयी, होर से झीला रे बाहड़े था।²² होर अराधनालया रे मुखिये मंझा ले एक याईर नाऊआं रा मुखिया आया, होर तेस जो देखी किन्हें, तेसरे पैरा पई गया।²³ होर तिने ये बोली किन्हें बौहत अरज कीती, कि मेरी छोटी बेटी मरने वाळी ई; तू आई किन्हें तेस्सा पर हाथ रखी दे, ताकि से ठीक हुई किन्हें जीऊन्दी रहे।²⁴ तेबे से तेस साउगी गया, होर बडी भीड़ तेसरे पीछे हुई गयी, एथी तक कि लोक तेस पर पई जाया करहा ऐ थे।²⁵ होर एक जनाने, जेस्सा जो बारा साला ले खून बैहणे री बमारी थी।²⁶ होर से कई बैदा ले लाज करींदि करींदि बौहत दुःखी हुई चुकिरी थी; होर तेस्से आपणा सभ कुछ खर्च करी दितिरा था, पर कुछ फायदा नी हुआ, पर होर जादा बमार हुई गईरी थी।²⁷ जेबे तेस्से यीसू रे बारे सुणेया से भीड़ा मंझ तेसरे पीछे आई, होर तेसरे कपड़े छुही लये।²⁸ क्यूंकि तेस्से बोलीरा था, कि अगर हांऊ तेसरे कपड़े छुही लैहन्गी, ता मां ठीक हुई जाणा।²⁹ होर तेभे ई तेस्सा रा खून बैहणा बंद हुई गया; होर तेस्से आपणे सरीरा मन्झ जाणी लया, कि हांऊ तेस्सा बमारी ले ठीक हुई गयी।³⁰ यीसुए तेबे ई जाणी लया, कि मेरे ले सक्ति निकळी, होर से भीड़ा मन्झा ले पीछे मुड़ेया होर पुछेया, मेरे कपड़े कुने छुहे? ³¹ होर तेसरे चले तेस किन्हें बोल्या; तू देख्हा, कि भीड़ तेरे पर पई जाया करहा ई, होर तुस्से बोल्हा ऐ; कि हांऊ कुने छुहेआ? ³² तेबे तिने तेस्सा जनाने जो देखणे रे कठे जेस्से जे ये काम कीतीरा था, चारो तरफ देख्या।³³ तेबे तेस्से जनाने ये जाणी किन्हें, कि तेस्सा किन्हें केहड़ी भलाई हुई, से डरदी होर काम्दी हुई आई, होर तेसरे पैरा पर पई किन्हें, तेस किन्हें सारा हाल सच सच बोली दितेया।³⁴ तिने तेस्सा किन्हें बोल्या; बेटी तेरे बिस्वासे ई, तू ठीक कीती; सांती किन्हें जा, होर आपणी

एस बमारी ले बची रैह।³⁵ से ये बोल्या ई करहा था, कि यहूदी धर्म सभा रे, मुखिया रे घरा ले लोके आई किन्हें बोल्या, कि तेरी बेटी मरी गयी; एबे तू गुरु जो किधियो परेसान करेया करहा? ³⁶ जो गल्ला स्यों करेया करहा ऐं थे, यीसुए तिन्हा गल्ला री अनसुणी करी किन्हे, आराधनालया रे मुखिया किन्हें बोल्या; मत डरा; सिर्फ बिस्वास रखा।³⁷ होर तिने पतरस होर याकूब होर याकुबा रे भाई यहून्ना जो छाडी किन्हें, होर केसी जो आपणे साउगी नी आउणे दितेया।³⁸ होर आराधनालया रे, मुखिया रे घरा मन्झ पौहंची किन्हें, तिने लोका जो बौहत रोंदे कर्लान्दे होर चिलांदे देख्या।³⁹ तेबे तिने भीतर जाई किन्हें तिन्हा किन्हें बोल्या, तुसे किधियो हाल्ला पाईरा होर रोंदे लगीरे? म्हठी नी मरीरी, पर सोया करहा ई।⁴⁰ स्यों तेसरी हासी डुआन्दे लगे, पर तिने सभ बाहर काहड़े होर म्हठी रे माऊ बाब होर आपणे साथिया जो लई किन्हें, से अन्दर गया, जेथी जे म्हठी पईरी थी।⁴¹ होर म्हठी रा हाथ पकड़ी किन्हें तिने तेस्सा किन्हें बोल्या; 'तलीता कूमी' जेसरा मतलब ये आ कि हे मठिए, हांऊ तेरे किन्हें बोल्हा, उठी जा।⁴² होर म्हठी झटपट उठी किन्हें चल्दी फिरदी लगी; क्यूंकि से बारा साला री थी। होर स्यों लोक बौहत हरान हुई गये।⁴³ फेरी तिने तिन्हा जो चिताई किन्हे हुकम दितेया कि ये गल केसी जो पता नी चले, होर ये भी बोल्या; कि तेस्सा जो कुछ खाणे रे कठे देआ।

6 ¹ होर से तेथी ले निकळी किन्हें आपणे देसा मंझ आया, होर तेसरे चले तेसरे पीछे चली पये।² होर सब्ता रे ध्याड़े से आराधनालया मन्झ उपदेस करदा लग्या; होर बौहत लोक सुणी किन्हें हरान हुई गये होर बोल्दे लगे, एस जो ये गल्ला केथी ले आई? होर ये केहड़ा ज्ञान आ जो एस माहणु जो दितिरा? होर केहड़े बडे बडे काम एसरे हाथा ले हुहां ऐं? ³ क्या ये तरखाण, मरीयमा रा म्हठा नी आ, होर याकुब होर योसेस होर यहूदा होर समौन एसरे भाई नी ऐ? होर क्या तेसरी बैहणीया एथी आस्सा मंझ नी रैहन्दी? इधी कठे तिन्हे तेसरे बारे मन्झ ठोकर खाद्दी।⁴ यीसुए तिन्हा किन्हें बोल्या, कि नवी आपणे देसा होर आपणे टब्बरा होर आपणे घरा जो छाडी किन्हें होर केथी भी बेज्जत नी हुंदा।⁵ होर से तेथी कोई होर बडे काम नी करी सक्या, सिर्फ थोड़े बौहत बमारा पर हाथ रखी किन्हें स्यों ठीक कीते।⁶ होर तिने तिन्हारे अविस्वासा पर हरानी जताई, होर से चारो तरफ गाऊंआ गाऊंआ उपदेस करदा लग्या।⁷ होर से तिन्हा बारा चले जो आपणे वाले सादी किन्हें तिन्हा जो दो दो करी किन्हें भेज्दा लग्या; होर तिन्हा जो असुद्ध आत्मा पर हक दिया।⁸ होर तिने तिन्हा जो हुकम दितेया, रस्ते रे कठे डंडे जो छाडी किन्हें होर कुछ देख्या लेंदे; ना ता रोटी, ना झोळा होर ना बटूए मंझ ढब्बे।⁹ जूते ता पैहनी सक्हा ऐ पर दो दो कुरते नी पैहनणा।¹⁰ होर तिने तिन्हा किन्हें बोल्या; जेथी

केथी तुसे केसीरे घरा जाओ ता जेबे तक तेथी ले बिदाई नी हो, तेबे तक तेथी रुकी रह्या।¹¹ जेस जगहा रे लोक तुस्सा जो नी मन्ने, होर तुस्सा री नी सुणे, तेथी ले चलदे ई तुस्से आपणे पैरा री धूडा जो झाडी देआ, ताकि तिन्हा पर गुआही हो।¹² होर तिन्हे जाई किन्हें प्रचार कितेया, कि मन फिराऊवा।¹³ होर तिन्हे बौहत दुष्ट आत्मा काढी, होर बौहत बीमारा पर तेल मळी किन्हें तिन्हा जो ठीक कितेया।¹⁴ होर हेरोदेस राजे तेसरे बारे सुणेया, क्यूंकि तेसरा नांऊ फैहली गईरा था, होर तिने बोल्या, कि यहुन्ना बपतिस्मा देणे वाळा मरीरे मंझा ले जीउंदा हुई गईरा, इधी कठे तेस ले सामर्था रे काम हुहां ऐं।¹⁵ होर होरिये बोल्या, ये ता एलियाह आ, पर होरिये बोल्या, नबी या नबिया मंझा ले केसी एकी साहीं आं।¹⁶ हेरोदेसे ये सुणी किन्हें बोल्या, जेस यहुन्ना रा मूंड मैं कटवाई दितिरा था, से जीउंदा हुई गईरा।¹⁷ क्यूंकि हेरोदेसे आपणे आप यहुन्ना जो पकड़वाई किन्हें जेहला मंझ पाई दितिरा था, तिने आपणे भाई फिलिपुसा री लाडी हेरोदियासा री वजहा ले, जेस्सा किन्हें जे तिने ब्याह करी लईरा था, एहडा कितेया।¹⁸ क्यूंकि यहुन्ने हेरोदेसा किन्हें बोलिरा था, कि आपणे भाई री लाडी रखणा तेरे कठे ठीक नी आ।¹⁹ इधी कठे हेरोदियास तेस किन्हें नफरत करहा ई थी, होर ये चाहीं थी, कि तेस जो मरवाई दे, पर एहडा नी हुई सक्या।²⁰ क्यूंकि हेरोदेस यहुन्ना जो धर्मी होर पवित्र माहणु जाणी किन्हें तेस ले डरहा था, होर तेस जो बचाहां था, होर तेसरी गल्ला सुणी किन्हें बौहत डरी जाहां था, फेरी भी से तेसरी गल्ला खुसी किन्हें सुणहां था।²¹ होर ठीक मौका आउणे पर, जेबे हेरोदेसे आपणे जन्म ध्याडे पर आपणे प्रधाना होर सेनापतिया, होर गलीला रे बडे लोका रे कठे बडी दावत दिती।²² होर हेरोदियासा री म्हठी अन्दर आई, होर नाची किन्हें हेरोदेसा जो होर तेस साउगी बैठणे वाळे लोका जो खुस कितेया; तेबे राजे म्हठी किन्हें बोल्या, तू जो चाहे मेरे ले मांग मां तुजो देणा।²³ होर तिने कसम खादही, कि जो कुछ तू मेरे ले मान्धगी, मां आपणा आधा राज तक तुजो देई देणा।²⁴ तेस्से बाहर जाई किन्हें आपणी माऊआ ले पुछेया, कि हांऊ क्या मांगू? तेस्से बोल्या; यहुन्ना बपतिस्मा देणे वाळे रा मूंड।²⁵ से झटपट राजे वाले अन्दर आई, होर तेस ले अरज किती; हांऊ चाहीं कि तू एभे ई यहुन्ना बपतिस्मा देणे वाळे रा मूंड एक थाळी मन्झ मंगवाई दे।²⁶ तेबे राजा बौहत दुःखी हुआ, पर आपणी कसमा री वजहा ले, होर साउगी बैठणे वाळे री वजहा ले, से तेस्सा जो टाळी नी सक्या।²⁷ होर राजे झटपट एक स्पाही जो हुकम दितेया कि तेसरा मूंड काटी किन्हें लई आऊ; तिने जेहला मंझ जाई किन्हें तेसरा मूंड काटेया;²⁸ होर एक थाळी मन्झ रखी किन्हें लई आया होर तेस्सा म्हठी जो दितेया, होर म्हठीए आपणी माऊआ जो दितेया।²⁹ ये सुणी किन्हें तेसरे चले आये, होर तेसरी ल्हास

चकी किन्हें कबरा मन्झ रखी।³⁰ प्रेरिते यीसू वाले कठे हुई किन्हें आये, जो कुछ तिन्हे कितेया, होर स्वाया था, सब तेस जो दसी दितेया।³¹ तिने तिन्हा किन्हें बोल्या; तुस्से आप्पुए केसी बियाबान जगहा मन्झ चली जाऊआ, होर अराम करा; क्यूंकि बौहत लोक आया जाया करहा ऐ थे, होर तिन्हा जो खाणे रा मौका भी नी मिल्ला था।³² इधी कठे स्यों किस्तिया पर स्वार हुई किन्हें, बियाबान जगहा मन्झ लग जे चली गये।³³ होर बौहतिये तिन्हा जो जांदे होए पछ्याणी लया, होर सभ के सभ नगरा मंझा ले कठे हुई किन्हें पैदल दौडे होर तिन्हा ले पैहले पूजी गये।³⁴ होर तिने निकळी किन्हें एक बडी भीड़ देखी, होर तिन्हा पर तरस खाध्या, क्यूंकि स्यों तिन्हा भेडा साहीं थे, जिन्हारा कोई रखवाळा नी हुंदा; होर से तिन्हा जो बौहत सारी गल्ला स्वान्दा लग्या।³⁵ जेबे जे ध्याडा ढळी गया, ता तेसरे चले तेस वाले आई किन्हें बोल्दे लगे; ये बियाबान जगहा ई, होर ध्याडा भी बौहत ज्यादा ढळी गईरा।³⁶ तिन्हा जो भेजी दे, कि स्यों चारो तरफा रे ग्रांऊआं होर बस्ती मन्झ जाई किन्हें, आपणे कठे कुछ खाणे जो लई आये।³⁷ तिने तिन्हा जो जबाब दितेया; कि तुसे ई इन्हा जो खाणा देआ; तिन्हे तेस किन्हें बोल्या; क्या आस्से सौ दिनारा री रोटीया मुले ल्याई ऐ, कि तिन्हा जो खुआई सकिए? ³⁸ तिने तिन्हा किन्हें बोल्या; जाई किन्हें देखा तुस्सा वाले कितनी रोटीया ई? तिन्हे पता करी किन्हें बोल्या; पांज रोटीया होर दो मछिया।³⁹ तेबे तिने तिन्हा जो हुकम दितेया, कि सभी जो हरे घाहा प्रयाहले घीहडी मंझ बठ्याळी देआ।⁴⁰ स्यों सौ सौ होर पन्ज्याह पन्ज्याहा री घीहडी मंझ बैठी गये।⁴¹ होर तिने तिन्हा पांज रोटीया जो होर दो मछिया जो लई किन्हें, स्वर्गा वखा देखी किन्हें धन्यवाद कितेया होर रोटीया तोडी तोडी किन्हें चले जो देंदा गया, कि स्यों लोका जो खाणा बांडी सके, होर तिन्हे दो मछिया भी तिन्हा मंझ बांडी दिती।⁴² होर सभ खाई किन्हें रजी गये।⁴³ होर तिन्हे बचीरे रोटी रे टुकडे री होर मछिया किन्हें भहरी री बारा टोकरिया चकी।⁴⁴ जिन्हें जे रोटीया खाधही, स्यों पांज झार मर्ध थे।⁴⁵ तेबे तिने झटपट आपणे चले जबरदस्ती किस्तिया पर चढाये, ताकि स्यों तेस ले पैहले पारली तरफ बैतसैदा जो चली जाए, जेबे तक कि से लोका जो भेजी नी दे।⁴⁶ होर तिन्हा जो भेजणे ले बाद से पहाडा पर प्रार्थना करने रे कठे चली गया।⁴⁷ होर जेबे साहंज हुई, ता किस्ती झीला रे मन्झ भर बीचो बीच थी, होर से कल्हा धरती पर था।⁴⁸ होर जेबे तिने देख्या, कि स्यों किस्ती चलान्दे चलान्दे डरी गईरे; क्यूंकि बागरा रा असर तिन्हा पर भारी था, राती चौथे पैहरा रे करीब, से झीला पर चली किन्हें तिन्हा वाले आया; होर तिन्हा ले अगे निकलणे ही वाळा था।⁴⁹ पर तिन्हे तेस जो झीला पर चल्दे देखी किन्हें समझ्या, कि से भूत आ, होर चिंगा पान्दे लगे, क्यूंकि सभ तेस जो देखी किन्हें डरी गईरे थे।

50 पर तिने झटपट तिन्हा किन्हें गल्ला किती होर बोल्या; डरा नी हिम्मत रखा; ये हांऊ आं; डरा मत । 51 तेबे से तिन्हा वाले किस्तिया पर आया, बागर रुकी गया; स्यों बौहत हरान हुई गे । 52 क्यूंकि स्यों तिन्हा रोटिया रे बारे मन्झ नी समझे थे पर तिन्हारे मन काठे हुई गयीरे थे । 53 होर स्यों पार उतरी किन्हें गन्नेसरत पूजे, होर किस्ती जो बाहडे बान्ही दितेया । 54 होर जेबे स्यों किस्ती ले उतरे, ता लोक झटपट तेस जो पैहचाणी गये । 55 फेरी स्यों बमारा जो मांजे प्रयाहले चकी किन्हें हर जगहा फिरदे रहे, जेथी भी तिन्हे ये सुणेया कि से तेथी आ; होर स्यों तिन्हा जो तेथी तेथी लई गये । 56 होर जेथी केथी से गांऊआ, नगरा, या बस्तिया मन्झ जाहां था, ता लोक बमारा जो बजारा मंझ रखी किन्हें तेस ले अरज करहा ऐ थे, कि से तिन्हा जो आपणे कपडे रा पल्लू ई छूहणे दे; होर जितने तेस जो छुहां ऐं थे, स्यों सब ठीक हुई जाहें थे ।

7 1 तेबे फरीसी होर कई एक साख्त्री जो यरूस्लेमा ले आई रे थे, तेस वाले आई किन्हें कठे हुए । 2 होर तिन्हे तेसरे कई चले जो असुद्ध यानी बगैर हाथ धोये रोटी खांदे देख्या था । 3 क्यूंकि फरीसी होर सब यहूदी, पुरनिये रे रवाजा पर चल्हा ऐ, होर जेबे तक ठीक ढंगा किन्हें हाथ नी धोई लैंदे तेबे तक खाणा नी खांदे । 4 होर बजारा ले आई किन्हें, जेबे तक स्यों न्हाई नी लैंदे, तेबे तक खाणा नी खांदे; होर बौहत सारी गल्ला ई, जो तिन्हा वाले मनणे रे कठे पुजाई दितीरी, जिहां कौलिया, लोटे होर त्राम्बे रे भांडे जो धोणा – मांजणा । 5 इधी कठे तिन्हे फरीसीये होर साख्त्रिये तेस ले पुछेया, कि तेरे चले किधियो पुरनिये रे रवाजा पर नी चल्दे, होर बगैर हाथ धोये रोटी खाहें । 6 तिने तिन्हा किन्हें बोल्या; कि यसायाह नबिए तुस्सा कपटिया रे बारे मंझ बिलकुल ठीक भविष्यवाणी कितीरी; जेहडा लिखीरा; कि ये लोक आपणे ओठा किन्हें मेरी ईज्जत करहा ऐ, पर तिन्हारा मन मेरे ले बौहत दूर आ । 7 होर स्यों बेकार मेरी पूजा करहा ऐ; क्यूंकि स्यों माहणुआ रे हुकमा जो धर्मा री बिधी बोली किन्हें स्वाहें । 8 क्यूंकि तुस्से परमेसरा रे हुकमा जो टाळी किन्हें माहणुआ रे रवाजा जो मन्हा ऐ । 9 होर तिने तिन्हा किन्हें बोल्या; तुस्से आपणे रवाजा जो मनाणे रे कठे परमेसरा रे हुकमा जो कितने बढ़िया तरीके किन्हें टाळी देहां ऐं? 10 क्यूंकि मुसे बोलीरा कि आपणे माऊ होर बाबा री ईज्जत करा; होर जो कोई माऊ या बाबा जो बुरा बोले, से जरूर मारेया जाए । 11 पर तुस्से बोल्हा ऐ, कि अगर कोई आपणे माऊ बाबा किन्हें बोले, कि जो कुछ तुजो मेरे ले फायदा मिली सकहा था, से कुरवान यानी परमेसरा जो अरपन हुई चुकिरा । 12 होर तुस्से तेस जो तेसरे बाबा या माऊआ री कुछ सेऊआ नी करणे देंदे । 13 इस तरहा तुस्से अपणे रवाजा किन्हें परमेसरा रा वचन टाळी देहां ऐं; होर ऐहडे ऐहडे बौहत सारे काम करहा ऐ ।

14 होर तिने लोक आपणे वाले सादी किन्हें तिन्हा किन्हें बोल्या, तुस्से सभ मेरी सुणा, होर समझा । 15 एहडी कोई चीज नी ई जो माहणु जो बाहरा ले गन्दा करे, पर जो चीजा माहणु रे अन्दरा ले निकळा ई, स्यों ई तेस जो गंदा करहा ई । 16 अगर केसी रे सुणने रे कान हो, ता से सुणी ले । 17 फेरी जेबे से भीडा जो छाडी किन्हें घरा अन्दर गया, ता तेसरे चले एस दृष्टान्ता रे बारे मन्झ तेस ले पुछेया । 18 तिने तिन्हा ले पुछेया, क्या तुस्से भी ऐहडे नासमझ ऐ? क्या तुस्से नी समझ्दे? कि जो चीज बाहरा ले माहणु रे अन्दर जाहीं, से तेस जो असुद्ध नी करी सकदी? 19 क्यूंकि से तेसरे मना मन्झ नी, पर पेटा मंझ जाहीं, होर संडासा ले हुई किन्हें बाहर निकळी जाहां? ये बोली किन्हें तिने खाणे जो सुद्ध ठैहराया । 20 फेरी तिने बोल्या; जो माहणु मंझा ले निकळा आ, से ई माहणु जो असुद्ध करहा । 21 क्यूंकि अन्दरा ले यानी माहणु रे मना मंझा ले, बुरी बुरी सोच, व्यभिचार । 22 चोरी, खून, परखीगमन, लालच, दुष्टपन, धोखा, लुचपन, बुरी नजर, निन्दा, घमण्ड होर मुखता निकळहा ई । 23 ये सब बुरी गल्ला अन्दरा ले ई निकळहा ई होर माहणु जो असुद्ध करहा ई । 24 फेरी से तेथी ले उठी किन्हें सुर होर सैदा रे देसा मंझ आया; होर एक घरा मन्झ गया, होर चाहां था, कि कोई नी जाणी पाये, पर से ल्हुखी नी सक्या । 25 होर झटपट एक जनाने जेसरी छोटी म्हठी मंझ दुष्ट आत्मा थी, तेसरे बारे मन्झ सुणी किन्हें आई, होर तेसरे पैरा पर पई गई । 26 ये जनाने यूनानी होर सुरुफिनिकी जाती री थी; होर तेस्से तेस ले अरज किती, कि मेरी म्हठी मंझा ले दुष्ट आत्मा काढी दे । 27 तिने तेस्सा किन्हें बोल्या, पैहले बच्चेया जो ता पेट भरी किन्हें रजणे ता देआ, क्यूंकि बच्चेया री रोटी लई किन्हें कुत्ते रे अगे रखणा ठीक नी आ । 28 पर तेस्से तेस जो जबाब दितेया; कि सच आ प्रभु; तेबे बी कुत्ते भी ता मेजा थाले पईरे बच्चेया री रोटी रे टुकडे खाई लैहां ऐं । 29 होर तिने तेस्सा किन्हें बोल्या; एस जबाबा री वजहा ले तू चैना किन्हें चली जा; दुष्ट आत्मा तेरी बेटी मंझा ले निकळी गयी । 30 होर तेस्से आपणे घरा आई किन्हें देख्या कि म्हठी मांजे पर लेटिरी होर दुष्ट आत्मा तेस्सा मंझा ले निकळी गईरी ई । 31 फेरी से सुर होर सैदा रे देसा ले निकळी किन्हें दिकपुलिस देसा ले हुई किन्हें गलीला री झीला पर पुजेया । 32 होर लोके एक टौणे जो, जो हकलाहां भी था, तेस वाले आई किन्हें तेस ले अरज किती, कि से आपणा हाथ तेस पर रखे । 33 तेबे से तेस जो भीडा ले लग लई गया, होर आपणी गुठिया तेसरे काना मंझ पाई, होर थूकी किन्हें तेसरी जीभ छुही । 34 होर स्वर्गा वखा देखी किन्हें आह भरी, होर तेस किन्हें बोल्या; इफ्तह यानी खुल्ही जा । 35 होर तेसरे कान खुल्ही गये, होर तेसरी जीभा री गांठ भी खुल्ही गई, होर से साफ साफ बोल्दा लग्या । 36 तेबे तिने स्यों खबरदार किते कि केसी किन्हें देख्या बोल्दे; पर जितना तिने

स्यों खबरदार किते उतना ई स्यों प्रचार करदे लगे । ³⁷ होर स्यों बौहत ई हरान हुई किन्हें बोल्दे लगे, तिने जो कुछ कितेया सभ खरा कितेया; से टौणे जो सुणने री होर टाटे जो बोलणे री ताकत देहां ।

8 ¹ तिन्हा ध्याड़े, जेबे जे दबारा बडी भीड़ कठी हुई, होर तिन्हा वाले खाणे रे कठे कुछ नी था, तिने आपणे चेले जो आपु वाले सादी किन्हें तिन्हा किन्हें बोल्या । ² मुंजो ऐसा भीड़ा पर तरस आया करहा आ, क्यूंकि ये त्राय ध्याड़े ले बराबर मेरे साउगी ऐ, होर तिन्हा वाले खाणे रे कठे कुछ नी आ । ³ अगर हांऊ तिन्हा जो भूखा घरा भेजी दूं, ता तिन्हा रस्ते मन्झ ई थकी किन्हें बेहोस हुई जाणा, क्यूंकि इन्हा मंझा ले कई ता बौहत दूरा ले आईरे । ⁴ तेसरे चेले तेस जो जबाब दितेया, कि एथी जंगला मन्झ इतनी रोटिया केथी ले ल्याईये ताकि यों रजी जाए? ⁵ तिने तिन्हा ले पुछेया; तुस्सा वाले कितनी रोटिया ई? तिन्हे बोल्या, सात । ⁶ तेबे तिने लोका जो जमीना पर बैठणे रा हुकम दितेया, होर स्यों सात रोटिया लई, होर धन्यबाद करी किन्हें तोड़ी, होर आपणे चेले जो देंदा गया कि स्यों तिन्हा रोटिया जो तिन्हारे अगे रखे, होर तिन्हे लोका अगे खाणा परोसेया । ⁷ तिन्हा वाले थोहड़ी छोटी मछिया भी थी; होर तिने धन्याबाद करी किन्हें तिन्हा जो भी लोका रे अगे रखणे रा हुकम दितेया । ⁸ होर स्यों खाई किन्हें रजी गये होर तिन्हे बाकी बची रे टुकड़े रे सात टोकरे भरी किन्हें चके । ⁹ होर स्यों लोक लगभग चार झारा रे करीब थे, होर तिने स्यों भेजी दिते । ¹⁰ होर से झटपट आपणे चेले साउगी किस्ती पर स्वार हुई किन्हें दलमनुता देसा जो चली गया । ¹¹ होर फरीसी निकळी किन्हें तेस किन्हें वाद विवाद करदे लगे, होर तेस जो परखणे रे कठे तेस ले कोई स्वर्गा रा चिन्ह मांगेया । ¹² तिने आपणी आत्मा मन्झ आह भरी किन्हें बोल्या, एस पीहड़ी रे लोक चिन्ह किधियो टौळहा ऐ? हांऊ तुस्सा किन्हें सच सच बोल्हा, कि एसा पीहड़ी री लोका जो कोई चिन्ह नी दितेया जाणा । ¹³ होर से तिन्हा जो छाडी किन्हें दबारा किस्तिया पर आया होर झीला रे पारली तरफ गया । ¹⁴ होर स्यों रोटी ल्याऊणा भूली गयीरे थे, होर किस्ती मन्झ तिन्हा वाले एक ई रोटी थी । ¹⁵ होर तिने स्यों खबरदार किते, कि देखा, फरिसिया रे खमीरा होर हेरोदेसा रे खमीरा ले सावधान रहुआ । ¹⁶ स्यों आपु मन्झ सोच विचार करदे लगे, कि आस्सा वाले ता रोटी नी ई । ¹⁷ ये जाणी किन्हें यीसुए तिन्हा किन्हें बोल्या; तुस्से आपु मन्झ सोच विचार किधियो करेया करहा ऐ? कि तुस्सा वाले रोटी नी ई? क्या हल्ली तक तुस्से जाणदे होर समझे नी ऐ? ¹⁸ क्या तुस्सा रा मन काठा हुई गयीरा? क्या हाखिया हुंदे हुई भी नी देखे? होर कान हुंदे हुऐ भी नी सुणदे? होर तुस्सा जो याद नी आ । ¹⁹ कि जेबे मैं पांज झार लोका रे कठे पांज रोटिया तोड़ी थी

ता तुस्से बचीरे टुकड़े री कितनी रोटिया भरी किन्हें चकी थी? तिन्हे तेस किन्हें बोल्या, बारा टोकरिया । ²⁰ होर जेबे मैं चार झार लोका रे कठे सात रोटिया तोड़ी, ता तुस्से बचीरे टुकड़े री कितनी टोकरिया चकी? होर तिन्हे तेस किन्हें बोल्या, सात टोकरे । ²¹ तिने तिन्हा किन्हें बोल्या, क्या हल्ली तक तुस्से नी समझे? ²² होर स्यों बैतसैदा मन्झ आये; होर लोके एक काणा तेस वाले ल्यांदेआ होर तेस ले अरज किती, कि तेस जो छुही ले । ²³ होर तिने तेस काणे रा हाथ पकड़ेया होर तेस जो गांऊआ ले बाहर लई गया, होर तेसरी हाखिया मन्झ थुकी किन्हें तेस पर हाथ रख्या, होर तेस ले पुछेया; क्या तुजो कुछ सुझहा? ²⁴ ऊपर देखी किन्हें तिने बोल्या; हांऊ माहणुआ जो देखहा; क्यूंकि स्यों मुंजो डाळा साहीं चल्दे फिरदे नजर आया करहा ऐ । ²⁵ तेबे तिने दबारा तेस री हाखिया पर हाथ रख्या, होर तिने ध्याना किन्हें देख्या, होर सब कुछ साफ साफ सुझधा लग्या । ²⁶ होर तिने से ये बोली किन्हें घरा जो भेज्या, कि एस गांऊआं रे अन्दर पैर भी देख्या रख्दा । ²⁷ यीसू होर तेसरे चेले कैसरिया फिलिप्पी रे गांऊआं मन्झ चली गये; होर रस्ते मन्झ तिने आपणे चेले ले पुछेया कि लोक मुंजो क्या बोल्हा ऐ? ²⁸ तिन्हे तेस जो जबाब दितेया; कि यहून्ना बपतिस्मा देणे वाळा; पर कोई कोई एलियाह; होर कोई नबीया मंझा ले कोई एक आ, एहडा बोल्हा ऐ । ²⁹ तिने तिन्हा ले पुछेया; पर तुस्से मुंजो क्या बोल्हा ऐ? पतरसे तेस जो जबाब दितेया; तू मसीह आ । ³⁰ तेबे तिने तिन्हा जो खबर दार करी किन्हें बोल्या, कि तुस्से मेरे बारे मन्झ केसी जो देख्या दस्दे । ³¹ होर से तिन्हा जो स्वान्दा लग्या, कि माहणु रे पुत्रा रे कठे जरूरी आ कि से बौहत दुःख ऊठाये, होर पुरनिये होर महायाजक होर साख्री तेस जो तुच्छ समझी किन्हें मारी दे, होर से त्रीजे ध्याड़े जी उठे । ³² तिने ये गल तिन्हा किन्हें साफ साफ बोली दीती; एस गल्ला पर पतरस तेस जो अलग जे लई जाई किन्हें झिडकदा लग्या । ³³ पर तिने मुडी किन्हें, होर आपणे चेले वखा जो देख्या होर पतरसा जो झिडकी किन्हें बोल्या; हे सैतान, मेरे साम्हणे ले दूर हुई जा; क्यूंकि तू परमेसरा री गल्ला पर नी, पर माहणु री गल्ला पर मन ल्गाहां । ³⁴ तिने भीड़ा समेत आपणे चेले जो सादी किन्हे, तिन्हा किन्हें बोल्या, जो कोई मेरे पीछे आऊणा चाहे, से आपणे आपा री नाह करे होर आपणा कूस चकी किन्हें, मेरे पीछे चले । ³⁵ क्यूंकि जो कोई आपणी जान बचाणा चाहां तेस से खोई देणी, पर जो कोई मेरे होर मेरे सुसमाचारा रे कठे आपणा प्राण गुआई देहन्गा, तेसरा प्राण बची जाणा । ³⁶ अगर माहणु सारे संसारा जो पाई ले होर आपणे प्राण गुआई दे, ता तेस जो क्या फायदा? ³⁷ क्यूंकि कोई भी माहणु केसी चीजा रे बदले जिन्दगी नी पाई सकदा । ³⁸ जेस केसी एस व्यभिचारी होर पापी पीढी मन्झ मेरे होर मेरे वचना री वजहा ले सरमाणा, माहणु रे पुत्रा भी जेबे तेस पवित्र दूता

किन्हें आपणे पिता री महिमा साउगी आउणा, तेबे तेस, तेस ले भी सरमाणा ।

9 ¹ होर तिने तिन्हा किन्हें बोल्या; हांऊ तुस्सा किन्हें सच सच बोल्हा, कि जो एथी खहडी रे, इन्हा मंझा ले कई ऐहडे ऐ, कि जेबे तक स्यों परमेसरा रा राज सामर्था किन्हें आउंदा ना देखी ले, तेबे तक तिन्हा मौता रा सुआद नी चखणा । ² छेह ध्याडे ले बाद यीसु, पतरसा होर याकुबा होर यहूजे जो आपणे साउगी लई गया, होर कल्हे जे केसी ऊन्वे पाहडा पर लई गया; होर तिन्हा रे साम्हणे तेसरा रूप बदली गया । ³ होर तेसरे कपडे ऐहडे चमकदे लगे होर एथी तक इतने चीटे हुई गये कि धरती पर कोई धोबी भी तेहडे चीटे नी करी सकदा । ⁴ होर तिन्हा जो मूसा साउगी एलियाह सुझ्या; होर स्यों यीसू साउगी गल्ला करेया करहा ऐ थे । ⁵ होर पतरसे यीसू किन्हें बोल्या; हे रब्बी, आस्सा रा एथी रैहणा ठीक आ; इधी कठे आस्सा तीन मंडप बनाणे; एक तेरे कठे, एक मुसा रे कठे, होर एक एलियाहा रे कठे । ⁶ क्यूंकि से नी जाणदा था, कि क्या जबाब दे, इधी कठे कि स्यों बौहत डरी गईरे थे । ⁷ तेबे तक बादले स्यों घेरी लये, होर तेस बादला मन्झा ले ये अवाज निकळी, कि ये मेरा प्यारा पुत्र आ; एसरी सुणा । ⁸ तेबे तिन्हे झटपट चारो तरफ देख्या, होर यीसू जो छाडी किन्हें आपणे साउगी होर केसी जो नी देख्या । ⁹ होर स्यों पाहडा ले उतरेया करहा थे, तिने तिन्हा जो हुकम दितेया, कि जेबे तक माहणु रा पुत्र मरीरे मंझा ले जीउंदा नी हुई जाए, तेबे तक जो कुछ तुसे देख्या से केसी किन्हें देख्या बोल्दे । ¹⁰ होर तिन्हे एस गल्ला जो याद रख्या; होर आपु मन्झ बैहस करदे लगे, कि मरीरे मन्झा ले जी ऊठणे रा क्या मतलब आ? ¹¹ होर तिन्हे तेस ले पुछेया, सास्त्री किधियो बोल्हा ऐ, कि एलियाहा रा पैहले आऊणा जरूरी आ । ¹² तिने तिन्हा जो जबाब दितेया, कि एलियाहा सच्चे पैहले आई किन्हें सब कुछ सुधारणा, पर माहणु रे पुत्रा रे बारे मन्झ ये किधियो लिखीरा, कि तेस बौहत दुःख ऊठाणा, होर तुच्छ गिणेया जाणा । ¹³ पर हांऊ तुस्सा किन्हें बोल्हा, कि एलियाह ता आई चुकिरा, होर जेहडा तेसरे बारे मन्झ लिखीरा, कि तिन्हे जो कुछ चाहेया से तेस किन्हें कितेया । ¹⁴ होर जेबे से चले वाले आया, ता तिन्हे तिन्हारे चारो तरफ बडी भीड लगीरी देखी, होर सास्त्री या जो तिन्हा साउगी बैहस करदे देख्या । ¹⁵ होर तेस जो देख्दे ई सभ बौहत हरान हुंदे लगे, होर तेसरी तरफ दौडी किन्हें तेस जो प्रणाम कितेया । ¹⁶ तिने तिन्हा ले पुछेया; तुस्से इन्हा किन्हें क्या बैहस करेया करहा ऐ? ¹⁷ भीडा मंझा ले एकिये तेस जो जबाब दितेया, कि हे गुरू, मैं आपणे म्हठे जो, जेस मंझ जे गूंगी आत्मा स्माईरी, तेरे वाले ल्यान्दिरा था । ¹⁸ जेबे केभे से दुष्ट आत्मा एस पर उत्रहा ई, एस जो हेठ जमीना पर पटकी देहां ई, होर एसरे मुंहा ले झाग निकळदा लगहा, होर दान्द किरडदा लगहा,

होर सुक्दा लगीरा; होर मैं तेरे चले किन्हें बोल्या कि तेस्सा दुष्ट आत्मा जो काढी दे पर स्यों नी काढी सके । ¹⁹ ये सुणी किन्हें तिने तिन्हा जो जबाब दितेया, कि हे अविश्वासी लोको; मां केभे तक तुस्सा साउगी रैहणा? होर कधी तक तुस्सा जो सैहणा? तेस जो मेरे वाले ल्याऊआ । ²⁰ तेबे स्यों तेस जो तेस वाले लई आये होर जेबे तिने से देख्या, ता तेस्से आत्मे से झटपट मरोडेया; होर से जमीना पर पया, होर मुहां ले झाग का काहडी किन्हें रघडधा लग्या । ²¹ तिने तेसरे बाबा ले पुछेया; एस री ये हालत कधी ले ई? ²² तिने बोल्या, बचपना ले; दुष्ट आत्मे एस जो नास करने रे कठे कधी आगी होर कधी पाणी मन्झ सट्टेया; पर अगर तू कुछ करी सकहा, आस्सा पर तरस खाई किन्हें आस्सा री मदद कर । ²³ यीसूऐ तेस किन्हें बोल्या; अगर तू करी सकहा; ये क्या गल हुई? विस्वास करणे वाले रे कठे ता सब कुछ हुई सकहा । ²⁴ बच्चे रे बापूऐ झटपट गिडगिडाई किन्हें बोल्या; हे प्रभु, हांऊ विस्वास करहा, मेरे अविस्वासा रा उपाय करा । ²⁵ जेबे यीसूऐ देख्या, कि लोक दौडी किन्हें भीड लगाया करहा ऐ, ता तिने असुद्ध आत्मा जो ये बोली किन्हें झिडकेया, कि हे गूंगी होर बैहरी आत्मा, हांऊ तुजो हुकम देहां, तेस मंझा ले निकळी जा, होर तेस मन्झ दबारा वाप्स देखेया आऊन्दी । ²⁶ तेबे से चिंगी किन्हें, होर तेस जो बौहत मरोडी किन्हें, निकळी गयी; होर बच्चा मरीरा साहीं हुई गया, लोक एथी तक बोल्दे लगे, कि से ता मरी गया । ²⁷ पर यीसूऐ तेसरा हाथ पकडी किन्हें से ऊपर चक्या, होर से खडा हुई गया । ²⁸ जेबे से घरा जो आया, ता तेसरे चले कल्हे जे जाई किन्हें तेस ले पुछेया, आस्से एस्सा दुष्ट आत्मा जो कि नि काढी सके? ²⁹ तिने तिन्हा किन्हें बोल्या, कि ये जाति बगैर प्रार्थना केसी होर उपाय ले नी निकळी सकदी । ³⁰ फिरी स्यों तेथी ले चली पये, होर स्यों गलीला मंझा ले हुई किन्हें जाया करहा ऐ थे, होर से नी चाहन्दा था कि तेस जो कोई जाणे । ³¹ होर से आपणे चलेया जो उपदेस देंदा होर तिन्हा जो बोल्हा था, कि माहणु रा पुत्र, माहणु रे हाथा ले ई धोखे किन्हें पकडवाया जाणा, होर तिन्हा से मारी देणा, होर मरणे ले बाद तेस त्रीजे ध्याडे जीउंदा हुई जाणा । ³² पर ये गल तिन्हारी समझ नी आई, होर स्यों तेस ले पूछणे ले डरहा ऐ थे । ³³ फेरी स्यों कफरनहुमा मन्झ आये; होर घरा मन्झ आई किन्हें तिने तिन्हा ले पुछेया कि रस्ते मन्झ तुस्से केस गल्ला पर बैहस करेया करहा ऐ थे? ³⁴ पर स्यों चुप रहे, क्यूंकि रस्ते मन्झ तिन्हे आपु मन्झ ये बैहस कीती थी, कि आस्सा मंझा ले बडा कुणहां? ³⁵ तेबे तिने बैठी किन्हें स्यों बारा चले सादे, होर तिन्हा किन्हें बोल्या, अगर कोई बडा हुणा चाहां, ता से सभी ले छोटा होर सभी रा सेवक बणे । ³⁶ होर तिने एक बच्चे जो लई किन्हें तिन्हा मन्झ खडा कितेया, होर आपणे गोदा मन्झ लई किन्हें तिन्हा किन्हें बोल्या । ³⁷ जो कोई मेरे नांऊआं ले ऐहडे बच्चे मंझा ले

केसी एकी जो अपनाहां, से मुंजो अपनाहां; होर जो कोई मुंजो अपनाहां, से मुंजो नी, पर मेरे भेजने वाळे जो अपनाहां।³⁸ तेबे यहूने तेस किन्हें बोल्या, हे गुरु आस्से एक माहणु जो तेरे नांऊआं ले दुष्ट आत्मा जो काहू दे देख्या होर आस्से तेस जो नाह करदे रहे, क्यूंकि से आस्सा रे पीछे नी चल्दा।³⁹ यीसूए बोल्या, तेस जो नाह नी करा; क्यूंकि ऐहड़ा कोई नी आ जो मेरे नांऊआं ले सामर्था रे काम करे, होर जल्दी ई मुंजो बुरा भला बोली सके।⁴⁰ क्यूंकि जो आस्सा रे खिलाफ नी आ, से आस्सा वखा जो आ।⁴¹ जो कोई तुस्सा जो एक ग्लास पाणी इधी कठे प्याये कि तुसे मसीह रे बंदे ऐ, हांऊ तुसा किन्हें सच सच बोल्हा ऐ, कि तेस आपणा फल कधी नी खोणा।⁴² पर जो कोई इन्हा छोटे मंडा ले जो मेरे पर विस्वास करहा, केसी जो भी ठोकर खुआन्धे ता तेसरे कठे खरा आ कि एक बड़ा चक्की रा पाट तेसरे गळा मंडा टांग्या जाये होर तेस जो द्रयाऊवा मन्झ सट्टी दितेया जाए।⁴³ अगर तेरा हाथ तुजो ठोकर खुआऐ ता तेस जो काटी दे, टुंडा हुई किन्हें जीन्दगी मन्झ दाखल हुणा तेरे कठे भला आ, बजाय एता रे कि दो हाथ हुंदे हुए नरका मन्झ पाया जाए जेथी री आग कधी बुझदी नी ई।⁴⁴ जेथी रे कीड़े कधी नी मरदे होर ना आग बुझहा ई।⁴⁵ होर अगर तेरा पैर तुजो ठोकर खुआऐ ता तेस जो काटी दे।⁴⁶ लंगड़ा हुई किन्हें जिन्दगी मन्झ दाखल हुणा तेरे कठे एता ले भला आ, बजाय एता रे कि दो पैर हुंदे हुए नरका री आगा मंडा पाया जाये।⁴⁷ होर अगर तेरी हाख तुझे ठोकर खुआऐ ता तेता जो काही दे, काणा हुई किन्हें परमेसरा रे राजा मन्झ दाखल हुणा तेरे कठे भला आ, बजाय एता रे कि दो हाखिया हुंदे हुए नरका री आगा मन्झ पाई जाए।⁴⁸ जेथी रे कीड़े कधी नी मरदे होर ना आग बुझहा ई।⁴⁹ क्यूंकि हर एक माहणु जो आगा मन्झ लूणा कितेया जाणा।⁵⁰ लूण बांका आ, पर अगर लूणा रा लूणापन खत्म हुई जाहां, ता से दबारा लूणा कीहां कितेया जाणा? आपणे मन्झा लूण रखा, होर आपु मन्झ सांति किन्हें रहा।

10 फेरी से तेथी ले उठी किन्हें यहूदिया री सीमा मन्झ होर यर्दना रे पार आया, होर भीड़ तेस वाले दबारा कठी हुई गयी, होर से आपणे रवाजा रे मुताबक तिन्हा जो दबारा उपदेस देंदा लग्या।² तेबे फरिसिये तेस वाले आई किन्हें तेसरी परखणी करणे रे कठे तेस ले पुछेया, क्या ये ठीक आ कि मर्ध आपणी लाड़ी जो छाडी दे? ³ तिने तिन्हा जो जबाब दितेया, कि मुसे तुस्सा जो क्या हुकम दितीरा? ⁴ तिन्हे बोल्या, मुसे त्याग पत्र लिखणे होर छाडणे रा हुकम दितीरा आ। ⁵ यीसूए तिन्हा किन्हें बोल्या, कि तुस्सा रे मना रे काठेपना री वजहा ले तिने तुस्सा रे कठे ये हुकम लिख्या। ⁶ पर सृष्टि रे सुरुआता ले ई परमेसरे मर्ध होर औरत करी किन्हें तिन्हा जो बणाया। ⁷ एता कठे माहणुआ आपणे माऊ बाबा ले लग हुई

किन्हें आपणी लाड़ी रे साउगी रहणा, होर तिन्हा दुहींआं एक सरीर हुणा। ⁸ एता कठे स्यों ऐबे दो नी पर एक जिस्म हुणे। ⁹ इधी कठे जेस जो परमेसरे जोड़ी रा हो, तेस जो माहणु लग नी करे। ¹⁰ होर घरा मंडा चले एता रे बारे मन्झ तेस ले दबारा पुछेया। ¹¹ तिने तिन्हा किन्हें बोल्या, जो कोई आपणी लाड़ी जो छाडी किन्हें दूजी किन्हें ब्याह करे ता से तेस्सा पैहली रे खिलाफ व्यभिचार करहा। ¹² होर अगर लाड़ी आपणे लाडे जो छाडी दे होर दूजे किन्हें ब्याह करे ता से व्यभिचार करहा ई। ¹³ फेरी लोक बञ्चेया जो तेस वाले ल्याउंदे लगे, कि से तिन्हा पर हाथ रखे, पर चले स्यों झिड़के। ¹⁴ यीसूए ये देखी किन्हें गुस्सा हुई गये होर तिन्हा किन्हें बोल्या, बञ्चेया जो मेरे वाले आऊणे देया होर इन्हा जो नाह नी करा, क्यूंकि परमेसरा रा राज ऐहड़े रा ई आ। ¹⁵ हांऊ तुस्सा किन्हें सच सच बोल्हा, कि जो कोई परमेसरा रे राजा जो बञ्चेया साहीं नी मन्ने, तेस तेता मन्झ कधी भी दाखल नी हुणा। ¹⁶ होर तिने तिन्हा जो गोदा मन्झ लया, होर तिन्हा पर हाथ रखी किन्हें तिन्हा जो आसिरवाद दितेया। ¹⁷ होर जेबे से रस्ते मन्झ जाया करहा था, ता एक माहणु तेस वाले दौड़ी किन्हें आया, होर तेसरे अगे घुटणे टेकी किन्हें तेस ले पुछेया? हे अच्छे गुरु, अनन्त जिन्दगी पाणे रे कठे हांऊ क्या करूं? ¹⁸ यीसूए तेस किन्हें बोल्या, तू मुंजो अच्छा कि बोल्हा? परमेसरा जो छाडी किन्हें कोई अच्छा नी आ। ¹⁹ तू हुकम ता जाणहां, हत्या नी करणा, व्यभिचार नी करणा, चोरी नी करणा, झूठी गुआही नी देणा, धोखा नी देणा, आपणे माऊ बाबा री ईज्जत करणी। ²⁰ तिने तेस किन्हें बोल्या, हे गुरु, इन्हा सभी गल्ला जो ता हांऊ बचपना ले ई मन्नदा आईरा। ²¹ यीसूए तेस पर नजर ऊठाई होर तेस जो प्यार कितेया, होर तेस किन्हें बोल्या, तेरे अन्दर एक गल्ला री कमी ई; जा, जो कुछ तेरा आ, तेता जो बेची किन्हें गरीबा जो दे, होर तुजो स्वर्गा मन्झ धन मिलणा, होर आई किन्हें मेरे पीछे चल। ²² एस गल्ला ले तेसरे चेहरे पर उदासी छाई गयी, होर से दुःखी हुई किन्हें चली गया, क्यूंकि से बौहत अमीर था। ²³ यीसूए चारो तरफ देखी किन्हें आपणे चले किन्हें बोल्या, अमीरा रा परमेसरा रे राजा मन्झ दाखल हुणा केहड़ा कठण आ। ²⁴ चले तेसरी गल्ला ले बौहत हरान हुए, एता पर यीसूए दबारा तिन्हा जो जबाब दितेया, हे बञ्चेयो, जो ढब्बे पर भरोसा रक्खा ऐं, तिन्हा रे कठे परमेसरा रे राजा मन्झ दाखल हुणा केहड़ा कठण आ। ²⁵ परमेसरा रे राजा मन्झ धनवाना रा दाखल हुणा ऊंटा रा सुई रे नाके मंडा ले निकळना आसान आ। ²⁶ स्यों बौहत ई हरान हुई किन्हें आपु मन्झ बोल्दे लगे ता फेरी केसरा उद्धार हुई सकहा? ²⁷ यीसूए तिन्हा जो देखी किन्हें बोल्या, माहणुआ ले ता ये हुई नी सकदा, पर परमेसरा ले हुई सकहा; क्यूंकि परमेसरा ले सभ कुछ हुई सकहा। ²⁸ पतरस तेस किन्हें बोल्दा लग्या, कि देख, आस्से ता

सभ कुछ छाडी किन्हें तेरे पीछे चलीरे।²⁹ यीसूए बोल्या, हांऊ तुस्सा किन्हें सच सच बोल्ला, कि एहड़ा कोई नी आ, जिने जे मेरे होर मेरे सुसमाचारा रे कठे घरबार या भाई-बैहणीया या माऊ-बाबा या बाल बच्चेया या जमीना जो छाडेया हो।³⁰ होर एस युगा मन्झ घरबार होर भाई बैहणीया होर माऊआ होर बाळ बच्चेया होर जमीना जो, सौ गुणा ले ज्यादा वाप्स नी पाया हो; पर दुःख होर यातना साउगी होर आऊणे वाळे युगा मन्झ अनन्त जीन्दगी।³¹ पर बौहत जेहड़े पैहले हुन्चे, स्यों पिछले हुणे होर जो पिछले ऐ, स्यों पैहले हुणे।³² होर स्यों यरूसलेमा जो जांदे हुए, जेबे स्यों रस्ते मन्झ थे, होर यीसू तिन्हा रे अगे अगे जाया करहा था; होर स्यों हरान हुंदे लगे होर जो तेसरे पीछे चल्या करहा ऐ थे, स्यों डरदे लगे, तेबे से दबारा तिन्हा बारा चले जो लई किन्हें तिन्हा किन्हें स्यों गल्ला करदा लग्या, जो तेस पर आऊणे वाळी थी।³³ कि देखा, आस्से यरूसलेमा जो जाहें, होर माहणु रा पुत्र माहयाजका होर साखीया रे हाथा पकड़वाया जाणा, होर तिन्हा तेस जो मौता री सजा देणी होर अन्य जातिया रे हाथा मन्झ सौंपी देणा।³⁴ होर तिन्हा तेसरा मजाक ऊडाणा, होर तेस पर थूकणा, होर तेस जो कोड़े मारणे, होर त्राय ध्याडे ले बाद तेस जीउंदे हुई जाणा।³⁵ तेबे जब्दी रे म्हेठे याकूब होर यहुन्ना तेस वाले आई किन्हें बोल्दे लगे, हे गुरु, आस्से ये चाहें, कि जो आस्से तेरे ले मांगे, से ई तू आस्सा रे कठे कर।³⁶ होर तिने तिन्हा किन्हें बोल्या, तुसे क्या चाहें कि हांऊ तुस्सा रे कठे करूं? ³⁷ तिन्हे तेस किन्हें बोल्या, आस्सा ले हुई सकहा; यीसूए तिन्हा किन्हें बोल्या, आस्सा जो ऐ हक दे कि तेरी म्हीमा मन्झ आस्से तेरे साउगी बैठे, एक दाई वखा जो होर दूजे जो बाई वखा जो।³⁸ यीसूए तिन्हा किन्हें बोल्या, तुस्से नी जाणदे, कि क्या मान्धा ऐ? जो कटोरा हांऊ पीणे वाळा आ; क्या तुस्से पी सकहा ऐ? होर जो बमिस्मा हांऊ लैणे वाळा आ; क्या तुसे लई सकहा ऐ? ³⁹ तिन्हे तेस किन्हें बोल्या; आस्सा ले हुई सकहा; यीसूए तिन्हा किन्हें बोल्या; जो कटोरा हांऊ पीणे वाळा आ, तुस्सा भी पीणा; होर जो बपतिस्मा हांऊ लैणे वाळा आ, से तुस्सा भी लैणा।⁴⁰ पर जिन्हा रे कठे जे ये तयार कितीरा, सिर्फ तिन्हा जो छाडी किन्हें कसी जो आपणे दायें होर बाएं बठयाळणा मेरा काम नी आ।⁴¹ ये सुणी किन्हें दस चले याकूब होर यहुन्ना पर चिढदे लगे।⁴² होर यीसूए तिन्हा जो सादेया, होर तिन्हा किन्हें बोल्या, तुस्से जाणहां ऐं, कि जो अन्य जाति रे हाकम समझे जाहें, स्यों तिन्हा पर राज करहा ऐ; होर जो बडे ऐ, स्यों तिन्हा पर हक जताहें।⁴³ पर तुस्सा मन्झ ऐहड़ा नी आ, पर जो कोई तुस्सा मन्झ बडा हुणा चाहें से तुस्सा रा दास बणे।⁴⁴ होर तुस्सा मन्झ जो कोई प्रधान बणना चाहें, से सभी रा दास बणे।⁴⁵ क्यूंकि माहणु रा पुत्र इधी कठे नी आईरा, कि तेसरी सेउआ टैहल किती जाए, पर

इधी कठे आईरा, कि आपु खुद सेउआ करे, होर बौहता रे कठे आपणे प्राण दे।⁴⁶ होर स्यों यरीहो मंझ आये, होर जेबे से होर तेसरे चले, होर एक बडी भीड़ यरीहो छाडी किन्हें जाया करहा ई थी, ता तिमाई रा म्हठा बरतिमाई नांऊआं रा एक काणा भिखारी, सड़का रे बाहडे बैठिरा था।⁴⁷ जेबे तिने ये सुणेया कि यीसू नासरी तेथी ले हुई किन्हें जाया करहा; से हाका पाई पाई किन्हें बोल्दा लग्या, हे दाऊदा री संतान, यीसू मुंजो पर दया कर।⁴⁸ बौहती लोके से झिड़केया कि से चुपचाप रहे, पर से होर ज्यादा चिलान्दा लग्या, कि हे दाऊदा री संतान, मुंजो पर दया कर।⁴⁹ तेबे यीसू रुक्या होर बोल्या, एस जो मेरे वाले ल्याउआ; होर लोके तेस काणे जो सादी किन्हें तेस किन्हें बोल्या, हिम्मत कर, उठ खड़ा हुई जा; से तुजो सादेया करहा।⁵⁰ से आपणा कपड़ा तेथी सट्टी किन्हें, एकदम ऊठेया होर यीसू वाले आई गया।⁵¹ होर यीसूए तेस किन्हें बोल्या; तू क्या चाहें कि हांऊ तेरे कठे करूं? होर काणे तेस किन्हें बोल्या, हे रब्बी, हांऊ बस इतना चाहें कि हांऊ देखदा लगी जाऊं।⁵² यीसूए तेस किन्हें बोल्या; चली जा, तेरे विश्वासे तू ठीक करी दितेया; होर से झटपट देखदा लग्या, होर रस्ते मन्झ तेसरे पीछे पीछे चली पया।

11 ¹ जेबे स्यों यरूसलेमा रे नेडे जैतुना रे पाहड़ा पर बैतफगे होर बैतनियाह पौहंचे, ता तिने आपणे चले मंझा ले दो ऐ बोली किन्हें भेजे।² कि आपणे साम्हणे रे ग्राऊआं मन्झ जाऊआ, होर तेथी पुज्दे ई तुस्सा जो एक गधी रा बच्चा जेस पर जे कोई कधी नी चढीरा हो, बान्हीरा मिलणा, तेस जो खोल्ही किन्हें लई आऊआ।³ अगर तुस्सा ले कोई पुछे कि तुस्से ये क्या करेया करहा ऐ? तेबे तुस्से ऐहड़ा बोल्या, कि प्रभु जो ऐसरी जरूरत ई; होर फेरी तेस से जल्दी ई भेजी देणा।⁴ तिन्हे जाई किन्हें दरवाजे वाले खुल्ही गळही मन्झ गधी रे बच्चे जो बान्हीरा देख्या, होर स्यों तेस जो खोल्हदे लगे ⁵ होर तिन्हा मंझा ले कुछ लोके जो तेथी खहड़ी रे थे, तिन्हा ले पुछेया कि तुस्से क्या करेया करहा ऐ? गधी री बच्चे जो किधियो खोल्हया करहा ऐ? ⁶ होर तिन्हे, तिन्हा किन्हें तेहड़ा ई बोल्या, जेहड़ा यीसूए तिन्हा किन्हें बोलीरा था, होर तेबे तिन्हे स्यों जाणे दिते।⁷ होर तिन्हे गधी रे बच्चे जो यीसू वाले ल्याई किन्हें तेस पर कपडे ब्छ्याये होर से तेस पर बैठी गया।⁸ होर बौहत लोके रस्ते मन्झ आपणे कपडे ब्छ्याये होर होरिये डोहरिया मंझा ले डाळीया काटी काटी किन्हें रस्ते मन्झ ब्छ्यायी दीती।⁹ होर जो तेसरे अगे अगे जाहें थे होर पीछे पीछे चल्हा ऐ थे, चिल्लाई चिल्लाई किन्हें बोल्ला ऐ थे, होसन्ना; धन्य आ से, जो प्रभु रे नांऊआं ले आंऊआं।¹⁰ धन्य आ आस्सा रे पिता दाऊदा रा राज जो आया करहा; सर्गा मन्झ होसन्ना।¹¹ होर से यरूसलेमा पूजी किन्हें मंदरा मन्झ आया, होर तिने चारो तरफा री सभ चीजा

देखी क्यूंकि साहन्ज हुई गईरी थी; से बारा चेले जो साउगी लई किन्हें बैतनियाह गया।¹² दूजे ध्याड़े जेबे स्यों बैतनियाहा ले निकळे ता तेस जो भूख लगी।¹³ होर से दूरा ले अन्जीरा रा एक हरा भरा डाळ देखी किन्हें तेता रे नेडे गया, ताकि कुछ मिली सके, पर पात्रा जो छाडी किन्हें कुछ नी मिल्या; क्यूंकि फला रा टैम नी था।¹⁴ तिने तेस किन्हें बोल्या, एभे ले कोई तेरा फल कधी नी खाये। होर तेसरे चेले सुणेया करहा ऐ थे।¹⁵ फेरी स्यों यरूसलेमा मन्झ आये, होर से मंदरा मन्झ गया; होर तेथी जो लेण देण करेया करहा ऐ थे, तिन्हा जो बाहर काहूढदा लग्या, होर ढब्बे रा लेण देण करणे वाले री पीढिया पलटी दीती होर कबूतर बेचने वाळे री चौकिया ऊलट पुळट करी दीती।¹⁶ होर तिने मंदरा मंझा ले केसी जो कुछ भी ले जाणे नी दितेया।¹⁷ होर तिन्हा जो सिखा देई किन्हें बोल्या, क्या ये नी लिखीरा, कि मेरा घर सब जातिया रे कठे प्रार्थना रा घर कैहलाया जाणा? पर तुस्से ता ये डाकुआ रा डूआर बणाई दितीरा।¹⁸ ये सुणी किन्हें माहयाजक होर साख्त्री तेसजो मारणे रा मौका टोळदे लगे; क्यूंकि स्यों तेस ले डरहा ऐ थे, इधी कठे कि सभ लोक तेसरी सिखा ले हरान हुहां ऐं थे।¹⁹ होर हर रोज, साहन्ज हुंदे ई से नगरा ले बाहर निकळी जाहां था।²⁰ होर भ्यागा ई जेबे स्यों तेथी ले चली पये ता तिन्हे तेस अन्जीरा रे डाळा जो जडा तक सुकीरे देख्या।²¹ पतरसा जो से गल याद आई, होर तिने तेस किन्हें बोल्या, हे रब्बी, देख, ये अन्जीरा रा डाळ जेस जो तें श्राप दितीरा था से सुकी गया।²² यीसूऐ तेस जो जबाब दितेया, कि परमेसरा पर विस्वास रखा।²³ हाऊ तुस्सा किन्हें सच सच बोल्हा कि जो कोई ऐस पाहडा जो बोले; तू ऊखडी जा, होर द्रयाऊआ मन्झ पई जा, होर आपणे मना मन्झ सक नी करे, पर विस्वास करे, कि जो बोल्हा ऐ, से हुई जाणा, ता से तेसरे कठे से हुई जाणा।²⁴ इधी कठे हाऊ तुस्सा किन्हें बोल्हा, कि जो कुछ तुस्से प्रार्थना मन्झ मान्धगे ता विस्वास करी लऊआ कि तुस्सा जो मिली गया, होर ये तुस्सा रे कठे हुई जाणा।²⁵ होर जेबे केबे तुस्से खडही किन्हें प्रार्थना करहा ऐ, होर अगर तुस्सा जो केसी किन्हें कोई सिकायत हो, ता तेस जो माफ करा; क्यूंकि तुस्सा रे स्वर्गीया पिता तुस्सा रे पाप माफ करी देणे।²⁶ होर अगर तुस्से तिन्हा जो माफ नी करघे ता तुस्सा रे पिता जो स्वर्गा मन्झ आ, तुस्सा रे पाप भी माफ नी करणे।²⁷ स्यों फेरी यरूसलेमा मंझ आये, होर जेबे से मंदरा मन्झ टैहळया करहा था, ता माहयाजक होर साख्त्री होर पुरनिये तेस वाले आई किन्हें पुछदे लगे।²⁸ कि तू ये काम केस हका किन्हें करहा? होर ये हक तुजो कुने दितेया कि तू ये काम करे?²⁹ यीसूऐ तेस किन्हें बोल्या; हाऊ भी तुस्सा ले एक गल पुछहा; मुंजो जबाब देआ, तेबे मां तुस्सा जो दस्णा कि ये काम हाऊ केस हका ले करहा।³⁰ यहुन्ना रा बसिस्मा स्वर्गा वखा ले था या माहणु वखा ले?

मुंजो जबाब देआ।³¹ तेबे स्यों आपु मन्झ बैहस करदे लगे कि अगर आस्से बोलिए, स्वर्गा वखा ले, ता तेस बोलणा, फेरी तुस्से तेसरा विस्वास कि नी कितेया? ³² होर अगर आस्से बोलिए, माहणु वखा ले, ता लोका रा डर आ, क्यूंकि सब जाणहां ऐं कि यहुन्ना सच्चे नबी आ।³³ होर तिन्हे यीसू जो जबाब दितेया, कि आसे नी जाणदे; यीसूऐ तिन्हा किन्हें बोल्या, ता हाऊ भी तुस्सा जो नी दस्दा, कि हाऊ ये काम केस हका किन्हें करहा।

12¹ फेरी से दृष्टान्ता मन्झ तिन्हा किन्हें गल्ला करदा लग्या; कि केसी माहणु ऐ अंगूरा रा बगीचा लाया, होर तेता रे चारो तरफ बाड़ लगाया; होर रसा रा कुंड खणेया, होर गुम्मट बणाया; होर किसाना जो तेता रा ठेका देई किन्हें परदेसा जो चली गया।² फेरी अंगूर पकणे रा टैम आया ता तिने किसाना वाले आपणा एक दास भेज्या कि से जाई किन्हें किसाना ले अंगूरा रे बगीचे रा हिस्सा लई के आये।³ पर तिन्हे तेस जो पकडी किन्हें मारेया पिटेया होर खाली हाथ भेजी दितेया।⁴ फेरी तिने एक होर दासा जो तिन्हा वाले भेज्या, होर तिन्हे तेसरा मूंड पुआडी दितेया होर तेसरी बेज्जती किती।⁵ फेरी तिने एक होर दास भेज्या, होर तिन्हे से मारी दितेया; तेबे तिने होर भी बौहत दास भेजे; तिन्हा मंझा ले तिन्हे कितने पिते, होर कितने मारी दिते।⁶ एबे तेस वाले एक ई रही गईरा था, जो तेसरा प्यारा बेटा था; सभी ले बाद मन्झ तिने से भी तिन्हा वाले ये सोची किन्हें भजी दितेया; कि तिन्हा मेरे बेटे रा आदर करणा।⁷ पर तिन्हे किसाने आपु मन्झ बोल्या; ये ई ता वारस आ, आऊआ एस जो मारी देहां ऐं, तेबे उत्तराधिकार आस्सा रा हुई जाणा।⁸ होर तिन्हे से पकडी किन्हें मारी दितेया, होर अंगूरा रे बगीचे ले बहार सट्टी दितेया।⁹ एता कठे एभे अंगूरा रे बगीचे रे मालका क्या करणा? तेस आई किन्हें तिन्हा किसाना रा नास करी देणा, होर अंगूरा रा बगीचा होरी केसी जो देई देणा।¹⁰ क्या तुस्से पवित्र साख्त्रा मन्झ ये वचन नी पढेया, कि जेस पात्थरा जो मिस्त्रिये बेकार जाणेया, से ई कोणे रा पात्थर बणी गया।¹¹ ये प्रभु री तरफा ले हुआ, होर ये आस्सा री नजरा मन्झ नौख्हा।¹² तेबे तिन्हे तेस जो पकडना चाहेया; क्यूंकि स्यों समझी गईरे थे, कि ये दृष्टान्त तिने तिन्हारे खलाफ बोल्या; पर स्यों लोका ले डरहा ऐ थे, होर स्यों तेस जो छाडी किन्हें चली गये।¹³ तेबे तिन्हे तेस जो गल्ला मन्झ फसाणे रे कठे कई फरिसिया होर हेरोदिया जो तेस वाले भेज्या।¹⁴ होर तिन्हे आई किन्हें तेस किन्हें बोल्या; हे गुरु, आस्से जाणहां ऐं, कि तू सच्चा आ, होर केसी री परवाह नी करदा, क्यूंकि तू माहणु रा मुहं देखी किन्हें गल्ला नी करदा, पर परमेसरा रा रस्ता सच्चाई किन्हें दस्हा।¹⁵ क्या कैसरा जो कर देणा ठीक आ, कि नी? आस्से देईऐ कि नी? तिने तिन्हारी मकारी जाणी किन्हें तिन्हा किन्हें बोल्या; मुंजो किधियो परखदे लगीरे? एक दीनारा जो मेरे

वाले लई आऊआ, कि हांऊ देखूं।¹⁶ होर स्यों लई आये, होर तिने तिन्हा किन्हें बोल्या; ये मूरत होर नांऊ केसरा आ? तिन्हे बोल्या, कैसरा रा।¹⁷ यीसूए तिन्हा किन्हें बोल्या; जो कैसरा रा आ, से कैसरा जो, होर जो परमेसरा रा आ, से परमेसरा जो देआ, तेबे स्यों तेस पर हरान हुंदे लगे।¹⁸ फेरी सदूकी भी, जो बोल्ला ऐ थे, कि पुनरुत्थान हाया नी आ, होर स्यों तेस वाले आई किन्हें पुछ्दे लगे।¹⁹ कि हे गुरू, मुसे आस्सा रे कठे लिखीरा, कि अगर केसी रा भाई बगैर संताने मरी जाए, होर तेसरी लाडी पीछे रही जाये, ता तेसरा भाई तेसरी लाडी किन्हें ब्याह करी ले होर आपणे भाई रे कठे संतान पैदा करे।²⁰ सात भाई थे, पैहला भाई ब्याह करी किन्हें बगैर संताने मरी गया।²¹ तेबे दूजे भाईए से जनाने ब्याही लई होर से भी बगैर संताने मरी गया; होर तिहां ई त्रीजे भी।²² होर साता रे सात भाईया री कोई संतान नी हुई; बादा मन्झ से जनाने भी मरी गयी।²³ जी ऊठणे ले बाद तिन्हा मन्झा ले से केसरी लाडी हुणी? क्यूंकि से साता रे सात भाईया री लाडी हुई चुकिरी थी।²⁴ यीसूए तिन्हा किन्हें बोल्या; तुस्से ना ता सास्त्रा जो जाणहां ऐं, होर ना ही परमेसरा री सक्ति जो; क्या तुस्से बडी भुला मन्झ नी पईरे?²⁵ क्यूंकि जेबे तिन्हा मरीरे मंझा ले जी ऊठणा, ता तिन्हा मन्झ ब्याह, सादी नी हुणी; पर स्वर्गा मन्झ तिन्हा दूता साहीं हुणा।²⁶ मरीरे मंझा ले जी ऊठणे रे बारे मन्झ क्या तुस्से मूसा री कताबा मन्झ झाडी री काहणी मन्झ नी पढेया, कि परमेसरे तेस किन्हें बोल्या, हांऊ अब्राहमा रा परमेसर, होर इसहाका रा परमेसर, होर याकूबा रा परमेसर आ।²⁷ से मुरदे रा परमेसर नी आ, पर जीउंदे रा आ, तुस्से बडी भुला मन्झ पईरे।²⁸ होर सास्त्रिया मंझा ले एकीये आई किन्हें तिन्हा जो बैहस करदे सुणेया, होर ये जाणी किन्हें कि तिने तिन्हा जो बौहत अच्छे तरीके किन्हें जबाब दितेया; तेस ले पुछेया; सभी हुकमा ले मुख्या हुकम कुण जे आ?²⁹ यीसूए तेस जो जबाब दितेया, सभ हुकमा मन्झा ले खास हुकम ये आ; कि हे इस्राएल सुण; सिर्फ आस्सा रा परमेसर ई एकमात्र परमेसर आ।³⁰ होर तू आपणे प्रभु परमेसरा किन्हें आपणे सारे मना ले होर आपणे प्राणा ले, होर आपणी सारी बुद्धि ले होर आपणी सारी सक्ति ले प्यार रख्या।³¹ होर दूजा हुकम ये आ, कि तू आपणे पड़ोसी किन्हें आपणे साहीं प्यार रख्या; एता ले बडा होर कोई हुकम नी आ।³² सास्त्रिये तेस किन्हें बोल्या, हे गुरू, बौहत बढिया, तैं ठीक बोल्या, कि से एक ई आ, होर तेस जो छाडी किन्हें होर कोई नी आ।³³ होर तेस किन्हें सारे मन होर सारी बुद्धि होर सारे प्राण होर सारी सक्ति किन्हें प्यार रखणा, सारे होम होर बलिदाना ले बढी किन्हें आ।³⁴ जेबे यीसूए देख्या कि तिने समझी किन्हें जबाब दितेया, ता तेस किन्हें बोल्या; तू परमेसरा रे राजा ले दूर नी आ; होर फेरी केसी जो तेस ले कुछ होर पूछणे री हिम्मत नी हुई।³⁵ फेरी

यीसूए मंदरा मन्झ उपदेस देंदे हुए बोल्या, कि सास्त्री किधियो बोल्ला ऐ, कि मसीह दाऊदा रा म्हठा आ?³⁶ दाऊदे आपु ऐ पवित्र आत्मा मन्झ हुई किन्हें बोल्या, कि प्रभुए मेरे प्रभु किन्हें बोल्या; मेरी दाई तरफ बैठ, जेबे तक कि हांऊ तेरे बैरी दुश्मणा जो तेरे पैरा हेठ नी करी देंऊ।³⁷ दाऊद ता आपु ई तेस जो प्रभु बोल्ला आ, फेरी से तेसरा म्हठा केथी ले हुआ? होर भीडा रे लोके तेसरी गल्ला खुसी किन्हें सुणी।³⁸ तिने आपणे उपदेसा मन्झ तिन्हा किन्हें बोल्या, सास्त्रिया ले सावधान रहूआ, जो आपणे लम्बे चोगे पैहनी किन्हें ओरे परे घुमणा पसंद करहा ऐ।³⁹ होर बजारा मन्झ नमस्कार, होर आराधनालया मन्झ खास जगहा पर बैठणा होर दावता मन्झ खास जगहा पाणे री चाह रख्हा ऐं।⁴⁰ स्यों बिधवा रे घरा जो खाई जाहें, होर दिखावे रे कठे बडी देरा तक प्रार्थना करदे रैंहें, इन्हा लोका जो कडी सजा मिलणी।⁴¹ होर से मंदरा रे दान पात्रा रे साम्हणे बैठी किन्हें देख्या करहा था, कि लोक किहां दान पात्रा मन्झ दान पाहें, होर बौहत अमीर लोके बौहत सारा धन पाया।⁴² इतने मन्झ एक गरीब विधवे आई किन्हें दो दमड़ीया पाई, जो एक पैसे रे बराबर नी थी।⁴³ तेबे तिने आपणे चले जो नेडे सादी किन्हें तिन्हा किन्हें बोल्या; हांऊ तुस्सा किन्हें सच सच बोल्ला, कि मंदरा रे दान पात्रा मन्झ सभी ले ज्यादा दान देणे वाळी ये विधवा ई।⁴⁴ क्यूंकि सभीए आपणे धना री बढती री वजहा ले दान दितेया, एसे विधवे आपणी कमी घटी मंझा ले जो कुछ तेसा वाले था, तेसे आपणी सारी क्माई पाई दीती।

13¹ जेबे से मंदरा ले निकळया करहा था, ता तेसरे चले मंझा ले एकिये तेस किन्हें बोल्या, हे गुरू, देखा, केहडे केहडे पात्थर होर केहडे केहडे भवन ऐ!² यीसूए तेस किन्हें बोल्या; क्या तुस्से ये बडे बडे भवन देख्या करहा ऐ, एथी पात्थरा पर पात्थर भी नी बचणा, क्यूंकि एक एक पात्थर ढाळी दितेया जाणा।³ जेबे से जैतुना रे पाहडा पर मंदरा रे साम्हणे बैठीरा था, ता पतरसे होर याकूबे होर यहुन्ने होर अन्द्रियासे लग जे जाई किन्हें तेस ले पुछेया।⁴ कि आस्सा जो दस कि ये गल्ला कधी हुणी? होर जेबे ये गल्ला पुरी हुणी तेस टैमा रा क्या इशारा हुणा।⁵ यीसू तिन्हा किन्हें बोल्दा लग्या; सावधान रहूआ कि कोई तुस्सा जो ना भरमाये।⁶ मेरे नांऊआं ले कई आऊणे होर दावा करणा कि हांऊ से ई आ, होर तिन्हा बौहत भरमाणे।⁷ होर जेबे तुस्से लड़ाईया री गल्ला सुणो; ता नी घबराणा; क्यूंकि इन्हारा हुणा जरूरी आ; पर तेस टैम अंत नी हुणा।⁸ क्यूंकि जाति दूजी जाति रे खलाफ, होर एक राज्या दूजे राज्या रे खलाफ खड़े हुणा, होर कई जगहा पर हिलण हुणे, होर अकाल पौऊणे, ये ता सिर्फ पीडा री सुरुआत ई।⁹ पर तुस्से आपणे बारे मन्झ सावधान रहूआ, क्यूंकि लोका तुस्से माह सभा मन्झ सौपणे, होर तुस्सा जो पंचायता मन्झ मारेया

जाणा; होर मेरी वजहा ले हाकमा होर राजे रे अगे खड़े हुणा पौऊणा, ताकि तिन्हारे रे कठे गुआही हो।¹⁰ पर जरूरी आ कि पैहले सुसमाचार सब जातिया मन्झ प्रचार कितेया जाए।¹¹ जेबे तिन्हा तुस्सा जो लई जाई किन्हें न्याय रे कठे सौंपणा, ता पैहले ले चिन्ता नी करणा, कि आस्सा क्या बोलणा; पर जो कुछ बोलणा हूंगा तेस टैम जो कुछ दस्या जाणा से ई बोलणा, क्यूंकि बोलणे वाळे तुस्से नी ऐ, पर पवित्र आत्मा आ।¹² होर भाईया भाई जो, होर बाबा म्हठे जो पकड़वाई किन्हें मरवाई देणे होर बाल बच्चेया माऊ बाबा रे खलाफ हुई किन्हें स्यों मरवाई देणे।¹³ होर मेरे नांऊआं री वजहा सभी लोका तुस्सा किन्हें बैर करणा; पर जो आखरी तक सबर करघा तेसरा ई ऊद्धार हुणा।¹⁴ इधी कठे जेबे तुस्से भयानक होर विनाशकारी चीजा जो देखो, (पढने वाळे समझी ले) तेबे जो यहूदिया मन्झ हो, स्यों पाहड़ा पर भगी जाए।¹⁵ जो लोक घरा री छता पर हो, स्यों आपणे घरा ले कुछ लेणे रे कठे हेठ ना आये होर ना अन्दर जाए।¹⁶ होर जो डोहरिया मन्झ हो, से आपणा कपड़ा लेणे रे कठे वाप्स ना आये।¹⁷ तिन्हा ध्याड़े जो गर्भवती होर दूध पियांदी हुंधी, तिन्हारे कठे हाय हाय।¹⁸ होर प्रार्थना करेया करा, कि ये सब ठंडा रे ध्याड़े नी हो।¹⁹ क्यूंकि स्यों ध्याड़े ऐहड़े दुःखा रे हुणे, कि जिहां सृष्टि री सुरूआता ले, जेभे ले परमेसरे एसा सृष्टि जो रच्या, आज तक ना कधी हुए होर ना फेरी दबारा कधी हुणे।²⁰ होर अगर प्रभु तिन्हा ध्याड़े जो नई घटान्दा, ता कोई भी प्राणी नी बचदा; पर तिन्हा चुणीरे लोका री वजहा ले, जिन्हा जो तिने चुणी लईरा, तिन्हा ध्याड़े जो घटाया।²¹ तेस टैम अगर कोई तुसा किन्हें बोले; देखा, मसीह एथी आ, या देखा, तेथी आ, ता बिस्वास नी करणा।²² क्यूंकि झूठे मसीह होर झूठे नबी ऊठ खड़े हुणे, होर चिन्ह होर नौखे काम दसे जाणे कि अगर हुई सके ता चुणारे जो भी भरमाई दे।²³ पर तुस्से सावधान रह्या; देखा, मैं तुस्सा जो सभ गल्ला पैहले ई दसी दीतिरी।²⁴ तिन्हा ध्याड़े, तेस दुःखा ले बाद सुरज काळा हुई जाणा, होर चांदनिया उजाला नी देणा।²⁵ होर सर्गा ले तारे पौऊदे लगणे; होर सर्गा री सक्तिया हिल्लाई जाणी।²⁶ तेबे लोका माहणु रे पुत्रा जो बडी सामर्था होर म्हीमा साउगी बादला मन्झ आऊन्दे देखणा²⁷ तेस टैम तेस आपणे दूता जो भेजी किन्हें, धरती रे एस कनारे ले सर्गा रे तेस कनारे तक चारो दिसा ले आपणे चुणीरे लोक कठे करणे।²⁸ अन्जीरा रे डाळा ले ये दृष्टान्त सीखा; जेबे तेसरी डाळी कोमल हुई जाहीं; होर पातर निकळदे लगहा ऐ; ता तुसे जाणी लैहें, कि गर्मी रा मौसम नेडे आ।²⁹ इहां ई जेबे तुस्से इन्हा गल्ला जो हुंदे देखो, ता जाणी लया, कि से नेडे आ, पर दरवाजे वाले आ।³⁰ हांऊ तुस्सा किन्हें सच सच बोल्हा, कि जेबे तक ये गल्ला नी हुई लैहन्गी, तेबे तक एसा पीढीया रा अंत नी हुणा।³¹ सर्ग होर धरती टळी जाणे, पर मेरी गल्ला कधी नी

टळणी।³² तेस ध्याड़े या तेस घड़ी रे बारे मन्झ कोई नी जाणदा, ना स्वर्गा रे दूत होर ना पुत्र; पर सिर्फ पिता।³³ देखा, जागदे होर प्रार्थना करदे रह्या; क्यूंकि तुस्से नी जाणदे कि से टैम केभे आऊणा।³⁴ ये तेस माहणु रे हालात ऐ, जो परदेसा जांदे टैमा आपणे घरा जो छाडी जाये, होर आपणे दासा जो हक देई दे; होर हर एकी जो तेसरा काम समझाई दे, होर चौकीदारा जो जागदे रहणे रा हुकम दे।³⁵ इधी कठे जागदे रह्या; क्यूंकि तुस्से नी जाणदे कि घरा रा मालक केभे आई जाणा, साँझा या आधी राती, या कुकड़ा री झांग देणे रे टैमा या भ्यागा।³⁶ ऐहड़ा नी हो कि से एकदम आई किन्हें तुस्सा जो सोंदे पाये।³⁷ होर जो हांऊ तुस्सा किन्हें बोल्हा, तेहड़ा ई सभी किन्हें बोल्हा, जागदे रहूआ।

14¹ दो ध्याड़े ले बाद फसह होर अखमीरी रोटी रा साजा हुणे वाळा था। होर माहयाजक होर साख्री एस गल्ला री तलासा मन्झ थे कि तेस जो धोखे किन्हें पकड़े होर मारी दे।² पर स्यों बोल्हा ऐ थे, कि साजे रे ध्याड़े नी ई, केथी ऐहड़ा नी हो कि हाल्ला पई जाये।³ जेबे से बैतनियाहा मन्झ समौन कोहड़ी रे घरा खाणा खांदे बैठिरा था, तेबे एक जनाने संगमरमरा रे भांडे मन्झ जट्टामासी रा मैहन्गा इतर लई किन्हें आई; होर भांडा तोड़ी किन्हें इत्र तेसरे मुंडा पर दलेया।⁴ पर कोई कोई चिहड़ी किन्हें आपणे मना मन्झ बोल्दे लगे, एस इत्रा री इतनी बरबादी किधियो किती? ⁵ क्यूंकि एस इत्रा जो तीन सौ दिनारा ले भी जादा कीमता मन्झ बेची किन्हें गरीबा जो बांडी सकहा ऐ थे, होर स्यों तेस्सा जो झिडकदे लगे।⁶ यीसूऐ बोल्या; एस्सा जो छाडी देऊआ; एस्सा जो किधियो परेसान करेया करहा ऐ? एस्से ता मेरे किन्हें भलाई ई किती।⁷ गरीब ता तुस्सा साउगी हमेसा रहणे, होर तुस्से जेबे चाहो तेबे तिन्हा किन्हें भलाई करी सकहा ऐ; पर मां तुस्सा साउगी हमेसा नी रहणा।⁸ जो कुछ से करी सकी, तेस्से कितेया; तेस्से मेरे दफनाणे री त्यारी मन्झ पैहले ले ई मेरे सरीरा पर इतर मळी दितेया।⁹ हांऊ तुस्सा किन्हें सच सच बोल्हा, कि सारे संसारा मन्झ जेथी केथी सुसमाचार प्रचार कितेया जाणा, तेथी तेस्सा रे एस कामा री गल्ला तेस्सा री यादा मन्झ किती जाणी।¹⁰ तेबे यहूदा इसकरियोति ये जो बारा मंझा ले एक था, माहयाजका वाले गया, ताकि से तेस जो तिन्हारे हाथ पकड़वाई दे।¹¹ होर स्यों सुणी किन्हें खुस हुए, होर तेस जो ढब्बे देणे रे कठे मनी गये, होर से ये मौका टोळदा लग्या कि किहां तेस जो पकड़वाऊं? ¹² अखमीरी रोटी रे साजे रे पैहले ध्याड़े, जेता मन्झ जे फसहा रा बलिदान करहा ऐ थे, तेसरे चेले तेसले पुछेया, तू केथी चाहां कि आस्से जाई किन्हें तेरे कठे फसहा रे साजे री त्यारी करे? ¹³ तिने आपणे चेले मंझा ले दुहीं जो ये बोली किन्हें भेज्या, कि नगरा मन्झ जाऊआ, होर एक माहणु पाणी रा घड़ा ल्याउंदे

हुए तुस्सा जो मिलणा, तेसरे पीछे चली जाया।¹⁴ होर से जेस घरा मन्झ जाए तेस घरा रे मालका किन्हें बोल्या; गुरू बोल्हा, कि प्रौहणे रा कमरा जेथी जे मां आपणे चलेया साउगी साजा मनाणा, से केथी आ? ¹⁵ तेस तुस्सा जो एक सजा सजाईरा, होर त्यार कितिरा बडा कमरा दसी देणा, तेथी आस्सा रे कठे त्यारी करा। ¹⁶ होर चेले निकळी किन्हें नगरा मन्झ आई गये होर जेहडा तिने तिन्हा किन्हें बोलीरा था, तेहडा ई पाया, होर तिन्हे फसहा रे साजे री त्यारी किती। ¹⁷ जेबे साहंज हुई, ता से आपणे बारा चलेया साउगी आया। ¹⁸ होर जेबे स्यों खाणा खाया करहा ऐ थे, ता यीसूऐ बोल्या; हांऊ तुस्सा किन्हें सच सच बोल्हा, कि तुस्सा मंझा ले ऐकिया, जो मेरे साउगी खाणा खाया करहा, हांऊ पकड़वाणा। ¹⁹ तिन्हा पर ऊदासी छाई गी, होर स्यों एक एक करी किन्हें तेस किन्हें बोल्दे लगे; क्या से हांऊ आं? ²⁰ तिने तिन्हा किन्हें बोल्या, से बारा चेल्या मंझा ले एक आ, जो मेरे साउगी थाळु मन्झ हाथ पाहां। ²¹ क्यूंकि माहणु रे पुत्रा रा ता जाणा पक्का आ; जेहडा तेसरे बारे मन्झ लिखीरा आ, पर हाय तेस माहणु पर जेसरे ज्रीए जे माहणु रा पुत्र पकड़वाया जाहां। अगर तेस माहणु रा जन्म नी हुंदा ता तेसरे कठे खरा हुंदा। ²² होर जेबे स्यों खाया करहा ऐ थे ता तिने रोटी लई होर धन्याबाद करी किन्हें तोड़ी, होर तिन्हा जो दीती; होर बोल्या, लऊआ, ये मेरा सरीर आ। ²³ फेरी तिने डौंगा/कटोरा लई किन्हें धन्यबाद कितेया, होर तिन्हा जो दितेया; होर तिन्हे सभीऐ तेता मंझा ले पितेया। ²⁴ होर तिने तिन्हा किन्हें बोल्या, ये वाचा रा मेरा से खून आ, जो बौहतिया रे कठे बहाया जाहां। ²⁵ हांऊ तुस्सा किन्हें सच सच बोल्हा, कि दाखा रा रस मां तेस ध्याडे तक कधी नी पीणा, जेबे तक परमेसरा रे राजा मन्झ नंऊआं नी पीऊं। ²⁶ फेरी स्यों भजन गाई किन्हें जैतुना रे पाहडा पर चली गये। ²⁷ तेबे यीसूऐ तिन्हा किन्हें बोल्या; तुस्सा सभीया ठोकर खाणी, क्यूंकि लिखीरा आ, कि मां रखवाळा मारी देणा, होर भेडा बिखरी जाणी। ²⁸ पर मां आपणे जी ऊठणे ले बाद तुस्सा ले पैहले ई गलीला जो चली जाणा। ²⁹ पतरसे तेस किन्हें बोल्या; अगर सभ ठोकर खाहन्गे ता खाये, पर मां ठोकर नी खाणी। ³⁰ यीसूऐ तेस किन्हें बोल्या; हांऊ तुध किन्हें सच सच बोल्हा, कि आज राती ई, कुकडा रे दो बारी झांग देणे ले पैहले, तुध त्राय बारी मुखरी जाणा। ³¹ पर तिने होर जोर देई किन्हें बोल्या, अगर मुंजो तेरे साउगी मरणा भी पहंगा, तेबे बी मां तेरी नाह कधी नी करणी। ³² फेरी स्यों गतसमने नांऊआं री एक जगहा मन्झ आये, होर तिने आपणे चेल्या किन्हें बोल्या, एथी बैठी रहया, जेबे तक हांऊ प्रार्थना करूं। ³³ होर से पतरस होर याकुब होर यहूना जो आपु साउगी लई गया; होर से बौहत दुःखी होर परेसान हुंदा लग्या। ³⁴ होर तिन्हा किन्हें बोल्या; मेरा मन बौहत ऊदास आ, एथी तक कि हांऊ मरणे वाळा आ,

तुस्से एथी रूका, होर जागदे रहूआ। ³⁵ होर से थोहडा अगे जे चली गया, होर जमीना पर झूकी किन्हें प्रार्थना करदा लग्या, कि अगर हुई सके ता एस कटोरे जो मेरे वाले ले हट्टाई दे। ³⁶ होर बोल्या; हे अब्बा, हे पिता, तेरे ले सभ कुछ हुई सकहा; एस कटोरे जो मेरे वाले ले हट्टाई दे; तेबे भी जेहडा हांऊ चाहां तेहडा नी, पर जो तू चाहां तेहडा ई हो। ³⁷ फेरी से आया, होर तिने स्यों सुत्तिरे देखे, होर पतरसा किन्हें बोल्या, हे समौन तू सोया करहा? क्या तू एक घडी भी जागी नी सक्या? ³⁸ जागदे होर प्रार्थना करदे रहूआ कि तुस्से परीक्षा मन्झ नी फसो; आत्मा ता त्यार ई, पर सरीर कमजोर आ। ³⁹ होर से दबारा वाप्स चली गया, होर से ई गल बोली किन्हें प्रार्थना किती। ⁴⁰ होर दबारा वाप्स आई किन्हें तिने स्यों सुत्तिरे देखे, क्यूंकि तिन्हारी हाखिया निन्द्रा किन्हें भहरी री थी; होर स्यों नी जाणदे थे कि तेस जो क्या जबाब देईऐ। ⁴¹ से त्रीजी बारी दबारा वाप्स आया होर तिन्हा किन्हें बोल्या; एबे सौंदै रहया होर अराम करा, बस भतेरा हुआ, टैम आई गया; देखा माहणु रा पुत्र पापिया रे हाथा पकड़वाया जाहां। ⁴² ऊठा, चला देखा, मेरा पकड़वाणे वाळा नेडे आई गईरा। ⁴³ से ऐहडा बोल्या ई करहा था, कि यहूदा, जो बारा चले मंझा ले एक था, आपणे साउगी माहयाजक होर साखी होर पुरनिये री तरफा ले एक बडी भीड़ तलवारा होर डंडे लई किन्हें झटपट आई पौहंच्या। ⁴⁴ होर तेसरे पकड़वाणे वाळे तिन्हा जो ये इशारा दस्सीरा था, कि जेस जो हांऊ चुम्बन देंऊ, से ई हुणा, तेस जो पकड़ी किन्हें सावधानी किन्हें लई जाया। ⁴⁵ होर जेबे से आया, होर झटपट तेस वाले जाई किन्हें बोल्या; हे रब्बी, होर तेस जो चुम्बन दितेया। ⁴⁶ तेबे तिन्हे तेस जो पकड़ी किन्हें गिरफ्तार करी लया। ⁴⁷ तिन्हा मंझा ले जो तेसरे नेडे खहड़ी रे थे, एकिये तलवार काढी होर माहयाजका रे दासा पर चलाई, होर तेसरा कान टुकी दितेया। ⁴⁸ यीसूऐ तिन्हा किन्हें बोल्या; क्या तुस्से डाकू समझी किन्हें मुंजो पकड़णे रे कठे तलवारा होर डंडे लई किन्हें निकळी रे? ⁴⁹ हांऊ ता हर रोज मंदरा मन्झ तुस्सा साउगी रही किन्हें ऊपदेस देहां था, होर तेबे तुस्से हांऊ नी पकड़ेया; पर ये इधी कठे हुआ कि पवित्र साखी री गल्ला पुरी हुई जाए। ⁵⁰ होर स्यों सभ चले तेस जो छाडी किन्हें भगी गये। ⁵¹ होर एक जुआन आपणे नांगे सरीरा पर चादर ढखी किन्हें तेसरे पीछे पीछे चल्लीरा था; होर लोके तेस जो पकड़णा चाहेया। ⁵² पर से चादर छाडी किन्हें नांगा भगी गया। ⁵³ फेरी स्यों यीसू जो माहयाजका वाले लई गये; होर सभ माहयाजक होर पुरनिये होर साखी तेस वाले कठे हुई गये। ⁵⁴ पतरस दूरा दूरा ले ई तेसरे पीछे पीछे माहयाजका रे आहंगणा रे अन्दर तक गया, होर पैहरेदारा साउगी बैठी किन्हें आग तफदा लग्या। ⁵⁵ माहयाजक होर सारी माह सभा यीसू जो मारणे रे कठे तेसरे खलाफ गुआही री तलासा मन्झ थे, पर

नी पाई सके।⁵⁶ क्यूँकि बौहत सारे लोक तेसरे खलाफ झूठी गुआही देया करहा ऐ थे, पर तिन्हारी गुआही एक बराबर नी थी।⁵⁷ तेबे कितने लोके ऊठी किन्हें तेसरे बरखिलाफ ये झूठी गुआही दीती।⁵⁸ कि आस्से ऐस जो बोल्दे सुणी रा, कि मां ऐस हाथा रे बणाईरे मंदरा जो ढाई देणा, होर तीन ध्याडे मन्झ होर दूजा मंदर बणाई देणा जो हाथा ले नी बणीरा हो।⁵⁹ ऐता पर भी तिन्हारी गुआही एक बराबर नी थी।⁶⁰ तेबे माहयाजके बीचा मंझ खहड़ी किन्हें यीसू ले पुछेया; कि तू कोई जबाब नी देंदा? ये लोक तेरे बरखिलाफ गुआही देया करहा ऐ? ⁶¹ पर से चुप चाप रहया, होर कुछ जबाब नी दितेया; माहयाजके दबारा तेस ले पुछेया, क्या तू तेस पवित्र परमेसरा रा पुत्र मसीह आ? ⁶² यीसूऐ बोल्या; हां हांऊ आं; होर तुस्सा माहणु रे पुत्रा जो तेस परम शक्ति शाली परमेसरा री दाई तरफ बैठीरे, होर सर्गा रे बादला साउगी आउंदे देखणा।⁶³ तेबे माहयाजके आपणे कपडे छेकी किन्हें बोल्या; एबे आस्सा जो ग्वाहा रा क्या काम आ? ⁶⁴ तुस्से ये निन्दा सुणी; तुस्सा रा क्या विचार आ, तिन्हे सभीऐ बोल्या; ये मारणे लायक आ।⁶⁵ तेबे कुछ तेस पर थुकदे लगे, होर तेसरा मुहं ढकदे होर तेस जो मुक्के मारी किन्हें, तेस किन्हें बोल्दे लगे; भविष्यवाणी कर; पैहरेदारे तेस जो पकड़ी किन्हें चांडे मारे।⁶⁶ जेबे पतरस हेठ आंघणा मन्झ था, ता माहयाजका री नौकराणीया मंझा ले एक तेथी आई।⁶⁷ तेस्से पतरसा जो आग तफदे देख्या होर तेस जो टकटकी लगाई किन्हें देखी किन्हें बोल्दी लगी, तू भी तेस यीसू नासरी साउगी था।⁶⁸ से मुखरी गया, होर बोल्या, ना हांऊ तेस जो जाणहां होर ना मेरी समझा मन्झ आया करहा कि तू क्या बोल्या करहा ई? फेरी से बाहर डेहळी वाले गया, होर तेभे ई कुकडे झांग दिती।⁶⁹ से नौकराणी तेस जो देखी किन्हें स्यों जे नेडे खहड़ी रे थे, दबारा बोल्दी लगी, कि ये तिन्हा मंझा ले एक आ।⁷⁰ पर से दबारा मुखरी गया होर थोहड़ी देरा बाद, स्यों जे तेस वाले खहड़ी रे थे तिन्हे पतरसा किन्हें बोल्या; पक्का तू तिन्हा मंझा ले एक आ; क्यूँकि तू भी गलीला रा आ।⁷¹ तेबे से आपणे आपा जो कोस्दा होर कसम खांदा लग्या, कि हांऊ तेस माहणु जो, जेस री जे तुस्से गल्ला करहा ऐ, नी जाणदा।⁷² होर तिहां ई दूजी बारी कुकडे झांग दिती; पतरसा जो ये गल जो यीसूऐ तेस किन्हें बोलीरी थी याद आई, कि कुकडा रे दो बार झांग देणे ले पैहले तुध त्राय बारी मेरी नाह करणी; से तेसरी ये गल्ला सोची किन्हें रोंदा लग्या।

15 ¹ होर भ्याग हुंदे ई झटपट माहयाजके, पुरनिये होर साख्रिये होर माहसभे सलाह करी किन्हें यीसू जो बान्हया, होर तेस जो लई जाई किन्हें पिलातुसा रे हाथा मन्झ सौंपी दितेया।² होर पिलातुसे तेस ले पुछेया, क्या तू यहूदिया रा राजा आ? तिने तेस जो जबाब दितेया; कि तू आपु ई बोल्या करहा।³ होर माहयाजक तेस पर बौहत गल्ला रा दोष लगाया

करहा ऐ थे।⁴ पिलातुसे तेस ले दबारा पुछेया, क्या तू कुछ जबाब नी लगीरा देंदा, देख, यूं तेरे पर दोष लगाया करहा ऐ? ⁵ यीसूऐ दबारा कुछ नी बोल्या; एथी तक कि पिलातुसा जो बड़ी हरानी हुई।⁶ होर से तेस साजे मन्झ एक कैदी जो, जेस जो जे स्यों चाहें थे, से तेस जो तिन्हारे कठे छाडी देहां था।⁷ होर बरअब्बा नांऊरा एक माहणु तिन्हा बंदी साउगी कैदी था, जिने जे दंगे मन्झ हत्या कितिरी थी।⁸ होर भीड़ ऊपर जाई किन्हें तेस ले अरज करदी लगी, कि जिहां तू हमेसा ले आस्सा रे कठे करदा आईरा तेहड़ा ई कर।⁹ पिलातुसे तिन्हा जो जबाब दितेया, क्या तुस्से चाहें, कि हांऊ तुस्सा रे कठे यहूदिया रे राजे जो छाडी देंऊ? ¹⁰ क्यूँकि से जाणहां था, कि माहयाजके तेस जो डाह या हिर्खा री वजहा ले पकड़वाईरा था।¹¹ पर माहयाजके लोका जो भडकाया, कि से बरअब्बा जो ई तिन्हारे कठे छाडी दे।¹² ये सुणी किन्हें पिलातुसे तिन्हा ले दबारा पुछेया; तेबे जेस जो जे तुस्से यहूदिया रा राजा बोल्हा ऐं, तेसरा हांऊ क्या करूं? स्यों दबारा चिल्लाये, कि तेस जो कूसा पर चढ़ाई देआ।¹³ पिलातुसे तिन्हा किन्हें बोल्या; किधियो, इने क्या बुराई कितिरी? ¹⁴ पर स्यों होर ज्यादा चिल्लाए, कि तेस जो कूसा पर चढ़ाई देया।¹⁵ तेबे पिलातुसे भीड़ा जो खुस करणे रे कठे, बरअब्बा जो तिन्हारे कठे छाडी दितेया, होर यीसू जो कोडे लगाई किन्हें सौंपी दितेया, कि तेस जो कूसा पर चढ़ाई दितेया जाए।¹⁶ होर स्पाही तेस जो किले रे भीतर आहंगणा मन्झ लई गये, जेस जो प्रीटोरियन बोल्या जाहां, होर सारी पलटना जो सादी लया।¹⁷ होर तिन्हे तेस जो बैजणी कपडे पन्हयाये होर काण्डे रा ताज गुन्धी किन्हें तेसरे मुंडा पर रख्या।¹⁸ होर ये बोली किन्हें स्यों तेस जो नमस्ते करदे लगे, कि हे यहूदिया रे राजा, नमस्कार!¹⁹ होर स्यों तेसरे मुंडा पर सरकंडे मारदे, होर तेस पर थुकदे होर घुटने टेकी किन्हें तेस जो नमस्कार करदे रहे।²⁰ होर जेबे स्यों तेसरा मजाक ऊड़ाई बैठे ता तिन्हे तेस जो, जो बैजणी कपडे पन्ह्याईरे थे स्यों तुआरी किन्हें तेसरे ऐ ई कपडे तेस जो पन्ह्याई दिते, होर तेबे तेस जो कूसा पर चढ़ाणे रे कठे बाहर लई गये।²¹ होर सिकंदर होर रूफसा रा बाब, समौन नांऊआं रा एक कुरेनी आदमी, जो गाऊंआ ले आया करहा था, तेथी ले निकळेया; तिन्हे तेस जो बगारी मन्झ पकड़ेया, कि से यीसू रा कूस चकी किन्हें लई चले।²² होर स्यों तेस जो गुलगुता नांऊआं री जगहा पर लई गये जेस रा मतलब आ, खोपड़ी री जगहा।²³ होर स्यों तेस जो लोहवान मिलिरा दाखरस देंदे लगे, पर तिने नी लया।²⁴ तेबे तिन्हे से कूसा पर चढ़ाई दितेया, होर तेसरे कपडे पर चिठिया पाई, ताकि हर एकी जो बांड मिली सको।²⁵ होर ये लगभग त्रीजा पैहर था जेबे जे तिन्हे से कूसा पर चढ़ाया।²⁶ होर तेसरा दोषपत्र लिखी किन्हें तेस रे ऊपर लगाई दितेया कि “ये यहूदिया रा राजा आ”।²⁷ होर तिन्हे तेस

साउगी दो डाकू, एक दाईं तरफ होर दूजा बाईं तरफ क्रूसा पर चढ़ाये।²⁸ तेबे धर्मसास्त्रा रा से वचन कि से डाकूआ साउगी गिणेया गया, पूरा हुआ।²⁹ होर रस्ते मन्झ आऊणे जाणेवाळे मूंड हिल्लाई हिल्लाई किन्हें ये बोली किन्हें तेसरी निन्दा करहा ऐ थे, कि वाह! मंदरा जो ढाणे वाळे होर त्रीजे ध्याड़े बनाणे वाळे! क्रूसा परा ले ऊतरी किन्हें आपणे आपा जो बचाई ले।³⁰ इहां ई माहयाजक सास्त्रिया साउगी,³¹ आपु मन्झ मजाक करेया करहा ऐ थे; कि इने होर बचाए, होर से आपणे आपा जो नी बचाई सकदा? ³² इस्त्राएला रा राजा मसीह ऐबे क्रूसा परा ले ऊतरी किन्हें आई जा, कि आस्से देखी किन्हें विस्वास करिये; होर जो तेस साउगी क्रूसा पर चढ़ाई रे थे, स्यों भी तेस री निन्दा करेया करहा ऐ थे।³³ होर छठे पैहर ध्याड़ीया ई, सारे देसा मन्झ न्हयारा छाई गया; होर त्रीजे पैहर तक रैहया।³⁴ त्रीजे पैहर यीसूऐ चिल्लाई किन्हें जोरा किन्हें बोल्या, इलोई, इलोई, लमा शबक्तनी? जेस रा मतलब आ; हे मेरे परमेसर, हे मेरे परमेसर तैं हांऊ किधियो छाडी दितेया? ³⁵ होर जो तेसरे नेडे खहड़ी रे थे, तिन्हा मंझा ले बौहतिये ये सुणी किन्हें बोल्या; देखा ये एलियाहा जो सादेया करहा।³⁶ होर एकिये दौड़ी किन्हें स्पन्जा जो सिरके मन्झ डूबोया, होर सरकंडे पर रखी किन्हें तेस जो चुसणे जो दितेया, होर बोल्या, रुकी जाऊआ, देख्हा ऐ, कि एलियाह तेस जो थाले तुआरने रे कठे आंहुआं, कि नी? ³⁷ तेबे यीसूऐ बड़े जोरा किन्हें चिल्लाई किन्हें आपणे प्राण छाडी दिते।³⁸ होर मंदरा रा पर्दा ऊपरा ले लई किन्हें हेठा तक फटी किन्हें दो टुकड़े हुई गया।³⁹ जो सूबेदार तेसरे साम्हणे खहड़ी रा था, जेबे तिने तेस जो चिल्लाई किन्हें प्राण छाडदे हुए देख्या, ता तेस किन्हें बोल्या, सच्चे ये माहणु, परमेसरा रा पुत्र था।⁴⁰ कई जनाने भी दूरा ले देख्या करहा ई थी; तिन्हा मन्झ मरियम मगदलीनी होर छोटे यकुबा होर योसेसा री माऊ मरियम होर शलोमी थी।⁴¹ जेबे से गलीला मन्झ था, ता स्यों तेसरे पीछे पीछे चल्हा ई थी, होर तेसरी सेउआ टैहल करहा ई थी; होर, होर भी बौहत सारी जनाने थी, जो तेस साउगी यरूसलेमा मन्झ आईरी थी।⁴² साहंज हुई गईरी थी, ता सब्ता रे ध्याड़े ले एक ध्याड़े पैहले, जो त्यारी रा ध्याड़ा था।⁴³ तेथी अरिमितिया रा रैहणे वाळा युसूफ आया, जो एक इज्जतदार मंत्री होर आपु भी परमेसरा रे राजा रा इन्तजार करेया करहा था; से हिम्मत करी किन्हें पिलातुसा वाले गया होर यीसू री ल्हास मांगी।⁴⁴ पिलातुसा जो हरानी हुई, कि से इतने छोड़े ई मरी गया? होर तिने सूबेदारा जो सादी किन्हें पुछेया, कि क्या तेस जो मरीरे काफ़ी देर हुई गी? ⁴⁵ जेबे सुबेदारा ले तिने सारा हाल जाणी लया, ता ल्हास युसुफा जो देई दीती।⁴⁶ तेबे तिने एक पतली चादर मुले खरीदी, होर ल्हास तुआरी किन्हें चादरा मन्झ लपेटी, होर तिने तेसरी ल्हास एक कबरा मन्झ, जो चटाना रे

बीचा मन्झ खणीरी थी, रखी दिती, होर कबरा रे दरवाजे पर एक पाथर धकेली दितेया।⁴⁷ होर मरियम मगदलीनी होर योसेसा री माऊ मरियमे ये देखी लया कि तिन्हे तेस जो केथी जे रख्या।

16¹ जेबे सब्ता रा ध्याड़ा बीती गया, ता मरियम मगदलीनी होर याकुबा री माऊ मरियम होर स्लोमीए मसाले खरीदी लये, कि आई किन्हें तेस पर मळी सके।² होर हपते रे पैहले ध्याड़े भ्यागा ई, जेबे सूरज निकळेया करहा था, स्यों कबरा पर आई।³ होर आपु मन्झ बोल्दी लगी, कि आस्सा रे कठे कबरा रे दरवाजे रा पाथर केस हटाणा? ⁴ जेबे तिन्हे देख्या, कि पाथर ता हटी गईरा! क्यूंकि से बौहत बडा था।⁵ होर कबरा रे अन्दर जाई किन्हें, तिन्हे एक जुआना जो चीटे कपड़े पैहनी रे दाईं बखा जो बैठिरे देख्या, होर बौहत हरान हुई गये।⁶ तिने तिन्हा किन्हें बोल्या, हरान मत हुआ, तुस्से यीसू नासरी जो, जेस जो क्रूसा प्र्याहले चढ़ाया था, तेस जो टोळ्हा ई; से जीउंदा हुई गईरा; से एथी नी आ; देखा एस जगहा जो, जेथी जे तिन्हे तेस जो रखिरा था।⁷ पर तुस्से जाऊआ, होर तेसरे चले होर पतरसा किन्हें बोला, कि तेस तुस्सा ले पैहले गलीला जो जाणा; जेहड़ा तिने तुस्सा किन्हें बोलिरा था, तेस तुस्सा जो तेथी मिलणा।⁸ होर स्यों निकळी किन्हें कबरा वाले ले चली गयी; क्यूंकि डरा रे मारे स्यों काम्या करहा ई थी, होर तिन्हे केसी किन्हें कुछ नी बोल्या, क्यूंकि स्यों डरी गईरी थी।⁹ हपते रे पैहले ध्याड़े भ्यागा ई से जीऊन्दा हुई किन्हें सभी ले पैहले मरियम मगदलीनी जो, जेस्सा मन्झा ले जे तिने सात दुष्ट आत्मा काढी थी, तेस्सा जो सुझ्या।¹⁰ तेस्से जाई किन्हें तेसरे साथिया जो, जो दुःखा मन्झ डूबीरे थे होर रोया करहा ऐ थे, तिन्हा जो खबर दीती।¹¹ होर तिन्हे ये सुणी किन्हें कि से जीउंदा आ, होर तेस्से से देखी लेईरा, तिन्हे तेस्सा री एस गल्ला पर विस्वास नी कितेया।¹² एता ले बाद से दूजे रूपा मन्झ तिन्हा मंझा ले दुहीं जो सुझ्या, जेबे स्यों गांऊआं री तरफ जाया करहा ऐ थे,¹³ तिन्हे भी जाई किन्हें होरी जो खबर दीती, पर तिन्हे तिन्हारा भी विस्वास नी कितेया।¹⁴ तेता ले बाद से तिन्हा ग्यारा चले जो भी सुझेया, जेबे जे स्यों खाणा खांदे बैठीरे थे, होर तिन्हारे अविस्वास होर मना रे काठेपना रे कठे तिने स्यों झाड़े, क्यूंकि जिन्हें जे तेस जो जीउंदे हुणे ले बाद देख्या था, तिन्हे तेसरा विस्वास नी कितेया।¹⁵ होर तिने तिन्हा किन्हें बोल्या, तुस्से सारे संसारा मंझ जाई किन्हें सारी सृष्टि रे लोका जो सुसमाचार प्रचार करा।¹⁶ जो कोई विस्वास करघा होर बप्तिस्मा लैन्च्हा तेसरा, उद्धार हुणा, पर जो कोई विस्वास नी करघा, तेस दोषी बणी जाणा।¹⁷ होर विस्वास करणे वाळे मन्झ ये चिन्ह हुणे कि तिन्हा मेरे नांऊआं ले दुष्ट आत्मा काढणी।¹⁸ तिन्हा नौई नौई भाषा बोलणी, सांप ऊठाई लैणे, होर अगर

स्यों जैहरली चीजा भी पी जाये तेबे भी तिन्हारा कुछ नुक्सान नी हुणा, तिन्हा बमारा पर हाथ रखणे, होर तिन्हा ठीक हुई जाणा । ¹⁹ होर प्रभु यीसू तिन्हा किन्हें गल्ला करणे ले बाद स्वर्गा जो चली गया, होर परमेसरा रे दाई तरफ बैठी गया ।

²⁰ होर तिन्हे निकळी किन्हें हर जगहा प्रचार कितेया, होर प्रभु तिन्हा साउगी काम करदा रैहया, होर तिन्हा चिन्हा रे ज़ीये जो साउगी साउगी हुंदे जाहें थे, वचना जो, पक्का करदा रैहया । आमीन ॥

लूका

1 इधी कठे कि बौहतिये स्यों गल्ला, जो आस्सा रे बीचा मन्झ हुई, इतिहास लिखणे मन्झ हाथ ल्गाईरा। 2 जिहां, तिन्हेजो पैहले ले ई इन्हा गल्ला जो देखणे वाळे होर वचना रे सेवक थे आस्सा तक पौहन्चाया। 3 इधी कठे हे श्रीमान थिऊफिलुस मुंजो भी ये ठीक लग्हा कि तिन्हा सभी गल्ला रा सारा हाल सुरूहु ले ई ठीक ठाक परखी किन्हे तिन्हा जो तेरे कठे क्रमा रे मुताबक लिखी सकूं। 4 ताकि तू ये जाणी ले, कि ये गल्ला जिन्हारी जे तैं शिक्षा पाईरी, केहडी अटल ई। 5 यहूदिया रा राजा हेरोदेसा रे टैमा अबिय्याहा रे दला मन्झ जकरयाहा नांऊआं रा एक याजक था, होर तेसरी लाडी हारूना रे खानदाना री थी, तेस्सा रा नांऊ इलीसिबा था। 6 होर स्यों दुहें परमेसरा रे साम्हणे धर्मी थे; होर प्रभु रे सारे हुक्मा होर विधिया पर खराई किन्हे चलने वाळे थे। 7 तिन्हारी कोई संतान नी थी, क्यूंकि इलिसिबा बाहन्ज थी, होर स्यों दुहें खपरे हुई गईरे थे। 8 जेबे जकरयाहा रे समाजा रे मंदरा मन्झ याजका रे कामा री बारी थी, से परमेसरा रे साम्हणे याजका रा काम करहा था। 9 ता याजका रे रवाजा रे मुताबक चल्ली री परम्परा रे मुताबक तेसरे नांऊआं पर चिठी निकळी, कि प्रभु रे मंदरा मन्झ जाई किन्हे धुपवत्ती भ्वाये। 10 होर धुपवत्ती भ्वाणे रे टैमा लोका री सारी मण्डली बाहर प्रार्थना करेया करहा ई थी। 11 होरतेस ई टैम तेसरे साम्हणे प्रभु रा एक स्वर्गदूत प्रगट हुआ; से धूपा री बेदी रे दाई तरफ खहडी रा था। 12 होर जकर्याह स्वर्गदूता जो देखी किन्हे बौहत डरी गया। 13 पर स्वर्गदूते तेस किन्हे बोल्या, हे जकर्याह डर मत क्यूंकि तेरी प्रार्थना सुणी लई गईरी होर तेरी लाडी इलिसिबा ले तेरे कठे एक म्हठा जम्मणा, होर तू तेसरा नांऊ यहून्ना रख्या। 14 होर तुजो आनंद होर खुसी हुणी; होर बौहत लोका तेसरे जन्मा री वजहा ले खुस हुणा। 15 क्यूंकि तेस प्रभु रे साम्हणे महान हुणा; होर तेस दाखरस होर सराब कधी नी पीणा; होर तेस आपणी माऊआ रे गर्भा ले ई पवित्र आत्मा ले परिपूर्ण हुणा। 16 होर तेस इस्राएलिया मंझा ले बौहत लोक तिन्हारे प्रभु परमेसरा री तरफ फेरणे। 17 तेस एलियाहा री आत्मा होर सक्ति मन्झ हुई किन्हे तेसरे अगे अगे चलणा, तेस पिता रा मन बच्चे री तरफ फेरी देणे; होर हुकम नी मनणे वाळैया जो धर्मिया साहीं समझ रखणे रे कठे प्रेरणा देणी; ये सभ, तेस लोका जो प्रभु रे खातर त्यार करणे रे कठे करणा। 18 जकर्याहि स्वर्गदूता ले पुछेया; ये हांऊ कीहां जाणूं कि ये सच आ? क्यूंकि हांऊ ता खपरा आ; होर मेरी लाडी भी खपरी हुई गईरी। 19 स्वर्गदूते तेस जो जबाब दितेया, कि हांऊ जिब्राईल आ, जो परमेसरा रे साम्हणे खहडीरा रैंहयां;

होर मुंजो तुध किन्हे गल्ल बात करणे होर तुजो ये समाचार सुनाणे रे कठे भेजिरा। 20 होर देख जेस ध्याडे तक यूं गल्ला पूरी नी हुई जाये, तेस ध्याडे तक तूध चुप रहणा, होर गूंगा हुई जाणा, इधी कठे कि तैं मेरी गल्ला रा विस्वास नी कितेया तिन्हा आपणे टैमा पर पूरी हुणा। 21 होर लोक जकर्याहा रा इंतजार करदे रहे होर हरान हुई गये कि तेस जो मंदरा मन्झ इतनी देर कि लगी? 22 जेबे से बाहर आया, ता से तिन्हा किन्हे बोली नी सक्या; होर स्यों जाणी गये, कि तिने मंदरा मन्झ कोई दर्सन देख्या; होर से तिन्हा जो ईसारा करदा रहया, पर से गूंगा बणी किन्हे रही गया। 23 जेबे तेसरी सेउआ रे ध्याडे पुरे हुई गये, ता से आपणे घरा जो चली गया। 24 इन्हा ध्याडे ले बाद तेसरी लाडी इलिसिबा गर्भवती हुई; होर पांज महीने तक आपणे आपा जो ये बोली किन्हे ल्कोंदी रहै। 25 कि माहणु मन्झ मेरी बेज्जती दूर करणे रे कठे प्रभु ऐ इन्हा ध्याडे मन्झ दया करी किन्हे मेरे कठे ऐहडा कितेया। 26 छठे महीने मन्झ परमेसरा री तरफा ले जिब्राईल स्वर्गदूता जो गलीला रे नासरत नगरा मन्झ एक कुआरीआ वाले भेज्या गया। 27 जेस्सा री मांगणी यूसुफ नांऊआं रे, दाऊदा रे घराने रे एक आदमी किन्हे हेई री थी; तेस्सा कुआरी रा नांऊ मरियम था। 28 होर स्वर्गदूते तेस्सा वाले अन्दर आई किन्हे बोल्या; तुध पर परमेसरा री दया हुई री, आनंद होर जय तेरी हो, परमेसर तेरे साउगी आ। 29 से तेस वचना ले बौहत डरी गयी, होर सोच्ची लगी, कि ये केस तरीके रा अभिवादन आ? 30 स्वर्गदूते तेस्सा किन्हे बोल्या, हे मरियम; डर मत, क्यूंकि परमेसरा री दया तेरे पर हुई गईरी। 31 होर देख, तुध गर्भवती हुणा, होर तेरा एक पुत्र हुणा, तू तेसरा नांऊ यीसू रख्या। 32 तेस म्हान हुणा; होर तेस जो परम प्रधाना रा पुत्र बोल्या जाणा; होर प्रभु परमेसरा तेस जो तेसरे बाबा, दाऊदा री गद्दी देई देणी। 33 होर तेस याकूबा रे घराने पर हमेसा राज करणा; होर तेसरे राजा रा कधी अंत नी हुणा। 34 मरीयमे स्वर्गदूता किन्हे बोल्या, ये किहां हुई सकहा? हांऊ ता केसी आदमी जो नी जाणदी। 35 स्वर्गदूते तेस्सा जो जबाब दितेया; कि पवित्र आत्मा तेरे पर आऊणा, होर परम प्रधाना री सक्ति तुध पर छाया करणी, इधी कठे तेस जन्म लैणे वाळे पवित्र बालका जो, परमेसरा रा पुत्र बोल्या जाणा। 36 होर देख, होर तेरे ई टब्बरा मन्झ इलिसिबा रा भी बुढापे मन्झ बेटा हुणे वाळा आ, जेस्सा जो लोक बांझ बोल्हा यें थे, तेस्सा रा ये छठा म्हीना चल्लीरा आ। 37 क्यूंकि जो वचन परमेसरा री तरफा ले हुंहां से बेअसर नी हुंदा। 38 मरियमे बोल्या, देख, हांऊ ता प्रभु री दासी ई, मेरे किन्हे तेरे वचना रे मुताबक हो; तेबे

स्वर्गदूत तेस्सा वाले ले चली गया।³⁹ तिन्हा ध्याड़े मरियम ऊठी किन्हें झटपट पाहड़ी देसा मन्झ बस्सीरे यहूदा रे एक नगरा जो चली गयी।⁴⁰ होर जकर्याहा रे घरा मन्झ जाई किन्हें इलिसिबा जो प्रणाम कितेया।⁴¹ जिहां ई इलिसिबे मरियमा रा प्रणाम सुणेया, तिहां ई बच्चा तेस्सारे पेटा मन्झ उछलेया, होर इलिसिबा पवित्र आत्मा किन्हें भहरी गयी।⁴² होर तेस्सेउची अवाजा मन्झ पुकारी किन्हें बोल्या, तू सभ जनानिया मन्झ भागा वाळी ई, होर तेरे पेटा रा फल धन्य आ।⁴³ होर ये दया मेरे पर केथी ले हुई, कि मेरे प्रभु री माऊ मेरे वाले आई? ⁴⁴ होर देख, होर जिहां ई तेरे अभिवादना री अवाज मेरे काना मन्झ पई, तिहां ई बच्चा मेरे पेटा मन्झ खुसी रे मारे उछलेया।⁴⁵ तू भागा वाळी ई, जेस्से जे विस्वास कितेया कि जो गल्ला प्रभु री तरफा ले तेस्सा किन्हें बोली गईरी थी; स्यों पूरी हुणी।⁴⁶ तेबे मरीयमे बोल्या, मेरा प्राण प्रभु री बड़ाई करहा।⁴⁷ होर मेरी आत्मा मेरे ऊद्धार करणे वाळे परमेसरा ले खुस ई।⁴⁸ क्यूंकि तिने आपणी दासी री दीनता पर रैहम कितेया, इधी कठे देखा, एभे ले सभिया युगा युगा रे लोका मुंजो भागा वाळी बोलणा।⁴⁹ क्यूंकि जो सक्तिमान आ तिने मेरे कठे बडे बडे काम कितीरे, होर तेसरा नाऊ पवित्र आ।⁵⁰ होर तेसरी दया तिन्हा पर, जो तेस ले डरहा ऐ, पीढी पीढी तक बणी रेंहीं।⁵¹ तिने आपणे हाथा री ताकत दसी, होर जो आपणे आपा जो बडा समझहा ऐ थे, स्यों तितर बितर करी दिते।⁵² तिने राजे राजगद्दी ले हेठ सट्टी दिते; होर दीन लोक ऊंचे किते।⁵³ तिने भुखे खरी चीजा किन्हें भरपूर किते, होर अमीर खाली हाथ काढी दिते।⁵⁴ तिने आपणा सेवक इस्राएल सम्भाळया।⁵⁵ कि से आपणी तेस दया जो याद करे, जो अब्राहमा होर तेसरे खानदाना पर हमेसा रैहणी, जेहडा तिने आस्सा रे माऊ बाबा किन्हें बोलीरा था।⁵⁶ मरियम लगभग त्राय महीने तक तेस्सा वाले रही किन्हें आपणे घरा जो चली गयी।⁵⁷ तेबे इलिसिबा रा बच्चा जम्णे रा टैम पूरा हुआ, होर तेस्से म्हेठे जो जन्म दितेया।⁵⁸ तेस्सा रे पड़ोसिये होर टब्बरे ये सुणी किन्हें, कि प्रभुए तेस्सा पर बडी दया किती, स्यों तेस्सा साउगी बौहत खुस हुए।⁵⁹ होर ऐहडा हुआ कि आठवे ध्याड़े स्यों जेबे बच्चे रा खतना कर्वान्दे आये होर तेसरा नाऊ तेसरे बाबा रे नाऊआं पर जकर्याह रखदे लगे।⁶⁰ होर तिन्हे तेस्सा किन्हें बोल्या, तेरे टब्बरा मन्झ केसीए भी ऐहडा नाऊ नी रखीरा।⁶¹ होर तिन्हे तेस्सा किन्हें बोल्या, तेरे टब्बरा मन्झ केसीए भी ऐहडा नाऊ नी रखीरा।⁶² तेबे तिन्हे तेसरे बाबा ले इसारे मन्झ पुछेया।⁶³ कि तू तेसरा नाऊ क्या रखणा चाहां? होर तिने लिखणे री पट्टी मांगी होर लिख्या, कि तेसरा नाऊ यहुन्ना आ; होर सभी जो हरानी हुई।⁶⁴ तेबे तेसरा मुंह होर जीभ झटपट खुल्ली गयी; होर से बोल्दा होर परमेसरा रा धन्याबाद करदा लगया।⁶⁵ होर तेसरे ओरे परे

रैहणे वाळेया पर डर छाई गया; होर तिन्हा सभी री गल्ला री चर्चा यहूदिया रे सारे पाहड़ी देसा मन्झ फैल्ली गई।⁶⁶ होर सभी सुणने वाळे आपणे आपणे मना मन्झ ये विचार करी किन्हें बोल्या, ये बच्चा केहडा हुणा? क्यूंकि प्रभु रा हाथ तेस साउगी था।⁶⁷ होर तेसरा बाब जकर्याह पवित्र आत्मा किन्हें भहरी गया, होर भविष्यवाणी करदा लगया।⁶⁸ कि प्रभु, इस्राएला रा परमेसर धन्य हो, कि तिने आपणे लोका पर नजर कीती होर तिन्हारा छुटकारा कितेया।⁶⁹ होर आपणे दास दाऊदा रे खानदाना मन्झ आस्सारे कठे एक उद्धारा रा सींग खडा कितेया।⁷⁰ जेहडा कि तिने बौहत पैहले आपणे पवित्र नबीया रे ज़ीये वचन दितेया था।⁷¹ तिने आस्सा रे दुसमना ले, होर आस्सा रे बैरीया रे हाथा ले आस्सा रा छुटकारा कितेया।⁷² ताकि से आस्सा रे बाब दादे पर दया करी किन्हें आपणी वाचा री याद करे।⁷³ होर से कसम जेहड़ी तिने आस्सा रे पिता अब्राहमा किन्हें खाधी री थी।⁷⁴ कि तेस आस्से, आस्सा रे दुसमना रे हाथा ले छुडाणे।⁷⁵ होर आपणी जिन्दगी भर हर रोज तेसरे साम्हणे आस्से पवित्र होर धर्मी बणी रही सके।⁷⁶ हे बच्चे, एभे ले तुध परम प्रधान परमेसरा रा नबी हुणा, क्यूंकि तुध प्रभु रे अगे अगे चली किन्हें तेसरे कठे रस्ता त्यार करणा।⁷⁷ होर तेस लोका किन्हें बोलणा कि तिन्हारे पापा री माफी री वजहा ले ई तिन्हारा उद्धार हुणा।⁷⁸ आस्सा रे परमेसरा री बडी दया ले एक नऊए ध्याड़े री भ्याग आस्सा पर ऊपरा ले उतरणी।⁷⁹ कि न्ह्यारे होर मौता री छांऊआं मन्झ बैठणे वाळेया जो ज्योति मिली सके, होर आस्सा रे पैरा जो सांति रे रस्ते पर सीधे चलाई सके।⁸⁰ होर से बच्चा बढ़दा होर आत्मा मन्झ ताकतवर हुंदा चली गया, होर इस्राएला पर जाहिर हुणे तक जंगला मन्झ रैहया।

2¹ तिन्हा ध्याड़े औगुस्तुस कैसरा री तरफा ले हुकम निकळेया, कि सारे संसारा रे लोका रे नाऊ लिखे जाये।² ये पैहली नाऊ लिखाई तेस टैम हुई, जेबे क्लिरिनयुस सुरीया रा हाकम था।³ होर सभ लोक नाऊ लिखवाणे रे कठे आपणे आपणे नगरा जो चली गये।⁴ एता कठे कि यूसुफ भी दाऊदा रे खानदाना होर वंसा ले था, से भी गलीला रे नासरत नगरा ले यहूदिया मन्झ दाऊदा रे नगरा बैतलैहमा जो चली गया।⁵ ताकि से आपणी बरेड मरियमा साउगी नाऊ लिखवाई सके।⁶ होर ऐहडा हुआ कि हल्ली तक जेबे स्यों तेथी थे, तेस्सा रे जम्मणे रे ध्याड़े पुरे हुए।⁷ होर तेस्से आपणा पैहलोठा पुत्र जणेया होर तेस जो कपड़े मन्झ लपेटी किन्हें चरणी मन्झ रख्या।⁸ होर तेस देसा मन्झ कुछ पुहाल थे, जो राती मैदाना मन्झ रही किन्हें आपणे झुंडा री पैहरेदारी करेया करहा ऐ थे।⁹ होर प्रभु रा एक दूत तिन्हा वाले आई किन्हें खडा हुआ, होर प्रभु रा प्रयासा तिन्हारे चारो तरफ चमक्या, होर स्यों बौहत डरी

गये । ¹⁰ तेबे स्वर्गदूते तिन्हा किन्हें बोल्या, मत डरा; क्यूंकि देखा हांऊ बड़ी खुसी रा समाचार सुणाहां जो सभ लोका रे कठे हुणा । ¹¹ कि आज दाऊदा रे नगरा मन्झ एक उद्धार कर्ता जम्मीरा, होर ये ई मसीह प्रभु आ । ¹² होर एस गल्ला रा तुस्सा रे कठे ये चिन्ह हुणा, कि तुस्सा एक बच्चे जो कपड़े मन्झ लपेटेरा होर चरणी मन्झ लेटीरा देखणा । ¹³ तेबे अचानक तेस स्वर्गदूता साउगी होर बौहत सारे स्वर्गदूता रा एक दल परमेसरा री स्तुति करदे होर ये बोल्दे हुए सुझ्या । ¹⁴ कि सर्गा मन्झ परमेसरा री म्हीमा होर धरती पर तिन्हा माहणु मन्झ जिन्हा ले से खुस आ, सांति हो । ¹⁵ जेबे स्वर्गदूत तिन्हा वाले ले स्वर्गा जो चली गये, ता पुहाले आपु मन्झ बोल्या, आऊआ आस्से बैतलैहमा जाई किन्हें ये गल जेहडी आस्सा किन्हें हुई, होर जेस गल्ला जो प्रभुए आस्सा किन्हें दस्या, देख्हा ऐ । ¹⁶ होर तिन्हे झटपट जाई किन्हें मरियम होर यूसुफा जो होर चरणी मन्झ तेस बच्चे जो लेटिरा देख्या । ¹⁷ होर पुहाले तिन्हा जो देखी किन्हें से गल जो एस बच्चे रे बारे मन्झ तिन्हा किन्हें बोली गईरी थी, तेता रे बारे मन्झ तिन्हे सभी जो दस्सी दितेया । ¹⁸ होर सभी सुणने वाळे जो, तिन्हा गल्ला ले जो पुहाले तिन्हा किन्हें बोलीरी थी, हरानी हुई । ¹⁹ पर मरियम ये सभ गल्ला आपणे मना मन्झ रखी किन्हें सोच्ची रही । ²⁰ होर पुहाल जेहडा तिन्हा किन्हें बोलिरा था, तेहडा ई सभ सुणी होर देखी किन्हें स्यों परमेसरा री स्तुति करदे हुए वाप्स चली गये । ²¹ जेबे आठ ध्याड़े पुरे हुई गये, होर तेसरे खतने रा टैम आया, ता तेसरा नांऊ यीसू रखेया, तेस जो ये नांऊ तेसरे गर्भा मन्झ आऊणे ले पैहले ई स्वर्गदूता रे ज़ीये देई दितिरा था । ²² होर जेबे मूसा री व्यवस्था रे मुताबक तिन्हारे सुद्ध हुणे रे ध्याड़े पुरे हुए ता स्यों यीसू जो प्रभु रे साम्हणे आर्पण करणे रे कठे यरुस्लेमा जो लई गये । ²³ (जेहडा कि प्रभु री व्यवस्था मन्झ लिखीरा कि हर एक पैहलोठा प्रभुरे कठे पवित्र ठैहरणा) । ²⁴ होर प्रभु री व्यवस्था रे वचना रे मुताबक कपोता रा एक जोडा, या कबूतरा रे दो बच्चे लई किन्हें बलिदान करा । ²⁵ होर देखा, यरुशलैमा मन्झ समौन नांऊआं रा एक माहणु था, होर से माहणु धर्मी होर भक्त था; होर इस्राएला रे सुख चैना रा इंतजार करहा करहा था, होर पवित्र आत्मा तेस पर था । ²⁶ पवित्र आत्मा री तरफा ले तेस जो चेतावनी हुई गईरी थी, कि जेबे तक तू प्रभु रे मसीहा रा दरसन नी करी लैहन्गा, तेबे तक तेस नी मरणा । ²⁷ से आत्मा ले प्रेरणा पाई किन्हें मंदरा मन्झ आया; होर जेबे माऊ बाब तेस बच्चे जो मंदरा मन्झ अन्दर लई आये, कि तेसरे कठे व्यवस्था रे रवाजा रे मुताबक करे । ²⁸ तेबे तिने से आपणी गोदा मन्झ चक्या होर परमेसरा रा धन्याबाद करी किन्हें बोल्या । ²⁹ हे स्वामी, ऐभे तू आपणे दासा जो आपणे वचना रे मुताबक सांति किन्हें भेजी दे । ³⁰ क्यूंकि मेरी हाखिये तेरे उद्दारा जो देखी

लया । ³¹ जेस जो तैं सभ देसा रे लोका रे साम्हणे त्यार कितिरा । ³² कि से अन्य जातिया जो प्रयासा देणे रे कठे ज्योति, होर तेरे आपणे लोका रे कठे एसाईला री म्हीमा हो । ³³ होर तेसरा बाब होर तेसरी माऊ इन्हा गल्ला ले जो तेसरे बारे मन्झ बोली जाहीं थी, हरान हुहां ऐं थे । ³⁴ तेबे समौने तिन्हा जो आसीष देई किन्हें, तेसरी माऊ मरियमा किन्हें बोल्या; देखा, एस बच्चे इस्राएला मन्झ बौहता रे गिरणे होर उठणे रा कारण बणना, होर जेसरे खलाफ बौहत गल्ला हुणी । ³⁵ होर तेरा प्राण भी तलवारा किन्हें छिदी जाणा, एता ले बौहती लोका रे दिला रे विचार जाहिर हुई जाणे । ³⁶ होर अशेरा रे गोत्रा मन्झा ले हन्नाह नांऊआं री फनूएला री म्हीठी एक नबण थी; से बौहत स्याणी थी, होर ब्याह हुणे ले बाद सात साला तक आपणे लाड़े साउगी रही री थी । ³⁷ से चुआसी साला ले विधवा थी, होर मंदरा जो जाणा नी छाडदी थी पर ब्रत होर प्रार्थना करी करी किन्हें राती ध्याड़ी उपासना करदी रहीं थी । ³⁸ होर से तेस ई टैम तेथी आई किन्हें प्रभु रा धन्याबाद करदी लगी, होर तिन्हा सभी किन्हें, जो यरुस्लेमा रे छुटकारे रा इंतजार करहा करहा ऐं थे, तेसरे बारे मन्झ गल्ला करदी लगी । ³⁹ होर जेबे स्यों प्रभु री व्यवस्था रे मुताबक सभ कुछ निपटाई चुके ता स्यों गलीला मन्झ आपणे नगर नासरता जो दबारा वाप्स चली गये । ⁴⁰ होर बच्चा बढदा, होर ताकतवर हुंदा, होर बुद्धि किन्हें परिपूर्ण हुंदा गया; होर परमेसरा री दया तेस पर थी । ⁴¹ तेसरे माऊ बाब हर साल फसहा रे साजे मन्झ यरुसलेमा जो जांदे रेंहे थे । ⁴² जेबे से बारा साला रा हुआ, ता स्यों साजे रे रवाजा रे मुताबक यरुस्लेमा जो चली गये । ⁴³ होर जेबे स्यों तिन्हा ध्याड़े जो पूरा करी किन्हें वाप्स जांदे लगे, ता से बच्चा यीसू यरुसलेमा मंझ ई रही गया; होर ये गल तेसरे माऊ बाब नी जाणदे थे, ⁴⁴ तिन्हे ये समझ्या कि, से बच्चा बाकि होर यात्रिया साउगी हुंघा, एक ध्याड़े रा पडाव निकळी गया; होर स्यों तेस जो आपणे टब्बरा होर जाण पैहचाण वाळे लोका मन्झ टोळदे लगे । ⁴⁵ पर जेबे से नी मिलेया, ता तेस जो टोळदे टोळदे स्यों यरुस्लेमा जो वाप्स आई गए । ⁴⁶ होर तीन ध्याड़े ले बाद तिन्हा जोसे मंदरा मन्झ गुरुआ रे बीचो बीच बैठीरे, तिन्हारी सुणदे होर तिन्हा ले सुआल करदे मिल्या । ⁴⁷ होर जितने तेसरी सुणेया करहा ऐं थे, स्यों सभ तेसरी समझ होर तेसरे जबाबा ले हरान थे । ⁴⁸ तेबे स्यों तेस जो देखी किन्हें हरान हुए होर तेसरी माऊए तेस किन्हें बोल्या; हे पुत्र, तैं आस्सा किन्हें ऐहडा व्यवहार किधियो कितेया? देख, तेरा बाब होर हांऊ तुजो टोळदे टोळदे परेसान हुई गईरे थे । ⁴⁹ तिने तिन्हा किन्हें बोल्या; तुस्से मुंजो किधियो टोळेया करहा ऐं थे? क्या तुस्से नी जाणदे थे, कि मुंजो आपणे पिता रे घरा मन्झ हुणा जरूरी आ । ⁵⁰ पर जो गल तिने तिन्हा किन्हें बोली, स्यों तिन्हा जो नी समझी सके । ⁵¹ तेबे से तिन्हा

साउगी गया, होर नासरता मन्झ आया, होर तिन्हारे हुक्मा रा पालन करदा रहैया; होर तेसरी माऊए ये सभ गल्ला आपणे मना मन्झ रखी।⁵² होर यीसू बुद्धि होर कद काठी मन्झ होर परमेसर होर माहणुआं रे अनुग्रहा मन्झ बढ़दा गया।

3¹ तिबिरियुस कैसरा रे राजा रे पहन्दरुए साला मन्झ जेबे पुन्तियुस पिलातुस यहूदिया रा हाकम था, होर गलीला मन्झ हेरोदेस, तेसरा भाई फिलिप्पुस इतूरैया मन्झ, होर त्रखोनितिस होर लिसानियास अबिलेने मन्झ चौथाई रे राजा थे।² होर जेबे हन्ना होर कैफा महायाजक थे, तेस टैम परमेसरा रा वचन जंगला मन्झ जकर्याहा रे म्हठे यहून्ना वाले पुजेया।³ होर से यर्दना रे ओरले परले सारे देसा मन्झ आई किन्हें, पापा री माफी रे कठे मन बदलावा रे बपतिस्मा रा प्रचार करदा लग्या।⁴ जिहां जे यसायाह नबी रे बोलीरे वचना री कताबा मन्झ लिखिरा, कि जंगला मन्झ पुकारने वाळे री अवाज हुएया करहा ई। कि प्रभु रा पैंडा त्यार करा, तेसरी सड़का सीधी बणाऊआ।⁵ हर एक घाटी भहरी जाणी, होर हर एक पाहड़ होर टीला बराबर कितेया जाणा, होर जो टेढ़ा आ से सीधा, होर जो ऊँचा आ से नीचा, होर जो उबड़ खाबड़ आ से चौरस रस्ता बणी जाणा।⁶ होर हर प्राणीया परमेसरा रा उद्धार देखणा।⁷ जो भीड़ा री भीड़ तेस ले बपतिस्मा लेणे रे कठे उमड़ी पौहीं थी, तिन्हा किन्हें से बोल्हा था; हे सांपा रे बच्चेयो, तुस्सा जो कुने दस्या कि आऊणे वाळे गुस्से ले भगा।⁸ एता कठे मना जो बदलणे रे लायक फल ल्याऊआ; होर आपणे आपणे मना मन्झ ये नी सोचा, कि आस्सा रा बाब अब्राहाम आ; क्यूंकि हांऊ तुस्सा किन्हें बोल्हा, कि परमेसरा इन्हा पात्थरा ले अब्राहामा रे कठे संतान पैदा करी सकहा।⁹ होर एबे भी छहू डाळा री जड़ा पर रखिरा आ, इधी कठे जो जो डाळ बढ़िया फल नी ल्याऊन्दा, तेस जो काटेया होर आगी मन्झ फुकी देहां ऐं।¹⁰ होर लोके तेस ले पुछेया, ता आस्से क्या करिए? ¹¹ तिने तिन्हा जो जबाब दितेया, कि जेस वाले जे दो कुरते हो से तेसजो देई दे, जेस वाले जे नी हाए, होर जेस वाले जे खाणा हो, से भी ऐहड़ा ई करे।¹² होर चुंगी लैणे वाळे भी बपतिस्मा लैणे रे कठे आये, होर तेस ले पुछेया, कि हे गुरु, आस्से क्या करिए? ¹³ तिने तिन्हा किन्हें बोल्या, जो तुस्सा रे कठे जायज आ, तेता ले ज्यादा नी लैणा।¹⁴ होर स्पाहिये भी तेस ले ये पुछेया, आस्से क्या करिए? तिने तिन्हा किन्हें बोल्या, केसी पर अत्याचार नी करणा, होर ना झूठा दोष लगाणा, होर आपणी क्माई पर सन्तुष्ट रहैणा।¹⁵ जेबे लोके आस लगाई री थी, होर सभ आपणे आपणे मना मन्झ यहून्ना रे बारे मन्झ विचार करेया करहा ऐ थे, कि क्या ये ई मसीह ता नी ई आ? ¹⁶ ता यहून्ने तिन्हा सभी जो जबाब दितेया, कि हांऊ ता तुस्सा जो पाणी किन्हें बपतिस्मा देहां, पर से जे आऊणे वाळा आ, जो मेरे ले सक्तिसाली आ,

हांऊ ता एस लायक भी नी आ, कि तेसरे बूटा रे तस्में खोल्ही सकूं, तेस तुस्सा जो पवित्र आत्मा होर आगी किन्हें बपतिस्मा देणा।¹⁷ तेसरा सूप तेसरे हाथा मन्झ आ; होर तेस आपणा खलिहान बढ़िया तरीके किन्हें साफ करणा; होर कणका जो आपणे भण्डारा मन्झ कठा करणा, पर भूह तेस आगी मन्झ फुकी देणा जो कधी बुझदी नी।¹⁸ एता कठे से बौहत सारी खरी शिक्षा देई किन्हें लोका जो सुसमाचार सुणादा रहैया।¹⁹ पर तिने चौथाई देसा रे राजा हेरोदेसा जो, तेसरे भाई फिलिप्पुसा री लाड़ी हेरोदियासा साउगी तेसरे बुरे सबंधा रखणे रे कठे तेस जो फटकार लगाई थी।²⁰ इधी कठे हेरोदेसे यहून्ने जो कैदी बणाई किन्हें, जेहड़े कुकर्म तिने कितरे थे, तेता मन्झ तिने एक होर जोड़ी लया।²¹ जेबे सब लोके बपतिस्मा लया, होर यीसू भी बपतिस्मा लई किन्हें प्रार्थना करेया करहा था, ता सर्ग खुल्ही गया।²² होर पवित्र आत्मा कबुतरा साहीं तेस पर उतरेया, होर ये आकासवाणी हुई, कि तू मेरा प्यारा पुत्र आ, हांऊ तुध किन्हें बौहत खुस आ।²³ जेबे यीसू आपु खुद उपदेस देंदा लग्या, से लगभग तीह साला रा था होर (जेहड़ा समझ्या जाहां था) युसुफा रा म्हठा था; होर से ऐली रा।²⁴ होर से मत्ताता रा, होर से लेवी रा, होर से मलकी रा, होर से यन्ना रा, होर से यूसुफा रा।²⁵ होर से मत्तियाह रा, होर से आमोसा रा, होर से नहुमा रा, होर से असल्याहा रा, होर से नोगहा रा।²⁶ होर से माता रा, होर से मत्तियाहा रा, होर से शिमी रा, होर से योसेखा रा, होर से योदाहा रा।²⁷ होर से यहून्ने रा, होर से रेसा रा, होर से जरूब्बाबेला रा, होर से शलतियेला रा, होर से नेरी रा।²⁸ होर से मलकी रा, होर से अदी रा, होर से कोसमा रा, होर से इलमोदामा रा, होर से एरा रा।²⁹ होर से येसु रा, होर से इलाजारा रा, होर से योरिमा रा, होर से मत्ताता रा, होर से लेवी रा।³⁰ होर से समौना रा, होर से यहूदाहा रा, होर से यूसुफा रा, होर से योनाना रा, होर से इलयाकीमा रा।³¹ होर से मलेयाहा रा, होर से मिन्नाहा रा, होर से मत्तता रा, होर से नाताना रा, होर से दाऊदा रा।³² होर से यिशै रा, होर से ओबेदा रा, होर से बोअजा रा, होर से सलमोना रा, होर से नहसोना रा।³³ होर से अम्मनीदाबा रा, होर से अरनी रा, होर से हिस्त्रोना रा, होर से फिरिसा रा, होर से यहूदाहा रा।³⁴ होर से याकूबा रा, होर से इसहाका रा, होर से अब्राहामा रा, होर से तेरहा रा, होर से नाहोरा रा।³⁵ होर से सरूगा रा, होर से रेऊआ रा, होर से फिलिगा रा, होर से एबिरा रा, होर से शिलहा रा।³⁶ होर से केनाना रा, होर से अर्पक्षदा रा, होर से शेमा रा, होर से नुहा रा, से लिमिका रा।³⁷ होर से मथुशीलहा रा, होर से हनोका रा, होर से यिरीदा रा, होर से महललेला रा, होर से केनाना रा।³⁸ होर से इनोशा रा, होर से शेता रा, होर से आदमा रा, होर से परमेसरा रा था।

4¹ फेरी यीसू पवित्र आत्मा ले भहरी किन्हें, यर्दना ले वाप्स चली गया; होर चाळी ध्याडे तक आत्मा रे स्वाये जंगला मन्झ फिरदा रह्या।² तिन्हा ध्याडे मंझा तिने कुछ नी खाधेया होर जेबे स्यों ध्याडे पुरे हुई गये, ता तेस जो भूख लगी।³ होर सैताने तेस किन्हें बोल्या; अगर तू परमेसरा रा पुत्र आ, ता एस पात्थरा जो बोल कि ये रोटी बणी जाये।⁴ यीसूए तेस जो जबाब दितेया; कि ये लिखीरा, कि माहणु सिर्फ रोटी ले ई जीऊन्दा नी रहणा।⁵ तेबे सैतान तेस जो लई गया होर तेस जो एक पला मन्झ संसारार रे सारे राज दस्से।⁶ होर सैताने तेस किन्हें बोल्या; मां ये सब हक, होर इन्हा री म्हीमा तुजो देई देणी, क्युंकि ये सभ कुछ मुंजो देई दितीरा; होर जेस जो हांऊ चाहूँ तेस जो ये सभ कुछ देई देहां।⁷ इधी कठे अगर तू मुंजो नमस्कार करघा, ता ये सब कुछ तेरा हुई जाणा।⁸ यीसू ए तेस जो जबाब दितेया; कि तू प्रभु आपणे परमेसरा जो नमस्कार कर; होर सिर्फ तेसरी ई सेउआ कर।⁹ तेबे तिने से यरूशलेमा मन्झ लई जाई किन्हें मंदरा री चोटी पर खडा कितेया, होर तेस किन्हें बोल्या; अगर तू परमेसरा रा पुत्र आ, ता आपणे आपा जो एथी ले हेठा जो सट्टी दे।¹⁰ क्युंकि ये लिखीरा, कि तेस तेरे बारे मन्झ स्वर्गदूता जो हुकम देणा, कि स्यों तेरी रक्षा करे।¹¹ होर तिन्हा तुस्से हाथो हाथ चकी लैणे ऐहडा नी हो कि, तेरे पैरा मन्झ पात्थरा किन्हें ठेस लगे।¹² यीसू ए तेस जो जबाब दितेया; ये भी बोलिरा, कि तू आपणे प्रभु, परमेसरा री परखणी देख्या करदा।¹³ जेबे सैतान परखणी करी बैठेया, ता थोहडी देरा रे कठे तेस वाले ले चली गया।¹⁴ फेरी यीसू आत्मा री सामर्था ले भहरी किन्हें गलीला जो वाप्स चली गया, होर तेसरी गल्ला ओरले परले सारे देसा मन्झ फैहली गयी।¹⁵ होर से तिन्हारी धर्म सभा मन्झ ई उपदेस देंदा रह्या, होर सभ तेसरी जै जै कार करहा ऐ थे।¹⁶ होर से नासरता मन्झ आया; जेथी जे तेसरा पालण पोसण हुई रा था; होर से आपणे रीति रवाजा रे मुताबक सब्ता रे ध्याडे धर्म सभा मन्झ जाई किन्हें पढने रे कठे खहडेया।¹⁷ यसायाहा नबी री क्ताब तेस जो दीती, होर तिने कताब खोल्ही किन्हें, से जगह काढी जेथी जे ये लिखीरा था।¹⁸ कि प्रभु रा आत्मा मरे ऊपर आ, इधी कठे कि तिने मुंजो कंगाला जो सुसमाचार सुणाणे रे कठे मेरा अभिषेक कितिरा, होर मुंजो इधी कठे भेजिरा, कि गुलामा जो छुटकारे रा होर काणेया जो नजर पाणे रा सुसमाचार प्रचार करूं होर जो दभिरे ऐ तिन्हा जो छुडाऊं।¹⁹ होर प्रभु रे खुस रहणे रे साला रा प्रचार करूं।²⁰ तेबे तिने क्ताब बंद करी किन्हें सेवका रे हाथा मन्झ देई दिती, होर बैठी गया; होर धर्म सभा रे सभ लोका री हाखिया तेस पर लगी री थी।²¹ तेबे से तिन्हा किन्हें बोल्दा लग्या, कि आज ई ये लेख तुस्सारे साम्हणे पूरा हुई गया।²² होर सभिण तेसरी बडाई किती, होर जो गल्ला तेसरे मुंहा ले निकळहा ई

थी, तिन्हा वचना जो सुणी किन्हें स्यों हरान थे; होर स्यों बोल्दे लगे, क्या ये युसूफा रा म्हठा नी आ? ²³ तिने तिन्हा किन्हें बोल्या; तुस्सा मेरे किन्हें ये कहावत जरूर बोलणी, कि हे बैदा, आपणे आपा जो ठीक कर! जो कुछ आस्से सुणेया कि जेहडा तैं कफरनहुमा मन्झ कितेया तेता जो एथी आपणे देसा मन्झ भी कर।²⁴ होर तिने बोल्या; हांऊ तुस्सा किन्हें सच सच बोल्ला, कोई नबी आपणे देसा मन्झ मान सम्मान नी पांदा।²⁵ होर हांऊ तुस्सा किन्हें सच सच बोल्ला, कि एलियाहा रे टैमा मन्झ जेबे साढे त्राय साला तक सर्ग बंद रह्या, एथी तक कि सारे देसा मन्झ बौहत बडा अकाल पया, तेथी इस्त्राएला मन्झ बौहत सारी विधवा थी।²⁶ पर एलियाहा जो, सैदा रे सारपता मन्झ रहणे वाळी विधवा जो छाडी किन्हें तिन्हा मंझा ले केसी होरी वाले नी भेज्या गया।²⁷ होर एलिशा नबी रे टैमा इस्त्राएला मन्झ बौहत कोढी थे, पर नामान सुरयानी जो छाडी किन्हें तिन्हा मंझा ले कोई होर सुद्ध नी कितेया गया।²⁸ ये गल्ला सुणदे ही जितने लोक आराधनालया मन्झ थे, सभ गुस्से किन्हें भहरी गये।²⁹ होर तिन्हे उठी किन्हें तेस जो नगरा ले बाहर काढी दितेया, होर जेस पाहडा पर तिन्हारा नगर बस्सी रा था, तेता री चोटी पर तेस जो लई गये, ताकि स्यों तेस जो तेथी ले हेठा जो सट्टी दे।³⁰ पर से तिन्हारे बीचा मंझा ले बची निकळी किन्हें चली गया।³¹ फेरी से गलीला रे कफरनहुम नगरा मन्झ गया, होर से सब्ता रे ध्याडे तिन्हा लोका जो उपदेस देया करहा था।³² स्यों तेसरे उपदेसा ले बौहत हरान हुई गये क्युंकि तेसरा वचन अधिकारा समेत था।³³ आराधनालया मन्झ एक माहणु था, जेस मन्झ जे दुष्टात्मा थी।³⁴ से जोरा किन्हें चिन्गेया, हे यीसू नासरी, आस्सा जो तुध किन्हें क्या काम आ? क्या तू आस्सा जो नास करने रे कठे आईरा? हांऊ तुजो जाणहा आ तू कुणहां? तू परमेसरा रा पवित्र माहणु आ।³⁵ यीसूए तेस जो झिडकी किन्हें बोल्या, चुप रहः होर तेस मंझा ले निकळी जा: तेबे दुष्टात्मा तेस जो मन्झ भर पटकी किन्हें बगैर नुकसान किते तेस मंझा ले निकळी गई।³⁶ एता पर सभी जो हरानी हुई, होर स्यों आपु मन्झ गल्ला करी किन्हें बोल्दे लगे, ये केहडा वचन आ? कि से हका होर सामर्था साउगी असुद्ध आत्मा जो हुकम देहां, होर स्यों निकळी जाहीं।³⁷ होर चार किनारे होर हर जगहा तेसरी धूम मची गयी।³⁸ से आराधनालय मंझा ले उठी किन्हें समौना रे घरा जो गया होर समौना री सासा जो बुखार चहडी रा था, होर तिन्हे तेस्सा रे कठे तेस ले अरज किती।³⁹ तिने तेस्सा रे नेडे खहडी किन्हें बुखारा झिडकेया होर से बुखार तेस्सा परा ले उतरी गया होर से झटपट उठी किन्हें तेसरी सेउआ टैहल करदी लगी।⁴⁰ होर जेबे सूरज डुब्बेआ करहा था, तेथी बौहत लोक कई तरहा री बमारीया मन्झ पडिरे थे, स्यों सभ तिन्हा जो तेस वाले लई आये, होर तिने एकी एकी पर हाथ रखी किन्हें तिन्हा

जो ठीक कितेया।⁴¹ होर दुष्टात्मा बड़ी भारी चिन्हादी लगी होर ये बोल्दी लगी कि तू परमेसरा रा म्हठा आ, होर स्यों कईया मंझा ले निकळी गयी, पर से तिन्हा जो झिडकहा था होर तिन्हा जो बोळणे नी देंदा था, क्युंकि स्यों जाणहां ऐं थे कि से मसीह आ।⁴² जेबे ध्याडा हुई गया ता से जंगला जो चली गया, होर भीडा री भीड तेस जो टोळी किन्हें तेस वाले आई होर तेस जो रोक्दी लगी, कि आस्सा वाले ले मत जा।⁴³ पर तिने तिन्हा किन्हें बोल्या; मुंजो होर भी नगरा मन्झ जाई किन्हें परमेसरा रा सुसमाचार सुणाणा जरूरी आ, क्युंकि हांऊ एता रे कठे भेजीरा।⁴⁴ होर से गलीला रे आराधनालया मन्झ प्रचार करदा रैहया।

5¹ जेबे भीड तेस पर पया करहा ई थी, होर परमेसरा रा वचन सुणहां ई थी, होर से गन्नेसरेता री झीला रे बाहडे खहडी रा था, ता एहडा हुआ।² कि तिने झीला रे बाहडे दो किस्तिया लगीरी देखी, होर मछ्वारे तिन्हा किस्तिया परा ले उत्तरी किन्हें जाल धोया करहा ऐं थे।³ तिन्हा किस्तिया मंझा ले एकी किस्ती पर जेहडी समौना री थी, तेता पर चहडी किन्हें, तिने तेस किन्हें बोल्या, कि किस्ती जो बाहडे ले थोहडा जे दूर टह्राई ले, तेबे से बैठी किन्हें लोका जो किस्तिया प्रयाहले ले उपदेस देंदा लग्या।⁴ जेबे से गल्ला करी चुक्केया, ता तिने समौना किन्हें बोल्या, आपणी किस्ती जो डूबे जे पाणी वाले लई चल, होर मछी पकडने रे कठे जाल पाई दे।⁵ समौने तेस जो जबाब दितेया, कि हे स्वामी, आस्से सारी रात बडी मैहनत किती होर कुछ नी पकडेया; पर तेबे बी तेरे बोळने ले हांऊ जाल पाई देहां।⁶ तेबे तिन्हे ऐहडा कितेया, तिन्हे बौहत सारी मछिया पकडी लई, होर तिन्हारे जाल फटदे लगे।⁷ एता पर तिन्हे आपणे साथिया जो, जो दूजी किस्तिया पर थे, इशारा कितेया, कि आई किन्हें मदद करा; होर तिन्हे आई किन्हें, दो किस्तिया एथी तक भरी लई कि स्यों डूबदी लगी।⁸ ये देखी किन्हें समौन पतरस यीसू रे पैरा पर पई गया, होर बोल्या; हे प्रभु, मेरे वाले ले चली जा, क्युंकि हांऊ ता एक पापी माहणु आं।⁹ क्युंकि इतनी सारी मछिया पकडने पर तेस जो होर तेसरे साथिया जो बौहत हरानी हुई।¹⁰ होर तिहां ई जब्दी रे म्हठे याकुबा होर यहूना जो भी, जो सिमौना रे साथी थे, तेबे यीसुए समौना किन्हें बोल्या, मत डर: एभे ले तुध माहणुआं जो जीउंदे पकडेया करणा।¹¹ होर स्यों किस्तिया जो बाहडे लई आए होर सब कुछ छाडी किन्हें तेसरे पीछे हुई गये।¹² जेबे से केसी नगरा मन्झ था, ता देखा, तेथी एक माहणु था जो कोहडा किन्हें भहरी रा था, होर यीसू जो देखी किन्हें से आपणे मुहां रे भारे पया, होर अरज किती, कि हे प्रभु अगर तू चाहे ता मुंजो सुद्ध करी सकहा।¹³ तिने आपणा हाथ बढाई किन्हें से छुही लया होर बोल्या हांऊ चाहं कि तू सुद्ध हुई जा: होर तेसरा कोढ झटपट दूर हुई

गया।¹⁴ तेबे तिने से खबरदार कितेया, कि केसी किन्हें देख्या बोल्दा, पर याजका जो जाई किन्हें आपणे आपा जो दस, होर आपणे सुद्ध हुणे रे बारे मन्झ जो कुछ मुसे चढाउवा बोलिरा तेस जो चढा, ताकि तिन्हा पर गुआही हो।¹⁵ पर तेसरी चर्चा होर भी फैहल्दी गयी, होर भीडा री भीड तेस ले सुणने रे कठे होर आपणी ब्मारीया ले ठीक हुणे रे कठे, कठी हुई।¹⁶ पर से जंगला मन्झ लग जे जाई किन्हें प्रार्थना करदा रैहया था।¹⁷ होर एक ध्याडे ऐहडा हुआ कि से उपदेस देया करहा था, होर फरीसी होर व्यवस्थापक तेथी बैठीरे थे, जो गलीला होर यहूदिया रे हर एक ग्राऊंआ ले, होर यरूस्लेमा ले आईरे थे; होर ठीक करने रे कठे प्रभु री सक्ति तेस साउगी थी।¹⁸ होर देखा, कई लोक एक माहणु जो, जो लकवे रा मरीज था, से मांजे प्रयाहले चकी किन्हें ल्यान्देया, होर स्यों तेस जो अन्दर ले जाणे होर यीसू रे साम्हणे ल्याऊणे रा उपाय करदे रहे।¹⁹ होर जेबे भीडा री वजहा ले तेस जो अन्दर नी लई जाई सके ता तिन्हे छापरा प्रयाहले चहडी किन्हें होर खपरैल टह्राई किन्हें, तेस जो सण मांजे बीचो बीच मन्झ भर यीसू रे साम्हणे तुआरी दितेया।²⁰ तिने तिन्हारा विस्वास देखी किन्हें तेस किन्हें बोल्या; माहणुआं, तेरे पाप माफ हुई गये।²¹ तेबे साख्री होर फरीसी बैहस करदे लगे, कि ये कुण आ, जो परमेसरा रा अपमान करहा? परमेसरा जो छाडी किन्हें कुण पापा जो माफ करी सकहा? ²² यीसुए तिन्हारे मना री गल जाणी किन्हें, तिन्हा किन्हें बोल्या कि तुसे आपणे मना मन्झ क्या बैहस करहा करहा ऐं? ²³ असान क्या आ? क्या ये बोलणा, कि तेरे पाप माफ हुई गये, या ये बोलणा कि उठ, हांडदा लग ²⁴ पर इधीकठे कि तुसे जाणी सको कि माहणु रे पुत्रा जो धरती पर पाप माफ करणे रा भी हक आ (तिने तेस लकवे रे मरीजा किन्हें बोल्या) हांऊ तुध किन्हें बोल्हा, उठ होर आपणा मांजा चकी किन्हें आपणे घरा जो चली जा।²⁵ से झटपट तिन्हारे साम्हणेले उठेया, होर जेस पर जे से लेटिरा था तेस जो चकी किन्हें, परमेसरा री बडाई करदा हुआ आपणे घरा जो चली गया।²⁶ तेबे सब हरान हुए होर परमेसरा री जय जय कार करदे लगे, होर बौहत डरी किन्हें बोल्दे लगे, कि आज आसे नौखी गल देखी।²⁷ होर तेता ले बाद से बाहर गया, होर लेवी नांऊआं रे एक चुंगी लैणे वाळे जो चुंगी री चौकी पर बैठीरे देख्या, होर तेस किन्हें बोल्या, मेरे पीछे चली पऊ।²⁸ तेबे से सभ कुछ छाडी किन्हें उठेया, होर तेसरे पीछे चली पया।²⁹ होर लेविये आपणे घरा मन्झ तेसरे कठे बौहत बडी दावत किती; होर चुंगी लैणे वाळेया री होर जेहडे तेस साउगी खाणा खांदे बैठीरे थे एक बौहत बडी भीड थी।³⁰ होर फरीसी होर तिन्हारे साख्री तेसरे चेले किन्हें ये बोली किन्हें कुडकूडान्दे लगे, कि तुस्से चुंगी लैणे वाळे होर पापिया साउगी किधियो खाहें पीहां ऐं? ³¹ यीसुए तिन्हा जो जबाब दितेया; कि बैदा री जरूरत भले चंगे

जो नी हुन्दी, पर तिन्हा जो बैदा री जरुरत ई जो बीमार ऐ।
 32 हांऊ धर्मिया रे कठे नी, पर पापिया जो मन फिराणे रे कठे साददा आईरा। 33 होर तिन्हे तेस किन्हें बोल्या, यहुन्ने रे चले ता बराबर उपवास रख्हा ऐ होर प्रार्थना करहा ऐ, होर तिहां ई फरिसिया रे भी, पर तेरे चले ता खाहें पीहां ऐं? 34 यीसुए तिन्हा किन्हें बोल्या; जेबे तक दूल्हा तिन्हा साउगी आ, क्या दुल्हे रे बरातीया उपवास करणा? 35 पर स्यों ध्याड़े आऊणे, जेबे जे दूल्हा तिन्हा ले लग कितेया जाणा, होर तेबे तिन्हा, तिन्हा ध्याड़े मन्झ उपवास करणा। 36 तिने एक होर दृष्टान्त भी तिन्हा किन्हें बोल्या; कि कोई माहणु नंऊए कपड़े मंझा ले कपड़ा छेकी किन्हें पुराणे कपड़ेया मन्झ टाहली नी लग्नादा, नी ता नौई टाहली फटी जाणी होर से टाहली पुराणे कपड़ेया साउगी मेल नी खांदी। 37 होर कोई नंऊए दाखरसा जो पुराणी मशका मन्झ नी भरदा, नी ता नंऊए दाखरसा किन्हें मशका फटी जाणी होर दाखरसा खिंडही जाणा होर मशका रा भी नास हुई जाणा। 38 पर नंऊआं दाखरस नौई मशका मन्झ भरणा चाहिए 39 कोई माहणु पुराणा दाखरस पी किन्हें नंऊआं नी चाहन्दा क्यूंकि से बोल्हा कि पुराणा ई ठीक आ।

6 फेरी से सब्ता रे ध्याड़े डोहरिया मंझा ले हुई किन्हें जाया करहा था, होर तेसरे चले बालें तोड़ी तोड़ी किन्हें, होर हाथा किन्हें मळी मळी किन्हें खांदे जाहें थे। 2 तेबे फरीसीया मंझा ले कई बोल्दे लगे, तुस्से तेस कामा जो किधियो करहा ऐ, जेस जो सब्ता रे ध्याड़े मन्झ करना ठीक नी आ? 3 यीसुए तिन्हा जो जबाब दितेया; क्या तुस्से ये नी पढ़ेया, कि दाऊदे जेबे से होर तेसरे साथी भूखे थे ता तिन्हे क्या कितेया? 4 से परमेसरा रे घरा जो किधियो गया, होर भेंटा री रोटिया खाहदी, तिन्हा रोटिया जो याजका जो छाडी किन्हें कोई होर खाए से ठीक नी आ, होर तिने आपणे साथिया जो भी दिती? 5 होर तिने तिन्हा किन्हें बोल्या; माहणु रा पुत्र सब्ता रे ध्याड़े रा प्रभु आ। 6 होर ऐहडा हुआ कि केसी होर सब्ता रे ध्याड़े से आराधनालय मन्झ जाई किन्हें उपदेस देंदा लग्या; होर तेथी एक माहणु था, जेसरा जे सीधा हाथ सुकी गईरा था यानि तेसरा सीधा हाथ बेजान हुई गईरा था। 7 साखी होर फरीसी तेस पर दोष लगाने री ताका मन्झ थे, देख्हा ऐं कि से सब्ता रे ध्याड़े तेस जो ठीक करहा कि नी। 8 पर से तिन्हारे विचार जाण्हा था; एता कठे तिने तेस सुकिरे हाथा यानी तेस बेजान हाथा वाळे माहणु किन्हें बोल्या; उठ, मंझ भर खडा हुई जा: से उठी किन्हें खडा हुई गया। 9 यीसुए तिन्हा किन्हें बोल्या; हांऊ तुस्सा ले ये पुछ्हा कि सब्ता रे ध्याड़े क्या करणा ठीक आ, खरा करणा या बुरा करणा? 10 होर तिने चहुँ किनारे तिन्हा सभी जो देखी किन्हें तेस आदमी किन्हें बोल्या; आपणा हाथ अगे कर: तिने तेहडा ई कितेया, होर तेसरा हाथ ठीक हुई गया। 11 पर स्यों आपे ले

बाहर हुई गये होर बैहस करदे लगे कि आस्से यीसू किन्हें क्या करिए? 12 होर तिन्हा ध्याड़े से पाहडा पर प्रार्थना करने रे कठे निकळेया, होर तिने परमेसरा रे कठे सारी रात प्रार्थना करदे करदे बिताई दिती। 13 जेबे ध्याड़ा सुहरू हुई गया, ता तिने आपणे चले जो सादी किन्हें तिन्हा मंझा ले बारा चले छांटी लये, होर तिने तिन्हा जो प्रेरित बोल्या। 14 होर स्यों यूँ ऐं, समौन जेस रा नांऊ जे तिने पतरस भी रख्या था; होर तेसरा भाई अन्द्रियास होर याकूब होर यहुन्ना होर फिलिप्पुस होर बरतुलमै। 15 होर मत्ती होर थोमा होर हलफई रा म्हठा याकूब होर समौन जेस जो जे जेलोतेस भी बोल्हा ऐ। 16 होर याकूबा रा म्हठा यहूदा होर यहूदा इसकरयोती, जो यीसू जो पकड़वाणे वाळा बणेया। 17 तेबे से तिन्हा साउगी उतरी किन्हें चौरस जगहा मन्झ खहड़ेया, होर तेसरे चलेया री बडी भीड़, होर सारे यहूदिया होर यरूस्लेमा होर सुर होर सैदा रे द्रयाऊआ रे बाहडे बौहत सारे लोक, जो तेसरी सुणने होर आपणी बमारीया ले ठीक हुणे रे कठे तेस वाले आईरे थे, तेथी थे। 18 होर बुरी आत्मा रे स्ताईरे लोका जो भी ठीक करहा ऐ थे। 19 होर सभ तेस जो छुहणा चाहें थे, क्यूंकि तेस मंझा ले सक्ति निकळी किन्हें सभी जो ठीक करहा ई थी। 20 तेबे तिने आपणे चलेया री तरफ देखी किन्हें बोल्या; भागा वाळे ऐ तुस्से, जेहडे मना रे दीन ऐ, क्यूंकि परमेसरा रा राज तुस्सारा आ। 21 भागा वाळे ऐ तुस्से, जो एभे भूखे ऐ; क्यूंकि तुस्से रजाए जाणे; भागा वाळे ऐ तुस्से, जेहडे एबे रोआं ऐं, क्यूंकि तुस्सा हास्णा। 22 भागा वाळे ऐ तुस्से, जेबे माहणु रे पुत्रा री वजहा ले लोका तुस्सा किन्हें बैर करणा, होर तुस्से काडी देणे, होर तुस्सा री बेज्जती करणी, होर तुस्सा रा नांऊ बुरा जाणी किन्हें काटी दितेया जाणा। 23 तेस ध्याड़े तुस्सा खुस हुई किन्हें उछलणा, क्यूंकि देखा, तुस्सा रे कठे स्वर्गा मन्झ बडा ईनाम आ: तिन्हारे बाब दादे नबिया साउगी भी तेहडा ई करहा ऐ थे। 24 पर हाय तुस्सा पर; जो अमीर ऐ, क्यूंकि तुस्से आपणी सांति पाई चुके। 25 पर हाय तुस्सा पर; जो एभे रजीरे, क्यूंकि तुस्सा भूखे रैहणा, हाय तुस्सा पर: जो एभे हासा ऐ, क्यूंकि तुस्सा शोक करणा होर रोणा। 26 हाय, तुस्सा पर; जेबे सब लोक तुस्सा जो खरा बोले, क्यूंकि तिन्हारे बाब दादे झूठे नबिया साउगी भी तेहडा ई करहा ऐ थे। 27 पर हांऊ तुस्सा सुणने वाळेया किन्हें बोल्हा, कि आपणे दुसमना किन्हें प्यार रखा; जो तुस्सा किन्हें नफरत करे, तिन्हारे भला करा। 28 जो तुस्सा जो श्राप दे, तिन्हा जो तुस्से आसिरवाद देआ: जो तुस्सा री बेज्जती करे, तिन्हारे कठे प्रार्थना करा। 29 जो तेरे चेहरे री एक तरफ थप्पड़ मारे तेस वखा दूजा भी फेरी दे; होर जो तेरी दोहर लई ले, तेस जो कुरता लैणे ले भी नी रोक। 30 जो कोई तुध ले मांगे, तेस जो दे; होर जो तेरी चीज़ा लई ले तेस ले दबारा वाप्स नी मांग। 31 होर जेहडा तुस्से चाहें

कि लोक तुस्सा साउगी करे, तुस्से भी तिन्हा साउगी तेहडा ई करा।³² अगर तुस्से आपणे प्यार रखणे वाळेया किन्हें ई प्यार रखघे, ता तुस्सा री तेता मन्झ क्या बडाई हुई? क्यूंकि पापी भी आपणे प्यार रखणे वाळेया किन्हें प्यार रक्खा ऐ।³³ होर अगर तुस्से आपणे भलाई करणे वाळेया साउगी ई भलाई करहा ऐ, ता तुस्सा री तेता मन्झ क्या बडाई हुई? क्यूंकि पापी भी ता ऐहडा ई करहा ऐ।³⁴ होर अगर तुस्से तिन्हा जो धुआर देहां ऐं, जिन्हा ले दबारा वाप्स पाणे री आस रखो, ता तुस्सा री तेता मन्झ क्या बडाई? क्यूंकि पापी पापिया जो धुआर देहां ऐं, ताकि तितना ई फेरी दबारा वाप्स पाई सको।³⁵ बल्कि आपणे दुसमना किन्हें प्यार रक्खा, होर भलाई करा: होर दबारा वाप्स पाणे री आस नी रक्खी किन्हें धुआर देआ: होर तुस्सा रे कठे बडा फल हुणा; होर तुस्सा परम प्रधाना री संतान बणना, क्यूंकि से तिन्हा पर जो धन्यवाद नी करदे होर बुरे ऐ से तिन्हा पर भी कृपालु आ।³⁶ जेहडा तुस्सा रा पिता दयालु आ, तिहां ई तुस्से भी दयालु बणा।³⁷ दोष मत लगाऊवा; ता तुस्सा पर भी दोष नी ल्याया जाणा: दोषी नी ठैहराऊवा, ता तुस्से भी दोषी नी ठैहराये जाणे; माफ़ करा ता तुस्से भी माफ़ किते जाणे।³⁸ देआ करा, ता तुस्सा जो भी दितेया जाणा: लोका तुस्सा जो पूरा नापी किन्हें, दबाई दबाई किन्हें होर हिलाई हिलाई किन्हें दली किन्हें तुस्सा री गोदा मन्झ पाणा, क्यूंकि जेस नापा किन्हें तुस्से नाप्घे, तेस नापा ले ई तुस्सा रे कठे भी नाप्पेया जाणा।³⁹ फेरी तिने तिन्हा किन्हें एक दृष्टान्त बोल्या; क्या काणा, काणे जो रस्ता दसी सकहा? क्या तिन्हा दुहिया गढहे मन्झ नी पऊणा? ⁴⁰ चेला आपणे गुरु ले बडा नी आ; पर जेबे तेस सिद्ध हुई जाणा, ता तेस आपणे गुरु साहीं बणी जाणा।⁴¹ तू आपणे भाई री हाखी रे तिनके जो किधियो देख्हा, होर आपणी हाखिया रा आल्हा तुजो नी सुझदा? ⁴² होर जेबे तू आपणी हाखिया रा आल्हा नी देख्दा, ता तू आपणे भाई किन्हें किधियो बोल्हा, भाई, रुकी जा तेरी हाखिया ले हांऊ तिनका काढी देंऊ? हे पाखंडी, पैहले आपणी हाखी ले आल्हा काहड, तेबे जेहडा तिनका तेरे भाई री हाखी मन्झ आ, तू भली भांति काढी सकहा।⁴³ कोई खरा डाळ नी आ, जो बुरा फल ल्याए, होर ना ता कोई बुरा डाळ आ, जो खरा फल ल्याए।⁴⁴ हरेक डाळ आपणे फला ले पैहचाणया जाहां; क्यूंकि लोक झाडिया ले अंजीर नी तोड़दे, होर ना झड़बेरी ले अंगूर।⁴⁵ भला माहणु आपणे मना रे भले भंडारा ले खरी खरी गल्ला काढहा; होर बुरा माहणु आपणे बुरे भण्डारा ले बुरी गल्ला काढहा आ; क्यूंकि जेहडा मना मन्झ भहरी रा तेहडा ई मुँहा पर आहुंआं।⁴⁶ जेबे तुस्से मेरा ग्लाईरा नी मनदे, ता तुस्से मुंजो हे प्रभु, हे प्रभु किधियो बोल्हा ऐ? ⁴⁷ जो कोई मेरे वाले आहुंआं होर मेरी गल्ला सुणी किन्हें तिन्हा जो मन्हा, हांऊ तुजो दस्हा कि से केस साहीं आं? ⁴⁸ से तेस

माहणु साहीं आं, जिने जे घर बनाणे रे टैमा जमीन डूधी खणी किन्हें चट्टाना प्रयाहले नीऊ पाई, होर जेबे बाढ आई ता धारा तेस घरा पर लगी, पर तेस जो हिलाई नी सकी; क्यूंकि से पक्का बणी रा था।⁴⁹ पर जो सुणी किन्हें नी मनदा, से तेस माहणु साहीं आं, जिने जे माटे प्रयाहले बगैर नीऊआं रा घर बणाया। जेबे तेस पर धारा बजी, ता से झटपट पई गया; होर से पई किन्हें सत्यानास हुई गया।

7¹ जेबे से लोका जो आपणी सारी गल्ला सुणाई चुक्या, ता से कफरनहुमा मन्झ आया।² होर तेथी एक सूबेदार था जेसरा दास इतना बमार था कि से मरणे ई वाळा था, से दास तेसरे कठे बौहत प्यारा था।³ तिने यीसू री चर्चा सुणी किन्हें यहूदिया रे कई पुरनिये तेस वाले ये अरज करने रे कठे तेस वाले भेजे, कि से आई किन्हें तेसरे दासा जो ठीक कर।⁴ स्यों यीसू वाले आई किन्हें तेस किन्हें बड़ी मिन्नत करदे लगे, से एस लायक आ, कि तू तेसरे कठे ये करे।⁵ क्यूंकि से आस्सा री जाति किन्हें प्यार रक्खा होर तिने ई आस्सा रे आराधनालया जो बणाईरा।⁶ होर यीसू तिन्हा साउगी चली गया, होर जेबे से घरा ले ज्यादा दूर नी था, ता सुबेदारे तेस वाले कई दोस्ता रे ज़ीये संदेसा भेजेया, कि हे प्रभु दुःख नी उठा, क्यूंकि हांऊ एस लायक नी आ, कि तू मेरे छापपरा थाले आए।⁷ एता कठे मैं आपणे आपा जो एस लायक भी नी समझ्या, कि हांऊ तेरे वाले आंऊ, पर सिर्फ वचन ही बोली दे ता मेरे दासा ठीक हुई जाणा।⁸ हांऊ आपु केसी अधिकारी हेठ काम करणे वाळा माहणु आ; होर स्पाही मेरे हाथा मंझ ऐ, होर जेबे हांऊ एकी जो बोल्हा, जा, ता से चली जाहां, होर दूजे जो बोल्हा कि आऊ, ता से आंहुआं; होर आपणे केसी दासा जो बोल्हा कि ये कर, ता से करहा।⁹ ये सुणी किन्हें यीसु जो हरानी हुई, होर तिने मुंह फेरी किन्हें तेस्सा भीडा किन्हें जो तेसरे पीछे पीछे आया करहा ई थी बोल्या, हांऊ तुस्सा किन्हें बोल्हा, कि मैं इस्त्राएला मन्झ भी ऐहडा विस्वास नी पाया।¹⁰ होर जो लोक सुबेदारे भेजिरी थे, तिन्हे घरा जाई किन्हें तेस दासा जो भला चंगा पाया।¹¹ थोहडे ध्याडे ले बाद से नाईन नांऊआं रे एक नगरा जो गया, होर तेसरे चेले, होर बडी भीड भी तेस साउगी चली।¹² जेबे से नगरा रे फाटका वाले पुज्जेया, ता देखा, लोक एक मुरदे जो बाहर लई जाया करहा ऐ थे; जो आपणी माऊआ रा कल्हा कल्हा म्हठा था, होर से एक विधवा थी; होर नगरा रे बौहत सारे लोक तेस्सा साउगी थे।¹³ तेस्सा जो देखी किन्हें प्रभु जो तरस आया, होर तिने तेस्सा किन्हें बोल्या; रो मत।¹⁴ तेबे तिने नेडे जे आई किन्हें अर्थी छुही; होर अर्थी चकणे वाळे रुकी गये, तेबे तिने बोल्या; हे जुआन, हांऊ तुजो बोल्हा, उठ! ¹⁵ तेबे से मुर्दा उठी बैठया, होर बोल्दा लग्या: होर तिने से तेसरी माऊआ जो सौपी दितेया।¹⁶ ये देखी किन्हें सभ लोका पर डर छाई गया; होर

स्यों परमेसरा री बड़ाई करी किन्हें बोल्दे लगे कि आस्सा मन्झ एक बडा नबी आई गईरा, होर परमेसरे आपणे लोका पर कृपा दृष्टि किति। 17 होर तेसरे बारे मन्झ ये गल सारे यहूदिया होर ओरले परले, नेडे रे सारे देसा मन्झ फैल्ही गयी। 18 होर तेसरे चले आई किन्हें यहून्ना जो इन्हा गल्ला रा समाचार दितेया। 19 तेबे यहून्ने आपणे चले मंझा ले दो जण सादी किन्हें स्यों प्रभु वाले ये पूछणे रे कठे भेजे कि आऊणे वाळे तुस्से ई ऐ, कि आस्से केसी होरी जो न्हयाळिये? 20 तिन्हे तेस वाले आई किन्हें बोल्या, यहून्ना बसिस्मा देणे वाळे आस्से तेरे वाले ये पुछणे रे कठे भेजिरे, कि आऊणे वाळे तुस्से ई ऐ, कि आस्से केसी होरी जो न्हयाळिये? 21 तेस ई टैम तिने कईया जो बमारिया; होर पीडा, होर दुष्टात्मा ले छुडाया; होर बौहत सारे काणे लोका जो हाखिया दिती। 22 होर तिने तिन्हा किन्हें बोल्या; जो कुछ तुस्से देख्या होर सुणेया, जाई किन्हें यहून्ना किन्हें बोली देआ; कि काणे देख्या ऐ, लंगडे चल्हा फिरहा ऐ, कोढी सुद्ध किते जाहें, होर कंगाला जो सुसमाचार सुणाया जाहां। 23 होर भागा वाळा आ से, जेस जे मेरी वजहा ले ठोकर नी खाणी। 24 जेबे यहून्ना रे भेजिरे लोक चली गये, ता यीसू यहून्ना रे बारे मन्झ लोका किन्हें बोल्दा लग्या, तुस्से जंगला मन्झ क्या देख्दे गयीरे थे? क्या बागरा किन्हें हिल्दे हुए सरकंडे जो? 25 ता फेरी तुस्से क्या देख्दे गयीरे थे? क्या नर्म कपडे पैहनीरे माहणु जो? देखा, जो भडकीले कपडे पैन्हा ऐ, होर सुख विलासा किन्हें रैंहां ऐं, स्यों राजभवना मन्झ रैंहां ऐं। 26 ता फेरी तुस्से क्या देख्दे गईरे थे? क्या केसी नबी जो? हां, हांऊ तुस्सा किन्हें बोल्हा, बल्कि नबी ले भी बडे जो। 27 ये से ई आ, जेसरे बारे मन्झ लिखीरा, कि देखा, हांऊ आपणे दूता जो तेरे अगे अगे भेज्हा, जेस तेरे अगे अगे रस्ता ठीक करणा। 28 हांऊ तुस्सा किन्हें बोल्हा, कि जो जनाने ले जम्मीरे, तिन्हा मंझा ले यहून्ना ले बडा कोई नी आ: पर जो परमेसरा रे राजा मन्झ, छोटे ले भी छोटा आ, से तेस ले भी बडा आ। 29 होर तेबे सभिए सुणी किन्हें एथी तक कि चुंगी लैणे वाळे भी यहून्ने रा बसिस्मेजो लई किन्हें परमेसरा जो सच्चा मनी लया। 30 पर फरिसिये होर व्यवस्थापके तेस ले बसिस्मा नी लई किन्हें परमेसरा री इच्छा जो, आपणे बारे मन्झ टाळी दितेया। 31 एता कठे हांऊ एस जमाने रे लोका री तुलना केस साउगी करूँ कि स्यों केस साहीं ऐं? 32 स्यों तिन्हा बच्चेया साहीं ऐं जो बजारा मन्झ बैठीरे एक दूजे किन्हें चिंगी चिंगी किन्हें बोल्हा ऐ, कि आस्से तुस्सा रे कठे बौसरी बजाई, होर तुस्से नी नाचे, आस्से रोये, पर तुस्से नी रोये। 33 क्यूंकि यहून्ना बसिस्मा देणे वाळा ना रोटी खांदा आया, होर ना दाखरस पींदा आया; होर तुस्से बोल्हा ऐ, कि तेस मन्झ दुष्टात्मा ई। 34 माहणु रा पुत्र खांदा पींदा आया; होर तुस्से बोल्हा ऐ, कि देखा, पेटू होर पियक्कड माहणु, चुंगी लैणेवाळेया रा होर पापिया रा दोस्त।

35 पर जाना री खराई ता तेसरे फला ले ई सिद्ध हुणी। 36 फेरी केसी फरिसिये तेस किन्हें अरज किति, कि मेरे साउगी खाणा खाऊआ; इधीकठे से तेस फरीसी रे घरा मन्झ जाई किन्हें खाणा खांदे बैठया। 37 होर देखा, तेस नगरा री एक पापण जनाने ये जाणी किन्हें कि से फरीसी रे घरा मन्झ खाणा खांदे बैठीरा, संगमरमरा रे भांडे मन्झ इतर ल्याई। 38 होर तेसरे पैरा वाले, पीछे खहड़ी हुई किन्हें, रोंदी हुई, तेसरे पैरा जो आपणी हाखिया रे पाणी किन्हें सगदी होर आपणे मुंडा रे बाळा किन्हें पुहन्दी लगी होर तेस्से तेसरे पैरा जो बार बार चूमी किन्हें तिन्हा पर इतर मळेया। 39 ये देखी किन्हें, से फरीसी जिने जे से सादिरा था, आपणे मना मन्झ सोच्दा लग्या, अगर ये नबी हुंदा ता जाणी लैंदा, कि ये जे तेस जो छुहेया करहा ई, से कुण्ही होर केहड़ी जनाने ई? क्यूंकि से ता पापण ई। 40 ये सुणी किन्हें यीसुए तेसरे जबाबा मन्झ बोल्हा; कि हे समौन हांऊ तेरे किन्हें कुछ बोलणा चाहां, तिने बोल्या, हे गुरु बोल। 41 केसी माहजना रे दो देहणदार थे, एकी पर पांज सौ रा होर दूजे पर पन्ज्याहा दीनारा रा कर्जा था। 42 क्यूंकि स्यों कर्जा वाप्स करणे री हालता मन्झ नी थे इधी कठे तिने दया करी किन्हें स्यों दुहें माफ करी दिते; इधी कठे तिन्हा मंझा ले केस तेस किन्हें ज्यादा प्यार रखणा। 43 समौने जबाब दितेया, मेरी समझा मन्झ से, जेसरा जे तिने ज्यादा माफ कितेया: तिने तेस किन्हें बोल्या, तैं ठीक विचार कितेया। 44 होर तेस्सा जनाने री तरफा मुडी किन्हें तिने समौना किन्हें बोल्या; क्या तू एस्सा जनाने जो देख्हा? हांऊ तेरे घरा मन्झ आया पर तैं मेरे पैरा धोणे रे कठे पाणी नी दितेया, पर ऐसे मेरे पैर हाखिया रे पाणी किन्हें सगे, होर आपणे बाळा किन्हें पुहन्जे। 45 तैं मुंजो चुम्बन नी दितेया, पर जेबे ले हांऊ आईरा तेभे ले एस्से मेरे पैरा जो चूमणा नी छाडेया। 46 तैं मेरे मुंडा पर तेल नी मळेया; पर ऐसे मेरे पैरा पर इतर मळेया। 47 इधी कठे हांऊ तुध किन्हें बोल्हा; कि एस्सा रे पाप जो बौहत थे, माफ हुई गये, क्यूंकि इने बौहत प्यार कितेया; पर जेसरा थोहडा माफ हुईरा, तेस थोहडा ई प्यार करणा। 48 होर तिने तेसा जनाने किन्हें बोल्या, तेरे पाप माफ हुई गये। 49 तेबे जो लोक तेस साउगी खाणा खांदे बैठीरे थे, स्यों आपणे आपणे मना मन्झ सोचदे लगे, कि ये कुणहां आ जो पापा जो भी माफ करहा? 50 पर तिने जनाने किन्हें बोल्या, तेरे विस्वासे तू बचाई लई, सांति किन्हें चली जा।

8 1 एता ले बाद से नगरा नगरा होर गाँऊआ गाँऊआ प्रचार करदे हुए, होर परमेसरा रे राजा रा सुसमाचार सुणांदे हुए, फिरदा लग्या। 2 होर स्यों बाहर तेस साउगी थे: होर कितनी सारी जनानिया भी जो दुष्टात्मा ले होर बमारिया ले छुडाई गईरी थी, होर स्यों ये ई, मरियम जेस्सा जो मगदलीनी बोल्हा ऐ थे, जेस्सा मंझा ले जे सात दुष्टात्मा काढी गईरी थी।

³ होर हेरोदेसा रे भंडारी खोजे री लाडी योअन्ना होर सुसन्नाह होर भी बौहत सारी जनानिया: स्यों ता आपणी सम्पति किन्हें तेसरी सेउआ करहा ई थी। ⁴ जेबे बडी भीड कठी हुई, होर नगरा नगरा रे लोक तेस वाले आंहुआं ऐं थे, तिने तिन्हा किन्हें दृष्टान्ता मन्झ बोल्या। ⁵ कि एक बेजा बाहणे वाळा, बेजा बाहणे रे कठे निकळैया: होर बाहणे रे टैमा कुछ बेजा ता पैडे रे बाहडे पया होर जिखी गया, होर सर्गा रे चीडुऐ आई किन्हें से चुगी लया। ⁶ होर कुछ पाथरा वाळी ज्मीना पर पया, होर छोडे ई जम्मी गया, पर नमी नी मिलणे री वजहा ले सेसुकी गया। ⁷ होर कुछ बेजा ता झाडीया मंझ पया, होर झाडीये साउगी बढी किन्हें से दबाई दितेया। ⁸ पर कुछ बेजा बढिया ज्मीना पर पया; होर बढी किन्हें बौहत फलेया; होर बढी किन्हें तिने सौ गुणा फल ल्यान्देया: ये बोली किन्हें तिने जोरा किन्हें बोल्या; जेस वाले सुणने रे कठे कान हो, से सुणे। ⁹ तेसरे चेले तेस ले पुछेया, कि ये दृष्टान्त क्या आ? तिने बोल्या; ¹⁰ तुस्सा जो ता परमेसरा रे राजा री भेदा री समझ दितीरी, पर होरी जो दृष्टान्ता मन्झ सुणाया पहुँआं। इधी कठे कि स्यों देखदे हुए भी नी देखे, होर सुणदे हुए भी नी समझे। ¹¹ दृष्टान्त ये आ: कि बेजा ता परमेसरा रा वचन आ? ¹² पैडे रे बाहडे रे स्यों ऐं, जिन्हें जे वचन सुणेया, तेबे सैतान आई किन्हें तिन्हारे मना मंझा ले बचना जो चकी के लई जाहां, ताकि ऐहडा नी हो कि स्यों विस्वास करी किन्हें उद्धार पाई ले। ¹³ होर गट्टे वाळी ज्मीना रे स्यों ऐं, जेबे स्यों सुणहा ऐं, ता बचना जो खुसी किन्हें मन्हा ऐं, पर आपणे भीतर जड नी पकड़णने री वजहा ले स्यों थोहडे ही ध्याडे तक विस्वास रख्हा ऐ; होर सतावा रे टैमा स्यों ठोकर खाहें। ¹⁴ होर जो झाडीया मंझ बोये गईरे, यूँ स्यों ऐं जिन्हें जे वचन सुणेया, होर संसारा री चिन्ता, धन होर जिंदगी रे सुख विलासा मन्झ फसी जाहें, होर तिन्हारा फल निष्फल रही जाहां। ¹⁵ पर बढिया ज्मीना रे स्यों ऐं, जो बचना जो सुणी किन्हें खरे होर अच्छे मना ले मनी लैहां ऐं, होर सबर रखी किन्हें फल ल्याहुआं ऐं। ¹⁶ कोई भी केसी बत्ती जो भखाई किन्हें तेता जो मांजे हेठ नी रख्दा, पर से तेता जो दीवटा पर रख्हा, की आऊणे जाणे वाळे प्रयासा पाए। ¹⁷ क्यूँकि कुछ ल्हुखी रा नी आ, जो कि जाहिर नी हो; होर ना कोई एहडा रहस्य आ, जो जाणेया ना जाए, होर जाहिर नी हो। ¹⁸ इधी कठे सावधान रह्हुआ, कि तुस्से क्या सुणहां ऐं? क्यूँकि जेस वाले जे हाया, तेस जो होर दितेया जाणा; होर जेस वाले जे नी आ, तेस ले से भी लई लैणा, जेस जो स्यों आपणा मन्हा ऐं। ¹⁹ तेसरी माऊ होर भाई तेस वाले आए, पर भीडा री वजहा ले स्यों तेस किन्हें मिली नी सके। ²⁰ होर तेस किन्हें बोल्या गया, कि तेरी माऊ होर तेरे भाई बाहर खहड़ीरे होर तुध किन्हें मिलणा चाहें। ²¹ पर तिने जबाब दितेया होर तिन्हा जो बोल्या; कि मेरी माऊ होर मेरे

भाई यूँ ऐं, जो परमेसरा रा वचन सुणहां ऐं और मन्हां ऐं। ²² फेरी एक ध्याडे से होर तेसरे चेले किस्तिया पर सवार हुए, होर तिने तिन्हा किन्हें बोल्या; कि आऊआ, झीला री पारली तरफ चल्हा ऐ: होर तेबे तिन्हे किस्ती खोल्ही दिती। ²³ पर जेबे किस्ती चल्या करहा थी, से सई गया: होर झीला पर आंधी आई, होर किस्ती पाणी किन्हें भर्दी लगी होर स्यों खतरे मन्झ थे। ²⁴ तेबे स्यों यीसू वाले आये होर तिन्हे से ठुआळैया, होर बोल्या: हे स्वामी! हे स्वामी! आस्से नास हुऐआ करहा ऐ: तेबे तिने उठी किन्हें आंधी होर पाणी री लैहरा झिडकी होर स्यों थम्ही गयी, होर तेथी बडी सांति हुई गई। ²⁵ होर तिने तिन्हा किन्हें बोल्या; तुस्सा रा विस्वास केथी था? पर स्यों डरी गये, होर हरान हुई किन्हें आपु मन्झ बोल्दे लगे, ये कुणहां? जो आंधी होर पाणी जो भी हुकम देहां, होर स्यों तेस जो मन्हां ऐं। ²⁵ होर तिने तिन्हा किन्हें बोल्या; तुस्सा रा विस्वास केथी था? पर स्यों डरी गये, होर हरान हुई किन्हें आपु मन्झ बोल्दे लगे, ये कुणहां? जो आंधी होर पाणी जो भी हुकम देहां, होर स्यों तेस जो मन्हां ऐं। ²⁶ फेरी स्यों गिरासेनिया रे देसा मन्झ पूजे, जो गलीला री झीला रे पार साम्हणे था। ²⁷ जेबे से बाहडे पुज्जेया, ता तेस नगरा रा एक माहणु तेस जो मिल्या, जेस मंझ जे दुष्ट आत्मा थी होर से बौहत ध्याडे ले कपडे नी पैहणदा था होर ना घरा मन्झ रैह्यां था, पर से कबरा मंझ रैह्यां था। ²⁸ से यीसू जो देखी किन्हें चिन्गेया, होर तेसरे साम्हणे लेटी किन्हें जोरा किन्हें बोल्दा लग्या: हे परम प्रधाना रे पुत्र यीसू, मुंजो तेरे किन्हें क्या काम! हांऊ तुध ले अरज करहा, मुंजो दुःख नी दे। ²⁹ क्यूँकि से तेस्सा दुष्टात्मा जो, तेस माहणु मंझा ले निकळने रा हुकम देया करहा था, इधी कठे कि से तेस पर हाबी हूहां ई थी: होर जेबकी लोक तेस जो सांगळा होर बेडिया किन्हें बान्हा ऐं थे, तेबे भी से जंजीरा जो त्रोडी देहां था, होर दुष्टात्मा तेस मन्झ बसी गई री थी। ³⁰ होर यीसुए तिन्हा ले पुछेया, “तेरा नांऊ क्या आ?” तिने बोल्या; मेरा नांऊ सेना आ; क्यूँकि तेस मन्झ बौहत दुष्टात्मा स्माई री थी। ³¹ होर तिन्हे तेस ले बौहत अरज किती, कि से तिन्हा जो डुघे गडहे मन्झ जाणे रा हुकम नी दे। ³² तेथी पहाडा पर सुअरा रा एक बडा झुण्ड चरेया करहा था, होर तिन्हे तेसले अरज किती, कि आसा जो इन्हा सुअरा मन्झ भेजी दे, होर तिने स्यों जाणे दिते। ³³ होर तेबे असुध आत्मा तेस माहणु ले निकळी किन्हें सुअरा मंझ चली गयी होर से झुंड उग्र हुई किन्हें ढलाना परा ले लुढकदे लुढकदे झीला मन्झ पई गया, होर डूवी मरेया। ³⁴ होर तिन्हारे चरवाहे भगी गये, होर नगरा मन्झ होर गाऊआ मन्झ जाई किन्हें ये खबर दीती। ³⁵ होर जो कुछ हुऐआ था तेता जो देखणे रे कठे लोक आये, होर स्यों यीसू वाले आये, होर जेस माहणु मंझा ले जे दुष्टात्मा काढी री थी; तेस जो कपडे पैहिनी रे होर सचेत हुई किन्हें

तेथी बैठीरे देख्या, होर स्यों ये देखी के डरी गए।³⁶ होर देखणे वाळे तेस जो दस्सेया, कि से दुष्ट आत्मा रा स्तार्डरा आदमी किहां ठीक हुआ।³⁷ तेबे गिरासेनिया रे ओरले परले सब लोक तेस वाले आई किन्हें अरज करदे लगे, कि आस्सा रे लाके ले चली जा; क्यूंकि तिन्हा पर बडा डर छाई गईरा था: होर से किस्तिया मन्झ सवार किन्हें वाप्स चली गया।³⁸ जेस आदमी ले जे दुष्टात्मा काढी री थी, से यीसू ले अरज करदा लग्या, कि मुंजो आपणे साउगी रैहणे दे, पर यीसुए से वाप्स भेजी दितेया, होर तेस किन्हें बोल्या।³⁹ आपणे घरा जो वाप्स चली जा होर जाई किन्हें आपणे लोका जो दस, कि परमेसरे तेरे कठे केहडे बडे बडे काम कीते; से जाई किन्हें सारे नगरा मन्झ प्रचार करदा लग्या, कि यीसुए मेरे कठे केहडे बडे बडे काम कीते।⁴⁰ जेबे यीसू वाप्स आये, ता लोके तेसरा स्वागत कितेया; क्यूंकि स्यों सभ तेस जो न्याहळेया करहा ऐ थे।⁴⁰ जेबे यीसू वाप्स आये, ता लोके तेसरा स्वागत कितेया; क्यूंकि स्यों सभ तेस जो न्याहळेया करहा ऐ थे।⁴¹ होर देखा, याईर नांऊआं रा एक माहणु जो आराधनालया रा मुखिया था, से आया, होर यीसू रे पैरा पर पई गया होर अरज करदा लग्या, कि मेरे घरा जो चल।⁴² क्यूंकि तेसरी बारा साला री इकलौती म्हठी थी, होर से मरणे वाळी थी: जेबे से जाया करहा था, तेबे लोक तेस पर पई जाया करहा ऐ थे।⁴³ होर एक जनाने जेस्सा जो बारा साला ले खून बैहणे री बमारी थी, होर जो आपणी सारी कमाई बैदा री पीछे खर्च करी बैठी री थी होर फेरी भी से केसी रे हाथा ले ठीक नी हुई पाई थी।⁴⁴ तेस्से पीछे ले आई किन्हें तेस रे कपडे रा पूहंग छुहेया, होर झटपट तेस्सा रा खून बैहणा बंद हुई गया।⁴⁵ एता पर यीसूए बोल्या: हांऊ कुणे छुहेया? जेबे सब मुखरंदे लगे, ता पतरस होर तेसरे साथीये बोल्या: हे स्वामी, तुजो ता भीड दबाया करहा ई होर तेरे प्रयाहले पया करहा ई।⁴⁶ पर यीसूए बोल्या: केसिये हांऊ छुहेया क्यूंकि में जाणी लईरा कि मेरे मंझा ले सामर्थ निकळी।⁴⁷ जेबे जनाने देख्या, कि हांऊ ल्हुखी नी सक्दी, ता से काम्दी हुई आई, होर तेस्से तेसरे पैरा पर पई किन्हें सब लोका रे साम्हणे दस्सेया, कि में केस वजहा ले तू छुहेया, होर किहां ठीक हुई गयी।⁴⁸ तिने तेस्सा किन्हें बोल्या, बेटीये तेरे विस्वासे तू ठीक करी दिती, सांति किन्हें चली जा।⁴⁹ से ये बोल्या ही करहा था, कि केसी आराधनालया रे मुखिये रे घरा ले कोई तेथी आया होर बोल्या, तेरी म्हठी मरी गयी: गुरु जो दु:ख नी दे।⁵⁰ यीसूए सुणी किन्हें तेस जो जबाब दितेया, मत डर; सिर्फ विस्वास रख, ता से बची जाणी।⁵¹ घरा मन्झ आई किन्हें तिने जबाब दितेया पतरस होर युहन्ना होर याकुब होर मठी रे माऊ - बाबा जो छाडी किन्हें तिने होर केसी जो आपणे साउगी अन्दर नी आऊणे दितेया।⁵² होर सब तेस्सा रे कठे रोया पिटेया करहा ऐ थे, पर तिने बोल्या; रोआ मत; से

मरीरी नी ई, पर सया करहा ई।⁵³ एता पर लोके तेसरा मजाक उडाया क्यूंकि स्यों ये जाणहां ऐं थे, कि म्हठी ता मरी चुकीरी।⁵⁴ पर तिने तेस्सा रा हाथ पकडेया, होर चिल्लाई किन्हें बोल्या, म्हठिये उठी जा!⁵⁵ तेबे तेस्सा रे प्राण वाप्स आई गये होर से झटपट उठी गयी; फेरी तिने हुकम दितेया, कि तेस्सा जो कुछ खाणे जो देआ।⁵⁶ तेस्सा रे माऊ-बाब हरान हुई गये, पर तिने स्यों खबरदार किते कि ये जो कुछ भी हुएया, केसी किन्हें देख्या बोल्दे।

9¹ फेरी तिने बारा चेले सादी किन्हें तिन्हा जो सब दुष्टात्मा होर बमारीया जो दूर करणे री सामर्थ होर हक दितेया।² होर तिने स्यों परमेसरा रे राजा रा प्रचार करणे, होर बमारा जो ठीक करणे रे कठे भेजे।³ होर तिने तिन्हा किन्हें बोल्या, रस्ते रे कठे कुछ देख्या लेंदे: ना ता डंडा, ना ता झोळा, ना रोटी, ना पैसा होर ना दो दो कुरते।⁴ होर जेस केसी घरा मन्झ तुस्से रुको, जेबे तक तुस्से तेस जगहा ले नी जाओ; तेथी ई रुकी रैहया।⁵ जो कोई तुस्सा जो नी मन्ने तेस नगरा ले निकळदे हुए आपणे पैरा री धूल झाडी देआ, ताकि तिन्हा पर गुआही हो।⁶ होर स्यों निकळी किन्हें गांऊआं गांऊआं सुसमाचार सुणान्दे, होर हर जगहा लोका जो ठीक करदे फिरे।⁷ होर चौथाई देसारा राजा हेरोदेस ये सब सुणी किन्हें डरी गया, क्यूंकि कई बोल्हा ऐ थे, कि यहुन्ना मरीरे मंझा ले जीउंदा हुई गईरा।⁸ होर कई ये बोल्हा ऐ थे, कि एलियाह प्रगट हुई गईरा: होरिये ये बोल्या, कि कोई पुराणे नबी मंझा ले कोई जीऊन्दा हुई गई रा।⁹ पर हेरोदेसे बोल्या, यहुन्ने रा ता में मूंड कट्वाई दितिरा था, एबे ये कुणहां, जेसरे बारे मन्झ हांऊ ऐहडी गल्ला सुणहां? होर तिने तेस जो देखणे री इच्छा प्रगट किती।¹⁰ फेरी प्रेरिते वाप्स आई किन्हें जो कुछ तिन्हे कितिरा था, तेस जो दसी दितेया, होर से तिन्हा जो लग करी किन्हें बैतसैदा नांऊआं रे एक नगरा जो लई गया।¹¹ ये जाणी किन्हें भीड तेसरे पीछे चलदी लगी: होर से खुसी किन्हें तिन्हा किन्हें मिल्लेया, होर से तिन्हा किन्हें परमेसरा रे राजा री गल्ला करदा लग्या: होर जो ठीक हुणा चाहें थे, तिने स्यों ठीक करी दिते।¹² जेबे ध्याडा ढळदा लग्या, ता तिन्हे बारा चेले आई किन्हें तेस किन्हें बोल्या, भीड वाप्स भेजी दे, ताकि स्यों चारों तरफा रे गांऊआं होर बस्ती मन्झ जाई किन्हें रही सके, होर खाणे रा इंतजाम करे, क्यूंकि आस्से एथी बियावान जगहा मन्झ ऐ।¹³ तिने तिन्हा किन्हें बोल्या, तुस्से ई इन्हा जो खाणे रे कठे देआ: तिन्हे बोल्या, आस्सा वाले पांज रोटिया होर दो मछिया जो छाडी किन्हें होर कुछ नी आ: पर हां, अगर आस्से जाई किन्हें इन्हा सभ लोका रे कठे खाणा मूले खरीधो, ता हुई सकहा: तेथी लगभग पांज हज़ार आदमी थे।¹⁴ तेबे तिने आपणे चेले किन्हें बोल्या, तिन्हा जो पन्ज्याह पन्ज्याह री घीहडी मन्झ बठयाळी देआ।¹⁵ तिन्हे ऐहडा ई कितेया, होर सब बठयाळी

दिते।¹⁶ तेबे तिने स्यों पांज रोटिया होर दो मछिया लई, होर स्वर्गा री तरफा जो देखी किन्हें धन्याबाद कितेया, होर रोटिया त्रोडी त्रोडी किन्हें तिन्हा चले जो देंदे गये, ताकि स्यों लोका जो परोसी सके।¹⁷ होर स्यों खाई किन्हें रजी गये, होर तिन्हे बची रे टुकड़े री बारा भरी भरी टोकरिया चकी।¹⁸ जेबे से कल्हे प्रार्थना करहा करहा था, ता चले तेस साउगी थे, होर तिने तिन्हा ले पुछेया, कि लोक मुंजो क्या बोल्ला ऐ? ¹⁹ तिन्हे जबाब दितेया, यहुन्ना बसिस्मा देणे वाळा, होर कोई कोई एलियाह, होर कोई पुराणे नबीया मन्झा ले कोई जी उठीरा।²⁰ तिने तिन्हा ले पुछेया, पर तुस्से मुंजो क्या बोल्ला ऐ? पतरसे जबाब दितेया, तूस्से परमेसरा रे मसीह ऐ।²¹ तेबे तिने स्यों खबरदार किते, कि ये गल केसी किन्हें देख्या बोल्दे।²² होर तिने बोल्या, कि माहणु रे पुत्रा रे कठे जरूरी आ, कि से बौहत दुःख उठाये होर पुरनिए होर माहयाजक होर साख्री तेस जो बेकार जाणी किन्हें मारी दे, होर से त्रीजे ध्याडे जीऊन्दा हुई जाए।²³ तिने सभी किन्हें बोल्या, अगर कोई मेरे पीछे आऊणा चाहे, ता से आपणे आपा रा इनकार करे होर हर रोज आपणा क्रूस चकी किन्हें मेरे पीछे आए।²⁴ क्यूंकि जो कोई आपणा प्राण बचाणा चाहंगा से तेस गुआई देणा, पर जो कोई मेरे कठे आपणा प्राण देन्हागा से तेस बचाई लैणा।²⁵ अगर माहणु सारे संसारा जो पाई ले, होर आपणा प्राण गुआई दे, या तेता रा नुकसान उठाए, ता तेस जो क्या फायदा हुणा? ²⁶ जो कोई मेरी होर मेरी गल्ला ले सरमाहंगा; माहणु रे पुत्रा भी जेबे तेस आपणी, होर आपणे पिता री, होर पवित्र स्वर्गदूता री, महिमा साउगी आऊणा, ता तेस भी तेस ले सरमाणा।²⁷ हांऊ तुस्सा किन्हें सच सच बोल्ला, कि जो एथी खहड़ीरे, तिन्हा मन्झा ले कई ऐहडे ऐ, कि जेबे तक स्यों परमेसरा रे राजा जो नी देखी लैन्हंगे, तेबे तक तिन्हा मौता रा सुआद नी चखणा।²⁸ इन्हा गल्ला रे कोई आठ ध्याडे बाद, से पतरस होर यहुन्ना होर याकूबा जो साउगी लई किन्हें प्रार्थना करने रे कठे पाहडा पर गया।²⁹ जेबे से प्रार्थना करेया ई करहा था, ता तेसरे चेहरे रा रूप बदली गया; होर तेसरा कपडा चीटा हुई किन्हें चमकदा लग्या।³⁰ होर देखा, मूसा होर एलियाह, ये दो माहणु, तेस साउगी गल्ला करेया करहा ऐ थे।³¹ ये महिमा साउगी प्रगट हुए; होर स्यों तेसरे मरणे री चर्चा करहा करहा ऐ थे, जो यरुस्लेमा मन्झ हुणे वाळा था।³² पतरस होर तेसरे साथी निंद्रा किन्हें भहरी रे थे, होर जेबे स्यों पूरी तरह जागी गये, ता तिन्हे तेसरी महिमा; होर दो माहणुं, जो तेस साउगी खहड़ी रे थे, देखे।³³ जेबे स्यों तेस वाले ले जांदे लगे, ता पतरसे यीसू किन्हें बोल्या; हे स्वामी, आस्सा रा एथी रैहणा भला आ: एता कठे आस्सा तीन मंडप बनाणे, एक तेरे कठे, एक मुस्सा रे कठे, होर एक एलियाहा रे कठे। से नी जाणदा था, कि क्या बोल्या करहा।³⁴ से ये बोल्या ई करहा था, कि एक बादले आई

किन्हें स्यों घेरी लए, होर जेबे स्यों बादला किन्हें घिरदे लगे, ता डरी गये।³⁵ होर तेस बादला मन्झा ले ये आवाज आई, कि ये मेरा पुत्र आ होर मेरा चुणिरा आ, एसरी सुणा।³⁶ ये अवाज हुंदे ई यीसू कल्हा ई रही गया; होर स्यों चुप रहे, होर तेस टैमतिन्हें जो कुछ देख्या तेता मन्झा ले कोई भी गल तिन्हें केसी किन्हें नी बोली।³⁷ होर दूजे ध्याडे जेबे स्यों पाहडा ले उतरी गये, ता एक बडी भीड़ तेस किन्हें आई मिली।³⁸ होर देखा, भीड़ा मन्झा ले एक माहणुए चल्लाई किन्हें बोल्या, हे गुरु, हांऊ तुध ले अरज करहा, कि मेरे म्हेठे पर दया कर; क्यूंकि से मेरा इकलौता म्हेठा आ।³⁹ होर देख, एक दुष्टात्मा तेस जो पकडा आ, होर से अचानक चिंगा पांदा लच्छा; होर से तेस जो ऐहडा मरोडा आ, कि से मुँहा मन्झ झाग भरी ल्याहूँआं; होर तेस जो कुचली किन्हें बडी मुश्किला किन्हें छाडहा।⁴⁰ होर मैं तेरे चले ले अरज किते, कि स्यों तेस्सा दुष्टात्मा जो काढी दे; पर स्यों काढी नी सके।⁴¹ यीसूए जबाब दितेया, हे अविस्वासियो होर हठीले लोको, मां कधी तक तुस्सा साउगी रैहणा, होर तुस्सा री सैहन्दे रैहणा? आपणे म्हेठे जो एथी लई आऊआ।⁴² से आया ही करहा था, कि दुष्टात्मे तेस जो पटकी किन्हें मरोडेया, पर यीसूए बुरी आत्मा झिडकी होर म्हेठे जो ठीक करी किन्हें तेसरे बाबा जो देई दितेया।⁴³ तेबे सब लोक परमेसरा रे बडी सामर्थ देखी किन्हें हरान हुई गए।⁴⁴ पर जेबे सब लोक तिन्हा सभ कामा ले जो से करहा था, हरान हुएआ करहा ऐ थे, ता तिने आपणे चले किन्हें बोल्या; ये गल्ला तुस्सा री काना मन्झ पई रहे, क्यूंकि माहणु रा पुत्र माहणु रे हाथा मन्झ पकडवाया जाणे वाळा आ।⁴⁵ पर स्यों एस गल्ला जो नी समझदे थे, होर ये गल इन्हा ले ल्हुखी रही; कि स्यों जाणने नी पाए, होर स्यों एस गल्ला रे बारे मन्झ तेस ले पूछणे ले डरहा ऐ थे।⁴⁶ फेरी तिन्हा मन्झ ये बैहस हुन्दी लगी, कि आस्सा मन्झ बडा कुणहां? ⁴⁷ पर यीसूए तिन्हारे मना रा विचार जाणी लया, होर एक बच्चा लई किन्हें आपणे वाले खडा कितेया।⁴⁸ होर तिन्हा किन्हें बोल्या; जो कोई मेरे नांऊआं ले एस बच्चे जो मन्हा आ, से मुंजो मन्हा आ, से मेरे भेजणे वाळे जो मन्हा आ, क्यूंकि जो तुस्सा मंझ सभी ले छोटे ले छोट्टा आ, से ई बडा आ।⁴⁹ तेबे यहुन्ने बोल्या, हे स्वामी, आस्से एक माहणु जो तेरे नांऊआं ले दुष्टात्मा जो काढदे देख्या, होर आस्से तेस जो नाह किते, क्यूंकि से आस्सा साउगी तेरे पीछे नी हुई लैदा।⁵⁰ यीसूए तिन्हा किन्हें बोल्या, तेस जो नाह नी करा; क्यूंकि जो तुस्सा रे खलाफ नी आ, से तुस्सा री वखाआ।⁵¹ जेबे तेसरे ऊपर उठाए जाणे रे ध्याडे पुरे हुणे वाळे थे, ता तिने यरुस्लेमा जो जाणे रा पक्का विचार बणाया।⁵² होर तिने आपणे दूत पैहले ई भेजी दिते: स्यों सामरिया रे एक गांऊआं मन्झ गये, ताकि स्यों तेसरे कठे जगहा तैयार करे।⁵³ पर तिन्हे लोके तेस जो उतरणे नी दितेया, क्यूंकि से यरुस्लेमा

जो जाया करहा था।⁵⁴ ये देखी किन्हें तेसरे चले याकूब होर यहून्ने बोल्या; हे प्रभु; क्या तू चाहां कि आस्से हुकम देईऐ, कि सर्गा ले आग पई किन्हें तिन्हा जो भस्म करी दे।⁵⁵ पर तिने मुडी किन्हें स्यों झिड़के होर बोल्या, तुस्से नी जाणदे कि तुस्से केहड़ी आत्मा रे ऐ।⁵⁶ क्यूंकि माहणु रा पुत्र लोका रे प्राणा जो नास करणे रे कठे नी पर बचाणे रे कठे आईरा: होर स्यों केसी होर गांऊआं मन्झ चली गये।⁵⁷ जेबे स्यों पैंडे मन्झ चल्या करहा ऐ थे, ता केसीए तेस किन्हें बोल्या, जेथी जेथी तुध जाणा, मां तेरे पीछे चलणा।⁵⁸ यीसुए तेस किन्हें बोल्या, लोमडिया रे डुआर होर सार्गा रे चीडूआ रे कोहल हुहां ऐं, पर माहणु रे पुत्रा जो मूंड रखणे री भी जगहा नी ई।⁵⁹ तिने दूजे किन्हें बोल्या, मेरे पीछे चल; तिने बोल्या; हे प्रभु, मुंजो पैहले जाणे दे कि हांऊ आपणे बाबा जो दफनाई सकूं।⁶⁰ तिने तेस किन्हें बोल्या, मरीरे जो आपणे मुरदे आपु दफनाणे दे, पर तू जाई किन्हें परमेसरा रे राजा री कथा सुणा।⁶¹ एकी होरिये भी बोल्या; हे प्रभु, मां तेरे पीछे चलणा; पर पैहले मुंजो जाणे दे कि हांऊ आपणे घरा रे लोका किन्हें ग्लाई आंऊ? ⁶² यीसुए तेस किन्हें बोल्या; जो कोई आपणा हाथ हळा पर रखी किन्हें पीछे देख्हा, से परमेसरा रे राजा रे लायक नी आ।

10¹ होर इन्हा गल्ला ले बाद प्रभुए स्हत्र होर माहणु नियुक्त किते होर जेस नगरा होर जगहा जो से आपु जाणे वाळा था, तेथी तिन्हे स्यों दो दो करी किन्हें आपणे आगे भेजे।² होर तिने तिन्हा किन्हें बोल्या; पक्कीरे खेत ता बौहत ऐ पर मजदूर थोहडे ई ऐ: एता कठे खेता रे मालका किन्हें अरज करा, के से आपणे खेता री कट्टाई रे कठे मजदूर भेजी दे।³ जाऊआ; देखा हांऊ तुस्सा जो भेडा साहीं भेडीया रे बीचा मन्झ भेज्हा।⁴ इधी कठे ना ता बटुआ, ना ता झोळा, ना ता बूट लैया; होर ना पैंडे मन्झ केसी जो नमस्कार करहा।⁵ जेस केसी रे घरा मन्झ जाऊआ, सभी ले पैहले ये बोला, एस घरा मन्झ सांति हो।⁶ अगर कोई तेथी सांति रे लायक हूंगा: ता तुस्सा रा कल्याण तेस पर बणी रहणा, नी ता तेस तुस्सा वाले वाप्स आई जाणा।⁷ तेस ई घरा मन्झ रहुआ, होर जो कुछ तिन्हा ले मिले, से ई खाऊआ पिऊआ, क्यूंकि मजदूरा जो आपणी मजदूरी मिलणी चाहिए, घरा घरा नी फिरणा।⁸ होर जेस नगरा मन्झ जाओ, होर तेथी रे लोक तुस्सा जो स्वीकार करे, ता जो कुछ तुस्सा रे साम्हणे रख्या जाए से ई खाया।⁹ तेथी रे बमारा जो ठीक करा: होर तिन्हा किन्हें बोला, कि परमेसरा रा राज तुस्सा रे नेडे आई पौहंचिरा।¹⁰ पर जेस नगरा मन्झ जाऊआ, होर तेथी रे लोक तुस्सा जो स्वीकार नी करे, ता तेथिरी गहळिया मन्झ जाई किन्हें बोला।¹¹ कि तुस्सा रे नगरा री धूल भी, जो आस्सा रे पैरा मन्झ लगीरी, आस्से तुस्सा रे साम्हणे झाडी देंहा ऐ, कि परमेसरा रा राज तुस्सा रे नेडे आई पौहंचिरा।¹² हांऊ

तुस्सा किन्हें सच सच बोल्हा, कि तेस ध्याडे तेस नगरा रे लोका ले सदोमा रे लोका री दसा खरी हुणी।¹³ हाय खुराजीन ! हाय बैतसैदा ! जो सामर्था रे काम तुस्सा मन्झ किते गये, अगर स्यों सूर होर सैदा मन्झ किते जांदे, ता टाट ढखी किन्हें होर सुआही मन्झ बैठी किन्हें स्यों केभके जे मन फिराई लेंदे।¹³ हाय खुराजीन ! हाय बैतसैदा ! जो सामर्था रे काम तुस्सा मन्झ किते गये, अगर स्यों सूर होर सैदा मन्झ किते जांदे, ता टाट ढखी किन्हें होर सुआही मन्झ बैठी किन्हें स्यों केभके जे मन फिराई लेंदे।¹⁴ पर न्याया रे ध्याडे तुस्सा री दसा ले सूर होर सैदा री दसा ज्यादा सहनीय हुणी।¹⁵ होर हे कफरनहूम, क्या तू स्वर्गा तक उचा कितेया जाणा? तू ता अधोलोका तक नीचा कितेया जाणा।¹⁶ जो तुस्सा री सुणहां, से मेरी सुणहां होर जो तुस्सा जो तुच्छ जाणहां, से मुंजो तुच्छ जाणहां; होर जो मुंजो तुच्छ जाणहां, से मेरे भेजणे वाळे जो तुच्छ जाणहां।¹⁷ स्यों स्हत्र जण खुसी किन्हें दबारा आई किन्हें बोल्दे लगे, हे प्रभु, तेरे नांऊआं ले दुष्टात्मा भी आस्सा रे बसा मन्झ ई।¹⁸ तिने तिन्हा किन्हें बोल्या; हांऊ सैताना जो बिजली साहीं स्वर्गा ले पौऊन्दा देख्या करहा था।¹⁹ देखा, मैं तुस्सा जो सांपा होर बिचु जो रौन्दणे रा, होर सत्रु सैताना री सारी सामर्था पर हक दितिरा; होर केसी चीजा ले तुस्सा जो कुछ नुक्सान नी हुणां।²⁰ तेबे भी एता ले खुस मत हुआ, कि आत्मा तुस्सा रे बसा मन्झ ई, पर एता ले खुस हुआ कि तुस्सा रे नांऊ स्वर्गा मन्झ लिखिरे।²¹ तेस ई टैम से पवित्र आत्मा मन्झ हुई किन्हें खुसी किन्हें भहरी गया, होर बोल्या; हे पिता, स्वर्ग होर धरती रे प्रभु, हांऊ तेरा धन्यावाद करहा, कि तैं ये गल्ला बुधिमाना होर समझदारा ले ल्कोई के रखी, होर बच्चेया पर प्रकट किती: हां, हे पिता, तुस्सा जो ये ई खरा लग्या।²² मेरे पिते मुंजो सब कुछ साँपी दितिरा होर कोई नी जाणदा कि पुत्र कुणहां सिर्फ पिता होर पिता कुणहां ये भी कोई नी जाणदा, सिर्फ पुत्र होर पुत्र ई पिता जो प्रगट करी सक्हा।²³ होर तिने चले री तरफ मुडी किन्हें चुपके जे बोल्या, भागा वाळे ई स्यों हाखिया, जो तिन्हा गल्ला जो देख्हा ई जिन्हा जो तुस्से देख्हा ऐ।²⁴ क्यूंकि हांऊ तुस्सा किन्हें बोल्हा, कि तुस्से जिन्हा गल्ला जो देख्हा ऐ तिन्हा जो बौहत सारे नबीये होर राजे देखणा चाहेया पर नी देख्या, होर स्यों गल्ला सुणनी चाही जो तुस्से सुणहां ऐं पर नी सुणी।²⁵ होर देखा, एक व्यवस्थापक उठेया; होर ये बोली किन्हें, तेसरी परखणी करदा लग्या; कि हे गुरु, अनंत जिन्दगी रा वारस हुणे रे कठे हांऊ क्या करूं? ²⁶ तिने तेस किन्हें बोल्या; कि व्यवस्था मन्झ क्या लिखीरा? तू किहां पढ्हा? ²⁷ तिने जबाब दितेया, कि तू प्रभु आपणे सारे मन होर आपणे सारे प्राण होर आपणी सारी सक्ति होर आपणी सारी बुद्धि साउगी प्यार रख; होर आपणे पडोसी किन्हें आपु साहीं प्यार कर।²⁸ तिने तेस किन्हें बोल्या, तैं ठीक जबाब

दितेया, ऐहड़ा ई कर: तेबे तुध जीऊन्दे रैहणा । 29 पर तिने आपणे आपा जो धर्मी बणाणे री इच्छा ले यीसू ले पुछेया, ता मेरा पड़ोसी कुणहां? 30 यीसुए जबाब दितेया; कि एक माहणु यरुस्लेमा ले यरीहो जाया करहा था, होर से डाकुए घेरी लया तेसरे कपडे तुआरी दिते, होर तेस जो मारी पिटी किन्हें अधमुआ छाडी किन्हें चली गये । 31 होर ऐहड़ा हुआ; कि तेस ई रस्ते ले एक याजक जाया करहा था: पर तेस जो देखी किन्हें से कतराई किन्हें चली गया । 32 इहां ई एक लेवी तेस जगहा आया, से भी तेस जो देखी किन्हें कतराई किन्हें चली गया । 33 पर एक सामरी मुसाफर तेथी ले निकळेया, होर तिने तेस जो देखी किन्हें तरस खाधेया । 34 होर तिने तेस वाले आई किन्हें होर तेसरे जख्मा पर तेल होर दाखरस लगाई किन्हें पट्टिया बान्ही, होर तेस जो आपणी सुआरी पर चढाई किन्हें सराया मन्झ लई गया, होर तेसरी सेऊआ टैहल किती । 35 दूजे ध्याड़े तिने दो दीनार काढी किन्हें सराया रे रखवाळे जो दिते, होर बोल्या: एसरी सेऊआ टैहल करणा, होर जो कुछ तेरा होर लगघा, से मां वापसी पर तुजो देई देणा । 36 तेरी समझा ले, जो डाकुआ मन्झ फस्सिरा था इन्हा तीना मंझा ले तेसरा पड़ोसी कुण हुआ? 37 तिने बोल्या, से ई जिने जे तेस पर तरस खाधेया: यीसुए तेस किन्हें बोल्या, जा, तू भी ऐहड़ा ई कर । 38 फेरी जेबे स्यों जाया करहा ऐ थे, ता से एक गांऊआं मन्झ गया, होर मार्था नांऊआं री एक जनाने आपणे घरा मन्झ तेसरा स्वागत कितेया । 39 होर तेस्सा री मरियम नांऊआं री एक बैहण थी; से प्रभु रे पैरा वाले बैठी किन्हें तेसरा वचन सुणहां ई थी । 40 पर मार्था सेऊआ करदे करदे व्याकुल हुई गयी होर से तेस वाले आई किन्हें बोल्दी लगी; हे प्रभु, क्या तुस्सा जो कुछ फिकर नी ई कि मेरी बैहणिए हांऊ सेऊआ करणे रे कठे कल्ही छाडी दितिरी? एता कठे तेस्सा किन्हें बोल, कि मेरी मदद कर । 41 प्रभुए तेस्सा जो जबाब दितेया, मार्था, हे मार्था; तू बौहत चीज़ा रे कठे फिकर करहा ई होर व्याकुल हूं। 42 पर एक गल ता जरूर ई, होर तेस खरे हिस्से जो मरीयमे छांटी लईरा: जो तेस्सा ले कधी वाप्स नी लया जाणा ।

11 1 फेरी से एक जगहा प्रार्थना करेया करहा था: होर जेबे से प्रार्थना करी चुक्केया, ता तेसरे चले मंझा ले एकिये तेस किन्हें बोल्या; हे प्रभु, जिहां यहुन्ने आपणे चले जो प्रार्थना करणा स्वाई तिहां ई आस्सा जो भी तुस्से स्वाई दे । 2 तिने तिन्हा किन्हें बोल्या: जेबे तुस्से प्रार्थना करो, ता एहड़ा बोलणा; हे आस्सा रे पिता, तेरा नांऊ पवित्र मन्नेया जाए, तेरा राज आए । 3 आस्सा री हर धयाड़े री रोटी आस्सा जो देया कर । 4 होर आस्सा रे पापा जो माफ करी दे, क्यूंकि आस्से भी आपणे हर एक गुन्हेगारा जो माफ करहा ऐ, होर आस्सा जो परीक्षा मन्झ नी पऊणे दे । 5 होर तिने तिन्हा किन्हें बोल्या, तुस्सा मन्झ ऐहड़ा कुणहां कि तेसरा एक दोस्त हो, होर से आधी राती तेस

वाले आई किन्हें बोले कि हे दोस्त; मुंजो तीन रोटिया देई दे । 6 क्यूंकि एक मुसाफर दोस्त मेरे वाले आई गईरा, होर तेसरे अगे रखणे रे कठे मेरे वाले कुछ नी हाया । 7 होर से भीतरा ले जबाब दे, कि मुंजो दुःख नी दे; एभे ता दरवाजा बंद आ, होर मेरे बच्चे मेरे वाले बिस्तरे मन्झ ऐ, इधी कठे हांऊ उठी किन्हें तुजो कुछ देई नी सकदा? 8 हांऊ तुस्सा किन्हें बोल्हा, हालांकि तेसरा दोस्त हुणे पर भी तेस तेस्जो जो उठी किन्हें कुछ नी देणा, तेबे बी बेशर्म हुई किन्हें मांगदे रैहणे री वजहा ले तेस, तेस्जो जो कुछ चाहिए उठी किन्हें देणां । 9 होर हांऊ तुस्सा किन्हें बोल्हा, मांगघे, ता तुस्सा जो दितेया जाणा; टोळघे ता तुस्सा जो मिलणा खटखटाहंगे ता तुस्सा रे कठे खोलहया जाणा । 10 क्यूंकि जो कोई मान्हा, तेस जो मिलहा; होर जो टोळहा ऐ, से पाहां; होर जो खटखटाहां, तेसरे कठे खोलहया जाणा । 11 तुस्सा मन्झ ऐहड़ा कुण बाब हुणां, कि जेबे तेसरा म्हठा रोटी मांगे, ता तेस जो पात्थर दे: या मछी मांगे ता मछी रे बदले तेस जो सांप दे? 12 या आंडे मांगघे ता तेस जो बिचु दे? 13 अगर तुस्से, बुरे हुई किन्हें आपणे बच्चेया जो खरी चीज़ा देणा जाणहां ऐं, ता स्वर्गीय पिता आपणे मांगणे वाळे जो पवित्र आत्मा की नी देणी । 14 फेरी तिने एक गूंगी आत्मा काढी, जेबे दुष्टात्मा निकळी गयी, ता टाटा बोल्दा लगया; होर लोका जो हरानी हुई । 15 पर तिन्हा मंझा ले बौहतिये ये बोल्या, ये ता सैताना रे मुखिया री सहायता किन्हें दुष्टात्मा जो काढहा । 16 होरिये तेसरी परखणी करणे रे कठे तेस ले सर्गा रा एक निसाण मान्योया । 17 पर तिने, तिन्हारे मना री गल्ला जाणी किन्हें, तिन्हा किन्हें बोल्या; जेस जेस राजा मन्झ फूट हूं। ई, से राज उजड़ी जाहां: होर जेस घरा मन्झ फूट हूं। ई से नास हुई जाहां । 18 होर अगर सैतान आपणा ही विरोधी हुई जाए, ता तेसरा राज कींहा बणी रही सकहा? क्यूंकि तुस्से मेरे बारे मन्झ ता बोल्हा ऐ, कि ये सैताना री सहायता किन्हें दुष्टात्मा काढहा । 19 होर अगर हांऊ सैताना री सहायता किन्हें दुष्टात्मा जो काढहा, ता तुस्सा री संतान केसरी सहायता किन्हें काढहा ऐ? इधी कठे तिन्हा ई तुस्सा रा न्याय चुकाणा । 20 पर अगर हांऊ परमेसरा री सामर्था किन्हें दुष्टात्मा जो काढहा आ, ता परमेसरा रा राज नेडे आई गईरा । 21 जेबे कोई ताकतवर माहणु हथियार बान्ही किन्हें आपणे घरा री रखवाली करहा, ता तेसरी सम्पति बची रहीं । 22 पर जेबे तेस ले बढी किन्हें कोई होर ताकतवर हमला करी किन्हें तेस जो जीती लैहां, ता तेसरे स्यों हथियार जिन्हा पर जे तेसरा भरोसा था, तेस ले लूटी लैहें होर लूटी री सम्पति जो स्यों आपु मन्झ बांडी लैहें । 23 जो मेरे साउगी कठा नी करदा से खिंडहा । 24 जेबे असुद्ध आत्मा माहणु मंझा ले निकळी जाहीं ता से सुकी जगहा मन्झ अराम टोळदी फिरहा ई; होर जेबे तेस्सा जो अराम नी मिलदा, ता बोल्हा ई; मां तेस ई घरा मन्झ वाप्स चली जाणा जेथी ले हांऊ अईरी थी

। 25 होर से आई किन्हें तेस जो साफ सुथरा होर सजा-सजाई रा पाहीं। 26 तेबे से आई किन्हें आपणे ले भी ज्यादा बुरी सात दुष्टात्मा आत्मा जो आपणे साउगी ल्याहूंआं ई, होर स्यों तेस मन्झ जाई किन्हें वास करहा ई, होर तेस माहणु री दसा पैहले री ले भी होर बुरी जाहीं। 27 जेबे से ये गल्ला बोल्या करहा था ता भीड़ा मन्झा ले केसी जनाने चिल्लाई किन्हें बोल्या, भागा वाळी ई से कोख जेस मन्झ जे तू रैहया; होर स्यों स्तन जिन्हारा जे तें दूध पितेया। 28 तिने बोल्या, हां; पर भागा वाळे ऐ स्यों, जो परमेसरा रा वचन सुणहां ऐं होर मन्हां ऐं। 29 जेबे बडी भीड़ कठी हुई जाया करहा ई थी ता से बोल्दा लग्या; कि एस जमाने रे लोक बुरे ऐ; स्यों चिन्ह टोळहा ऐ; पर योना रे चिन्हा जो छाडी किन्हें होर कोई चिन्ह तिन्हा जो नी दितेया जाणा। 30 जिहां योना निन्वे रे लोका रे कठे चिन्ह ठैहरया, तिहां ई माहणु रा पुत्र भी एस जमाने रे लोका रे कठे एक चिन्ह ठैहरया। 31 दक्षिणा वखा री राणीया न्याय रे ध्याड़े एस जमाने रे लोका साउगी उठी किन्हें, स्यों दोषी ठैहराणे, क्यूंकि से सुलेमाना रा ज्ञान सुणने रे कठे धरती रे दूजे कनारे ले आई, होर देखा, एथी से आ जो सुलेमाना ले भी बडा आ। 32 निन्वे रे लोक न्याय रे ध्याड़े एस जमाने रे लोका किन्हें खडे हुई किन्हें, स्यों दोषी ठैहराणे; क्यूंकि तिन्हे योना रा प्रचार सुणी किन्हें मन फिराया होर देखा, एथी से आ, जो योना ले भी बडा आ। 33 कोई माहणु दीया भखाई किन्हें तेस जो तहखाने मन्झ या भांडे हेठ नी रखदा, पर दीवटा पर रख्हा ऐ कि भीतर आऊणे वाळे पर प्रयासा हो। 34 तेरे सरीरा रा दीया तेरी हाखिया ई, इधी कठे जेबे तेरी हाखिया साफ ई, ता तेरा सारा सरीर भी प्रयासे किन्हें भहरी रा आ, पर जेबे तेरी हखिया बुरी ई, ता सारा सरीर भी अंधकारमय हुई जाणा। 35 इधी कठे च्त्न रैहया, कि जो प्रयासा तुध मन्झ आ से अंधकारमय नी हुई जाओ। 36 इधी कठे अगर तेरा सारा सरीर प्रयासे किन्हें भहरी रा आ, होर तेसरा कोई हिस्सा न्याहरे मन्झ नी आ, ता तेस पुरी तरहा ले ऐहडा चमकणा जिहां कोई दीया तुस्सा पर आपणी किरणा चमकाया करहा। 37 जेबे से गल्ला करेया करहा था, ता केसी फरीसीये तेस ले अरज किती, कि मेरे वाले एथी खाणा खाई ले; होर से भीतर जाई किन्हें खाणा खांदे बैठया। 38 फरीसी ये देखी किन्हें हरान हुआ कि से खाणा खाणे ले पैहले नी न्हाया। 39 प्रभु ऐ तेस किन्हें बोल्या, हे फरीसियो, तुस्से कटोरे होर थाळी जो बाहरा बाहरा ले मांजहा ऐ, पर तुस्सा रे अन्दर न्याहरा होर दुष्टता भहरी री। 40 हे नर्कलेओ, जिने जे बाहरला हिस्सा बणाया, क्या तिने अन्दरला हिस्सा नी बणाया? 41 पर हां, अन्दरली चीजा जो दान करी देऊआ, ता देखा, सभ कुछ तुस्सा रे कठे सुद्ध हुई जाणा। 42 पर हे फरीसियो, तुस्सा पर हाय! तुस्से पदीने होर सुदाब बूटी रा, होर कई तरहा री जडी बूटी रा

दसुआं हिस्सा देहां ऐं, पर न्याय जो होर परमेसरा रे प्यारा जो टाळी देहां ऐं: करणा ता ऐहडा चाहिये था कि इन्हा जो भी करदे रैहन्दे होर तिन्हा जो भी नी छाडदे। 43 हे फरीसियो, तुस्सा पर हाय! तुस्से आराधनालय मन्झ खास खास आसन होर बजारा मन्झ नमस्कार चाहें। 44 हाय तुस्सा पर! क्यूंकि तुस्से तिन्हा ल्हुखी री कबरा साहीं ऐं, जिन्हा पर लोक चल्हा ऐं, पर नी जाणदे। 45 तेबे एकी व्यवस्थापके तेस जो जबाब दितेया, कि हे गुरु, इन्हा गल्ला रे बोलणे ले तू आस्सा री बेज्जती करहा। 46 तिने बोल्या; हे व्यवस्थापको, तुस्सा पर भी हाय! तुस्से ऐहडे बोझा थाले जिन्हा जो चकणा बौहत कठण आ, माहणुआं पर लाध्हा ऐ पर तुस्से आपु तिन्हा बोझा जो आपणी एक गुठी किन्हें भी नी छुहन्दे। 47 हाय तुस्सा पर! तुस्से तिन्हा नबी री कबरा बणाहें, जिन्हा जो तुस्सा रे बाब-दादे मारी दितिरा था। 48 एता कठे तुस्से मेरे गवाह ऐ, होर आपणे बाब-दादा रे कामा मन्झ समर्थन करहा ऐ; क्यूंकि तिन्हे ता स्यों मारी दिते होर तुस्से तिन्हा री कबरा बणाहें। 49 इधी कठे परमेसरा री बुद्धिये भी बोल्या, कि मां तिन्हा वाले नबी होर प्रेरित भेजणे: होर तिन्हा, तिन्हा मंझा ले कितने मारी देणे, होर कितने स्ताणे। 50 इधी कठे संसारा री सुरहु आता ले जितने भी नबीया रा खून बहाई गईरा, तेता रा हिसाब किताब, एस जमाने रे लोका ले लया जाणा। 51 हाबिला री हत्या ले लई किन्हें जकरियाह री हत्या तक जो बेदी होर मंदरा रे बीचा मन्झ घात कितिरा: हांऊ तुस्सा किन्हें सच बोल्हा, तेसरा हिसाब किताब, एस जमाने रे लोका ले लया जाणा। 52 हाय तुस्सा व्यवस्थापका पर! कि तुस्से ज्ञाना री चाबी ता लई ली, पर तुस्से आफ्हु ऐ दाखल नी हुए, होर दाखल करणे वाळे भी रोकी दिते। 53 जेबे से तेथी ले निकळेया, ता सास्त्री होर फरीसी बौहत पीछे पई गये होर स्यों बौहत गल्ला रे बारे मन्झ तेस ले सुआल पुछदे लगे। 54 होर स्यों तेस जो फसाणे रे इंतजारा मंझा लगी रहे ताकि स्यों तेसरे मुंहा री कोई गल पकडी सके।

12 1 इतने मन्झ जेबे हज़ारा रे स्हाबे भीड़ लगी गयी, एथी तक कि स्यों एक दूजे पर पई जाया करहा ऐ थे, ता से सभी ले पैहले आपणे चेले किन्हें बोल्दा लग्या, कि फरिसिया रे कपटरुपी खमीरा ले सावधान रैहया। 2 कुछ ढखीरा नी आ, जो प्रगट नी हुणा; होर ना कुछ ल्कोई रा, जो जाणेया ना जाणा। 3 इधी कठे जो कुछ तुस्से न्यहारे मन्झ बोलिरा, से प्रयासे मन्झ सुणेया जाणा: होर जो तुस्से कमरे मन्झ चुप-चाप बोलिरा, से घरा रे छता परा ले प्रचार कितेया जाणा। 4 पर मेरे दोस्तो! हांऊ तुस्सा किन्हें बोल्हा, कि जो सरीरा जो मारहा ऐ पर एता ले ज्यादा कुछ नी करी सकदे तिन्हा ले नी डरा। 5 हांऊ तुस्सा जो खबरदार करहा कि तुस्सा जो केस ले डरणा चाहिए, तेस ले ई डरा जेस जो तुस्सा जो मारने ले बाद

नरका मन्झ पाणे रा हक आ।⁶ क्या दो पैसे री पांज चिड़िया नी बिकदी? फेरी भी परमेसर तिन्हा मंझा ले एकी जो भी नी भुल्दा।⁷ पर तुस्सा रे मुंडा रे सारे बाळ भी गिणीरे ऐ, एता कठे डरा मत, तुस्से बौहत चिड़िया ले भी बढी किन्हें ऐ।⁸ हांऊ तुस्सा किन्हें बोल्हा जो कोई माहणु रे साम्हणे मुंजो मनी लैहन्ना, तेस जो माहणु रे पुत्रा भी परमेसरा रे स्वर्गदूता रे साम्हणे मनी लैणा।⁹ पर जो माहणु रे साम्हणे मेरा इनकार करे तेसरा परमेसरा रे साम्हणे इनकार कितेया जाणा।¹⁰ जो कोई माहणु रे पुत्रा रे विरोधा मन्झ कोई गल बोले, तेसरा से अपराध माफ कितेया जाणा। पर जो कोई पवित्र आत्मा रे विरोधा मन्झ कोई गल बोले ता तेसरा से अपराध माफ नी कितेया जाणा।¹¹ जेबे लोक तुस्सा जो सभा, होर होर हाकिमा होर साहबा रे साम्हणे लई जाए, ता फिकर नी करणा कि आसे किहां या क्या जबाब दे, या क्या बोले।¹² क्यूंकि पवित्र आत्मा तेस ई टैम तुस्सा जो स्वर्ग देणा, कि क्या बोलणा चाहिए।¹³ फेरी भीडा मन्झा ले एकिए तेस किन्हें बोल्या, हे गुरु, मेरे भाई किन्हें बोल, कि बाबा री जायदाद मुंजो बांडी दे।¹⁴ तिने तेस किन्हें बोल्या; हे माहणुआं, कुने मुंजो तुस्सा रा न्यायी या बांडणे वाळा बणाया? ¹⁵ होर तिने तिन्हा किन्हें बोल्या, च्त्न जे रैहया करा, होर हर किस्मा रे लालचा ले आपणे आपा जो बचाई रखा: क्यूंकि केसी री जिंदगी तेसरी बौहत ज्यादा सम्पति हुणे री वजहा ले नी हुन्दी।¹⁶ तिने तिन्हा किन्हें एक दृष्टान्त बोल्या, कि केसी धनवाना री ज्मीना मन्झ बडी भारी फसल हुई।¹⁷ तेबे से आपणे मना मंझ सोचदा लग्या, कि मैं क्या करूं, क्यूंकि मेरे वाले जगहा नी ई, जेथी जे हांऊ आपणी फसल रखी सकूं।¹⁸ होर तिने बोल्या; मां ऐहडा करणा: मां आपणे गोदाम तोडी किन्हें होर भी बडे बणाणे; ¹⁹ होर तेथी मां आपणा सभ नाज पाथा होर जायदाद रखणी: होर आपणे प्राणा किन्हें बोलणा, कि हे मेरे प्राण, मेरे वाले बौहत साला रे कठे बौहत जायदाद रखिरी; अराम कर, खा, पी, सुखा किन्हें रैह।²⁰ पर परमेसरे तेस किन्हें बोल्या; हे मुख, आज राती ई तेरा प्राण तेरे ले लई जाणा; तेबे जो कुछ तैं कठा कितिरा, से केस रा हुणा? ²¹ ऐहडा ई से माहणु भी आ जो आपणे कठे पैसा कठा करहा, पर परमेसरा री नजरा मन्झ धनवान नी आ।²² फेरी तिने आपणे चेले किन्हें बोल्या; इधी कठे हांऊ तुस्सा किन्हें बोल्हा, आपणे प्राणा री चिन्ता नी करा, कि आस्सा क्या खाणा; ना आपणे सरीरा री कि क्या पैहनणा।²³ क्यूंकि खाणे ले प्राण, होर कपडे ले सरीर बढी किन्हें आ।²⁴ काऊआ पर ध्यान देआ; स्यों ना ता बाहें, ना काट्हा ऐ; ना तिन्हारे भंडार होर ना गोदाम हुहां ऐं; तेबे भी परमेसर तिन्हा जो पाळहा; तुस्सा री कीमत ता चिड़ू पखेरू ले भी बौहत ज्यादा ई।²⁵ तुस्सा मन्झा ले ऐहडा कुणहां, जो फिकर करी किन्हें आपणी जिन्दगिया री अवस्था मन्झ एक घडी भी बढाई सकहा?

²⁶ इधी कठे अगर तुस्से छोटे ले छोटा काम भी नी करी सकदे, ता होर गल्ला रे कठे किधियो फिकर करहा ऐ? ²⁷ सोसना रे डाळा पर ध्यान करा कि स्यों किहां बढहा ऐ; स्यों ना मैहनत करहा ऐ, ना काट्हा ऐ: तेबे भी हांऊ तुस्सा किन्हें बोल्हा, कि सुलेमान भी, आपणी सारी महिमा मन्झ, तिन्हा मंझा ले एकी साहीं कपडे नी पैहनी सक्या था।²⁸ इधी कठे अगर परमेसर मैदाना री घाहा जो, जो आज ई, होर काला आगी मन्झ पाई देणी, ऐहडा पन्हाहां; ता हे कम विस्वास वाळयो, तेस तुस्सा जो कि नी पैहनाणा? ²⁹ होर तुस्से एस गल्ला री टोळा मन्झ नी रहुआ, कि क्या खाणा होर क्या पीणा, होर ना ता सक करा।³⁰ क्यूंकि संसारा री जातिया इन्हा सब गल्ला री खोजा मन्झ रैंहीं: होर तुस्सा रा पिता जाणहां, कि तुस्सा जो इन्हा चीजा री जरुरत ई।³¹ पर तेसरे राजा री खोजा मन्झ रहुआ, ता ये चीजा भी तुस्सा जो मिली जाणी।³² हे छोटे झुंड, मत डर; क्यूंकि तुस्सा रे पिता जो ये खरा लग्या, कि तुस्सा जो राज दे।³³ आपणी जायदाद बेची किन्हें दान करी देआ; होर आपणे कठे ऐहडे बटुए बणाऊआ, जो पुराणे नी हुंदे, यानि- स्वर्गा मन्झ ऐहडा धन कठा करा जो घटदा नी आ होर जेसरे नेडे ना ता चोर नी जांदा, होर ना ता कीडा बिगाडदा।³⁴ क्यूंकि जेथी तुस्सा रा धन आ, तेथी तुस्सा रा मन भी लगी रैहणा।³⁵ तुस्सा री कमर कस्सी रहे, होर तुस्सा रे दीये जळदे रहे।³⁶ होर तुस्से तिन्हा माहणुआं साहीं बणां, जो आपणे मालका जो न्याहळेया करहा ऐ, कि तेस ब्याहा रे भोजा ले केभे वाप्स आऊणा; ताकि जेबे से आई किन्हें दरवाजा खटखटाए, ता स्यों झटपट तेसरे कठे दरवाजा खोल्ही सके।³⁷ भागा वाळे ऐ स्यों दास, जिन्हा जो मालक आई किन्हें जागदे पाए; हांऊ तुस्सा किन्हें सच सच बोल्हा, कि तेस कमर बान्ही किन्हें तिन्हा जो खाणा खुआणा, होर नेडे आई किन्हें तिन्हारी सेऊआ करणी।³⁸ अगर से रात के दूजे पैहर या त्रीजे पैहरा मन्झ आई किन्हें तिन्हा जो जागदे पाए, ता स्यों भागा वाळे ऐ।³⁹ पर तुस्से ये जाणी लऊआ, कि अगर घरा रा मालक जाणदा, कि चोरा केस टैम आऊणा, ता से जागदा रैहन्दा, होर आपणे घरा मन्झ सेंध नी लगाणे देंदा।⁴⁰ तुस्से भी त्यार रहुआ; क्यूंकि जेस घडी तुस्से सोचदे भी नी, तेस घडी माहणु रे पुत्रा आई जाणा।⁴¹ तेबे पतरसे बोल्या, हे प्रभु, क्या ये दृष्टान्त तू सिर्फ आस्सा किन्हें बोल्हा या सभी किन्हें?।⁴² प्रभुए बोल्या; से विस्वासयोग्य होर बुद्धिमान भंडारी कुणहां, जेसरा मालक तेस जो नौकर चाकरा पर मुखिया बणाये कि तिन्हा जो टैमा पर भोजन सामग्री दे।⁴³ भागा वाळे ऐ स्यों दास, जेस जो तेसरा मालक आई किन्हें ऐहडा करदा पाए।⁴⁴ हांऊ तुस्सा किन्हें सच सच बोल्हा; तेस से आपणी सभ जायदादा पर मुखिया बनाणा।⁴⁵ पर अगर से दास सोच्दा लगे, कि मेरा मालक आऊणे मन्झ देर करेया करहा,

होर दास होर दासिया जो मारणा पीटणा सुरहु करी दे होर खांदा-पींदा होर मतवाहळदा लगे।⁴⁶ ता तेस दासा रे मालका ऐहडे ध्याडे आऊणा कि जेबे से तेस जो न्हयाळया नी करदा हो, होर ऐहडी घडी आउणा जेस जो से नी जाणदा हो, होर तेस जो बडी भारी ताडना देई किन्हें तेसरा हिस्सा अविश्वासिया साउगी ठैहराणा।⁴⁷ होर से दास जो आपणे मालका री इच्छा जाणहां था, पर त्यार नी रैहया होर ना तेसरी इच्छा रे मुताबक चल्या तेस बौहत मार खाणी।⁴⁸ पर जेस जो आपणे मालका री इच्छा रा ज्ञान नी आ होर ऐहडा काम करी बैठे जो मार खाणे रे लायक हो ता तेस दासा पर थोहडी मार पऊणी, इधी कठे जेस जो बौहत दितिरा, तेस ले बौहत मान्योया जाणा, होर जेस जो बौहत सौम्पेया गईरा, तेस ले बौहत बौहत मान्योया जाणा।⁴⁹ हांऊ धरती पर आग लगान्दा आईरा; होर हांऊ क्या चाहां सिर्फ ये कि ये आग एभे भडकी जाए।⁵⁰ मुंजो ता एक बपतिस्मे री प्रक्रिया ले हुई किन्हें गुजरणा पउणा, होर जेबे तक ये पूरा नी हुई जाए तेबे तक मां बौहत व्याकुल रैहणा?⁵¹ क्या तुस्से समझ्या करहा ऐ कि हांऊ धरती पर मेल मलाप करान्दा आईरा? हांऊ बोल्हा, नी, पर लग करान्दा आईरा।⁵² क्यूंकि एभे ले एक घरा मन्झ पांज जणा आपु मन्झ वरोध रखणा, तीन जणा दोआ किन्हें, दो जणा तीना किन्हें।⁵³ बाबा म्हठे किन्हें, होर म्हठे या बाबा किन्हें वरोध रखणा; माऊआ मठी किन्हें, होर मठिया माऊआ किन्हें, सासा न्हूसा किन्हें, होर न्हूसा सासा किन्हें वरोध रखणा।⁵⁴ होर तिने भीडा किन्हें भी बोल्या, जेबे तुस्से बादला जो पश्चिम दिशा ले उठदे देख्हा ऐ, ता तुस्से झटपट बोल्हा ऐ, कि बरखा आऊणे वाळी ई; होर ऐहडा ई हुहां भी।⁵⁵ होर जेबे तुस्से दक्षिण दिसा ले हऊआ चलदी देख्हा ऐ, ता तुस्से बोल्हा ऐ, कि लू चलणे वाळी ई, होर ऐहडा ई हुहां भी।⁵⁶ हे कपटियो, तुस्से धरती होर सर्गा मन्झ फर्क ता करी सक्हा ऐ, पर एस जमाने रे बारे मन्झ फर्क करणा कि नी जाणदे?⁵⁷ होर तुस्से आप्हुऐ फैसला कि नी करी लैन्दे, कि ठीक क्या आ?⁵⁸ जेबे तू आपणे वरोधी साउगी हाकमा वाले जाएता रस्ते मन्झ ई तेस ले छुटणे री कोसिस कर ऐहडा नी हो, कि से तुजो न्यायी वाले खींजी के लई जाए, होर न्यायी तुजो अधिकारी जो सौंपी दे होर अधिकारी तुजो जेहला मन्झ पाई दे।⁵⁹ हांऊ तुस्सा किन्हें बोल्हा, कि जेबे तक तू एक एक पाई नी देई देहन्ना तेबे तक तुध तेथी ले नी छुटणा।

13¹ तेस टैम कुछ लोक आई पूजे, होर तेस किन्हें तिन्हा गलीलिया री गल करदे लगे, जिन्हा रा खून पिलातुसे तिन्हारी बलिया साउगी मिलाई रा था।² ये सुणी किन्हें तिने तिन्हा किन्हें ये बोल्या, क्या तुस्से ये समझ्या करहा ऐ, कि ये गलीली, बाकी होरी गलीलिया ले ज्यादा पापी थे कि तिन्हा पर ऐहडी विपति पई।³ हांऊ तुस्सा किन्हें बोल्हा, कि बिल्कुल

नई; पर अगर तुस्से मन नी फेरघे ता तुस्सा सभिया भी इहां नास हुई जाणा।⁴ या क्या तुस्से समझ्या करहा ऐ, कि स्यों ठारा लोक जिन्हा पर जे सिलोहा रा गुम्मट पया था, स्यों दभी किन्हें मरी गये: क्या स्यों यरुस्लेमा रे सब रैहणे वाळे ले ज्यादा पापी थे?⁵ हांऊ तुस्सा किन्हें बोल्हा, कि बिल्कुल नई; पर अगर तुस्से मन नी फेरघे ता तुस्सा सभिया भी इहां ई नास हुई जाणा।⁶ फेरी तिने ये दृष्टान्त भी बोल्या, कि केसी रे अंगूरा रे बगीचे मन्झ एक अंजीरा रा डाळ था: से तेस मन्झ फल टोळदा आया, पर नी पाया।⁷ तेबे तिने बगीचे रे माली किन्हें बोल्या, देखा, तीन साला ले हांऊ एस अंजीरा रे डाळा मन्झ फल टोळदा आया करहा, पर नी मिलदा, एस जो काटी दे ताकि ये जमीना जो ना रोके।⁸ तिने तेस जो जबाब दितेया, कि हे स्वामी, एस जो एस साल होर रैहणे दे; कि हांऊ एसरे चारो तरफ खणी किन्हें खाद पाई देंऊ।⁹ होर अगे जो ये फले ता वाह भला, नई ता एस जो काटी देआ।¹⁰ सव्ता रे ध्याडे से एक आराधनालय मन्झ उपदेस देआ करहा था।¹¹ होर देखा, एक जनाने थी, जेस्सा जो ठारा साला ले एक कमजोर करणे वाळी दुष्टात्मा लगीरी थी, होर से कुबडी हुई गईरी थी, होर केसी भी तरीके ले से सीधी नी हुई सकदी थी।¹² होर जेबे यीसुए से देखी, तिने से सादी लई, होर बोल्या हे नारी, तू आपणी दुर्बलता ले छुटी गयी।¹³ तेबे तिने तेस्सा पर हाथ रखे, होर से झटपट सीधी हुई गई, होर परमेसरा री जै जै कार करदी लगी।¹⁴ इधी कठे कि यीसुए से सव्ता रे ध्याडे से ठीक कितिरी थी, आराधनालया रा मुखिया गुस्सा करी किन्हें बोल्दा लग्या, कि छेह ध्याडे ऐ, जिन्हा मन्झ काम करणा चाहिए, इधी कठे तिन्हा ध्याडे मन्झ ई आई किन्हें ठीक हुई जाऊआ; पर सव्ता रे ध्याडे नी।¹⁵ ये सुणी किन्हें प्रभुए जबाब दितेया; हे कपटियो, क्या सव्ता रे ध्याडे तुस्सा मंझा ले हर एक आपणे बैल या गधे जो बाडे ले खोल्ही किन्हें पाणी पियांदे नी लई जांदा? होर क्या ये ठीक नी था, कि ये जनाने जो इब्राहीमा री बेटी ई जेस्सा जो सैताने ठारा साला ले बान्ही रक्खिरा था, ये सव्ता रे ध्याडे एस बंधना ले छुड़ाई जांदी? होर जेबे तिने ये गल्ला बोली, ता तेसरे सब वरोधी बेज्जत हुई गए, होर सारी भीड तिन्हा महिमा रे कामा ले जो से करहा था, खुस हुई।¹⁸ फेरी तिने बोल्या, परमेसरा रा राज केस साहीं आं? होर मैं तेसरी तुलना केस किन्हें करूं? होर राई रे एक दाणे रे बराबर आ, जेस जो केसी माहणुऐ लई किन्हें आपणे बगीचे मन्झ बाहया: होर से बडी किन्हें बडा डाळ बणी गया; होर सर्गा रे छिड़ूऐ तेसरी डाळीया पर बसेरा कितेया।²⁰ तिने दबारा बोल्या; हांऊ परमेसरा रे राजा री तुलना केस किन्हें करूं? होर से स्जेडे साहीं आं, जेस जो केसी जनाने लई किन्हें तीन पसेरी आटे मन्झ मलाया, होर हुंदे हुंदे सारा आटा सीजी गया।²² से नगर नगर, होर गाँव गाँव हुई

किन्हें उपदेस देंदा हुआ यरूशलेमा वखा जो जाया करहा था ।²³ होर केसीए तेस ले पुछेया; हे प्रभु, क्या उद्धार पाणे वाळे थोहडे ऐ? ²⁴ तिने तिन्हा किन्हें बोल्या; संगडे दरवाजे ले भीतर जाणे री कोसिस करा, क्यूंकि हांऊ तुस्सा किन्हें बोल्हा, कि बौहत ऐहडे हुणे जिन्हां जे भीतर जाणा चाहणा, पर नी जाई पाणा । ²⁵ जेबे घरा रा मालक उठी किन्हें दरवाजा बंद करी चुके, होर तुस्से बाहर खहड़ी किन्हें दरवाजे खटखटान्दे लगो, हे प्रभु आस्सा रे कठे दरवाजा खोलही दे, होर से जबाब दे कि हांऊ तुस्सा जो नी जाणदा, तुस्से केथी ले आईरे? ²⁶ तेबे तुस्सा बोल्दे लगणा, कि आस्से तेरे साम्हणे खाधेया पितेया होर तुस्से आस्सा रे कठे बजारा मन्झ उपदेस दितेया । ²⁷ पर तेस बोलणा, हांऊ तुस्सा किन्हें बोल्हा, हांऊ नी जाणदा तुस्से केथी ले आईरे? हे कुकर्मियो! तुस्से सभ मेरे वाले ले दूर हुई जाओ । ²⁸ तेथी रोणा होर दान्द पीसणा हुणा: जेबे तुस्से इब्राहीमा होर इसहाका होर याकुबा होर सब नबिया जो परमेसरा रे राजा मन्झ ब्याळे, होर आपणे आपा जो बाहर काहडदे हुए देखणा । ²⁹ होर पूर्व होर पश्चिम; उत्तर होर दक्षिणा ले लोका आई किन्हें परमेसरा रे राजा रे दावता मन्झ भागीदार हुणा । ³⁰ होर देखा, जितने पिछले ऐ स्यों पैहल्के हुणे, होर जितने पैहल्के ऐ, स्यों पिछले हुणे । ³¹ तेस टैम कितने फरिसिये आई किन्हें तेस किन्हें बोल्या, एथी ले निकळी किन्हें चली जा; क्यूंकि हेरोदेस तुजो मारी देणा चाहं । ³² तिने तिन्हा किन्हें बोल्या; जाई किन्हें तेस्सा लोमडी किन्हें बोली दे, कि देख हांऊ आज होर काला दुष्टात्मा जो काढहा होर बमारा जो ठीक करहा होर त्रीजे ध्याडे मां काम पूरा करणा । ³³ तेबे भी मुंजो आज होर काला होर परसी चलना जरुरी आ, क्यूंकि ये नी हुई सकदा कि कोई नबी यरूशलेमा ले बाहर मारेया जाए । ³⁴ हे यरूशलेमा! हे यरूशलेमा! तू जो नबिया जो मारी देहां, होर जो तेरे वाले भेजे गए तिन्हा जो पाल्थर मारहा ऐ; कितनी बारे में ये चाहेया, कि जिहां कुकडी आपणे बच्चेया जो आपणे फांखा हेठ कठा करहा ई, तिहां ई हांऊ भी तेरे बच्चेया जो कठा करूं, पर तैं नी चाहेया । ³⁵ देखा, तुस्सा रा घर तुस्सा रे कठे उजाड छाडी देआ करहा, होर हांऊ तुस्सा किन्हें बोल्हा; जेबे तक तुस्से नी बोल्हे, कि भागा वाळा आ से, जो प्रभु रे नांऊआं ले आंहुंआं, तेबे तक तुस्सा हांऊ फेरी कधी नी देखणा ।

14 ¹ फेरी से सब्ता रे ध्याडे फरिसिया रे मुखिया मंझा ले केसी रे घरा मन्झ रोटी खांदे गया: होर तिन्हारी तेस पर नज़र थी । ² होर देखा, एक माहणु तेसरे साम्हणे था, जेस जो जलंधरा री बमारी थी । ³ एता पर यीसूए व्यवस्थापका होर फरिसिया किन्हें बोल्या; क्या सब्ता रे ध्याडे खरा करणा ठीक आ, कि नई? पर स्यों चुपचाप रहै । ⁴ तेबे तिने तेस जो हाथ लगाई किन्हें ठीक कितेया, होर जाणे दितेया । ⁵ होर तिन्हा

किन्हें बोल्या; कि तुस्सा मंझा ले ऐहडा कुण आ, जेसरा गधा या बैल कुँए मन्झ पई जाए होर से सब्ता रे ध्याडे तेस जो बाहर ना काहडे? ⁶ स्यों इन्हा गल्ला रा कुछ जबाब नी देई सके । ⁷ जेबे तिने देखेया, कि मैहमान खास खास जगहा किधियो छांटहा ऐ ता दृष्टान्त देई किन्हें तिन्हा किन्हें बोल्या । ⁸ जेबे कोई तुजो ब्याहा मन्झ सादे, ता खास जगहा मन्झ नी बैठणा, केथी ऐहडा नी हो, कि तिने तुध ले भी केसी बडे जो सादा दितिरा हो । ⁹ होर जिने तुजो होर तेस जो दुहीं जो सादा दितिरा आ: आई किन्हें तेरे किन्हें बोले, कि एस जो जगहा दे, होर तेबे मुंजो बेजत हुई किन्हें सभी ले नीची जगहा मन्झ बैठणा पऊणा । ¹⁰ पर जेबे तू सादेया जाए, ता सभी ले छोटी जगहा बैठ्या, कि जेबे, जिने जे मुंजो सादा दितिरा से आए, ता तेरे किन्हें बोले कि हे दोस्त, आगे आई किन्हें बैठी जा; तेबे तेरे साउगी बैठणे वाळे रे साम्हणे तेरी जै जै कार हुणी । ¹¹ होर जो कोई आपणे आपा जो बडा बणाहंगा, से छोटा कितेया जाणा; होर जो कोई आपणे आपा जो छोटा बणाहंगा, से बडा कितेया जाणा । ¹² तेबे तिने आपणे सादणे वाळे किन्हें बोल्या, जेबे तू ध्याडी रा या रात की दावत तयार करे, ता आपणे दोस्ता या भाईया या टब्बरा या अमीर पडोसीया जो नी साद, केथी ऐहडा नी हो, कि स्यों भी तुजो सादा दे, होर तेरा प्रतिफल पूरा हुई जाए । ¹³ पर जेबे तू दावत करे, ता कंगाल, टुंडे, लंगडे, होर काणेया जो साद । ¹⁴ तेबे तुध भागा वाळा हुणा, क्यूंकि तिन्हा वाले बदले मन्झ तुजो देणे रे कठे कुछ नी आ, पर एता रा प्रतिफल तुजो धर्मी लोका रे जी उठणे पर दितेया जाणा । ¹⁵ तेस साउगी खाणा खाने वाळे मंझा ले एकिए ये गल्ला सुणी किन्हें तेस किन्हें बोल्या, भागा वाळा आ से, जेस जे परमेसरा रे राजा मन्झ रोटी खाणी । ¹⁶ तिने तेस किन्हें बोल्या: केसी माहणुए बडी दावत दिती होर तिने बौहत सारे लोक सादे । ¹⁷ जेबे खाणा तयार हुई गया, ता तिने आपणे दासा रे हाथा ले मैहमाना जो संदेसा भेजेया, कि आऊआ; एबे खाणा तयार आ । ¹⁸ पर स्यों सब माफी मांगदे लगे, पैहले वाळे तेस किन्हें बोल्या, मैं एक खेत मुले लईरा; होर जरुरी आ कि तेस जो देखी आंऊ: हांऊ तेरे किन्हें अरज करहा, मुंजो माफ करी दे । ¹⁹ दूजे बोल्या, मैं पांज जोडी बैल मुले लईरे: होर तिन्हा जो परखणे रे कठे जाया करहा: हांऊ तेरे किन्हें अरज करहा, मुंजो माफ करी दे । ²⁰ एकी होरिये बोल्या; मैं ब्याह करी लईरा, इधी कठे हांऊ नी आई सकदा ²¹ तिने दासे आई किन्हें आपणे मालका जो ये गल्ला सुणाई दिती, तेबे घरा रे मालके गुस्से मन्झ आई किन्हें आपणे दासा किन्हें बोल्या, नगरा रे बजारा होर गलिया मन्झ झटपट जाई किन्हें कंगाल, टुंडे, लंगडे होर काणेया जो एथी लई आऊआ । ²² सेवके दबारा बोल्या; हे स्वामी, जेहडा तैं बोल्या था, तेहडा ई आस्से करी दितेया; पर हली भी जगहा बाकि ई । ²³ मालके दासा किन्हें बोल्या, सडका पर होर बाडे

वखा जाई किन्हें लोका जो जबरदस्ती लई आऊआ ताकि मेरा घर भहरी जाए।²⁴ क्यूंकि हांऊ तुस्सा किन्हें बोल्हा, कि जो सादीरे थे तिन्हा मंझा ले एकीया भी मेरी दावता जो नी चखणा।²⁵ होर जेबे बडी भीड़ तेस साउगी जाया करहा ई थी, ता तिने पीछे मुडी किन्हें तिन्हा किन्हें बोल्या।²⁶ अगर कोई मेरे वाले आए, होर आपणे बाबा होर माऊआ होर लाडी होर बाल बच्चे होर भाई होर बैहण बल्कि आपणे प्राणा जो भी प्यारा जाणे, ता से मेरा चेला नी हुई सकदा।²⁷ होर जो कोई आपणे क्रूस नी चके, होर मेरे पीछे नी आए; से भी मेरा चेला नी हुई सकदा।²⁸ तुस्सा मंझा ले कुण आ जो गढ़ बणाणा चाहं, होर पैहले बैठी किन्हें हिसाब कताब ना जोडी ले, कि तेस जो पूरा करने री बिसात मेरे वाले हाई कि नी? ²⁹केथी ऐहडा नी हो, कि जेबे नींव तयार करी किन्हें तेता जो पूरा नी करी सके, ता सब देखणे वाळे ये बोली किन्हें मजाक उड़ान्दे लगे।³⁰ कि ये माहणु बणान्दा ता लगी गया, पर तयार नी करी सक्केया।³¹ या कुण ऐहडा राजा आ, कि दूजे राजे किन्हें लड़ाई करदे जाहां, होर पैहले बैठी किन्हें सोच विचार ना करी ले कि आपणे दस हजार स्पाही साउगी क्या से बीह हज़ार स्पाही वाळे आपणे वरोधी रा साहमणा करी सकहा कि नी? ³²अगर तेस मन्झ सामर्थ नी हुंगी ता तेसरा वरोधी हली रस्ते मन्झ ई हुणा तेबे तेस आपणा दूत भेजी किन्हें मेल मलाप करणा चाहणा।³³ एस तरीके ले तुस्सा मंझा ले जो कोई आपणा सभ कुछ छाडी नी दे, ता से मेरा चेला नी हुई सकदा।³⁴ लूण ता खरा आ, पर अगर लूणा रा सुआद बिगडी जाए, ता से केस चीज़ा किन्हें स्वादिष्ट बणाया जाणा। ³¹ तिने तिन्हा किन्हें बोल्या, कि जेबे स्यों मूसा होर नबी री नी सुणदे, ता अगर मरीरे मंझा ले कोई भी जी उठे तेबे भी तिन्हा तेसरी नी सुणनी।³⁵ से ना ता ज्मीना रे होर ना ता खादा रे काम आऊणा: तेता जो लोक बाहर सट्टी देहें: जेसरे सुणने रे कान हो से सुणी ले।

15 ¹सब चुंगी लैणे वाळे होर पापी तेस वाले आहूँआं ऐ थे ताकि तेस री सुणे। ²होर फरीसी होर साख्त्री कुडकुडाई किन्हें बोल्दे लगे, कि ये ता पापिया साउगी मिल्हा होर तिन्हा साउगी खाहां भी आ। ³तेबे तिने तिन्हा किन्हें ये दृष्टान्त बोल्या। ⁴तुस्सा मंझा ले कुण ऐहडा हुणा जेसरी जे सौ भेडा हो, होर तिन्हा मंझा ले एक गुआही जाए ता नीडीनुएं भेडा जो जंगला मन्झ छाडी किन्हें, तेस्सा गुआही री भेडा जो तेबे तक टोळहा जेबे तक से मिली नी जाए।⁵ होर जेबे मिली जाहीं, तेबे से बडी खुसी किन्हें तेस्सा भेडा जो खऊए पर चकी किन्हें ल्याऊंआ।⁶ होर घरा मन्झ आई किन्हें दोस्ता होर पड़ोसीया जो कठे करी किन्हें बोल्हा, मेरे साउगी खुसी मनाऊवा, क्यूंकि मेरी गुआही री भेड मिली गई री।⁷ हांऊ तुस्सा किन्हें बोल्हा, कि ठीक इहां से एक मन फिराणे वाळे पापी रे बारे मन्झ भी स्वर्गा

मन्झ इतनी ई खुसी हुणी, जितनी कि तिन्हा नीडीनुएं ऐहडे धर्मिया रे बारे मन्झ नी हुन्दी, जिन्हा जो मन फिराणे री जरूरत नी हुन्दी।⁸ या कुण ऐहडी जनाने हुणी, जेस वाले जे दस सिक्के हो, होर तिन्हा मंझा ले एक गुआही जाए; ता से दीया भखाई किन्हें होर घरा जो झाडी बुहारी किन्हेंजेबे तक मिली नी जाए, बडी मैहनत करी किन्हें तेस जो टोळहा ई।⁹ होर जेबे मिली जाहां, ता से आपणी सहेलिया होर पड़ोसीया जो कठे करी किन्हें बोल्हा ई, मेरे साउगी खुसी मनाऊवा, क्यूंकि मेरी गुआही रा सिक्का मिली गईरा।¹⁰ हांऊ तुस्सा किन्हें बोल्हा; कि ठीक इहां ई से एक मन फिराणे वाळे पापी रे बारे मन्झ परमेसरा रे स्वर्गदूता रे साम्हणे खुसी हुहां ई।¹¹ फेरी तिने बोल्या, केली माहणु रे दो म्हठे थे।¹² तिन्हा मंझा ले छोटे म्हठे, बाबा किन्हें बोल्या कि हे बापू जायदादा मन्झा ले जो मेरा हिस्सा आ, से मुंजो देई दे! होर तिने बाबे तिन्हा दुंही म्हठे जो आपणी जायदाद बांडी दिती।¹³ होर हल्ली बौहत ध्याडे नी हुए थे कि छोटे म्हठा सभ कुछ कठा करी किन्हें एक दूर देसा जो चली गया होर तेथी तिने बुरे कामा मन्झ आपणी सारी जायदाद खर्च करी दिती।¹⁴ जेबे से सभ कुछ खर्च करी बैठ्या, ता तेस देसा मन्झ बडा भारी अकाल पया, होर से कंगाल हुई गया।¹⁵ होर से तेस देसा रे रैहणे वाळे एक आदमी वाले मजदूरी करदा लग्या: तिने से आपणे खेता मन्झ सुअर चरांदे भेजी दितेया।¹⁶ होर से चाहं था, कि जो फळीया सुअर खाहें थे तिन्हा किन्हें से भी आपणा पेट भरे; होर तेस जो कोई कुछ नी देंदा था।¹⁷ जेबे से आपणे आपा मन्झ आया, तेबे से बोल्दा लग्या, कि मेरे बाबा रे कितने मजदूर ऐ, जिन्हा जो भर पेट खाणा मिल्हा, होर हांऊ एथी भूखा मरेया करहा।¹⁸ मां एभे उठी किन्हें आपणे बाबा वाले जाणा होर तेस किन्हें बोळणा कि बापू जी मैं स्वर्गा रे ब्रोधा मन्झ होर तेरी नजरा मन्झ पाप कितिरा।¹⁹ एबे हांऊ एस लायक नी रैहया कि तेरा म्हठा कैहलाऊं, तू मुंजो आपणे एक मजदूरा मंझा ले एकी साहीं जाणी किन्हें मजदूरी पर रखी ले।²⁰ तेबे से उठी किन्हें आपणे बाबा वाले चली गया: से हल्ली दूर ई था, कि तेसरे बाबे से देखी लया होर तरसा किन्हें भहरी गया होर दोडी किन्हें तिने से गले लगाया, होर बौहत प्यार कितेया।²¹ तिने म्हठे आपणे बाबा किन्हें बोल्या; बापू जी, मैं स्वर्गा रे ब्रोधा मन्झ होर तेरी नजरा मन्झ पाप कितिरा, होर एबे हांऊ एस लायक नी रैहया कि तेरा म्हठा कैहलाऊं।²² पर बाबे आपणे दासा किन्हें बोल्या; झटपट खरे ले खरा कपडे काढी किन्हें तेस जो पैहनाऊवा, होर तेसरे हाथा मन्झ गुठी, होर पैरा मन्झ जूते पैहनाऊआ।²³ होर पाळी रा जानवर लयाई किन्हें काटा ताकि आस्से खाईए होर खुसी मनाई ऐ।²⁴ क्यूंकि मेरा ये म्हठा मरी गईरा था, से जीऊन्दा हुई गया: जो गुआही गईरा था, एभे से मिली गया; होर स्यों खुसी मणान्दे लगे।²⁵ पर तेसरा बडा

म्हठा खेता मन्झ था: होर जेबे से घरा रे नेडे पुज्जेया, ता तिने गाणे बजाणे होर नाचणे री अवाज सुणी।²⁶ होर तिने एक दासा जो सादी किन्हें पुछेया; ये क्या हुएया करहा? ²⁷ तिने तेस किन्हें बोल्या, तेरा भाई आईरा, होर तेरे बाबे पाळीरा जानवर काटिरा, इधी कठे कि से भला चंगा वाप्स मिली गया। ²⁸ ये सुणी किन्हें से गुस्से किन्हें भहरी गया, होर अन्दर नी गया: पर तेसरा बाब बाहर आई किन्हें तेस जो मणान्दा लग्या। ²⁹ तिने आपणे बाबा जो जबाब दितेया, कि देख; हांऊ इतने साला ले तेरी सेऊआ करेया करहा, होर कधी भी तेरा हुकम नी टाळेया, तेबे बी तैं मुंजो कधी एक बकरी रा बच्चा नी दितेया, कि हांऊ आपणे दोस्ता किन्हें खुसी मणान्दा। ³⁰ पर जेबे तेरा ये म्हठा आया, जिने जे तेरी जायदाद वेश्यावृत्ति मन्झ उडाई दिती, ता तैं तेसरे कठे पाळीरा जानवर काटेया। ³¹ तिने तेस किन्हें बोल्या; बेटा, तू ता हमेसा मेरे साउगी रँहया; होर जो कुछ मेरा आ से सभ कुछ तेरा ई आ। ³² पर एभे खुसी मनाणी होर मगन हुणा चाहिए क्यूंकि ये तेरा भाई मरी गईरा था, ये दबारा जीऊन्दा हुई गया; गुआही गईरा था, पर एभे मिली गया।

16 ¹ फेरी तिने चेले किन्हें भी बोल्या; केसी धनवाना रा एक भंडारी था, होर लोके तेसरे साम्हणे तेस पर ये दोस लगाया कि ये तेरी सारी जायदाद उडाया करहा। ² इधी कठे तिने तेस जो सादी किन्हें बोल्या, ये क्या आ जो हांऊ तेरे बारे मन्झ सुणेया करहा? आपणे भंडारीपना रा लेखा जोखा दे; क्यूंकि तू आगे जो भंडारी नी रही सकदा। ³ तेबे भंडारी सोचदा लग्या, कि एबे हांऊ क्या करूं? क्यूंकि मेरा मालक एबे भंडारी रा काम मेरे ले छुटेया करहा: माटा ता मेरे ले नी खहणना: होर भीख मांगणे ले मुंजो शर्म आऊआं ई। ⁴ मैं समझी गया, कि मुंजो क्या करणा चाहिए: ताकि जेबे हांऊ भंडारी रे कामा ले हटीई दितेया जांऊ, ता लोका आपणे घरा मन्झ मेरा स्वागत करणा। ⁵ होर तिने आपणे मालका रे कर्जदारा मंझा ले एकी जो सादी किन्हें पैहले कर्जदारा ले पुछेया, कि तेरे पर मेरे मालका रा कितना कर्जा आ? ⁶ तिने बोल्या, सौ मण तेल; तेबे तिने तेस किन्हें बोल्या, कि आपणा खाता ले होर बैठी किन्हें झटपट पन्ज्याह लिख। ⁷ फेरी दूजे कर्जदारा ले पुछेया; तेरे पर कितना कर्जा आ? तिने बोल्या, सौ मण कणक; तेबे तिने तेस किन्हें बोल्या; आपणा खाता ले होर अस्सी लिखी दे। ⁸ मालके तेस पापी भंडारी री बडाई किती, कि तिने चतुराई किन्हें काम कितेया; क्यूंकि एस संसारा रे लोक आपणे टैमा रे लोका ले रीति व्यवहारा मन्झ, ज्योति रे लोका ले ज्यादा चतर ऐ। ⁹ होर हांऊ तुस्सा किन्हें बोल्हा, कि सांसारिक दौळता किन्हें आपणे कठे दोस्त बणाई लऊआ; क्यूंकि जेबेधन दौलत खत्म हुई जाणी, तिन्हा अनंत निवासा मन्झ तुस्सा रे स्वागत करणा। ¹⁰ जो

थोहडे ले थोहडी गल्ला मन्झ सच्चा आ, से बौहता मन्झ भी सच्चा आ, होर जो थोहडे ले थोहडी गल्ला मन्झ बईमान आ, से बौहता मंझा भी बईमान आ। ¹¹ इधी कठे जेबे तुस्से सांसारिक धन दौलता रे कठे भरोसे रे लायक नी रँहे ता सच्ची दौलता रे बारे मन्झ तुस्सा पर केस भरोसा करणा? ¹² होर अगर तुस्से पराये रे धन दौलता मन्झ भरोसे रे लायक नी रँहे, ता जो तुस्सा रा आ, से तुस्सा जो केस देणा। ¹³ कोई दास दो मालका री सेऊआ नी करी सकदा: क्यूंकि तेस एकी किन्हें बैर होर दूजे किन्हें प्यार रखणा; या एकी किन्हें मिली के रँहणा होर दूजे जो तिरस्कार करणा: तुस्से परमेसरा होर धन दौलता री सेऊआ एक साथ नी करी सकदे। ¹⁴ फरीसी जो लोभी थे, ये सभ गल्ला सुणी किन्हें तेसरा मजाक उडान्दे लगे। ¹⁵ तिने तिन्हा किन्हें बोल्या; तुस्से ता माहणु रे साम्हणे आपणे आपा जो धर्मी बणाहें: पर परमेसर तुस्सा रे मना जो जाणहां, क्यूंकि जो चीज माहणु री नजरा मन्झ बडी ई, से परमेसरा री नजरा मन्झ बुरी ई। ¹⁶ यहून्ना रे टैमा तक ता व्यवस्था होर नबीया रा प्रचार हुआ, तेता ले बाद परमेसरा रे राजा रा सुसमाचार सुणाया करहा ऐ, होर हर कोई तेता मन्झ बौहत तेजी किन्हें प्रवेस हुएया करहा। ¹⁷ पर व्यवस्था रा एक एक बिंदु मिटणे रे बजाय सर्गा होर धरती रा टळी जाणा असान आ। ¹⁸ जो कोई आपणी लाडी जो छाडी किन्हें दूजी किन्हें ब्याह करहा, से व्यभिचार करहा, होर जो कोई ऐहडी छाडी गई री जनाने किन्हें ब्याह करहा, से भी व्यभिचार करहा। ¹⁹ एक धनवान माहणु था जो बेंजणी कपडे होर मलमला रे कपडे पैहना था, होर हर रोज सुख - विलासा होर धूम धामा किन्हें रँहया था। ²⁰ होर लाजर नांऊआं रे एक कंगाला जो जेसरा जे सारा सरीर जख्मा किन्हें भहरी रा हुहां था तेसरे दरवाजे वाले छाडी देहां ऐ थे। ²¹ होर से चाहं था, कि धनवाना री मेजा प्र्याहले री जूठना किन्हें आपणा पेट भरे; बल्कि कुत्ते भी आई किन्हें तेसरे जख्मा जो चाटहा ऐ थे। ²² होर ऐहडा हुएया कि से कंगाल मरी गया, होर स्वर्गदूते तेस जो लई किन्हें इब्राहीमा रे फाहले मन्झ पौहंचाया; होर से धनवान भी मरी गया, होर गाडेया गया। ²³ होर अधोलोका मन्झ तिने तड़फदे हुए जेबे आपणी हाखिया चकी, ता तिने दूरा ले अब्राहमा री गोदा मन्झ लाजर देखेया। ²⁴ होर तिने चिल्लाई किन्हें बोल्या, हे पिता अब्राहम, मेरे पर दया करी किन्हें लाजरा जो भेजी दे, ताकि से आपणी गुठी रा सिरा पाणी मन्झ डुबोई किन्हें मेरी जीभा जो ठंडा करी दे, क्यूंकि हांऊ एस आगा मन्झ तड़फेया करहा। ²⁵ पर इब्राहमे बोल्या; हे बेटे याद कर, कि तैं आपणे जिंदगी मन्झ खरी चीज़ा लई चुकिरा, होर तिहां ई लाजर बुरी चीज़ा: पर एभे से एथी सांति पाया करहा, होर तू तड़पेया करहा। ²⁶ होर इन्हा सभ गल्ला जो छाडी किन्हें आस्सा रे होर तुस्सा रे बीचा मन्झ एक भारी गढा ठैहराईरा

कि जो एथी ले तेस पार तुस्सा वाले जाणा चाहे, स्यों ना जाई सके, होर ना कोई तेथी ले एस पार आस्सा वाले आई सके। 27 तिने बोल्या; ता हे पिता हांऊ तुध किन्हें अरज करहा, कि तू तेस जो मेरे पिता रे घरा भेजी दे। 28 क्यूंकि मेरे पांज भाई ऐ, से तिन्हा रे साम्हणे इन्हा गल्ला री गवाही दे, ऐहडा नी हो कि स्यों भी एस पीडा री जगहा मन्झ आए। 29 इब्राहीमे तेस किन्हें बोल्या, तिन्हा वाले ता मूसा होर नबी री कताबा ई, स्यों तिन्हारी सुणे। 30 तिने बोल्या; नई, हे पिता इब्राहीम; पर अगर कोई मरीरे मंझा ले तिन्हा वाले जाए, ता तिन्हा मन फिराणा। 31 तिने तिन्हा किन्हें बोल्या, कि जेबे स्यों मूसा होर नबी री नी सुणदे, ता अगर मरीरे मंझा ले कोई भी जी उठे तेबे भी तिन्हा तेसरी नी सुणनी।

17 1 फेरी तिने आपणे चले किन्हें बोल्या; ये हुई नी सकदा कि ठोकर नी लगे, पर हाय, तेस आदमी पर जेसरे कारण जे स्यों आंऊआ ई। 2 जो इन्हा छोटी मंझा ले केसी एकी जो ठोकर खुआहां, तेसरे कठे ये खरा हुंदा, कि चक्की रा पाट तेसरे गळा मन्झ लटकाया जांदा, होर तेस जो द्रयाऊआ मन्झ सटी दितेया जांदा। 3 सावधान रहूआ; अगर तेरा भाई पाप करे ता तेस जो समझा, होर अगर से पछताए ता तेस जो माफ करी दे। 4 अगर पूरे ध्याड़े से सात बार तेरे खलाफ पाप करे, होर सात बारी तेरे वाले आई किन्हें आई किन्हें बोले, कि हांऊ पछताया करहा ता तेस जो माफ करी देया। 5 तेबे प्रेरिते प्रभु किन्हें बोल्या, आस्सा रा विस्वास बढ़ाऊआ। 6 प्रभुए बोल्या; कि अगर तुस्सा जो राई रे दाणे रे बराबर भी विस्वास आ, ता तुस्से एस तुता रे डाळा किन्हें बोल्दे कि जड़ा ले पठी किन्हें द्रयाऊआ मन्झ लगी जा, ता तेस तुस्सा री गल मनी लैणी थी। 7 पर तुस्सा मन्झा ले ऐहडा कुण आ, जेसरा दास हळ च्लाहां, या भेडा चराहां, होर जेबे से डोहरीया ले आंऊआ, ता तेस किन्हें बोले झटपट आई किन्हें खाणा खांदे बैठी जा। 8 होर ये नी बोले, कि मेरा खाणा तयार कर: होर जेबे तक हांऊ खाणा खांऊ तेबे तक कमर बान्ही किन्हें मेरी सेऊआ कर; एता ले बाद तू भी खाई पी लैणा। 9 क्या से तेस दासा रा धन्याबाद करहा, क्यूंकि तिने स्यों चीज़ा किती जिन्हा रा हुकम तेस जो दितिरा था। 10 इहां ई तुस्से भी, जेबे तिन्हा सभ कामा जो करी बैठघे जिन्हा रा जे हुकम तुस्सा जो दितिरा था, ता बोलणा, कि आस्से निकम्मे दास ऐ; कि जेहडा आस्सा जो करणा चाहिए था तेहडा ई कितेया। 11 होर ऐहडा हुआ किसे यरुस्लेमा जो जांदे वक्त सामरिया होर गलीला मंझा ले हुई किन्हे जाया करहा था। 12 होर केसी गाऊंआ मंझ जांदे वक्त तेसजो दस कोठी मिले। 13 होर तिन्हे दूर खहड़ी किन्हे, जोरा जोरा किन्हे बोल्या, हे यीसु, हे स्वामी, आस्सा पर दया करा। 14 तिने तिन्हा जो देखी किन्हे बोल्या, जाऊआ; होर आपणे आपा जो याजका जो दस; होर जांदे जांदे

स्यों सुद्ध हुई गए। 15 तेबे तिन्हा मंझा ले एकीए ये देखी किन्हे कि हाऊं ठीक हुई गया, जोरा जोरा किन्हे परमेसरा री जै जै कार करदा हुआ वाप्स आया। 16 होर से मुंहा रे भारे तेसरे पैरा पई किन्हे, तेसरा धन्यबाद करदा लग्या; होर से सामरी था। 17 एता पर यीसुए बोल्या, क्या दसा रे दस सुद्ध नी हुए ता फेरी स्यों नौ केथी ए? 18 क्या एस परदेसी जो छाडी किन्हे होर कोई नी निकल्या, जो परमेसरा री जै जै कार करदा? 19 तेबे तिने तेस किन्हे बोल्या; उठी किन्हे चली जा; तेरे विस्वासे तू ठीक कितेया। 20 जेबे फेरीसिए तेस ले पुछेया, कि परमेसरा रा राज कधी आऊणा? ता तिने तेस जो जबाब दितेया, कि परमेसरा रा राज प्रगट रूपा ले नी आउंदा। 21 होर लोका ये नी बोलणा, कि देखा, एथीआ, या तेथी आ, क्यूंकि देखा, परमेसरा रा राज तुस्सा मंझ आ। 22 होर तिने चले किन्हे बोल्या; स्यों ध्याड़े आऊणे, जिन्हा मंझ तुस्सा माहणु रे पुत्रा रे ध्याड़े मंझा ले एकी जो देखणा चाहणा, होर तुस्सा ये नी देखी पाणा। 23 लोका तुस्सा किन्हे बोलणा, देखा, तेथीआ, या देखा एथीआ; पर तुस्से चली देखा जांदे होर ना तिन्हारे पीछे हुई जाए। 24 क्यूंकि जिहां बिजली सर्गा रे एक तरफा ले चमकी किन्हे सर्गा रे दुजी तरफा जो चमका ई, तिहां ई माहणु रे पुत्रा भी आपणे ध्याड़े मंझ प्रगट हुणा। 25 पर पैहले जरूरी आ, किसे बौहत दुख उठाए, होर एस जमाने रे लोका तेसरा तिरस्कार करणा। 26 जेहडा नूह रे टैमा मंझ था, तेहडा ई माहणु रे पुत्रा रे ध्याड़े मंझ भी हुणा। 27 जेस ध्याड़े तक नूह जहाजा पर नी चढेया, तेस ध्याड़े तक लोक खांदे पींदे रैहे, होर तिन्हा मंझ ब्याह सादी हुन्दे रैहे; तेबे जल प्रलय आया होर तिन्हा सभैरा नास करी दितेया। 28 होर जेहडा लूता रे टैमा मंझ हुएया था, कि लोक खांदे पींदे लेण देण करदे, डाळ लगान्दे होर घर बणान्दे रैहे। 29 पर जेस ध्याड़े लूत स्दोमा ले नीकल्येया, तेस ध्याड़े आग होर गन्धक सर्गा ले बरसी होर सभ कुद्ध नास करी दितेया। 30 माहणु रे पुत्रा रे प्रगट हुणे रे टैमा भी ऐहडा ई हुणां। 31 तेस ध्याड़े जो कोठे पर हो; होर तेसरा समान घरा मंझहो, से तेसजो लैणे रे कठे हेठ नी आए, होर तिहां ई जो डोहरीया मंझ हो स्यों वाप्स पीछे नी हटे। 32 लूता री लाडी जो याद रखा। 33 जो कोई आपणा प्राण बचाणा चाहंगा तेस से गुआई देणा, होर जो कोई तेस जो गुआई दे तेस से बचाई लैणा। 34 हाऊं तुस्सा किन्हे बोल्हा, तेस राती एक मांजे प्र्याहले दो माहणु हुणे, एक लई जाणा होर दूजा छाडी दितेया जाणा। 35 दो जनाने साउगी साउगी चकी पिस्णी, एक लई जाणी, होर दुजी छाडी दिती जाणी। 36 दो जण डोहरीया मंझ हुणे एक लई जाणा दूजा छाडी दितेया जाणा। 37 ये सुणी किन्हे तिन्हे तेसले पुछेया, हे प्रभु ये केथी हुणा? तिने तिन्हा किन्हे बोल्या, जेथी ल्हास ई, तेथी गिद्ध कठे हुणे।

18 ¹ फेरि तिने एतारे बारे मंझ कि हमेसा प्रार्थना करणा होर हियाव नी छाडना चाहिए तिन्हा किन्हे ये दृष्टांत बोल्या। ² कि केली नगरा मंझ एक न्यायी रेंहयां था: जो ना परमेसरा ले डरहा था होर ना केली माहणु री परवाह करहा था। ³ होर तेसनगरा मंझ एक विधवा भी रेंहयां थी: जो तेस वाले आई किन्हे बोल्या करहा ई थी, कि मेरा न्याय कर होर मुंजों मेरे वरोधी ले बचा। ⁴ से बौहत टैमा तक आनाकानी करदा रैहया पर बाद मंझ तिने मना मंझ सोची किन्हे बोल्या, हालांकि हाऊं ना ता परमेसरा ले डरहा, होर ना माहणु री कुछ परवाह करहा। ⁵ तेबे भी ये विधवा मुंजों परेसान करहा ई, ईधी कठे मां तेस्सा रा न्याय चुकाणा केथी ऐहडा नी हो कि घडी घडी आई किन्हे बाद मंझ मेरी नाका मंझ दम करे। ⁶ प्रभुए बोल्या, सुणा, कि ये पापी न्यायी क्या बोल्हा? ⁷ एता कठे क्या परमेसरा आपणे चुणीरे लोका रा न्याय नी चुकाणा, जो राती ध्याडी तेसरी दुहाई देहां ऐं; होर क्या तेस तिन्हारे बारे मंझदेर करणी? ⁸ हाऊं तुस्सा किन्हे बोल्हा; तेस झटपट तिन्हारा न्याय चुकाणा; तेबे भी माहणुरे पुत्रा जेबे आऊणा, ता क्या तेस धरती मंझ विस्वास पाणा? ⁹ फेरि यीसुए तिन्हा लोका रे कठे भी जो आपणे आपा जो खरा मन्हां ऐं थे, होर केली जोभी कुछ नी समझदे थे, ये दृष्टांत सुणाया। ¹⁰ किदो माहणु मंदरा मंझ प्रार्थना करने रे कठे गए; एक फरीसी था होर दूजा चुंगी लैणेवाळा। ¹¹ फरीसी खडा हुई किन्हे आपणे मना मन्झ इहां प्रार्थना करदा लग्या, कि हे परमेसर, हाऊं तेरा धन्यावाद करहा, कि हाऊं होरी माहणु साहीं डाकू, ठग होर व्यभिचारी नी आ, होर ना एस चुंगी लैणे वाळे साहीं आ। ¹² हाऊं हमे मंझा ले दो बार उपवास करहा; हाऊं आपणी सभ कमाई रा दसुआं हिस्सा भी देहां। ¹³ पर चुंगी लैणे वाळे दूर खहडी किन्हे, स्वर्गा वखा हाखिया नी चकी, पर आपणी छाती पिटी पिटी किन्हे बोल्या: हे परमेसर मुंजो पापी पर दया कर। ¹⁴ हाऊं तुस्सा किन्हे बोल्हा, कि से दूजा नी; पर येही आदमी धर्मी हुई किन्हे घरा जो गया; क्यूंकि जो कोई आपणे आपा जो बडा बणाहंगा, से छोटा कितेया जाणा; होर जो आपणे आपा जो छोटा बणाहंगा, से बडा कितेया जाणा। ¹⁵ फेरि लोक आपणे बच्चे जो भी तेस वाले ल्याऊन्दे लगे, कि से तिन्हा पर हाथ रखे; होर चेले तिन्हा जो झिडकदे लगे। ¹⁶ यीसुए बच्चे जो नेडे सादी किन्हे बोल्या, बच्चे जो मेरे वाले आऊणे देआ, होर तिन्हा जो नाह नी करा: क्यूंकि परमेसरा रा राज ऐहडा रा आ। ¹⁷ हाऊं तुस्सा किन्हे सच सच बोल्हा, कि जो कोई परमेसरा रे राजा जो बच्चे साहीं नी मनघा ता तेस तेता मन्झ कधी प्रवेस नी करी पाणा। ¹⁸ केली मुखिए तेस ले पुछेया, हे अच्छे गुरु, अनंत जिंदगी रा अधिकारी हुणे रे कठे हाऊं क्या करूं? ¹⁹ यीसुए तेस किन्हे बोल्या; तू मुंजो खरा किधियो बोल्हा? कोई खरा नी

आ, सिर्फ एक, मतलब परमेसर। ²⁰ तू हुक्मा जो ता जाणहां, की व्यभिचार नी करणा, झूठी गुआही नी देणी, आपणे बाबा होर माऊआ री इज्जत करणी। ²¹ तिने बोल्या, हाऊं ता इन्हा गल्ला जो बचपना ले ई मनदा अईरा। ²² ये सुणी किन्हे यीसुए तेस किन्हे बोल्या, तुध मन्झ एबे भी एक गल्ला री कमी ई, आपणा सभ कुछ बेचीं किन्हे कंगाला जो बांडी दे; होर तुजो स्वर्गा मन्झ धन मिलणा, होर आई किन्हे मेरे पीछे चली पऊ। ²³ से ये सुणी किन्हे बौहत उदास हुएया, क्यूंकि से बौहत अमीर था। ²⁴ यीसुए तेस जो देखी किन्हे बोल्या; अमीरा रा परमेसरा रे राजा मन्झ प्रवेस करणा केहडा कठण आ? ²⁵ परमेसरा रे राजा मन्झ अमीरा रे प्रवेस करणे ले ऊंटा रा सुई रे नाके मन्झा ले निकळना आसान आ। ²⁶ होर तिन्हे सुणने वाळे बोल्या, ता फेरी केस रा उद्धार हुई सकहा? ²⁷ तिने बोल्या; जो माहणु ले नी हुई सकदा, से परमेसरा ले हुई सकहा। ²⁸ पतरसे बोल्या; देखा, आस्से ता घर बार छाडी किन्हे तेरे पीछे हुई गईरे। ²⁹ तिने तिन्हा किन्हे बोल्या; हाऊं तुस्सा किन्हे सच सच बोल्हा, कि ऐहडा कोई नी आ जिने परमेसरा रे राजा रे कठे घर या लाडी या भाई या माऊ बाब या बाल बच्चे जो छाडी दितिरा हो। ³⁰ होर एस टैम कई गुणा ज्यादा नी मिलेया हो; होर परलोका मन्झ अनंत जिन्दगी। ³¹ फेरी तिने बारा चेले जो साउगी लई किन्हे तिन्हा किन्हे बोल्या; देखा, आस्से यरुस्लेमा जो जाहें, होर जितनी गल्ला माहणु रे पुत्रा रे कठे नबीया रे ज़ीये लिखी गईरी स्यों सब पूरी हुणी। ³² क्यूंकि से गैर जातिया रे हाथा मन्झ सौम्पेया जाणा, होर स्यों तेसरा मजाक उडान्दे लगे; होर तेसरी बेज्जती करणी, होर तेस पर थुकणा। ³³ होर तेस जो कोडे मारणे, होर जानी ले मारी देणा होर त्रीजे ध्याडे तेस जीउदे हुई जाणा। ³⁴ होर तिन्हे इन्हा गल्ला मंझा ले कोई गल नी समझी: होर ये गल तिन्हा मन्झ छुपी गई, होर जो बोल्या गईरा था से तिन्हा री समझा मंझ नी आया। ³⁵ जेबे से यरीहो रे नेडे पुजेया, ता एक काणा सडका रे बाहडे बैठी किन्हे भीख मान्गेया करहा था। ³⁶ होर से भीडा री चलणे री अवाज सुणी किन्हे पुछदा लग्या, ये क्या हुएया करहा? ³⁷ तिन्हे तेस जो बोल्या, कि यीसु नासरी जाया करहा? ³⁸ तेबे तिने जोरा किन्हे बोल्या, हे यीसु दाऊदा री संतान, माह पर दया कर। ³⁹ जो अगे जाया करहा ऐ थे, स्यों तेस जो झिडकदे लगे कि चुप रैह: पर से होर भी च्लान्दा लग्या, कि हे दाऊदा री संतान, मुंजो पर दया कर। ⁴⁰ तेबे यीसुए खडे हुई किन्हे हुकम दितेया कि तेस जो मेरे वाले ल्याऊआ, होर जेबे से नेडे आया, ता तिने तेस ले ये पुछेया। ⁴¹ तू क्या चाहं, कि हाऊं तेरे कठे करूं? तिने बोल्या; हे प्रभु, ये कि हाऊं देखदा लगी जाऊं। ⁴² यीसुए बोल्या; ता देखदा लगी जा, तेरे विस्वासे तू ठीक करी दितेया। ⁴³ होर से झटपट देखदा लगी गया; होर परमेसरा री जै जै कार करी किन्हे तेसरे पीछे

चली पया, होर सभ लोके देखी किन्हें परमेसरा री जै जै कार किती ।

19 ¹ होर से यरीहो मन्झा ले हुई किन्हें जाया करहा था । ² होर देखा, जक्कई नांऊआं रा एक माहणु था जो चुंगी लैणे वाळे रा मुखिया था होर से अमीर आदमी था । ³ से यीसु जो देखणा चाहां था कि से कुणहा? पर भीड़ा री वजहा ले से नी देखी सक्या । क्यूंकि से नाटा था । ⁴ तेबे तेस जो देखणे रे कठे से आगे दौडी किन्हें एक गुलरा रे डाळा प्रयाहले चहडी गया, क्यूंकि यीसु तेस पैडे ले हुई किन्हें जाया करहा था । ⁵ जेबे यीसु तेस जगहा पर पुज्जेया, ता तिने ऊपर देखी किन्हें तेस जो बोल्या; हे जक्कई झटपट उतरी जा; क्योँक आज मेरा तेरे घरा मन्झ रहणा जरुरी आ । ⁶ से झटपट उतरेया होर से तेस जो खुसी किन्हें आपणे घरा जो लई गया । ⁷ ये देखी किन्हें सभ लोक कुडकूडान्दे लगे, से ता एक पापी माहणु रे घरा चली गया । ⁸ जक्कई ऐ खहडी किन्हें प्रभु किन्हें बोल्या; हे प्रभु, देखा हांऊ आपणी आधी जायदाद कंगाला जो देई देहां, होर अगर मैं केसी रा कुछ भी बईमानी करी किन्हें लई लईरा हो, ता तेस जो मां चार गुणा वाप्स करी देणा । ⁹ तेबे यीसुए तेस किन्हें बोल्या; आज एस घरा मन्झ उद्धार आई रा, इधी कठे कि ये भी अब्राहमा री एक संतान ई । ¹⁰ क्यूंकि माहणु रा पुत्रतिन्हा जो टोळदे होर तिन्हारा उद्धार करदा आईरा, स्यों जे गुआही गरैरे । ¹¹ जेबे स्यों ये गल्ला करेया करहा ऐ थे, ता तिने एक दृष्टान्त बोल्या, इधी कठे कि से यरुस्लेमा रे नेडे था, होर स्यों सम्झेया करहा ऐ थे, कि परमेसरा रा राज हूण एभे प्रगट हुणा चाहां । ¹² एता कठे तिने बोल्या, एक अमीर आदमी दूर देसा जो चली गया ताकि राजपद पाई किन्हें वाप्स आए । ¹³ होर तिने आपणे दसा मंझा ले दस दास सादे होर तिन्हा जो दस मोहरा दिती, होर तिन्हा किन्हें बोल्या, मेरे वाप्स आऊणे तक लेण देण नी करणा । ¹⁴ पर तेसरे नगरा मन्झ रहणे वाळे तेस किन्हें बैर रक्खा ऐ थे, होर तेसरे पीछे दूता रे ज्रीये सादा भेजेया, कि आस्से नी चाहंदे, कि ये आस्सा पर राज करे । ¹⁵ जेबे से राजपद पाई किन्हें वाप्स आई गया, ता ऐहडा हुएया कि तिने आपणे दासा जो जिन्हा जो तिने पैसे देई दितीरे थे, स्यों आपणे वाले सादे ताकि ये जाणी सके कि लेण देण करी किन्हें क्या क्या कमाया । ¹⁶ तेबे पैहले दासे आई किन्हें बोल्या; कि हे मेरे स्वामी तेरी मोहरा किन्हें मैं होर दस मोहरा कमाई । ¹⁷ तिने तेस किन्हें बोल्या; साबास, खरे दास, तू भागा वाळा आ, तू बौहत थोहडे मन्झ विश्वासी निकळेया एबे दस नगरा रा हक तू रखी ले । ¹⁸ दूजे आई किन्हें बोल्या; हे स्वामी मैं तेरी मोहरा किन्हें पांज होर मोहरा कमाई । ¹⁹ तिने बोल्या, कि तू भी पांज नगरा पर हाकम बणी जा । ²⁰ त्रीजे आई किन्हें बोल्या; हे स्वामी देख, तेरी मोहर ऐ ई, जो मैं तोलिए मन्झ बान्ही रखिरी । ²¹ क्यूंकि हांऊ तेरे ले डरी गईरा था, इधी

कठे कि तू एक कठोर आदमी आ, जो तैं नी रखिरा तेस जो तू चकी लैहा, होर जो तैं नी बाहीरा, तेस जो काटी देहां । ²² तिने तेस किन्हें बोल्या; हे दुष्ट दास, मां तेरे ग्लाणे रे मुताबक तेरा न्याय करणा: तू मुंजो जाणहां था कि हांऊ कठोर आदमी आ, जो मैं नी रख्या तेस जो हांऊ चकी लैहां आ, होर जो मैं नी बाहिरा, तेस जो काटहा । ²³ ता तैं मेरे पैसे बैंका मन्झ जम्हा कि नी करवाए, ताकि हांऊ आई किन्हें ब्याजा समेत लई लैदा । ²⁴ होर जो लोक नेडे खहडी रे थे, तिने तिन्हा किन्हें बोल्या, से मोहर तेस ले लई लऊआ, होर जेस वाले जे दस मोहरा ई तेस जो देई देआ । ²⁵ (तिन्हे तेस किन्हें बोल्या, हे स्वामी, तेस वाले दस मोहरा ई) । ²⁶ हांऊ तुस्सा किन्हें सच सच बोल्हा आ, कि जेस वाले जे हाया तेस जो होर दितेया जाणा; होर जेस वाले जे नी आ तेस ले से भी लई लैणा जो तेस वाले हाया । ²⁷ पर मेरे तिन्हा बैरीया जो, जो नी चाहन्दे थे कि मैं तिन्हा पर राज करूं, तिन्हा जो एथी ल्याई किन्हें मेरे साम्हणे जानी ले मारी देऊआ । ²⁸ ये गल्ला बोली किन्हें से तिन्हा रे अगे अगे यरुश्लेमा वखा जो चल्दा लग्या । ²⁹ होर जेबे से जैतुना नांऊआं रे पाहडा पर बैतफगे होर बैतनियाहा रे नेडे पूजे, ता तिने आपणे चेले मंझा ले दो जण भेजे । ³⁰ कि साम्हणे रे गांऊआं मन्झ जाई किन्हें तुस्सा जो एक गधी रा बच्चा मिलणा जेस पर जे कधी कोई सवार नी हुईरा, बान्हीरा तुस्सा जो मिलणा, तेस जो खोल्ही किन्हें ल्याऊआ । ³¹ होर अगर कोई तुस्सा ले पूछे, कि तुससे एस जो किधियो खोल्हया करहा ऐ, ता ये बोली देआ, कि प्रभु जो एसरी जरुरत ई । ³² जेहडे भेजीरे थे; तिन्हे जाई किन्हें जेहडा तिने तिन्हा किन्हें बोलिरा था, तेहडा ई तिन्हे पाया । ³³ जेबे स्यों गधे रे बच्चे जो खोल्हया करहा ऐ थे, ता तेसरे मालके तिन्हा ले पुछेया; एस बच्चे जो किधियो खोल्हया करहा ऐ? ³⁴ तिन्हे बोल्या, प्रभु जो एसरी जरुरत ई । ³⁵ स्यों तेस जो यीसु वाले लई आए होर आपणे कपडे तेस पर ब्छ्याए होर यीसु तेस प्रयाहले बैठी गये । ³⁶ जेबे से जाया करहा था, ता स्यों आपणे कपडे पैडे मन्झ ब्छ्याया करहा ऐ थे । ³⁷ होर नेडे आऊन्दे आऊन्दे जेबे से जैतुना रे पाहडा री ढलाना पर पुजेया, ता चलेया री सारी मण्डली तिन्हा सभ चमत्कार जो तिन्हे देखिरे थे, खुस हुई किन्हें जोरा जोरा किन्हें परमेसरा री जै जै कार करदे लगी गये । ³⁸ कि भागा वाळा आ से राजा, जो प्रभु रे नांऊआं ले आंहुआं; स्वर्गा मन्झ शान्ति होर सर्ग मंडला मन्झ जै जै कार हो । ³⁹ तेबे भीड़ा मंझा ले कितने फरीसी तेस किन्हें बोल्दे लगे, हे गुरु आपणे चेले जो झिडका । ⁴⁰ तिने जबाब दितेया, होर बोल्या, हांऊ तुस्सा किन्हें बोल्हा, अगर ये चुप रहै, ता पात्थरा चिंगी उठणा । ⁴¹ होर जेबे से नेडे पूजी गया ता तेस नगरा जो देखी किन्हें से रोया । ⁴² होर बोल्या, क्या ई खरा हुंदा, कि तू; हां, तू ई, इन्हा ध्याडे मन्झ ई शांति री गल्ला जाणी लैदा, पर

एबे स्यों तेरी हाखिया ले ल्हुखी गईरी।⁴³ क्यूंकि स्यों ध्याड़े तुध पर आऊणे कि तेरे दुसमणा मोर्चा बान्ही किन्हें तू घेरी लैणा, होर चार तरफा ले तू दबाणा।⁴⁴ होर तुजो होर तेरे बच्चेया जो, जो तेरे मन्झ ऐ, माटे मन्झ मलाई देणे, होर तुध मन्झ पात्थरा पर पात्थर नी छाडणा; क्यूंकि तैं से मौका जेबे तेरे पर दया हुई थी नी पैहचाणेया।⁴⁵ तेबे तिने मंदरा मन्झ जाई किन्हें स्यों जे दुकानदारी करहा करहा ऐ थे, बाहर काहडे।⁴⁶ होर तिन्हा किन्हें बोल्या, ये लिखीरा आ; कि मेरा घर प्रार्थना रा घर हुणा: पर तुस्से ता ऐ डाकुआ री खोह बनाई दितिरी।⁴⁷ होर से रोज मंदरा मन्झ उपदेस देंहा था: होर माहयाजका होर साखी होर मुखिया लोक तेस जो मारणे री ताका मन्झ रैहन्दे लगी रैहे।⁴⁸ पर कोई उपाय नी काढी सके; कि ये केस तरीके किन्हें करिए क्यूंकि सभ लोक तेसरी बडी चाऊआ किन्हें सुणहा ऐं थे।

20¹ एक ध्याड़े ऐहड़ा हुएया कि जेबे से मंदरा मन्झ लोका जो उपदेस देंहा होर सुसमाचार सुणाया करहा था, ता माहयाजक होर साखी, पुरनिये साउगी नेडे आई किन्हें खहड़ी गये।² होर बोल्दे लगे, कि आस्सा जो दस, कि तू इन्हा कामा जो केस हका किन्हें करहा, होर से कुणहा, जिने जे तुजो ऐ हक दितिरी? ³ तिने तिन्हा जो जबाब दितेया, कि हांऊ भी तुस्सा ले एक गल पुछहा; मुंजो दसा।⁴ यहुन्ने रा बसिस्मा स्वर्गा वखा ले था या माहणु वखा ले था? ⁵ तेबे स्यों आपु मन्झ बोल्दे लगे, कि अगर आसे बोलिए कि स्वर्गा वखा ले, ता तेस बोलणा; फेरी तुससे तेसरा विस्वास कि नी कितेया? ⁶ होर अगर आस्से बोलिए, माहणु वखा ले, ता सब लोका आस्सा पर पत्थरवाह करणा, क्यूंकि स्यों सच्चे जाणहां ऐं, कि यहुन्ना नबी था। ⁷ होर तिन्हे जबाब दितेया, आस्से नी जाणदे कि ये केस वखा ले था। ⁸ यीसुए तिन्हा किन्हें बोल्या, ता मैं भी तुस्सा जो नी दसदा, कि हांऊ ऐ काम केस हका ले करहा। ⁹ तेबे से लोका किन्हें ये दृष्टान्त बोल्दा लग्या, कि केसी माहणु ऐ अंगूरा रा बगीचा लगाया, होर किसाना जो तेता रा ठेका देई दितेया होर बौहत ध्याड़े रे कठे परदेसा जो चली गया। ¹⁰ जेबे फसला रा टैम आया ता तिने किसाना वाले एक दास भेजेया, कि से अंगूरा रे बगीचे रे कुछ फल रा हिस्सा तेस जो दे, पर किस्साने तेस जो मारी पिटी किन्हें खाली हाथ भेजी दितेया। ¹¹ फेरी तिने एक होर दास भेजेया, होर तिन्हे से भी मारेया पिटेया होर तेसरी बेज्जती करी किन्हें खाली हाथ भेजी दितेया। ¹² फेरी तिने त्रिजा भेजेया, होर तिन्हे से भी मारी पिटी किन्हें काढी दितेया। ¹³ तेबे अंगूरा रे बगीचे रे मालके बोल्या, एबे हांऊ क्या करूं? मां आपणा प्यारा बेटा भेजणा क्या पता तिन्हा तेसरी इज्जत करणी। ¹⁴ किसान तेस जो देखी किन्हें आपु मन्झ सोच विचार करदे लगे, कि ये ता वारस आ; आऊआ, आस्से एस जो मारी देईए, ताकि उत्तराधिकार आस्सा रा हुई जाए

।¹⁵ होर तिन्हे से अंगूरा रे बगीचे ले बाहर काढी किन्हें मारी दितेया: इधी कठे अंगूरा रे बगीचे रे मालका तिन्हा साउगी क्या करणा? ¹⁶ तेस आई किन्हें तिन्हा किसाना रा नास करी देणा, होर अंगूरा रा बगीचा होरी जो देई देणा: ये सुणी किन्हें तिन्हे बोल्या, परमेसर ऐहड़ा ना करे। ¹⁷ तिने तिन्हा वखा जो देखी किन्हें बोल्या; फेरी ये क्या लिखीरा आ, कि जेस पात्थरा जो मिस्त्रिए बेकार समझ्या था, से ई कुणे रा पात्थर बणी गया। ¹⁸ जेस केसी तेस पात्थरा पर पऊणा तेस चकनाचूर हुई जाणा, होर जेस पर तेस पऊणा, तेस से पीसी के रखी देणा। ¹⁹ तेस टैम साखी होर माहयाजके से पकड़णा चाहेया, क्यूंकि स्यों समझी गये, कि तिने आस्सा पर ये दृष्टान्त बोल्या, पर स्यों लोका ले डरी गये। ²⁰ होर स्यों तेस री ताका मन्झ लगी रैहे होर जासूस भेजे, कि धर्मा रा भेष बदली किन्हें तेसरी कोई ना कोई गल पकड़े, कि तेस जो स्यों हाकमा रे हाथा होर तेसरे अधीनता मन्झ सौंपी दे। ²¹ तिन्हे तेस ले ये पुछेया, कि हे गुरु, आस्से जाणहां ऐं कि तू ठीक बोलहा, होर स्वाहां, होर केसी रा पक्षपात नी करदा; बल्कि परमेसरा रा रस्ता सच्चाई किन्हें दसा आ। ²² क्या आस्सा जो कैसरा जो कर देणा चाहिए कि नी? ²³ तिने तिन्हा री च्लाकी समझी किन्हें तिन्हा किन्हें बोल्या; मुंजो एक दीनार दसा। ²⁴ एता पर केसरी मूर्ति होर नांऊ आ? तिन्हे बोल्या, कैसरा रा। ²⁵ तिने तिन्हा किन्हें बोल्या; ता जो कैसरा रा आ, से कैसरा जो देआ होर जो परमेसरा रा आ, से परमेसरा जो देआ। ²⁶ स्यों लोका रे साम्हणे तेस गल्ला जो पकड़ी नी सके, पर तेसरे जबाबा ले हरान हुई किन्हें रही गये। ²⁷ होर स्टुकी बोलहा ऐं कि मरीरे मंझा ले जीऊन्दा हुणा ता बिल्कुल नी आ, तिन्हा मंझा ले बौहत जणे तेस वाले आई किन्हें पुछेया। ²⁸ कि हे गुरु, मुस्से आस्सा रे कठे ये लिखीरा आ, कि अगर केसी रा भाई आपणी लाडी रे रैहन्दे बगैर सन्ताने मरी जाए, ता तेसरा भाई तेसरी लाडी जो ब्याही ले, होर आपणे भाई रे कठे वंश जणे। ²⁹ सात भाई थे, पैहला भाई ब्याह करी किन्हें बगैर सन्ताने मरी गया। ³⁰ फेरी दूजे होर त्रीजे भी तेसा जनाने किन्हें ब्याह करी लया। ³¹ इहां करी किन्हें स्यों साता रे सात बगैर सन्ताने मरी गये। ³² तिन्हा ले बाद से जनाने भी मरी गयी। ³³ ता पुनरुत्थाना रे ध्याड़े से केस री लाडी हुणी, क्यूंकि से साता रे सात भाईरा री लाडी हुई चुकिरी थी। ³⁴ यीसुए तिन्हा किन्हें बोल्या; कि एस संसारा रे लोक ब्याह सादी करहा ऐ। ³⁵ पर जो लोक एस लायक हुन्हे, तिन्हा एस संसारा होर मरीरे मंझा ले पुनरुत्थाना जो पाई लैणा, तिन्हा मन्झ ब्याह सादी नी हुणी। ³⁶ तिन्हा फेरी नी मरणा; क्यूंकि तिन्हा स्वर्गदूता साहीं हुणा, क्यूंकि पुनरुत्थाना रे बच्चे हुणे रे नाते स्यों परमेसरा री सन्तान ऐ। ³⁷ पर एस गल्ला जो कि मरणे वाळे जी उठहा ऐ, हलांकि मुसे भी झाडी री कथा मन्झ एता रे बारे मन्झ दसिरा, कि से

प्रभु जो अब्राहमा रा परमेसर, होर इसहाका रा परमेसर, होर याकुबा रा परमेसर बोल्हा।³⁸ से मुरदे रा परमेसर नी आ पर जीऊन्देया रा परमेसर आ: क्यूंकि स्यों सभ लोक जो तेसरे ऐ, जीऊन्दा आ।³⁹ तेबे ये सुणी किन्हें साख्रिये मंझा ले बौहत लोके बोल्या, कि हे गुरु तैं ठीक बोल्या।⁴⁰ होर तिन्हा जो तेस ले कुछ होर पूछणे री हिम्मत नी हुई।⁴¹ फेरी तिने तिन्हा ले पुछेया, मसीहा जो दाऊदा री सन्तान किधियो बोल्हा ऐ? ⁴² दाऊद आपु भजनसहिंता री कताबा मन्झ बोल्हा, कि प्रभुए मेरे प्रभु किन्हें बोल्या, कि मेरी दाई तरफा बैठ।⁴³ जेबे तक कि हांऊ तेरे दुसमना जो तेरे पैरा हेठ नी करी देऊं।⁴⁴ दाऊद ता तेस जो प्रभु बोल्हा; ता से फेरी तेसरी सन्तान किहाँ बणेया? ⁴⁵ जेबे लोक सुणेया करहा ऐ थे, ता तिने आपणे चेले किन्हें बोल्या।⁴⁶ साख्रिया ले सावधान रहुआ, जिन्हा जो लम्बे लम्बे चोगे पैहनी किन्हें घुमणा खरा लगआ, होर जिन्हा जो बजारा मन्झ नमस्कार, होर सभा मन्झ खास जगहा होर दावता मन्झ खास बैठणे जगहा खरी लगहा ई ⁴⁷ स्यों विधवा रे घर खाई जाहें, होर दिखावे रे कठे बडी देरा तक प्रार्थना करदे रहें: इन्हा बौहत सजा पाणी।

21 ¹ होर आपणी हाखिया ऊपर चकी होर देखेया कि अमीर आपणा आपणा दान पेटी मन्झ पाया करहा ऐ थे। ² होर तिने एक गरीब विधुवा जो भी त्राम्बे रे दो सिक्के पांदे देख्या। ³ होर तिने बोल्या, हांऊ तुस्सा किन्हें सच सच बोल्हा, ऐसे गरीब विधुवे सभी ले ज्यादा दान दितेया: ⁴ क्यूंकि तिन्हे सभिए आपणी बौहत कमाई मंझा ले दान दितेया पर तेस्से जनाने, आपणी कमी घटी मंझा ले आपणी सारी कमाई देई दिती। ⁵ कुछ लोक मंदरा रे बारे मन्झ गल्ला करेया करहा ऐ थे, कि से मंदर बांके बांके पात्थरा होर परमेसरा जो चढाईरी चीजा किन्हें केहडा बधिया सजाईरा। ⁶ स्यों ध्याडे आऊणे, जिन्हा मन्झ ये सभ कुछ जो तुस्से देख्हा आ, तिन्हा मंझा ले एथी पात्थरा पर पात्थर भी नी रहणा, जो ढाहणा नी आ। ⁷ तिन्हे तेस ले पुछेया, कि हे गुरु, ये सभ केभे हुणा? होर ये गल्ला जेबे पूरी हुणे वाळी हुणी, ता तेस टैम रा क्या नसाण हुणा? ⁸ तिने बोल्या; सावधान रहुआ, कि कोई तुस्सा जो ना भरमाए, क्यूंकि बौहत लोका मेरे नांऊआं ले आई किन्हें बोलणा, कि हांऊ से ई आ; होर ये भी कि टैम आई ग्यीरा: ता तुस्से तिन्हा रे पीछे देख्या चली जांदे। ⁹ होर जेबे तुस्से लड़ाईया होर दंगे फसादा री गल्ला सुणो, ता डरदे देख्या; क्यूंकि इन्हा गल्ला रा पैहले हुणा जरुरी आ; पर तेस टैम झटपट अंत नी हुणा। ¹⁰ तेबे तिने तिन्हा किन्हें बोल्या, कि जाति पर जाति होर राज्या पर राज्या चढाई करणी। ¹¹ होर बडे बडे हिलण हुणे, होर जगहा जगहा अकाल होर माहमारिया हुणी, होर सर्गा मन्झ डराऊणी चीजा हुणी होर बडे चिन्ह प्रगट हुणे। ¹² पर इन्हा सभ गल्ला

ले पैहले तिन्हा मेरे नांऊआं री वजहा ले तुस्से पकडने, होर सताणे, होर पंचायता मन्झ सौंपणे, होर जेहला मन्झ पाणे, होर राजे होर हाकमा रे साम्हणे लई जाणे। ¹³ पर ऐ तुस्सा रे कठे गुआही देणे रा मौका हुई जाणा। ¹⁴ इधी कठे आपणे आपणे मना मन्झ ठानी के रखा कि आसा पैहले ले जबाब देणे री फिकर नी करणी। ¹⁵ क्यूंकि मां तुस्सा जो ऐहडी बोली होर बुद्धि देणी, कि तुस्सा रे सारे वरोधीया तुस्सा रा साम्हणा या खण्डन नी करणे रे लायक नी रहणा। ¹⁶ होर तुस्सा रे माऊ बाबा होर भाईया होर टब्बरा, होर दोस्ता भी तुस्से पकडवाणे; एथी तक कि तुस्सा मंझा ले कितने मारी देणे। ¹⁷ होर मेरे नांऊआं री वजहा ले सभ लोका तुस्सा किन्हें बैर करणा। ¹⁸ पर तुस्सा रे मुंडा रा एक बाळ भी बांका नी हुणा। ¹⁹ आपणे धीरज धरणे ले तुस्से आपणे प्राण बचाई सकहा ऐ। ²⁰ जेबे तुस्से यरुस्लेमा जो सेना किन्हें घिरी रा देखो, ता जाणी लया कि तेसरा उजडी जाणा नेडे आ। ²¹ तेबे जो यहूदिया मन्झ हो स्यों पाहडा पर भगी जाए, होर जो यरुस्लेमा रे भीतर हो स्यों बाहर निकळी जाए; होर जो गाऊआ मन्झ हो स्यों तेस नगरा मन्झ नी जाए। ²² क्यूंकि ये बदला लेणे या सजा पाणे रे ऐहडे ध्याडे हुणे, ताकि जो गल्ला लिखी गईरी स्यों सभ पूरी हुई जाए। ²³ तिन्हा ध्याडे मन्झ जो जनाने गर्भवती होर दूध पिआणे वाळी हुणी, तिन्हा रे कठे हाय हाय, क्यूंकि देसा मन्झ बडा क्लेस होर इन्हा लोका पर बडी विपत्ति आऊणी। ²⁴ स्यों तलवारा किन्हें मारी दिते जाणे, होर सभ देसा रे लोका मन्झ बंदी बणाई किन्हें पूजाए जाणे, होर जेबे तक दूजी जाति रा टैम पूरा नी हुई जाए, तेबे तक यरुस्लेम दूजी जातिया रे पैरा हेठ रोंदया जाणा। ²⁵ होर सूरज होर चाँद होर तारे मन्झ चिन्ह सुझणे, होर धरती पर, देसा देसा रे लोका जो संकट हुणा; क्यूंकि तिन्हा दरयाऊआ री गर्जन होर लैहरा रा हाल्ला सुणी किन्हें डरी जाणा। ²⁶ होर डरा री वजहा ले होर संसारा पर आऊणे वाळी घटना रा इंतजार करदे करदे लोका रे जीआ मन्झ जी नी रहणा क्यूंकि सर्गा री सक्तिया हिलाई जाणी। ²⁷ तेबे स्यों माहणु रे पुत्रा जो सामर्थ होर बडी महिमा साउगी बादला पर आऊन्दे देखणा। ²⁸ जेबे ये गल्ला हुन्दी लगे, ता सीधे हुई किन्हें आपणे मूंडा जो ऊपर चक्केया; क्यूंकि तुस्सा रा छुटकारा नेडे आ। ²⁹ तिने तिन्हा किन्हें एक दृष्टान्त बोल्या कि अन्जीरा रे डाळ होर सभ डाळा जो देखा। ³⁰ जिहां ई तिन्हा रे टुए फटहा ऐ, ता तुस्से देखी किन्हें जाणी लैहें, कि गर्मी रा मौसम नेडे आ। ³¹ इहां ई जेबे तुस्से इन्हा गल्ला जो हुन्दे देख्दे लगे, तेबे जाणी लया कि परमेसरा रा राज नेडे आ। ³² हांऊ तुस्सा किन्हें सच सच बोल्हा, कि जेबे तक ये सभ गल्ला नी हुई जाए, तेबे तक एस्सा पीढी रा अंत नी हुणा। ³³ सर्ग होर धरती टळी जाणे, पर मेरी गल्ला कधी नी टळणी। ³⁴ इधी कठे सावधान रहुआ, ऐहडा नी हो कि तुस्सा रे

मन खुमार होर मतवाळेपन, होर एस जिन्दगी री चिंता किन्हें सुस्त हुई जाए, होर से ध्याडा तुस्सा पर फंदे साहीं एकदम आई जाए।³⁵ क्यूंकि तेस सारी धरती रे सभ रहणे वाळे पर इहां ई आई जाणा।³⁶ इधी कठे जागदे रहुआ होर हर टैम प्रार्थना करदे रहुआ कि तुस्से इन्हा सभी आऊणे वाळी घटना ले बचणे, होर माहणु रे पुत्रा रे साम्हणे खहडने रे लायक बणी सको।³⁷ होर से ध्याडीया मंदरा मन्झ उपदेस देहां था; होर राती बाहर जाई किन्हें जैतुना नांऊआं रे पाहडा पर रहंयां था।³⁸ होर भ्यागा तडके सभ लोक उठी किन्हें तेस वाले मंदरा मन्झ सुणने रे कठे जाया करहा ऐ थे।

22¹ अखमीरी रोटी रा साजा जेस जो फसहा रा साजा भी बोलहा ऐ, आऊणे वाळे था।² होर माहयाजक होर साखी एस गल्ला री ताका मन्झ थे कि तेस जो किहां मारिये, पर स्यों लोका ले डरहा ऐ थे।³ होर सैतान यहूदा मन्झ समाया, जेस जो इस्करियोती भी बोलहा ऐ, होर से तिन्हा बारा चेले मंझा ले एक था।⁴ तिने जाई किन्हें माहयाजका होर मुखिया साउगी गलबात किती, कि से तिन्हारे हाथा मन्झ किहां पकड़वाणा? ⁵ स्यों खुस हुई गये, होर तेस जो पैसे देणे रा वचन दितेया।⁶ तिने मनी लया, होर मौका टोळदा लग्या, कि जेबे भीड़ भडाका नी हो तेस जो तिन्हारे हाथा मन्झ पकड़वाई दे।⁷ तेबे अखमीरी रोटी रा साजे रे ध्याडा आया, जेस मन्झ फसहा रा मेन्ना बली करणा जरूरी आ ⁸ होर यीसूए पतरसा होर यहूने जो ये बोली किन्हें भेजेया, कि जाई किन्हें आस्सा रे खाणे रे कठे फसहा तयार करा।⁹ तिन्हे तेस ले पुछेया, कि तू क्या चाहां, कि आस्से तयार करे? ¹⁰ तिने तेस किन्हें बोल्या; देखा, नगरा मन्झ जांदे ई एक माहणु जिने जे पाणी रा घडा चकीरा हुणा तुस्सा जो मिलणा, जेस घरा मन्झ से जाए; तुस्से तेसरे पीछे चली जाया।¹¹ होर तेस घरा रे मालका किन्हें बोला, कि गुरु तुध किन्हें बोलहा; कि से प्राहुणे रा कमरा केथी आ जेथी हांऊ आपणे चेले साउगी फसहा रे साजे रा खाणा खाई सकूं? ¹² तेस तुस्सा जो एक सजा सजाई रा कमरा दसणा, तेथी ई तयारी करणा।¹³ तिन्हे जाई किन्हें, जेहडा तिने तिन्हा किन्हें बोल्या था, तेहडा ई पाया, होर फसहा रा भोज तयार कितेया।¹⁴ जेबे टैम आई गया, ता से प्रेरिता साउगी खाणा खांदे बैठी गया।¹⁵ होर तिने तिन्हा किन्हें बोल्या; मेरी बडी इच्छा थी, कि दुःख भोगणे ले पैहले ये फसहा रा साजा तुस्सा साउगी खाऊं।¹⁶ क्यूंकि हांऊ तुस्सा किन्हें बोलहा आ, कि जेबे तक से परमेसरा रे राजा मन्झ पूरा नी हुई जाए तेबे तक मां ये दबारा नी खाणा।¹⁷ तेबे तिने कटोरा लई किन्हें धन्याबाद कितेया, होर बोल्या, एता जो लई लऊआ होर आपु मन्झ बांडी लऊआ।¹⁸ क्यूंकि हांऊ तुस्सा किन्हें बोलहा, कि जेबे तक परमेसरा रा राज नी आये तेबे तक मां दाखा रा रस नी पीणा।¹⁹ फेरी तिने रोटी लई

होर धन्यबाद करी किन्हें रोटी तोड़ी, होर तिन्हा जो ये बोलदे हुए रोटी दीती, कि ये मेरा सरीर आ, जो तुस्सा रे कठे दिती जाहीं: मेरी यादगारा रे कठे ऐहडा ई करदे रहंया।²⁰ इहां ई तिने बियारी रे पीछे कटोरे चकेया होर बोल्या, “ ये कटोरा मेरे तेस खुना रे रूपा मन्झ एक नई वाचा रा प्रतीक आ जेस जो तुस्सा रे कठे बहाया गईरा।²¹ पर देखा, मेरे पकड़वाणे वाळे रा हाथ मेरे साउगी मेजा पर आ।²² क्यूंकि माहणु रे पुत्रा रा मरणा ता पक्का आ, पर हाय तेस माहणु पर जेस रे ज़ीये जे पकड़वाया जाहां।²³ तेबे स्यों आपु मन्झ पूछ ताछ करदे लगे, कि आस्सा मंझा ले कुण आ, जेस जे ये काम करणा? ²⁴ तिन्हा मन्झ ये बैहस भी हुई; कि आस्सा मंझा ले सभी ले बडा कुण आ? ²⁵ तिने तिन्हा किन्हें बोल्या, अन्य जाति रे राजा तिन्हा पर राज करहा ऐ; होर जो तिन्हा पर हक रखहा ऐ, तिन्हा जो भलाई करणे वाळा बोलहा ऐ।²⁶ पर तुस्से ऐहडे देख्या हुंदे; पर जो तुस्सा मन्झ बडा हो, से छोट्टे साहीं होर जो मुखिया हो, से दासा साहीं बणे।²⁷ क्यूंकि बडा कुण आ; से जो खाणा खांदे बैठिरा या से जे सेऊआ करहा करहा? क्या से नी आ जेहडा खाणा खांदे बैठिरा? पर हांऊ तुस्सा मन्झ दासा साहीं आ।²⁸ पर तुस्से स्यों ऐं, जो मेरी परीक्षा मन्झ लगातार मेरे साउगी रहें।²⁹ होर हांऊ तुस्सा जो तिहां ई एक राज देआ करहा जिहां मेरे पिता जिए मुंजो दितिरा था, तिहां ई हांऊ भी तुस्सा रे कठे देहां।³⁰ ताकि तुस्से मेरे राजा मन्झ मेरी मेजा पर खाऊआ पिऊआ; बल्कि राजगद्दी पर बैठी किन्हें इस्राएला रे बारा गोत्रा रा न्याय करा।³¹ समौन, हे समौन, देख, सैताने तुस्से लोक मांगी लईरे कि तुस्सा जो कणका साहीं फटकी सके।³² पर मैं तेरे कठे अरज कितिरी, कि तेरा विस्वास चली नी जाए: होर जेबे तू बदले, ता आपणे भाईया जो मजबूत करणा।³³ तिने तिन्हा किन्हें बोल्या; हे प्रभु, हांऊ तेरे साउगी जेहला जाणे, बल्कि मरणे रे कठे भी तयार आ।³⁴ तिने बोल्या; हे पतरस हांऊ तेरे किन्हें बोलहा, कि आज कुक्कडा झांग नी देणी जेबे तक तू तीन बारी मेरा इनकार ना करी ले, कि तू मुंजो नी जाणदा।³⁵ होर तिने तिन्हा किन्हें बोल्या, कि जेबे मैं तुस्से बगैर बटुऐ, होर बगैर झोळे, होर बगैर जूते भेजे थे, ता क्या तुस्सा जो केसी चीजा री कमी हुई थी? तिन्हे बोल्या; केसी चीजा री कमी नी हुई।³⁶ तिने तिन्हा किन्हें बोल्या, पर एबे जेस वाले जे बटुआ आ से लई ले, होर तिहां ई झोळा भी लई ले, होर जेस वाले तलवार नी हो से आपणे कपड़े बेची किन्हें खरीदी ले।³⁷ क्यूंकि हांऊ तुस्सा किन्हें बोलहा, कि साखी रा लिखीरा पक्का पूरा हुणा: से एक पापी समझ्या गया, हाँ मेरे बारे मन्झ लिखी गईरी ये गल पूरी हुणे वाळी ई।³⁸ तिन्हे बोल्या; हे प्रभु, देख एथी दो तलवारा ई: तिने तिन्हा किन्हें बोल्या; बस बौहत ई।³⁹ तेबे से बाहर निकली किन्हें आपणे रवाजा रे मुताबक जैतुना रे पाहडा

पर गया, होर चेले तेसरे पीछे हुई गये।⁴⁰ तेस जगहा पौहंची किन्हें तिने तिन्हा किन्हें बोल्या; प्रार्थना करा, कि तुस्से परीक्षा मन्झ नी पौ।⁴¹ होर पात्थरा जो जितनी दूरा तक डयाई सकहा ऐ, से तिन्हा ले लगभग तितनी ई दूर लग जे चली गया, होर घुटने टेकी किन्हें प्रार्थना करदा लग्या।⁴² कि हे पिता अगर तू चाहे ता एस कटोरे जो मेरे वाले ले हटाई ले, तेबे बी मेरी नी पर तेरी इच्छा पुरी हो।⁴³ तेबे स्वर्गा ले एक दूत तेस जो सुझेया जो तेस जो सामर्थ देहां था।⁴⁴ होर से बौहत बैचेन हुई किन्हें होर भी ज्यादा प्रार्थना करदा लग्या; होर तेसरा पसीना खुना रे टेपे बणी किन्हें थाले जमीना पर पया करहा था।⁴⁵ तेबे से प्रार्थना ले उठेया होर आपणे चेले वाले आया ता तिने स्यों दुःखा रे मारे सूती रे देखे? ⁴⁶ होर तिन्हा किन्हें बोल्या, तुस्से किधियो सोया करहा ऐ? उठा, प्रार्थना करा, ताकि परीक्षा मन्झ नी पई सको।⁴⁷ से ये बोल्या ई करहा था, कि देखा एक भीड़ आई, होर तिन्हा बारा मंझा ले एकियो जेसरा नाऊ जे यहूदा था तिन्हारे अगे अगे आया करहा था, से यीसू वाले आया, कि तेसरा चूमा लया।⁴⁸ यीसुए तेस किन्हें बोल्या, हे यहूदा, क्या तू चूमा लई किन्हें माहणु रे पुत्रा जो पकड़वाहां? ⁴⁹ तेसरे साथिये जेबे देख्या कि क्या हुणे वाळा आ, ता तिन्हे बोल्या; हे प्रभु; क्या आसे तलवार च्लाईए? ⁵⁰ होर तिन्हा मंझा ले एकिये माहयाजका रे दासा पर तलवार चलाई होर तेसरा दायँ कान काटी दितेया।⁵¹ एता पर यीसुए बोल्या; एबे बस करा: होर तिने तेसरा कान छुही किन्हें ठीक करी दितेया।⁵² तेबे यीसुए माहयाजका; होर मंदरा रे मुखिए होर पुरनिये मंझा ले, जो तेसरे वरोधी बणी किन्हें आईरे थे, बोल्या; क्या तुस्से मुंजो डाकू जाणी किन्हें तलवारा होर डंडे लई किन्हें आईरे? ⁵³ जेबे हांऊ मंदरा मन्झ हर ध्याडे तुस्सा साउगी था, ता तुस्से मुंजो पर हाथ नी पाया; पर ये तुस्सा री घड़ी ई, होर न्हारे रे राज आ।⁵⁴ फेरी स्यों तेस जो पकड़ी किन्हें लई चले, होर माहयाजका रे घरा मन्झ ल्याए होर पतरस दूरा दूरा ले ई तेसरे पीछे पीछे चल्या करहा था।⁵⁵ होर जेबे स्यों आहंगणा मन्झ आग भखाई किन्हें कठे बैठिरे थे, ता पतरस भी तिन्हारे मंझ भरा बैठी गया।⁵⁶ होर एक दासिए तेस जो आगी रे प्रयासे मन्झ बैठिरे देख्या होर तेस वखा देखी किन्हें बोल्दी लगी, ये भी ता तेस साउगी था।⁵⁷ पर तिने ये बोली किन्हें नाह करी दिती, कि ओ जनानिये, हांऊ तेस जो नी जाणदा।⁵⁸ थोहड़ी देरा बाद केसी होरिये तेस जो देखी किन्हें बोल्या, तू भी ता तिन्हा मंझा ले एक आ: पतरसे बोल्या; ओ जनाब से हांऊ नी आ।⁵⁹ कोई घंटे भरा ले बाद एक होर आई किन्हें बोल्दा लग्या, पक्का ये भी ता तेस साउगी था; क्यूंकि ये गलीली आ।⁶⁰ पतरसे बोल्या, ओ माहणुआं, हांऊ नी जाणदा कि तू क्या बोल्हा? से बोल्या ई करहा था कि झटपट कुक्कड़े झांग देई दिती।⁶¹ होर तेबे प्रभुए घूमी किन्हें पतरसा वखा देख्या,

होर पतरसा जो प्रभु री से गल याद आई जो तिने बोलिरी थी, कि आज कुक्कड़ा रे झांग देणे ले पैहले, तुध तीन बारी मेरा इनकार करणा।⁶² होर से बाहर निकळी किन्हें बड़ा भारी रोंदा लग्या।⁶³ जिन्हें माहणुए जे यीसू जो पकड़ीरा था, तिन्हे तेसरा मजाक उड़ाया होर तेस जो मारदे पीटदे लगे।⁶⁴ होर तिन्हे तेसरी हाखिया पर पट्टी बान्ही दिती होर तेस ले पुछेया, भविष्यवाणी करी किन्हें दस कि तू कुने मारेया? ⁶⁵ होर तिन्हे बौहत सारी विरोधा री गल्ला तेसरे खलाफ किती।⁶⁶ जेबे ध्याडा सुरहु हुएया ता लोका रे पुरनिये होर माहयाजक होर साखी कठे हुए, होर फेरी स्यों लोक तेस जो आपणी माहसभा मन्झ लई गये।⁶⁷ अगर तू मसीह आ, ता आस्सा किन्हें बोली दे! तिने तिन्हा किन्हें बोल्या, अगर हांऊ तुस्सा किन्हें बोलू ता तुस्सा विस्वास नी करणा।⁶⁸ होर अगर हांऊ पूछूँ, ता तुस्सा जबाब नी देणा।⁶⁹ पर एभे ले माहणु रा पुत्रा सर्वसक्तिमान परमेसरा री दाई तरफ बैठणा।⁷⁰ एता पर सभिए बोल्या, ता क्या तू परमेसरा रा पुत्र आ? तिने तिन्हा किन्हें बोल्या; तुस्से आपु ई बोल्हा ऐ, कि हांऊ आ।⁷¹ तेबे तिन्हे बोल्या; एबे आस्सा जो गुआही री क्या जरूरत ई; क्यूंकि आस्से आपुए तेसरे मुंहा ले सुणी लया।

23 ¹ तेबे तिन्हारी सारी सभा उठी किन्हें तेस जो पिलातुसा वाले लई गयी।² होर स्यों ये बोली किन्हें तेस पर दोष लगांदे लगे, कि आस्से एस जो लोका जो बरगलान्दे होर कैसरा जो कर देणे ले नाह करदे, होर आपणे आपा जो मसीह राजा बोल्दे हुए सुणीरा आ।³ पिलातुसे तेस ले पुछेया, क्या तू यहूदिया रा राजा आ? तिने तेस जो जबाब दितेया, कि तू आपुए बोल्या करहा।⁴ तेबे पिलातुसे माहयाजका होर लोका किन्हें बोल्या, हांऊ एस माहणु मन्झ कुछ दोष नी पांदा।⁵ पर स्यों होर भी जोर लगाई किन्हें बोल्दे लगे, ये गलीला ले लई किन्हें एथी तक सारे यहूदिया मन्झ उपदेस देई देई किन्हें लोका जो बरगलाहॉं।⁶ ये सुणी किन्हें पिलातुसे पूछेया, क्या ये माहणु गलीली आ? ⁷ होर ये जाणी किन्हें कि से हेरोदेसा रे इलाके रा आ, तेस जो हेरोदेसा वाले भेजी दितेया, क्यूंकि तिन्हा ध्याडे से भी यरुक्षेमा मन्झ था।⁸ हेरोदेस यीसू जो देखी किन्हें बौहत ही खुस हुएया, क्यूंकि से बौहत ध्याडे ले तेस जो देखणा चाहॉं था: इधी कठे कि तिने तेसरे बारे मन्झ सुणी रा था, होर तेस जो चमत्कार करदे हुए देखणे री आस रखिरी थी।⁹ तिने यीसू ले बौहत सुआल पूछे, पर तिने तेस जो कोई जबाब नी दितेया।¹⁰ होर माहयाजक होर साखी खहड़ी किन्हें तेस पर कड़े दोष लगाया करहा ऐ थे।¹¹ तेबे हेरोदेसे आपणे स्पाहिया साउगी तेसरी बेज्जती करी किन्हें तेसरा मजाक उड़ाया, होर तेस जो भड़किला कपड़ा पन्हयाई किन्हें तेस जो पिलातुसा वाले वाप्स भेजी दितेया।¹² तेस ध्याडे पिलातूस

होर हेरोदेस दुहें दोस्त बणी गये। एता ले पैहले स्यों एक दूजे रे दुसमन थे।¹³ पिलातुसे माहयाजक होर मुखिये होर लोक सादे होर तिन्हा किन्हें बोल्या।¹⁴ तुस्से ये माहणु लोका जो बरगलाणे वाळा बणाई किन्हें मेरे वाले ल्याईन्दीरा, होर देखा, में तुस्सा रे साम्हणे से परखेया, पर जिन्हा गल्ला रा दोष तुस्से तेस पर ल्याहें, तिन्हा गल्ला रे बारे मन्झ में तेस मन्झ कुछ भी गलती नी पाई।¹⁵ ना ही हेरोदेसा जो क्युंकि तिने एस जो आस्सा वाले वाप्स भेजी दितेया: होर देखा, तेस ले ऐहडा कुछ नी हुएया कि से मौता री सजा दिती जाए।¹⁶ इधी कठे हांऊ तेस जो कोड़े लगाई किन्हें छाडी देंहा।¹⁷ पिलातूस फसहा रे साजे रे मौके पर हर साल लोका रे कठे एक कैदी जो छाडहा था।¹⁸ तेबे सभ मिली किन्हें हाला पांदे लगे, कि एसरा काम तमाम करी देआ, होर आस्सा रे कठे बरअब्बा जो छाडी देआ।¹⁹ बरअब्बा जो सैहरा मन्झ दंगा फसाद होर हत्या करणे रे कठे जेहला मन्झ पाईरा था।²⁰ पर पिलातुस यीसू जो छाडी देणा चाहं था, तिने स्यों दबारा समझाये।²¹ पर तिन्हे चिंगा पाई पाई किन्हें बोल्या: कि तेस जो कूसू पर चढाऊआ, कूसू पर।²² तिने त्रीजी बारी तिन्हा किन्हें बोल्या; कि, तिने क्या बुराई कितिरी? में तेस मन्झ मौता री सजा रे लायक कोई गल नी पाई! इधी कठे हांऊ तेस जो कोड़े लगाई किन्हें छाडी देहां।²³ पर स्यों चिंगी चिंगी किन्हें पीछे पई गये, कि तेस जो कूसू पर चढाई देआ, होर तिन्हारा चिलाणा बौहत बढी गया।²⁴ एता कठे पिलातुसे हुकम दितेया, कि तिन्हारी बिनती रे मुताबक कितेया जाए।²⁵ पिलातुसे से आदमी छाडी दितेया, जो दंगा फसाद होर हत्या करणे रे कठे जेहला मन्झ पाईरा था, ये से ही था जेस जो छाडणे री स्यों मांग करेया करहा ऐ थे, होर यीसू जो तिन्हारे हाथा मन्झ देई दितेया कि स्यों तेस किन्हें जो चाहे से करे।²⁶ जेबे स्यों यीसू जो लई जाया करहा ऐ थे, ता तिन्हे समौन नांऊआं रे एक कुरेनी जो, जो ग्राऊआं ले आया करहा था, पकडी किन्हें तेस पर कूसू लादी दितेया कि से तेस कूसू जो यीसू रे पीछे पीछे लई चले।²⁷ होर लोका री बडी भीड़ तेसरे पीछे हुई गयी: होर बौहत सारी जनाने भी, तेसरे कठे छाती पिटदी होर रोंदी लगी।²⁸ यीसूए तिन्हा वखा मुडी किन्हें बोल्या; हे यरुक्षेमा री पुत्रियो, मेरे कठे नी रोआ; पर आपणे होर आपणे बच्चेया रे कठे रोआ।²⁹ क्युंकि देखा, ऐहडे ध्याडे आया करहा ऐ, जिन्हा मन्झ तिन्हा बोलणा, भागा वाळी ई स्यों जनाने जो बाहन्ज ई, होर भागा वाळे ऐ स्यों गर्भ जिन्हें कधी कोई नी जणेया होर स्यों स्तन जिन्हें कधी दूध नी पियाआ।³⁰ तेस टैम तिन्हा पाहडा किन्हें बोलणा, कि आस्सा पर पई जा, होर पाहडीया किन्हें बोलणा कि आस्सा जो ढकी ले।³¹ क्युंकि जेबे स्यों हरे डाळा किन्हें ऐहडा करहा, ता तिन्हा सुके किन्हें क्या कुछ नी करणा।³² होर तेथी दो होर माहणु

भी थे जो कुकर्मि थे, तिन्हा जो भी सजा देणे रे कठे बाहर ले जाया करहा ऐ थे।³³ जेबे स्यों तेस जगहा पूजे जेस जो खोपडी बोल्ला ऐ, ता तिन्हे, तिन्हा दुहीं पापिया साउगी से भी कूसू पर चढाया, एकी जो तेसरी दाई तरफ होर दूजे जो तेसरी बाई तरफ।³⁴ तेबे यीसूए बोल्या; हे पिता, इन्हा जो माफ़ करी दे, क्युंकि ये नी जाणदे कि क्या करेया करहा ऐ? होर तिन्हे चिठी पाई किन्हें तेसरे कपडे आपु मन्झ बांडी लये।³⁵ लोक खहडी किन्हें देख्या करहा ऐ थे होर मुखिए भी मजाक उड़ाया करहा ऐ थे, कि इने होर लोक बचाई रे, अगर ये परमेसरा रा मसीह आ, होर तेसरा चुणीरा आ, ता से आपणे आपा जो बचाई ले।³⁶ स्पाहीये भी तेस वाले आई किन्हें मजाक उड़ाया होर तेस जो पीणे रे कठे सिरका दितेया।³⁷ अगर तू यहूदिया रा राजा आ ता आपणे आपा जो बचाई ले।³⁸ होर तेसरे ऊपर एक सुचना लिखिरी थी, कि ये यहूदिया रा राजा आ।³⁹ जो पापी लटकाई रे थे, तिन्हा मंझा ले एकिए तेसरी बेज्जती करी किन्हें बोल्या; क्या तू मसीह नी आ? ता फेरी आपणे आपा जो होर आस्सा जो बचा।⁴⁰ एता पर दूजे डाकुए तेस जो झिडकी किन्हें बोल्या, क्या तू परमेसरा ले भी नी डरदा? तू भी ता से ई सजा पाया करहा।⁴¹ होर आस्से ता न्याय रे मुताबक सजा पाया करहा ऐ, क्युंकि आस्से ता आपणे करमा रा ठीक ठीक फल पाया करहा ऐ; पर इने ता कोई भी गलत काम नी कितेया।⁴² तेबे तिने बोल्या; हे यीसू, जेबे तू आपणे राजा मन्झ आए, ता मुंजो याद रख्या।⁴³ तिने तेस किन्हें बोल्या, हांऊ तुध किन्हें सच सच बोल्ला; कि आज ई तुध मेरे साउगी स्वर्गलोका मन्झ हुणा।⁴⁴ होर लगभग दूजे पैहरा ले लई किन्हें त्रिजे पैहरा तक सारे देसा मन्झ न्याहरा छाई गया।⁴⁵ होर सुरजा रा प्रयासा जांदा रैहया, होर मंदरा रा परदा बीचा मन्झा ले फटी गया।⁴⁶ होर यीसूए जोरा किन्हें चिल्लाई किन्हें बोल्या; हे पिता, हांऊ आपणी आत्मा तेरे हाथा मन्झ सौम्पेया करहा: होर ये बोली किन्हें तिने प्राण छाडी दिते।⁴⁷ सुबेदारे, जो कुछ हुएया था देखी किन्हें, परमेसरा री जै जै कार किति, होर बोल्या; पक्का ये माहणु धर्मी था।⁴⁸ होर सारी भीड़ जो ये देखणे रे कठे कठी हुई री थी, एस घटना जो देखी किन्हें छाती पिटदी हुई वाप्स चली गयी।⁴⁹ पर स्यों सभ जो तेस जो जाणहां ऐं थे, तिन्हा जनानिया समेत जो गलीला ले तेसरे पीछे पीछे आया करहा ई थी, दूर खहडी किन्हें ये सभ कुछ देख्या करही थी।⁵⁰ होर देखा युसूफ नांऊआं रा एक मंत्री जो सज्जन होर धर्मी माहणु था।⁵¹ होर से तिन्हारे फैसले होर तिन्हारे एस कामा ले खुस नी था, होर से यहूदिया रे नगर अरिमतिया रा रैहणे वाळा था होर परमेसरा रे राजा रा इंतजार करणे वाळा था।⁵² तिने पिलातुसा वाले जाई किन्हें यीसू री ल्हास मांगी लई।⁵³ होर तेसरी ल्हास तुआरी किन्हें चादरा मन्झ लपेटी, होर एक कबरा

मन्झ रखी, जो चटाना मन्झ खणी री थी; होर तेस मन्झ कोई कधी नी रखिरा था।⁵⁴ से त्यारी रा ध्याडा था, होर सब्ता रा ध्याडा सुरहु हुणे वाळा था।⁵⁵ होर तिन्हे जनानिये जो तेसरे साउगी गलीला ले आई री थी, पीछे पीछे जाई किन्हें से कब्र देखी, होर ये भी कि तेसरी ल्हास किहां रखिरी थी।⁵⁶ होर स्यों वाप्स आई होर खुशबूदार चीजा त्यार कित्ती; होर सब्ता रे ध्याडे ता तिन्हे हुकमा रे मुताबक विश्राम कितेया।

24¹ पर हसे रे पैहले ध्याडे भ्यागा ई स्यों तिन्हा खुशबूदार चीजा जो लई किन्हें जो तिन्हे त्यार कितरी थी, कबरा पर आई।² तिन्हा जो कबरा परा ले पात्थर हट्टी रा मिलेया।³ होर अंदर जाई किन्हें प्रभु यीसू री ल्हास नी पाई।⁴ जेबे स्यों एस गल्ला ले हरान हुएया करहा ई थी ता देखा, दो मर्ध जिन्हें जे चमकीले कपड़े पैहनी रे थे तिन्हा वाले खहड़ी गये।⁵ जेबे स्यों डरी गयी, होर धरती वखा आपणे मुंह फेरी दिते; ता तिन्हे तेस किन्हें बोल्या; तुस्से जीऊन्देया जो मरीरे मन्झ किधियो टोल्हा ई? ⁶ से एथी नी आ, पर जीउंदा हुई गईरा; याद करा; कि तिने गलीला मन्झ रैहणे रे टैमा तुस्सा किन्हें क्या बोलिरा था।⁷ कि जरुरी आ, कि माहणु रा पुत्र पापिया रे हाथा मन्झ पकड़ाया जाए; होर कूसा प्र्याहले चढ़ाया जाए; होर त्रीजे ध्याडे जीउंदा हुई जाए।⁸ तेबे तेसरी गल्ला तिन्हा जो याद आई।⁹ होर कबरा ले वाप्स आई किन्हें तिन्हे तिन्हा ग्यारा चलेया जो, होर, बाकि सभी जो ये गल्ला सुणाई दिती।¹⁰ जिन्हे जे प्रेरिता किन्हें ये गल्ला बोली, स्यों ये जनानिया थी: मरियम मगदलीनी होर योअन्ना होर याकूबा री माऊ मरियम होर तिन्हा साउगी होर जनानिया भी थी।¹¹ पर तिन्हा री गल्ला तिन्हा जो कहाणी साहीं लगी, होर तिन्हे तिन्हारा विस्वास नी कितेया।¹² तेबे पतरस उठी किन्हें कबरा वाले दौड़ी के गया, होर झुकी सिर्फ कपड़े पईरे देखे, होर जो कुछ हुईरा था तेता ले हरान हुई किन्हें, से आपणे घरा जो चली गया।¹³ देखा, तेस ई ध्याडे तिन्हा मंझा ले दो जण इम्माउस नाऊआं रे एकी ग्राऊआं जो जाया करहा ऐ थे, जो यरुश्लेमा ले कोई सात मीला री दुरी पर था।¹⁴ होर स्यों इन्हा सभी गल्ला पर जो हुई री थी, आपु मन्झ गलबात करेया करहा ऐ थे।¹⁵ होर जेबे स्यों आपु मन्झ गलबात होर पूछताछ करेया करहा ऐ थे, ता यीसू आपुए तेथी हाजर हुई गया होर तिन्हा साउगी चलदा लग्या।¹⁶ पर तिन्हा री हाखिया ऐहडी बंद करी दितीरी थी, कि स्यों तेस जो नी पछ्याणी सके।¹⁷ तिने तिन्हा ले पुछेया; ये क्या गल्ला ई, जो तुस्से चलदे चलदे आपु मन्झ करेया करहा ऐ? स्यों उदास हुई किन्हें खड़े रही गये।¹⁸ ये सुणी किन्हें, तिन्हा मन्झा ले क्लियुपास नाऊआं रे एक आदमिए बोल्या; क्या तू यरुश्लेमा मन्झ कल्हा परदेसी आ; जो नी जाणदा, कि इन्हा ध्याडे मन्झ क्या क्या घटेया? ¹⁹ तिने तिन्हा ले पुछेया; कुण गल्ला? तिन्हे

तेस किन्हें बोल्या; यीसू नासरी रे बारे मन्झ जो परमेसरा रा होर सभ लोका रे नेडे काम होर वचना मन्झ सामर्थी नबी था।²⁰ होर माहयाजके होर आस्सा रे मुखिए से पकड़वाई दितेया, कि तेस पर मौता रा हुकम दितेया जाए; होर तेस जो कूसा पर चढ़ाया जाए।²¹ पर आस्सा जो आस थी, कि एस ई आस्सा जो छुटकारा देणा, होर इन्हा सभ गल्ला रे अलावा एस घटना जो घटी रे आज त्राय ध्याडे हुई गईरे।²² होर आस्सा री संगता मंझा ले कई जनाने भी आस्से हरान करी दिते, जो भ्यागा भ्यागा ई कबरा पर आईरी थी।²³ होर जेबे तेसरी ल्हास नी पाई, ता ये बोल्दी हुई आई, कि आस्से स्वर्गदूता रा दर्सन देख्या, तिन्हे बोल्या कि से जीउंदा हुई गईरा।²⁴ तेबे आस्सा रे साथिया मन्झा ले कई कबरा वाले गये, होर जेहडा तिन्हे जनानिया बोलिरा था, तिन्हे तेहडा ई तेथी पाया; तिन्हे से नी देख्या।²⁵ तेबे तिने तिन्हा किन्हें बोल्या; हे मूर्खो, होर नबीया रा सभ गल्ला पर विस्वास करणे रे मामले मन्झ मंदमति ऐ! ²⁶ क्या जरुरी नी था, कि मसीह ये दुःख उठाई किन्हें आपणी महिमा मन्झ प्रवेस करे? ²⁷ तेबे तिने मुसा ले होर सभ नबीया ले सुरहु करी किन्हें सारे पवित्र सास्त्रा मंझा ले, आपणे बारे मन्झ कितिरी गला रा मतलब तिन्हा जो समझाया।²⁸ इतने मन्झ स्यों तेस ग्राऊआं वाले पूजी गये, जेथी जे स्यों जाया करहा ऐ थे, होर तेसरे व्यवहारा ले ऐहडा मैहसूस हुएया कि से होर अगे जाणा चाहं।²⁹ पर तिन्हे ये बोली किन्हें से रोकेया, कि आस्सा वाले रही जा; क्यूंकि साहन्ज हुएया करहा ई होर ध्याडा भी ढलेया करहा। तेबे से तिन्हा साउगी रैहणे रे कठे भीतर गया।³⁰ जेबे से तिन्हा साउगी खाणा खांदे बैठ्या, ता तिने रोटी लई किन्हें धन्यावाद कितेया, होर रोटी तोड़ी किन्हें तिन्हा जो देंदा लग्या।³¹ तेबे तिन्हा री हाखिया खुल्ही गयी; होर तिन्हे से पैहचाणी लया, होर से तिन्हा रे साम्हणे गायब हुई गया।³² तिन्हे आपु मन्झ बोल्या, जेबे से रस्ते मन्झ आस्सा किन्हें गल्ला करहा करहा था, होर पवित्र सास्त्रा रा मतलब आस्सा जो समझाहां था, ता क्या आस्सा रा मन आगी साहीं नी भड़केया था? ³³ स्यों तेस ई टैम उठी किन्हें यरुश्लेमा जो वाप्स चली गये, होर तेथी तिन्हा जो स्यों ग्यारा प्रेरित होर तिन्हा साउगी तिन्हारे होर साथी सभ कठे मिले।³⁴ स्यों बोल्हा ऐ थे, प्रभु सचऐ जीउंदा हुई ग्यीरा, होर तिने समौना जो दर्सन दिते।³⁵ तेबे तिन्हे दुर्हीऐ जो कुछ रस्ते मन्झ हुईरा था तेता रा ब्यौरा दितेया होर दस्सेया कि रोटी तोड़ने रे टैमा तिन्हे से किहां पछ्याणेया।³⁶ स्यों ये गल्ला हल्ली बोल्या ई करहा ऐ थे, कि से आपुए तिन्हा रे बीचा मन्झ आई किन्हें खहड़ी गया; होर तिन्हा किन्हें बोल्या, तुस्सा जो सांति मिले।³⁷ पर स्यों घबराई गये होर डरी गये, होर तिन्हा जो ये लग्या कि स्यों केसी भूता जो देख्या करहा ऐ।³⁸ होर तिने तिन्हा किन्हें बोल्या; तुस्से किधियो डरहा ऐ? होर तुस्सा

रे मना मन्झ सक कि हुएया करहा? ³⁹ मेरे हाथा होर पैरा जो देखा, कि हांऊ से ई आ; मुंजो छुही किन्हें देखा; क्यूंकि आत्मा री हड्डी मास नी हुंदा जेहड़ा तुस्से मेरे मन्झ देख्हा ऐ। ⁴⁰ ये बोली किन्हें तिने तिन्हा जो आपणे हाथ पैर दसे। ⁴¹ जेबे खुसी रे मारे तिन्हा जो विस्वास नी हुएया, होर हरानी हुई, ता तिने तिन्हा ले पुछेया; क्या एथी तुस्सा वाले कुछ खाणा आ? ⁴² होर तिन्हे तेस जो भुनी री मछी रा एक टुकड़ा दितेया। ⁴³ तिने से मछी रा टुकड़ा लया होर तिन्हारे साम्हणे खाधेया। ⁴⁴ फेरी तिने तिन्हा किन्हें बोल्या, ये मेरी स्यों गल्ला ई, जो मैं तुस्सा साउगी रही किन्हें, तुस्सा किन्हें बोली थी, कि जरुरी आ, कि जितनी गल्ला मूसा री व्यवस्था होर नबिया री होर भजना री क्ताबा मन्झ, मेरे बारे मन्झ लिखिरी, स्यों सभ पुरी हो। ⁴⁵ तेबे तिने पवित्र सास्त्रा जो समझणे रे कठे तिन्हारी समझ खोल्ही दिती। ⁴⁶ होर तिन्हा किन्हें बोल्या, ऐहड़ा लिखिरी आ; कि मसीहा

दुःख उठाणा, होर त्रीजे ध्याड़े मरीरे मंझा ले जीउंदे हुई जाणा। ⁴⁷ होर यरुक्षेमा ले लई किन्हें सभ जातिया मन्झ मन फिराऊआ रा होर पापा री माफ़ी रा प्रचार, तेसरे नांऊआं ले ई कितेया जाणा। ⁴⁸ तुस्से इन्हा सभ गल्ला रे गुआह ऐ। ⁴⁹ होर एभे मेरे परम पिता जीए मेरे किन्हें जो वाद्हा कितिरा, से मां तुस्सा रे कठे भेजणा होर जेबे तक स्वर्गा ले सामर्थ नी पाओ, तेबे तक तुस्से एस नगरा मन्झ ई रुकी रहेया। ⁵⁰ तेबे से तिन्हा जो बैतनियाहा तक बाहर लई गया, होर आपणे हाथ चकी किन्हें तिन्हा जो आसिरवाद दितेया। ⁵¹ होर तिन्हा जो आसिरवाद देंदे हुए से तिन्हा ले लग हुई गया होर स्वर्गा जो चली गया। ⁵² होर स्यों तेस जो प्रणाम करी के बड़ी खुसी किन्हें यरुक्षेमा जो वाप्स चली गये। ⁵³ होर लगातार मंदरा मन्झ हाजर हुई किन्हें परमेसरा री बड़ाई करहा ऐ थे।

यूहन्ना

1 सभी ले पैहले वचन था, होर वचन परमेसरा साउगी था, होर वचन ई परमेसर था।² ये ई वचन पैहले ले परमेसरा साउगी था।³ सभ कुछ तेसरे ज़ीये जम्या, होर जो कुछ जम्या, तेता मंझा ले कोई भी चीज़ तेसरे बगैर नी जम्मी।⁴ तेस मंझ जीन्दगी थी, होर से जीन्दगी माहणु री जोती थी।⁵ होर जोत न्हयारे मंझ चम्का ई: होर न्हयारे से नी मन्नेया।⁶ परमेसरा री तरफा ले भेजीरा एक माहणु आया जेसरा नांऊ यूहन्ना था।⁷ से इधी कठे आया कि से जोती री गवाही दे, ताकि सभ तेसरे ज़ीये विस्वास करे।⁸ से आपु ता जोती नी था, पर तेस्सा जोती री गवाही देणे रे कठे आया।⁹ सञ्ची जोती जो हर एक माहणु जो प्रयासा देहां ई संसारा मंझ आऊणे वाळी थी।¹⁰ से संसारा मंझ था, होर संसार तेसरे ज़ीये जम्या, होर संसारे से नी पछयाणेया।¹¹ से आपणे घरा आया होर तेसरे आपणे ही लोके से नी मन्नेया।¹² पर जिन्हें से मन्नेया तिन्हा जो तिने तेसरी संतान हुणे रा हक दितेया, यानि जो तेसरे नांऊआं पर विस्वास रख्हा ऐ।¹³ स्यों ना ता खुना ले, ना सरीरा री इच्छा ले, ना माहणु री इच्छा ले, पर परमेसरा री इच्छा ले जम्मे।¹⁴ होर वचन देहधारी हुआ; होर उपकार होर सञ्चाई किन्हें भहरी किन्हें आस्सा मंझ डेरा कितेया, होर आस्से तेसरी एहडी म्हीमा देखी, जेहडी पिता रे इकलौते पुत्रा री।¹⁵ यूहन्ने तेसरे बारे मंझ गवाही दीती होर चिल्लाई किन्हें बोल्या, कि ये से ई आ, जेसरे बारे मंझ मैं बोल्या, कि जो मेरे बाद आऊणे वाळा आ, से मेरे ले भी बढी किन्हें आ, क्यूंकि से मेरे ले पैहले था।¹⁶ क्यूंकि तेसरी भरपूरी ले आस्से सभीये उपकारा पर उपकार हासल कितेया।¹⁷ इधी कठे कि व्यवस्था मूसा रे ज़ीये मिली, पर उपकार होर सञ्चाई प्रभु यीसू मसीहा रे ज़ीये पूजे।¹⁸ प्रभु जो केसीए कधी नी देख्या, पर इकलौते पुत्रे जो पिता री गोदा मंझ आ, तिने ई से जाहिर कितेया।¹⁹ यूहन्ने री गवाही ये ई कि जेबे यरूस्लेमा रे यहुदिये याजक होर लेवी जो तेस ले ये पुछणे रे कठे भेज्या कि तू कुणहां? ²⁰ होर तिने ये मन्नी लया होर नाह नी किती पर मन्नी लया कि से मसीह नी आ।²¹ तेबे तिन्हे तेस ले पुछेया फेरी तू कुणहां? क्या तू एलियाह आ? तिने बोल्या, हांऊ नी आं: ता क्या तू नबी आ? होर तिने जबाब दितेया, नी।²² तेबे तिन्हे तेस ले दबारा पुछेया, फेरी तू कुणहां? ताकि आस्से आपणे भेजणे वाळे जो जबाब देई सके; तू आपणे बारे मंझ क्या बोल्ला? ²³ यूहन्ने बोल्या, जो यसायाह नबिये बोलीरा, कि हांऊ जंगला मंझ पुकारणे वाळे री अवाज ई कि प्रभु रा रस्ता सीधा करा।²⁴ स्यों फेरीसिया री तरफा ले भेजे गईरे थे।²⁵ तिन्हे तेस ले सुआल पुछेया, कि अगर तू मसीह नी आ, होर ना तू एलियाह

आ, होर ना नबी आ, फेरी तू बसिस्मा कि देहां।²⁶ यूहन्ने तिन्हा जो जबाब दितेया, कि हांऊ ता तुस्सा जो पाणी किन्हें बसिस्मा देहां; पर तुस्सा मंझ एक एहडा आदमी खडी रा, जेस जो तुस्से नी जाणदे।²⁷ यानि से मेरे बाद आऊणे वाळा आ, होर हांऊ तेस रे बूटा रे तस्में री गाँठ खोलणे रे लायक भी नी आ।²⁸ ये सारी गल्ला यर्दना ले पार बैथनियाहा मंझ हुई, जेथी जे यूहन्ना बसिस्मा देहां था।²⁹ दूजे ध्याड़े तिने यीसू जो आपणी तरफ आउंदे देखी किन्हें बोल्या, देखा, ये परमेसरा रा मेन्ना आ, जो संसारा रे पापा जो उठाई लेंहां।³⁰ ये से ई आ, जेसरे बारे मंझ मैं बोलीरा था, कि एक आदमी मेरे पीछे आहूँआं, जो मेरे ले भी अच्छा आ; क्यूंकि से मेरे ले पैहले था।³¹ होर हांऊ तेस जो नी पछयाणदा था, पर एता कठे हांऊ पाणी किन्हें बसिस्मा देंदा आया, कि से इन्नाएला पर प्रगट हुई जाए।³² होर यूहन्ने ये गवाही दीती, कि मैं आत्मा कबुतरा साहीं गासा ले उतरदे देखी। होर से तेस पर रुकी गई।³³ होर हांऊ ता तेस जो पछयाणदा नी था, पर जिने मुंजो पाणी किन्हें बसिस्मा देणे रे कठे भेजीरा, तिने ई मुंजो बोलीरा कि जेस पर तू आत्मा उतरदे होर रूकदे देखे से ई पवित्र आत्मा किन्हें बसिस्मा देणे वाळा आ।³⁴ होर मैं देख्या, होर गवाही दीती, कि से ई परमेसरा रा पुत्र आ।³⁵ अगले ध्याड़े यूहन्ना आपणे दो चले साउगी तेथी दबारा हाजर था।³⁶ होर तिने यीसू जो जांदे देख्या होर बोल्या देखा, ये परमेसरा रा मेन्ना आ।³⁷ तेबे स्यों दूहें चले तेसरी सुणी किन्हें यीसू रे पीछे पीछे चली पये।³⁸ यीसुए पीछे मुडी किन्हें स्यों आपणे पीछे आउंदे देखे होर बोल्या, तुस्से केस जो टोळहा ऐ? तिन्हे तेस किन्हें बोल्या, हे रब्बी, यानि, हे गुरु तू केथी रेंहयां? तिने तिन्हा किन्हें बोल्या, चला देखी लऊवा।³⁹ तेबे तिन्हे आई किन्हें तेसरे रैहणे री जगहा देखी, होर स्यों तेस ध्याड़े तेथी रही गये: होर ये लगभग दसुआं घंटा था।⁴⁰ जिन्हें जे यूहन्ने री गल सुणी होर यीसू रे पीछे चली पये, तिन्हा दूहीं मंझा ले एक, समौन पतरसा रा भाई अन्द्रीयास था।⁴¹ तिने पैहले आपणे सगे भाई समौना किन्हें मिली किन्हें बोल्या, कि आस्सा जो ख्रिस्तुस यानी, मसीह मिली गईरा।⁴² से तेस जो यीसू वाले लई आया: यीसुए तेस जो देखी किन्हें बोल्या, कि तू यूहन्ना रा म्हठा समौन आ, तुध कैफा, यानी पतरस कैहलाया जाणा।⁴³ दूजे ध्याड़े यीसुए गलीला जो जाणा चाहेया; होर तिने फिलिप्पुसा साउगी मिली किन्हें बोल्या, मेरे पीछे चल।⁴⁴ फिलिप्पुस ता अन्द्रीयास होर पतरसा रे नगर बैतसैदा रा रैहणे वाळा था।⁴⁵ फिलिप्पुसा जो नतनियेल मिल्या होर तिने तेस किन्हें बोल्या, आस्सा जो से मिली गईरा, जेसरे बारे मन्झ

मूसा री व्यवस्था मंझ नबीये लिखीरा, ये आ युसुफा रा म्हठा, नासरता रा यीसू । 46 नतनएले तेस किन्हें बोल्या, क्या कोई बांकी चीज भी नासरता ले निकळी सकहा ई? फिलिप्पुसे तेस किन्हें बोल्या, चली के खुद देखी ले । 47 यीसुए नतनियेला जो आपणी तरफ आऊं देखी किन्हें तेसरे बारे मंझ बोल्या, देखा, ये सच्चे इस्राएली आः एस मंझ कपट नी आ । 48 नतनियेले तेस किन्हें बोल्या, तू मुंजो किहां जाणहां? यीसुए तेस जो जबाब दितेया; एता ले पैहले कि फिलिप्पुसे तू सादेया, मैं तू देखी लईरा था जेबे तू अन्जीरा रे डाळा रे थाले था । 49 नतनियेले तेस जो जबाब दितेया, कि हे रब्बी, तू परमेसरा रा पुत्र आः तू इस्राएला रा माहराजा आ । 50 यीसुए तेस जो जबाब दितेया; क्या तू इधी कठे विस्वास करहा? कि मैं जो तेरे किन्हें बोल्या, कि मैं तू अन्जीरा रे डाळा रे थाले देख्या था, तुध एता ले बी बडे बडे काम देखणे । 51 फेरी तिने तेस किन्हें बोल्या, हांऊ तुस्सा किन्हें सच सच बोल्हा, कि तुस्सा स्वर्गा रा दरवाजा खुल्ही रा होर परमेसरा रे स्वर्गदूता जो माहणु रे पुत्रा पर, हेठ आऊं दे होर ऊपरा जो जां दे देखणा ।

2 1 फेरी त्रीजे ध्याडे गलीला रे काना मंझ केसी रा ब्याह था । होर यीसू री माऊ भी तेथी थी । 2 होर यीसू होर तेसरे चेले भी तेस ब्याहा मंझ सादे गईरे थे । 3 जेबे दाखरस घटी गया, ता यीसू री माऊए तेस किन्हें बोल्या, कि तिन्हा वाले दाखरस नी रह्या । 4 यीसुए तेस्सा किन्हें बोल्या, ओ जनाने मुंजो तुध किन्हें क्या काम आ? हल्ली मेरा टैम नी आया । 5 तेसरी माऊए दासा किन्हें बोल्या, जो कुछ से तुस्सा किन्हें बोले, तेहडा ई करेया । 6 तेथी यहूदिया रे सुद्ध करणे रे मुताबक पात्थरा रे छेह हाण्डू रखिरे थे; जिन्हा मंझ दो दो, तीन तीन मण आहूंआं था । 7 यीसुए तिन्हा किन्हें बोल्या, घडे मंझ पाणी भराः तेबे तिन्हे स्यों घडे मुंहा तक भरी दिते । 8 तेबे तिने तिन्हा जो बोल्या, एबे थोहडा दाखरस काढी किन्हें भोजा रे प्रधाना (दावता रे मुखिए) वाले लई जा । 9 होर स्यों थोहडा दाखरस काढी किन्हें लई गये, जेबे भोजा रे प्रधाने से स्वादी किन्हें देख्या, जो दाखा रा रस बणी गईरा था, होर नी जाणदा था, कि से केथी ले आईरा था, (पर जिन्हे दासे दाखरस काढी किन्हें ल्यान्दिरा था, सिर्फ तिन्हा जो पता था) तेबे भोजा रे प्रधाने लाडे जो सादी किन्हें बोल्या । 10 हर एक माहणु पैहले खरा दाखरस देहां, फेरी जेबे जे लोक पी किन्हें धुत हुई जाहें, तेबे मधम होर हलका देहां ऐं; पर तैं बधिया दाखा रा रस हली तक बचाई रखीरा । 11 यीसुए गलीला रे काना मंझ आपणा ये पैहला चमत्कार दसी किन्हें आपणी म्हीमा दसी होर तेसरे चेले तेस पर विस्वास कितेया । 12 तेता ले बाद से होर तेसरी माउ, होर तेसरे भाई, होर तेसरे चेले कफ़रनहुमा जो गये होर तेथी कुछ ध्याडे रहे । 13 यहूदिया रा फसहा रा साजा नेडे था होर यीसू यरुशलेमा

जो गया । 14 होर तेस मंदरा मंझ तिने बोहळद, होर भेड होर कबूतरा रे बेचणे वाळे, होर वपारी देखे । 15 होर तिने रस्सिया रा कोडा बणाई किन्हें सभ भेडा होर बोहळद मंदरा ले काढी दिते, होर लेण देण करणे वाले रे ढब्बे सटी दिते, होर बैठणे री पीढीया सटी दीती । 16 होर कबूतर बेचणे वाळेया किन्हें बोल्या; इन्हा जो एथी ले बाहर लई जाः मेरे बाबा रे घरा जो वपारा रा घर नी बणाऊवा । 17 तेबे तेसरे चेले जो याद आया कि ये लिखीरा, “तेरे घरा री धुना हांऊ खाई देणा” । 18 एता पर यहूदिये तेस किन्हें बोल्या, तू जे ये सभ करहा ता तू आस्सा जो कुण जे चमत्कार दस्हा? 19 यीसू ए तिन्हा जो जबाब दितेया; कि एस मंदरा जो ढाई देया, होर मां ये त्रीजे ध्याडे खडा करी देणा । 20 यहूदिये बोल्या; एस मंदरा जो बनाणे रे कठे छन्ताळी साल लगे; होर क्या तुध ये मंदर तीन ध्याडे मंझ खडा करी देणा? 21 पर तिने आपणे सरीरा रे मंदरा रे बारे मंझ बोल्या था । 22 इधी कठे जेबे से मरिरे मंझा ले जीउंदा हुई गया ता तेसरे चेले जो याद आया, कि तिने ये बोलिरा था; होर तिन्हे पवित्र सास्त्रा होर तेस वचना रा बिस्वास कितेया जो यीसुए बोलिरा था । 23 जेबे से यरुश्लेमा मंझ फसहा रे टैम साजे मंझ था, ता बौहतिए स्यों चमत्कार जो से दस्हा था, देखी किन्हें तेसरे नांउआं पर बिस्वास कितेया । 24 पर यीसुए आपणे आपा जो तिन्हारे भरोसे नी छाडेया, क्यूंकि से सभी जो जाणहां था । 25 होर तेसजो एस गल्ला री कोई जरूरत नी थी, कि कोई आई किन्हें तेस जो माहणु रे बारे मंझ दसे, क्यूंकि से आपु जाणहां था, कि माहणु रे मना मंझ क्या आ?

3 1 फरिसिया मंझा ले नीकुदेमुस नांऊआं रा एक माहणु था, जो यहूदिया रा हाकम था । 2 तिने राती यीसू वाले आई किन्हें तेस किन्हें बोल्या, हे स्वामी, आस्से जाणहां ऐं, कि तू परमेसर री तरफा ले गुरु बणी किन्हें आईरा; क्यूंकि कोई इन्हा चमत्कारा जो, जो तू दस्हा, अगर परमेसर तेस साउगी नी हो, ता से इन्हा चमत्कारा जो नी दसी सकदा । 3 यीसुए तेस जो जबाब दितेया; कि हांऊ तुस्सा किन्हें सच सच बोल्हा, अगर कोई नंऊऐं सिरे ले नी जम्मे ता से परमेसरा रा राज नी देखी सकदा । 4 नीकुदेमुसे तेस जो बोल्या, माहणु जेबे बुड्डा हुई जाहां, ता से किहां माऊआ रे गर्भा मंझ जाई किन्हें दबारा जन्म लई सकहा? 5 यीसुए तेस जो जबाब दितेया, कि हांऊ तुस्सा किन्हें सच सच बोल्हा; कि जेबे तक कोई आदमी पाणी होर आत्मा किन्हें नी जम्मे ता से परमेसरा रे राजा मंझ प्रवेस नी करी सकदा । 6 क्यूंकि जो सरीरा ले जम्मीरा, से सरीर आ; होर जो आत्मा ले जम्मीरा, से आत्मा आ । 7 अचम्भा नी कर, कि हांऊ तुजो बोल्हा; कि तुजो नंऊऐं सिरे ले जमणा जरूरी आ । 8 हउवा जेथी चांही तेथी चल्हा ई, होर तू तेतारी अवाज सुणहां, पर नी जाणदा, कि से केथी ले आहूंआं ई होर केथी जो जांही? जो कोई

आत्मा ले जम्मीरा से एहड़ा ई आ।⁹ निकुदेमुसे तेस जो जबाब दितेया; कि ये गल्ला किहां हुई सकहा ई? ¹⁰ ये सुणी किन्हें यीसुए तेस जो बोल्या; तू इस्त्राएली रा गुरु हुई किन्हें भी इन्हा गल्ला जो नी समझदा? ¹¹ हांऊ तुस्सा किन्हें सच सच बोल्ला कि आस्से जो जाणहां ऐं, से बोल्ला ऐ, होर जो आस्से देख्या तेता री गवाही देहां ऐं, होर तुस्से आस्सा री गवाही नी मनदे। ¹² जेबे में तुस्सा किन्हें धरतीया री गल्ला किती, ता तुस्से विस्वास नी करदे, जे हांउ तुस्सा किन्हें स्वर्गा री गल्ला करूँ, ता फेरी तुस्सा किहां विस्वास करणां? ¹³ होर कोई स्वर्गा जो नी गया, पर से ई जो स्वर्गा ले उतरेया, यानि माहणु रा म्हठा जो स्वर्गा मंझ आ। ¹⁴ होर जिहां मुसे जंगला मंझ सांप (कीड़ा) ऊपर चढ़ाया, तिंहा ई जरूरी आ कि माहणु रा म्हठा भी ऊंचे पर चढ़ाया जाये। ¹⁵ ताकि जो कोई विस्वास करे से तेस मंझ अनंत जिंदगी पाए। ¹⁶ क्यूंकि परमेसरे संसारा किन्हें एहड़ा प्यार कितेया कि तिने आपणा इकलौता म्हठा देई दितेया, ताकि जो कोई तेस पर विस्वास करे से नास नी हो पर अनंत जिंदगी पाए। ¹⁷ परमेसरे आपणे म्हठे जो संसारा मंझ इधी कठे नी भेज्या, कि से संसारा जो सजा रा हुक्म दे पर तिने से इधी कठे भेज्या कि संसार तेस रे ज़ीए मुक्ति पाई सके। ¹⁸ जो तेस पर विस्वास करहा, तेस पर सजा रा हुक्म नी हुंदा, पर जो तेस पर विस्वास नी करदा, से दोषी बणी गया, इधी कठे कि तिने परमेसरा रे इकलौते म्हठे रे नांऊआं पर विस्वास नी कितेया। ¹⁹ होर सजा रे हुक्मा री वजहा ये ई कि प्रयासा संसारा मंझ आईरा, होर माहणु ऐं न्ह्यारे जो प्रयासे ले ज्यादा खरा मन्या क्यूंकि तिन्हारे काम बुरे थे। ²⁰ क्यूंकि जो कोई बुराई करहा से प्रयासे किन्हें बैर करहा, होर से प्रयासे रे नेडे नी आउंदा, एहड़ा नी हो कि तेसरे कामा पर इल्जाम लगी जाए। ²¹ पर जो सच्चा ई पर चल्हा, से प्रयासे रे नेडे आहूँआं, ताकि तेसरे काम सूझी जाये, कि स्यों परमेस्वरा री तरफा ले किते गईरे। ²² एता ले बाद यीसू होर तेसरे चले यहूदी देसा मंझ आये; होर से तेथी तिन्हा साउगी रही किन्हें बसिस्मा देंदा लग्या। ²³ होर यहूदा भी सालेमा रे नेडे एनाना मंझ बसिस्मा देंहां था, क्यूंकि तेथी बौहत पाणी था। होर लोक आई किन्हें बसिस्मा लैहां ऐं थे। ²⁴ क्यूंकि यहूदा तेबे तक जेहला अन्दर नी पाईरा था। ²⁵ तेथी यहूदे रे चलेया रा केसी यहूदी साउगी सुद्धिकरणा रे बारे मंझ बैहस हुई। ²⁶ होर तिन्हे यहूदे वाले आई किन्हें तेस किन्हें बोल्या, हे रब्बी, यानि हे गुरु, जो आदमी यर्दना रे पार तेरे साउगी था, होर जेसरी गवाही तैं दीती, देखा से बसिस्मा देंहां, होर सभ तेस वाले आहूँआं ऐं। ²⁷ यहूदे जबाब दितेया, जेबे तक माहणु जो स्वर्गा ले नी दीतेया जाये तेबे तक से कुछ नी पाई सकदा। ²⁸ तुस्से ता आपु ई मेरे गवाह ये, कि मैं बोल्या, हांउ मसीह नी आ, पर तेसले अगे भेज्या गईरा। ²⁹ जेसरी वाले जे लाडी ई, से ई

लाडा आ: पर लाडे रा दोस्त जो खड़ा हुई किन्हें तेसरी सुणहां, से लाडे री अवाज सुणी किन्हें बौहत खुस हुई जाहां, एभे मेरी ये खुसी पुरी हुई गई। ³⁰ जरूरी आ कि से बढे होर हांउ घटी जाऊं। ³¹ जो ऊपरा ले आहूँआं, से सभी ले खरा आ, जो धरती ले आहूँआं से धरती रा आ; होर धरतिया री गल्ला करहा: जो स्वर्गा ले आहूँआं, से सभी ले ऊपर आ। ³² जो कुछ तिने देख्या, होर सुणेया, तेसरी ई गवाही देंहां; होर कोई तेसरी गवाही नी मनदा। ³³ क्यूंकि जो परमेसरे भेज्या, से परमेसरा री गल्ला करहा: क्यूंकि से आत्मा नापी नापी के नी देंदा। ³⁴ क्यूंकि जो परमेसरे भेज्या, से परमेसरा री गल्ला करहा: क्यूंकि से आत्मा नापी नापी के नी देंदा। ³⁵ पिता पुत्रा किन्हें प्यार रख्हा, होर तिने सभ चीज़ा तेसरे हाथा मंझ देई दीतीरी। ³⁶ जो पुत्रा पर विस्वास करहा, अनंत जिंदगी तेसरी ई; पर जो पुत्रा री नी मनदा, तेस जिंदगी नी देखणी, पर परमेसरा रा गुस्सा तेस पर रेंह्यां।

4 ¹ फेरी जेबे प्रभु जो पता लगया, कि फेरीसीये सुणेया, कि यीसू यहूदे ले ज्यादा चले बणाहां, होर तिन्हा जो बसिस्मा देंहां। ² बल्कि यीसू आपु नी पर तेसरे चले बसिस्मा देंहां ऐं थे। ³ तेबे से यहूदिया जो छाडी किन्हें गलीला जो चली गया। ⁴ होर तेस जो सामरिया ले हुई किन्हें जाणा जरूरी था। ⁵ एता कठे से सुखार नांउ सामरिया रे एक नगरा तक आया, जो तेस जमीना वाले आ, जो याकुबे आपणे म्हठे युसुफा जो दिती रा था। ⁶ होर यकुबा रा कुआं भी तेथी था; यीसू आपणे सफरा रा थकीरा तेस कुएं पर ईहां ई बैठी गया, होर ये गल छेह घंटे रे लगभग हुई। ⁷ इतने मंझ एक सामरी जनाने पाणी भरणे रे कठे आई: यीसूए तेस्सा जो बोल्या, मुंजो पाणी प्या। ⁸ क्यूंकि तेसरे चले ता नगरा मंझ खाणा मूल्ले लैंदे गईरे थे। ⁹ तेस्से सामरी जनाने तेस जो बोल्या, तू यहूदी हुई किन्हें मेरे ले पाणी किहां मांघ्हा? (क्यूंकि यहूदी सामरिया साउगी कैसी भी तरीके रा व्यवहार नी रखदे थे)। ¹⁰ यीसुए जबाब दितेया, अगर तू परमेसरा रे बारदाना जो जाणदी, होर ये भी जाणदी कि से कुणहां जो तेरे किन्हें बोल्ला; मुंजो पाणी प्या ता तू तेसले मांगदी, होर से तुजो जिन्दगी रा पाणी देंदा। ¹¹ जनानिये तेस जो बोल्या, हे प्रभु, तेरे वाले पाणी भरणे रे कठे कुछ भी नी आ, होर कुआं बौहत दुघ्हा: ता फेरी से जिंदगी रा पाणी तेरे वाले केथी ले आया? ¹² क्या तू आस्सा रे बापू यकुबा ले बडा आ, जिने जे आस्सा जो ये कुआं दितेया; होर आपु होर आपणे बच्चे होर आपणे जानवरा समेत एता मंझा ले पींदे रैहे। ¹³ यीसुए तेस्सा जो जबाब दितेया, कि जेस भी ये पाणी पीणा तेस जो फेरी सोख लगणी। ¹⁴ पर जो कोई तेस पाणी मंझा ले पीन्हा जो मां तेस जो देणा, तेस फेरी हमेसा रे कठे सोखे नी हूणां: पर जो पाणी मां तेस जो देणा, तेस तेता मंझ एक सोता बणी जाणा जेस हमेसा रे कठे मुट्दे रैहणा।

15 जनाने तेस जो बोल्या, हे प्रभु तेस पाणी जो मुंजो देई दे ताकि हांड सोखी नी रहूँ होर ना पाणी भरणे रे कठे इतनी दूर आऊ । 16 यीसुए तेस्सा जो बोल्या, जा, आपणे लाडे जो एथी सादी किन्हें लई आऊ । 17 तेस्से जनाने जबाब दितेया, कि हांड बगैर लाडे ई: यीसुए तेस्सा किन्हें बोल्या, तू ठीक बोल्हा ई कि हांड बगैर लाडे ई । 18 क्यूंकि तू पांज लाडे करी चुकी री, होर जेस वाले तू एभे हाई से भी तेरा लाडा नी आ; ये ता तैं सच बोल्या । 19 जनाने तेस जो बोल्या, हे प्रभु, मुंजो लग्हा कि तू नब्बी आ । 20 आस्सा रे पूर्वजे एस पहाडा पर ई भजन कितेया: होर तुस्से बोल्हा ऐ कि से जगह जेथी जे भजन करणा चाहिए से यरुस्लेमा मंझ ई । 21 यीसुए तेस्सा जो बोल्या, हे जनाने, मेरी गल्ला रा विस्वास कर कि से टैम आहूँआं कि तुस्सा ना ता एस पहाडा पर पिता रा भजन करणा ना यरुस्लेमा मंझ । 22 तुस्से जेस जो नी जाणदे, तेसरा भजन करहा ऐ; होर आस्से जेस जो जाणहां ऐं तेसरा भजन करहा ऐ; क्यूंकि उद्धार यहूदिया मंझा ले आ । 23 पर से टैम आहूँआं, बल्कि एभे भी आ तेता मंझ सचे भक्ता पिता रा भजन आत्मा होर सच्चा ई किन्हें करणा, क्यूंकि पिता आपणे कठे एहडे ई भजन करणे वालेया जो टोळहा । 24 परमेसर आत्मा आ, होर जरूरी आ कि तेसरे भजन करणे वाळे आत्मा होर सच्चाई किन्हें भजन करे । 25 जनाने तेस किन्हें बोल्या, हांड जाणहां ई कि मसीह जेसजो जे ख्रीष्ट बोल्हा ऐ, से आउणे वाळा आ; जेबे तेस आऊणा, तेबे तेस आस्सा जो सभ गल्ला दसी देणी । 26 यीसुए तेस्सा जो बोल्या, हांड जो तेरे किन्हें बोल्या करहा, हांड से ई आ । 27 इतने मंझ तेसरे चले आई गये, होर अचम्भा करदे लगे, कि से जनाने किन्हें क्या गल्ला करेया करहा; तेबे बी केसीए नी बोल्या, कि तू क्या चाहां? या किधियो तेस्सा किन्हें गल्ला करेया करहा था । 28 तेबे से जनाने आपणा घडा छाडी किन्हें नगरा मंझ चल्ली गयी, होर से लोका किन्हें बोल्दी लगी । 29 आऊआ, एक माहणु जो देखा, जिने मेरे बारे मंझ जो भी मैं कितेया से सभ कुछ तिने दसी दितेया: केथी ऐ मसीह ता नी आ? 30 इधी कठे स्यों नगरा ले निकळी किन्हें तिन्हा वाले आउंदे लगे । 31 तेस ई टैम तेसरे चले यीसू किन्हें अर्ज करदे लगे, कि हे रब्बी, कुछ खाई ले । 32 पर तिने तिन्हा किन्हें बोल्या, मेरे वाले खाणे रे कठे एहडा खाणां आं जेस जो तुस्से नी जाणदे । 33 तेबे चले आपु मंझ बोल्दे लगे, क्या केसीए तेसरे कठे कुछ खाणा ल्यान्द्रा? 34 यीसुए तिन्हा किन्हें बोल्या, मेरा खाणा ये आ, कि आपणे भेजणे वाळे री इच्छा रे मुताबक चलूं होर तेसरा काम पूरा करूं । 35 क्या तुस्से नी बोल्दे, कि कटणी हूणे मंझ हल्ली बी चार महीने बाकी ये? देखा, हांड तुस्सा किन्हें बोल्हा, आपणी हखीया चकी के खेता जो देखा, कि स्यों डोहरीया कटणी रे कठे पक्की चुकीरी । 36 होर काटणे वाळा मजदूरी पाहां, होर हमेसा रे कठे फल कठा करहा; ताकि बाहणे वाळा होर काटणे

वाळा दुहें मिली किन्हें आनन्द मनाईये । 37 क्यूंकि एता पर ये कहावत ठीक बैठणी कि बेजा बाहणे वाळा होर आ होर काटणे वाळा होर आ । 38 मैं तुस्से तेस खेता री कटाई रे कठे भेजे, तेता मंझ तुस्से मैहनत नी किती: होरीये मैहनत किती होर तुस्से तिन्हारी मैहनता रे फला मंझ भागी बणे । 39 तेस नगरा रे बौहत सामरीये तेस्सा जनानीया रे कैहणे रे कारण, जेस्से जे ये गवाही दितीरी थी, कि तिने सभ कुछ जो मैं कितिरा था, मुन्झो दसी दितेया, तेस्सा री एस गल्ला पर विस्वास कितेया । 40 तेबे जेबे ये सामरी तेस वाले आये, ता स्यों तेस किन्हें बिनती करदे लगे, कि आस्सा वाले एथी रही जा: होर से तेथी दो ध्याडे तक रहैया । 41 होर तेसरे बचना रे कारण होर भी बौहतिए विस्वास कितेया । 42 होर तिन्हे तेस्सा जनाने किन्हें बोल्या, एभे आस्से तेरे कैहणे ले ई विस्वास नी करदे, क्यूंकि आस्से आप्हुए सुणी लैया, होर जाणहां ऐं कि सच्चे ये ई संसारा रा मुक्तिदाता आ । 43 फेरी से दो ध्याडे ले बाद से तेथी ले निकळी किन्हें गलीला जो चली गया । 44 क्यूंकि यीसुये आप्हुए गवाही दीती, कि नबी आपणे देसा मंझ इज्जत नी पांदा । 45 जेबे से गलीला मंझ आया, ता गलीली चाऊवा किन्हें तेस किन्हें मिले, क्यूंकि जितने काम तिने यरुस्लेमा मंझ साजे रे टेमा कितीरे थे, तिन्हे सभ कुछ देखीरा था, क्यूंकि स्यों भी साजे मंझ गईरे थे । 46 तेबे से फेरी गलीला रे काना मंझ आये, जेथी जे तिने पाणी रा दाखरस बणाया था: होर एक राजे रा कर्मचारी था जेसरा म्हठा कफरनहुमा मन्झ बमार था । 47 तिने ये सुणी किन्हें कि यीसू यहूदिया रे गलीला मंझ आई गईरा, से तेस वाले गया होर तेस किन्हें बिनती करदा लग्या कि चली किन्हें मेरे म्हठे जो ठीक करी दे: क्यूंकि से मरणे ई वाळा था । 48 यीसुए तेस जो बोल्या, जेबे तक तुस्से चिन्ह होर नौखे काम नी देखे तेबे तक तुस्सा कधी विस्वास नी करणा । 49 राजे रे कामीये तेस किन्हें बोल्या; हे प्रभु, मेरे म्हठे री मौत हुणे ले पैहले चली पऊ । 50 यीसुए तेस जो बोल्या, जा, तेरा म्हठा जीउंदा आ: तिने आदमिये यीसू री गल्ला रा विस्वास कितेया, होर से चली गया । 51 से रस्ते मन्झ जाया करहा था, कि तेसरे सेवक तेस वाले आई किन्हें मिले होर बोल्दे लगे कि तेरा म्हठा जीउंदा आ । 52 तिने तिन्हा ले पुछेया कि केस टैम से ठीक हुंदा लग्या था? तिन्हे तेस जो बोल्या, काल सातुवे घंटे एसरा बुखार उतरी गया । 53 तेबे पिता जाणी गया, कि ये तेस ई टैम ठीक हुई गया जेस टैमा जे यीसुए तेस जो बोल्या, तेरा म्हठा जीउंदा आ, होर तिने होर तेसरे सारे टब्बरे विस्वास कितेया । 54 ये दूजा चमत्कार था, जो यीसुए यहूदिया ले निकळी किन्हें गलीला मंझ आई किन्हें दस्सेया ।

5 ¹ इन्हा गल्ला ले बाद यहूदीया रा एक साजा हुआ होर यीसू यरुस्लेमा जो चली गया । ² यरुस्लेमा मंझ भेड फाटका वाले एक तलाब आ जेस जो इब्रानी भाषा मंझ बेतसैदा

बोल्हा ऐ, होर तेसरे पांज डेहळिया या बर्याडे ये।³ इन्हा मंझ बौहत बीमार, काणे, लंगडे, होर बेजान (सुकी रे अंगा वाळे) (पाणी रे हीलणे रे इंतजारा मंझ) तेथी पईरे हूहां ऐं थे।⁴ क्यूंकि नियुक्त कितीरे टैमा रे मुताबक परमेसरा रे स्वर्गदूत तालाबा मंझ उतरी किन्हें पाणी जो हिलायें थे: पाणी हीलदे ही जो कोई पैहले उतरहा था से ठीक हुई जाहां था चाहे तेसरी केहडी भी बमारी की नी हो।⁵ तेथी एक माहणु था, जो ठती साला ले बमारीया मंझ पईरा था।⁶ यीसुए तेस जो तेथी पईरा देखी किन्हें होर ये जाणी किन्हें कि ये बौहत ध्याडे ले एस दसा मंझ पईरा। तेस्ते पुछेया, क्या तू ठीक हूणा चाहां?⁷ तिने बमारे तेस जो जवाब दितेया, कि हे प्रभु, मेरे वाले कोई माहणु नी आ, कि जेबे जे पाणी हिलाया जाहां, ता मुंजो तलाबा मंझ तुआरी सके; पर मेरे पुजदे पुजदे दूजा मेरे ले पैहले उतरी जाहां।⁸ यीसुए तेस जो बोल्या, उठ होर आपणा मांजा चकी किन्हें हांडदा लग।⁹ से आदमी झट पट ठीक हुई गया, होर आपणा मांजा चकी किन्हें चलदा फिरदा लग्या।¹⁰ से सब्ता रा ध्याडा था। एता कठे यहूदी तेस किन्हें, से जे ठीक हुई गईरा था, तेस किन्हें बोल्दे लगे, कि आज ता सब्ता रा ध्याडा आ, होर नियमा रे मुताबक तेरा मांजा चकणा ठीक नी आ।¹¹ तिने तेस जो जबाब दितेया, कि जिने हांड ठीक कितेया, तिने ई मुंजो बोल्या, आपणा मांजा चकी किन्हें हांडदा लग।¹² तिन्हे तेस्ते पुछेया से कुण माहणुं आं जिने जे तुजो बोल्या, आपणा मांजा चकी किन्हें हांडदा लग।¹³ पर से जे ठीक हुई गयी रा था, से नी जाणदा था कि से कुणहां; क्यूंकि तेस जगहा मंझ भीड भडाका हुणे री बजहा ले यीसू तेथी ले हटी गईरा था।¹⁴ इन्हा गल्ला ले बाद से यीसू जो मंदरा मंझ मिल्या, तेबे यीसुए तेस किन्हें बोल्या, देख, तू ता ठीक हुई गईरा; फेरी द्वारा कधी पाप देख्या करदा, एहडा नी हो कि एता ले भी कोई बड्डी बिपदा तेरे पर आई जाए।¹⁵ तिने माहणुं ऐं जाई किन्हें यहूदिया किन्हें बोली दितेया, कि जिने जे हांड ठीक कितेया, से यीसु आ।¹⁶ एता रे कठे यहूदी यीसू जो स्तांदे लगे, क्यूंकि से एहडे एहडे काम सब्ता रे ध्याडे करहा था।¹⁷ पर यीसुए तिन्हा जो बोल्या, कि पिता एभे तक काम करहा, होर हाऊं भी काम करहा।¹⁸ एस वजहा ले यहूदी होर भी ज्यादा तेस जो मारणे री कोसिस करदे लगे, कि से ना सिर्फ सब्ता रे ध्याडे रे नियमा जो तोडहा, पर परमेसरा जो आपणा पिता बोली किन्हें, आपणे आपा जो परमेसरा रे बराबर मन्हा।¹⁹ एता पर यीसुए तिन्हा जो बोल्या, हाऊं तुस्सा किन्हें सच सच बोल्हा, पुत्र आपणे आप कुछ नी करी सकदा, पर से सिर्फ तेहडा ई करहा जेहडा से पिता जो करदे देखहा, क्यूंकि जो जो काम से करहा, तिन्हा कामा जो पुत्र भी तेहडा ई करहा।²⁰ क्यूंकि पुत्र पिता किन्हें प्यार करहा होर जो जो काम से आपु करहा, से सभ तेस जो दस्था; होर तेस एता ले भी बडे बडे काम तेस जो दसणे,

ताकि तुस्से अचम्भा करी सको।²¹ क्यूंकि जिहां पिता मरीरे जो ठुआळहा होर जिन्दा करहा, तिहां ई पुत्र भी जिन्हां जो से चांहा तिन्हा जो जिन्दगी देंहां।²² होर पिता कैसी रा फैसला नी करदा, पर फैसले रा सारा काम तिने पुत्रा जो देई दिती रा।²³ जिहां सब लोक पिता री इज्जत करहा ऐ तिहां ई पुत्रा री भी इज्जत करा: जो पुत्रा री इज्जत नी करदा, से पिता री जिने जे से भेजीरा, तेसरी इज्जत नी करदा।²⁴ हांड तुस्सा किन्हें सच सच बोल्हा, जो मेरी बाणी सुणी किन्हें मेरे भेजणे वाळेया रा विस्वास करहा, अनंत जीन्दगी तेसरी ई, होर तेस पर सजा रा हुक्म नी हुन्दा पर से मौता ले पार हुई किन्हें जीन्दगी मंझ आई चुकिरा।²⁵ हांड तुस्सा किन्हें सच सच बोल्हा, एहडा टैम आहूँआं, होर एभे भी आ, जेता मंझ मुरदेया परमेसरा रे पुत्रा री अवाज सुणनी, होर जो सुणघे तिन्हा जीणा।²⁶ क्यूंकि जिहां पिता आपणे आपा मंझ जीन्दगी रक्खा, तिहां ई तिने ये हक आपणे पुत्रा जो भी दिती रा कि स्यों आपणे आपा मंझ जीन्दगी रखे।²⁷ बल्कि तेस जो फैसला करणे रा भी हक दितेया, क्यूंकि से माहणु रा म्हठा आ।²⁸ एता ले हरान मत हुआ, से टैम आहूँआं, कि जितने कबरा मंझ ऐ, तिन्हा तेसरी अवाज सुणी किन्हें निकळना।²⁹ जिन्हें जे भलाई कितिरी तिन्हा जिंदगी रे पुनरूथाना रे कठे जी उठणा होर जिन्हें जे बुराई कीतीरी तिन्हा सजा रे पुनरूथाना रे कठे जी उठणा।³⁰ हांड आपणे आप कुछ नी करी सकदा; जो हाऊं सुणहां, हाऊं तेहडा ई फैसला करहा, होर मेरा न्याय सच्चा आ, क्यूंकि हांड आपणी इच्छा नी, पर आपणे भेजणे वाळे री इच्छा चांहां।³¹ जे हांड आपणुए आपणी गुआही देंऊ ता मेरी गुआही सच्ची नी ई।³² एक होर आ जो मेरी गुआही देहां से सच्ची ई।³³ तुस्से यहून्ने ले पुछवाया होर तिने सच्चा ई री गुआही दिती।³⁴ पर हांड आपणे बारे मंझ माहणुआ री गुआही नी चाहन्दा, फेरी भी हाऊं ये गल्ला इधी कठे करहा, ताकि तुस्सा जो मुक्ति मिले।³⁵ से एहडा दीया था जो भक्खा होर चमक्हा था; होर तुस्सा जो कुछ देरा तक तेसरे प्रयासे मंझ, मगन हूणा बांका लग्या।³⁶ पर मेरे वाले जो गुआही ई से यहून्ने री गुआही ले बड्डी ई: क्यूंकि जो काम पिते मुंजो पूरा करणे रे कठे सौम्पीरा यानि ये ई काम जो हांड करहा, स्यों मेरे गुआह ऐ, कि पिते हांड भेजीरा।³⁷ होर पिता जिने जे हांड भेजीरा, तिने ई मेरी गुआही दीती: तैं ना कधी तेसरी अवाज सुणी, होर ना तेसरी सकल देखी।³⁸ होर तुस्से तेसरे बचना जो मना मंझ नी बसणा देंदे क्यूंकि जिने जे से भेज्या तेसरा विस्वास नी करदे।³⁹ तुस्से पवित्र सास्त्रा मंझ टोळहा ऐ, क्यूंकि तुस्से ये सोच्चा ऐ कि तेता मंझ तुस्सा जो अनन्त जीन्दगी मिल्ला ई, होर ये से ई आ जो मेरी गुआही देंहां।⁴⁰ फेरी भी तुस्से जीन्दगी पाणे रे कठे मेरे वाले नी आऊणा चाहन्दे।⁴¹ हांड माहणु ले इज्जत नी चाहन्दा।⁴² पर हांड तुस्सा जो जाणहां, कि तुस्सा

अन्दर परमेसरा रा प्यार नी आ।⁴³ हांउ आपणे पिता रे नांऊआं ले आईरा, होर तुस्से मुंजो नी मन्नदे; अगर कोई होर आपणे ई नांऊआं ले आई जाये, ता तुस्सा से स्वीकार करी लैणा।⁴⁴ तुस्से मांह पर किहां विस्वास करी सकहा ऐ? जेबे जे तुस्से जे एक दूजे ले इज्जत चाहें, होर तेस्सा इज्जता रे बारे मन्न सोच्दे भी नी जो परमेसरा री तरफा ले आहूँआं ई।⁴⁵ ये नी समझा, कि मां पिता रे साम्हणे तुस्सा पर दोष लगाणा: तुस्सा पर दोष लगाणे वाळा ता हाया यानि मूसा जेस पर तुस्से भरोसा रखीरा।⁴⁶ क्यूंकि अगर तुस्से मूसा रा विस्वास कितेया, ता तुस्से मेरा भी विस्वास करदे, क्यूंकि तिने मेरे बारे मन्न लिखीरा।⁴⁷ पर अगर तुस्से तेसरी लिखी री गल्ला रा विस्वास नी करदे, ता मेरी गल्ला रा विस्वास तुस्सा किंहा करणा?

6¹ इन्हा गल्ला ले बाद यीसू गलीला री झीला यानि तिबिरीयास झीला रे दूजे किनारे पर गया।² होर एक बडी भीड़ तेसरे पीछे हुई गयी क्यूंकि जो नौखे काम से रोगीया पर करहा था स्यों तिन्हा जो देख्हा ऐ थे।³ तेबे यीसू पहाडा पर चढ़ी किन्हें तेथी आपणे चले साउगी बैठेया।⁴ होर यहूदिया रा फसहा रा साजा नेडे था।⁵ तेबे यीसुए आपणी हाखिया उठाई किन्हें एक बौहत बड़ी भीड़ आपणे वाले आउंदे देखी, होर फिलिपुसा किन्हें बोल्या, कि आस्से इन्हा रे कठे खाणा कैथी ले खरीदिये? ⁶ पर तिने ये गल तेस जो परखण रे कठे बोली; क्यूंकि से आपु जाणहां था की तेस क्या करणा।⁷ फिलिपुसे तेसजो जबाब दितेया, कि दो सौ दीनारा री रोटी भी तिन्हा रे कठे पुरी नी हुणी ताकि तिन्हा मंझा ले हर एकी जो थोडी थोडी मिली सके।⁸ तेसरे चले मंझा ले समौन पतरसा रे भाई अन्द्रीयासे तेस जो बोल्या।⁹ एथी एक म्हठा आ जेस वाले जौवा री पांज रोटीया होर दो मछिया ई। पर इतने लोका रे कठे यों क्या ई।¹⁰ यीसुए बोल्या, कि लोका जो बठयाळी देया। तेस जगहा बौहत घाह था: तेबे स्यों लोक जो गिणतिया मंझ लगभग पांज हजार थे बैठी गये: ¹¹ तेबे यीसुए रोटीया लई, होर धन्यावाद करी किन्हें बैठणे वाळेया मंझ बांडी दिती: होर तिहां ई मछिया मंझा ले जितनी स्यों चाहें थे तिन्हा जो बांडी दिती।¹² जेबे स्यों खाई किन्हें रजी गये ता तिने आपणे चले किन्हें बोल्या, कि बचीरे टुकडे कठे करा, ताकि कुछ भी बरबाद नी हो।¹³ तेबे तिन्हे बचीरे टुकडे कठे किते, होर तिन्हे जौवा री पांज रोटीया रे टुकडे जो खाणे वाळे ले बची गयीरे थे तिन्हारी बारा टोकरीया भरी।¹⁴ जेबे जो अदभुत काम करी किन्हें तिने दसी दितेया ता स्यों लोक ये देखी किन्हें बोल्दे लगे; कि से नबी जो संसारा मंझ आऊणे वाळा था, पक्का ये ई आ।¹⁵ यीसुए ये जाणी किन्हें कि स्यों मुंजो राजा बणाणे रे कठे पकड़ना चाहें, होर से तेथी ले निकळी किन्हें कल्हा पाहडा पर चली गया।¹⁶ फेरी जेबे साहन्ज हुई, ता तेसरे चले झीला रे बाढे गये।

¹⁷ होर स्यों किस्तिया मंझ सुआर हुई किन्हें झीला ले हुई किन्हें कफरनहूमा जो जांदे लगे: तेस टैम न्हयारा हुई गईरा था, होर यीसू हली तक तिन्हा वाले नी अईरा था।¹⁸ होर आंधी री वजहा ले झीला मंझ लैहरा उठदी लगी।¹⁹ इधी कठे जेबे स्यों किस्ती चलान्दे चलान्दे लगभग तीन चार मील निकळी गये, ता तिन्हे यीसू जो झीला पर चलदे, होर किस्ती रे नेडे आऊन्दे देख्या, होर डरी गये।²⁰ पर तिने तिन्हा किन्हें बोल्या, डरा नी, ये हांऊ आं।²¹ तेबे जाई किन्हें तिन्हे यीसू जो किस्ती मंझ चढणे दितेया: होर जल्दी ही किस्ती तेस जगहा पूजी गयी जेथी जे स्यों जाणां चाहें थे।²² दूजे ध्याडे जेबे लोका री भीड़ झीला रे पार खडी री थी, ता तिन्हे ये देख्या, कि तेथी एक किस्ती जो छाडी किन्हें होर कोई किस्ती नी थी, होर यीसू आपणे चले साउगी तेस किस्ती पर नी चढेया, पर सिर्फ तेसरे चले ही गयीरे थे।²³ तेबे भी होर छोट्टी किस्तीया तिबरीयासा ले तेस जगहा आई जेथी तिन्हे प्रभु रा धन्यवाद करणे ले बाद रोटी खाध्ही थी।²⁴ एता कठे जेबे भीडे देख्या, कि एथी ना यीसू आ, होर ना तेसरे चले ऐ, स्यों भी छोट्टी छोट्टी किस्तीया मंझ सुआर हुई किन्हें यीसू जो टोल्दे टोल्दे कफरनहूमा जाई पूजे।²⁵ होर तिन्हे झीला ले पार तेस साउगी मिली किन्हें बोल्या, हे रब्बी तू एथी केभे आया? ²⁶ यीसुए तिन्हा जो जबाब दितेया, कि हांऊ तुस्सा किन्हें सच सच बोल्हा, तुस्से मुंजो एता कठे नी टोल्दे कि तुस्से नौखे काम देखे, पर एता कठे टोल्हा ऐ कि तुस्से रोटीया खाई किन्हें रजी गये।²⁷ नास हुणे वाळे खाणे रे कठे मैहनत नी करा, पर तेस खाणे रे कठे मैहनत करा जो अनंत जीन्दगी तक बणी किन्हें रहे, जो माहणुआ रे पुत्रा तुस्सा जो देणी, क्यूंकि पिता यानि परमेसरे तेस पर छाप करी दिती।²⁸ तिन्हे तेस किन्हें बोल्या, परमेसरा रा काम करणे रे कठे आस्सा जो क्या करणा चाहिए? ²⁹ यीसुए तिन्हा जो जबाब दितेया, परमेसरा रा काम ये आ, कि तुस्से तेस पर जिने जे से भेजीरा विस्वास करा।³⁰ तेबे तिन्हे तेस किन्हें बोल्या, फेरी तू कुण जे नौखा काम करहा कि आस्से तेसजो देखी किन्हें विस्वास करीए, तू कुण जे काम दस्हा? ³¹ आस्सा रे बाबदादे जंगला मंझ मन्ना खाध्या, जो लिखीरा आ, कि तिने तिन्हा जो खाणे रे कठे स्वर्गा ले रोटी दिती।³² यीसुए तिन्हा किन्हें बोल्या, हांऊ तुस्सा किन्हें सच सच बोल्हा कि मुसे तुस्सा जो से रोटी स्वर्गा ले नी दिती, पर मेरा पिता तुस्सा जो स्वर्गा ले सच्ची रोटी देहां।³³ क्यूंकि परमेसरा री रोटी से ई जो स्वर्गा ले उतरी किन्हें संसारा जो जीन्दगी देहां ई।³⁴ तेबे तिन्हे तेस किन्हें बोल्या, हे पभु, ये रोटी आस्सा जो हमेसा देया करा।³⁵ यीसुए तिन्हा किन्हें बोल्या, जीन्दगी री रोटी हांऊ ई: जेस जे मेरे वाले आऊणा तेस कधी भी भूखे नी रैहणा होर जो माह पर विस्वास करघा, तेस जो कधी सोख नी लगणी।³⁶ पर हांऊ तुस्सा जो बोल्हा, कि तुस्से भी

हांऊ देखी लईरा, तेबे भी विस्वास नी करदे।³⁷ जो कुछ पिता मुंजो देहां से मेरे वाले आहूँआं, से माँ कधी नी काढणा।³⁸ क्यूंकि हांऊ आपणी इच्छा नी, पर आपणे भेजणे वाळे री इच्छा पुरी करणे रे कठे आईरा।³⁹ होर मेरे भेजणे वाळे री इच्छा ये ई कि जो कुछ तिने मुंजो दिती रा, तेता मंझा ले हांऊ कुछ नी गुआऊं पर तेस जो आखरी ध्याडे तेस जो फेरी ठुआळी देंऊ।⁴⁰ क्यूंकि मेरे पिता री इच्छा ये ई, कि जो कोई पुत्रा जो देखे, होर तेस पर विस्वास करे, तेस अनंत जिन्दगी पाणी; होर माँ से आखरी ध्याडे फेरी ठुआळी देणा।⁴¹ तेबे यहूदी तेस पर कुडकुड करदे लगे एता कठे कि तिने बोल्या था; कि जो रोटी स्वर्गा ले उतरी, से हांऊ ई।⁴² होर तिन्हे बोल्या, क्या ये युसुफा रा म्हठा यीसू नी आ, जेसरे माऊ बाबा जो आस्से जाणहां ऐं? तेब से किधीयो बोल्हा कि हांऊ स्वर्गा ले आईरा।⁴³ यीसुए तिन्हा जो जबाब दितेया, कि आपु मंझ नी कुडकुडावा।⁴⁴ कोई मेरे वाले नी आई सकदा, जेबे तक पिता, जिने जे हांऊ भेजीरा, तेस जो खींजी किन्हे नी लई आंऊ; होर माँ से आखरी ध्याडे फेरी ठुआळी देणा।⁴⁵ नबीया रे लेखा मंझा ये लिखीरा आ, कि स्यों सब परमेसरा री तरफा ले सिखाई रे हुंगे। जेस केसीये पिता ले सुणेया होर सिखेया, से मेरे वाले आहूँआं।⁴⁶ ये नी, कि केसीए पिता देख्या पर जो परमेसरा री तरफा ले आ, सिर्फ तिने ई पिता देख्या।⁴⁷ हांऊ तुस्सा किन्हे सच सच बोल्हा, कि जो कोई विस्वास करहा, अनंत जीन्दगी तेसरी ई।⁴⁸ हांऊ जीवना री रोटी ई।⁴⁹ तुस्सा रे बाब दादे जंगला मंझ मन्ना खाध्या होर मरी गये।⁵⁰ ये से रोटी ई जो स्वर्गा ले उतरहा ई ताकि माहणु तेता मंझा ले खाई सके होर नी मरे।⁵¹ जीन्दगीया री रोटी जो स्वर्गा ले उतरीरी हांऊ ई, अगर कोई एसा रोटिया मंझा ले खाये, ता हमेसा जींदा रहणा होर जो रोटी माँ संसारा रे जीन्दगीया रे कठे देणी, से मेरा मास आ।⁵² एता पर यहूदी ये बोली किन्हे आपु मंझ झगडदे लगे, कि ये आदमी किहां आपणा मास खाणे जो देई सकहा? ⁵³ यीसुए तिन्हा किन्हे बोल्या; हांऊ तुस्सा किन्हे सच सच बोल्हा जेबे तक माहणुआ रे पुत्रा रा मास नी खाहंगे, होर तेसरा खून नी पीहंगे, तुस्सा मंझ जीन्दगी नी ई।⁵⁴ जो मेरा मास खाहाँ होर मेरा खून पींहा, अनंत जीन्दगी तेसरी ई, होर आखरी ध्याडे से माँ फेरी ठुआळी देणा।⁵⁵ क्यूंकि मेरा मास खाणे री चीज ई, होर मेरा खून पीणे री चीज ई।⁵⁶ जो मेरा मास खाहाँ होर मेरा खून पीहां, से मेरे अन्दर होर हांऊ तेस अन्दर बणी के रह्यां ⁵⁷ जिहां जीउंदे परमेसर पिते हांऊ भेजीरा होर हांऊ पिता री बजहा ले जीउंदा आ तिहां ई तेस भी जो मुंजो खांहगा तेस मेरी बजहा ले जीउंदे रहणा।⁵⁸ जो रोटी स्वर्गा ले उतरीरी से ये ई, बाब दादे साहीं नी कि खाया, होर मरी गये; जेस केसी ये रोटी खाणी तेस हमेसा जीउंदे रहणा।⁵⁹ ईयूँ गल्ला तिने कफरनहुमा रे एक मंदरा मंझ प्रचारा रे

टैमा बोली।⁶⁰ एता कठे तेसरे चेले मंझा ले बौहतिये ये सुणी किन्हे बोल्या, कि ये गल बडी कौऊडी ई; इन्हा जो कुण सुणी सकहा? ⁶¹ यीसुए आपणे मना मंझ ये जाणी किन्हे कि मेरे चेले आपु मंझ एस गल्ला री बजहा ले कुडकुडान्दें लगीरे, तिन्हा ले पुछेया, क्या इन्हा गल्ला ले तुस्सा जो ठोकर लघ्हा ई।⁶² होर अगर तुस्से माहणु रे पुत्रा जो जेथी से पैहले था, तेथी ले ऊपर जांदे देखणा तेबे क्या हूणां? ⁶³ आत्मा ता जीन्दगी देणे वाळी ई, सरीरा ले कुछ फायदा नी: जो गल्ला में तुस्सा किन्हे बोलीरी स्यों आत्मा होर जीन्दगी ई।⁶⁴ पर तुस्सा मंझा ले कितने एहडे ऐ जो विस्वास नी करदे: क्यूंकि यीसू ता पैहले ले जाणहां था कि जो विस्वास नी करदे, स्यों कुणहें? होर केस हांऊ पकड वाणा।⁶⁵ होर तिने बोल्या, इधी कठे में तुस्सा किन्हे बोल्या था कि जेबे तक केसी जो पिता री तरफा ले ये बरदान नी दितेया जाये तेबे तक से मेरे वाले नी आई सकदा।⁶⁶ एता ले बाद तेसरे चेले मंझा ले बौहत तेसरे खिलाफ हुई गये होर फेरी तेस साउगी नी चले।⁶⁷ तेबे यीसुए तिन्हा बारा चलेया किन्हे बोल्या, क्या तुस्से भी जाणा चाहें? ⁶⁸ समौन पतरसे तेस जो जबाब दितेया, कि हे प्रभु आस्से केस वाले जाईये? अनंत जीन्दगीया री गल्ला ता तेरे ही वाले ई।⁶⁹ होर आस्से विस्वास कितेया, होर जाणी गये, कि परमेसरा रा पवित्र माहणु तू ई आ ⁷⁰ यीसुए तिन्हा जो जबाब दितेया, क्या मैं तुस्से बारा चेले नी चुणीरे? तेबे बी तुस्सा मंझा ले एक सैतान आ।⁷¹ ये तिने समौन इस्करयोति रे म्हठे यहूदा ईस्करयोति रे बारे मंझ बोल्या, क्यूंकि येही जो तिन्हा बारा मंझा ले था, तेस जो पकड वाणे वाळा था।

7¹ इन्हा गल्ला ले बाद यीसू गलील मंझा फिरदा रह्या, क्योकि यहूदी तेस जो मारणे रे कठे कोसिस करेया करहा ऐ थे, इधी कठे से यहूदिया मंझ घूमणा नी चाहन्दा था।² होर यहूदिया रे तम्बुआ रा साजा नेडे था।³ इधी कठे तेसरे भाईये तेस जो बोल्या, एथी ले निकळी किन्हे यहूदिया जो चली जा, क्यूंकि जो काम तू करहा तिन्हा जो तेरे चेले भी देखे।⁴ क्यूंकि एहडा कोई नी हूणां जो प्रसिद्ध हूणां चाहां होर लुहखी किन्हे काम करे: अगर तो ये काम करहा, ता आपणे आपा जो संसारा पर जाहीर कर।⁵ क्यूंकि तेसरे भाई भी तेस पर विस्वास नी करदे थे।⁶ तेबे यीसुए तिन्हे किन्हे बोल्या, मेरा टैम हल्ली नी आईरा; पर तुस्सा रे कठे हमेसा टैम आ।⁷ संसार तुस्सा किन्हे नफरत नी करी सकदा, पर से मेरे किन्हे बैर करहा, क्यूंकि हांऊ तेसरे खिलाफ ये गुवाही देहां, क्यूंकि तेसरे काम बुरे ऐ।⁸ तुस्से त्योहारा मंझ जावा: माँ हल्ली एस त्योहारा मंझ नी जाणा; क्यूंकि हल्ली तक मेरा टैम पूरा नी हुईरा।⁹ से इउं गल्ला करी किन्हे गलीला मंझ ई रही गया।¹⁰ पर जेबे तेसरे भाई त्योहारा मंझ चली गये, ता से आपु खुल्लम खुल्ला नी गया पर चुपके जे गया।¹¹ यहूदी त्योहरा मंझ तेस जो ये बोली किन्हे टोल्दे

लगे कि से केथी आ? ¹² होर लोका मंझ तेसरे बारे मंझ चुपे चुपे बौहत गल्ला हुई: कुछ बोल्हा ऐ थे से भला माहणु आं। होर कुछ बोल्हा ऐ थे कि नई, से लोका जो भरमाहां। ¹³ तेबे बी यहूदीया रे डरा रे मारे कोई आदमी तेसरे बारे मंझ खुल्ही किन्हें नी बोल्दे थे। ¹⁴ होर जेबे त्योहारा रा आधा ध्याडा बीती गया; ता यीसू मंदरा मंझ जाई किन्हें प्रचार करदा लग्या। ¹⁵ तेबे यहूदी हरान हुई किन्हें बोल्दे लगे, कि एस जो बगैर पढे पढाई किहां आई? ¹⁶ यीसुए तिन्हा जो जबाब दितेया, कि मेरा प्रचार मेरा नी आ, पर मेरे भेजणे वाळे रा आ। ¹⁷ अगर कोई आपणी इच्छा पर चलणा चाहां, ता तेस एस प्रचारा रे बारे मंझ जाणी जाणा कि से परमेसरा री तरफा ले आ, या हांऊ आपणी तरफा ले बोल्हा। ¹⁸ जो आपणी तरफा ले कुछ बोल्हा, से आपणी ई वाह वाह चाहां, पर जो आपणे भेजणे वाळे री बडाई चाहां से ई सच्चा आ, होर तेस मंझ पाप नी आ। ¹⁹ क्या मुसे तुस्सा जो व्यवस्था नी दिती? तेबे बी तुस्सा मंझा ले कोई व्यवस्था पर नी चलदा। तुस्से मुंजो किधीयो मारणा चाहें? ²⁰ लोके जबाब दितेया, तेरे अन्दर दुष्टात्मा ई; कुण तुजो मारणा चाहां? ²¹ यीसुए तिन्हा जो जबाब दीतेया, कि मैं एक काम कितीरा, होर तुस्से अचम्भा करहा ऐ। ²² एता कठे मुसे तुस्सा जो खतने रा हुकम दितेया (ये मूसा री तरफा ले नी आ, पर बाबदादे ले आ) होर तुस्से सब्ता रे ध्याडे माहणु आ रा खतना करहा ऐ। ²³ जेबे सब्ता रे ध्याडे माहणु आ रा खतना कितेया जाहां ताकि मूसा री व्यवस्था रा हुकम टळी ना जाये, तुस्से मेरे प्रयाहले किधीयो गुस्सा करहा ऐ, कि मैं सब्ता रे ध्याडे एक आदमी जो पुरी तरहा ले ठीक कितेया। ²⁴ मुहं देखी किन्हें फैसला नी करा, पर ठीक ठीक न्याय करा। ²⁵ तेबे कितने यरूस्लेमी बोल्दे लगे; क्या ये से नी आ, जेस जो मारणे रे कठे कोसिस करेया करहा ऐ। ²⁶ पर देखा, से ता खुलम खुला गल्ला करहा होर कोई तेस जो कुछ नी बोल्दा; क्या सच्चे सरदारो सच सच जाणी लईरा, कि ये ई मसीह आ। ²⁷ एस जो ता आस्से जाणहां ऐं, कि ये के थीरा आ; पर जेबे मसीहा आउणा, ता केसी जो पता नी चलणा कि से केथीरा। ²⁸ तेबे यीसुए मंदरा मंझ उपदेस देंदे हुए चिल्लाई किन्हें बोल्या, तुस्से मुंजो जाणहां ऐं होर ये भी जाणहां ऐं कि हांऊ केथीरा आ, हांऊ आपणे आपा ले नी आईरा पर मेरा भेजणे वाळा सच्चा आ, तेस जो तुस्से नी जाणदे। ²⁹ हांऊ तेस जो जाणहां, क्यूंकि मैं तेसरी तरफा ले आ होर तिने ही हांऊ भेजीरा। ³⁰ तेबे तिन्हे से पकड़ना चाहेया तेबे भी केसीये तेस जो हाथ नी लगाया, क्यूंकि तेसरा टैम हल्ली तक नी आईरा था। ³¹ होर भीडा मंझा ले बौहतिये तेस पर विस्वास कितेया, होर बोल्दे लगे, कि मसीहा जेबे आउणा, ता क्या एता ले ज्यादा तेस चमत्कार दसणे जो इने दसे? ³² फरीसीये लोका जो तेसरे बारे मंझ चुपे चुपे ये गल्ला करदे सुणेया, होर महायाजके होर फरीसीये तेस जो पकड़ने रे

कठे स्पाही भेजे। ³³ एता पर यीसुए बोल्या, हांऊ थोहडी देरा तक तुस्सा साउगी आ; तेबे मां आपणे भेजणेवाळे वाले चली जाणा। ³⁴ तुस्सा हांऊ टोळना पर नी मिलणा होर जेथी हांऊ आ, तेथी तुस्से नी आई सकदे। ³⁵ यहूदीये आपु मंझ बोल्या, एस केथी जाणा, कि आस्सा जो ये नी मिलणा: क्या एस तिन्हा वाले जाणा, जो युनानिया मंझ तितर बीतर हुई किन्हें रैहें, होर युनानिया जो भी स्वाणा चाहां? ³⁶ ये क्या गल ई जो तिने बोली, कि तुस्सा हांऊ टोळना, पर नी मिलणा: होर जेथी हांऊ आ, तेथी तुस्से नी आई सकदे? ³⁷ फेरी साजे रे आखरी ध्याडे, जो खास ध्याडा आ, यीसू खडा हुई किन्हें होर चिल्लाई किन्हें बोल्या, अगर कोई सोखा हो ता मेरे वाले आई किन्हें पीये। ³⁸ जेस मांह पर विस्वास करणा, जो सास्त्रा मंझ बोलीरा, तेसरे दिला मंझा ले जीन्दगिया रे पाणी री नदिया बैल्ली। ³⁹ तिने ये वचन तेस आत्मा रे बारे मंझ बोल्या, जेस जो तेस पर विस्वास करणे वाळे, पाणे वाळे थे, क्यूंकि आत्मा हल्ली तक उतरीरा नी था; क्यूंकि यीसू हल्ली तक आपणी महिमा जो नी पौहुन्चीरा था। ⁴⁰ तेबे भीडा मंझा ले केसी केसीए ये गल्ला सुणी किन्हें बोल्या, स्वाणा, ये ई से नबी आ। ⁴¹ होरीये बोल्या; ये मसीह आ, पर केसीए बोल्या; क्या मसीहा गलीला ले आउणा? ⁴² क्या पवित्र सास्त्रा मंझ नी बोलीरा, कि मसीह दाऊदा रे बंसा ले होर बैतलेहमा गाऊवां ले आउणा, जेथी दाऊद रैहयां था? ⁴³ इधी कठे तेसरी बजहा ले लोका मंझ फूट पई। ⁴⁴ तिन्हा मंझा ले कितने तेस जो पकड़ना चाहें थे, पर केसीए तेस पर हाथ नी पाया। ⁴⁵ तेबे स्पाही महायाजक होर फरीसीया वाले आये, होर तिन्हे किन्हें बोल्या, तुस्से से कि नी ल्यान्देया? ⁴⁶ स्पाहीये जबाब दितेया, कि केसी माहणुये कधी भी एहडी गल नी किती। ⁴⁷ फरीसिये तिन्हा जो जबाब दितेया, क्या तुस्से भी भरमाई रे? ⁴⁸ क्या सरदारा या फरीसिया मंझा ले केसीए भी तेस पर विस्वास कितेया? ⁴⁹ पर ये लोक जो व्यवस्था नी जाणदे, श्रापित ऐ। ⁵⁰ नीकुदेमुसे जो पैहले तेस वाले आईरा था होर तिन्हा मंझा ले एक था, तिन्हा किन्हें बोल्या। ⁵¹ क्या आस्सा री व्यवस्था केसी आदमी जो जेबे तक कि पैहले तेसरी सुणी किन्हें जाणी नी ले, कि से क्या करहा, दोषी बणाहां? ⁵² तिन्हे तेस जो जबाब दितेया, क्या तू भी गलीला रा आ? टोळ होर देख कि गलीला ले कोई नबी प्रगट हूणां कि नी? ⁵³ तेबे सभ कोई आपणे आपणे घरा जो चली गये।

8 ¹ पर यीसू जैतुना रे पहाडा पर गया। ² होर से भ्यागा ई दबारा मंदरा जो आया, होर सब लोक तेस वाले आये; होर से बैठी किन्हें तिन्हा जो सखान्दा लग्या। ³ तेबे सास्त्री होर फरीसी एक जनाने जो ल्याहूंआं ऐं, जो व्यभिचारा मंझ पकड़ी गईरी थी, होर तेस्सा जो मंझ भरा खडा करी किन्हें यीसु किन्हें बोल्या। ⁴ हे गुरु, ये जनाने व्यभिचार करदे पकड़ी

गईरी।⁵ व्यवस्था मंझ मुसे आस्सा जो ये हुकम दिती रा कि एहड़ी जनानेया जो पथराव करणा: इधी कठे तू एस्सा जनाने रे बारे मंझ क्या बोल्ला? ⁶ तिन्हे तेस जो परखणे रे कठे ये गल बोली ताकि तेस पर दोष लगाणे रे कठे कोई गलती मिली सके, पर यीसू झुकी किन्हे आपणी गुठीया किन्हे जमीना पर कुछ लिखदा लग्या। ⁷ जेबे स्यों तेस्ते पुछदे रहे, ता तिने ऊपर उठी किन्हे तिन्हा जो बोल्ला, कि तुस्सा मंझा ले जो पापी नी हो, से ही तेस्सा जो पैहले पात्थर मारे। ⁸ होर से दबारा झुकी किन्हे जमीना पर लिखदा लग्या। ⁹ पर स्यों ये सुणी किन्हे बडे ले लई किन्हे छोटे तक एक एक करी किन्हे चली गये, होर यीसू कल्हा रही गया, होर जनाने तेथी बीचा मंझ खडी रही गयी। ¹⁰ यीसुए ऊपर उठी किन्हे तेस्सा किन्हे बोल्ला, हे जनाने, स्यों केथी गये? क्या केसीए तुजो दंडा रा हुकम नी दितेया। ¹¹ तेस्से बोल्ला, हे प्रभु, केसीए नी: यीसुए बोल्ला, हांऊ भी तुजो दंडा रा हुकम नी देंदा; जा होर दबारा पाप देख्या करदी। ¹² तेबे यीसुए दबारा लोका किन्हे बोल्ला, संसारा रा उजाला हांऊ आं; जो मेरे पीछे आहुन्घा, तेस न्याहरे मंझ नी चलणा, पर जीन्दगीया रा उजाला पाणा। ¹³ फरीसीये तेस किन्हे बोल्ला; तू आपणी गवाही आपु देहां; तेरी गवाही ठीक नी ई। ¹⁴ यीसुए तिन्हा जो जबाब दितेया; कि अगर हांऊ आपणी गवाही आपु देहां, तेबे बी मेरी गवाही ठीक ई, क्यूंकि हांऊ जाणहां, कि हांऊ केथी ले आईरा, होर केथी जाहां? पर तुस्से नी जाणदे कि हांऊ केथी ले आहूंआं या केथीयो जाहां। ¹⁵ तुस्से सरीरा रे मताबक न्याय करहा ऐ; हांऊ केसी रा न्याय नी करदा। ¹⁶ होर जे हांऊ न्याय करूं भी, ता मेरा न्याय सच्चा आ, क्यूंकि हांऊ कल्हा नी आ, पर हांऊ होर मेरा पिता जिने जे हांऊ भेजीरा। ¹⁷ होर तुस्सा री व्यवस्था मंझ लिखीरा; कि दो आदमिया री गवाही मिली किन्हे सच्ची हूंहां ई। ¹⁸ एक ता हांऊ आपु आपणी गवाही देहां, होर दूजा पिता मेरी गवाही देहां जिने हांऊ भेजीरा। ¹⁹ तिन्हे तेस किन्हे बोल्ला, तेरा पिता केथी आ? यीसुए जबाब दितेया, कि जे तुस्से मुंजो जाणदे ता मेरे पिता जो बी जाणदे। ²⁰ ये गल्ला तिने मंदरा मंझ उपदेस देंदे हुए भण्डार घरा मंझ बोली, होर केसीए से नी पकड़ेया; क्यूंकि हल्ली तक तेसरा टैम नी आईरा था। ²¹ तिने दबारा तिन्हा किन्हे बोल्ला, हांऊ चलहा, होर तुस्सा हांऊ टोळणा होर आपणे आपा मंझ मरी जाणा: जेथी हांऊ जाहां तेथी तुस्से नी आई सकदे? ²² एता पर यहुदिये बोल्ला, क्या ऐस आपणे आपा जो मारी देणा, जो बोल्ला, कि जेथी हांऊ जाहां, तेथी तुस्से नी आई सकदे। ²³ तिने तिन्हा किन्हे बोल्ला, तुस्से हेठले ऐ, हांऊ उपरला आ, तुस्से संसारा रे ऐ, हांऊ संसारा नी आ। ²⁴ इधी कठे मैं तुस्सा किन्हे बोल्ला, कि तुस्सा आपणे पापा मंझ मरणा; क्यूंकि अगर तुस्से विस्वास नी करघे कि हांऊ से ई आ, ता आपणे पापा मंझ मरणा। ²⁵ तिन्हे

तेस किन्हे बोल्ला, तू कुणहां? यीसुए तिन्हा किन्हे बोल्ला, हांऊ से ई आ, जो पैहले ले तुस्सा जो बोळदा आया। ²⁶ तुस्सा रे बारे मंझ मुंजो बोहत कुछ बोलना आ, होर फैसला करणा आ, पर मेरा भेजणे वाळा सच्चा आ; होर जो मैं तेस्ते सुणेया ये ही हांऊ संसारा किन्हे बोल्ला। ²⁷ स्यों नी समझे कि आस्सा किन्हे पिता रे बारे मंझ बोल्ला। ²⁸ तेबे यीसुए बोल्ला, कि जेबे तुस्से माहणुया रे पुत्रा जो उचे पर चढाणा, तेबे तूसा जाणना कि हांऊ से ई आ, होर हांऊ आपणे आप कुछ नी करदा, पर जिहां पिते हांऊ सखाईरा, तिहां ई हांऊ यूं गल्ला बोल्ला। ²⁹ होर मेरा भेजणेवाळा मेरे साउगी आ; तिने हांऊ कलहा नी छाडी रा; क्यूंकि हांऊ हमेसा तेहडा ई काम करहा जेस ले से खुस हुंहा। ³⁰ जिहां ई से ये गल्ला बोल्ला करहा था, कि बौहतिये तेस पर विस्वास कितेया। ³¹ तेबे यीसुए तिन्हा यहुदिया किन्हे जिन्हे जे तेस पर विस्वास कितेया था, बोल्ला, अगर तुस्से मेरे वचना मंझ बणी के रहेंगे, ता तुस्सा सच्चे मेरे चले बणना। ³² होर तुस्सा सच्चाई जाणनी, होर सच्चाईया तुस्से अजाद करी देणे। ³³ तिन्हे तेस जो जबाब दितेया; कि आस्से ता अब्राहमा रे बंसा ले ऐ होर कधी केसी रे गुलाम नी बणे; फेरी तू कि बोल्ला, कि तुस्सा अजाद हुई जाणा। ³⁴ यीसुए तिन्हा जो जबाब दितेया, हांऊ तुस्सा किन्हे सच सच बोल्ला कि जो कोई पाप करहा, से पापा रा गुलाम आ। ³⁵ होर गुलाम हमेसा घरा मंझ नी रहन्दा, पर पुत्र हमेसा रहेंयां। ³⁶ एता कठे अगर पुत्रा तुस्से अजाद करणे, ता सच्चे तुस्सा अजाद हुई जाणा। ³⁷ हांऊ जाणहां कि तुस्से अब्राहमा रे बंसा ले ऐ; तेबे बी मेरा वचन तुस्सा रे दिला मंझ जगह नी पांदा, इधी कठे तुस्से मुंजो मारी देणा चाहें। ³⁸ हांऊ से ही बोल्ला, जो मैं आपणे पिता वाले देखी रा, होर तुस्से बी तेहडा ई करहा ऐ जो तुस्से आपणे बाबा ले सुणहां ऐं। ³⁹ तिन्हे तिन्हा जो जबाब दितेया, कि आस्सा रा पिता ता अब्राहम आ: यीसुए तिन्हा किन्हे बोल्ला; अगर तुस्से अब्राहमा री संतान हुंदे, ता अब्राहमा साहीं काम करदे। ⁴⁰ पर एभे तुस्से मुंजो एहडे माहणु जो मारी देणा चाहें, जिने जे तुस्सा जो से सच्चा वचन दस्या जो मैं परमेसरा ले सुणेयां, ये ता अब्राहमे नी कितेया था। ⁴¹ तुस्से आपणे बाबा साहीं काम करहा ऐ: तिन्हे तेस किन्हे बोल्ला, आस्से व्यभिचारा ले नी जम्मिरे; आस्सा रा एक पिता आ यानि परमेसर। ⁴² यीसुए तिन्हा किन्हे बोल्ला, अगर परमेसर तुस्सा रा पिता हुंदा, ता तुस्से मेरे किन्हे प्यार रखदे; क्यूंकि हांऊ परमेसरा ले निकळी किन्हे आईरा; हांऊ आपणे आप नी आईरा, पर तिने ई हांऊ भेजीरा। ⁴³ तुस्से मेरी गल कि नी समझे? क्यूंकि तुस्से मेरा वचन सुणी नी सकदे। ⁴⁴ तुस्से आपणे पिता सैताना ले ऐ, होर आपणे पिता री इच्छा पुरी करणा चाहें; से ता सूरहू ले ई खूनी आ, होर सच्चाई पर खडा नी रहैया, क्यूंकि सच्चाई ता तेस अन्दर हाई नी जेबे से झूठ

बोल्हा, ता आपणे आदता रे कारण बोल्हा, क्यूंकि से झूठा आ, बल्कि झूठा रा बाब आ।⁴⁵ पर हांऊ जो सच बोल्हा, तुस्से मेरा विस्वास नी करदे? ⁴⁶ तुस्सा मंझा ले कुण मुंजो पापी हुणे रा दोष ल्याहां? होर अगर मैं सच बोल्हा, ता तुस्से मेरा विस्वास कि नी करदे? ⁴⁷ जो परमेसरा ले हूहां से परमेसरा री गल्ला सुणहां; होर तुस्से इधी कठे नी सुणदे क्यूंकि तुस्से परमेसरा री तरफा ले नी ये। ⁴⁸ ये सुणी किन्हें यहुदिये तेस किन्हें बोल्या, क्या आस्से ठीक नी बोल्दे, कि तू सामरी आ, होर तेरे अन्दर दुस्तात्मा ई? ⁴⁹ यीसुए जबाब दीतेया, कि मेरे अन्दर दुस्तात्मा नी ई; पर हांऊ आपणे पिता रा आदर करहा; होर तुस्से मेरा नरादर करहा ऐ। ⁵⁰ पर हांऊ आपणी बडाई नी चाहन्दा, हां, एक ता आ जो चाहां, होर न्याय करहा। ⁵¹ यहुदिये तिन्हा किन्हें बोल्या, कि एभे आस्से जाणी लया कि तेरे अन्दर दुस्तात्मा ई: अब्राहम मरी गया, होर नबी बी मरी गये होर तू बोल्हा कि अगर कोई मेरे वचना पर चल्हा ता तेस अनंतकाला तक मौता रा स्वाद नी चखणा। ⁵² यहुदिये तिन्हा किन्हें बोल्या, कि एभे आस्से जाणी लया कि तेरे अन्दर दुस्तात्मा ई: अब्राहम मरी गया, होर नबी बी मरी गये होर तू बोल्हा कि अगर कोई मेरे वचना पर चल्हा ता तेस अनंतकाला तक मौता रा स्वाद नी चखणा। ⁵³ आस्सा रा पिता अब्राहम ता मरी गया, क्या तू तेस्ते बडा आ? होर नबी भी मरी गये, तू आपणे आपा जो क्या मन्हां। ⁵⁴ यीसुए जबाब दितेया; अगर हांऊ आपणुए आपणी बडाई करूं, ता मेरी बडाई कुछ नी ई; पर मेरी बडाई करणे वाळा मेरा पिता आ, जेस जो बोल्हा ऐ, कि से आस्सा रा परमेसर आ। ⁵⁵ होर तुस्से तेस जो जाणी नी पाए: पर हांऊ तेस जो जाणहां; होर अगर हांऊ बोलूं कि मैं तेस जो नी जाणदा, ता मां तुस्सा साहीं झूठे बणना: पर हांऊ तेस जो जाणहां, होर तेसरे वचना पर चल्हा। ⁵⁶ तुस्सा रा पिता अब्राहम मेरा ध्याडा देखणे री उमीदा रे कठे बौहत खुस था; होर तिने देख्या, होर खुसी मनाई। ⁵⁷ यहुदिये तेस किन्हें बोल्या, हल्ली तक तू पन्ज्याह साला रा नी आ; फेरी भी तैं अब्राहम देखी लया। ⁵⁸ यीसुए तिन्हा किन्हें बोल्या; हांऊ तुस्सा किन्हें सच सच बोल्हा; एता गे पैहले कि अब्राहम जम्मेया, हांऊ आं। ⁵⁹ तेबे तिन्हे तेस जो मारणे रे कठे पात्थर चके, पर यीसू ल्हुखी किन्हें मंदरा ले निकळी गया।

9 ¹ फेरी जांदे हुए यीसुए एक माहणु देख्या जो जन्मजात काणा था। ² होर तेसरे चेले तेस्ते पुछदे लगे, हे रब्बी, कुन्ने पाप कितिरा था कि ये काणा जम्मा, इने माहणुए, या तेसरे माऊ बाबे? ³ यीसुए जबाब दितेया, कि ना ता इने पाप कितिरा था, ना एसरे माऊ बाबे: पर ये इधी कठे हुआ ताकि परमेसरा रे काम प्रगट हो। ⁴ जिने हांऊ भेज्या, आस्सा जो तेसरे काम ध्याडी ध्याडी करणा जरूरी ऐ; एहडी रात आऊणे वाळी ई जेबे कोई काम नी करी सकदा। ⁵ जेबे तक हांऊ संसारा

मंझ आ, तेबे तक संसारा रा उजाला आ। ⁶ ये बोली किन्हें तिने जमीना पर थुक्या होर तेस थूका ले माटे जो चिकणा बणाया, होर से माटा तेस काणे री हाखीया पर लगाई किन्हें। ⁷ तेस किन्हें बोल्या; जा सीलोहा रे तलाबा मंझ धोई ले, (जेसरा मतलब यानि भेजीरा) होर तिने जाई किन्हें हाखीया धोई, होर से देख्दा हुआ वाप्स आया। ⁸ तेबे पडोसी होर जिन्हें जे से पैहले भीख मांगदा देखीरा था, स्यों बोल्दे लगे; क्या ये सेह नी आ, जो बैठी किन्हें भीख मांगहां था? ⁹ बौहतिये बोल्या, ये सेही आ; होरीये बोल्या, नई नई पर तेस साहीं आं; तिने आपणुए बोल्या, हांऊ सेही आ। ¹⁰ तेबे स्यों तेस्ते पुछदे लगे, तेरी हाखीया किहां खुल्ही गयी? ¹¹ तिने जबाब दितेया, कि यीसू नांऊआं रे एक माहणुए चिकणा माटा लया, होर मेरी हाखीया पर लगाई किन्हें मेरे किन्हें बोल्या, कि जा होर सीलोहा रे तलाबा मंझ हाखीया धोई ले; मैं गया आपणी हाखीया धोई होर देख्दा लग्या। ¹² तिन्हे तेस्ते पुछेया; से केथी आ? तिने बोल्या; हांऊ नी जाणदा। ¹³ लोक तेस जो जो पैहले काणा था फरीसीया वाले लई गये। ¹⁴ जेस ध्याडे यीसुए चिकणा माटा लगाई किन्हें तेसरी हाखीया खोल्ही थी से सब्ता रा ध्याडा था। ¹⁵ दबारा फरीसीये तेस्ते पुछेया, तेरी हाखीया किहां खुल्ही गयी? तिने तिन्हा किन्हें बोल्या; तिने मेरी हाखीया पर माटा लगाया, फेरी मैं आपणी हाखीया धोई होर एबे हांऊ देख्हा। ¹⁶ एता पर कई फरीसी बोल्दे लगे ये माहणु परमेसरा री तरफा ले नी आ, क्यूंकि से सबता रा ध्याडा नी मनदा। होरीये बोल्या, पापी माहणु किहां एहडे चमत्कार दसी सकहा? होर तिन्हा मंझ फूट पई गयी। ¹⁷ तिन्हे तेस काणे किन्हें दबारा बोल्या, तिने जे तेरी हाखीया खोल्ही, तू तेसरे बारे मंझ क्या बोल्हा? तिने बोल्या, से एक नबी आ। ¹⁸ पर यहूदी लोका जो विस्वास नी हुआ कि ये काणा था होर एभे देख्हा जेबे तक तिन्हे तेसरे माऊ बाब सादे जेसरी जे हाखीया खुल्ही गईरी थी, ¹⁹ होर तिन्हे, तिन्हा ले पुछी नी लया, कि क्या ये तुस्सा रा म्हठा आ? जेस जो तुस्से बोल्हा ऐ कि काणा जम्मीरा था; फेरी एभे किहां देख्हा? ²⁰ तेसरे माऊ बाबे तिन्हा जो जबाब दितेया होर बोल्या; आस्से ता जाणहां ऐ कि ये आस्सा रा म्हठा आ, होर काणा जम्मीरा था। ²¹ पर आस्से ये नी जाणदे कि एबे ये किहां देख्दा लग्या, होर ये नी जाणदे कि कुने तेसरी हाखीया खोल्ही दीती; से जुआन आ, तेस्ते ई पूछा; तेस आपणे बारे मंझ आपु बोली देणा। ²² यूं गल्ला तेसरे माऊ बाबे इधी कठे बोली क्यूंकि स्यों यहूदीया ले डराहे थे; क्यूंकि यहूदी एका करी चुकीरे थे; कि अगर कोई बोले कि से मसीह आ, ता तेस जो मंदरा ले बाहर काडी देया। ²³ इधी कठे तेसरे माऊ बाबे बोल्या, से जुआन आ; तेस ले ऐ पूछा। ²⁴ तेबे तिन्हे तेस माहणु जो जो काणां था दूजी बारी सादेया होर तेस किन्हें बोल्या, परमेसरा री बडाई कर; आस्से

ता जाणहां ऐं कि से आदमी पापी आ । 25 तिने जबाब दितेया; होर बोल्या हांऊ नी जाणदा कि से पापी आ, या नी आ: हांऊ एक गल जाणहां कि हांऊ काणा था होर एभे देख्हा । 26 तिन्हे तेस किन्हें दबारा बोल्या, कि तिने तेरे साउगी क्या कितेया? होर किहां तेरी हाखीया खोल्ही? 27 तिने तेस किन्हें बोल्या, मैं ता तुस्सा किन्हें पैहले बोली दीतीरा, पर तुस्से नी सुणेया; एबे दूजी बारी किधियो सुणना चाहें? क्या तुस्से भी तेसरे चले बणना चाहें? 28 तेबे स्यों तेस जो बुरा भला बोल्दे लगे, तू ई तेसरा चेला आ, आस्से ता मूसा रे चले ऐ । 29 आस्से जाणहां ऐं कि परमेसरे मूसा किन्हें गल्ला कीती; पर एस आदमी जो नी जाणदे कि केथी रा आ । 30 तिने तिन्हा जो जबाब दितेया; ये ता हरानी री गल ई कि तुस्से नी जाणदे कि से केथी रा आ, तेबे बी तिने मेरी हाखीया खोल्ही दीती । 31 आस्से जाणहां ऐं कि परमेसर पापिया री नी सुणदा पर अगर कोई परमेसरा रा भक्त हो, होर तेसरी इच्छा पर चलदा हो, ता से तेसरी सुणा आ । 32 संसारा रे सुरूआता ले ये कधी सुणने मंझ नी आया, कि केसीए भी जम्मिरे काणे री हाखीया नी खोल्ही हो । 33 अगर ये आदमी परमेसरा री तरफा ले नी हुंदा, ता से कुछ भी नी करी सकदा था । 34 तिन्हे तेस जो जबाब दितेया होर बोल्या, कि तू ता बिलकुल पापा मंझ जम्मीरा, तू आस्सा जो क्या स्वाहां? होर तिन्हे से बाहर काढी दितेया । 35 यीसुए ये सुणेया, कि तिन्हे से बाहर काढी दितेया; होर जेबे तेस किन्हें मिलण हुआ ता तिने तेस जो बोल्या, क्या तू परमेसरा रे पुत्रा पर विस्वास करहा? 36 तिने जबाब दितेया, कि हे प्रभु; से कुण आ कि हांऊ तेस पर विस्वास करूं? 37 यीसुए तेस किन्हें बोल्या, तें से देखीरा; होर जो तुहद किन्हें गल्ला करेया करहा से ई आ । 38 होर तिने बोल्या, हे प्रभु, हांऊ विस्वास करहा: होर तेस जो परणाम कितेया 39 तेबे यीसुए बोल्या, हांऊ एस संसारा मंझ न्याय रे कठे आई रा, ताकि जो नी देख्दा से देखे, होर जो देख्हा ऐ स्यों काणे हुई जाये । 40 जो फरीसी तेस साउगी थे, तिन्हे ये गल्ला सुणी के तेस किन्हें बोल्या, क्या आस्से भी काणे ऐं? 41 यीसुए तिन्हा किन्हें बोल्या, अगर तुस्से काणे हुंदे ता पापी नी बणदे पर एभे बोल्हा ऐ, कि आस्से देख्हा ऐ, इधी कठे तुस्सा रा पाप बणी रेंहयां ।

10 1 हांऊ तुस्सा किन्हें सच सच बोल्हा, कि जो कोई दरवाजे ले हुई किन्हें भेडा रे बाड़े मंझ दाखल नी हुंदा पर होर दूजे रस्ते ले हुई किन्हें दाखल हुहां से चोर होर डाकू आ । 2 पर जो दरवाजे ले हुई किन्हें दाखल हुहां से भेडा रा पुहाल आ । 3 तेसरे कठे दरवान दरवाजा खोल्ही देहां, होर भेडा तेसरी अवाज सुणहां ई, होर से आपणी भेडा जो नांऊ लई किन्हें साद्हा होर बाहार लई जाहां । 4 होर जेबे से आपणी सभ भेडा जो बाहर काढी देहां, ता से तिन्हा रे अगे अगे चल्हा,

होर भेडा तेसरे पीचे पीचे चल्हा ई; क्यूंकि स्यों तेसरी अवाज पछयाणहां ई । 5 पर तिन्हा पराये रे पीछे नी जाणा, पर तेस ते दूर भगणा, क्यूंकि स्यों पराये री अवाज नी पछयाणंदी । 6 यीसुए तिन्हा किन्हें ये काहणी बोली, पर स्यों नी समझे कि यूं क्या गल्ला ई जो से आस्सा किन्हें बोल्हा । 7 तेबे यीसुए तिन्हा किन्हें दबारा बोल्या, हांऊ तुस्सा किन्हें सच सच बोल्हा, कि भेडा रे कठे दरवाजा हांऊ आं । 8 जितने मेरे ले पैहले आये; स्यों सब चोर होर डाकू ऐ पर भेडे तिन्हारी नी सुणी । 9 दरवाजा हांऊ आं: अगर कोई मेरे ज्रीए भीतर जाये ता तेस मुक्ति पाणी होर तेस भीतर बाहर आउणा जाणा करेया करणा होर चारा पाणा । 10 चोर केसी होर कामा रे कठे नी आउंदा पर सिर्फ चोरी करदे, मारणे रे कठे होर नास करणे रे कठे आहूंआं । हांऊ एता कठे आया कि स्यों जीन्दगी पाए होर भरपूर पाए । 11 हांऊ बधिया पुहाल आ; बधिया पुहाल भेडा रे कठे आपणी जान देहां । 12 मजदूर जो न ता पुहाल आ, होर न ता भेडा रा मालक, से भेड़िये जो आउंदे देखी किन्हें, भेडा जो छाडी किन्हें भगी जाहां, होर भेड़िया तिन्हा जो पकडा आ होर ओरे परे भगाई देहां । 13 से इधी कठे भगी जाहां क्यूंकि से मजदूर आ, होर तेस जो भेडा री फिकर नी ई । 14 बधिया पुहाल हांऊ आं; जिहां पिता मुंजो जाणहां, होर हांऊ पिता जो जाणहां । 15 ईहां ई हांऊ आपणी भेडा जो जाणहां, होर मेरी भेडा मुंजो जाणहां ई, होर मैं आपणी भेडा रे कठे आपणी जान देहां । 16 होर मेरी होर भी भेडा ई, जो एस भेड बाड़े री नी ई; मेरा तिन्हे जो भी ल्याऊणा जरूरी आ, तिन्हा मेरी अवाज सुणनी; तेबे एक ई दल होर एक ई पुहाल हूणां । 17 पिता इधी कठे मेरे किन्हें प्यार करहा, क्यूंकि हांऊ आपणी जान देहां, ताकि हांऊ तेता जो दबारा वाप्स लई लूं । 18 कोई तेता जो मेरे ले नी लैंदा, पर हांऊ आप्हुए तेता जो देहां: तेता जो देणे रा हक मेरे वाले आ, होर तेता जो दबारा वाप्स लेणे रा भी हक आ, ये हुकम मेरे पिता ले मुंजो मिलिरा । 19 इन्हा गल्ला री वजहा ले यहूदिया मंझ दबारा फूट पई । 20 होर तिन्हा मंझा ले बौहत बोल्दे लगे, कि तेस अन्दर दुस्तात्मा ई, होर से पागल आ; तेसरी तुस्से कि सुणहां ऐं? 21 होरीये बोल्या, ये गल एहडे माहणु री नी ई जेस अन्दर दुस्तात्मा हो: क्या दुस्तात्मा केसी री हाखीया खोल्ही सकहा ई? 22 यरूस्लेमा मंझ स्थापना रा साजा हुआ होर ठंडा रा मौसम था । 23 होर यीसू मंदरा मंझ सुलेमाना री डेहळी मंझ घुमेया करहा था । 24 तेबे यहूदिये से घेरी लया होर पुछेया, तूध आस्सा रे मना जो कधी तकर सका अन्दर रखणा? अगर तू मसीह आ, ता आस्सा किन्हें साफ साफ दसी दे । 25 यीसुए तिन्हा जो जबाब दितेया, कि मैं तुस्सा किन्हें दसी दीतीरा, होर तुस्से विस्वास नी करदे, जो काम हांऊ आपणे पिता रे नांऊआं ले करहा स्यों ई मेरे गवाह ऐ । 26 तुस्से इधी कठे विस्वास नी

करदे, क्यूंकि तुस्से मेरी भेडा मंझा ले नी ये।²⁷ मेरी भेडा मेरी अवाज सुणहां ई, होर हांऊ तिन्हा जो जाणहां, होर स्यों मेरे पीचे पीचे चल्हा ई।²⁸ होर हांऊ तिन्हा जो अनंत जीन्दगी देहां, होर तिन्हा कधी नास नी हूणां, होर कोई तिन्हा जो मेरे हाथा ले नी छुडाई सकदा।²⁹ मेरा पिता, जिने जे स्यों मुंजो दीतीरे, सभी ले बडा आ, होर कोई तिन्हा जो मेरे पिता रे हाथा ले नी छुडाई सकदा।³⁰ मैं होर मेरा पिता एक ऐ।³¹ यहूदिये तेस पर पथराव करणे रे कठे पात्थर चके।³² एता पर यीसुए तिन्हा जो जबाब दितेया, मैं तुस्सा जो आपणे पिता री तरफा ले बौहत भले काम दसे, तिन्हा कामा मंझा ले केस कामा रे कठे तुस्से मेरे पर पथराव करहा ऐ? ³³ यहूदिये तेस जो जबाब दितेया, कि आस्से भले कामा रे कठे तुजो पथराव नी करदे, पर तू परमेसरा री बेजती करहा होर माहणु हुई किन्हें आपणे आपा जो परमेसर बणाहां।³⁴ यीसुए तिन्हा जो जबाब दितेया, क्या तुस्सा री व्यवस्था मंझ नी लिखीरा कि मैं बोल्या तुस्से ईस्वर ऐ।³⁵ अगर तिने तिन्हा जो ईस्वर बोल्या जिन्हा वाले परमेसरा री वाणी पूजी (होर पवित्र सास्त्रा री गल लोप नी हुई सकदी) ³⁶ जेस जो पिते पवित्र ठहराई किन्हें संसारा मंझ भेज्या तुस्से तेस किन्हें बोल्ला ऐ कि तू बेजती करहा, इधी कठे कि मैं बोल्या कि हांऊ परमेसरा रा पुत्र आ।³⁷ अगर मैं आपणे पिता रे काम नी किते, ता मेरा विस्वास भी देख्या करदे।³⁸ पर अगर हांऊ तिन्हा कामा जो करहा, ता चाहे तुस्से मेरा विस्वास नी करा, पर तिन्हा कामा रा ता विस्वास करा, ताकि तुस्से जाणी होर समझी सको कि पिता मेरे अन्दर, होर हांऊ पिता मंझ आ।³⁹ तेबे तिन्हे दबारा तेस जो पकड़ने री कोसिस कीती पर से तिन्हारे हाथा ले निकळी गया।⁴⁰ फेरी से यरदना ले पार तेस जगहा चली गया, जेथी यहूना पैहले बपतिस्मा देहां था, होर से तेथी रहया।⁴¹ होर बौहत लोक तेस वाले आई किन्हें बोल्ला ऐ थे, कि यहूने ता कोई चमत्कार नी दसेया, पर जो कुछ यहूने एस आदमी रे बारे मंझ बोलीरा था से सच था।⁴² होर तेथी बौहतिये तेस पर विस्वास कितेया।

11 ¹ मरीयम होर तेस्सा री बैहण मारथा रे नगरा बैतीयाहा मंझ लाज़र नांऊआं रा एक बमार माहणु था।² ये से ई मरीयम थी जेस्से प्रभु रे पैरा पर इत्र दली किन्हें आपणे बाळा किन्हें पुहन्जेया था, एस्सा रा भाई लाज़र बमार था।³ तेसरी बैहणीऐं यीसू जो बुलावा भेज्या, कि हे प्रभु, देख जेस जो तू प्यार करहा, से बमार आ।⁴ ये सुणी किन्हें यीसुए बोल्या, ये बमारी मौता रे कठे नी ई पर परमेसरा री बडाई कठे ई, कि तेसरे जरिए परमेसरा रे पुत्रा री बडाई हो।⁵ यीसू मारथा होर तेस्सा री बैहण होर लाज़रा किन्हें प्यार करहा था।⁶ होर जेबे तिने सुणेया, कि से बमार आ, ता तेस जगहा पर से था, से तेथी दो ध्याडे होर रुकी गया।⁷ फेरी तेता ले बाद

तिने चलेया किन्हें बोल्या, कि आउआ, आस्से दबारा यहूदिया जो वाप्स चल्हा ऐ।⁸ चले तेस जो बोल्दे लगे, हे रब्बी, एभे ता यहूदी तुजो पथराव करणा चाहें, होर क्या तू दबारा तेथी जाणा चाहं? ⁹ यीसूऐ जबाब दितेया, क्या धीयाडी रे बारा घंटे नी हुंदे? अगर कोई ध्याडी ध्याडी चले ता से ठोकर नी खांदा, क्यूंकि से एस संसारा रा उजाला देख्हा।¹⁰ पर अगर कोई राती जो चले, ता से ठोकर खाहां, क्यूंकि तेस अन्दर प्रयासा नी आ।¹¹ तिने ये गल्ला बोली होर एता ले बाद से तिन्हा किन्हें बोल्दा लग्या, कि आस्सा रा दोस्त लाजर सई गईरा, पर हांऊ तेस जो जगांदे चलीरा।¹² तेबे चले तेस जो बोल्या, हे प्रभु, अगर से सूतिरा ता तेस बची जाणा।¹³ यीसुए ता तेसरी मौता रे बारे मंझ बोल्या था: पर स्यों समझे कि तिने निन्द्रा मंझ सई जाणे रे बारे मंझ बोल्या।¹⁴ तेबे यीसुए तिन्हा किन्हें साफ बोली दितेया, कि लाजर मरी गया।¹⁵ होर हांऊ तुस्सा री वजहा ले खुस आ कि हांऊ तेथी नी था ताकि तुस्से विस्वास करी सको, पर एबे आई जावा, आस्से तेस वाले चलहा ऐ।¹⁶ तेबे थोमे, तेस जो जे दिदुमुस भी बोल्ला ऐ, आपणे साथी चले किन्हें बोल्या, आउआ आस्से भी तेस साउगी मरदे चल्हा ऐ।¹⁷ होर जेबे यीसू जो तेथी आई किन्हें ये पता लग्या कि तेस जो कबरा मंझ रखीरे चार ध्याडे हुई चुकीरे थे।¹⁸ बैतीयाह यरुस्लेमा ले लगभग दो मीला री दूरी पर था।¹⁹ होर बौहत यहूदी मारथा होर मरीयमा वाले तिन्हा रे भाई रे बारे मंझ सांति देणे रे कठे आईरे थे।²⁰ मारथा यीसू रे आऊणे री खबर सुणी किन्हें तेस किन्हें मिलदे चली गयी, पर मरीयम घरा बैठी रहै।²¹ मारथे यीसू किन्हें बोल्या, हे प्रभु, अगर तू एथी हुंदा, ता मेरा भाई कधी नी मरदा।²² होर एभे भी हांऊ जाणहां ई, कि जो कुछ तू परमेसरा ले मान्घ्या, परमेसरा तुजो देणा।²³ यीसुए तेस्सा किन्हें बोल्या, तेरे भाईआ जीउंदे हुई जाणा।²⁴ मारथे तेस किन्हें बोल्या, हांऊ जाणहां ई, कि आखरी ध्याडे पुनरूथाना रे टैमा तेस जीउंदे हुई जाणा।²⁵ यीसुए तेस्सा किन्हें बोल्या, पुनरूथान होर जीन्दगी हांऊ आं, जो कोई मेरे पर विस्वास करहा से अगर मरी भी जान्घ्या, तेबे बी तेस जीणा।²⁶ होर जो कोई जीउंदा आ, होर मेरे पर विस्वास करहा, तेस अनंतकाला तक नी मरणा, क्या तू ऐसा गल्ला पर विस्वास करहा ई? ²⁷ तेस्से तेस किन्हें बोल्या, हां, हे प्रभु, हांऊ विस्वास करी चुकीरी, कि परमेसरा रा पुत्र मसीह जो आणे बाळा था, से तू ई आ।²⁸ होर ये बोली किन्हें से चली गई, होर तेस्से आपणी बैहण मरीयमा जो चुपके जे सादी किन्हें बोल्या, गुरू एथी आ होर से तुजो सादेया करहा।²⁹ होर से ये सुणदे ई एकदम उठी किन्हें तेस वाले चली गई।³⁰ (यीसू हल्ली ग्रांऊआं मंझ नी पुजीरा था, पर तेस ई जगहा था जेथी जे मारथा तेस किन्हें मिली थी।)³¹ तेबे जो यहूदी तेस्सा रे घरा आईरे थे, तेस्सा जो सांति देया करहा ऐ थे, ये देखी किन्हें कि

मरीयम झटपट उठी किन्हें बाहर चली गई होर तिन्हे ये समझी किन्हें कि से कबरा पर रोणे रे कठे चली गई, तेस्सा रे पीछे चली गये।³² जेबे मरीयम तेथी पूजी जेथी यीसू था, ता तेस जो देखदे ही से तेसरे पैरा पई गी होर तेस किन्हें बोल्या, हे प्रभु, अगर तू एथी हुंदा ता मेरा भाई नी मरदा।³³ जेबे यीसुए तेस्सा जो होर तिन्हा यहूदिया जो जेहडे तेस्सा साउगी आईरे थे रोंदे देखे; से आत्मा मंझ बौहत दुआस हुआ, होर व्याकुल था।³⁴ होर बोल्या, तुस्से से केथी रखीरा? तिन्हे तेस किन्हें बोल्या, हे प्रभु, आउआ चली किन्हें देखी लउवा।³⁵ यीसू रोया।³⁶ तेबे यहूदी बोल्दे लगे, देखा, से तेस किन्हें केहड़ा प्यार करहा था।³⁷ पर तिन्हा मंझा ले कितने बोल्ला ऐ थे, क्या जिने जे काणे री हाखीया खोल्ही, तेस ले ये बी नी हुई सक्या कि तेस माहणु जो मरणे ना देंदा? ³⁸ यीसू मना मंझ बौहत ज्यादा उदास हुई किन्हें दबारा कबरा पर आया, से कब्र एक गुफा थी, होर एक पात्थर तेता पर रखीरा था।³⁹ यीसुए बोल्या, पात्थरा जो टहाई देया: तेस मुर्दे लाजरा री बैहण मारथा तेस किन्हें बोल्दे लगी, हे प्रभु, एबे ता ल्हासा ले बास आया करदी हुंगी; क्यूंकि तेस जो ता मरीरे चार ध्याडे हुई चुकिरे।⁴⁰ यीसुए तेस्सा किन्हें बोल्या, क्या मैं तेरे किन्हें नी बोल्या था कि अगर तू विस्वास करधी, ता तुध परमेसरा री बड़ाई देखणी।⁴¹ तेबे तिन्हे से पात्थर टहाया, फेरी यीसुए आपणी हाखीया चकी किन्हें बोल्या, हे पिता, हांऊ तेरा धन्यावाद करहा, कि तैं मेरी सुणी लई।⁴² होर हांऊ जाणहां था, कि तू हमेसा मेरी सुणहां, पर जो भीड़ ओरे परे खड़ी री ई, तिन्हा री वजहा ले मैं ये बोल्या, ताकि स्यों विस्वास करी सके, कि तैं हांऊ भेजीरा।⁴³ ये बोली किन्हें से जोरा किन्हे चिल्लाया, कि हे लाज़र बाहर निकळ ⁴⁴ जो मरी गईरा था, से कफना ले हाथ पैर बान्हीरा बाहर निकळी आया होर तेसरा मुंह गोछे किन्हें लपेटिरा था, यीसुए तिन्हा किन्हें बोल्या, एस जो खोल्ही देया होर जाणे देया।⁴⁵ तेबे जो यहूदी मरीयमा वाले आईरे थे, होर तेसरा ये काम देख्या, तिन्हा मंझा ले बौहतिये तेस पर विस्वास कितेया।⁴⁶ पर तिन्हा मंझा ले कितने एहडे थे जिन्हें फरीसीया वाले जाई किन्हें यीसू रे कामा री खबर दीती।⁴⁷ एता पर महायाजके होर फरीसीये खास सभा सादी होर बोल्या, आस्से क्या करिये? ये माहणु ता बौहत चमत्कार दस्हा।⁴⁸ अगर आस्से तेस जो ईहां छाडी देहंगे, ता सभिया तेस पर विस्वास करी लैणा होर रोमीया आई किन्हें आस्सा री जगहा होर जाति दुहीयां पर कब्ज़ा जमाई लैणा ⁴⁹ तेबे तिन्हा मंझा ले काईफा नांऊआं रे एक आदमीऐ जो तेस साला रा महायाजक था, तिने तिन्हा किन्हें बोल्या, तुस्से कुछ नी जाणदे।⁵⁰ होर ना ये सोच्हा ऐ, कि तुस्सा रे कठे ये खरा आ, कि आस्सा रे लोका रे कठे एक माहणु मरे, होर ये नी कि सारी जातिया नास हुई जाये।⁵¹ ये गल तिने आपणी तरफा ले नी बोली, पर तेस साला

रे महायाजके ये भविष्यवाणी कीती कि यीसूआ तेस्सा जाति रे कठे मरणा।⁵² होर ना सिर्फ तेस्सा जाति रे कठे, पर इधी कठे भी कि से परमेसरा रे बाहर भटकी रे बच्चेया जो कठा करी सके।⁵³ एता कठे स्यों तेस ध्याडे ले ई तेस जो मारणे रे कठे सलाह करदे लगे।⁵⁴ इधी कठे यीसू तेस टैमा ले यहूदिया मंझ अजाद नी घुमदा था, पर से तेथी ले जंगला रे नेडे बस्सीरे ईफ्राइम नांऊआं रे एक नगरा जो चली गये; होर आपणे चेले साउगी से तेथी रैहंदा लग्या।⁵⁵ होर यहूदिया रा फसहा रा साजा नेडे था, होर बौहत लोक फसहा ले पैहले देहाता ले यरूस्लेमा जो चली गये कि आपणे आपा जो पवित्र करी सको।⁵⁶ तेबे स्यों यीसू जो टोळणे होर मंदरा मंझ खडी किन्हें आपु मंझ बोल्दे लगे, तुस्से क्या समझा ऐ? ⁵⁷ क्या तेस त्योहारा मंझ नी आऊणा? होर महायाजके होर फरीसीये भी हुकम देई दीतिरा था, कि अगर कोई ये जाणदा हो कि यीसू केथी आ ता जरूर दसे, ताकि स्यों तेस जो पकड़ी सके।

12 ¹फेरी यीसू फसहा ले छेह ध्याडे पैहले बैतनियाहा मंझ आया, जेथी लाज़र था: जेस जो यीसुए मरीरे मंझा ले जीउंदा कितेया था। ²तेथी तिन्हे तेसरे कठे खाणा त्यार कितेया, होर मारथा सेउवा करेया करहा ई थी, होर लाज़र तिन्हा मंझा ले एक था, जो तेस साउगी खाणा खांदे बैठीरा था। ³तेबे मरीयमे जटामासी रा आधा सेर कीमती इत्र लई किन्हें यीसुरे पैरा पर दलेया, होर आपणे बाळा किन्हें तेसरे पैर पुह्त्जे, होर इत्रा री बासा किन्हें सारा घर भहरी गया। ⁴पर तेसरे चेले मंझा ले यहूदा ईस्करयोति नांऊआं रा एक चेला था, जो तेसजो पकड़वाणे वाळा था, से बोल्दा लग्या। ⁵ये इतर तीन सौ दीनारा मंझ बेची किन्हें गरीबा जो कि नी दितेया? ⁶तिने ये गल इधी कठे नी बोली, कि तेस जो गरीबा री फिकर थी, पर इधी कठे कि से चोर था होर तेस वाले एक थैली थी, होर तेस थैली मंझ जो कुछ भी पाहें थे, से काढी लैहां था। ⁷यीसुए बोल्या, रैहणे देया, ऐस्सा जो नी रोका, ऐस्से मेरे गाडे जाणे री त्यारी रे कठे, ये इत्र बचाई किन्हें रखीरा था। ⁸क्यूंकि गरीब ता तुस्सा साउगी हमेसा रैहें, पर मां तुस्सा साउगी हमेसा नी रैहणा। ⁹यहूदिया मंझा ले आम आदमी जाणी गये, कि से तेथी आ, होर स्यों ना सिर्फ यीसू री वजहा ले आये पर एता कठे भी आये कि लाजरा जो देखी लईये, जेस जो यीसुए मरीरे मंझा ले जीउंदा करी दितीरा था। ¹⁰तेबे माहयाजके लाजरा जो भी मारणे रे कठे सलाह बणाई। ¹¹क्यूंकि तेसरी वजहा ले बौहत यहूदी चली गये, होर यीसू पर विस्वास कितेया। ¹²दूजे ध्याडे बौहत लोके जो साजे मंझ आईरे थे, ये सुणी किन्हें कि यीसू यरूस्लेमा मंझ आया करहा था। ¹³तिन्हे खजरा री डाळीया लई, होर तेस किन्हें मिलणे रे कठे निकळी गये, होर चलान्दे लगे, होसन्ना, धन्य आ ईसरायला रा

राजा, जो प्रभु रे नांऊआं ले आहूँआं । 14 जेबे यीसू जो गधे रा बच्चा मिल्या, ता से तेस पर बैठी गया । 15 जेहड़ा लिखीरा भी आ, कि हे सियोना री बेटी, मत डर, देख, तेरा राजा गधे रे बच्चे पर चढ़ी किन्हें आउंदा लगीरा । 16 तेसरे चेले, ये गल्ला पैहले नी समझीरे थे; पर जेबे यीसू री महीमा प्रगट हुई, ता तिन्हा जो याद आया, कि ये गल्ला तेसरे बारे मंझ लिखीरी थी; होर लोके तेस किन्हें एहड़ा व्यवहार कितेया । 17 तेबे भीड़ा रे लोके जो तेस टैम तेस साउगी थे ये गवाही दीती कि तिने लाजरा जो कबरा मंझा ले सादी किन्हें, मरीरे मंझा ले जीउंदा कितेया था । 18 एता कठे लोक तेस किन्हें मिलदे आये, क्यूंकि तिन्हे सुणीरा था, कि तिने ये चमत्कार दस्या । 19 तेबे फरीसीये आपु मंझ बोल्या, सोचा ता सही कि तुस्सा ले कुछ नी बणी सकदा: देखा, संसार तेसरे पीछे हुई चलीरा । 20 जो लोक तेस साजे मंझ भजन करदे आईरे थे तिन्हा मंझा ले कई यूनानी थे । 21 तिन्हे गलीला रे बैतसैदा रे रैहणे वाळे फिलिप्पुसा वाले आई किन्हें तेसले अरज कीती, कि जनाब आस्से यीसू किन्हें मिलणा चाहें । 22 फिलिप्पुसे अन्द्रीयासा वाले आई किन्हें एता रे बारे बोल्या; तेबे अन्द्रीयासे होर फिलिप्पुसे इन्हा गल्ला रे बारे यीसू किन्हें बोल्या । 23 एता पर यीसुए तिन्हा किन्हें बोल्या, से टैम आई गईरा, कि माहणु रे पुत्रा री जै जै कार हो । 24 हांऊ तुस्सा किन्हें सच सच बोल्हा, कि जेबे तक कणका रा दाणा ज्मीना मंझ पई किन्हें मरी नी जांदा, से कल्हा रही जाहां पर जेबे से मरी जाहां, से बौहत फल्हा फुल्हा । 25 जो आपणे प्राणा जो प्यारा जाणहां, से तेस गुआई देणा; होर जो एस संसारा मंझ आपणे प्राणा जो नी चाहन्दा, से तेस अनंत जीन्दगीया तक बचाई के रखणा । 26 अगर कोई मेरी सेउआ करघा, ता तेस मेरे पीछे आऊणा; होर जेथी हांऊ आ तेथी मेरा दास भी हूणां; अगर कोई मेरी सेउआ करघा, ता पिता तेसरी ईज्जत करणी । 27 एबे मेरा मन घबराई गईरा होर हांऊ क्या बोलू? हे पिता, मुंजो दुःखा री एस्सा घडीया ले बचाई ले? पर एस्सा दुःखा री घडीया रे कठे ता ई हांऊ आईरा । 28 हे पिता आपणे नांऊआं री बड़ाई कर: तेबे ये अकासबाणी हुई, कि मैं तेसरी महीमा कीती, होर दबारा बी करणी । 29 तेबे जो लोक खड़े हुई किन्हें सुणेया करहा ऐ थे, तिन्हे बोल्या; कि बादल गरजेया, होरीये बोल्या, स्वर्गदूते तेस किन्हें गल कीती । 30 एता पर यीसुए तिन्हा जो जबाब दितेया, ये अकास बाणी मेरे कठे नी ई पर तुस्सा रे कठे ई । 31 एबे एस संसारा रा न्याय हुहां, एबे एस संसारा रा मुखिया काढी देणा । 32 पर अगर हांऊ धरतीया ले उचे पर चढ़ाया जाहंगा, ता मैं सभ आपणे वाले खींजी किन्हें लई आऊणे । 33 एहड़ा बोली किन्हें तिने ये दसी दितेया, कि तेस केहड़ी मौत मरणा? 34 एता पर लोके तेस किन्हें बोल्या, कि आस्से व्यवस्था री ये गल सुणीरी, कि मसीहा हमेसा रैहणा, फेरी तू किधीयो बोल्हा,

कि माहणु रे पुत्रा जो उचे पर चढ़ाणा जरूरी आ, ये माहणु रा पुत्र कुणहां? 35 यीसुए तिन्हा किन्हें बोल्या, उजाला थोहड़ी देरा तक तुस्सा रे बीचा मन्झ आ, जेबे तक जोत तुस्सा साउगी ई तेबे तक चलदे रहा; एहड़ा नी हो कि न्याहरा तुस्सा जो घेरी ले; जो न्याहरे मंझ चल्हा से नी जाणदा कि केथीओ जाहां । 36 जेबे तक उजाला तुस्सा साउगी आ, प्रयासे पर विस्वास करा ताकि तुस्से प्रयासे री संतान हो । ये गल्ला बोली किन्हें यीसू चली गया होर तिन्हा ले ल्हुखी गया । 37 होर तिने, तिन्हारे साम्हणे इतने चमत्कार दसे, तेबे बी तिन्हे तेस पर विस्वास नी कितेया । 38 ताकि यसायाह नबी रा बचन पूरा हुई जाए तिने बोल्या कि हे प्रभु आस्सा रे समाचारा रा विस्वास कुने कितेया? होर प्रभु रा भुजबल केस पर जाहीर हुआ? 39 एता कठे स्यों विस्वास नी करी सके, क्यूंकि यसायाहे दबारा बोल्या । 40 तिने तिन्हारी हाखीया काणी, होर तिन्हारा मन काठा करी दितेया; केते एहड़ा नी हो, कि स्यों हाखीया ले देखे, होर मना ले समझे, होर फिरी जाये, होर हांऊ तिन्हा जो चंगा करूं । 41 यसायाहे ये गल्ला इधी कठे बोली, क्यूंकि तिने तेसरी महीमा देखी; होर तिने तेसरे बारे मंझ गल्ला कीती । 42 तबे बी कई खास सासका मंझा ले बौहतिये तेस पर विस्वास कितेया, पर फरीसिया री वजहा ले खुल्ही किन्हे तेस जो नी मनदे थे, एहड़ा नी हो कि मंदरा ले काढी दे । 43 क्यूंकि माहणु री बड़ाई तिन्हा जो परमेसरा री बड़ाई ले ज्यादा बांकी लगी । 44 यीसुए जोरा किन्हें बोल्या, जो मेरे पर विस्वास करहा, से मेरे पर नी, बल्कि मेरे भेजणे वाळे पर विस्वास करहा ऐ । 45 होर जो मुंजो देख्हा, से मेरे भेजणे वाळे जो देख्हा । 46 हांऊ संसारा मंझ उजाला बणी किन्हें आईरा ताकि जो कोई मेरे पर विस्वास करहा, से न्याहरे मंझ नी रही सको । 47 अगर कोई मेरी गल्ला सुणी किन्हें मन्नी ले, ता मां से दोषी नी मनणा, क्यूंकि हांऊ संसारा जो दोषी बनाणे रे कठे नी, पर संसारा रा उद्धार करणे रे कठे आईरा । 48 जो मुंजो तुच्छ जाणहां होर मेरी गल्ला स्वीकार नी करदा, तेस जो दोषी ठेहराणे वाळा ता एक आ: यानि जो वचन मैं बोलीरा, तेस आखरी ध्याड़े तेस रा फैसला करणा । 49 क्यूंकि मैं आपणी तरफा ले गल्ला नी किती, पर पिता जिने हांऊ भेजीरा तिने ई मुंजो हुकम दितेया, कि क्या बोलू? होर क्या बोळणा चाहिये? 50 होर हांऊ जाणहां, कि तेसरा हुकम अनंत जीन्दगी ई इधी कठे हांऊ जो बोल्हा, से जेहड़ा पिते मेरे किन्हें बोल्या हांऊ तेहड़ा ई हांऊ बोल्हा ।

13 1 फसहा रे साजे ले पैहले जेबे यीसुए जाणी लया, कि तेसरी घडी आई गईरी होर तेस संसारा जो छाडी किन्हें पिता वाले चली जाणा, ता तिने आपणे लोका किन्हें जो संसारा मंझ थे, होर जिन्हा किन्हें जेहड़ा प्यार से रख्हा था, से आखरी तक तेहड़ा ई प्यार तिन्हा साउगी रख्हा रैहया । 2 रात

के खाने रे टैमा, जेबे सैतान समौना रे म्हठे यहूदा ईस्करयोति रे मना मंझ ये पाई चुकीरा था, कि से तेस जो पकड़ाये, ³ यीसुए ये जाणी किन्हें कि पिते सब कुछ तेसरे हाथा मंझ करी दितिरा होर से परमेसरा ले आईरा, होर परमेसरा वाले वाप्स जाया करहा। ⁴ से खाणा खांदे खांदे उठी गया होर आपणे कपड़े तुआरी किन्हें तोलिया आपणी कमरा मंझ बाहन्या। ⁵ तेबे तसले मंझ पाणी भरी किन्हें चले रे पैर धोणे सुहुरू कीते होर जेस तोलिये किन्हें तिने आपणी कमर बान्हीरा थी तेस तोलिये किन्हें से तिन्हारे पैर पुह्जदा लग्या। ⁶ जेबे से समौन पतरसा वाले आया; तेबे तिने तेस किन्हें बोल्या, हे प्रभु, क्या तू मेरे पैर धोहां? ⁷ यीसुए तेस जो जबाब दितेया, जो हांऊ करहा, तू एभे नी जाणदा, पर तुध एता ले बाद समझणा। ⁸ पतरसे तेस किन्हें बोल्या, तू मेरे पैरा जो कधी देख्या धोंदा: ये सुणी किन्हें यीसुए तेस किन्हें बोल्या, जे हांऊ तुजो नी धोन्हा, ता मेरे साउगी तेरा कुछ भी हिस्सा नी आ। ⁹ समौन पतरसे तेस किन्हें बोल्या, हे प्रभु तेबे ता तू मेरे पैर ई नी, बल्कि हाथ होर मूंड भी धोई दे। ¹⁰ यीसुए तेस किन्हें बोल्या, जो नहाई बैठीरा, तेस जो पैर धोणे रे अलावा होर कुछ धोणे जरूरत नी ई; पर से बिलकुल साफ़ आ, होर तुस्से शुद्ध ऐ, पर सभ के सभ नी। ¹¹ क्यूंकि से आपणे पकड़वाणे वाळे जो जाणहां था, एता कठे तिने बोल्या, तुस्से सभ के सभ शुद्ध नी ऐ। ¹² जेबे से तिन्हारे पैर धोई बैठया होर आपणे कपड़े पैहनी किन्हें दबारा बैठी गया, ता से तिन्हा किन्हें बोल्दा लग्या, क्या तुस्से समझी गये कि मैं तुस्सा साउगी क्या कितेया? ¹³ तुस्से मुंजो गुरू, होर प्रभु, बोल्हा ऐ, होर ठीक ई बोल्हा ऐ, क्यूंकि हांऊ से ई आ। ¹⁴ अगर मैं प्रभु होर गुरू हुई किन्हें तुस्सा रे पैर धोये; ता तुस्सा जो भी एक दूजे रे पैर धोणे चहिये। ¹⁵ क्यूंकि मैं तुस्सा जो एक नमूना दसी दितेया, जो मैं तुस्सा साउगी कितेया, तुस्से भी ऐहडा ई करदे रह्या। ¹⁶ हांऊ तुस्सा किन्हें सच सच बोल्हा, दास आपणे स्वामी ले बडा नी हुंदा; होर ना भेजीरा आपणे भेजणे वाळे ले। ¹⁷ अगर तुस्से इन्हा गल्ला जो जाणहां ऐं, होर अगर तिन्हा पर चलघे ता तुस्सा धन्य हुणां। ¹⁸ हांऊ तुस्सा सभी रे बारे मंझ नी बोल्दा: स्यों जे मैं चुणी लईरे, तिन्हा जो हांऊ जाणहां: पर ये इधी कठे आ, कि पवित्र सास्त्रा री वाणी पूरी हो, कि जो मेरी रोटी खाहाँ, तिने मेरे पर लात उठाई। ¹⁹ एबे हांऊ ये हुणे ले पैहले तुस्सा जो दसी देंऊ, होर जेबे ये हुई जाये ता तुस्से विस्वास करी लया कि हांऊ से ई आ। ²⁰ हांऊ तुस्सा किन्हें सच सच बोल्हा, कि जो कोई मेरे भेजीरे जो स्वीकार करहा, से मुंजो स्वीकार करहा, होर जो मुंजो स्वीकार करहा, से मेरे भेजणे वाळे जो स्वीकार करहा। ²¹ ये गल्ला बोली किन्हें यीसू आत्मा मंझ दुखी हुआ होर तिने ये गवाही दिती, कि हांऊ तुस्सा किन्हें सच सच बोल्हा, कि तुस्सा मंझा ले ऐकिया हांऊ पकड़वाणा। ²² चले एक दूजे पर

सक करदे हुए देखदे लगे, कि से केसरे बारे मंझ बोल्या करहा। ²³ तेसरे चले मंझा ले एक जेस किन्हें जे यीसू प्यार करहा था, से यीसू री छाती री तरफ झुकी किन्हें बैठी रा था। ²⁴ तेबे समौन पतरसे तेसरी तरफ इसारा करी किन्हें पुछेया, कि दस से केसरे बारे मंझ बोल्हा? ²⁵ तेबे तिने तिहां ई यीसू री छाती री तरफ झुकी किन्हें पुछेया, हे प्रभु, से कुणहां? ²⁶ यीसुए जबाब दितेया, जेस जो हांऊ ये रोटी रा टुकड़ा डूबाई किन्हें देहन्गा, तेस ई हूणां, होर तिने रोटी रा टुकड़ा डूबाई किन्हें समौना रे पुत्र यहूदा ईस्करयोति जो दितेया। ²⁷ होर रोटी रा टुकड़ा लैंदे ही सैतान तेस अन्दर समाई गया: तेबे यीसुए तेस किन्हें बोल्या, जो तू करणे वाळा आ, झट पट कर। ²⁸ पर बैठणे वाळे मंझा ले कोई नी समझी पाया कि तिने ये गल तेस किन्हें किधियो बोली? ²⁹ क्यूंकि यहूदा ईस्करयोति वाले थैली थी, इधी कठे केसीए सोच्या कि यीसू तेस किन्हें बोल्या करहा कि त्योहारा रे कठे जो कुछ चाहिए से खरीदी ले, या गरीबा जो कुछ देई दे। ³⁰ तेबे से रोटी रा टुकड़ा लई किन्हें बाहर चली गया, होर रात का टैम था। ³¹ जेबे से बाहर चली गया ता यीसुए बोल्या; एबे माहणु रे पुत्रा री बड़ाई हुई, होर परमेसरा री बड़ाई तेस मंझ हुई। ³² अगर परमेसरा री बड़ाई तेस मंझ हुई, परमेसरा भी आपणे मंझ तेसरी बड़ाई करणी, होर एकदम करणी। ³³ हे बच्चेयो, हांऊ होर थोहड़ी देरा तक तुस्सा वाले आ, फेरी तुस्सा हांऊ टोळना, होर जो मैं यहूदिया किन्हें बोलीरा, कि जेथी हांऊ जाहां तेथी तुस्से नी आई सकदे, तेहडा ही हांऊ एबे तुस्सा किन्हें भी बोल्हा। ³⁴ हांऊ तुस्सा जो एक नंऊआं हुकम देहां एक दूजे किन्हें प्यार रखा: जो मैं तुस्सा किन्हें रखीरा, तेहडा ई तुस्से भी एक दूजे साउगी प्यार रखा। ³⁵ अगर आपु मंझ प्यार रखगे ता एता ले ई सभिया जाणी जाणा, कि तुस्से मेरे चले ऐ। ³⁶ समौन पतरसे तेस किन्हें बोल्या, हे प्रभु, तुस्से केथियो जाया करहा? यीसुए जबाब दितेया, कि जेथी हांऊ जाहां, तेथी तू एबे मेरे पीछे नी आई सकदा ! पर बादा मंझ तुध मेरे पीछे आऊणा। ³⁷ पतरसे तेस किन्हें बोल्या, हे प्रभु, एभे हांऊ तेरे पीछे कि नी आई सकदा? मैं ता तेरे कठे जान भी देई सकहा। ³⁸ यीसुए जबाब दितेया, क्या तुध मेरे कठे आपणी जान देई देणी? हांऊ तेरे किन्हें सच सच बोल्हा कि जेबे तक तुध मेरे बारे मंझ तीन बारी नांह नी करणी कुकड़ा झांग नी देणी।

14 ¹ तुस्सा रा मन दुखी नी हो, तुस्से परमेसरा पर विस्वास रख्हा ऐ मेरे पर भी विस्वास रखा। ² मेरे पिता रे घरा मंझ रहणे रे कठे बौहत जगहा ई, अगर जगहा नी हुन्दी, ता मां तुस्सा किन्हें बोली देणा था कि हांऊ तुस्सा रे कठे जगहा त्यार करणे रे कठे जाया करहा। ³ होर अगर हांऊ जाई किन्हें जगहा त्यार करूं, ता दबारा वाप्स आई किन्हें मां तुस्से आपणे साउगी लई जाणें, ताकि जेथी हांऊ रहूं तेथी तुस्से भी

रहो।⁴ होर जेथी हांऊ जाहां तेथी रा रस्ता तुस्से जाणहां ऐं।
⁵ थोमे तेस किन्हें बोल्या, हे प्रभु, आस्से नी जाणदे कि तू केथी जाहां? ता रस्ता किहां जाणी सक्हा ऐ।⁶ यीसुए तेस किन्हें बोल्या, रस्ता होर सच्चाई होर जीवन हांऊ ई आं; मेरे बगैर कोई पिता वाले नी पूजी सक्दा।⁷ अगर तुस्से हांऊ जाणेया हुंदा, ता मेरे पिता जो बी जाणदे; होर एभे ले तुस्से तेस जो जाणहां ऐं, होर देखी भी लईरा।⁸ पिलिप्पुसे तेस किन्हें बोल्या, हे प्रभु, आस्सा जो पिता दसी दे: ये ई आस्सा रे कठे बौहत आ।⁹ यीसुए तेस किन्हें बोल्या; हे फिलिप्पुस, हांऊ इतने ध्याडे ले तुस्सा साउगी आ, होर क्या तू मुंजो नी जाणदा? जिने हांऊ देखी लया तिने पिता देखी लया: तू किधियो बोल्ला, कि आस्सा जो पिता दसी दे।¹⁰ क्या तू विस्वास नी करदा, कि हांऊ पिता मंझ आ, होर पिता मेरे मंझ; ये गल्ला जो हांऊ तुस्सा किन्हें बोल्ला, आपणी तरफ़ा ले नी बोल्ला, पर पिता मेरे अन्दर रही किन्हें आपणे काम करहा।¹¹ मेरा विस्वास करा कि हांऊ पिता रे अन्दर आ; होर पिता मेरे अन्दर आ; नई ता मेरे कामा री वजहा ले ई मेरा विस्वास करा।¹² हांऊ तुस्सा किन्हें सच सच बोल्ला, जो मेरे पर विस्वास रख्हा, ये काम जो हांऊ करहा, तेस बी करणे, बल्कि एता ले बी बडे बडे काम करणे, क्यूंकि हांऊ पिता वाले जाया करहा।¹³ होर जो कुछ तुस्से मेरे नांऊआं ले मान्धगे, तेहड़ा ई मां करणा पुत्रा रे ज़ीये पिता री बड़ाई हो।¹⁴ अगर तुस्से मेरे नांऊआं ले कुछ भी मान्धगे ता मां से करणा।¹⁵ अगर तुस्से मेरे किन्हें प्यार रख्हा ऐ, ता तुस्सा मेरे हुकम मनणें।¹⁶ होर मां पिता ले अरज करणी, कि से तुस्सा जो एक होर मददगार दे, ताकि से हमेसा तुस्सा साउगी रहे।¹⁷ यानि सच्चाई रा आत्मा, जेस जो संसार स्वीकार नी करी सक्दा, क्यूंकि से ना ता तेस जो देख्हा होर ना तेस जो जाणहां: तुस्से तेस जो जाणहां ऐं, क्यूंकि से तुस्सा साउगी रेंहयां, होर तेस तुस्सा मंझ हूणां।¹⁸ मां तुस्से अनाथ नी द्वाडणे, मां तुस्सा वाले आऊणा।¹⁹ होर थोहड़ी देर रह गयीरी कि संसारा हांऊ नी देखणा, पर तुस्सा हांऊ देखणा, एता कठे कि हांऊ जीउंदा आ, होर तुस्सा भी जीउंदे रहैणा।²⁰ तेस ध्याडे तुस्सा जाणना कि हांऊ पिता मंझ आ, होर तुस्से मेरे अन्दर, होर हांऊ तुस्सा अन्दर।²¹ जेस वाले मेरे हुकम ऐ, होर से तिन्हा जो मन्हां, से ई मेरे किन्हें प्यार रख्हा, होर जो मेरे किन्हें प्यार रख्हा, तेस किन्हें मेरा पिता प्यार रखणा, होर मां तेस किन्हें प्यार रखणा, होर आपणे आपा जो तेस पर जाहिर करणा।²² तिने यहुदे (जो यहूदा ईस्करयोति नी था) तेस किन्हें बोल्या, हे प्रभु, तू आपणे आपा जो आस्सा पर किधियो जाहिर करेया करहा? पर संसारा पर नी।²³ यीसुए तेस जो जबाब दितेया, अगर कोई मेरे किन्हें प्यार रख्हा, ता तेस मेरे वचन मनणें, होर मेरे पिता तेस किन्हें प्यार रखणा, होर आस्सा तेस वाले आउणा, होर तेस साउगी

रहैणा।²⁴ जो मेरे किन्हें प्यार नी रख्हा, से मेरे वचना जो नी मनदा, होर जो वाणी तुस्से सुणहां ऐं, से मेरी नी पर पिता री ई, जिने हांऊ भेजीरा।²⁵ ये गल्ला मैं तुस्सा किन्हें बोलीरी थी जेबे हांऊ तुस्सा साउगी था।²⁶ पर मददगार यानि पवित्र आत्मा जेस जो पिता मेरे नांऊआं ले भेजणा, तेस तुस्सा जो सभ गल्ला दसणी, होर जो कुछ मैं तुस्सा किन्हें बोलीरा तेस तुस्सा जो याद करणा।²⁷ हांऊ तुस्सा जो सांति देहां, हांऊ आपणी सांति तुस्सा जो देहां; जिहां संसार देहां, तेहड़ा हांऊ नी देंदा: तुस्सा रा मन ना घबराए होर ना डरे।²⁸ तुस्से सुणेया, कि मैं तुस्सा किन्हें बोल्या, हांऊ जाहां, होर तुस्सा वाले दबारा वाप्स आहूँआं, अगर तुस्से मेरे किन्हें प्यार रख्हा, ता एस गल्ला ले खुस हुंदे, कि हांऊ पिता वाले जाहां, क्यूंकि पिता मेरे ले बडा आ।²⁹ होर मैं तुस्सा किन्हें ये सभ कुछ पैहले ई दसी दितेया, कि जेबे तेहड़ा हुई जाहंगा, ता तुस्से मेरा विस्वास करेया।³⁰ मैं एभे ले तुस्सा साउगी होर गल्ला नी करणी, क्यूंकि एस संसारा रा हाकम आहूँआं, होर मेरे अन्दर तेसरा कुछ नी आ।³¹ पर ये इधी कठे हुहां कि संसार जाणी सके कि हांऊ पिता किन्हें प्यार करहा, होर जिहां पिते मुंजो हुकम दीतिरा, मैं तेहड़ा ई करहा: उठा, एथी ले चला।

15 ¹ सच्ची अंगूरा री बेल हांऊ ई; होर मेरा पिता किसान आ।² जो डाळी मेरे मंझ ई, होर नई फळदी, तेता जो से काटी देहां, होर जो डाळी फल्ला ई तेता जो से होर छांटा आं ताकि से होर फले।³ तुस्से ता तेस वचना री वजहा ले जो मैं बोलीरा शुद्ध हुई गयीरे।⁴ तुस्से मेरे अन्दर बणी किन्हें रहूआ, होर मां तुस्सा अन्दर: जिहां अगर डाळी अंगूरा री बेला मन्झ बणी किन्हें नी रहे, ता से आपणे आपा ले नी फली सक्दी, तिहां ई अगर तुस्से भी मेरे अन्दर बणी किन्हें नी रहो ता नी फली सक्दे।⁵ हांऊ अंगूरा री बेल ई: तुस्से डाळीया ई; जो मेरे अन्दर बणी किन्हें रेंहयां, होर हांऊ तेस मंझ, से बौहत फल फल्ला, क्यूंकि मेरे ले लग हुई किन्हें तुस्से कुछ भी नी करी सक्दे।⁶ अगर कोई मेरे मंझ बणी किन्हें नी रहे ता हांऊ तेस जो डाळीया साहीं सट्टी देहां, होर से सुकी जाहां, होर लोक तिन्हा जो कठी करी किन्हें आगी मंझ पाई देहां ऐं होर स्यों भखी किन्हे फुख्ही जाहीं।⁷ अगर तुस्से मेरे मंझ बणी के रहो, होर मेरी गल्ला तुस्सा मंझ बणी के रहे ता जो चाहे मांगा होर से तुस्सा रे कठे हुई जाणा।⁸ मेरे पिता री बड़ाई एता ले हुहां ई, कि तुस्से बौहत जे फल ल्याऊआ, तेबे ई तुस्से मेरे चेले हुणे।⁹ जिहां पिते मेरे किन्हें प्यार रखीरा, तिहां ई मैं भी तुस्सा किन्हें प्यार रखीरा, मेरे प्यारा मंझ बणी के रहैया।¹⁰ अगर तुस्से मेरे हुकमा जो मनघे, ता तुस्सा मेरे प्यारा मन्झ बणी के रहैणा: जिहां मैं आपणे पिता रा हुकम मन्या, होर तेसरे प्यारा मन्झ बणी रेंहयां।¹¹ मैं यूं गल्ला तुस्सा किन्हें इधी कठे बोलीरी, कि मेरी खुसी तुस्सा

मंझ बणी रहे, होर तुस्सा री खुसी पूरी हुई जाये।¹² ये मेरा हुकम आ, कि जो मैं तुस्सा किन्हें प्यार रखीरा, तिहां ई तुस्से भी एक दूजे किन्हें प्यार रखा।¹³ एता ले बडा प्यार केसी रा नी आ, कि कोई आपणे दोस्ता रे कठे आपणी जान दे।¹⁴ जो कुछ हांऊ तुस्सा जो हुकम देहां, अगर तेहड़ा ई करघे ता तुस्से मेरे दोस्त ऐ।¹⁵ एभे ले मां तुस्सा जो दास नी बोलणा, क्यूंकि दास नी जाणदा, कि तेसरा मालक क्या करहा? पर मैं तुस्सा जो दोस्त बोलीरा, क्यूंकि मैं जो गल्ला आपणे पिता ले सुणी, स्यों सब गल्ला मैं तुस्सा जो दसी दितिरी।¹⁶ तुस्से हांऊ नी छांटीरा पर मैं तुस्से छांटीरे होर नियुकत कीतीरे ताकि तुस्से जाई किन्हें फल ल्याए; होर तुस्सा रा फल टिकी सके, ताकि जो कुछ तुस्से मेरे नांऊआं ले पिता ले मान्घगे, तेस तुस्सा जो देणा।¹⁷ इन्हा गल्ला रा हुकम हांऊ तुस्सा जो इधी कठे देहां, कि तुस्से एक दूजे किन्हें प्यार रखा।¹⁸ अगर संसार तुस्सा किन्हें बैर रख्हा, ता तुस्से जाणहां ऐं कि तिने तुस्सा ले पैहले मेरे किन्हें नफरत कीती।¹⁹ अगर तुस्से संसारा रे हुंदे, ता संसार आपणे किन्हें प्यार रखदा, पर एता रे कठे कि तुस्से संसारा मंझा ले छांटी लईरे इधी कठे संसार तुस्सा किन्हें नफरत करहा।²⁰ याद करा जो गल मैं तुस्सा किन्हें बोली थी, कि दास आपणे मालका ले बडा नी हुंदा, अगर तिन्हे हांऊ सताया, ता तुस्से भी सताए जाणे, अगर तिन्हे मेरी गल मनी, ता तिन्हा तुस्सा री भी मनणी।²¹ पर ये सब कुछ तिन्हा मेरे नांऊआं री वजहा ले तुस्सा साउगी करणा।²² अगर हांऊ नी आउंदा होर तिन्हा किन्हें गल्ला नी करदा, ता स्यों पापी नी ठैहरदे, पर एभे तिन्हा वाले तिन्हारे पापा रे कठे कोई भाना नी आ।²³ जो मेरे किन्हें नफरत रख्हा, से मेरे पिता किन्हें भी नफरत रख्हा।²⁴ अगर हांऊ तिन्हा मंझ स्यों काम नी करदा, जो होरी केसिये नी कीते ता स्यों पापी नी ठैहरदे, पर एभे ता तिन्हे हांऊ होर मेरे पिता जो देखी लया, होर आस्सा दूहीं किन्हें नफरत कीती।²⁵ होर ये इधी कठे हुएया, कि से वचन पूरा हो, जो तिन्हारी व्यवस्था मंझ लिखीरा, कि तिन्हे मेरे किन्हें बेबजह नफरत कीती।²⁶ पर जेबे तेस मददगारा आऊणा, जो मां तुस्सा वाले भेजणा, यानि सच्चा रा आत्मा जो पिता री तरफा ले निकळा आ, ता तेस मेरी गवाही देणी।²⁷ होर तुस्से भी गवाह ऐ क्यूंकि तुस्से सुहुरू ले मेरे साउगी ऐ।

16¹ ये गल्ला मैं तुस्सा किन्हें इधी कठे बोली कि तुस्से ठोकर नी खाओ।² तिन्हा तुस्से मंदरा मंझा ले काढी देणे, बल्कि एहड़ा टैम आहूंआं, कि जो कोई तुस्सा जो मारघा तेस ये समझणा कि से परमेसरा री सेउआ करेया करहा।³ होर तिन्हा ये इधी कठे करणा कि तिन्हे ना ता पिता जाणेया होर ना हांऊ।⁴ पर ये गल्ला मैं इधी कठे तुस्सा किन्हें बोली, कि जेबे तिन्हारा टैम आये ता तुस्सा जो याद रहे कि मैं तुस्सा जो

तिन्हारे बारे मंझ पैहले दसी दितिरा था। सुहुरू मंझ ये गल्ला मैं इधी कठे नी बोली क्यूंकि मैं तुस्सा साउगी था।⁵ एभे हांऊ आपणे भेजणेवाळे वाले जाहां होर तुस्सा मंझा ले कोई मेरे ले नी पुछदा, कि तू केथी जाहां?⁶ पर मैं जो ये गल्ला तुस्सा किन्हें बोली, इधी कठे तुस्सा रा मन दुःखा किन्हें भरी गईरा।⁷ तेबे बी हांऊ तुस्सा किन्हें सच सच बोल्हा, कि मेरा जाणा तुस्सा रे कठे अच्छा आ, क्यूंकि अगर हांऊ नी जांऊ, ता तेस मददगारा तुस्सा वाले नी आउणा, पर अगर हांऊ जांघ्हा, ता मां से तुस्सा वाले भेजी देणा।⁸ होर तेस आई किन्हें संसारा जो पाप, धार्मिकता होर न्याया रे बारे मंझ दोषी ठैहराणा।⁹ पापा रे बारे मंझ इधी कठे कि स्यों मेरे पर विस्वास नी करदे।¹⁰ होर धार्मिकता रे बारे मंझ इधी कठे कि हांऊ पिता वाले जाहां, होर तुस्सा हांऊ दबारा नी देखणा।¹¹ न्याया रे बारे मंझ इधी कठे कि संसारा रा हाकम दोषी ठैहराई दीतिरा।¹² मुंजो तुस्सा किन्हें होर भी बौहत सारी गल्ला करणी, पर हल्ली तुस्से तिन्हा जो सही नी सक्दे।¹³ पर जेबे तेस यानि सच्चा रा आत्मा आउणा, ता तेस तुस्सा जो सब सच्चा रा रस्ता दसणा, क्यूंकि तेस आपणी तरफा ले कुछ नी बोलणा, पर जो कुछ तेस सुणना, तेस तेहड़ा ई बोलणा, होर हुणे वाळी गल्ला तुस्सा जो दसणी।¹⁴ तेस मेरी जै जै कार करणी, क्यूंकि तेस मेरी गल्ला लई किन्हें तुस्सा जो दसणी।¹⁵ जो कुछ पिता रा आ, से सब मेरा आ, इधी कठे मैं बोल्या, कि तेस मेरी गल्ला लई किन्हें तुस्सा जो दसणी।¹⁶ थोहड़ी देरा तक तुस्सा हांऊ नी देखणा, होर थोहड़ी देरा बाद दबारा तुस्सा हांऊ देखणा।¹⁷ तेबे तेसरे चले आपु मन्झ बोल्या, ये क्या आ, जो से आस्सा किन्हें बोल्हा, कि थोहड़ी देरा मंझ तुस्सा हांऊ नी देखणा, होर फेरी थोहड़ी देरा बाद दबारा तुस्सा हांऊ देखणा, होर ये इधी कठे आ क्यूंकि हांऊ पिता वाले जाहां?¹⁸ तेबे तिन्हे बोल्या, “थोहड़ी देरा मंझ” ये क्या गल ई? आस्से नी जाणदे, कि से क्या बोल्हा।¹⁹ यीसुए ये जाणी किन्हें, कि स्यों मेरे ले कुछ पूछणा चाहें, तिने तिन्हा किन्हें बोल्या, क्या तुस्से आपु मंझ मेरी एस गल्ला रे बारे मंझ पूछ ताछ करेया करहा ऐ, कि थोहड़ी देरा मंझ तुस्सा हांऊ नी देखणा, होर फेरी थोहड़ी देरा मंझ तुस्सा हांऊ देखणा।²⁰ हांऊ तुस्सा किन्हें सच सच बोल्हा, कि तुस्सा रोणा होर विलाप करणा, पर संसारा खुसी मनाणी: तुस्सा जो दुःख हूणां, पर तुस्सा रा दुःख खुसी मंझ बदली जाणा।²¹ जेबे जनाने बच्चे जो जन्म देंदी लघ्हा ई ता तेस्सा जो पीड़ा हूहां ई, क्यूंकि तेस्सा री दुखा री घड़ी आई गईरी, पर जेबे से बच्चे जो जन्म देई चुक्हा ई ता से एस खुसी किन्हें कि तेस्से एक माहणु जो संसारा मंझ जन्म दितेया से फेरी तेस पीड़ा जो दबारा याद नी करदी।²² होर तुस्सा जो भी एभे दुःख हूहां, पर मां तुस्सा किन्हें फेरी दबारा मिलणा होर तुस्सा रे मना मंझ खुसी हुणी; होर तुस्सा री खुसी तुस्सा ले

केसी नी छुड़ाणी ।²³ तेस ध्याड़े तुस्सा मेरे ले कुछ नी पूछणा: हांऊ तुस्सा किन्हें सच सच बोल्हा, अगर तुस्से पिता ले कुछ मान्धगे, ता तेस मेरे नांऊआं ले तुस्सा जो देणा ।²⁴ एभे तक तुस्से मेरे नांऊआं ले कुछ नी मान्धगे; मान्धगे ता तुस्सा जो मिलणा ताकि तुस्सा री खुसी पूरी हुई जाए ।²⁵ मैं यूं गल्ला तुस्सा किन्हें काहणीया मंझ बोलीरी, पर एहड़ा टैम आहूँआं, कि मां तुस्सा किन्हें काहणीया मंझ होर नी बोलणा, पर साफ साफ तुस्सा जो पिता रे बारे मंझ दसणा ।²⁶ तेस ध्याड़े तुस्सा मेरे नांऊआं ले मांगणा, होर हांऊ तुस्सा किन्हें ये नी बोल्हा, कि मां तुस्सा रे कठे पिता ले अरज करणी ।²⁷ क्यूंकि पिता आपहुए तुस्सा किन्हें प्यार रख्हा, इधी कठे कि तुस्से मेरे किन्हें प्यार रख्हा ऐ, होर ये भी विस्वास कीतेया, कि हांऊ पिता री तरफ़ा ले आईरा ।²⁸ हांऊ पिता री तरफ़ा ले संसारा मंझ आईरा, होर दबारा संसारा जो छाडी किन्हे पिता वाले जाहां ।²⁹ तेसरे चले बोल्या, एबे तू साफ साफ बोल्या करहा, होर कोई काहणीया मंझ नी लगीरा बोल्हा ।³⁰ एबे आस्से जाणी गये कि तू सब कुछ जाणहां, होर तुजो कोई मतलब नी आ, कि कोई तेरे ले पूछे, एता ले आस्से विस्वास करहा ऐ कि तू परमेसरा री तरफ़ा ले आईरा ।³¹ ये सुणी किन्हें यीसुए तिन्हा किन्हें बोल्या, क्या तुस्से एबे विस्वास करहा ऐ? ³² देखा, से घड़ी आहूँआं ई बल्कि आई पुजीरी कि तुस्सा सभिया ओरे परे हुई किन्हें आपणा आपणा रस्ता लैणा, होर हांऊ कल्हा छाडी देणा, तेबे बी हांऊ कल्हा नी आ, पिता मेरे साउगी आ ।³³ मैं ये गल्ला तुस्सा किन्हें इधी कठे बोली, ताकि तुस्सा जो मेरे मंझ सांति मिलो; संसारा मंझ तुस्सा जो कलेस हूहां, पर हिम्मत करा, मैं संसार जीती लईरा ।

17 ¹ यीसुए ये गल्ला बोली होर आपणी हाखीया सरगा वखा जो चकी किन्हें बोल्या, हे पिता, से घड़ी आई पुजीरी, आपणे पुत्रा री म्हीमा कर, कि पुत्र भी तेरी म्हीमा करे ।² क्यूंकि तैं तेस जो सभी रे प्राणा पर हक दीतीरा, कि तेस जो तैं स्यों देई दितीरे, ताकि तिन्हा सभी जो से हमेसा री जीन्दगी दे ।³ होर हमेसा री जीन्दगी ये ई, कि स्यों तुजो, सच्चे परमेसरा जो होर यीसू मसीहा जो, जो तैं भेजीरा जाणी सके ।⁴ जो काम तैं मुंजो करणे रे कठे दिती रा था, तेस जो पूरा करी किन्हें मैं तेरी म्हीमा कितिरी ।⁵ होर एभे, हे पिता, तू आपणे साउगी मेरी म्हीमा तेस म्हीमा ले कर जो संसारा रे हुणे ले पैहले, मेरी तेरे साउगी थी ।⁶ मैं तेरा नांऊ तिन्हा माहणुआ पर जाहीर कीतेया जो तैं संसारा मंझा ले मुंजो दीते: स्यों तेरे थे होर तैं स्यों मुंजो दिते, होर तिन्हे तेरा वचन मनी लया ।⁷ एबे स्यों जाणी गयीरे, कि जो कुछ तैं मुंजो दीतिरा, से सब तेरी तरफ़ा ले आ ।⁸ क्यूंकि जो गल्ला तैं मेरे वाले पूजाईरी, मैं तिन्हा जो भी पूजाई दिती होर तिन्हे स्यों गल्ला मनी लई: होर सच सच जाणी लया, कि

हांऊ तेरी तरफ़ा ले आईरा, होर विस्वास करी लया कि तैं ई हांऊ भेजीरा ।⁹ मैं तिन्हारे कठे अरज करहा, संसारा रे कठे नी, पर तिन्हा रे कठे जो तैं मुंजो दितीरे, क्यूंकि स्यों तेरे ऐ ।¹⁰ होर जो कुछ मेरा आ से सब तेरा आ, होर जो कुछ तेरा आ से मेरा आ, होर मैं तिन्हारे जरिये म्हीमा पाई ।¹¹ अगे ले मां संसारा मंझ नी रैहणा, पर इन्हा संसारा मंझ रैहणा, होर हांऊ तेरे वाले आहूँआं; हे पवित्र पिता, आपणे तेस नांऊआं ले जो तैं मुंजो दितीरा, तिन्हारी हिफाजत कर, कि स्यों आस्सा साहीं एक हो ।¹² जेबे हांऊ तिन्हा साउगी था, ता मैं तेरे तेस नांऊआं ले, जो तैं मुंजो दितीरा, मैं तिन्हारी हिफाजत कीती, मैं तिन्हारी रखवाली कीती होर विनासा रे पुत्रा जो छाडी किन्हें तिन्हा मंझा ले कोई भी नास नी हुएआ, इधी कठे कि सास्त्रा री गल्ला पुरी हो ।¹³ पर एभे मैं तेरे वाले आहूँआं, होर ये गल्ला संसारा मंझ बोल्हा, कि स्यों मेरी पूरी खुसी आपणे आपा मंझ पाए ।¹⁴ मैं तेरा वचन तिन्हा वाले पुजाईत्रा, होर संसारे तिन्हा किन्हें नफरत कीती, क्यूंकि जिहां हांऊ संसारा रा नी आ, तिहां ई स्यों भी संसारा रे नी ऐ ।¹⁵ हांऊ ऐ अरज नी करदा, कि तू तिन्हा जो संसारा ले चकी ले, पर ये कि तू तिन्हा जो तेस दुष्टा ले बचाई के रख ।¹⁶ जिहां हांऊ संसारा रा नी आ, तिहां ई स्यों भी संसारा रे नी ऐ ।¹⁷ सच्चा रे ज़ीए तिन्हा जो पवित्र कर: तेरा वचन सच्चा आ ।¹⁸ जिहां तैं हांऊ संसारा मंझ भेजीरा, तिहां ई मैं स्यों संसारा मंझ भेजीरे ।¹⁹ होर तिन्हा रे कठे हांऊ आपणे आपा जो पवित्र करहा ताकि स्यों भी सच्चा रे ज़ीए पवित्र किते जाए ।²⁰ हांऊ सिर्फ इन्हा रे कठे ई अरज नी करदा, पर तिन्हा रे कठे भी जिन्हा इन्हा वचना रे ज़ीए मेरे पर विस्वास करणा, ताकि स्यों सब एक हो ।²¹ जिहां तू, हे पिता मेरे मंझ आ, होर हांऊ तेरे मंझ आ, तिहां ई स्यों भी आस्सा अन्दर हो; ताकि संसार विस्वास करे, कि तुस्से ई हांऊ भेजीरा ।²² होर से म्हीमा जो तैं मुंजो दिती री, मैं तिन्हा जो दिती री ताकि स्यों तिहां ई एक हो जिहां आस्से एक ऐ ।²³ हांऊ तिन्हा मंझ होर तू मेरे मंझ ताकि स्यों पके हुई किन्हें एक हुई जाए, होर संसार जाणे कि तैं ई हांऊ भेजीरा, होर जिहां तैं मेरे किन्हें प्यार रखेया, तिहां ई तिन्हा किन्हें प्यार रखेया ।²⁴ हे पिता, हांऊ चाहां कि स्यों जे तैं मुंजो दितीरे, जेथी हांऊ आं, तेथी स्यों भी मेरे साउगी हो कि स्यों मेरी तेस म्हीमा जो देखी सके जो तैं मुंजो दिती री, क्यूंकि तैं संसारा री पैदाईसा ले पैहले ले ई मेरे किन्हें प्यार रखेया ।²⁵ हे धर्मी पिता; संसार मुंजो नी जाणी सक्या, पर मैं तू जाणेया होर इन्हें भी जाणेया कि तैं ई हांऊ भेजीरा ।²⁶ होर मैं तेरा नांऊ तिन्हा जो दसेया होर दसदे रैहणा ताकि जो प्यार तुस्सा जो मेरे किन्हें था, से तिन्हा मंझ रहे होर हांऊ तिन्हा मंझ ।

18 ¹यीसु ये गल्ला बोली किन्हें आपणे चले साउगी किद्रोना रे नाळे रे पार गया, तेथी एक बगीचा था, जेस मंझ से होर तेसरे चले गये। ²होर तेसरा पकड़वाणे वाळा यहूदा भी तेस जगहा जो जाणहां था, क्यूंकि यीसू आपणे चले साउगी तेथी जांदा रेंहयां था। ³तेबे यहूदा पलटना जो, होर महायाजका होर फरीसीया री तरफ़ा ले पैहरेदारा जो लई किन्हें दीये होर लौ होर हथियारा जो लई किन्हें तेथी आया। ⁴तेबे यीसू तिन्हा सब गल्ला जो जेहडी तेस पर हुणेवाळी थी, जाणी किन्हें अगे आया, होर तिन्हा ले पुछदा लग्या, केस जो टोळहा ऐ? ⁵तिन्हे तेस जो जबाब दितेया, यीसू नासरी जो: यीसुए तिन्हा किन्हें बोल्या, से हांऊ आं, होर तेसरा पकड़वाणे वाळा यहूदा भी तिन्हा साउगी खडी रा था। ⁶तेसरे ये बोल्दे ई, कि से हांऊ आं, स्यों पीछे हटी किन्हें जमीना पर पई गये। ⁷तेबे तिने दबारा तिन्हा ले पुछेया, तुस्से केस जो टोळहा ऐ? होर तिन्हे बोल्या, यीसू नासरी जो। ⁸यीसू ऐ जबाब दितेया, मैं ता तुस्सा किन्हें बोली दितेया कि हांऊ से ई आ, अगर तुस्से मुंजो टोळहा ऐ ता इन्हा जो जाणे देया। ⁹ऐ इधी कठे हुआ ताकि से वचन पूरा हो, जो तिने बोल्या था, कि जो तैं मुंजो दिते, तिन्हा मंझा ले मैं एक भी नी गुआया। ¹⁰समौन पतरसा वाले तलवार थी तिने से तलवार काढी, होर महायाजका रे दासा पर चलाई होर तेसरा दायँ कान काटी दितेया, तेस दासा रा नांऊ मलखुस था। ¹¹तेबे यीसूए पतरसा किन्हें बोल्या, आपणी तलवार म्याना मंझ रख: जो प्याला मुंजो पिते दिती रा क्या हांऊ तेस जो नी पीयूं? ¹²तेबे स्पाहीये होर तिन्हारे सुबेदारे होर यहूदीया रे पैहरेदारे यीसू जो पकड़ी किन्हें बान्हया। ¹³होर पैहले स्यों तेस जो हन्ना वाले लई गये क्यूंकि से तेस साला रे माहायाजक कैफा रा सौहरा था। ¹⁴ये से ई कैफा था, जिने जे यहूदीया जो सलाह दित्री थी कि आस्सा रे कठे एक आदमी रा मरणा खरा आ। ¹⁵समौन पतरसा साउगी एक होर दूजा चेला था जो यीसू रे पीछे चली पया, ये दूजा चेला माहायाजका रा जाणा पैहचाणा था होर से यीसू साउगी माहायाजका रे आन्घणा तक गया। ¹⁶पर पतरस दरवाजे वाले खडी रा था, तेबे से दूजा चेला जो माहायाजका रा जाणा पैहचाणा था, बाहर निकळेया, होर से तेस्सा द्वारपालणा किन्हें बोली किन्हें, पतरसा जो अन्दर लई आया। ¹⁷से दासी जो द्वारपालण थी, तेस्से पतरसा किन्हें बोल्या, क्या तू भी एस माहणु रे चले मंझा ले एक आ? तिने बोल्या, से हांऊ नी आं। ¹⁸दास होर पैहरेदार ठंडा री वजहा ले खडी किन्हें आग तफ्या करहा ऐ थे होर पतरस भी तिन्हा साउगी खडी किन्हें आग तफ्या करहा था। ¹⁹तेबे माहयाजके यीसू ले तेसरे चले रे बारे होर तेसरे उपदेसा रे बारे मन्झ पुछेया। ²⁰यीसुए तेस जो जबाब दितेया, कि मैं संसारा किन्हें खुल्ही किन्हें गल्ला कीती; मैं सभा मंझ होर मंदरा मंझ

जेथी सभ यहूदी कठे हुंआ ऐं थे, हमेसा प्रचार कितेया होर चुपके चुपके कुछ नी बोल्या। ²¹तू मुंजो कि पूछहा? सुणनेवाळे ले पूछा: कि मैं तिन्हा किन्हें क्या बोल्या? देखा स्यों जाणहां ऐं; कि मैं क्या क्या बोल्या? ²²जेबे तिने ये बोल्या, ता पैहरेदारा मंझा ले एकिये जो तेसरे नेडे खडी रा था, यीसू जो थपण्ड मारी किन्हें बोल्या, क्या तू माहयाजका जो एहडा जबाब देहां। ²³यीसुए तेस जो जबाब दितेया, अगर मैं बुरा बोल्या, ता तेस बुराईया री गवाही दे; पर अगर खरा बोल्या, ता तू मुंजो किधीयो मारहा? ²⁴हन्ने तेस जो बान्ही किन्हें कैफा माहयाजका वाले भेजी दितेया। ²⁵समौन पतरस खडा हुई किन्हें आग तफ्या करहा था; तेबे तिन्हे तेस किन्हें बोल्या; क्या तू भी तेसरे चले मंझा ले एक आ? तिने मुखरी किन्हें बोल्या, मैं नी आं। ²⁶माहयाजका रे दासा मंझा ले एकिये जो तेसरे टब्बरा मंझा ले एक था, जेसरा जे कान पतरसे काटी दितीरा था, बोल्या, क्या मैं तू तेस साउगी बगीचे मंझ नी देख्या था? ²⁷पतरस दबारा मुखरी गया होर तेस ई टैम कुकड़े झांग दीती। ²⁸होर स्यों यीसू जो कैफा वाले ले लई किन्हे रोमी राज्यपाला रे मैहला मंझ लई गये। होर ये भ्यागा रा टैम था, पर स्यों आपु मैहला रे अन्दर नी गये ताकि असुद्ध नी हो पर फसह खाई सके। ²⁹तेबे पीलातुस तिन्हा वाले बाहर आया होर बोल्या, तुस्से एस माहणु पर क्या दोष ल्गाहें? ³⁰तिन्हे तेस जो जबाब दितेया, कि अगर ये कुकर्मि नी हुंदा ता आस्से एस जो तेरे हाथा मंझ नी देंदे। ³¹पिलातुसे तिन्हा किन्हें बोल्या, तुस्से ई एस जो लई जाई किन्हें आपणी व्यवस्था रे मुताबक ऐसरा फैसला करा: यहुदिये तेस किन्हें बोल्या, आस्सा जो हक नी आ कि आस्से केसी री जान ले। ³²ये इधी कठे हुआ, ताकि यीसू री से गल पुरी हो जो तिने बोलीरी थी कि तेस केहडी मौत मरणा। ³³तेबे पिलातुस दबारा मैहला रे अन्दर गया होर यीसू जो सादी किन्हें, तेस ले पुछेया, क्या तू यहूदिया रा राजा आ? ³⁴यीसुए जबाब दितेया, क्या तू ये गल आपणी तरफ़ा ले बोल्हा या होरीये मेरे बारे मंझ तेरे किन्हें बोलीरा? ³⁵पिलातुसे जबाब दितेया, क्या हांऊ यहूदी आ? तेरी ई जाति होर माहयाजके तुजो मेरे हाथा मंझ दिती रा, तैं क्या कितिरा? ³⁶यीसुए जबाब दितेया, कि मेरा राज एस संसारा नी आ, अगर मेरा राज एस संसारा रा हुंदा, ता मेरे दास लडदे, ताकि हांऊ यहूदिया रे हाथा मंझ नी दितेया जांदा: पर एभे मेरा राज एथी रा नी आ। ³⁷पिलातुसे तेस किन्हें बोल्या, कि तू बोल्हा, क्यूंकि हांऊ राजा आ; मैं इधी कठे जन्म लईरा, होर इधी कठे संसारा मंझ आईरा कि सच्चाई पर गवाही दूँ जो कोई सच्चाई रा आ, से मेरी अवाज सुणहां। ³⁸पिलातुसे तेस किन्हे बोल्या, सच क्या आ? होर ये बोली किन्हें से दबारा यहूदिया वाले चली गया होर तिने तिन्हा किन्हें बोल्या, मैं ता तेस अन्दर कोई दोष नी पांदा। ³⁹पर तुस्सा रा ये रवाज आ कि हांऊ फसहा मंझ तुस्सा रे कठे

एक माहणु जो छाडी दूँ, ता क्या तुस्से चाहें कि हांऊ तुस्सा रे कठे हांऊ यहूदिया रे राजा जो छाडी देंऊ? 40 तेबे तिन्हे दबारा चिल्लाई किन्हे बोल्या, एस जो नी पर आस्सा रे कठे बरअब्बा जो छाडी दे; होर बरअब्बा एक डाकू था।

19 1 तेबे पिलातुसे यीसू जो कोड़े लगाये। 2 होर स्पाहीये तेस जो कांडे रा मुकट बणाया होर तेसरे मुंडा पर रखेया, होर बैंगणी चोगा पन्हाया। 3 होर स्यों तेस वाले बार बार आई किन्हे बोल्दे लगे, हे यहूदिया रे राजा, नमस्ते! होर तिन्हे तेस जो थप्पड़ मारे। 4 पिलातुसे एक बारी दबारा बाहर आई किन्हे लोका किन्हे बोल्या, देखा, मैं तेस जो तुस्सा वाले दबारा बाहर ल्याहुंआं; ताकि तुस्से जाणी सको कि मैं तेस मंझ कोई दोष नी पांदा। 5 तेबे यीसू कांडे रा मुकट होर बैंगणी चोगा पैहनी किन्हे बाहर नीकळेया होर पिलातुसे तिन्हा किन्हे बोल्या, देखा एस आदमी जो ! 6 जेबे माहयाज्के होर पैहरेदारे से देख्या, ता तिन्हे चील्लाई किन्हे बोल्या, कि तेस जो कूस प्रयाहले चढाउआ, कूस प्रयाहले: पिलातुसे तिन्हा किन्हे बोल्या, तुस्से ई तेस जो कूस प्रयाहले चढाउआ; क्युंकि हांऊ तेस मंझ कोई दोष नी पांदा। 7 यहूदिये तेस जो जबाब दितेया, कि आस्सा रा भी कानून आ होर तेस कानुना रे मुताबक ये मारी देणे रे काबल आ क्युंकि इने आपणे आपा जो परमेसरा रा पुत्र बणाया। 8 जेबे पिलातुसे ये गल सुणी ता से होर भी डरी गया। 9 होर से दबारा मैहला अन्दर गया होर तिने यीसू किन्हे बोल्या, तू केथीरा आ? पर यीसुए तेस जो कुछ भी जबाब नी दितेया। 10 पिलातुसे तेस किन्हे बोल्या, तू मेरे किन्हे कि नी बोल्दा? क्या तू नी जाणदा कि तुजो छाडणे रा हक मेरे वाले आ होर तुजो कूस प्रयाहले चढाणे रा हक भी मेरे वाले आ। 11 यीसुए जबाब दितेया, कि अगर तुजो उपरा ले ये हक नी दितेया जांदा, ता तेरा मेरे ऊपर कुछ हक नी हुंदा; इधी कठे जिने जे हांऊ तेरे हाथा मंझ सौम्पीरा, तिन्हारा पाप ज्यादा बडा आ। 12 होर तेभे ले पिलातुसे तेस जो छाडी देणा चाहेया, पर यहूदिये चिल्लाई चिल्लाई किन्हे बोल्या, अगर तू एस जो छाडी देहन्गा ता तेरी दोस्ती कैसरा किन्हे नी ई; जो कोई आपणे आपा जो राजा बणाहां से कैसरा रा साम्हणा करहा। 13 ये गल्ला सुणी किन्हे पिलातुसे यीसू बाहर ल्यान्देया होर तेस जगहा एक चबूतरा था जेस जो इब्रानी भाषा मंझ गब्ता बोल्हा ऐ थे तेथी से न्याय आसना पर बैठी गया। 14 ये फसहा री त्यारी रा ध्याडा था होर लगभग छठा घंटा था: तेबे तिने यहूदीया किन्हे बोल्या, देखा, ये ई आ, तुस्सा रा राजा! 15 पर स्यों चिल्लाए, लई जा! लई जा! तेस जो कूस प्रयाहले चढा: पिलातुसे तेस किन्हे बोल्या, क्या हांऊ तुस्सा रे राजे जो कूस प्रयाहले चढाऊं? माहयाज्के जबाब दितेया, कि कैसरा जो छाडी किन्हे होर कोई आस्सा रा राजा नी आ। 16 तेबे तिने तेस जो तिन्हा रे हाथा मंझ सौंपी

दितेया ताकि से कूस प्रयाहले चढाया जा सके। 17 तेबे स्यों यीसू जो लई गये। होर से अपणा कूस चकी किन्हे तेस जगहा तक गया, जेस जो खोपड़ी री जगहा बोल्हा ऐ होर इब्रानी भाषा मंझ गुलगुता। 18 तेथी तिन्हे तेस जो होर तेस साउगी होर दो माहणु जो कूस प्रयाहले चढाया, एकी जो ओरे होर दूजे जो परे, होर बीचा मंझ यीसू जो। 19 होर पिलातुसे एक दोष पत्र लिखी किन्हे कूस प्रयाहले टांगी दितेया होर तेता मंझ ये लिखीरा था, यीसू नासरी यहूदिया रा राजा। 20 ये दोष पत्र बौहत यहूदिये पढेया क्युंकि से जगहा जेथी जे यीसू जो कूस पर चढाया था से जगहा सैहरा ले नेडे थी होर ये दोष पत्र इब्रानी होर लतीनी होर यूनानी मंझ लिखीरा था। 21 तेबे यहूदीये रे माहयाज्के पिलातुसा किन्हे बोल्या, यहूदिया रा राजा मत लिख पर ये लिख कि "तिने बोल्या, हांऊ यहूदीया रा राजा आ" 22 पिलातुसे जबाब दितेया, कि मैं जो लिखी दितेया, से लिखी दितेया। 23 जेबे स्पाही यीसू जो कूस प्रयाहले चढाई चुके, ता तेसरे कपड़े लई किन्हे चार हिस्से कीते, हर स्पाही जो एक एक हिस्सा, होर कुरता भी लया पर कुरता उपरा ले हेठा तक बगैर सलाई रा था: 24 इधी कठे तिन्हे आपु मंझ बोल्या, आस्सा जो ये नी छेकणा चहीए, पर एता रे कठे चिठी पाहें कि ये कैसरा हूणां? ये इधी कठे हुआ, कि पवित्र सास्त्रा री गल पुरी हो कि तिन्हे मेरे कपड़े आपु मंझ बांडी लये होर मेरे कपड़े रे कठे तिन्हे चिठी पाई: स्पाहीये एहडा ई कितेया। 25 पर यीसू रे कूस वाले तेसरी माऊ होर तेसरी माऊआ री बैहण मरीयम, क्लोपासा री लाडी होर मरीयम मगदलीनी खडी री थी। 26 जेबे यीसुए आपणी माऊ होर चले जो, जेस जो से प्यार करहा था खडी रे देख्या, यीसुए आपणी माऊआ किन्हे बोल्या: हे जनाने, देख, ये रैहया तेरा म्हठा। 27 तेबे तिने तेस चले किन्हे बोल्या, ये रही तेरी माऊ, होर तेस ई टैम से चले तेस्सा जो आपणे घरा लई गया। 28 एता ले बाद यीसुए ये जाणी किन्हे कि एभे सब कुछ हुई चुकेया; इधी कठे कि पवित्र सास्त्रा री गल पुरी हो, तिने बोल्या, "हांऊ सोखा आ"। 29 तेथी एक सीरके किन्हे भहरी रा भांडा रखीरा था, तिन्हे सीरके किन्हे स्पंज सगेया होर जूफे पर रखी किन्हे तेसरे मुंहा किन्हे लगाया। 30 जेबे यीसुए सिरका लई लया, तेबे तिने बोल्या, "पूरा हुई गया" होर मूंड झुकाई किन्हे तिने आपणे प्राण छाडी दिते। 31 होर इधी कठे कि से फसहा री त्यारी रा ध्याडा था, यहूदिये पिलातुसा किन्हे अरज कीती कि तिन्हारी टांगा तोड़ी किन्हे तिन्हा जो तेथी ले तुआरेया जाये ताकि सब्ता रे ध्याडे तिन्हारी ल्हासा कूस प्रयाहले नी रही सको, क्युंकि से सब्ता रा ध्याडा था। 32 तेबे स्पाही आये होर पैहले री टांगा तोड़ी फेरी दूजे री, जो तेस साउगी कूस प्रयाहले चढाईरे थे। 33 पर जेबे तिन्हे यीसू वाले आई किन्हे देख्या कि से मरी चुकिया, ता तिन्हे तेस री टांगा नी तोड़ी। 34 पर स्पाहीया

मंझा ले एकिये बरछे किन्हें तेसरी पसली छेदी होर तेता मंझा ले तिहां ई खून होर पाणी नीकळैया । ³⁵ जिने जे ये देख्या, तिने ई ये गवाही दिती री, होर तेसरी गवाही सञ्ची ई; होर से जाणहां कि से सच बोल्ला ताकि तुस्से भी विस्वास करी सको । ³⁶ ये गल्ला इधी कठे हुई कि पवित्र सास्त्रा री ये गल पुरी हुई सके कि तेसरी कोई हड्डी नी तोड़ी नी जाणी । ³⁷ फेरी एक होर जगहा ये लिखीरा आ, कि जेस जो तिन्हे छेदेया, तिन्हा से देखणा । ³⁸ इन्हा गल्ला ले बाद अरमतियाहा रे युसूफे जो यीसू रा चेला था, पर यहूदिया रे डरा रे मारे से एस गल्ला जो ल्कोई के रख्हा था, तिने पिलातुसा ले अरज किती, कि हांऊ यीसू री ल्हास लई जाऊं, होर पिलातुसे तेसरी अरज सुणी लई, होर से आई किन्हें तेसरी ल्हास लई गया । ³⁹ नीकुदेमुस भी जो पैहले यीसू वाले राती गईरा था लगभग पन्ज्याह सेर मिलिरा गन्धरस होर एलवा लई आया । ⁴⁰ तेबे तिन्हे यीसू री ल्हास नीति होर यहूदिया रे रूवाजा रे मुताबक तिन्हें तेसरी ल्हास सुगन्धा वाळी चीज़ा ल्गाई किन्हें कफना मंझ लपेटी । ⁴¹ से जगहा जेथी जे यीसू जो क्रूसा पर चढाईरा था, से एक बगीचा था, होर तेस बगीचे मंझ एक नौई कबर थी; जेस मंझ कधी कोई नी रखीरा था । ⁴² क्यूंकि यहूदिया रे त्यारी रे ध्याड़े री वजहा ले, तिन्हे यीसू तेस कबरा मंझ रख्या, क्यूंकि से कबर नेडे थी ।

20 ¹ हसे रे पैहले ध्याड़े मरीयम मगदलीनी भ्यागा ई, हल्ली न्हयारा ई था, से कब्रा पर आई, होर तेस्से पाल्थर हट्टीरा देख्या । ² तेबे से दोड़ी होर समौन पतरसा होर दूजे चले किन्हें जेस किन्हें जे यीसू प्यार करहा था आई किन्हें बोल्या, स्यों प्रभु जो कबरा मंझा ले काढी किन्हें लई गयीरे; होर आस्से नी जाणदी, कि तिन्हे से केथी रखीरा । ³ तेबे पतरस होर दूजा चेला बाहर निकळी किन्हें कबरा बखा दौड़े । ⁴ होर स्यों दुहें साउगी साउगी दौड़ेया करहा ऐ थे, पर दूजा चेला पतरसा ले अगे बढी किन्हें कबरा वाले पैहले पूजी गया । ⁵ होर तिने झुकी किन्हें देख्या कि तेथी कफना रे कपड़े पईरे: तेबे बी से अन्दर नी गया । ⁶ तेबे समौन पतरस भी तेसरे पीछे पीछे पौहंचेया होर से कबरा रे अन्दर गया होर तिने भी तेथी कफना रे कपड़े पईरे देखे । ⁷ होर से तोलिया जो तेसरे मुंडा किन्हें बान्हीरा था, से कपड़े साउगी नी पईरा था पर लग जे एक जगहा लपेटिरा देख्या । ⁸ तेबे दूजा चेला भी जो कबरा पर पैहले पौहंचेया था, से अन्दर गया होर तिने देखी किन्हें विस्वास कितेया । ⁹ क्यूंकि एभे तक तिन्हे पवित्र सास्त्रा री ये गल नी समझीरी थी, कि तेसरा मरीरे मंझा ले जीउंदे हूणां पक्का आ । ¹⁰ तेबे स्यों चले आपणे घरा जो वाप्स चली गये । ¹¹ पर मरीयम रोंदी बिलख्दी कबरा ले बाहर ई खड़ी रही होर से रोंदे रोंदे कबरा मंझ देखणे रे कठे झुकी । ¹² जेथी जे यीसू री ल्हास थी तेथी तेस्से दो स्वर्गदूत देखे जिन्हें चिट्टे कपड़े पैहनरे थे एकी जो सरहाणे होर दूजे

जो पैंदे बैठी रे देख्या । ¹³ तिन्हे तेस किन्हें बोल्या, हे जनाने तू किधियो रोंहां ई? तेस्से तिन्हा किन्हें बोल्या, स्यों मेरे प्रभु जो लई गये होर हांऊ नी जाणदी कि तिन्हे से केथी रखीरा । ¹⁴ ये बोली किन्हें से पीछे फीरी होर तेस्से तेथी यीसू खड़ी रा देख्या होर तेस्से से नी पैहचाणेया कि ये यीसू आ । ¹⁵ यीसूए तेस्सा किन्हें बोल्या, हे जनाने तू किधियो रोंहां ई? तू केस जो टोळ्हा ई? तेस्से तेसजो माली समझी किन्हें तेस किन्हें बोल्या, हे माहराज, अगर तू तेस जो लई गईरा ता मुंजो दसी दे कि तैं से केथी रखीरा, होर मां से लई जाणा । ¹⁶ यीसूए तेस्सा किन्हें बोल्या, मरीयम! से पीछे मुडी होर तेस्से इब्रानी भाषा मंझ बोल्या, रब्बूनी यानी हे गुरु । ¹⁷ यीसूए तेस्सा किन्हें बोल्या, मुंजो पकड़ी के नी रख क्यूंकि हांऊ हल्ली पिता वाले नी गईरा, पर पैहले मेरे भाईया वाले जाई किन्हें तिन्हा जो बोली दे, कि हांऊ आपणे पिता होर तुस्सा रे परमेसरा वाले ऊपर जाया करहा । ¹⁸ मरीयम मगदलीनीये जाई किन्हें चलेया जो दसेया, कि मैं प्रभु देख्या होर तिने मेरे किन्हें गल्ला कीती । ¹⁹ तेस ई ध्याड़े जो हफते रा पैहला ध्याड़ा था, साहन्ज के टैमा जेबे जे चले यहूदिया रे डरा रे मारे दरवाजे बंद कीतिरे थे, तेबे यीसू आया होर तिन्हारे बीचा मंझ खड़ी किन्हें तिन्हा किन्हें बोल्दा लग्या, तुस्सा जो सांति मिलो । ²⁰ होर ये बोली किन्हें तिने आपणा हाथ होर आपणी पसली तिन्हा जो दसी: तेबे चले प्रभु जो देखी किन्हें खुस हुए । ²¹ यीसूए फेरी तिन्हा किन्हें बोल्या, तुस्सा जो सांति मिलो; जिहां पिते हांऊ भेजीरा, तिहां ई हांऊ भी तुस्सा जो भेज्हा । ²² ये बोली किन्हें तिने तिन्हा पर फुकर मारी होर तिन्हा किन्हें बोल्या, पवित्र आत्मा लऊआ । ²³ जिन्हा रे पाप तुस्से माफ़ करघे तिन्हा रे कठे पाप माफ़ हुई जाणे होर जिन्हारे तुस्से रखघे, स्यों रखे रैहणे । ²⁴ पर बारा चले मंझा ले एक यानी थोमा जेस जो दिदुमुस भी बोल्ला ऐ, जेबे यीसू आया ता से तिन्हा साउगी नी था । ²⁵ जेबे होर चले तेस किन्हें बोल्दे लगे कि आस्से प्रभु देखी लईरा, तेबे तिने तिन्हा किन्हें बोल्या, जेबे तक हांऊ तेसरे हाथा मंझ मेखा रे सुराख नी देखी लैहन्गा, होर मेखा रे छेदा मंझ आपणी गुठी नी पाई लैहन्गा, तेबे तक मां विस्वास नी करणा । ²⁶ आठ ध्याड़े ले बाद तेसरे चले दबारा घरा रे अन्दर थे, होर थोमा तिन्हा साउगी था, होर दरवाजे बंद थे, तेबे यीसूए आई किन्हें तिन्हारे बीचा मंझ खड़ा हुई किन्हें बोल्या, तुस्सा जो सांति मिलो । ²⁷ तेबे तिने थोमसा किन्हें बोल्या, आपणी गुठी एथी लयाई किन्हें मेरी पसली मंझ पा होर अविश्वासी नी पर बिसवासी बण । ²⁸ ये सुणी किन्हें थोमसे जबाब दितेया, हे मेरे प्रभु, हे मेरे परमेसर ! ²⁹ यीसूए तेस किन्हें बोल्या, तैं ता मुंजो देखी किन्हें विस्वास कितेया, पर धन्य ऐ स्यों जिन्हें जे बगैर देखे विस्वास कितेया । ³⁰ यीसूए होर भी बौहत सारे चमत्कार चले रे साम्हणे दसे, जो एस कताबा

मन्झ नी लिखिरे।³¹ पर ये चिन्ह चमत्कार इधी कठे लिखे गईरे, ताकि तुस्से विस्वास करी सको, कि यीसू ई परमेसरा रा पुत्र मसीह आ: होर विस्वास करी किन्हें तेसरे नांऊआं ले जीन्दगी पाई सको।

21¹ इन्हा गल्ला ले बाद यीसुए तिन्नियासा झीला रे बाढे आपणे आपा जो चले पर जाहिर कितेया होर से एस तरीके किन्हें जाहिर हुआ।² तेथी समौन पतरस होर थोमस जेस जो दिदुमुस भी बोल्ला ऐ, होर गलीला रे काना नगरा रा नतनियेल होर जब्दी रे म्हठे, होर तेसरे चले मंझा ले दो होर जण कठे थे।³ समौन पतरसे तिन्हा किन्हें बोल्ला, हांऊ मछली पकड़दे चलीरा: तिन्हे तेस किन्हें बोल्ला, आस्से भी तेरे साउगी चल्हा ऐ: स्यों निकळी किन्हें किस्ती मंझ चढी गये, पर तेस राती तिन्हें कुछ नी पकड़ैया।⁴ होर भ्यागा ई यीसू झीला रे बाढे खहड़ैया, तेबे बी चले से नी पछ्छाणेया कि से यीसू आ।⁵ तेबे यीसुए तिन्हा किन्हें बोल्ला, हे बच्चेयो, क्या तुस्सा वाले कुछ खाणे जो आ? तिन्हे जबाब दितेया, कि नी।⁶ तिने तिन्हा किन्हें बोल्ला, किस्ती रे सीधे हाथा बखा जो जाल पाऊआ, तेबे तुस्सा जो मिलणा, तेबे तिन्हे जाल पाया, होर स्यों बौहत सारी मछिया हुणे री वजहा ले जाल नी खींजी सके।⁷ फेरी तिने चले जेस किन्हें जे यीसू प्यार करहा था तिने पतरसा किन्हें बोल्ला, ये ता प्रभु आ: समौन पतरसे ये सुणी किन्हें कि ये प्रभु आ, आपणी कमरा मन्झ तौलिया कसेया, क्यूंकि से नांगा था, होर तिने झीला मंझ छलांग लगाई।⁸ पर होर चले मछिया किन्हें भहरी रा जाल खीन्जी किन्हें ल्यान्देया, क्यूंकि स्यों झीला रे बाढे ले ज्यादा दूर नी थे स्यों लगभग दो सौ हाथा री दूरी पर थे।⁹ जेबे स्यों बाढे पूजी गये, ता तिन्हे कोएले री आग होर तेता पर मछी होर रोटी रखीरी देखी।¹⁰ यीसुए तिन्हा किन्हें बोल्ला, जो मछिया तुस्से एभे पकड़ीरी तिन्हा मंझा ले थोहड़ी मेरे वाले लई आऊआ।¹¹ समौन पतरसे किस्ती मंझ चढी किन्हें एक सौ त्रुन्जा बडी मछिया किन्हें भहरी रा जाल बाढे तक खीन्जेया, होर इतनी मछिया हुणे पर भी जाल नी फटेया।¹² यीसुए तिन्हा किन्हें बोल्ला, आऊआ खाणा खाऊआ होर चले मंझा ले केसी जो भी हिम्मत नी हुई, कि स्यों तेस ले पूछी सको, कि तू कुणहां? ¹³ यीसू आया, होर तिने रोटी लई किन्हें तिन्हा जो दीती, होर तिहां ई मछी भी दीती।¹⁴ ये त्रीजी बारी हुआ, जेबे जे यीसुए मरीरे मंझा ले जीउंदे हुणे ले

बाद चलेया जो दरसन दिते।¹⁵ खाणा खाणे ले बाद यीसुए समौन पतरसा किन्हें बोल्ला, हे समौन यूहन्ना रे म्हठे, क्या तू इन्हा सभी ले बढी किन्हें मेरे किन्हें प्यार रख्हा? तिने तेस किन्हें बोल्ला, हां प्रभु तू ता जाणहां, कि हांऊ तेरे किन्हें प्यार रख्हा: तिने तेस किन्हें बोल्ला, मेरे मेन्ने जो चरा।¹⁶ तिने फेरी दूजी बारी भी तेस किन्हें बोल्ला, हे समौन यूहन्ना रे म्हठे, क्या तू मेरे किन्हें प्यार रख्हा? तिने तेस किन्हें बोल्ला, हां प्रभु तू ता जाणहां, कि हांऊ तेरे किन्हें प्यार रख्हा: तिने तेस किन्हें बोल्ला, मेरी भेडा री रखवाळी कर।¹⁷ तिने त्रीजी बारी तेस किन्हें बोल्ला, हे समौन यूहन्ना रे म्हठे, क्या तू मेरे किन्हें प्यार रख्हा? पतरस उदास हुई गया, कि तिने तेस किन्हें त्रीजी बारी एहड़ा बोल्ला, कि क्या तू मेरे किन्हें प्यार रख्हा? होर तेस किन्हें बोल्ला, हे प्रभु तू ता सभ कुछ जाणहां, तू ये जाणहां कि हांऊ तेरे किन्हें प्यार रख्हा: यीसुए तेस किन्हें बोल्ला, मेरी भेडा जो चरा।¹⁸ हांऊ तुध किन्हें सच सच बोल्ला, जेबे तू जुआन था, ता आपणी कमर बान्ही किन्हें जेथी तू चाहां था तेथी तू जाहां था; पर जेबे तुध खपरे हूणां, ता तुध आपणे हाथ पसारणे, होर होरिया तेरी कमर बान्ही किन्हें जेथी जे तुध नी जाणा तेथी तिन्हा तू लई जाणा।¹⁹ तिने इन्हा गल्ला ले तेस जो ये दसी दितेया कि तेस केहड़ी मौत मरणे ले परमेसरा री बड़ाई करणी; होर तिने ये बोली किन्हें तेस किन्हें बोल्ला, मेरे पीछे आऊ।²⁰ पतरसे मुडी किन्हें तेस चले जो पीछे आउंदे देख्या, जेस किन्हें जे यीसू प्यार रख्हा था, होर जिने खाणा खाणे रे टैमा तेसरी छाती री तरफ झुकी किन्हें पुछेया था, कि हे प्रभु, तुजो पकड़वाणे वाळा कुणहां? ²¹ तेस जो देखी किन्हें पतरसे यीसू किन्हें बोल्ला, हे प्रभु एसरा क्या हाल हूणां? ²² यीसुए तेस जो बोल्ला, अगर हांऊ चाहूँ कि ये मेरे आऊणे तक जीउंदा रहे, ता तुजो क्या आ? तू मेरे पीछे चल।²³ ईधी कठे भाईया मंझ ये गल फैल्ही गयी, कि तेस चले नी मरणा; तेबे बी यीसुए तेस किन्हें ये नी बोल्ला, कि तेस नी मरणा, पर अगर हांऊ चाहूँ कि ये मेरे आऊणे तक जीउंदा रहे, ता तुजो क्या आ? ²⁴ ये ये ई चेला आ, जो इन्हा गल्ला री गवाही देहां होर जिने जे यों गल्ला लिखी, होर आस्से जाणहां ऐं, कि तेसरी गवाही सच्ची ई।²⁵ होर भी बौहत सारे काम ऐ, जो यीसुए कीते; अगर स्यों एक एक करी किन्हें लिखे जांदे ता हांऊ समझा आ, कि जो कताबा लिखी जांदी स्यों संसारा मंझ नी समान्दी।

प्रेरितों के काम

1¹ हे थियुफिलुस, मैं आपणी पैहली कताब तिन्हा सभ्नी गल्ला रे बारे मन्झ लिखी, जो सुरहु ले ई यीसुए किती होर करदा होर सिखांदा रैहया।² तेस ध्याड़े तक जेबे तक से तिन्हा प्रेरिता जो जिन्हारा जे तिने चुनाव कितेया था, पवित्र आत्मारे ज्रीए हुकम देई किन्हें ऊपर नी गया।³ होर तिने दुःख उठाणे ले बाद बौहत सारे पक्के सबूता देई किन्हें आपणे आपा जो तिन्हा जो जीउंदा साबित कितेया, होर चाळी ध्याड़े तक तिन्हा जो सुइदा रैहया: होर परमेसरा रे राजा री गल्ला करदा रैहया।⁴ होर तिन्हा किन्हें मिली किन्हें तिन्हा जो हुकम दितेया, कि यरुस्लेमा जो नी छाडा, पर पिता री तेस प्रतिज्ञा रे पूरा हुणे रा इन्तजार करदे रहूआ, जेसरी चरचा तुस्से मेरे ले सुणी चुकिरे।⁵ क्यूंकि यहूजे ता पाणी मन्झ बसिस्मा दितेया पर थोहड़े ध्याड़े ले बाद तुस्सा पवित्र आत्मा ले बसिस्मा पाणा।⁶ तिन्हे कठे हुई किन्हें तेस ले पुछेया, कि हे प्रभु, क्या तुध एस ई टैम इस्राएला रे राजा री स्थापना करी देणी? ⁷ तिने तिन्हा किन्हें बोल्या; समय होर काला जो जाणना, जिन्हा जो पिते आपणे ई हका मन्झ रखिरा; तुस्सा रा काम नी आ।⁸ पर जेबे पवित्र आत्मा तुस्सा पर आऊणा तेबे तुस्सा सामर्थ पाणी; होर यरुस्लेमा होर सारे यहूदिया होर सामरिया मन्झ, होर धरती रे छोरा तक तुस्सा मेरे गुआह हुणा।⁹ ये बोली किन्हें से तिन्हारे देखे देखे ऊपरा जो लई जाया गया; होर बादले से तिन्हारी हाखिया ले लकोई लया।¹⁰ जेबे से जाया करहा था ता स्यों तेस वखा जो टकटकी लगाई किन्हें देख्या करहा ऐ थे, ता देखा, दो माहणु चीटे कपड़े पैहनी किन्हें तिन्हा वाले खहड़ी गये।¹¹ होर बोल्दे लगे; हे गलीली माहणुओं, तुस्से खहड़ी किन्हें स्वर्गा वखा किधियो देख्या करहा ऐ? येही यीसू, जो तुस्सा वाले ले स्वर्गा पर ऊपरा जो लई जाया गया, जिहां तुस्से से स्वर्गा जो जांदे देख्या तिहां ई तेस दबारा आऊणा।¹² तेबे स्यों जैतूना नांऊआं रे पाहडा ले जो यरुस्लेमा रे नेडे एक सब्ता रे ध्याड़े री दूरी पर आ, यरुस्लेमा जो वाप्स चली गये।¹³ होर जेबे तेथी पूजे ता स्यों तेस ऊपरी कोठरी पर गये, जेथी पतरस होर यहूना होर याकूब होर अन्द्रियास होर फिलुप्पुस होर थोमा होर बरतुलमाई होर मत्ती होर हल्फई रा म्हठा याकूब होर समौन जेलोतेस होर याकूबा रा म्हठा यहूदा रैंहें थे।¹⁴ ये सब कई जनानिया होर यीसू री माऊ मरियम होर तेसरे भाईया साउगी एक मन हुई किन्हें प्रार्थना मन्झ लगी रैहे।¹⁵ होर तिन्हा ध्याड़े पतरस भाईया रे बीचा मन्झ जेथी लगभग एक सौ बीह लोक कठे थे, खहड़ी किन्हें बोल्दा लग्या।¹⁶ हे भाईयो, जरूरी था कि पवित्र साख्रा रा से

लेख पूरा हुई जाए, जो पवित्र आत्मे दाऊदा रे मुहां ले यहूदा रे बारे मन्झ जो यीसू जो पकड़वाणे वाळे रा नेता था पैहले ले ई बोलिरा था।¹⁷ क्यूंकि से ता आस्सा मन्झ गिणेया गया, होर एस सेउआ मन्झ सैहभागी हुएया।¹⁸ (तिने पापा री कमाई ले एक खेत खरदी लया; होर मुंडा रे भारे पया, होर तेसरा पेट फटी गया, होर तेसरी सब आंतड़ीया बाहर निकळी गयी।¹⁹ होर एस गल्ला जो यरुस्लेमा रे सब रैहणे वाळे जाणी गये, एथी तक कि तेस खेता रा नांऊ तिन्हारी भाषा मन्झ हकलदमा मतलब खुना रा खेत पई गया।)²⁰ क्यूंकि भजन संहिता मन्झ लिखीरा, कि तेसरा घर उजड़ी जाए, होर तेसरी जगहा होर कोई लई ले।²¹ इधी कठे जितने ध्याड़े तक प्रभु यीसू आस्सा साउगी आऊन्दा जांदा रैहया, मतलब यहूना बसिस्मा देणे वाळे ले लई किन्हें तेसरे आस्सा वाले ले उठाए जाणे तक, जो लोक बराबर आस्सा साउगी रैहे, तिन्हा मन्झा ले एकी जो चुणेया जाए।²² यानि तेस टैमा ले लई किन्हें जेभे ले यहूजे लोका जो बसिस्मा देणा सुरहु कितेया था होर जेबे तक यीसू जो आसा वाले ले ऊपर नी लई जाया गया, इन्हा लोका मन्झा ले कोई एक आस्सा साउगी यीसू रे जीउंदे हुणे रा गुआह बणी जाए।²³ तेबे तिन्हे दो माहणु खड़े किते, एक युसुफ, जेस जो जे बर सबा बोलहा ऐ, (जेसरा उपनाम युस्तुस आ), होर दूजा मत्तियाह।²⁴ होर ये बोली किन्हें प्रार्थना किती; कि हे प्रभु, तू ता सभ्नी रे मना जो जाणहां, ये दसी दे कि इन्हा दुंही मन्झा ले तें कुण चुणेया।²⁵ कि एस सेउआ होर प्रेरिता री जगहा लई ले जेस जो जे यहूदा छाडी किन्हें आपणी जगहा जो चली गईरा।²⁶ तेबे तिन्हे तिन्हा रे बारे मन्झ चिठिया पाई, होर चिठी मत्तियाहा रे नांऊआं पर निकळी, इधी कठे से तिन्हा ग्यारा प्रेरिता साउगी गिणेया गया।

2¹ जेबे पिन्तेकुस्ता रा ध्याड़ा आया, ता स्यों सभ एक जगहा कठे थे।² होर अचानक सर्गा ले बड़ी आंधी साहीं सणसणाहट हुई, होर तेता ले सारा घर जेथी स्यों बैठी रे थे गूंजी गया।³ होर तिन्हा जो आगी साहीं जीभा फटदी हुई सूझी; होर तिन्हा मन्झा ले हर एकी पर आई गयी।⁴ होर स्यों सभ पवित्र आत्मा किन्हें भहरी गये, होर जिहां आत्मे तिन्हा जो बोलणे री सामर्थ दिती, स्यों दूजी दूजी भाषा मन्झ बोल्दे लगे।⁵ होर सर्गा ले हेठ हर एक जाति मन्झा ले भक्त यहूदी यरुस्लेमा मन्झ रैंहयां ऐं थे।⁶ जेबे से अवाज हुई ता भीड़ लगी गई होर लोक डरी गये, क्यूंकि हर एकी जो येही सुणहां था, कि ये मेरी ई भाषा मन्झ बोल्या करहा।⁷ होर स्यों सभ हरान हुई किन्हें बोल्दे

लगे; देखा, ये जो बोल्या करहा ऐ क्या ये सभ गलीली नी ऐ? 8 ता फेरी आसा मंझा ले हर एक आपणी आपणी मात्र भाषा मन्झ तिन्हा जो बोल्दे हुए कींहा सुणेया करहा ऐ। 9 आस्से जेहडे पारथी होर मेददी होर एलामी लोक होर मैसोपोटामिया होर यहूदिया होर कप्पुदुकिया होर पुन्तुस होर आसिया। 10 होर फ्रुगिया होर पमफुलिया होर मिसर होर लिबुआ देस जो कुरेना रे नेडे ऐ, इन्हा सभ देसा रे रैहणे वाळे होर रोमी होर जन्मजात यहूदी होर यहूदी धर्म मनणे वाळे, क्रेती होर अरबी भी है। 11 पर आपणी आपणी भाषा मन्झ तिन्हा ले परमेसरा रे बडे बडे कामा री चरचा सुणहां ऐं। 12 होर स्यों सभ हरान हुई गये, होर डरी किन्हें एक दूजे किन्हें बोल्दे लगे कि ये क्या हुएया करहा? 13 पर होरिए मजाक करदे हुए बोल्या, कि स्यों ता नंऊऐं सराबा रे नसे मन्झ चूर ऐ। 14 पतरस तिन्हा ग्यारा साउगी खडा हुएया होर जोरा जोरा किन्हें बोल्दा लग्या, कि हे यहूदियो, होर हे यरुस्लेमा मन्झ रैहणे वाळ्यो, ये जाणी लऊआ होर कान लगाई किन्हें मेरी गल्ला सुणा। 15 जेहडा तुस्से सम्झेया करहा ऐ, ये नसे मन्झ नी ऐ, क्यूंकि हली ता भ्यागा रे नौ बजी रे। 16 पर ये से गल ई, जो योएल नबी रे ज्रीए बोली गईरी 17 कि परमेसर बोल्हा, कि आखरी ध्याडे मन्झ ऐहडा हुणा, कि मां आपणा आत्मा सभ माहणुआं पर दलणा होर तुस्सा रे म्हटे होर म्हठिया भविष्यवाणी करणी होर तुस्सा रे जुआना दर्सन देखणे, होर तुस्सा रे स्याणेया सपने देखणे। 18 पर मां आपणे दासा होर दासिया पर भी तिन्हा ध्याडे मन्झ आपणी आत्मा मंझा ले दलणा, होर तिन्हा भविष्यवाणी करणी। 19 होर मां ऊपर सर्गा मन्झ नौखे काम, होर धरती पर चिन्ह, मतलब खून होर आग होर धुएँ रा बादल दसणा। 20 प्रभु रे बडे होर खास ध्याडे रे आऊणे ले पैहले सुरजा न्हयारा होर चांदनीयां खूना साहीं हुई जाणा। 21 होर जेस केसी प्रभु रा नांऊ लैणा, तेसरा ई उद्धार हुणा। 22 हे इस्राएला रे लोको, इन्हा वचना जो सुणा: कि यीसू नासरी नांऊआं रा एक माहणु था। जेस जो परमेसरे सामर्था रे काम, नौखे काम होर चिहना ले, जो तिने तेसरे ज्रीए तुस्सा रे साम्हणे किते, तुस्सा पर प्रगट किते, हालांकि तुस्से आपु जाणहां ऐं। 23 ये ई माहणु, जेबे से परमेसरा री पैहले री बणाई री योजना होर परमेसरा रे पैहले रे ज्ञाना रे मुताबक पकड़वाया गया, ता तुस्से से पापिया रे हाथा ले तेस जो कूसा पर चढाई किन्हें मारी दितेया। 24 पर तेस जो परमेसरे मौता रे बंधना ले छुडाई किन्हें जिन्दा कितेया: क्यूंकि ये अनहोना था कि से तेसरे बसा मन्झ रैहन्दा। 25 क्यूंकि दाऊद तेसरे बारे मन्झ बोल्हा, कि मैं प्रभु जो हमेसा आपणे साम्हणे देख्दा रैहया क्यूंकि से मेरी दाई तरफ आ, ताकि हांऊ पई नी जाऊं। 26 इधी कठे मेरा दिल खुस था, होर मेरी जीभ मग्न हुई; बल्कि मेरे जिस्मा भी आस लगाई किन्हें जीणा। 27 क्यूंकि तुध मेरे प्राण पताळा

मन्झ नी छाडणे; होर ना आपणे पवित्र माहणु जो सड़ने देणा। 28 तैं मुंजो जीणे रा रस्ता दस्सेया; तुध आपणे दर्शना रे ज्रीए हांऊ खुसी किन्हें भरी देणा। 29 हे भाईयो, हांऊतेस कुलपति दाऊदा रे बारे मन्झ तुस्सा किन्हें खुल्ही किन्हें बोली सकहा कि से ता मरी गया होर तेसरी कबर आज तक आस्सा वाले मौजूद ई। 30 नबी हुणे रे नाते होर ये जाणी किन्हें कि परमेसरे मेरे किन्हें वाहदा कितिरा, कि परमेसरे मेरे किन्हें वाचा बान्हीरी, कि मां तेरे बंसा मंझा ले एक आदमी तेरी राजगद्दी पर बठ्याणा। 31 इधी कठे तिने ये देखि किन्हें पैहले ई मसीह यीसू रे जीदे हुणे रे बारे मन्झ भविष्यवाणी किती कि तेसरा प्राण अधोलोका मन्झ नी रखेया जाणाहोर ना ही तेसरा जिस्म सड़णा। 32 एस यीसू जो परमेसरे जीउंदा करी दितेया, जेसरे आस्से गुआह ऐ। 33 इहां ई परमेसरा रे हाथा ले सभी ले बडी जगहा पाई किन्हें, यीसुए परमपिता ले वायदे रे मुताबक पवित्र आत्मा पाई होर फेरी तिने एस आत्मा जो दली दितेया, जेस जो तुस्से एबे देख्या करहा ऐ होर सुणेया करहा ऐ। 34 क्यूंकि दाऊद ता स्वर्गा जो नी गया; पर से आपु बोल्हा, कि प्रभुए मेरे प्रभु किन्हें बोल्हा। 35 मेरी दाहिनी तरफ बैठ, जब तक कि हांऊ तेरे दुसमना जो तेरे पैरा हेठ नी करी दूँ। 36 इधी कठे एबे इस्राईला रा सारा घराना पक्का ये जाणी ले कि परमेसरे तेस यीसू जो जेस जो तुस्से कूसा पर चढाया, से प्रभु होर मसीह था। 37 तेबे सुणनेवाले रे दिल छिदी गये, होर स्यों पतरसा किन्हें होर बाकि प्रेरिता ले पुछ्दे लगे, कि हे भाईयो, आस्से क्या करिए? 38 पतरसे तिन्हा किन्हें बोल्हा, मन बदला, होर तुस्सा मंझा ले हर एक आपणे आपणे पापा री माफ़ी रे कठे यीसू मसीहा रे नांऊआं ले बसिस्मा लेया; ता तुस्सा पवित्र आत्मा रा दान पाणा। 39 क्यूंकि ये वाहदा तुस्सा, होर तुस्सा रे बाल बच्चे, होर तिन्हा सभ दूरा दूरा रे लोका रे कठे भी आ जिन्हा जो प्रभु आस्सा रे परमेसरा आपणे वाले सादणा। 40 तिने बौहत होर गल्ला मन्झ भी गुआही देई देई किन्हें समझाया कि आपणे आपा जो एसा टेढी जाति ले बचाऊआ। 41 तेबे तिन्हे तेसरा वचन मन्जेया तिन्हे बसिस्मा लया; होर तेस ई ध्याडे लगभग तीन झार माहणु तिन्हा मन्झ मिली गये। 42 होर स्यों प्रेरिता ले शिक्षा पाणे, होर सत्संग करणे, होर रोटी तोड़ने होर प्रार्थना करणे मन्झ व्यस्त रहे। 43 होर सभी लोका पर बड़ा भारी डर छाई गया, होर बौहत नौखे काम होर चिन्ह चमत्कार प्रेरिता रे ज्रीए प्रगट हुंहा ऐ थे। 44 होर स्यों सभ विस्वास करणे वाळे कठे रैहें थे, होर तिन्हारी सभ चीजा बांडा री थी। 45 होर स्यों आपणी जायदाद होर समान बेची बेची किन्हें जेहडी जेसरी जरुरत हुंहा ई थी बांडी देहां ऐं थे। 46 होर स्यों हर रोज एक मन हुई किन्हें मंदरा मन्झ कठे हुंहा ऐ थे, होर घरा घरा जाई किन्हें रोटी तोड़दे हुए खुसी झांदे होर एक मन हुई किन्हें खाणा खाहें थे। 47 होर परमेसरा

री जै जै कार करहा ऐ थे, होर सभ लोक तिन्हा ले बड़े खुस थे: होर जो उद्धार पाहें थे, प्रभु तिन्हा जो हर रोज तिन्हा मन्झ मिललाई देहां था।

3 ¹ पतरस होर यहुन्ना त्रीजे पैहर प्रार्थना रे टैमा मंदरा मन्झ जाया करहा ऐ थे। ² होर लोक एक जन्मजात लंगड़े जो लई जाया करहा ऐ थे, जेस जो स्यों हर रोज तेस फाटका वाले जेस जो सुन्दर बोल्ला ऐ, बठ्याली देहां ऐं थे। ³ जेबे तिने पतरस होर यहुन्ना जो मंदरा मन्झ जांदे देख्या, ता तिन्हा ले भीख मांगी। ⁴ पतरसे यहुन्ना साउगी तेस वखा ध्याना किन्हें देखी किन्हें बोल्ला, आस्सा वखा देख। ⁵ होर से कुछ पाणे री आस रखी किन्हें तिन्हा वखा जो देखदा लग्या। ⁶ तेबे पतरसे बोल्ला, चांदी होर सोना ता मेरे वाले नी आ; पर जो मेरे वाले आ, से हांऊ तुजो देहां आ; यीसू नांऊआं ले चलदा लग। ⁷ होर तिने तेसरा दाय्या हाथ पकड़ी किन्हें से खड़ा कितेया: होर झटपट तेसरे जाहंडू मन्झ ताकत आई गयी। ⁸ होर से उछली किन्हें खड़ा हुई गया, होर चलदा फिरदा लग्या उछल कूद करी किन्हें परमेसरा री जै जै कार करदा हुएया तिन्हा साउगी मंदरा मन्झ गया। ⁹ सभ लोके तेस जो चलदे फिरदे देखी किन्हें होर परमेसरा री जै जै कार करदे हुए देखी किन्हें। ¹⁰ तेस जो पैहचाणी लया कि ये से ई आ, जो मंदरा रे सुन्दर फाटका पर बैठी किन्हें भीख मांग्हा था; होर तेस घटना ले जो तेस साउगी घटी री थी; स्यों बौहत अचम्भा हुएया होर हरान हुए। ¹¹ से आदमी हली पतरस होर यहुन्ना साउगी था, ता सभ लोक बौहत हरान हुई किन्हें तेस जगहा दौड़ी दौड़ी किन्हें तेस वाले आये जेस जो जे सुलेमाना री डेहळी बोल्ला ऐ। ¹² ये देखी किन्हें पतरसे लोका किन्हें बोल्ला; हे इस्त्राएलियो, तुस्से एस माहणु जो देखी किन्हें किधियो हरान ऐ, होर आस्सा वखा जो इहां किधियो देख्या करहा ऐ, कि आस्से आपणी ई सक्ति या भक्ति किन्हें एस जो चलदा फिरदा करी दितेया। ¹³ अब्राहम होर इसहाक होर याकूबा रे परमेसरे, आस्सा रे बाबदादे रे परमेसरे आपणे दास यीसू री जै जै कार किती, जेस जो तुस्से पकड़वाई दितेया, होर जेबे पिलातुसे तेस जो छाड़णे रा विचार कितेया, तेबे तुस्से तेसरे साम्हणे तेसरा इनकार कितेया। ¹⁴ तुस्से तेस पवित्र होर धर्मी रा इनकार कितेया, होर अरज किती कि, एक खुनी जो तुस्सा रे कठे छाडी दे। ¹⁵ होर तुस्से जीन्दगी रा रस्ता दसणे वाले जो मारी दितेया, जेस जो परमेसरे मरीरे मंझा ले जीउंदा कितेया; होर एस गल्ला रे आस्से गुआह ऐ। ¹⁶ क्यूंकि आस्से यीसू रे नांऊआं मन्झ विस्वास करहा ऐ इधी कठे ये तेसरा नांऊ ई आ जिने जे एस आदमी मन्झ जान पाई जेस जो तुस्से देख्या करहा ऐ होर जाणहां ऐं; होर तेस ई विस्वासा ले जो यीसू ले मिल्ला आ, एस आदमी जो तुस्सा सभ री साम्हणे बिल्कुल ठीक करी दितेया। ¹⁷ होर हे भाईयो, एबे, हांऊ जाणहां कि ये काम

तुस्से नासमझी किन्हें कितेया, होर तेहड़ा ई तुस्सा रे सरदार भी कितेया। ¹⁸ पर जिन्हा गल्ला जो परमेसरे सभ नबीया रे मुंहा ले पैहले ई दसी दितिरा था, कि तेसरे मसीहा दुःख ऊठाणा; तिने एस तरीके किन्हें ये पूरा कितेया। ¹⁹ इधी कठे तुस्से आपणे मन फिराऊआ होर परमेसरा वखा जो वाप्स आऊआ ताकि तुस्सा रे पाप धोई जाए; ताकि प्रभु री हाजरी मन्झ सुख चैना रे ध्याड़े आए। ²⁰ होर से तेस मसीह यीसू जो भेजी सके जेस जो तुस्सा रे कठे पैहले ले ई चुणिरा। ²¹ जरूरी आ कि से स्वर्गा मन्झ तेस टेमा तक रैहे जेबे तक कि से सभ गल्ला रा सुधार नी करी ले जेसरी चर्चा परमेसरे आपणे पवित्र नबिया रे मुहां ले कितिरी, जो संसारा री शुरुआता ले हुंदे आईरे। ²² जेहड़ा मुसे बोल्ला, प्रभु परमेसरा तुस्सा रे भाईया मंझा ले तुस्सा रे कठे मेरे साहीं एक नबी खड़ा करणा, जो कुछ से तुस्सा किन्हें बोले, तेसरी सुणना। ²³ होर जो कोई माहणु जो तेस नबी री नी सुणे, लोका मंझा ले नास कितेया जाणा। ²⁴ होर समुएला ले लई किन्हें तेसले बाद जितने नबी आए तिन्हे सभिए जेबे बी कुछ बोल्ला तिन्हे इन्हा ध्याड़े रे बारे मन्झ घोसणा किती। ²⁵ तुस्से नबी री सन्तान होर तेस वाचा रे भागीदार ऐ, जो परमेसरे तुस्सा रे बाबदादे साउगी बान्ही, जेबे तिने अब्राहमा किन्हें बोल्ला, कि तेरे बंसा रे ज़ीए धरती रे सारे कुला आसिरवाद पाणा। ²⁶ परमेसरे आपणे दासा जो जीउंदा करी किन्हें पैहले तुस्सा वाले भेज्या, कि तुस्सा मंझा ले हर एकी जो तुस्सा री बुराईया ले फेरी किन्हें आसिरवाद दे।

4 ¹ जेबे स्यों लोका किन्हें ये बोल्ला करहा ऐ थे, ता याजका होर मंदरा रे मुखिए होर सदुकी तिन्हा वाले आए। ² क्यूंकि स्यों बौहत गुस्से हुई गये क्यूंकि स्यों लोका जो स्वाहें थे होर यीसू रा उधारण देई किन्हें मरीरे मंझा ले जी उठणे रा प्रचार करहा ऐ थे। ³ होर तिन्हे स्यों पकड़ी किन्हें दूजे ध्याड़े तक हवालाता मन्झ रखे क्यूंकि साहन्ज हुई गयीरी थी। ⁴ पर वचना रे सुणने वाळे मंझा ले बौहतीऐ विस्वास कितेया, होर तिन्हारी गिणती लगभग पांज झार मारधा रे बराबर हुई गयी री थी। ⁵ दूजे ध्याड़े एहड़ा हुएया कि तिन्हारे मुखीऐ होर पुरनिये होर साखी। ⁶ होर माहयाजक हन्ना होर कैफा होर यहुन्ना होर सिकंदर होर जितने माहयाजका रे घराने रे थे, सभ यरुस्लेमा मन्झ कठे हुए गये। ⁷ होर तिन्हा जो बिचा मन्झ खड़ा करी किन्हें पुछदे लगे, कि तुस्से ये काम केस री सक्ति या केसरे नांऊआं ले कितेया? ⁸ तेबे पतरसे पवित्र आत्मा ले भहरी किन्हें तिन्हा किन्हें बोल्ला, हे लोका रे मुखियो होर पुरनियो ⁹ अगर आज आस्सा ले एक लंगड़े आदमी साउगी कितिरी भलाई रे बारे मन्झ ये पूछताछ किती जाया करहा ई, कि खरा किहां हुई गया। ¹⁰ ता तुस्से सभ होर सारे इस्त्राएली लोक जाणी ले कि यीसू मसीह नासरी रे नांऊआं जेस जो तुस्से कूसा पर चढ़ाया,

होर परमेसरे मरीरे मंझा ले जीउंदा कितेया, होर ये माहणु तुस्सा साम्हणे भला चंगा खहड़ी रा।¹¹ ये से ई पाथर आ जेस जो तुस्से मिस्त्रिए बेकार जाणेया होर से कुण रे खास पाथर बणी गया।¹² होर केसी दूजे रे ज्रीए मुक्ति नी हाई; क्यूंकि स्वर्गा हेठ माहणु मन्झ होर कोई दूजा नांऊ नी दितिरा, जेस रे ज्रीए आस्से मुक्ति पाई सकीए।¹³ जेबे तिन्हे पतरस होर यहूना री हिम्मत देखी, होर ये जाणेया कि ये न्पहड होर आम आदमी आ, ता तिन्हा जो हरानी हुई; फेरी स्यों पैहचाणी गये, कि ये यीसू साउगी रही चुकी रे लोक ऐ।¹⁴ होर तेस माहणु जो जेहड़ा खरा हुई गयीरा था, तिन्हा साउगी खहड़ी रा देखी किन्हें, स्यों ब्रोधा मन्झ कुछ नी बोली सके।¹⁵ पर तिन्हा जो सभा ले बाहर जाणे रा हुकम देई किन्हें, स्यों आपु मन्झ विचार करदे लगे¹⁶ कि आस्से इन्हा माहणुआं साउगी क्या करिए? क्यूंकि यरुस्लेमा रे सभ रैहणे वाळेया पर ये जाहिर आ, कि इन्हा रे ज्रीए एक मसहुर चमत्कार दसिरा आ; होर आस्से तेता ले मुंह नी मोड़ी सकदे।¹⁷ पर इधी कठे कि ये गल लोका मन्झ होर ज्यादा फैहली नी जाए, आऊआ आस्से तिन्हा जो धमकी देईए कि स्यों एस नांऊआं ले फेरी केसी माहणु किन्हें गल ना करे।¹⁸ तेबे तिन्हे से सादेया होर चिताई किन्हें ये बोल्या, कि यीसू रे नांऊआं ले फेरी कुछ नी बोलणा होर ना सखाळणा।¹⁹ पर पतरस होर यहूने तिन्हा जो जबाब दितेया, कि तुस्से ई फैसला करा, कि क्या ये परमेसरा रे साम्हणे खरा आ, कि आस्से परमेसरा री गल छाडी किन्हें तुस्सा री गल मने।²⁰ क्यूंकि ये ता आस्सा ले नी हुई सकदा, कि जो आस्से देख्या होर सुणेया, से ना बोले।²¹ तेबे तिन्हे तिन्हा जो धमकाई किन्हें छाडी दितेया, क्यूंकि लोका री वजहा ले तिन्हा जो सजा देणे रा कोई कारण नी मिलेया, इधी कठे कि जो घटना हुई री थी तेता री वजहा ले सभ लोक परमेसरा री जै जै कार करहा ऐ थे।²² क्यूंकि से माहणु, जेस माहणु पर ये ठीक करणे रा चमत्कार कितेया गया था, तेसरी उमर चाळी साला ले ऊपर थी।²³ स्यों छुटी किन्हें आपणे साथिया वाले आई गये, होर जो कुछ माहयाजका होर पुरनिये तिन्हा किन्हें बोल्या था, तिन्हा जो सुणाई दितेया।²⁴ ये सुणी किन्हें, तिन्हे एक मन हुई किन्हें चिल्लाई किन्हें परमेसरा किन्हें बोल्या, हे स्वामी, तू से ई आ जिने स्वर्ग होर धरती होर द्रयाऊ होर जो कुछ तिन्हा मंझ आ बणाया।²⁵ तें पवित्र आत्मा रे ज्रीए आपणे दास आस्सा रे पिता दाऊदा रे मुंहा ले बोल्या, कि अन्य जातिये हुल्लड़ किधियो मचाई रा? होर देसा रे लोके बेकार गल्ला किधियो सोची लई री? ²⁶ प्रभु होर तेसरे मसीह रे ब्रोधा मन्झ धरती रे राजा खहड़ी गये, होर हाकम एक साउगी कठे हुए।²⁷ क्यूंकि सच गल ये ई कि तेरे दास यीसू रे ब्रोधा मन्झ, जेस रा तें अभिषेक कितेया, होरेदेस होर पुन्तियुस पिलातुस भी दूजी जातिया होर इस्राएलिया साउगी

एस नगरा मन्झ कठे हुए।²⁸ स्यों कठे हुए ताकि तेरी सक्ति होर इच्छा रे मुताबक जो कुछ पैहले ले ई पक्का हुई चुकीरा था, से पूरा हो।²⁹ एबे, हे प्रभु, तिन्हारी धमकिया जो देख; होर आपणे दासा जो ये बरदान दे, कि तेरा वचन न्डरे सुणाई सके।³⁰ होर चंगा करने रे कठे तू आपणा हाथ अगे कर; कि चमत्कार होर नौखे काम तेरे पवित्र दास यीसू रे नांऊआं ले किते जाए।³¹ जेबे स्यों प्रार्थना करी बैठे, ता से जगहा जेथी स्यों कठे हुई रे थे हिल्ली गया, होर स्यों सभ पवित्र आत्मा किन्हें भहरी गये, होर परमेसरा रा वचन न्डरे सुणान्दे रैहे।³² होर विस्वास करणे वाळेया री मण्डली एक चित होर एक मना रे थे एथी तक कि कोई भी आपणी सम्पति आपणी नी बोलदा था, पर सभ चीजा तिन्हा वाले बांडा री थी।³³ होर प्रेरित बडी सामर्था किन्हें प्रभु यीसू रे जी उठणे री गुआही देंदे रैहे होर तिन्हा सभ पर बडी दया थी।³⁴ होर तिन्हा मन्झ कोई गरीब नी था, क्यूंकि जिन्हा वाले जमीन या घर थे, स्यों तिन्हा जो बेची किन्हें, बेची री चीजा री कीमत ल्याई किन्हें प्रेरिता रे पैरा पर रखी देहां ऐं थे।³⁵ होर जितनी जेस जो जरूरत हुंहा ई थी, तेता रे मुताबक हर एकी जो बांडी देहां ऐं थे।³⁶ होर युसूफ नांऊआं रा कुप्रसा मन्झ जम्मिरा एक लेवी था जेसरा नांऊ प्रेरिते बर-नबा मतलब (सांति रा म्हठा) रख्या था।³⁷ तेसरी कुछ जमीन थी, जो तिने बेची, होर ढब्बे लई किन्हें प्रेरिता रे पैरा पर रखी दिते।

5 ¹ होर हनन्याह नांऊआं रे एक माहणुऐं, होर तेसरी लाडी सफीरे कुछ जमीन बेची।² होर तेस्सा जमीना री कीमता मंझा ले तिने कुछ हिस्सा आपणे कठे रखी छाडेया; होर ये गल तेसरी लाडी भी जाणहां ई थी, होर तिने तेता रा एक हिस्सा लई किन्हें प्रेरिता रे पैरा पर रखी दितेया।³ पर पतरसे बोल्या; हे हनन्याह! सैताने तेरे मना मन्झ ये गल किधियो पाई कि तू पवित्र आत्मा किन्हें झूठ बोले, होर जमीना री कीमता मंझा ले कुछ रखी छाडे? ⁴ लगभग तीन घंटे ले बाद जो कुछ हुईरा था तेता ले बेखबर हुई किन्हें, तेसरी लाडी अन्दर आई।⁵ ये गल्ला सुणदे ही हनन्याह पई गया, होर तिने प्राण छाडी दिते; होर सभ सुणने वाळे पर बडा भारी डर छाई गया।⁶ फेरी जुआन माहणुऐ उठी किन्हे तेसरी अर्थी बणाई होर बाहार लई जाई किन्हें दबाई दितेया ⁷ तेबे पतरसे तेस किन्हें बोल्या; मुंजो दस क्या तुस्से से जमीन इतने मन्झ ई बेची री थी? तेस्से बोल्या; हाँ, इतने मन्झ ई।⁸ तेबे पतरसे तेस किन्हें बोल्या; मुंजो दस क्या तुस्से से जमीन इतने मन्झ ई बेची री थी? तेस्से बोल्या; हाँ, इतने मन्झ ई।⁹ पतरसे तेस्सा किन्हें बोल्या; ये क्या गल ई, कि तुस्से दुहीं ऐ प्रभु री आत्मा री परखणी रे कठे एका करी लईरा? देख, तेरे लाडे जो दबाणे वाळे दरवाजे वाले ई खहड़ी रे ऐ, होर तू भी बाहर लई जाणी।¹⁰ तेबे से तेभे ई तेसरे पैरा पर पई गई, होर प्राण छाडी दिते होर जुआने अन्दर आई किन्हें

तेस्सा जो मरीरे पाया, होर बाहर लई जाई किन्हें तेस्सा जो तेस्सा रे लाड़े वाले दबाई दितेया।¹¹ होर सारी कलीसिया पर होर इन्हा गल्ला रे सभ सुणने वाळे पर, बड़ा डर छाई गया।¹² होर प्रेरिता रे हाथा ले बौहत चमत्कार होर नौखे काम लोका मन्झ दस्सेया जाहें थे, होर स्यों सभ एक मन हुई किन्हें सुलेमाना रे ओटे मन्झ कठे हूहां ऐं थे।¹³ पर होरी मंझा ले केसी जो ये हिम्मत नी हुई कि तिन्हा मन्झ सामिल हुई जाए; तेबे भी लोक तिन्हा री बड़ाई करहा ऐं थे।¹⁴ होर विस्वास करणेवाळे बौहत मर्ध होर जनाने प्रभु री कलीसिया मन्झ होर भी ज्यादा आई किन्हें मिलदे रैहे।¹⁵ एथी तक कि लोक बमारा जो सड़का पर ल्याई ल्याई किन्हें, मांजे होर बिस्तरे पर लट्ठ्याई देहां ऐं थे, कि जेबे पतरस आये, ता तेसरी छाया ई तिन्हा मंझा ले केसी एकी पर पई जाए।¹⁶ होर यरुस्लेमा रे ओरले परले नगरा ले भी बौहत लोक बमारा होर असुद्ध आत्मा रे स्तार्रे लोका जो ल्याई ल्याई किन्हें, कठे हूहां ऐं थे, होर सभ ठीक करी दिते जाहें थे।¹⁷ तेबे माह याजक होर तेसरे सभ साथी जो स्टुकिया रे पन्था रे थे, डाहा किन्हें भहरी गये।¹⁸ होर प्रेरिता जो पकड़ी किन्हें जेहला मन्झ बंद करी दितेया।¹⁹ पर राती प्रभु रे एकी स्वर्गदूते जेहला रे दरवाजे खोहली किन्हें तिन्हा जो बाहर ल्याई किन्हें बोल्या।²⁰ जाऊआ, मंदरा मन्झ खहड़ी किन्हें, एस्सा जिन्दगी रे बारे मन्झ सभ गल्ला लोका जो सुणाऊआ।²¹ स्यों ये सुणी किन्हें भ्याग हुंदे ई मंदरा मन्झ जाई किन्हें उपदेस देंदे लगे; पर माहयाजक होर तेसरे साथी आई किन्हें माहसभा जो होर इस्राएला रे सभ पुरनिये कठे किते, फेरी तिन्हे जेहला ले प्रेरिता जो बुलाऊआ भेज्या।²² पर जेबे साहब जेहला मन्झ पूजे ता तेथी तिन्हा जो प्रेरित नी मिले, होर तिन्हे वाप्स आई किन्हें एता री खबर दिती होर²³ बोल्या, आस्सा जो जेहला री निगरानी रे कठे ताळे लगीरे मिले होर दरवाजे वाले चौकीदार खहड़ी रे मिले थे पर जेबे आस्से दरवाजे खोहले ता आस्सा जो भीतर कोई नी मिलेया।²⁴ जेबे मंदरा रे मुखिए होर माहयाजके ये गल्ला सुणी, ता तिन्हा रे बारे मन्झ बड़ी भारी चिंता मन्झ पई गए कि एबे क्या हुणा? ²⁵ इतने मन्झ केसी ऐं आई किन्हें तिन्हा जो दस्या, कि देखा, जिन्हा जो तुस्से जेहला मन्झ बंद करी रखिरा था, स्यों माहणु मंदरा मन्झ खहड़ी रे लोका जो उपदेस देआ करहा ऐं।²⁶ तेबे मुखिए, अधिकारिया साउगी जाई किन्हें, तिन्हा जो बगैर जबरदस्ती लई आये, क्यूंकि स्यों लोका ले डरहा ऐं थे, कि स्यों आस्सा जो पत्थरवाह नी करे।²⁷ तिन्हे तिन्हा जो दबारा ल्याई किन्हें माहसभा रे साम्हणे खड़ा करी दितेया। होर माहयाजके तिन्हा ले पुछेया।²⁸ क्या आस्से तुस्सा जो खबरदार करी किन्हें हुकम नी दितेया था, कि तुस्से एस नांऊआं ले उपदेस नी देणा? तेबे बी देखा, तुस्से सारे यरुस्लेमा जो आपणे उपदेसा किन्हें भरी दितेया, होर तेस आदमी रा खून आस्सा री कियाडी

पर लादणा चाहें।²⁹ पर पतरसे होर प्रेरिते जबाब दितेया, कि माहणुआं रे हुकमा ले बड़ी किन्हें परमेसरा रे हुकमा रा पालन करणा चाहिए।³⁰ आस्सा रे बाबदादे रे परमेसरे यीसू जो जीऊंदा कितेया, जेस जो तुस्से कूसा पर लटकाई किन्हें मारी दितेया था।³¹ तेस जो ई परमेसरे आपणे दायें हाथा ले बौहत महान करी किन्हें प्रभु होर उद्धारकर्ता ठैहराया कि इस्राएला जो पश्चाताप होर पापा री माफी दे।³² होर आस्से इन्हा गल्ला रे गुआह ऐं, होर पवित्र आत्मा भी, जेस जो परमेसरे तिन्हा जो दितीरा, जो तेसरा हुकम मन्हां ऐं।³³ ये सुणी किन्हें स्यों जहळी गये, होर तिन्हा जो मारणा चाहेया।³⁴ पर गमलीएल नांऊआं रा एक फरीसी जो व्यवस्थापक होर सभ लोका मन्झ आदरणीय था, अदालता मन्झ खड़े हुई किन्हें प्रेरिता जो थोड़ी देरा रे कठे बहार लई जाणे रा हुकम दितेया।³⁵ तेबे तिने बोल्या, हे इस्राएलियो, जो कुछ इन्हा माहणुआं किन्हें करणा चाहें, सोची समझी किन्हें करणा।³⁶ क्यूंकि इन्हा ध्याड़े ले पैहले थिऊदास ये बोल्दा हुएया उठेया, कि हांऊ भी कुछ आ; होर कोई चार सौ माहणु तेस साउगी हुई गये, पर से मारेया गया; होर जितने लोक तेस जो मन्हां ऐं थे, सभ तितर बितर हुई गये होर मिटी गये।³⁷ तेता ले बाद जनगणना रे टैम गलीला रा रैहणे वाळा यहूदा प्रगट हुएया, तिने भी कुछ लोक आपणे वखा करी लये: से भी मारेया गया, होर जितने लोक तेस जो मन्हां ऐं थे, सभ तितर बितर हुई गये।³⁸ इधी कठे हांऊ एभे तुस्सा किन्हें बोल्हा, इन्हा माहणुआं ले दूर ई रहूआ होर तिन्हा किन्हें कुछ काम नी रखा; क्यूंकि अगर ये योजना या काम माहणुआं री तरफा ले हो, तेबे ता ये आप्पुए खत्म हुई जाणा।³⁹ पर अगर परमेसरा री तरफा ले हो, ता तुस्से तिन्हा जो कधी मिटाई नी सकदे; केथी एहड़ा नी हो, कि तुस्से परमेसरा किन्हें भी लड़ने वाले बणी जाओ।⁴⁰ तेबे तिन्हे तेसरी गल मनी लई; होर प्रेरिता जो सादी किन्हें पितेया; होर ये हुकम देई किन्हें छाडी दितेया, कि यीसू रे नांऊआं ले फेरी गल्ला देख्या करदे।⁴¹ स्यों एस गल्ला ले खुस हुई किन्हें माहसभा रे साम्हणे ले चली गये, कि आस्से तेसरे नांऊआं रे कठे बेइजत हुणे रे लायक ई हाए।⁴² होर हर रोज मंदरा मन्झ होर घरा घरा मन्झ उपदेस करणे, होर एस गला रा सुसमाचार सुणाणे ले नी रुके, कि यीसू ई मसीह ऐं।

6¹ तिन्हा ध्याड़े जेबे चेले बौहत हुंदे लगे, ता यूनानी भाषा बोलणे वाळे इब्रानीया पर बड़बड़ करदे लगे, कि हर रोज सेउआ मन्झ आस्सा री विधवा री देख भाळ नी हुएया करदी।² तेबे तिन्हे बारा चेले मंडली जो आपणे वाले सादी किन्हें बोल्या, ये ठीक नी आ कि आस्से परमेसरा रा वचन छाडी किन्हें खुआणे पिआणे री सेउआ मन्झ लगी जाए।³ इधी कठे हे भाईओ, आपणे मन्झा ले सात खरे आदमिया जो, जो पवित्र आत्मा होर बुद्धि किन्हें भहरी हो, छांटी लऊआ, कि आस्से

तिन्हा जो एस कामा पर लगाई दे । 4 पर आस्सा ता प्रार्थाना मन्झ होर वचना री सेउआ मन्झ लगी रहणा । 5 ये गल सारी मंडली जो खरी लगी, होर तिन्हे स्तिफनुस नांऊआं रे एक आदमी जो, जो विस्वास होर पवित्र आत्मा किन्हें भहरी रा था, होर फिलुप्पुस होर प्रखुरूस होर निकानोर होर तिमोन होर परमिनास होर अन्ताकिवाला निकुलाउसा जो, जो यहूदी मता मन्झ आई गईरा था, चुणी लया । 6 होर स्यों प्रेरिता रे साम्हणे खडे करी दिते होर तिन्हे प्रार्थना करी किन्हें तिन्हा पर हाथ रखे । 7 होर परमेसरा रा वचन फैहळदा गया होर यरुस्लेमा मन्झ चेले री गिणती बौहत बढदी गयी; होर याजका रा एक बडा समाज एस मता अधीन हुई गया । 8 स्तिफनुस अनुग्रह होर सामर्था मन्झ भहरी किन्हें लोका मन्झ बडे बडे नौखे काम होर चमत्कार दस्या करहा था । 9 तेबे तेस आराधनालय मंझा ले जो लिबरतिनी री आराधनालय बोली जाहीं थी, होर कुरेनी होर सिकंदरिया होर किलकिया होर एसिया रे लोका मंझा ले कई एक उठी किन्हें स्तिफनुसा किन्हें बैहस करदे लगे । 10 पर से जेस बुद्धिमानी होर आत्मा किन्हें बोल्हा था, स्यों तेसरे साम्हणे टिकी नी सके । 11 फेरी तिन्हे कुछ लोका जो लाहल्व देई किन्हें वुल्वाया, होर स्यों बोल्दे लगे, कि आस्से एस जो मुस्सा होर परमेसरा रे खिलाफ बोल्दे सुणीरा । 12 होर एस तरीके किन्हें तिन्हे जनता, स्याणे यहूदी अगुवे होर यहूदी साख्री भडकाए, होर स्यों यीसू जो पकड़ी किन्हें माहसभा मन्झ लई आये । 13 होर तिन्हे झूठे गुआह खडे किते, जिन्हें बोल्या कि ये आदमी एस पवित्र जगहा होर व्यवस्था रे खिलाफ बोलणा नी छाडदा । 14 क्यूंकि आस्से तेस जो ये बोल्दे सुणेया, कि एस यीसू नासरी ये जगहा ढाई देणी, होर स्यों रुवाज बदली देणे जो मुस्से आस्सा जो दितीरे । 15 तेबे सभ लोके जो सभा मन्झ बैठीरे थे, तेस वखा देख्या कि तेसरा मुंह स्वर्गदूता रे मुंहा साहीं सुड्या करहा ।

7 1 तेबे माहयाजके बोल्या, क्या ये गल्ला इहां ई? 2 तिने बोल्या; हे भाइयो, होर पितरो सुणा, आस्सा रा पिता अब्राहम हाराना मन्झ बसणे ले पैहले जेबे से मिसुपुतामिया मन्झ था; ता महिमामय परमेसरे तेस जो दर्सन दितेया । 3 होर तेस किन्हें बोल्या कि तू आपणे देसा होर आपणे घरा ले निकळी किन्हें तेस देसा मन्झ चली जा, जो मां तुजो दसणा । 4 तेबे से कस्दिया रे देसा ले निकळी किन्हें हाराना मन्झ बसी गया; होर तेसरे बाबा री मौता ले बाद परमेसरे तेस जो तेथी ले एस देसा मन्झ ल्याई किन्हें बसाया जेथी एबे तुस्से रहया करहा ऐ । 5 होर परमेसरे तेस जोउत्तराधिकारा मन्झ कुछ नी दितेया, पैर रखणे री भी जगहा नी दिती, पर ये वाहदा कितेया कि मां ये देस देस, तेरे होर तेरे बाद तेरे बंसा रे हाथा मन्झ करी देणा; हालांकि तेस टैम तेसरा कोई बच्चा भी नी था । 6 होर परमेसरे तेस किन्हें ये भी बोल्या, कि तेरे बंसा रे लोका पराये देसा मन्झ परदेसी

हुई किन्हें रहणा, होर तिन्हा स्यों दास बनाणे, होर चार सौ साला तक दुखी करणे । 7 फेरी परमेसरे बोल्या; जेस्सा जाति रे तिन्हा दास हुणा, तेस्सा जाति जो मां सजा देणी; होर एता ले बाद तिन्हा निकळी किन्हें एस जगहा ई मेरी सेउआ करणी । 8 होर तिने तेस किन्हें खतने री वाचा बान्ही; होर एस ई दसा मन्झ इसहाक तेस ले जम्या; होर आठुऐ ध्याडे तेसरा खतना कितेया; होर इसहाका ले याकूब होर याकुबा ले बारा कुलपति जम्मे । 9 होर कुलपतिऐ युसुफा किन्हें डाह करी किन्हें तेस जो मिस्र देसा जो जाणे वाळया रे हाथा मन्झ बेची दितेया; परमेसर तेस साउगी था । 10 होर परमेसरे तेस जो तेसरे सभ कलेसा ले छुडाई किन्हें मिसरा रे राजा फिरौना री नजरा मन्झ अनुग्रह होर बुद्धि दिती, होर तिने तेस जो मिसर देसा पर होर आपणे सारे घरा पर हाकम बणाया । 11 तेबे मिसर होर कनाना रे सारे देसा मन्झ अकाल पया; जेस ले बडा क्लेस हुएया, होर आस्सा रे बाबदादे जो नाज नी मिलदा था । 12 पर याकूबे ये सुणी किन्हें, कि मिसरा मन्झ नाज आ, ता तिने आस्सा रे पूर्वजा जो पैहली बार तेथी भेज्या । 13 होर दूजी बारी युसुफे आपणी पेहचान आपणे भाईया पर प्रगट किती, होर युसुफा री जाति फिरौना जो पता चली गयी । 14 तेबे युसुफे आपणे पिता याकूबा होर आपणे सारे घराने जो, जो कुल मिलाई किन्हें पंझहेतर आदमी थे, सादी लये । 15 तेबे याकूब मिसर देसा मन्झ गया; होर तेथी से होर आस्सा रे बाबदादे मरी गये । 16 होर तिन्हा री ल्हासा तेथी ले वाप्स स्केमा जो लई गये जेथी तिन्हा जो कबरा मन्झ दफनाई दितेया । ये से ई कब्र ई जेस जो अब्राहमे हमोरा रे बेटे ले चांदी देई किन्हें मुले लई थी । 17 जेबे परमेसरे अब्राहम जो, जो वचन दितीरा था, तेता रा पुरे हुणे रा टैम नेडे आया, ता मिसरा मन्झ हमोर लोका री गिणती बौहत ज्यादा हुई गयी । 18 आखिर कार मिसरा मन्झ एक ऐहडा राजा आया जो युसुफा जो नी जाणदा था । 19 तिने आस्सा री जाति किन्हें च्लाकी करी किन्हें आस्सा रे बाबदादा साउगी बुरा व्यवहार कितेया, कि तिन्हा जो आपणे बच्चे जो सट्टी देणा पया ताकि स्यों जीऊन्दे रही सको । 20 तेस टैम मुस्सा जम्या जो बौहत ई सुन्दर था; होर से तीन म्हीने तक आपणे बाबा रे घरा मन्झ पालन पोसण हुएया । 21 फेरी जेबे तेस जो बाहर छाडी दितेया गया ता फिरौना री म्हीती तेस जो चकी किन्हें लई गयी, होर आपणा म्हीठा बणाई किन्हें पाळया । 22 होर मुस्सा जो मिसरीया री सारी पढाई कराई, होर से गल्ला होर कामा मन्झ सामर्थी था । 23 जेबे से चाळी साला रा हुएया, ता तेसरे मना मन्झ आया कि हांऊ आपणे इस्राएली भाईया वाले जाऊं । 24 होर एक बारी जेबे तिने देख्या कि तिन्हा मंझा ले केसी एक आदमी पर अत्याचार हुएया करहा ता तिने से बचाया होर मिसरी माहणु जो मारी किन्हें तेस पीडित आदमी रा बदला लई लया । 25 तिने सोचेया, कि तेसरे भाई बन्धुआ

जाणी लैणा कि तिन्हा जो छुटकारा देणे रे कठे परमेसर तेस जो इस्तेमाल करेया करहा पर स्यों तेस जो समझी नी पाए । 26 दूजे ध्याडे जेबे स्यों आपु मन्झ लडेया करहा ऐ थे, ता से तेथी आई पुजेया; होर ये बोली किन्हें तिन्हा जो समझांदा लग्या, कि हे भाईयो, तुस्से ता भाई भाई ऐ, एक दूजे किन्हें बुरा बर्ताव किधियो करहा ऐ । 27 पर जो आपणे पडोसी किन्हें बुरा बर्ताव करेया करहा था, तिने से ये बोली किन्हें हटाई दितेया, कि तुजो कुने आस्सा पर हाकम होर न्यायी बणाया? 28 जिंहा तें काल तेस मिस्त्री रा खून करी दितेया, क्या तू तिहां ई मुंजो भी मारी देणा चाहं? 29 ये गल सुणी किन्हें, मुसा तेथी ले भगी गया; होर मिद्धान देसा मन्झ परदेसी हुई किन्हें रैहन्दा लग्या: होर तेथी तेसरे दो म्हटे हुए । 30 जेबे पुरे चाळी साल पुरे हुई गये, ता एक स्वर्गदूते सीनै पाहडा रे जंगला मन्झ तेस जो भखीरी री झाडी री लपटा मन्झ दर्सन दितेया । 31 मुस्सा तेस दर्शना जो देखी किन्हें हरान हुई गया, होर जेबे से देखणे रे कठे नेडे गया, ता प्रभु री अवाज आई । 32 कि हांऊ तेरे बाबदादेया जो, अब्राहम, इसहाक होर याकूबा रा परमेसर आ: तेबे ता मुस्सा कामी गया, एथी तक कि तेस जो देखणे री हिम्मत नी हुई । 33 तेबे प्रभुए तेस किन्हें बोल्या; आपणे पैरा ले जूते तुआरी ले, क्यूंकि जेस जगहा तू खहडी रा आ, से पवित्र जगहा ई । 34 मैं मिसरा मन्झ आपणे लोका साउगी हुएया करहा ऐ अत्याचार जो देखी चुकिरा; होर तिन्हा री आह होर तिन्हा रा रूणा सुणी लई रा; इधी कठे हांऊ तिन्हा जो छुडाणे रे कठे आईरा । आऊ, एभे मां तू मिसरा मन्झ भेजणा । 35 जेस मुसा जो तिन्हे ये बोली किन्हें न्कारेया था कि तुजो कुने आस्सा पर हाकम होर न्यायी बणाया; तेस जो ई परमेसरे हाकम होर छुडाणे वाळा बणाई किन्हें, तेस स्वर्गदूता रे ज्रीए जिने जे तेस जो झाडी मन्झ दर्सन दितेया था, भेज्या । 36 इने आदमीऐ ई मिसर होर लाल सागर होर जंगला मन्झ चाळी साला तक नौखे काम होर चमत्कार दसी दसी किन्हें यों काढी किन्हें बाहर लई आंदे । 37 ये से ई मुस्सा आ, जिने जे इस्राएलिया किन्हें बोल्या; कि परमेसरा तुस्सा रे भाईया मंझा ले तुस्सा रे कठे मेरे साहीं एक नबी खडा करणा । 38 ये से ई आ, जो जंगला मन्झ कलीसिया रे बीचा मन्झ तेस स्वर्गदूता साउगी था जिने सीनै पाहडा पर तेस किन्हें गल्ला किती, जो आस्सा रे पूर्वजा साउगी था होर तिने परमेसरा रे जीउंदे वचन पाई किन्हें आस्सा तक पौहन्चाये । 39 पर आस्सा रे बाबदादे तेसरा हुकम नी मन्नेया; बल्कि तेस जो हटाई किन्हें आपणे मन मिसरा वखा जो फेरे । 40 होर हारूने बोल्या; आस्सा रे कठे एहडा देवता बणाऊआ, जो आस्सा रे अगे अगे चले; क्यूंकि ये मुस्सा जो आस्सा जो मिसर देसा ले काढी किन्हें लई आया, आस्से नी जाणदे कि तेस जो क्या हुएया? 41 तिन्हा ध्याडे तिन्हे एक बडा बछु बणाई किन्हें, तेसरी मूर्ति रे अगे बली चढाई; होर

आपणे हाथा रे कामा मन्झ मग्न हुंदे लगे । 42 पर परमेसरे तिन्हा ले मुंह मोडी लया, कि स्यों सर्गा रे ग्रैह नक्षत्रा री पूजा करे; जेहडा नबी री काबा मन्झ लिखीरा; कि हे इस्राएला रे घराने, क्या तुस्से जंगला मन्झ चाळी साला तक पसुबलि होर अन्नबलि मुंजो ही चढान्दे रैहे? 43 होर तुस्से मोलेका रे तम्बू होर रिफान देऊआ रे तारे जो भी आपणे साउगी लई गईरे थे; स्यों मुर्तिया भी तुस्से लई गईरे थे जो तुस्से पूजा रे कठे बणाया थी; इधी कठे मां स्यों बेबीलोना ले भी परे जाई किन्हें बसाणे । 44 गुआही रा तम्बू भी तेस जंगला मन्झ आस्सा रे बाबदादे साउगी था; ये तम्बू तेस नमूने रे अधारा पर बणाईरा था, जेहडा तिने देखिरा था; होर जींहा मुस्सा किन्हें गल करने वाळे तेस जो बनाणे जो बोलिरा था । 45 तेस तम्बू जो उत्तराधिकारा मन्झ पाई किन्हें आस्सा रे बाबदादे यहोसू साउगी तेस टैम एथी लई आये थे; जेबे तिन्हे तिन्हा जातिया पर कब्जा कितेया जिन्हा जो परमेसरे आस्सा रे बाबदादे रे साम्हणे ले काढी दितेया; होर से दाऊदा रे टैमा तक रैहया । 46 तेस पर परमेसरे दया किती, होर तिने अरज किती, कि से याकुबा रे परमेसरा रे कठेएक मंदर बणाई सके । 47 पर सुलेमाने तेसरे कठे मंदर बणाया । 48 पर कुछ भी हो परमेसर ता हाथा रे बणाईरे मंदरा मन्झ नी रैहन्दा । जेहडा कि नबिये बोलिरा । 49 कि प्रभु बोलहा, स्वर्ग मेरी राजगद्दी ई होर धरती मेरे पैरा री चौकी ई, मेरे कठे तुस्सा केहडा घर बणाणा? होर मेरे अरामा री केहडी जगहा हुणी? 50 क्या ये सभ चीजा मेरे हाथा री नी बणाईरी? हे ठीठ, होर मन होर काना रे हे बगैर खतना वाळे लोको, तुस्से हमेसा पवित्र आत्मा रा साम्हणा करहा ऐ । 51 जेहडा तुस्सा रे बाबदादा करहा ऐ थे, तिहां ई तुस्से भी करहा ऐ । 52 क्या कोई एहडा भी नबी था, जेस जो तुस्सा रे बाबदादे नी स्ताया? तिन्हे ता स्योंमारी भी दिते जिन्हें बौहत पैहले ले ई तेस धर्मी रे आऊणा री घोषणा करी दिती थी, जेस जो एबे तुस्से धोखा देई किन्हें पकडवाया होर मारी दितेया । 53 तुस्से ता स्वर्गदूता रे ज्रीये व्यवस्था रा विधान पाया, पर तेता रा पालन नी कितेया । 54 ये गल्ला सुणी किन्हें स्यों फुख्ही गये होर तेस पर गुस्सा हुंदे लगे । 55 पर तिने पवित्र आत्मा किन्हें भहरी किन्हें स्वर्गा वखा जो देख्या होर परमेसरा री महिमा जो होर यीसू जो परमेसरा री दाई तरफ खहडी रे देख्या । 56 होर बोल्या; देखा, हांऊ स्वर्गा जो खुल्हीरा, होर माहणु रे पुत्रा जो परमेसरा री दाई तरफ खहडी रे देख्हा । 57 तेबे स्यों जोरा किन्हें चिंगे होर आपणे कान बंद करी दिते, होर एक मन हुई किन्हें तेस पर झपटे । 58 होर तेस जो नगरा ले बाहर काढी किन्हें पथरवाह करदे लगे, होर तेबे ई गुआही देणे वाळे आपणे आपणे कपडे तुआरी किन्हें शाउल नांऊआं रे एक जुआन आदमी रे पैरा पर रखी दिते । 59 होर स्यों स्तिफुनुसा जो पथरवाह करदे रैहे, होर से ये बोली किन्हें प्रार्थना करदा

रहया; कि हे प्रभु यीसू, मेरी आत्मा जो ग्रहण करी ले।⁶⁰ फेरी से जांदू रे भारे झुकी किन्हें जोरा किन्हें चिल्लाया, हे प्रभु, ये पाप तिन्हा पर मत लगा, होर ये बोली किन्हें से हमेसा रे कठे सई गया; होर शाउल तेसरी हत्या मन्झ सामिल था।

8¹ फेरी से जांदू रे भारे झुकी किन्हें जोरा किन्हें चिल्लाया, हे प्रभु, ये पाप तिन्हा पर मत लगा, होर ये बोली किन्हें से हमेसा रे कठे सई गया; होर शाउल तेसरी हत्या मन्झ सामिल था।² होर कुछ भक्त आदमिये स्तिफुनुसा जो कबरा मन्झ रखी दितेया; होर तेसरे कठे बड़ा दुःख मणाया।³ साउले कलीसिया उजाड़ना सुरहु करी दिती; होर घरा घरा मन्झ घुसी घुसी किन्हें से मरधा होर जनानिया जो घसीटी घसीटी किन्हें जेहला मन्झ पाहां था।⁴ जो लोक तितर बितर हुई गईर थे, स्यों सुसमाचार सुणान्दे लगे।⁵ होर फिलिप्पुस सामरिया नगरा मन्झ जाई किन्हें लोका मन्झ प्रचार करदा लग्या।⁶ होर जो गल्ला फिलिप्पुसे बोली तिन्हे लोके सुणी होर जो चमत्कार से दस्हा था तिन्हा जो देखी किन्हें तिन्हे एक मन हुई किन्हें तेसरी गल्ला पर ध्यान दितेया।⁷ क्युंकि बौहत लोका मंझा ले दुष्ट आत्मा बडे जोरा किन्हें चिंगदी हुई निकळी गयी, होर बौहत सारे लकवे रे रोगी होर लंगडे ठीक हुएया करहा ऐ थे।⁸ होर तेस नगरा मन्झ बडी खुसी हुई।⁹ एता ले पैहले तेस नगरा मन्झ समौन नाऊआं रा एक आदमी था, जो जादू टोणा करी किन्हें सामरिया रे लोका जो हैरान करहा था होर आपणे आपा जो बड़ा आदमी बणाहां था।¹⁰ होर सभ छोट्टे ले बडे तक तेस मनी किन्हें बोल्हा थे, कि ये माहणु परमेसरा री से सक्ति ई, जेस जो बौहत बडी सक्ति बोल्या जाहां।¹¹ तिने स्यों बौहत ध्याडे ले आपणे जादू टोणे रे कामा ले हरान करी रखिरा था, इधी कठे स्यों तेस जो बौहत मन्हां ऐं थे।¹² पर जेबे तिन्हे फिलिप्पुसा रा विस्वास कितेया जो परमेसरा रा सुसमाचार सुणाहां था ता लोक, क्या मर्ध क्या जनाने बसिस्मा लैंदे लगे।¹³ तेबे समौने आपु भी विस्वास कितेया होर बसिस्मा लई किन्हें फिलिप्पुसा साउगी रैहन्दा लग्या होर चमत्कार होर बडे बडे सामर्था रे काम हुंदे देखी किन्हें हैरान हुहां था।¹⁴ जेबे प्रेरिते जो यरुस्लेमा मन्झ थे सुणेया कि सामरिये परमेसरा रा वचन मनी लईरा ता पतरस होर यहुन्ने जो तिन्हा वाले भेज्या।¹⁵ होर तिन्हे जाई किन्हें तिन्हा रे कठे प्रर्थाना किती कि पवित्र आत्मा पाए।¹⁶ क्युंकि ये हली तक तिन्हा मंझा ले केसी पर नी उतरी रा था, तिन्हा जो ता सिर्फ प्रभु यीसू रे नाऊआं रा बसिस्मा ही दितेया गया।¹⁷ तेबे तिन्हे तिन्हा पर हाथ रखे होर तिन्हे पवित्र आत्मा पाई।¹⁸ जेबे समौने देख्या कि प्रेरिता रे हाथ रखणे ले पवित्र आत्मा दितेया जाहां, ता तिन्हा वाले पन्ज्याह रप्ये ल्याई किन्हें बोल्या।¹⁹ कि ये हक मुंजो भी देआ, कि हांऊ जेस केसी पर हाथ रखूं, से पवित्र आत्मा पाए।²⁰ पतरसे तेस किन्हें बोल्या; तेरे रप्ये तेरे साउगी

नास हो, क्युंकि तैं परमेसरा रा दान रप्ये किन्हें मुले लैणे रा विचार कितेया।²¹ एस गल्ला मन्झ ना ता तेरा कोई हिस्सा आ होर ना ई कोई साझा क्युंकि तेरा मन परमेसरा रे अगे सीधा नी आ।²² इधी कठे आपणी एस बुराई ले मन फिराई किन्हें प्रभु ले प्रर्थना कर, हुई सकहा जो तेरे मना मन्झ विचार था, तेस विचारा रे कठे तू माफ कितेया जाए।²³ क्युंकि हांऊ देख्हा, कि तू कड़वाहटा किन्हें भहरी गईरा होर पापा रे बंधना मन्झ पईरा।²⁴ समौने जबाब दितेया, कि तुस्से मेरे कठे प्रभु ले प्रार्थना करा कि जो गल्ला तुस्से बोलिरी, तिन्हा मंझा ले कोई मुंजो पर नी आई जाए।²⁵ इधी कठे तिन्हे गुआही देई किन्हें प्रभु रा वचन सुणाई किन्हें, यरुस्लेमा जो वाप्स चली गये, होर सामरिया रे बौहत गाऊआ मन्झ सुसमाचार सुणान्दे रैहे।²⁶ फेरी प्रभु रे एक स्वर्गदूते फिलिप्पुसा किन्हें बोल्या; उठी किन्हें दक्षिण देसा वखा जो तेस रस्ते पर जा, जो यरुस्लेमा ले गाजा जो जाहां, होर ये एक सुनसान रस्ता आ।²⁷ से उठी किन्हें चली गया, होर देखा, कूस देसा रे एक आदमी आया करहा था जो खोजा होर कूसीयों री राणी कन्दाके रा मंत्री होर खजांची था, होर भजन करणे रे कठे यरुक्षेम आईरा था।²⁸ होर से आपणे रथा पर बैठीरा था, होर यसायह नबी री कताब पढे पढे वाप्स जाया करहा था।²⁹ तेबे आत्मे फिलिप्पुसा किन्हें बोल्या, नेडे जाई किन्हें तेस रथा साउगी साउगी हुई जा।³⁰ फिलिप्पुस तेस रथा वखा जो दोडेया होर तेस खोजे जो यसायहा री कताब पढे हुए सुणेया, होर पुछेया, कि तू जो पढेया करहा क्या तेता जो समझेया करहा? ³¹ तिने बोल्या, जेबे तक कोई मुंजो नी समझाए ता मां किहां समझणा? होर तिने फिलिप्पुसा किन्हें अरज किती, कि रथा पर चढी किन्हें मेरे वाले बैठ।³² पवित्र सास्त्रा रा अध्याय जो से पढेया करहा था, से ये था; कि तेस जो तेस्सा भेडा साहीं काटणे जो लई जाया करहा ऐ थे, होर जिहां मेम्ना आपणे ऊन कतरने वाळे रे साम्हणे चुपचाप रैहयां, तिहां ई तिने भी आपणा मुंह नी खोल्या।³³ ऐहडी दीन दसा मन्झ तेसरा न्याय नी हुई पाया, होर तेसरे टैमा रे लोका रा बखान केस करणा? क्युंकि धरती ले तेसरा प्राण उठाया जाहां।³⁴ एता पर खोजे फिलिप्पुसा ले पुछेया; हांऊ तुध ले अरज करहा, कि ये दस कि नबी ये केस रे बारे मन्झ बोल्या करहा, आपणे या केसी दूजे रे बारे मन्झ? ³⁵ तेबे फिलिप्पुसे आपणा मुंह खोल्या, होर एस ई सास्त्रा ले सुरहु करी किन्हें तेस जो यीसू रा सुसमाचार सुणाया।³⁶ पैडे मन्झ चळदे चळदे स्यों केसी पाणी री जगहा पूजे, तेबे खोजे बोल्या, देखा एथी पाणी आ, एबे मुंजो बसिस्मा लैणे रे कठे क्या रूकावट ई? ³⁷ फिलिप्पुसे बोल्या, अगर तू सारे मना ले विस्वास करे ता हुई सकहा: तिने जबाब दितेया हांऊ विस्वास करहा कि यीसू मसीह परमेसरा रा पुत्र आ।³⁸ तेबे तिने रथ खडा करणे रा हुकम दितेया, होर फिलिप्पुस होर खोजा दुहें

पाणी मन्झ उतरी गये, होर तिने तेस जो बसिस्मा दितेया ।
 39 तेबे स्यों पाणी मंझा ले निकळी किन्हें ऊपर आई गये, ता
 प्रभु रा आत्मा फिलिप्पुसा जो चकी के लई गया, होर खोजे से
 फेरी दबारा नी देख्या, होर से खुसी म्नान्दा हुएया आपणे रस्ते
 चली गया । 40 होर फिलिप्पुस अस्दोदा मन्झ पूजी गया, होर
 जेबे तक कैसरिया मन्झ नी पुजेया, तेबे तक नगरा नगरा मन्झ
 जाई किन्हें सुसमाचार सुणान्दा गया ।

9 1 होर साऊले जो एभे तक प्रभु रे चले जो धमकाने होर
 मारणे री धुना मन्झ था, से माहयाजका वाले गया । 2 होर
 तिने दमिसका रे आराधनालया रे नांऊआं पर चिठिया मांगी
 ताकि क्या मर्ध, क्या जनाने, जिन्हा जो भी से एस रस्ते मन्झ
 पाए से तिन्हा जो बान्ही किन्हें यरुस्लेमा मन्झ लई आये । 3 पर
 चलदे चलदे जेबे से दमिसका रे नेडे पुजेया, ता अचानक सर्गा
 ले तेसरे चारो तरफ ज्योति चमकी । 4 होर से ज्मीना पर पई
 गया, होर ये अवाज सुणी, कि हे साऊल, हे साऊल, तू मुंजो
 किधियो स्ताया करहा? 5 तिने पुछेया; हे प्रभु, तू कुणहां? तिने
 बोल्या; हांऊ यीसू आ; जेस जो तू स्ताहां । 6 पर एबे उठी किन्हें
 नगरा मन्झ जा, होर जो कुछ करना, से तुजो बोली दितेया
 जाणा । 7 जो माहणु तेस साउगी थे, स्यों चुपचाप रही गये;
 क्यूंकि अवाज ता स्यों सुणहां हें थे, पर केसी जो नी देखे थे ।
 8 तेबे साऊल ज्मीना ले उठेया, पर जेबे हाखिया खोल्ही ता तेस
 जो कुछ नी सुझेया होर स्यों तेसरा हाथ पकड़ी किन्हें दमिसका
 मंझा ले लई गये । 9 होर से तीन ध्याडे तक नी देखी सक्या,
 होर ना खादेया होर ना पितेया । 10 दमिसका मन्झ हनन्याह
 नांऊआं रा एक चेला था, तेस किन्हें प्रभुए दर्सना मन्झ बोल्या,
 हे हनन्याह! तिने बोल्या; हां प्रभु । 11 तेबे प्रभुए तेस किन्हें
 बोल्या, उठी किन्हें तेस गली मन्झ जा जेस जो सीधी बोल्हाएं,
 होर यहूदा रे घरा मन्झ साऊल नांऊआं रा एक तारसी जो
 पूछी ले; क्यूंकि देख, से प्रार्थना करेया करहा । 12 होर तिने
 एक दर्सना मन्झ देखिरा कि हनन्याह नांऊआं रे एक माहणुए
 घरा मन्झ आई किन्हें तेस पर हाथ रखेया ताकि से दबारा देखी
 सके । 13 हनन्याहे जबाब दितेया, प्रभु, मैं एस आदमी रे बारे
 मन्झ बौहत लोका ले सुणीरा, कि इने यरुस्लेमा मन्झ तेरे पवित्र
 लोका साउगी बडी बडी बुराईया कितीरी । 14 होर एथी भी एस
 जो माहयाजका री तरफा ले हक मिलिरा, कि जो लोक तेरा
 नांऊ लैहांए, तिन्हा सभी जो बान्ही ले । 15 पर प्रभुए तेस किन्हें
 बोल्या, कि तू चला जा; क्यूंकि ये ता दूजी जातिया होर राजे
 माहराजे, होर इस्राएला रे साम्हणे मेरा नांऊ प्रगट करणे रे
 कठे मेरा चुणीरा एक साधन आ । 16 मां तेस जो दसणा, कि
 मेरे नांऊआं रे कठे तेस जो केहड़ा केहड़ा दुःख उठाणा पऊणा
 । 17 तेबे हनन्याह उठी किन्हें तेस घरा मन्झ गया, होर तेस
 पर आपणा हाथ रखी किन्हें बोल्या, हे भाई साऊल, प्रभु यीसू

ऐ हांऊ भेजीरा, जो तेरे रस्ते मन्झ तेरे साम्हणे प्रगट हुएया
 था कि तू दबारा देखी सके होर पवित्र आत्मा किन्हें भहरी
 जाए । 18 होर झटपट तेसरी हाखिया ले छिलके साहीं पये,
 होर से देखदा लग्या होर उठी किन्हें बसिस्मा लया । 19 फेरी
 खाणा खाणे ले बाद तेजो ताकत मिली गयी होर से दमिस्का
 मन्झ चेले साउगी कुछ होर टैमा तक रह्या । 20 फेरी से सीधा
 आराधनालया मन्झ जाई किन्हें यीसू रा प्रचार करदा लग्या,
 कि से परमेसरा रा पुत्र आ । 21 होर सभ सुणने वाळे हैरान हुई
 किन्हें बोल्दे लगे; "क्या ये से ई आदमी नी आ जो यरुस्लेमा मन्झ
 तिन्हा सभी जो नास करेया करहा था जो यीसू रे नांऊआं पर
 विस्वास रख्हा ऐ? होर क्या ये तिन्हा जो एथी पकड़ी किन्हें
 होर माहयाजका रे साम्हणे ल्याऊणे रे कठे नी आईरा था?"
 22 पर साऊल होर ज्यादा सामर्थी हुंदा चली गया, होर एस
 गल्ला रा सबूत देई देई किन्हें कि ये ई मसीह आ, होर दमिस्का
 मन्झ रहणे वाळे यहूदिया रा मुहं बंद करदा रह्या । 23 जेबे
 बौहत ध्याडे बीती गये, ता यहूदिये मिली किन्हें तेस जो मारणे
 री योजना बणाई । 24 पर तिन्हा री योजना साऊला जो पता
 चली गयी, स्यों ता राती ध्याडी फाटका वाले तेस जो मारणे
 री ताका मन्झ लगी रह्यां थे । 25 पर राती तेसरे चले तेस जो
 टोकरे मन्झ ळ्याया, होर नगरा री चार दिवारी ले लटकाई
 किन्हें तेस जो हेठ तुआरी दितेया । 26 यरुस्लेमा मन्झ पौहुंची
 किन्हें तिने चले साउगी मिलने रा जतन कितेया; पर स्यों सभ
 तेस ले डरहा ऐ थे, तिन्हा जो ये विस्वास नी था कि से भी
 एक चेला आ । 27 पर बरनबास तेस जो आपणे साउगी प्रेरिता
 वाले लई जाई किन्हें तिन्हा किन्हें बोल्या, कि इने किहां रस्ते
 मन्झ प्रभु जो देख्या, होर इने इस किन्हें गल्ला किती; फेरी
 दमिस्का मन्झ इने बडी हिम्मता किन्हें यीसू रे नांऊआं रा प्रचार
 कितेया । 28 से तिन्हा साउगी यरुस्लेमा मन्झ आऊन्दा जांदा
 रह्यां । 29 होर बगैर डरे प्रभू रे नांऊआं रा प्रचार करहा था:
 होर यूनानी भाषा बोलणे वाळे यहूदिया साउगी गलबात होर
 बैहस करहा था; पर स्यों तेस जो मारणे री कोसिस करदे लगे ।
 30 पर जेबे भाईया जो एस गल्ला रा पता चल्लेया ता स्यों तेस
 जो कैसरिया जो लई गये होर फेरी तेस जो तर्सुसा जो भेजी
 दितेया । 31 इधी कठे सारे यहूदिया, गलीला होर सामरिया
 री कलीसिया रा टैम बडी सांति किन्हें बितेया; से कलीसिया
 होर ज्यादा ताकतवर हुंदी लगी, क्यूंकि से कलीसिया प्रभु ले
 डरी किन्हें आपणी जिन्दगी बिताहीं थी, होर पवित्र आत्मा री
 सांति मन्झ चलदी होर बढदी जाहीं थी । 32 होर एहड़ा हुएया
 कि पतरस हर जगहा फिरि किन्हें, तिन्हा पवित्र लोका वाले भी
 पौहुन्चेया, जो लिद्धा मन्झ रहें थे । 33 तेथी तेस जो एनियास
 नांऊआं रा एक आदमी मिलेया जो आठ साला ले बिस्तरे मन्झ
 पई रह्यां ऐं था, तेस जो लकवा हुई गईरा था । 34 पतरसे

तेस किन्हें बोल्या, हे अनियास! यीसू तुजो चंगा करहा; उठ, आपणा बिस्तरा ठीक कर; तेबे से झटपट उठी किन्हें खड़ा हुई गया।³⁵ होर लुद्धा होर सारोना रे सभ रहणे वाळे तेस जो देखी किन्हें प्रभु वखा जो फिरे।³⁶ याफा मन्झ तबिता मतलब दोरकास नांऊआं री एक विस्वासण रँहयां ऐं थी, से बौहत सारे भले भले काम होर गरीबा जो दान देहां ई थी।³⁷ तिन्हा ध्याड़े से बमार हुई किन्हें मरी गयी; होर तिन्हे तेस्सा री ल्हासा जो न्हाई किन्हें अटारी प्र्याहले रखी दितेया।³⁸ होर इधी कठे कि लुद्धा याफा रे नेडे था, चले ये सुणी किन्हें कि पतरस तेथी आ दो माहणु भेजी किन्हें तिने अरज किती कि आस्सा वाले आऊणे रे कठे देर ना कर।³⁹ तेबे पतरस उठी किन्हें तिन्हा साउगी चली गया, होर जेबे पौहुंची गया, ता स्यों तेस जो तेस्सा अटारी पर लई गये; होर सभ विधवा रोंदी हुई तेस्सा वाले आई किन्हें खहड़ी गयी होर जो कुरते होर कपड़े दोरकासे तिन्हा साउगी रहन्दे हुए बणाईरे थे दसदी लगी⁴⁰ तेबे पतरसे सभी जो बाहर भेजी दितेया होर घुटने टेकी किन्हें प्रार्थना किती; होर ल्हासा वखा जो देखी किन्हें बोल्या; हे तबीता उठ, तेबे तेस्से आपणी हाखिया खोल्ही दिती; होर पतरसा जो देखी किन्हें से उठी बैठी।⁴¹ होर तिने तेस्सा जो आपणा हाथ देई किन्हें उठाया होर पवित्र लोका होर विधवा जो सादी किन्हें तेस्सा जो सौंपी दितेया।⁴² ये गल सारे याफा मन्झ फैहली गयी; होर बौहत लोके प्रभु रे नांऊआं पर विस्वास कितेया।⁴³ होर पतरस याफा मन्झ समौन नांऊआं रे केसी चामड़े रा काम धंधा करणे वाळे रे घरा बौहत ध्याड़े तक रहया।

10¹ कैसरिया मन्झ कुरनेलियुस नांऊआं रा एक आदमी था, जो इतालियानी नांऊआं री पलटना रा सूबेदार था।² से भक्त आदमी था, होर आपणे सारे टब्बरा समेत परमेसरा ले डरहा था, होर यहूदी लोका जो बौहत दान देहां था, होर बराबर परमेसरा ले प्रार्थना करहा था।³ ध्याड़ी रे नहुँऐं पैहरा रे नेडे तिने एक साफ साफ दर्सन देख्या कि परमेसरा रा एक दूत तेस वाले आया होर तेस किन्हें बोल्या करहा, “कुरनेलियुस।”⁴ तिने ध्याना किन्हें देख्या; होर डरी किन्हें बोल्या; हे प्रभु क्या आ? तिने तेस किन्हें बोल्या, तेरी प्रार्थना होर तेरे दान यादगारा रे कठे परमेसरा रे साम्हणे पूजी गईरे।⁵ होर एभे कुछ आदमिया जो याफा जो भेजा होर समौन नांऊआं रे एक आदमी जो, जेस जो पतरस भी बोल्ला ऐं, एथी सादी ल्युआ।⁶ से समौन नांऊआं रे एक चामड़े रा धंधा करणे वाळे साउगी रहया करहा, तेसरा घर द्रयाऊआ रे बाहडे आ।⁷ जेबे से स्वर्दूत जिने जे तेस किन्हें गल्ला किती, चली गया, ता तिने दो दासा जो, होर जो तेस वाले हाजर रँहयां ऐं थे तिन्हा मंझा ले एक भक्त स्पाही सादेया।⁸ होर तिन्हा जो सभ गल्ला दसी किन्हें याफा जो भेजी दितेया।⁹ दूजे ध्याड़े, जेबे

स्यों चलदे चलदे नगरा वाले पूजे, ता पतरस दो पैहरा रे टैमा प्रार्थना करने रे कठे छता पर चली गया।¹⁰ होर तेस जो भूख लगी, होर कुछ खाणा चाहं था; पर जेबे स्यों त्यार करेया करहा ऐं थे, ता से बेहोस हुई गया।¹¹ होर तिने देख्या, कि सर्ग खुल्ही गया; होर एक बडी चादरा साहीं कोई चीज हेठ उतरेया करहा ई, चारो कोणे ले पकड़ी किन्हें धरती पर तुआरेया करहा ऐं।¹² तेस पर हर किस्मा रे जानवर, धरती पर रंगणे वाळे जीव जन्तु होर सर्गा रे चिड्डु थे।¹³ होर फेरी तेस जो एक अवाज आई, कि हे पतरस उठ, मार होर खा।¹⁴ पर पतरसे बोल्ला, नीं प्रभु, कधी नी; क्यूंकि मैं कधी कोई तुच्छ या असुध खाणा नी खाधेया।¹⁵ फेरी दूजी बारी तेस जो अवाज आई, कि जेस केसी चीजा जो परमेसरे पवित्र बोलिरा, तुच्छ मत बोलणा।¹⁶ तीन बारी एहड़ा ई हुएया; तेबे से चीज झटपट सर्गा जो चकी गई।¹⁷ पतरसे जेस नजारे जो दर्सना मन्झ देखीरा था, तेस पर से हली चकरा मन्झ पईरा ई था कि कुरनेलियुसा रे भेजिरे लोक दरवाजे वाले खहड़ी किन्हें पुछेया करहा ऐं थे, कि समौना रा घर केथी आ? तिन्हे बाहर सादी किन्हें पुछेया, क्या समौन जेस जो पतरस भी बोल्ला ऐं प्रौहणा बणी किन्हें एथी रुकी रा?¹⁹ पतरस हली तेस दर्सना रे बारे मन्झ सोचेया ई करहा था, कि आत्मे तेस किन्हें बोल्ला, देख, तीन माहणु तेरी तलासा मन्झ ऐं।²⁰ इधी कठे उठी किन्हें हेठ चली जा, होर बेखटके तिन्हा साउगी चली जा; क्यूंकि मैं ई स्यों भेजिरे।²¹ तेबे पतरसे उतरी किन्हें तिन्हा माहणुआं किन्हें बोल्ला; देखा, जेसरी तलासा मन्झ तुस्से करेया करहा ऐं, से हांऊ ई आ; तुस्सा रे आऊणे री वजहा क्या ई? तिन्हे बोल्ला; कुरनेलियुस सूबेदार जो धर्मी होर परमेसरा ले डरने वाळा आ होर सारी यहूदी जाति मन्झ नेक इन्सान आ। यहूदी लोका मन्झ तेसरा बडी इज्जत ई; तिने एक स्वर्दूता ले एक चेतावनी पाईरी, कि तुजो आपणे घरा सादी किन्हें तुध ले वचन सुणे।²³ तेबे तिने तिन्हा जो भीतर सादी किन्हें तिन्हा रा आदर सत्कार कितेया। होर दूजे ध्याड़े, से तिन्हा साउगी चली गया; होर याफा रे भाईया मंझा ले कई तेस साउगी हुई गए।²⁴ दूजे ध्याड़े स्यों कैसरिया मन्झ पूजे, होर कुरनेलियुस आपणे टब्बरा होर प्यारे दोस्ता जो कठा करी किन्हें तिन्हा रा इंतजार करेया करहा था।²⁵ जेबे पतरस अन्दर आया करहा था, ता कुरनेलियुसे तेस किन्हें मुलाकात किती, होर पैरा हेठ पई किन्हें प्रणाम कितेया।²⁶ पर तेस जो ठुआळदे हुए पतरसे बोल्ला, खड़ा हुई जा, हांऊ भी ता एक माहणु आ।²⁷ होर तेस साउगी गलबात करदा हुएया अन्दर गया, होर बौहत सारे लोका जो कठे देखी किन्हें।²⁸ तिने तिन्हा किन्हें बोल्ला, तुस्से जाणहां ऐं, कि एक यहूदी रे कठे केसी दूजी जाति रे आदमी साउगी कोई मेल जोल रखणा या तेसरे घरा जाणा नियमा रे खिलाफ आ पर फिर भी परमेसरे

मुंजो दस्या कि मैं केसी आदमी जो तुच्छ या अपवित्र नी बोलू ।
 29 इधी कठे मुंजो जेबे सदया गया ता बगैर कुछ बोले हांऊ चला
 आया: एबे हांऊ पूछहा कि मुंजो केस कामा रे कठे सादिरा?
 30 कुरनेलियुसे बोल्या; किचार ध्याडे पैहले एस ई टैम ध्याडे
 रे तीन बजे हांऊ आपणे घरा मन्झ प्रार्थना करेया करहा था ।
 अचानक चमकीले कपड़े मन्झ एक आदमी मेरे साम्हणे खहड़ी
 गया । 31 होर बोल्या, कुरनेलियुस! तेरी प्रार्थना सुणी लईरी
 होर दीन दुखिया जो दितिरे तेरे दान परमेसरा रे साम्हणे याद
 किते गईरे । 32 इधी कठे याफा जो भेजी किन्हें समौन जो जेस
 जो पतरस भी बोल्हा ऐं, साद; से द्रयाऊआ रे बाहडे समौन
 चामडे रा धन्दा करणे वाळे रे घरा मन्झ प्राहुणा आ । 33 इधी
 कठे मैं तू झटपट सादी लया होर तैं एथी आऊणे री किरपा
 करी किन्हें बौहत खरा कितेया; एबे आस्से सभ एथी परमेसरा
 रे साम्हणे ऐ, ताकि जो कुछ परमेसरे तुजो बोलिरा तेस जो
 सुणे । 34 तेबे पतरसे मुंह खोल्ही किन्हें बोल्या; एबे हांऊ पकका
 समझी गया, कि परमेसर केसी रा भेदभाव नी करदा । 35 बल्कि
 हर जाति मन्झ जो तेसले डरहा होर धर्मा रे काम करहा, से
 तेस जो खरा लगहा । 36 ये ई आ से सन्देश जेस जो तिने यीसू
 मसीह रे ज़ीए सांति रे सुसंचारा रा उपदेस देंदे हुए इस्राएला
 रे लोका जो दितेया था; से सभ री प्रभु आ । 37 ये गल तुस्से
 जाणहां ऐं जो यहूने रे बसिस्मे रे प्रचारा ले बाद ग्लीला ले
 सुरहु करी किन्हें सारे यहूदिया मन्झ फैहली गयी । 38 तुस्से
 यीसू नासरी रे बारे मन्झ जाणहां ऐं कि परमेसरे पवित्र आत्मा
 होर सक्ति किन्हें तीसरा अभिषेक किहां कितेया था, होर से
 भलाई करदा, होर सभ री सैताना रे स्तार्ईरे थे, तिन्हा जो
 ठीक करदा फिरेया; क्यूंकि परमेसर तेस साउगी था । 39 होर
 आस्से तिन्हा सभ री गल्ला रे गुआह ऐं जिन्हा जो तिने यहूदिया
 रे प्रदेसा होर यरुस्लेमा मन्झ कितेया था । 40 पर परमेसरे त्रीजे
 ध्याडे तेस जो मरीरे मंझा ले जीउंदा करी दितेया होर प्रगट भी
 करी दितेया । 41 सभ लोका जो नी पर तिन्हा गुआहा जो जिन्हा
 जो परमेसरे पैहले ले चुणी लया था, मतलब आस्सा रे साम्हणे
 एथी तक कि आस्सा मंझा ले जिन्हें तेस साउगी तेसरे मरीरे मंझा
 ले जीउंदे हुणे ले बाद खाधेया होर पितेया । 42 तिने ई आस्सा
 जो हुकम दितेया कि आस्से लोका जो उपदेस दे होर साबत करे
 कि ये से ई आ जो परमेसरा रे ज़ीए जीउन्देआ रा होर मरीरे रा
 न्यायी बणाईरा । 43 तेसरे सभ नबी गुआही देहां ऐं कि जेस केसी
 तेस पर विस्वास करणा, तेस जोतेसरे नांऊआं रे ज़ीए पापा री
 माफ़ी मिलणी । 44 पतरस ये गल्ला बोल्या ई करहा था, कि
 पवित्र आत्मा वचना रे सभ सुणने वाळे पर उतरेया । 45 होर
 जितने खतना वाळे विश्वासी पतरसा साउगी आईरे थे, स्यों
 सभ हरान हुए कि दूजी जातिया पर भी पवित्र आत्मा रा दान
 दलीरा । 46 क्यूंकि तिन्हे तिन्हा जो लग लग भाषा बोल्दे होर

परमेसरा री जै जै कार करदे हुए सुणेया । 47 एता पर पतरसे
 बोल्या; क्या कोई पाणी जो रोकी सकहा, कि ये बसिस्मा नी
 पाए, जिन्हें आस्सा साहीं पवित्र आत्मा पाईरा । 48 होर तिने
 हुकम दितेया कि तिन्हा जो यीसू मसीहा रे नांऊआं ले बसिस्मा
 दितेया जाए; तेबे तिन्हे तेस ले अरज किती कि कुछ ध्याडे तक
 आस्सा साउगी रहै ।

11 1 होर प्रेरिते होर भाईये जो यहूदिया मन्झ थे सुणेया,
 कि दूजी जातिये भी परमेसरा रा वचन मनी लईरा
 । 2 होर जेबे पतरस यरुस्लेमा मन्झ आया, ता खतना कितिरे
 लोक तेस किन्हें बैहस करदे लगे । 3 कि तैं बगैर खतना वाळे
 लोका रे एथी जाई किन्हें तिन्हा साउगी खाधेया । 4 तेबे पतरसे
 तिन्हा जो सुरहु ले विधि अनुसार सुणाया । 5 कि हांऊ याफा
 नगरा मन्झ प्रार्थना करेया करहा था, होर बेहोस हुई किन्हें एक
 दर्सन देख्या, कि एक बडी चादरा साहीं कोई चीज हेठ उतरेया
 करहा ई, तेता जो चारो कुणे ले पकड़ी किन्हें सर्गा ले धरती पर
 तुआरेया करहा ऐ, फेरी से चादर उतरी किन्हें मेरे वाले आई ।
 6 जेबे मैं तेस पर ध्याना किन्हें देख्या ता हर किस्मा रे जानवर,
 धरती पर रेंगणे वाळे जीव जन्तु होर सर्गारे चिड्डु थे । 7 होर फेरी
 तेस जो एक अवाज आई, कि हे पतरस उठ, मार होर खा । 8 पर
 मैं बोल्या, नीं प्रभु, कधी नी; क्यूंकि मैं कधी कोई तुच्छ या असुध
 खाणा नी खाधेया । 9 फेरी दूजी बारी तेस जो अवाज आई, कि
 जेस केसी चीजा जो परमेसरे पवित्र बोलिरा, तुच्छ मत बोलणा
 । 10 तीन बारी एहड़ा ई हुएया; तेबे से सभ कुछ झटपट सर्गा जो
 चकी किन्हें लई गये । 11 तेस ई टैम जेथी हांऊ रुकिरा था, तेस
 घरा मन्झ तीन माहणु आई पौहुंचे, तिन्हा जो मेरे वाले कैसेरीया
 ले भेजिरा था । 12 आत्मे मुंजो तिन्हा साउगी बगैर नडरे जाणे
 जो बोल्या; होर स्यों छेह भाई भी मेरे साउगी गये होर आस्से
 तेस आदमी रे घरा मन्झ प्रवेस कितेया । 13 होर तिने बोल्या,
 कि मैं एक स्वर्गदूता जो आपणे घरा मन्झ खहड़ी रे देख्या, जिने
 मेरे किन्हें, कि याफा मन्झ आदमी भेजी किन्हें समौन जो जेस
 जो पतरस भी बोल्हा ऐं, सादी ले । 14 तेस तुस्सा किन्हें एहड़ी
 गल्ला करणी, जिन्हा रे ज़ीए तुध होर तेरे टब्बरा मुक्ति पाणी
 । 15 जेबे हांऊ गल्ला करदा लग्या, ता पवित्र आत्मा तिन्हा पर
 तेस ई तरीके किन्हें उतरेया, जेस तरीके ले सुहरु मन्झ से आस्सा
 पर उतरेया था । 16 तेबे मुंजो प्रभु रा से वचन याद आया; कि
 यहूना पाणी किन्हें बसिस्मा देहां था पर तुस्सा जो पवित्र आत्मा
 रा बसिस्मा मिलणा । 17 इधी कठे जेबे कि परमेसरे तिन्हा जो
 भी दान दितेया, जो आस्सा जो प्रभु यीसू पर विस्वास करणे ले
 मिलेया था; ता मैं कुण आ जो परमेसरा जो रोकी सकहा था ।
 18 ये सुणी किन्हें, स्यों चुप रहै, होर परमेसरा री जै जै कार करी
 किन्हें बोल्दे लगे, अच्छा, ता परमेसरे पापिया जो मन फेरणे
 रा मौका दितिरा, जो जिन्दगी वखा जो लई जाहां । 19 इधी

कठे स्यों लोक दुःखा री वजहा ले जो स्तिफुनुसा रे बारे मन्झ सुहरु हुएया था, स्यों तितर बितर हुई गये थे। होर दूरा दूरा तक फिनिक, साईप्रस होर अन्ताकिया तक जाई पूजे; ये यहूदिया जो छाडी किन्हें केसी होरी जो सुसमाचार सुणाहें थे।²⁰ पर तिन्हा मंझा ले कितने साईप्रस होर कुरेनी थे, जो अन्ताकिया मन्झ आई किन्हें यूनानीया जो भी सुसमाचार सुणान्दे लगे।²¹ होर प्रभु रा हाथ तिन्हा पर था, होर बौहत लोक विस्वास करी किन्हें प्रभु वखा जो फिरी गये।²² तेबे तिन्हा री चर्चा यरुस्लेमा री कलीसिया रे सुणने मन्झ आई, होर तिन्हे बरनबास अन्ताकिया भेज्या।²³ से तेथी पूजी किन्हें, होर परमेसरा री किरपा जो देखी किन्हें खुस हुएया; होर सभी जो उपदेस दितेया कि तन मन लगाई किन्हें प्रभु किन्हें लिपटी किन्हें रैहा।²⁴ क्युंकि से एक भला मानस था; होर पवित्र आत्मा किन्हें भहरी रा था: होर बौहत सारे लोक प्रभु मन्झ आई किन्हें मिली गये।²⁵ तेबे से साउला जो टोळने रे कठे तरसुसा जो चली गया।²⁶ होर जेबे से तिन्हा किन्हें मिलेया ता तिने से अन्ताकिया मन्झ ल्यान्देया, होर एहडा हुएया कि कि स्यों एक साल तक कलीसिया साउगी मिलदे होर बौहत लोका जो उपदेस देंदे रैहे, होर चले जो सभी ले पैहले अन्ताकिया मन्झ ही मसीह बोल्या गया।²⁷ तिन्हा ध्याडे कई नबी यरुस्लेमा ले अन्ताकिया मन्झ आए।²⁸ तिन्हा मंझा ले अगबुस नांऊआं रे एकी आदमिए खडे हुई किन्हें आत्मा री प्रेरणा ले ये दस्या, कि सारे संसारा मन्झ बडा अकाल पऊणा, होर से अकाल क्लौदियुसा रे टैमा पया।²⁹ तेबे चले फैसला कितेया, कि हर एक आपणी आपणी सक्ति रे मुताबक यहूदिया मन्झ रैहणे वाळे भाईया री सेउआ रे कठे कुछ भेजे।³⁰ होर तिन्हे एहडा ई कितेया; होर बरनबास होर साउला रे हाथ प्राचीना वाले कुछ भेजी दितेया।

12¹ तेस टैम हेरोदेस राजे कलीसिया रे कई माहणुआं जो दुःख देणा सुरुहु कितेया।² तिने यहून्ने रे भाई याकूबा जो तलवारा किन्हें मारी दितेया।³ होर जेबे तिने देख्या, कि यहूदी लोक एस गल्ला ले खुस हुहां ऐं, ता तिने पतरसा जो भी पकडी लया: स्यों ध्याडे अखमीरी रोटी रे ध्याडे थे।⁴ होर तिने से पकडी किन्हें जेहला मन्झ पाई दितेया, होर रखवाली रे कठे, होर चार चार स्पाहीया रे चार दला रे पैहरे मन्झ एस इरादे ले रखेया कि फसहा ले बाद तेस जो बाहर लोका रे साम्हणे लई आए।⁵ इधी कठे पतरसा री रखवाली हुएया करहा ई थी, पर कलीसिया तेसरे कठे दिला ले परमेसरा ले प्रार्थना करदी रही।⁶ जेबे हेरोदेस तेस जो तिन्हा रे साम्हणे ल्याउणे वाळा था, ता तेस ई रात पतरस दो जंजीरा किन्हें बान्हीरा दो स्पाहिया रे बीचा मन्झ सोया करहा था: होर पैहरुए दरवाजे वाले जेहला री रखवाली करेया करहा ऐ थे।⁷ ता देखा, प्रभु रा एक स्वर्गदूत तेस वाले खहडी गया; होर तेस कोठरी मन्झ

प्रयासा चमक्या: होर तिने पतरसा री पसली पर हाथ मारी किन्हें जगाया, होर बोल्या; उठ, जल्दी कर, होर तेसरे हाथा ले जंजीरा खुल्ही किन्हें पई गयी⁸ तेबे स्वर्गदूते तेस किन्हें बोल्या; कमर कस, होर आपणे बूट पैहनी ले: तिने तैहडा ई कितेया, फेरी तिने तेस किन्हें बोल्या; आपणे कपडे पैहनी किन्हें मेरे पीछे चल।⁹ से निकळी किन्हें तेसरे पीछे हुई गया; पर ये नी जाणदा था, कि जो कुछ स्वर्गदूत करेया करहा, से सच था; तिने सोचेया कि से कोई दर्सन देख्या करहा।¹⁰ तेबे स्यों पैहले होर दूजे पैहरे ले निकळी किन्हें तेस लोहे रे फाटका वाले पूजी गये, जो नगरा वखा ऐं; से तिन्हारे कठे आपणे आप खुल्ही गया; हरो स्यों निकळी किन्हें एक ई गली ले हुई किन्हें गये, इतने मन्झ स्वर्गदूता तेस जो छाडी किन्हें चली गया।¹¹ तेबे पतरसे सचेत हुई किन्हें बोल्या; एबे में सचऐ जाणी लयाकि प्रभुए आपणा स्वर्गदूत भेजी किन्हें मुंजो हेरोदेसा रे हाथा ले बचाई लया, होर यहूदिया री सारी आस तोडी दिती।¹² होर ये सोची किन्हें, से यहून्ने री माऊ मरियमा रे घरा आया, जेस जो मरकुस बोल्हा ऐं; तेथी बौहत लोक कठे हुई किन्हें प्रार्थना करेया करहा ऐ थे।¹³ जेबे तिने फाटका री ताकी खटखटाई; रुद्दा नांऊआं री एक दासी दरवाजे वाले ऐ देखणे रे कठे तेथी आई, कि कुण दरवाजा खटखटाया करहा? ¹⁴ होर पतरसा री अवाज प्छयाणी किन्हें तेस्से खुसी रे मारे दरवाजा नी खोल्या; पर दोडी किन्हें अन्दरा गई, होर दस्या कि पतरस दरवाजे वाले खहडी रा।¹⁵ तिन्हे तेस्सा किन्हें बोल्या; क्या तू पागल ई, पर तेस्से बडा जोर देई किन्हें बोल्या, कि सच्चे एहडा ई आ; तेबे तिन्हे बोल्या, तेसरा स्वर्गदूत हुणा।¹⁶ पर पतरस दरवाजा खटखटान्दा रैहया: होर जेबे तिन्हे ताकि खोल्ही, होर तेस जो देखी किन्हें हरान हुई गये।¹⁷ तेबे तिने तिन्हा जो हाथा रा इसारा कितेया, कि चुप चाप रहूआ; होर तिन्हा जो दस्या, कि प्रभु मुंजो किहां करी किन्हें जेहला ले काढी किन्हें लई आया: फेरी तिने बोल्या, कि याकूब होर भाईया जो ये गल बोली देआ; तेबे से निकळी किन्हें दूजी जगहा जो चली गया।¹⁸ भ्यागा ई स्पाहिया मन्झ बडा हाल्ला पया, कि पतरसा रा क्या हुएया? ¹⁹ जेबे हेरोदेसे तेसरी टोळ किती, होर से तेस जोनी मिलेया: ता तिने पेहरेदारा ले पूछ मांग किती होर तिन्हा जो मारणे रा हुकम दितेया, होर हेरोदेस यहूदिया जो छाडी किन्हें कैसरिया मन्झ जाई किन्हें रैहन्दा लग्या।²⁰ होर से सुर होर सैदा रे लोका ले बौहत गुस्सा था; स्यों एक झुण्ड बनाई किन्हें तेस किन्हें मिलदे आए, होर बलास्तुसा जो, जो राजा रा एक कर्मचारी था, तेस किन्हें मेल मलाप करणा चाहेया; क्युंकि राजा रे देसा ले तिन्हा रे देसा रा पालण पोसण हुहां था।²¹ एक नियुक्त कितिरे ध्याडे, हेरोदेसे आपणी राजवस्त्र पैहनी किन्हें राजगद्दी पर बेठ्या हरो लोका जो भाषण देंदा लग्या।²² लोक चिलांदे लगे ये ता माहणु रा नी

पर परमेसरा री अवाज ई । 23 तेस ई टैम प्रभु रे एक स्वर्गदूते झटपट से मारी दितेया, क्युंकि तिने परमेसरा री जै जै कार नी किती होर से कीड़े पई पई किन्हें मरी गया । 24 पर परमेसरा रा वचन बढ़दा होर फैह्ला गया । 25 जेबे बरनबास होर साउल आपणी सेउआ पूरी करी चुके, ता यहुन्ना जो, जेस जो मरकुस भी बोल्हा ऐं, तेस जो साउगी लई किन्हें यरुस्लेमा ले वाप्स आई गये ।

13 1 अन्ताकिया री कलीसिया मन्झ कितने नबी होर उपदेस्क थे, यानि बरनबास होर समौन जेस जो काला भी बोल्या जाहां; होर लुकियास कुरेनी, होर देसा री चौथाई रा राजा हेरोदेसा रा दूधभाई मनाहेम होर साउल । 2 जेबे स्यों उपवासा साउगी उपासना करेया करहा ऐं थे, ता पवित्र आत्मे बोल्या; मेरे कठे बरनबास होर साऊला जो तेस कामा रे कठे लग करा जेस रे कठे मैं स्यों सादिरे । 3 तेबे तिन्हे उपवास होर प्रार्थना करी किन्हें होर तिन्हा पर हाथ रखी किन्हें स्यों विदा करी दिते । 4 इधी कठे स्यों पवित्र आत्मा रे ज्रीए भेजे गये, स्यों सिलुकिया जो गये; होर तेथी ले जहाजा पर चढी किन्हें कुप्रुसा जो चली गये । 5 होर सलमीसा मन्झ पौहुंची किन्हें, परमेसरा रा वचन यहूदिया री आराधनालया मन्झ सुणाया; होर यहुन्ना तिन्हा रा दास था । 6 होर तेस सारे टापू मन्झ हुंदे हुए, पाफुस तक पौहुंचे; तेथी तिन्हा जो बार-यीसू नाऊआं रा एक यहूदी मिलेया जो एक जादूगर होर झूठा नबी था । 7 से एक बौहत बुद्धिमान आदमी था; से राज्यपाल सिरगियुस पौलुसा रा दास था जिने परमेसरा रा वचन सुणने रे कठे बरनबास होर साउल सादे थे । 8 पर इलीमास जादुगरे (क्युंकि ये ई तेसरे नाऊआं रा मतलब आ) तिन्हारा वरोध कितेया, तिन्हारा वरोध करी किन्हें तिने राज्यपाला जो विस्वास करणे ले रोकणा चाहेया । 9 तेबे साउले जेसरा नाऊ पौलुस भी आ, पवित्र आत्मा ले भहरी किन्हें तेस वखा जो टकटकी लगाई किन्हें बोल्या । 10 हर किस्मा रे धोखे होर मकारी किन्हें भहरी रे सैताना रे बच्चे, तू जे सारी धार्मिकता रा बैरी आ, क्या तूध प्रभु रे सीधे रस्ते जो टेढा करणा नी छाडणा? 11 एबे देख, प्रभु रा हाथ तेरे ऊपर आई गईरा; होर तुध कुछ टैमा तक काणे बणी रहणा होर सूरज नी देखी सकणा, तेबे झटपट धुई होर न्हारा तेस पर छाई गया होर से ओरे परे टटोळदा लग्या कि कोई तेसरा हाथ पकडी किन्हें तेस जो चलाये । 12 तेबे राज्यपाले जो कुछ हुएया, देखी किन्हें होर प्रभु रे उपदेसा ले हरान हुई किन्हें विस्वास कितेया । 13 पौलुस होर तेसरे साथी पाफुसा ले जहाजा रे ज्रीए पंफुलिया रे पिरगा मन्झ आये, होर यहुन्ना तिन्हा जो छाडी किन्हें यरुस्लेमा जो वाप्स चली गया । 14 होर पिरगा ले अगे बढी किन्हें पिसिदिया रे अन्ताकिया मन्झ पौहुंचे; होर सब्ता रे ध्याडे आराधनालया

मन्झ जाई किन्हें बैठी गये । 15 होर व्यवस्था होर नबी री काबा जो पढने ले बाद सभा रे मुखिए तिन्हा जो संदेसा भेज्या, कि हे भाईयो, अगर लोका जो सिक्षा देणे रे कठे तुस्सा वाले कुछ वचन आ ता तेस जो सुणाऊआ । 16 तेबे पौलुसे खडे हुई किन्हें होर हाथा किन्हें इसारा करी किन्हें बोल्या; हे इस्राएलियो, होर परमेसरा ले डरने वाळो, सुणा । 17 इन्हा इस्राएली लोका रे परमेसरे आस्सा रे बाब दादे जो चुणी लया, होर जेबे ये मिन्न देसा मन्झ परदेसी हुई किन्हें रहें थे, ता तिन्हा री बढोतरी किती; होर आपणी सामर्थी बाहीं किन्हें तिने स्यों तेथी ले काढे । 18 होर से कोई लगभग चाळी साला तक जंगला मन्झ तिन्हारी सैहन्दा रहया । 19 होर कनान देसा मन्झ सात जातिया रा नास करी किन्हें तिने से धरती इस्राएला रे लोका जो उत्तराधिकरा मन्झ देई दिती । 20 एता ले बाद तिने समुएल नबी तिन्हा मन्झ न्यायी ठैहराये । 21 तेता ले बाद तिन्हे एक राजा मान्गेया; तेबे बिन्यामिना रे गोत्रा मंझा ले एक आदमी यानि किसान रा म्हेठे साउला जो परमेसरे चाळी साला रे कठे तिन्हा जो राजे रे रूपा मन्झ देई दितेया । 22 फेरी तेस जो लग करी किन्हें दाऊदा जो तिन्हा रा राजा बणाया; जेसरे बारे मन्झ तिने गुआही दिती, कि मुंजो एक माहणु यीशै रा म्हेठा दाऊद, मेरे मना रे लायक मिली गईरा । तेस ई मेरी सारी इच्छा पूरी करणी । 23 एसरे बंसा मंझा ले ई आपणे वादे रे मुताबक इस्राएला वाले एक मुकितदाता, यानि यीसू जो भेज्या । 24 जेसरे आऊणे ले पैहले यहुन्ने सभ इस्राएलिया जो मन फिराऊआ रे बमिस्मा रा प्रचार कितेया । 25 होर जेबे यहुन्ना आपणा कामा जो पूरा करणे वाळा था, ता तिने बोल्या, तुस्से मुंजो क्या सम्झया करहा ऐं ? हांऊ से नी आ! पर देखा, मेरे बाद एक आऊणे वाळा आ, जेसरे पैरा रे जूते हांऊ खोळणे रे लायक नी आ । 26 हे भाईयो, तुस्से, जो अब्राहमा री संताना ई; होर तुस्से जो परमेसरा ले डरहा ऐं, तुस्सा वाले ऐस उद्दारा रा वचन भेजिरा । 27 क्युंकि यरुस्लेमा रे रहणे वाळे होर तिन्हारे मुखिए, तेस जो नी पैहचाणी सके, होर ना नबी री गल्ला समझी; जो हर सब्ता रे ध्याडे पढी जाहीं, इधी कठे तेस जो दोषी ठैहराई किन्हें तिन्हा नबिया रे वचना जो पूरा कितेया । 28 जेबकी तिन्हा वाले तेस जो मारणे रे कठे कोई आधार नी था, फेरी भी तिन्हे पिलातुसा ले मांग किती कि से मारी दितेया जाए । 29 होर जेबे तिन्हे तेसरे बारे मन्झ लिखिरी सभ गल्ला पूरी किती, ता तेस जो कूस प्र्याहले ले तुआरी किन्हें कबरा मन्झ रखी दितेया । 30 पर परमेसरे तेस जो मरीरे मंझा ले जीऊन्दा कितेया । 31 होर से तिन्हा जो तेस साउगी गलीला ले यरुस्लेमा जो आईरे थे, से तिन्हा जो बौहत ध्याडे तक सुद्धा रहया; लोका रे साम्हणे एबे स्यों भी गुआह ऐं । 32 होर आस्से तुस्सा जो तेस्सा प्रतिज्ञा रे बारे मन्झ, जो बाब दादे किन्हें कितिरी थी, ये सुसमाचार सुणाहें । 33 कि परमेसरे

यीसू जो जीऊन्दा करी किन्हें, से ई प्रतिज्ञा आस्सा री संताना रे कठे पूरी कित्ती, जेहड़ा दूजे भजना मन्झ भी लिखीरा, कि तू मेरा पुत्र आ; आज मैं ई तुजो जन्म दितिरा।³⁴ होर तेसरे एस तरह मरीरे मंझा ले जीऊन्दे करणे रे बारे मन्झ भी, कि से कधी नी सडे, तिने एहड़ा बोलिरा; कि मां तुजो स्यों पवित्र होर अटल आशीषा देणी जिन्हा जो देणे रा वचन मैं दाऊदा किन्हें कितिरा था।³⁵ इधी कठे तिने एक होर भजना मन्झ भी बोलिरा; कि तूध आपणे पवित्र बंदे जो सड़ने नी देणा।³⁶ क्यूंकि दाऊद ता परमेसरा री इच्छा रे मुताबक आपणे टैमा मन्झ सेउआ करी किन्हें मरी गया; होर आपणे बाब दादे मन्झ जाई मिलेया; होर सड़ी गळी भी गया।³⁷ पर जेस जो परमेसरे मरीरे मंझा ले जीऊंदा कितेया, से सड़ने नी पाया।³⁸ इधी कठे, हे भाईयो; तुस्से जाणी लो कि एसरे ज़ीए पापा री माफ़ी रा समाचार तुस्सा जो दितेया जाहां।³⁹ होर जिन्हा गल्ला ले तुस्से मुस्सा री व्यवस्था रे ज़ीए निर्दोस नी बणी रही सकहा ऐ थे, तिन्हा सभी ले हर एक विस्वास करणे वाळा तेसरे ज़ीए निर्दोष बणहां।⁴⁰ इधी कठे च्त्तन जे रहुआ, केते एहड़ा नी हो, कि जो नबी री क्ताबा मन्झ आईरा, से तुस्सा पर घटी जाए।⁴¹ निंदा करणेवाळ्यो, देखा, हरान हुई जाऊआ होर मरी मिटी जाऊआ; क्यूंकि मैं तुस्सा रे जमाने मन्झ एक काम एहड़ा करहा; एहड़ा काम, कि अगर कोई तुस्सा किन्हें तेसरी चर्चा करे, ता तुस्सा कधी विस्वास नी करणा।⁴² होर जिहां ई स्यों बाहर निकळे लोक तिन्हा किन्हें अरज करदे लगे, कि अगले सब्ता रे ध्याडे आस्सा जो ये गल्ला दबारा सुणाई जाए।⁴³ होर जेबे सभा उठी गयी ता यहूदियों होर यहूदी मता मन्झ आईरे भक्ता मन्झ बौहतिए पौलुस होर बरनबासा रे पीछे हुई गये; होर तिन्हे तिन्हा किन्हें गल्ला करी किन्हें समझाया, कि परमेसरा री दया मन्झ बणी किन्हें रहुआ।⁴⁴ अगले सब्ता रे ध्याडे नगरा रे लगभग सभ लोक परमेसरा रा वचन सुणने जो कठे हुई गये।⁴⁵ पर यहूदी भीड़ा जो देखी किन्हें डाहा किन्हें भहरी गये, होर निंदा करदे हुए पौलुसा री गल्ला रा वरोधा मन्झ बोलदे लगे।⁴⁶ तेबे पौलुसे होर बरनबासे बगैर डरे बोल्या, जरूरी था, कि परमेसरा रा वचन पैहले तुस्सा जो सुणाया जाए; पर जेबकी तुस्से तेस जो दूर करहा ऐ, होर आपणे आपा जो अनंत जींदगी रे लायक नी बणान्दे, ता देखा, आस्से दूजी जातिया री तरफ मुडहा ऐ।⁴⁷ क्यूंकि प्रभुए आस्सा जो ये आज्ञा दितिरी, कि मैं तू दूजी जातिया रे कठे ज्योति बणाईरा; ताकि तू धरती री कनारे तक मुक्ति रा द्वार हो।⁴⁸ ये सुणी किन्हें दूजी जातिया खुस हुई, होर परमेसरा रे वचना री जै जै कार करदे लगे; होर जितने अनंत जींदगी रे कठे ठैहराई गईरे थे, तिन्हे विस्वास कितेया।⁴⁹ तेबे प्रभु रा वचन तेस सारे देसा मन्झ फैहल्दा लग्या।⁵⁰ पर यहूदिये भक्त होर उच्च कुला री जनानिया जो होर नगरा रे

बडे लोका जो भड़काया, होर पौलुस होर बरनबासा रे खलाफ झगडा करवाई किन्हें तिन्हा जो आपणे बन्ने ले बाहर काडी दितेया।⁵¹ तेबे स्यों तिन्हा रे साम्हणे आपणे पैरा री धूल झाड़ी किन्हें इकुनियुमा जो चली गये।⁵² होर चेले खुसी किन्हें पवित्र आत्मा किन्हें भरदे रैहे।

14¹ ईकुनियुमा मन्झ एहड़ा हुएया कि स्यों यहूदिया री आराधनालया मन्झ साउगी साउगी गये, होर एहड़ी गल्ला कित्ती, कि यहूदिया होर युनानिया दुही मंझा ले बौहतिए विस्वास कितेया।² पर तिन्हा यहूदिये जो विस्वास नी करी सके थे, दूजी जातिया जो भड़काया होर भाईया रे खलाफ तिन्हारे मना मन्झ कड़वाहट पैदा करी दिती।³ होर स्यों तेथी बौहत्त ध्याडे तक रुके होर प्रभु रे बारे मन्झ बगैर डरे प्रचार करदे रैहे; होर तिन्हारे ज़ीए प्रभु चिन्ह होर नौखे काम करवाई किन्हें आपणी दया रे वचना री गुआही देहां था।⁴ पर नगरा रे लोका मन्झ फूट पई गई थी, एता ले कितने ता यहूदिया वखा जो, होर कितने प्रेरिता वखा जो हुई गये।⁵ पर जेबे दूजी जातिया होर यहूदिये आपणे मुखिए साउगी मिली किन्हें तिन्हा साउगी बुरा व्यवहार करणे होर तिन्हा पर पत्थरवाह करणे री चाल चली।⁶ ता पौलुस होर बरनबासा जो एस गल्ला रा पता चली गया होर स्यों लुकाउनिया रे लिस्तरा होर दिरबे जेहडे नगरा होर ओरले परले रे नगरा मन्झ चली गये।⁷ तेथी भी स्यों सुसमाचारा रा प्रचार करदे रैहे।⁸ लिस्तरा मन्झ एक आदमी बैठिरा था; जो पैरा ले कमजोर था, से जन्मा ले ई लंगड़ा था, होर कधी नी चल्लिरा था।⁹ से पौलुसा जो गल्ला करदे सुणेया करहा था होर इने तेस वखा जो टकटकी लगाई किन्हें देख्या कि एस जो ठीक हुई जाणे रा विस्वास आ।¹⁰ होर जोरा जोरा किन्हें बोल्या, आपणे पैरा रे भारे सीधा खड़ा हुई जा: तेबे से उछली किन्हें चलदा फिरदा लग्या।¹¹ लोके पौलुसा रा ये काम देखी किन्हें लुकाउनिया भाषा मन्झ चिल्लाई किन्हें बोल्या; देवते आस्सा वाले आई गईरे।¹² होर तिन्हे बरनबासा जो ज्यूस, होर पौलुसा जो हिरमेस बोल्या, क्यूंकि ये गल्ला करणे मन्झ खास था।¹³ तिबे ज्युसा रा पुजारी जेसरा मंदर जो नगरा रे साम्हणे था, बली रे कठे जानवर होर फुला रे हार फटका पर ल्याई किन्हें लोका साउगी बली करणा चाहां था।¹⁴ पर बरनबास होर पौलुस प्रेरिते जेबे सुणेया, ता आपणे कपडे फाड़ी दिते, होर भीड़ा वखा चिलांदे चिलांदे लपके।¹⁵ होर बोल्दे लगे; हे लोको तुस्से क्या करेया करहा ऐ? आस्से भी ता तुस्सा साहीं दु:ख सुख भोगी माहणुं ऐं, होर तुस्सा जो सुसमाचार सुणाहें, कि तुस्से इन्हा बेकार चीजा ले लग हुई किन्हें जींदे परमेसरा री तरफ फिरा, जिने जे स्वर्ग होर धरती होर द्रयाऊ होर जो कुछ तिन्हा मन्झ आ बणाया।¹⁶ तिने पिछले टैमा मन्झ सभ जातिया जो आपणे आपणे रस्ते मन्झ

जाणे दितेया । 17 तेबे भी तिने आपणे आपा जो बगैर गुआहे नी छाडेया; पर से भलाई करदा रैहया, होर सर्गा ले बरखा होर फलदाई मौसम देई किन्हें, ये ई तुस्सा जो खाणा देहां होर तुस्सा रे मना जो खुसी किन्हें भरी देहां । 18 ये बोली किन्हें भी तिन्हे लोका जो बडी मुस्किला किन्हें रोकेया कि तिन्हारे कठे बली नी चढाये । 19 पर कितने यहूदिये अन्ताकिया होर इकुनियुमा ले आई किन्हें लोका जो आपणे वखा जो करी लया, होर पौलुसा जो पत्थरवाह कितेया, होर मरीरा समझी किन्हें तेस जो नगरा ले बाहर घसीटी किन्हें लई गये । 20 पर जेबे चेले तेसरे चारो तरफ आई किन्हें खहडी गये, ता से उठी किन्हें नगरा मन्झ गया होर दूजे ध्याडे बरनबासा साउगी दिरबे जो चली गया । 21 होर स्यों तेस नगरा रे लोका जो सुसमाचार सुणाई किन्हें, होर बौहत सारे चेले बणाई किन्हें, लुम्बा होर इकुनियुम होर अन्ताकिया जो वाप्स आई गये । 22 होर चेले रे मना जो मजबूत करदे रैहे होर ये उपदेस देंदे रैहे, कि आस्सा जो बडे दुःख सही किन्हें परमेसरा रे राजा मन्झ प्रवेस करणा पऊणा । 23 होर तिन्हे हर एक कलीसिया मन्झ तिन्हारे कठे प्राचीन नियुक्त किते, होर उपवासा साउगी प्रार्थना करी किन्हें, तिन्हा जो प्रभु रे हाथा मन्झ सौम्पेया जेस पर जे तिन्हे विस्वास कितेया था । 24 होर पिसिदिया ले हुंदे हुए स्यों पंफुलिया मन्झ पौहुंचे; 25 होर पिरगा मन्झ वचन सुणाई किन्हें अतालिया मन्झ आये । 26 होर तेथी ले जहाजा ले अन्ताकिया मन्झ आये, जेथी ले स्यों तेस कामा रे कठे जो तिन्हे पूरा कितेया था परमेसरा री दया पर सौपी गईरे थे । 27 तेथी पौहुंची किन्हें, तिन्हे कलीसिया कठी किते होर दस्या, कि परमेसरे आस्सा साउगी केहडे बडे बडे काम किते! होर दूजी जातिया रे कठे विस्वासा रा द्वार खोल्ही दितेया । 28 होर स्यों चेले साउगी बौहत ध्याडे तक रैहे ।

15 1 फेरी कितने लोक यहूदिया ले आई किन्हें भाईया जो सिखांदे लगे कि अगर मुस्सा री विधि रे मुताबक तुस्सा रा खतना नी हुईरा ता तुस्सा रा उद्धार नी हुई सकदा । 2 जेबे पौलुस होर बरनबासा रा तिन्हा किन्हें झगडा होर बैहस हुई ता ये तय कितेया, कि पौलुस होर बरनबास, होर आस्सा मन्झा ले कितने होर आदमी एस गल्ला रे बारे मन्झ यरुस्लेमा जो प्रेरिता होर प्राचीना वाले जाए । 3 इधी कठे मंडलीए स्यों कुछ दुरा तक पौहुन्चाए; होर स्यों फिनिके होर सामरिया ले हुंदे हुए दूजी जातिया रे मन फिराऊ रा समाचार सुणान्दे गये, होर सभ भाईया जो बौहत खुस कितेया । 4 जेबे यरुस्लेमा मन्झ पौहुंचे, ता कलीसिया होर प्रेरित होर प्राचीन तिन्हा किन्हें खुसी साउगी मिले, होर तिन्हे दस्या कि परमेसरे तिन्हा साउगी केहडे केहडे काम किते थे । 5 पर फरिसिया रे मता मंझा ले जिन्हें विस्वास कितेया था, तिन्हा मंझा ले कितने लोके उठी

किन्हें बोल्या, कि तिन्हा जो खतना करवाणा होर मुस्सा री व्यवस्था जो मन्घणे रा हुकम देणा चाहिए । 6 तेबे प्रेरिते होर प्राचीने एस गल्ला रे बारे मन्झ विचार करने रे कठे, कठे हुए । 7 तेबे पतरसे बौहत बैहसा ले बाद खहडी किन्हें तिन्हा किन्हें बोल्या, हे भाईयो, तुस्से जाणहां ऐं, कि बौहत ध्याडे हुए, कि परमेसरे तुस्सा मंझा ले मुंजो चुणी लया, कि मेरे मुंहा ले दूजी जातिया सुसमाचारा वचन सुणी किन्हें विस्वास करे । 8 होर मना जो जाणने वाळे परमेसरे तिन्हा जो भी आस्सा साहीं पवित्र आत्मा देई किन्हें तिन्हा री गुआही दिती । 9 होर विस्वास करणे रे ज्रीए तिन्हारे मन पवित्र करी किन्हें आस्सा मन्झ होर तिन्हा मन्झ कुछ भेद नी रखेया । 10 ता एबे तुस्से परमेसरा री परीक्षा किधियो करेया करहा ऐ? कि चेले री क्याडी पर एहडाजुडा रखे, जेस जो आस्सा रे बाबदादे नी चकी सके थे होर ना आस्से चकी सकहा ऐ । 11 पर आस्से विसवास करहा ऐ कि जिहां स्यों प्रभु यीसू री दया रे ज्रीए उद्धार पाहें; तिहां ई आस्सा भी उद्धार पाणा । 12 तेबे सारी सभा चुपचाप हुई किन्हें बरनबास होर पौलुसा री सुणदी लगी, कि परमेसरे तिन्हा रे ज्रीए दूजी जातिया मन्झ केहडे केहडे चमत्कार होर नौखे काम दसे । 13 जेबे स्यों चुप हुए, ता याकूब बोल्दा लग्या, कि 14 हे भाईयो, मेरी सुणां: समौने दस्या, कि परमेसरे दूजी जातिया मंझा ले कुछ लोका जो आपणे नांऊआं रे कठे चुणी किन्हें सभी ले पैहले केहडा प्यार प्रगट कितेया । 15 नबीया रे वचन भी इन्हा गल्ला किन्हें मेल खाहां ऐं; जेहडा कि लिखी गईरा: 16 मां एता ले बाद आई किन्हें दाऊदा रा पई रा डेरा खडा करणा, होर तेसरे खंडहर दबारा बणाणे, होर मां एता री स्थापना करणी । 17 इधी कठे कि बाकी माहणु, मतलब सभ दूजी जातिया जो मेरे नांऊआं ले जाणी जाहीं, प्रभु जो टोळे । 18 ये ई गल प्रभु बोल्हा जो संसारा री सुरुआता ले इन्हा गल्ला रा समाचार देंदा आया । 19 इधी कठे मेरा विचार ये आ, कि दूजी जातिया मंझा ले जो लोक परमेसरा री तरफ फिरहा ऐ, आस्से तिन्हा जो दुःख नी दे । 20 बल्कि आस्सा जो तिन्हा वाले लिखी भेजणा चाहिए कि स्यों मुर्तिया रे ज्रीए अपवित्र कितेरे खाणे ले बचे, होर व्यभिचार होर गळा घुटिरा मासा ले होर खुना ले परे रैहे । 21 क्यूंकि पुराणे टैमा ले मुस्सा री व्यवस्था री विधि रा पाठ करणे वाळे नगरा - नगरा मन्झ पाए जाहें थे । हर सब्ता रे ध्याडे मुस्सा री व्यवस्था री विधि रा प्रार्थना सभा मन्झ पाठ हुंदा रैहया । 22 तेबे प्रेरित होर प्राचीने सारी कलीसिया साउगी मिली किन्हें ये फैसला कितेया कि तिन्हा मंझा ले ई कुछ लोका जो छांटी किन्हें मतलब यहूदा जेस जो बरसब्बा बोल्हा ऐं, होर सिलास, जो भाईया मन्झ खास थे; पौलुस होर बरनबासा साउगी अन्ताकिया भेजे जाए । 23 होर तिन्हारे हाथ ये लिखी किन्हें भेज, कि अन्ताकिया होर सुरिया होर किलिकिया रे रैहणे

वाळे भाईया जो, जो दूजी जातीया मंझा ले ऐ, प्रेरिता होर प्राचीना जो भाईया रा नमस्कार।²⁴ आस्से सुणीरा, कि आस्सा मंझा ले बौहत जणे तेथी जाई किन्हें, तुस्सा जो आपणी गल्ला ले डराई दितिरा; होर तुस्सारे मन उल्ट पुल्ट दितिरे, पर आस्से तिन्हा जो हुक्म नी दितिरा था।²⁵ इधी कठे आस्से एक मन हुई किन्हें ठीक सम्झेया, कि चुणी रे आदमिया जो आपणे प्यारे बरनबास होर पौलुसा साउगी तुस्सा वाले भेजे।²⁶ ये ता एहडे माहणु ऐ, जिन्हें जे आपणे प्राण आस्सा रे प्रभु यीसू मसीहा रे नांऊआं रे कठे जोखिमा मन्झ पाई रे।²⁷ होर आस्से यहूदा होर सिलासा जो भेज्या करहा ऐ, तिन्हा तुस्सा जो आपणे मुंहा लेये सभ गल्ला दसणी।²⁸ पवित्र आत्मा जो होर आस्सा जो ये ई ठीक लग्या कि तुस्सा पर इन्हा जरूरी गल्ला रे आलावा होर केसी गल्ला रा भार नी पाया जाए:²⁹ कि तुस्से मूर्ति पर चढाई रे खाणा ले, खुना ले, गळा घुटी किन्हें मारी रे मासा ले, होर व्यभिचारा ले बची किन्हें रहो। अगर तुस्से इन्हा ले दूर रहंगे ता तुस्सा रा भला हूणा, अगे सुभ हो।³⁰ फेरी स्यों तेथी ले विदा हुई गए होर अन्ताकिया पौहुन्चे, होर तेथी तिन्हे सभा बुलाई होर तिन्हा जो से पत्री देई दिती।³¹ पत्री पढी किन्हें तिन्हा जो बडा हौसला मिलेया होर तेस उपदेसा री गल्ला ले स्यों बौहत खुस हुए।³² होर यहूदा होर सीलासे जो आपु भी नबी थे, बौहत प्रवचन दिते होर भाईया जो उपदेस देई किन्हें मजबूत कितेया।³³ स्यों तेथी कुछ टैमा तकरैहे होर भाईए तिन्हा जो सांती किन्हें तिन्हा वाले भेजी दितेया जिन्हें जे तिन्हा जो भेजिरा था।³⁴ पर सिलासा जो तेथी रहणा खरा लग्या।³⁵ होर पौलुस होर बरनबास अन्ताकिया मंझ रही गये; होर बौहत सारे दूजे लोका किन्हें तिन्हे प्रभु रे वचना रा उपदेस देंदे हुए लोका मन्झ सुसमाचार रा प्रचार कितेया।³⁶ कुछ ध्याडे बाद बरनबासे पौलुसा किन्हें बोल्या, आऊआ, जिन्हा जिन्हा नगरा मन्झ आस्से प्रभु रे वचना रा प्रचार कितेया, तेथी आपणे भाईया वाले वाप्स चली किन्हें ये देख्हाए किस्सों क्या कुछ करेया करहा ऐ? ³⁷ बरनबास चाहां था कि यहूदा जेस जो जे मरकुस भी बोल्हा ऐ, तेस जो तिने आपणे साउगी नीणेरा विचार कितेया।³⁸ पर पौलुसे तेस जो, जो पंफुलिया मन्झ तिन्हा ले लग हुई गया था, होर कामा पर तिन्हा साउगी नी गया, साउगी नीणा ठीक नी सम्झेया।³⁹ फेरी एहडा टांटा हुएया कि स्यों एक दूजे ले लग हुई गये: होर बरनबास मरकुसा जो लई किन्हें जहाजा पर कुपुसा जो चली गया।⁴⁰ पर पौलुसे सिलासा जो चुणी लया, होर भाईए तेस जो परमेसरा री दया पर सौंपी किन्हें तेथी ले चली गये।⁴¹ होर कलीसिया जो मजबूत करदे हुए, सुरिया होर किलिकिया ले हुंदे हुए निकळेया।

16 फेरी से दिरबे होर लुख्रा मन्झ भी गया, होर देखा, तेथी तिमिथियुस नांऊआं रा एक चेला था, जो केसी

विस्वासी यहूदिनी रा म्हठा था, पर तेसरा बाब यूनानी था।² से लुख्रा होर इकुनियुमा रे भाईया मन्झ इज्जतदार था।³ पौलुस तिमिथियुसा जो यात्रा पर आपणे साउगी ले जाणा चाहेया था, इधी कठे तिने तेस जो साउगी लई लया होर तिन्हा जगहा पर रहणे वाळे यहूदीया री वजहा ले तेसरा खतना कितेया; क्यूंकि स्यों सभी जाणहां ऐं थे कि तेसरा बाब एक यूनानी था।⁴ होर नगरा नगरा जांदे हुए तिन्हे तेथी रे लोका जोतिन्हा नियमा रे बारे मन्झ दस्या जो यरुस्लेमा रे प्रेरिते होर प्राचीने तय कितीरे थे।⁵ इस तरह ता तेथी री कलीसिया विस्वासा मन्झ मजबूत हुन्दी गई होर गिणती मन्झ रोज बधदी गई।⁶ होर स्यों फ्रुगिया होर ग्लातिया देसा मंझा ले हुई किन्हें गये, होर पवित्र आत्मे तिन्हा जो एसिया मन्झ वचन सुणाणे जो नांह किती।⁷ होर तिन्हे मुसिया रे नेडे पौहुंची किन्हें, बितुनिया मन्झ जाणा चाहेया; पर यीसू री आत्मे तिन्हा जो जाणे नी दितेया।⁸ इधी कठे स्यों मुसिया ले हुई किन्हें त्रोआस पूजे।⁹ होर पौलुसे राती एक दर्सन देख्या कि एक मकिदुनी आदमी खहड़ी किन्हें तेस ले अरज करी किन्हें बोल्हा, कि पार उतरी किन्हें मकिदुनिया मन्झ आऊ; होर आस्सा री मदद कर।¹⁰ एस दर्सना जो देखणे ले बाद आस्से झटपट मकिदुनिया जाणा चाहेया, ये समझी किन्हें, कि परमेसरे आस्सा जो तिन्हा जो सुसमाचार सुणाणे रे कठे सादिरा।¹¹ इस तरह आस्से त्रोआसा ले पाणी रे रस्ते जाणे रे कठे आपणी किस्तिया खोल्ही दिती होर सीधे समोश्राके जाई पूजे; फेरी अगले ध्याडे नियापुलिसा जो चली गये।¹² तेथी ले आस्से फिलिप्पी पूजे, जो मकिदुनिया प्रदेसा रा एक खास नगर होर रोमिया री बस्ती ई; होर आस्से तेस नगरा मन्झ कुछ होर ध्याडे तक रहै।¹³ फेरी सब्ता रे ध्याडे आस्से नगरा रे फाटका रे बाहर नदी रे बाहडे ये समझी किन्हें गये, कि तेथी प्रार्थना करने रे कठे कोई जगह हुणी; होर बैठी किन्हें तिन्हा जनानिया किन्हें जो कठी हुई री थी, तिन्हा किन्हें गल्ला करदे लगे।¹⁴ होर लुदिया नांऊआं री एक जनाने थी जो बैजनी रंगा रे कपडे बेचणे वाळी परमेसरा री एक भक्तण थी; से बडे ध्याना किन्हें आस्सा री गल्ला सुणेया करहा ई थी, प्रभुए तेस्सारे दिला रे द्वार खोल्ही दिते ताकि जो कुछ पौलुस बोल्या करहा था; से तिन्हा गल्ला पर ध्यान देई सके।¹⁵ आपणे पुरे टब्बरा समेत बभिस्मा लैणे ले बाद तिने आस्सा किन्हें ये बोल्दे हुए अरज किती, अगर तुस्से मुंजो प्रभु री सची भक्तण मन्हां ऐं ता आऊआ होर मेरे घरा रुका; होर से आस्सा जो मन्नाई किन्हें लई गई।¹⁶ जेबे आस्से प्रार्थना करणे री जगहा जाया करहा ऐ थे, ता आस्सा जो एक दासी मिली जेस्सा मन्झ भविष्यवाणी करणे वाळी आत्मा थी; होर भविष्यवाणी करी किन्हें आपणे मालका रे कठे बौहत सारा पैसा कमाई किन्हें ल्याहुआं ई थी।¹⁷ से पौलुसा रे होर आस्सा रे पीछे आई किन्हें चिलांदी लगी,

कि ये माहणु परम प्रधान परमेसरा रा दास आ, जो आस्सा जो मुक्ति रे रस्ते री कथा सुणाया करहा । 18 से बौहत ध्याडे तक एहडा ई करदी रही, पर पौलुस दुखी हुई गया, होर मुंह फेरी किन्हें तेस आत्मा किन्हें बोल्या, हांऊ तुजो यीसू नांऊआं ले हुक्म देहां, कि तेस्सा मंझा ले निकळी जा होर सेतेस ई टैम निकळी गई । 19 जेबे तेस्सा रे मालके देख्या, कि आस्सा री कमाई री आस चली गई, ता तिन्हे पौलुस होर सिलासा जो पकड़ी किन्हें चौका मन्झ प्रधाना वाले खींजी किन्हें लई गये । 20 फेरी स्यों तिन्हा जो न्यायधिसा वाले लई गये होर बोल्या, ये लोक यहूदी ऐ होर आस्सा रे नगरा मन्झ गड़बड़ी फैहलाया करहा ऐ । 21 होर एहडे रीति रिवाजा री वकालत जिन्हा जो मन्नणा या जिन्हा पर चलणा आस्सा रोमिया रे कठे ठीक नी आ । 22 तेबे भीड़ा रे लोक तिन्हा रे त्रोध्रा मन्झ कठे हुई किन्हें तिन्हा रे खिलाफ हुई गये; होर न्यायधिसे तिन्हा रे कपड़े फाड़ी किन्हें तुआरी दिते, होर तिन्हा जो बैत मारणे रा हुक्म दितेया । 23 होर बौहत बैत लगाई किन्हें तिन्हा जो जेहला मन्झ पाई दितेया; होर दरोगा जो हुक्म दितेया, कि तिन्हा री चौकसी रख्या । 24 तिने एहडा हुक्म पाई किन्हें तिन्हा जो अंदरले वाळे कमरे मन्झ रख्या होर तिने तिन्हा रे पैर लकड़ी मन्झ कसी दिते । 25 लगभग आधी राती पौलुस होर सिलास प्रार्थना करी किन्हें परमेसरा रे भजन गाया करहा ऐ थे, होर कैदी तिन्हारी सुणेया करहा ऐ थे । 26 कि इतने मन्झ अचानक बड़ा हिलण हुआ, एथी तक कि जेहला री नींव हिली गई, होर झटपट सभ दरवाजे खुल्ली गये; होर सभ री बंधन खुल्ली गये । 27 होर दरोगा जागी गया, होर जेहला रे दरवाजे खुल्ले देखी किन्हें समझी गया कि कैदी भगी गये, इधी कठे तिने तलवार काढी किन्हें आपणे आपा जो मारी देणा चाहेया 28 पर पौलुसे जोरा किन्हें बोल्या; आपणे आपा जो कुछ नुक्सान नी पौहुंचा, क्यूंकि आस्से सभ एथी ऐ । 29 होर तिने दिया मंगवाई किन्हें अन्दर गया, होर काम्मदा हुई किन्हें पौलुस होर सिलासा रे पैरा पई गया । 30 होर तिन्हा जो बाहर ल्याई किन्हें बोल्या, हे श्रीमान जी, मुक्ति पाणे रे कठे हांऊ क्या करूँ? 31 तिन्हे बोल्या, प्रभु यीसू मसीह पर विस्वास कर, ता तुध होर तेरे टब्बरा मुक्ति पाणी । 32 होर तिन्हे तेस जो, होर तेसरे सारे घराने रे लोका जो प्रभु रा वचन सुणाया । 33 होर राती तेस ई टैम तिने तिन्हा जो लई जाई किन्हें तिन्हा रे जख्म धोए, होर तिने आपणे सभ लोका समेत झटपट बसिस्मा लया । 34 होर तिने तिन्हा जो आपणे घरा मन्झ लई जाई किन्हें, तिन्हा रे साम्हणे खाणा रख्या होर सारे टब्बरा समेत परमेसरा पर विस्वास करी किन्हें खुसी मनाई । 35 जेबे ध्याडा सुरहु हुआ तेबे न्यायधिसे पैहरादारा जो तेथी भेज्या कि तिन्हा माहणुआं जो छाडी देआ । 36 दरोगे ये गल्ला पौलुसा किन्हें बोली दिती, कि न्यायधिसे तुस्सा जो छाडणे रा

हुक्म देई दितीरा, इधी कठे निकळी किन्हें सांति किन्हें चली जाऊआ । 37 पर पौलुसे तिन्हा किन्हें बोल्या, कि आस्से जो रोमी माहणु ऐ, दोसी ठेहराए बगैर, लोका रे साम्हणे मारेया, होर जेहला मन्झ पाया, होर एभे चुपके चुपके स्यों आस्सा जो बाहर भेजी देणा चाहें, पक्का एहडा नी हुणा; हुणा ता ये चहिए कि स्यों आपु आई किन्हें आस्सा जो बाहर काहडे । 38 पैहरेदारे ये गल्ला न्यायधीसा किन्हें बोली दिती, होर स्यों ये सुणी किन्हें कि ये रोमी ऐ, डरी गये । 39 होर तिन्हे आई किन्हें स्यों मन्नाई लये, होर बाहर लई जाई किन्हें अरज किती कि स्यों नगरा ले चले जाए । 40 स्यों जेहला ले निकळी किन्हें लुदिया रे घरा जो चली गये, होर भाईया किन्हें मिली किन्हें तिन्हा जो सांति दिती, होर चली गए ।

17 ¹ फेरी स्यों अम्फिपुलिस होर अपुल्लोनिया हुई किन्हें थिस्सलुनिके मन्झ आए जेथी यहूदिया रा एक आराधनालया था । ² होर पौलुस आपणे रवाजा रे मुताबक तिन्हा वाले चली गया, होर तीन सब्ता रे ध्याडे पवित्र सास्त्रा ले तिन्हा किन्हें बैहस करदा रहैया । ³ होर तिन्हा रा मतलब खुल्ली किन्हें समझाहां था, कि मसीह जो दुःख उठाणा, होर मरीरे मंझा ले जीउंदे हुणा जरूरी था; होर ये ई यीसू जेसरी मैं तुस्सा जो कथा सुणाहां, मसीह आ । ⁴ तिन्हा मंझा ले कुछ लोक सैहमत हुई गये, पौलुस होर सिलासा रे मता मन्झ मिली गये; होर परमेसरा ले डरने वाळे अनगिनित यूनानी भी तिन्हा मन्झ मिली गये; इन्हा मन्झ बौहत सारी खास जनानिया भी मिली गई । ⁵ पर यहूदिये डाहा किन्हें भहरी किन्हें बजारू लोका मंझा ले कई बुरे माहणुआं जो आपणे साउगी म्लाई लया, होर भीड़ लगाई किन्हें नगरा मन्झ हुल्लड म्चांदे लगे, होर यासोना रे घरा पर धावा बोली दितेया होर ये किसिस करदे लगे कि कीहां नी किहां पौलुस होर सिलासा जो लोका रे साम्हणे लई आए । ⁶ पर जेबे तिन्हा जो स्यों नी मिले, ता चिल्लाई किन्हें यासोना होर बौहत सारे भाईया जो नगरा रे हाकमा रे साम्हणे खींजी किन्हें ल्यान्दे, कि ये लोक जिन्हें जे सारी दुनिया मन्झ उथल पुथल मचाई रखिरी, होर एबे एथी भी आई गईरे । ⁷ होर यासोने इन्हा जो बड़ी इज्जता किन्हें आपणे घरा रखिरा, होर ये सभ के सभ ये बोल्हा ऐ कि यीसू राजा आ, कैसरा रे हुकमा रा वरोध करहा ऐ । ⁸ तिन्हे लोका जो होर नगरा रे हाकमा जो ये सुणाई किन्हें डराई दितेया । ⁹ होर तिन्हे यासोन होर बाकी लोका किन्हें जमानत लई किन्हें तिन्हा जो छाडी दितेया । ¹⁰ भाईया जो झटपट रातो रात पौलुस होर सिलासे विरिया मन्झ भेजी दितेया; होर स्यों तेथी पौहुंची किन्हें यहूदिया रे आराधनालया मन्झ गये । ¹¹ ये लोक ता थिस्सलुनिके रे यहूदिया ले भी खरे थे होर तिन्हे बड़ी लगना किन्हें वचन मन्नेया, होर हर रोज पवित्र सास्त्रा मन्झ छानबीण करदे रहे कि ये गल्ला जो पौलुसे

दसी क्या स्यों सची ई कि नी? ¹² इधी कठे तिन्हा मंझा ले बौहतिए, होर तिन्हा साउगी इज्जतदार यूनाना री जनाने होर मर्ध विस्वास कितेया। ¹³ पर जेबे थिस्सलुनिके रे यहूदी जाणी गये, कि पौलुस बिरिया मन्झ भी परमेसरा रा वचन सुणाहां, ता स्यों तेथी भी आई पूजे होर लोका जो भडकान्दे होर हलचल म्चांदे लगे। ¹⁴ तेबे भाईए झटपट पौलुसा जो भेजी दितेया, कि जितना दूर हुई सके द्रयाऊआ रे बाहडे चली जाए; पर सिलास होर तिमीथियुस तेथी रही गये। ¹⁵ पौलुसा जो लई जाणे बाळे लोके से एथेंसा पुजाई दितेया होर सिलास होर तिमीथियुसा रे कठे ये हुकम दितेया कि स्यों भी जल्दी जल्दी तेस वाले आई जाए। ¹⁶ जेबे पौलुस एथेंसा मन्झ तिन्हा रा इन्तजार करेया करहा था, ता नगरा जो मूर्ति किन्हें भहरी रा देखी किन्हें तेसरा मन फुछ्ही गया। ¹⁷ इधी कठे से आराधनालया मन्झ यहूदिया होर भक्ता किन्हें होर चौका मन्झ जो लोक मिल्ला ऐ थे, तिन्हा किन्हें हर रोज बैहस करहा था। ¹⁸ तेबे इपिकुरी होर स्तोईकी विद्वान भी तेस किन्हें बैहस करदे लगे, होर तिन्हा मन्झा ले कुछ लोके बोल्या, ये बकवास करणे बाळा क्या बोल्हा? पर होरिये बोल्या; कि से दूजे केसी होरी देवते रा प्रचारक लग्हा, क्यूंकि से यीसू रा, होर पुनरुत्थाना रा सुसमाचार सुणाया करहा था। ¹⁹ तेबे स्यों तेस जो आपणे साउगी अरियुपगुसा री सभा मन्झ लई गये होर पुछेया, क्या आस्से जाणी सक्हा ऐं, कि ये नऊआं मत जो तू सुणाया करहा, क्या आ? ²⁰ क्यूंकि तू नौखी गल्ला आस्सा जो सुणाया करहा, इधी कठे आस्से जाणना चाहें कि इन्हा रा मतलब क्या आ? ²¹ इधी कठे कि सभ एथेंसा रे लोक होर जो परदेसी तेथी रैहयां थे नौई नौई गल्ला बोलणे होर सुणने रे अलावा होर केसी कामा मन्झ टैम नी काह्दे थे। ²² तेबे पौलुसे अरियुपगुसा रे साम्हणे खडे हुई किन्हें बोल्या, हे एथेंसा रे लोको! हांऊ देख्या करहा कि तुस्से हर गल्ला मन्झ बडे धर्मी ऐ। ²³ क्यूंकि मैं घुमदे फिरदे हुए तुस्सा रे पूजा पाठ करणे री चीजा जो देख्या करहा था, ता एक एहडी बेदी भी मिली, जेस पर ये लिखीरा था, कि "अनजाने ईश्वरा रे कठे" इधी कठे जेसरी जे तुस्से बगैर जाणे फ्छयाणे पूजा करहा ऐ, हांऊ तुस्सा जो तेसरा वचन सुणाहां। ²⁴ जिने परमेसरे धरती होर जो कुछ एस संसारा मन्झ आ सभ कुछ बणाईरा, से स्वर्ग होर धरती रा माल्क हुई किन्हें हाथा रे बणाईरे मंदरा मन्झ नी रैहन्दा। ²⁵ तेस जो केसी चीजा री कमी नी ई, इधी कठे से माहणु रे हाथा री सेउआ रा मौहताज नी आ, क्यूंकि से ता आपु ई सभी जो जींदगी होर साह होर सब कुछ देहां। ²⁶ एक ई माहणु ले तिने माहणुआं री सभ जातिया बणाई ताकि स्यों सारी धरती पर बसी जाए होर तिने ई लोका रा टैम तय कितेया होर तेस जगहा री, जेथी जे स्यों रैहयां ऐ, सीमा बान्ही दिती। ²⁷ ताकि स्यों तेस जो टोळी सके, हुई सक्हा कि स्यों तेस जो टोळी किन्हें तेस तक पौहंची सक्हा

ऐ; तेबे बी से आस्सा मंझा ले केसी ले भी दूर नी आ। ²⁸ क्यूंकि तेस मन्झ ई आस्से जीउंदे ऐ, होर चलदे फिरदे, होर तेस मन्झ ई आस्सा री पैहचान ई; ठीक इस तरहा इहां ई कुछ कविये आपणे आप बोलिरा; क्यूंकि आस्से भी तेसरे बच्चे ऐ। ²⁹ परमेसरा रे बच्चे हुणे रे नाते आस्सा जो कधी ये सोचणा नी चाहिए कि परमेसरा अस्तित्व सोने री, चांदी री या पात्थरा री बणी री माहणुआं री कल्पना या कारीगरा रे हाथा ले बणी री केसी मूर्ति साहीं आ। ³⁰ इधी कठे परमेसरे अज्ञानता रे युगा जो नजर अंदाज करी किन्हें एबे हर जगहा सभ माहणुआं जो मन फिराणे रा हुकम देहां। ³¹ क्यूंकि तिने एक धयाडा तय कितिरा, जेबे तेस आपणे नियुक्त कितेरे एक माहणु रे ज्रीए धर्मा किन्हें संसारा रा न्याय करणा, तेस जो मरीरे मन्झा ले जीउंदा करी किन्हें, तिने सभी जो एस गल्ला रा सबूत दितेया। ³² जेबे तिन्हे मरीरे मंझा ले जीउंदे हुणे री गल सुणी ता तिन्हा मंझा ले कुछ ता तेसरी हास्सी डूआन्दे लगे पर कुछ लोके बोल्या, आस्से एस बारे मन्झ तेरा प्रचार फेरी कधी दबारा सुणघे। ³³ इधी कठे पौलुस तिन्हा मंझा ले उठी किन्हें बाहर चली गया। ³⁴ पर कई माहणु तेस साउगी मिली गये, होर विस्वास कितेया, जिन्हा मन्झ अरियुपगुस रा सदस्य दियुनुसियुस था, होर दमरिस नांऊआं री एक जनाने होर तिन्हा साउगी होर भी बाकीलोक थे।

18 ¹ एता ले पौलुस एथेंसा जो छाडी किन्हें कुरिन्थियुसा जो चली गया। ² तेथी से पुन्तुसा रा निवासी अक्किला नांऊआं रे एक यहूदी किन्हें मिलेया; जो नऊआं नऊआं आपणी लाडी प्रिसकिल्ला साउगी इतालियाले आईरा था, क्यूंकि क्लौदियुसे सभ यहूदिया जो रोमा ले निकळी जाणे रा हुकम दितिरा था, इधी कठे पौलुस तिन्हा वाले चली गया। ³ होर तिन्हारा काम धंधा एक ई था इधी कठे से तिन्हा साउगी रैहया होर काम करदा लग्या होर स्यों तम्बू बनाणे रा काम करहा ऐ थे। ⁴ होर से हर एक सन्ता रे ध्याडे आराधनालया मन्झ बैहस करी किन्हें यहूदिया होर युनानिया जो समझाणें रा जतन करहा था। ⁵ जेबे सिलास होर तिमीथियुस मकिदुनिया ले आए, ता पौलुसे आपणा सारा टैम वचना रे प्रचारा मन्झ लगाई रखिरा था, से यहूदिया जो गुआही देई किन्हें साबित करहा था कि यीसू ई मसीह आ। ⁶ पर जेबे स्यों ब्रोध होर निंदा करदे लगे, ता तिने आपणे कपडे झाडी किन्हें तिन्हा किन्हें बोल्या; तुस्सा रा खून तुस्सा रे सिरा पर रहे; हांऊ निर्दोष आ, एबे मुंजो कोई सरोकार नी आ, एबे मां दूजी जातिया वाले चली जाणा। ⁷ होर तेथी ले चली किन्हें से तीतुस युस्तुस नांऊआं रे एक परमेसरा रे भक्ता रे घरा मन्झ आया; जेसरा घर आराधनालया साउगी बणीरा था। ⁸ तेबे आराधनालया रे मुखिए क्रिस्पुसे आपणे सारे टब्बरा समेत प्रभु पर विस्वास कितेया; होर बौहत सारे कुरिन्थी सुणी किन्हें विस्वास ल्याए होर बसिस्मा लया। ⁹ होर प्रभुए राती दर्सना रे

ज्रीए पौलुसा किन्हें बोल्या, डर नी, पर बोल्दा रैह होर चुपचाप मत हो।¹⁰ क्यूंकि हांऊ तेरे साउगी आ; इधी कठे तेरे पर हमला करी किन्हें कोई भी तुजो नुकसान नी पौहुन्चाई सकदा क्यूंकि एस नगरा मन्झ मेरे बौहत सारे लोक ऐ।¹¹ इधी कठे पौलुस तेथी डेढ साला तक परमेसरा रे वचना री शिक्षा तिन्हा जो देंदा रैहया।¹² जेबे अखाया रा राज्यपाल गल्लियो था तेबे ई यहूदीये एक जुट हुई किन्हें पौलुसा पर धावा बोली दितेया होर तेस जो पकड़ी किन्हें अदालता मन्झ लई गये।¹³ होर बोल्दे लगे, ये आदमी लोका जो परमेसरा री पूजा एहडे ढंगा किन्हें करणे रे कठे बैहकाया करहा जो व्यवस्था रे खिलाफ ई।¹⁴ पर जेबे पौलुस बोलणे ई वाळा था; ता गल्लिये यहूदिया किन्हें बोल्या, हे यहूदियो, अगर ये कुछ अन्याय या दुष्टता री गल्ला हुन्दी ता ठीक था कि हांऊ तुस्सा री सुणदा।¹⁵ पर अगर ये बैहस सिर्फ शब्दा, होर नांऊआं, होर तुस्सा री व्यवस्था रे बारे मन्झ ई, ता तुस्से ही जाणा; क्यूंकि हांऊ इन्हा गल्ला रा न्यायी नी बणना चाहन्दा।¹⁶ होर तिने तिन्हा जो न्याय आसना या अदालता ले बाहर काढी दितेया।¹⁷ तेबे सभ लोके आराधनालया रा मुखिया सोस्थिनेसा जो पकड़ी किन्हें न्याय आसना रे साम्हणे मारेया; पर गल्लिये इन्हा गल्ला री कुछ भी फिकर नी किती।¹⁸ इधी कठे पौलुस बौहत ध्याडे तक तेथी रैहया, तेता ले बाद से भाईया ले विदा हुएया होर तिने किंखिया मन्झ आपणे सिर मुंडवाये क्यूंकि तिने मन्नत मांगी री थी; होर से जहाजा पर सीरिया जो चली गया होर तेस साउगी प्रिसकिल्ला होर अक्किला थे।¹⁹ फेरी तिने इफिसुसा मन्झ पौहुंची किन्हें तिन्हा जो तेथी छाडी दितेया, होर आपु ई आराधनालया मन्झ जाई किन्हें यहूदिया किन्हें बैहस करदा लग्या।²⁰ जेबे तिन्हे तेस ले अरज किती, कि आस्सा साउगी कुछ होर ध्याडे तक रही जा, ता तिने नी मन्नेया।²¹ पर ये बोली किन्हें तिन्हा ले विदा हुएया, कि अगर परमेसरे चाहेया ता मां तुस्सा वाले दवारा आऊणा; तेबे से इफिसुसा ले जहाजा पर सवार हुई किन्हें तेथी ले चली गया।²² होर कैसरिया मन्झ उतरी किन्हें यरुस्लेमा जो चली गया, होर फेरी तिने कलीसिया रे लोका किन्हें मुलाकात किती होर फेरी अन्ताकिया जो चली गया।²³ होर तेथी कुछ टैम बिताणे ले बाद से विदा हुएया होर ग्लातिया होर फ्रुगिया रे इल्लाके मन्झ एक जगहा ले दूजी जगहा तक सफर करदे हुए सभी चेल्या जो मजबूत करदा फिरेया।²⁴ फेरी अपुल्लोस नांऊआं रा एक यहूदी जेसरा जन्म सिक्ंदरिया मन्झ हुईरा था, जो विद्वान माहणु था होर पवित्र सास्त्रा जो भली भांति जाणहां था, से इफिसुसा मन्झ आया।²⁵ तिने प्रभु रे रस्ते री शिक्षा पाई री थी, होर मन लगाई किन्हें यीसू रे बारे मन्झ ठीक ठीक सुणाहा होर सिखाहां था, पर से सिर्फ यहून्ना रे बसिस्मा रे बारे मन्झ जाणहां था।²⁶ से आराधनालया मन्झ न्दरे हुई किन्हें

बोल्दा लग्या, पर प्रिसकिल्ले होर अक्किले तेसरी गल्ला सुणी किन्हें, तेस जो आपणे वाले ल्याई किन्हें होर परमेसरा रा रस्ता तेस जो होर भी ठीक ठीक समझाई दितेया।²⁷ होर जेबे तिने तय कितेया कि पार जाई किन्हें अखाया जो जाए ता भाईए तेस जो हिम्मत देई किन्हें चलेया जो लिखेया कि स्यों तेस किन्हें ठीक तरहा ले मिले, होर तिने तेथी पौहुंची किन्हें तिन्हारी बड़ी मदद किती जिन्हें जे परमेसरा री दया ले विस्वास कितेया था।²⁸ क्यूंकि सास्त्रा ले ये साबित करदे हुए कि यीसू ई मसीह आ, तिने यहूदिया जो जनता रे बीचा मन्झ जोरदार बैहस करी किन्हें तिन्हा जो निरुतर करी दितेया।

19¹ होर जेबे अपुल्लोस कुरिन्थुसा मन्झ था, ता पौलुस सारे देसा ले हुई किन्हें इफिसुसा मन्झ आया, होर कई चेल्या जो देखी किन्हें।² तिन्हा किन्हें बोल्या; क्या तुस्से विस्वास करदे टैमा पवित्र आत्मा पाई? तिन्हे तेस किन्हें बोल्या, आस्से ता पवित्र आत्मा रे बारे मन्झ सुणी रा भी नी आ।³ तिने तिन्हा किन्हें बोल्या, ता फेरी तुस्से केसरा बसिस्मा लया? तिन्हे बोल्या, यहून्ना रा बसिस्मा।⁴ पौलुसे बोल्या; यहून्ने ये बोली किन्हें मन फिराऊआ रा बसिस्मा दितेया, कि जो मेरे बाद आऊणे वाळा आ, तेस पर मतलब यीसू पर विस्वास करणा।⁵ ये सुणी किन्हें तिन्हे प्रभु यीसूए रे नांऊआं रा बसिस्मा लया।⁶ होर जेबे पौलुसे तिन्हा पर हाथ रख्या, ता तिन्हा पर पवित्र आत्मा उतरेया, होर स्यों भिन्न भिन्न भाषा बोल्दे होर भविष्यवाणी करदे लगे।⁷ होर स्यों सारे कुल मिलेई किन्हें लगभग बारा आदमी थे।⁸ होर से आराधनालया मन्झ जाई किन्हें तीन महीने तक निडर हुई किन्हें बोल्दा रैहया, होर परमेसरा रे राजा रे बारे मन्झ बैहस करदा होर समझान्दा रैहया।⁹ पर तिन्हा मंझा ले कुछ लोक बौहत हठी थे तिन्हे विस्वास करणे ले नाह करी दिती होर लोका रे साम्हणे एस रस्ते जो भला बुरा बोल्दे लगे, होर से आपणे चले जो आपणे साउगी लई किन्हें तिन्हा ले लग हुई गया, होर सेतरनुसा रेस्कूला मन्झ हर रोज विचार विमर्श करदा लग्या।¹⁰ दो साल तक एहडा ई हुंदा रैहया; एथी तक कि आसिया रे निवासी क्या यहूदी क्या यूनानी सभीए प्रभु रा वचन सुणेया।¹¹ होर परमेसर पौलुसा रे हाथा ले सामर्था रे नौखे काम दस्हा था।¹² एथी तक कि तेसरे रुमाल होर अंगोछा बमारा वाले लई जाहें थे होर तिन्हारी बमारिया चली जाहीं थी, होर दुष्ट आत्मा तिन्हा मंझा ले निकळी जाहीं थी।¹³ पर कुछ यहूदी लोक, जो दुष्ट आत्मा तुआरदे हुए ओरे परे घुमदे फिरदे रैहें थे; स्यों एहडा करदे लगे कि जिन्हा लोका मन्झ दुष्ट आत्मा समाई री थी, तिन्हा पर प्रभु यीसू रे नांऊआं रा इस्तेमाल करणे री कोसिस करदे होर बोल्दे लगे, हांऊ तुस्सा जो तेस यीसू मसीह रे नांऊआं रा जेसरा प्रचार जे पौलुस करहा, हुकम देहां;¹⁴ एक स्कीवा नांऊआं रे यहूदी माहयाजका रे सात म्हे

थे जो एहड़ा ई करहा ऐ थे । 15 पर दुष्ट आत्मे जबाब दितेया, कि यीसू जो ता हांऊ जाणहां ई, होर पौलुसा जो भी पछ्छाणा ई, पर तुस्से कुणहें? 16 होर तिने माहणुऐ जेस मन्झ जे दुष्ट आत्मा थी; तिन्हा पर झपटी किन्हें स्यों काबू करी लये, होर तिन्हा पर एहड़ा उपद्रव कितेया, कि स्यों नांगे होर घायल हुई किन्हें तेस घरा ले भगे । 17 होर ये गल इफिसुसा रे निवासी यहूदी होर यूनानी भी सभ कुछ जाणी गये, होर तिन्हा सभ पर डर छाई गया; होर प्रभु यीसू रे नांऊआं री जै जै कार हुई । 18 जिन्हें विस्वास कितेया था, तिन्हा मंझा ले बौहुतिऐ आई किन्हें आपणे आपणे कामा जो मनी लया होर प्रगट कितेया । 19 होर जादू करणे वाळेया मंझा ले बौहत जणे आपणी आपणी पोथिया कठी करी किन्हें सभ रे साम्हणे फुखी दिती; होर जेबे तिन्हारी कीमत जोड़ी ता स्यों कताबा पन्ज्याह हजारा री निकळी । 20 इस तरहा प्रभु रा वचन बौहत सामर्था किन्हें फैहल्दा चली गया । 21 जेबे ये गल्ला हुई बैठी, ता पौलुसे आत्मा मन्झ ये फैसला कितेया कि मकिदुनिया होर अखाया ले हुई किन्हें यरुस्लेमा जो चली जांऊ, होर बोल्या, कि तेथी जाणे ले बाद मुंजो रोम भी जाणा जरुरी आ । 22 तिने तिमीथियुस होर इरास्तुस नांऊआं रे दो सेवादारा जो तेसरी सेऊआ करहा ऐ थे, मकिदुनिया मन्झ भेजी किन्हें आपु कुछ ध्याड़े तक आसिया मन्झ रही गया । 23 तेस टैम एस पन्था रे बारे मन्झ बड़ा हुल्लड हुएया । 24 क्यूंकि तेथी देमेत्रियुस नांऊआं रा एक सन्यार जो चांदी रा काम करहा था; से अरतिमिसा रे चांदी रे मंदर बणवाई किन्हें कारीगरा जो बौहत काम दिलाया करहा था । 25 तिने तिन्हा जो, होर एहड़ी चीजा रे कारीगरा जो कठे करी किन्हें बोल्या; हे माहणुओं, तुस्से जाणहां ऐ, कि एस कामा मन्झ आस्सा जो कितना पैसा मिल्ला आ । 26 होर तुस्से देख्हा होर सुणहां ऐ, कि सिर्फ इफिसुसा मन्झ नी, पर सारे आसिया मन्झ ये बोली किन्हें इने पौलुसे बौहत लोका जो समझाया होर भरमाई किन्हें बदली भी दिते, कि जो हाथा री कारीगरी ई, स्यों इश्वर नी ऐ । 27 होर एबे सिर्फ एस गल्ला रा डर नी आ, कि आस्सा रे काम धंधे री इज्जत चली जाणी; पर ये भी कि म्हान देबी अरतिमिसा रा मंदर भी बेकार समझी जाणा होर जेस जो सारा आसिया होर संसार पुज्हा, एता रा महत्व भी जांदा रहणा । 28 स्यों ये सुणी किन्हें गुस्से किन्हें भहरी गए, होर चिल्लाई चिल्लाई किन्हें बोल्दे लगे, “इफिसुसा री अरतिमिस म्हान ई ” । 29 होर सारे नगरा मन्झ बड़ा हाल्ला पया; होर लोके मकिदुनिया ले आईरे गयुस होर अरिस्तर्खुस जो, जो पौलुसा साउगी सफर करेया करहा ऐ थे, पकड़ी लया, होर तिन्हा जो रंगसाला मन्झ लई किन्हें दौड़े । 30 पौलुस लोका रे साम्हणे जाणा चाहं था, पर चेले तेस जो जाणे नी दितेया । 31 आसिया रे हाकमा मंझा ले कुछ तेसरे दोस्ते तेस वाले संदेसा भेज्या, होर अरज किती, कि

रंगसाला मन्झ जाई किन्हें जोखम नी उठाणा । 32 एबे देखा कोई कुछ चिल्लाया करहा था ता कोई कुछ, क्यूंकि सारी सभा मन्झ खलबली मचीरी थी, होर बौहत सारे लोक ता ये जाणदे भी नी थे, कि आस्से केस रे कठे कठे हुईरे । 33 तेबे तिन्हे सिकंदरा जो, जेस जो यहूदिया खड़ा कितिरा था, भीड़ा मंझा ले अगे कितेया, होर सिकंदरे आपणे हाथा किन्हें इसारा करी करी किन्हें लोका रे साम्हणे बचाव पक्ष रखणा चाहेया । 34 पर जेबे तिन्हे जाणी लया कि से यहूदी आ, ता स्यों सभ के सभ कोई दो घंटे तक एक ताना मन्झ चिलान्दे रहे, “इफिसुसा री देबी अरतिमिस म्हान ई ” । 35 तेबे नगरा रे मंत्रीए लोका जो सांत करी किन्हें बोल्या; हे इफिसियो, ये कुण नी जाणदा, कि इफिसियो रा नगर बड़ी देबी अरतिमिसा रे मंदर, होर ज्यूसा री तरफा ले पईरी मुरता रा टैहलुआ आ । 36 क्यूंकि इन्हा गल्ला ले इन्कार नी करी सकदे; इधी कठे तुस्सा जो सांत रहणा चहिए होर बगैर सोच विचारे कुछ नी करणा चहिए । 37 क्यूंकि तुस्से यूँ माहणु पकड़ी किन्हें एथी ल्यान्दिरे, जेव्की इन्हें ना ता कोई मंदर लुटेया होर ना ई आस्सा री देबी रा अपमान कितिरा । 38 फेरी भी देमेत्रियुस होर तेसरे साथी कारिगिरा जो केसी रे खिलाफ कोई शिकायत ई ता अदालत खुल्लही ई, होर हाकम भी मौजूद ऐ; तेथी स्यों एक दूजे पर मुकद्दमा चलाई सकहा ऐ । 39 पर अगर तुस्से एता ले ज्यादा जाणना चाहें ता तेता रा फैसला आम सभा मन्झ कितेया जाणा । 40 क्यूंकि आज के झगड़े री वजहा ले आस्सा पर दोष लगणे रा डर आ, एस दंगे रे कठे आस्सा वाले कोई भी कारण नी आ, जेस ले आस्से एस जो ठीक ठैहराई सके । 41 होर ये बोली किन्हें तिने सभा जो भेजी दितेया ।

20 1 जेबे हुल्लड थम्ही गया, ता पौलुसे चेले जो सादी किन्हें समझाया, होर तिन्हा ले विदा हुई किन्हें मकिदुनिया वखा जो चली गया । 2 होर तेस सारे देसा मन्झ हुई किन्हें होर तिन्हा जो बौहत समझाई किन्हें, से युनाना मन्झ आया । 3 से तेथी तीन म्हीने तक रुकेया होर होर से पाणी रे रस्ते ले हुई किन्हें सीरिया जो जाणे ही वाळा था पर तिने ये जाणी किन्हें कि यहूदीये तेस जो मारणे री योजना बनाई रखिरी; इधी कठे तिने फैसला कितेया कि से मकीदुनिया जो वाप्स आई जाए । 4 बिरिया रे पुरुसा रा म्हाठा सोपत्रुस होर थिस्लुनिकियो मन्झ से अरिस्तर्खुस होर सिकुन्दुस होर आसिया रा तुखिकुस होर त्रफिमुस आसिया तक तेस साउगी थे । 5 ये लोक ता पैहले ई चली गये होर त्रोआसा मन्झ आस्सा रा इंतजार करेया करहा ऐ थे । 6 बगैर खमीरा रा रोटी रे ध्याड़े ले बाद आस्से फिलिप्पी ले जहाजा पर चहड़ी किन्हें चली पये होर पांज ध्याड़े ले बाद त्रोआसा मन्झ तिन्हा किन्हें जाई मिले, होर सात ध्याड़े तक तेथी रहे । 7 हफ्ते रे पैहले ध्याड़े जेबे आस्से रोटी तोड़ने रे कठे, कठे हुए, ता पौलुसजो दूजे ध्याड़े जाणे वाळा था, ता तिने तिन्हा

किन्हें गलबात किती होर आधी राता तक गल्ला करदा रैहया ।
 8 उपरली कोठरी मन्झ जेथी आस्से सभ कठे हुईर थे, तेथी बौहत सारे दीये भख्ही रे थे । 9 तेथी युतुखुस नांऊआं रा एक जुआन ताकि प्र्याहले बैठी रा था; से भारी निन्द्रा मन्झ डुबिरा था । जेबे पौलुस बौहत देरा तक लगातार बोल्दा रैहया, ता से जुआन निन्द्रा रे झुलारे किन्हें त्रीजी मंजला ले थाले पई गया, होर तिन्हे से मरीरी हालता मन्झ चकेया । 10 पर पौलुसे उतरी किन्हें तेस किन्हें लिपटी गया, होर गले लगी किन्हें बोल्या, डरा नी, क्यूंकि तेसरी जान तेस मन्झ ई । 11 होर ऊपर जाई किन्हें रोटी तोडी होर खाई किन्हें बौहत देरा तक तिन्हा किन्हें गल्ला करदे रैहया, भ्याग हुणे ई वाळी थी; तेबे पौलुस तिन्हा ले विदा हुई गया । 12 होर स्यों तेस जुआन म्हठे जो जीऊन्दा घरा लई आए, होर तिन्हा जो बौहत राहत मिली । 13 आस्से जहाजा पर पैहले ले ई पौहुंची गये होर अस्सुसा जो चली पये; तेथी पौलुस आस्सा जो जहाजा पर लई जाणे वाळा था, तिने एहडी ई योजना बणाईरी थी; से आपु पैदल आऊणा चाहां था । 14 से जेबे अस्सुसा मन्झ आस्सा किन्हें मिलेया ता आस्से से जहाजा मन्झ चढाया होर आस्से मितुलेने मन्झ आए । 15 होर तेथी ले जहाजा पर चढी किन्हें आस्से दूजे ध्याडे खियुसारे साम्हणे पूजे, होर अगले ध्याडे सामुसा मन्झ आई गये, फेरी एक ध्याडे ले बाद आस्से मिलेतुसा मन्झ पौहुंचे । 16 क्यूंकि पौलुस जेथी तक हुई सके पिन्तेकुस्ता रे ध्याडे तक यरुस्लेमा मन्झ पूजने रा छोड करेया करहा था, इधी कठे तिने फैसला कितेया कि तेस इफिसुसा मन्झ रुके बगैर अगे चली जाणा, ताकि तेस जो आसिया मन्झ देर नी लगे; क्यूंकि तेज्हो बडी जल्दी पईरी थी; कि अगर हुई सके, ता तेसरा पिन्तेकुसा रा ध्याडा यरुस्लेमा मन्झ कटी सके । 17 होर तिने मिलेतुसा ले इफिसुसा मन्झ ये संदेस भेज्या, होर कलीसिया रे प्राचीना जो तेथी सादेया । 18 होर जेबे स्यों तेस वाले आए, ता तिन्हा किन्हें बोल्या, तुस्से जाणहां ऐं, कि पैहले ई ध्याडे ले जेबे हांऊ आसिया मन्झ पुजेया, हांऊ हर टैम तुस्सा साउगी किहां रैहया? 19 मतलब बडे दीन हुई किन्हें, होर आंसू बहाई बहाई किन्हें, होर तिन्हा परीक्षा मंझा ले जो यहूदिया री साजिसा री वजहा ले मेरे पर आई; हांऊ प्रभु री सेउआ करदा ई रैहया । 20 होर जो जो गल्ला तुस्सा रे फायदे री ई थी, तिन्हा जो दसणे होर लोका रे साम्हणे होर घरा घरा जाई किन्हें सिखाणे ले कधी नी झिङ्केया । 21 पर यहूदिया होर युनानिया रे साम्हणे गुआही देंदा रैहया, कि परमेसरा वखा जो मन फेरणा, होर आस्सा रे प्रभु यीसू मसीह पर विस्वास करणा चाहिए । 22 होर एबे देखा, हांऊ आत्मा मन्झ बन्धिरा यरुस्लेमा जो जाहां, होर नी जाणदा, कि तेथी मुंजो पर क्या क्या बीतणा? 23 सिर्फ ये कि पवित्र आत्मा हर नगरा मन्झ गुआही देई देई किन्हें मेरे किन्हें बोल्हा, कि बंधन होर क्लेस तेरे कठे त्यार आ । 24 पर

मेरे कठे, मेरे प्राणा री कोई जो कीमत नी ई; मैं ता बस तेस दौडा जो होर सेउआ जो पूरी करणा चाहां; जो मैं परमेसरा री दया रे सुसमाचारा पर गुआही देणे रे कठे परमेसरा ले पाईरी थी । 25 होर एबे देखा, हांऊ जाणहां, कि तुस्से सभ जिन्हा मंझा ले हांऊ परमेसरा रे राजा रा प्रचार करदा फिरेया, मेरा मुंह दबारा कधी देखी नी पाणा । 26 इधी कठे आज हांऊ तुस्सा रे साम्हणे घोषणा करहा कि तुस्सा मंझा ले केसी रे खुना रा दोषी हांऊ नी आ । 27 क्यूंकि हांऊ परमेसरा री सारी इच्छा तुस्सा जो दसणे मन्झ कधी नी हिचकिचाया । 28 इधी कठे आपणी होर आपणे झुण्डा री चौकसी करा; पवित्र आत्मे तिन्हा मंझा ले तुस्सा जो तिन्हा पर नजर रखणे वाळा बणाईरा ताकि तुस्से परमेसरा री तेस कलीसिया रा ध्यान रखा जेस जो तिने आपणे खुना रे बदले खरदी लईरा था । 29 हांऊ जाणहां, कि मेरे जाणे ले बाद हिंसक भेडिए तुस्सा रे बीचा मन्झ आऊणे, जिन्हा झुण्ड नी छाडणे । 30 तुस्सा रे बीचा मन्झा ले भी एहडे एहडे टेढे लोक उठणे, जिन्हा चेले जो आपणे पीछे खीन्जणे रे कठे, टेढी मेढी गल्ला करणी । 31 इधी कठे जागदे रहूआ; होर याद करा; कि मैं तीन साला तक राती ध्याडी आंसू बहाई बहाई किन्हें, हर एकी जो सचेत करणा नी छाडेया । 32 होर एभे हांऊ तुस्सा जो; परमेसर, होर तेसरे अनुग्रहा रे वचना जो सौंपी देहां; जो तुस्सा री बढोतरी करी सकहा, होर तुस्सा जो तिन्हा लोका साउगी जो पवित्र करी जाई चुकीरे, तुस्सा रा हिस्सा देई सकहा । 33 मैं केसी री चांदी रा सोने या कपडे रा लालच नी कितेया । 34 तुस्से आपु ऐ जाणहां ऐ कि मेरे इन्ही हाथे मेरी होर मेरे साथिया री जरूरता जो पूरा कितेया । 35 मैं तुस्सा जो सभ कुछ करी किन्हें दस्या, कि कडी मैहनत करी किन्हें आस्सा जो कमजोरा री मदद किहां करणी चाहिए होर आस्सा जो प्रभु यीसू रा वचन याद रखणा चाहिए जो तिने आपणे आप बोल्या था; कि लेणे ले देणा खरा आ । 36 ये बोली किन्हें तिने घुटने टेकी दिते होर तिन्हा सभी साउगी प्रार्थना किती । 37 तेबे स्यों बौहत रोये होर पौलुसा रे गले लिपटी किन्हें तेस जो चुम्दे लगे । 38 तिने जो ये बोल्या था, कि तिन्हा तेसरा मुंह कधी नी देखणा, एता ले लोक बौहत दुःखी थे; फेरी तिन्हे तेस जो जहाजा तक पौहुन्चाया ।

21 ¹ जेबे आस्से तिन्हा ले विदा हुई किन्हें जहाजा ले हुई किन्हें रवाना हुए ता आस्से सीधे चली किन्हें कोसा पूजे होर दूजे ध्याडे आस्से रुदुसा मन्झ, होर तेथी ले आस्से पतरा मन्झ पूजे; ² होर आस्सा जो तेथी ले एक जहाज फिनिके जो जांदा हुएया मिलेया, होर तेस जहाजा पर चढी किन्हें आस्से रवाना हुई गये । ³ जेबे आस्सा जो कुपुस सुद्धा लग्या ता तेस जो बाई तरफ छाडी किन्हें सीरिया री तरफा जो मुडी गये क्यूंकि जहाजा जो सुरा मन्झ समान तुआरणा था, इधी कठे आस्से भी तेथी उतरी गये । ⁴ चेले किन्हें मिली किन्हें आस्से तेथी सात

साल रहे; तिन्हे आत्मा रे सखाई रे पौलुसा किन्हें बोल्या, कि यरुस्लेमा मन्झ पैर मत रक्खणा ।⁵ जेबे स्यों ध्याडे पुरे हुए, ता आस्से तेथी ले चली पये; होर सभ जनानिया बच्चे समेत नगरा ले बाहरा तक आस्सा जो पुजांदे आए, होर आस्से द्रयाऊआ रे बाहडे घुटने टेकी किन्हें प्रार्थना किती ।⁶ होर एक दूजे ले विदा लई किन्हें आस्से जहाजा पर चढी गये; होर स्यों आपणे - आपणे घरा जो वाप्स हुई गये ।⁷ सुरा ले पाणी रे रस्ते ले सफर करदे हुए आस्से पतुलिमयिसा मन्झ पौहुंचे, होर भाईया जो नमस्कार करी किन्हें तिन्हा साउगी एक ध्याडे रैहे ।⁸ दूजे ध्याडे आस्से तेथी ले चली किन्हें कैसेरीया मन्झ आए, होर फिलिप्पुस सुसमाचार प्रचारका रे घरा मन्झ जो सात सेवका मंझा ले एक था, आस्से तेसरे घरा जाई किन्हें रैहे ।⁹ तेसरी चार कुंवारी म्हठिया थी; जो भविष्यवाणी करहा ई थी ।¹⁰ जेबे आस्से तेथी बौहत ध्याडे तक रही चुके, ता अगबुस नांऊआं रा एक नबी यहूदिया ले आया ।¹¹ तिने आस्सा वाले आई किन्हें पौलुसा रे कमरा रा पटा लया, होर आपणे हाथ पैर बान्ही किन्हें बोल्या; पवित्र आत्मा ऐ बोल्हा, कि जेस आदमी री कमरा रा ऐ पटा आ, से यरुस्लेमा मन्झ यहूदी लोका ईहा बान्हणा, होर दूजी जातिया रे हाथा मन्झ सौपणा ।¹² जेबे ये सुणेया ता आस्से होर तेथी रे लोके तेस ले यरुस्लेमा जो नी जाणे री विनती किती ।¹³ एता पर पौलुसे जबाब दितेया, कि तुस्से क्या करेया करहा ऐ, कि रोई रोई किन्हें मेरा दिल तोड़हा ऐ, हांऊ ता प्रभु यीसू रे नांऊआं रे कठे यरुस्लेमा मन्झ सिर्फ बान्हेया जाणे रे कठे नी, पर मरणे रे कठे भी त्यार आ ।¹⁴ जेबे से नी मन्नेया ता आस्से ये बोली किन्हें चुप हुई गये; कि प्रभु यीसू री इच्छा हो ।¹⁵ तिन्हा ध्याडे ले बाद दबारा आस्से त्यारी करी किन्हें यरुस्लेमा जो चली पये ।¹⁶ कैसरीया ले भी कुछ चले आस्सा साउगी चल्लीरे थे, स्यों आस्सा जो मनसोन नांऊआं रे एक पुराणे चले वाले लई गये, जो कुप्रुसा ले था, ताकि तेसरे घरा आस्से रही सके ।¹⁷ जेबे आस्से यरुस्लेमा मन्झ पूजे, ता भाई बडी खुसी किन्हें आस्सा किन्हें मिले ।¹⁸ दूजे ध्याडे पौलुस आस्सा जो लई किन्हें याकूबा वाले लई गया, जेथी सभ प्राचीन कठे हुईरे थे ।¹⁹ तेबे तिने तिन्हा जो नमस्कार करी किन्हें, जो जो काम परमेसरे तेसरी सेउआ रे ज्रीए दूजी जातिया मन्झ किते थे, एक एक करी किन्हें सभ दसे ।²⁰ तिन्हे ये बोली किन्हें परमेसरा री महिमा किती, फेरी तेस किन्हें बोल्या; हे भाई, तू देखहा, कि यहूदिया मंझा ले कई हजार लोके विस्वास कितेया; होर सभ व्यवस्था रे प्रति उत्साही ऐ ।²¹ होर तिन्हा जो तेरे बारे मन्झ ये सिखाईरा आ, कि तू दूजी जातिया मन्झ रैहणे वाळे यहूदिया जो मुसा री शिक्षा जो छाडणे री शिक्षा देहां, होर तिन्हा किन्हें बोल्हा कि स्यों ना ता आपणे बच्चेया रा खतना कराए होर ना ई आस्सा रे रीति रवाजा पर चले ।²² इधी कठे क्या कितेया जाए? तिन्हा

ये जाणी जरूर लैणा कि तू एथी आई चुकिरा ।²³ इधी कठे जो कुछ आस्से तुध किन्हें बोल्हा ऐ, तेहडा ई कर; एथी आस्सा वाले चार आदमी ऐ, जिन्हें मन्नत मांगिरी ।²⁴ इन्हा लोका जो लई जा होर तिन्हा साउगी आपणे आपा जो सुद्ध कर; होर तिन्हारे कठे खर्चा दे, कि स्यों आपणे मूंड मुंडवाईले, तेबे सभ लोका जो पता लगी जाणा, कि जो गल्ला तिन्हे तेरे बारे मन्झ सुणीरी, तेता मन्झ कोई सच्चाई नी ई बल्कि तू ता आपु ई व्यवस्था रे मुताबक जीन्दगी जीहां ।²⁵ जेथी तक विस्वास करणे वाळे गैर यहूदिया रा सवाल आ, आस्से तिन्हा जो एक चिट्ठी लिखी किन्हें भेजिरी, कि स्यों मूर्ति रे साम्हणे बलिदान कितेरे मासा ले, होर खुना ले, होर गळा घोटी रे मासा ले, होर व्यभिचारा ले, बच्ची किन्हें रहे ।²⁶ तेबे पौलुस तिन्हा माहणु जो लई किन्हें, होर दूजे ध्याडे तिन्हा साउगी सुद्ध हुई किन्हें मंदरा मन्झ गया, होर दसी दितेया, कि सुद्ध हुणे रे ध्याडे, मतलब तिन्हा मंझा ले हर एकी रे कठे चढावा कधी चढाया जाणा ।²⁷ जेबे स्यों सात ध्याडे पुरे हुणे ई वाळे थे, ता आसिया रे यहूदिये पौलुसा जो मंदरा मन्झ देखी किन्हें सभ लोका जो उकसाया, होर पौलुसा जो पकडी लया ।²⁸ फेरी स्यों चिल्लाई किन्हें बोले, इस्नाएला रे लोका री मदद करा; ये से ई आदमी आ, जो लोका रे, होर व्यवस्था रे, होर एस जगहा रे ब्रोधा मन्झ हर जगहा सभ लोका जो स्वाहां, एथी तक कि युनानिया जो भी मंदरा मन्झ ल्याई किन्हें तिने एस पवित्र जगहा जो गंदा करी दितेया ।²⁹ तिन्हे ता एता ले पैहले त्रुफिमस इफिसी जो तेस साउगी नगरा मन्झ देख्या था, होर सहम्झा ऐ थे, कि पौलुस तेस जो मंदरा मन्झ लई आईरा ।³⁰ तेबे सारे नगरा मन्झ हाहाकार मची गया, होर लोक दौडी किन्हें कठे हुए, होर पौलुसा जो पकडी किन्हें मंदरा ले बाहर रगडी किन्हें लई गये, होर झटपट दरवाजे बंद करी दिते ।³¹ जेबे स्यों तेस जो मारी देणा चाहें थे, तेबे ई पलटना रे मुखिया जो खबर मिली कि सारे यरुस्लेमा मन्झ खलबली मचिरी ।³² से झटपट कुछ स्पाहिया जो होर सूबेदारा जो साउगी लई किन्हें तिन्हा वाले हेठ दौडी किन्हें आया; होर पौलुसा पर हमला करणे वाळे यहूदिया वाले आया, होर जेबे लोके सेनापति होर स्पाहिया जो देख्या ता पौलुसा जो मारणा पिटणा बंद करी दितेया ।³³ तेबे पलटना रे मुखिए नेडे आई किन्हें तेस जो पकडी लया; होर से बंदी बणाई लया; तिने तेस जो दो जंजीरा किन्हें बान्हणे रा हुकम दितेया । फेरी तिने पुछेया कि ये कुणहां होर इने क्या कितेया? ³⁴ पर भीडा मंझा ले कोई कुछ होर कोई कुछ चिलान्दे रैहे होर एस हलेगूले मन्झ से जाणी नी पाया कि सच्चाई क्या ई, इधी कठे तिने हुकम दितेया कि तेस जो मैहला मन्झ लई चला ।³⁵ पौलुस जेबे पैडीया वाले पुजेया ता बेकाबू भीडा री वजहा ले स्पाहिया जो पौलुस चकी किन्हें लई जाणा पया ।³⁶ क्यूंकि लोका री भीड ये चिलांदी हुई तेसरे पीछे पईरी थी कि तेसरा अंत करा

। 37 होर जेबे स्यों पौलुसा जो मैहला मन्झ लई जाणे वाळे थे, ता तिने पलटना रे मुखिए किन्हें बोल्या; क्या मुंजो हुकम आ कि हांऊ तुध किन्हें कुछ बोलूं? तिने बोल्या; क्या तू यूनानी भाषा जाणहां? 38 क्या तू मिसरी ता नी आ, जिने जे कुछ टैम पैहले विद्रोह सुरहु कितेया था होर चार हजार आतंकवादिया री अगुवाई करेया करहा था? 39 पौलुसे बोल्या, हांऊ एक यहूदी माहणु आ, होर मसहूर नगर किलकिया रे तरसुसा रा निवासी आ; होर हांऊ तुध किन्हें अरज करहा, कि मुंजो लोका किन्हें गल्ला करणे दे । 40 जेबे तिने हुकम दितेया, ता पौलुसे पैडीया पर खहड़ी किन्हें लोका जो हाथा रा इशारा कितेया; जेबे स्यों चुप हुई गये, ता पौलुस तिन्हा किन्हें इब्रानी भाषा मन्झ बोलदा लग्या ।

22 1 पौलुसे बोल्या, हे भाईयो होर पितरो! मेरे बचाऊआ मन्झ एबे हांऊ कुछ बोलणा चाहं। 2 जेबे तिने तिन्हा किन्हें इब्रानी भाषा मन्झ बोल्या, ता स्यों होर ज्यादा सांत हुई गये; फेरी पौलुसे बोल्या, 3 हांऊ एक यहूदी माहणु आं, किलकिया रे तरसुसा मन्झ मेरा जन्म हुएया होर हांऊ एस ई नगरा मन्झ पळी बढी किन्हें बडा हुएया, एस नगरा मन्झ गमलीएला रे पैरा वाले बैठी किन्हें मेरी पढाई लिखाई हुई, होर बाब दादे री व्यवस्था ठीक तरीके किन्हें सखाई गई, होर पमेसरा रे कठे बौहत जादा उत्साही था, जेहडे तुस्से सभ आज लग्या करहा ऐ। 4 होर मैं मर्धा होर जनानिया जो बान्ही बान्ही किन्हें, होर जेहला मन्झ पाई पाई किन्हें, एस मता जो एथी तक स्ताया, कि तिन्हा जो मरवाई भी दे। 5 एस गल्ला रे कठे माहयाजक होर सभ पुरनिए गुआह ऐ; कि तिन्हा मंझा ले हांऊ भाईया रे नांऊआं पर चिठिया लई किन्हें दमिस्का जो जाया करहा था, कि तेथी एस मता जो मन्नणे वाळे जो भी हो तिन्हा जो बंदी बणाई किन्हें यरुस्लेमा मन्झ ल्याऊं ताकि तिन्हा जो सजा दिलवाई सकूं। 6 फेरी जेबे हांऊ चलदे चलदे दमिस्का रे नेडे पौहुन्हेचेया, ता एहडा हुएया कि दो पैहरा रे लगभग अचानक एक बडी रोशनी सर्गा ले मेरे चारो तरफ चमकी। 7 होर हांऊ धरती पर पई गया; होर ये अवाज सुणी, कि हे साऊल, हे साऊल, तू मुंजो किधियो स्ताया करहा ? मैं जबाब दितेया, कि हे प्रभु, तुस्से कुणहें? 8 तिने मेरे किन्हें बोल्या; हांऊ यीसू नासरी आ, जेस जो तू स्ताहां। 9 होर मेरे साथिये रोशनी ता देखी, पर पर जो मेरे किन्हें बोल्या करहा था तेसरी अवाज नी सुणी। 10 तेबे मैं बोल्या; हे प्रभु हांऊ क्या करूं? प्रभुए मेरे किन्हें बोल्या; उठी किन्हें दमिस्का मन्झ चली जा, होर जो कुछ तेरे करणे रे कठे नियुक्त कितिरा, से सभ कुछ तुजो तेथी दसी दितेया जाणा। 11 क्यूंकि मुंजो तेस्सा तेज रोशनी मन्झ कुछ नी सुद्धा लगीरा था, इधी कठे मेरे साथीये मेरा हाथ पकड़ी किन्हें हांऊ ले चलेया होर हांऊ इस तरह दमिस्का जाई पुजेया

। 12 तेथी हनन्याह नांऊआं रा एक आदमी था, जो व्यवस्था रा पालन करणे वाळा एक भक्त माहणु था। जो तेथी रे रैहणे वाळे सभ यहूदिया मन्झ इज्जतदार था। 13 से मेरे वाले आया होर मेरे नेडे खडे हुई किन्हें बोल्या, भाई साउल, दबारा देखदा लगी जा, होर तेस ई टैम, मैं से देख्या। 14 तेबे तिने बोल्या; आस्सा रे बाबदादा रे परमेसरे तुजो इधी कठे चुणी लईरा कि तू तेसरी इच्छा जो जाणी सके, होर तेस धर्मी जो देखे, होर तेसरे मुंहा ले गल्ला सुणे। 15 क्यूंकि तू तेसरी तरफा ले सभ माहणु रे साम्हणे तिन्हा गल्ला रा गुआह हुणा, जो तैं देख्या होर सुणेया। 16 एबे किधियो देर करेया करहा? उठ, बसिस्मा ले, होर तेसरा नांऊ लई किन्हें आपणे पापा जो धोई दे। 17 जेबे हांऊ दबारा यरुस्लेमा मन्झ आई किन्हें मंदरा मन्झ प्रार्थना करेया करहा था, ता हांऊ बेसुध हुई गया। 18 होर मैं देख्या कि से मेरे किन्हें बोल्या करहा, छोड़ कर होर झटपट यरुस्लेमा ले बाहर चली जा क्यूंकि मेरे बारे मन्झ तिन्हा तेरी गुआही नी मन्नणी। 19 इधी कठे मैं बोल्या, प्रभु ये लोक ता जाणहां यें कि तुध पर विस्वास करणे वाळे पर बंदी बणाई किन्हें होर पिटदे हुई किन्हें हांऊ यहूदी आराधनालया मन्झ घुमदा फिरेया। 20 होर ता होर जेबे तेरे गुआह स्तिफनुसा रा खून बहाया जाया करहा था, तेबे हांऊ भी तेथी खहड़ी रा था, होर एस गल्ला मन्झ बराबर सैहमत था, होर तेसरी हत्या करणे वाळे रे कपडे री रखवाळी करेया करहा था। 21 होर तिने मेरे किन्हें बोल्या, चली जा; क्यूंकि मां तू दूजी जातिया वाले दूर दूर भेजणा। 22 स्यों एस गल्ला तक ता चुप रैहे पर तेता ले बाद जोरा जोरा किन्हें चिलान्दे लगे, एहडे माहणु रा खात्मा करा; एसरा जीउन्दा रैहणा ठीक नी आ। 23 जेबे स्यों चिलांदे होर कपडे सटदे होर सर्गा मन्झ धूल डुआन्दे लगे। 24 ता पलटना रे सूबेदार बोल्या; कि एस जो मैहला मन्झ लई जाऊआ; होर कोडे मारी किन्हें जांच पडताल करा, कि हांऊ जाणी सकूं कि लोक केस वजहा ले एसरे ब्रोधा मन्झ चिलाया करहा ऐ। 25 पर जेबे स्यों तेस जो कोडे लगाणे रे कठे बान्हेया करहा ऐ थे, तेबे तेथी खहड़ी रे सूबेदारा किन्हें पौलुसे बोल्या, केसी रोमी नागरिका जो, जेस मन्झ जे दोष नी हो, कोडे लगाणा क्या तुस्सा रे कठे ठीक आ? 26 ये सुणी किन्हें सूबेदार पलटना रे मुखिया वाले जाई किन्हें बोल्या, तू ये क्या करेया करहा; ये ता रोमी आ। 27 तेबे पलटना रे मुखिए तेस वाले जाई किन्हें बोल्या, मुंजो दस, क्या तू रोमी आ? तिने जबाब दितेया, हां। 28 ये सुणी किन्हें पलटना रे मुखिए बोल्या, कि मुंजो ता रोमी नागरिक हुणे रे कठे बौहत सारा खर्च करणा पया, पौलुसे बोल्या, पर हांऊ ता जन्म जात रोमी नागरिक आ। 29 तेबे स्यों लोक जे तेसले पूछताछ करेया करहा ऐ थे, झटपट पीछे हटी गये; होर से पलटना रा मुखिया भी ये समझी किन्हें कि से एक रोमी नागरिक आ होर तिने तेस जो बंदी

बणाईरा, बौहत डरी गया।³⁰ क्यूंकि से सूबेदार एस गल्ला रा ठीक ठीक पता लगाणा चाहां था, कि यहुदिये पौलुसा पर तेस पर दोष किधियो लगाईरा, इधी कठे तिने अगले ध्याड़े तेसरे बंधन खोल्ही दिते; होर माहयाजका होर सारी माहसभा जो कठे हुणे रा हुकम दितेया, होर पौलुसा जो हेठ लई जाई किन्हें तिन्हारे साम्हणे खड़ा करी दितेया।

23¹ होर पौलुसे, यहूदी माहसभा पर टकटकी लगाई किन्हें देख्या, होर बोल्या, हे भाईयो, मैं आज तक परमेसरा रे कठे बिल्कुल सच्चे विवेका किन्हें जींदगी बिताई।² हनन्याह माहयाजके, तिन्हा री जो तेस वाले खहड़ी रे थे, तेसरे मुंहा पर थप्पड़ मारणे रा हुकम दितेया।³ तेबे पौलुसे तेस किन्हें बोल्या; हे सफेदी पुती री दिवार! परमेसरा तू मारणा; क्या तू व्यवस्था रे मुताबक मेरा न्याय करणे रे कठे बैठिरा, कि व्यवस्था रे विरोधा मन्झ मुंजो थप्पड़ मारणे रा हुकम देया करहा।⁴ पौलुसा रे नेडे खहड़ी रे लोके बोल्या, परमेसरा रे माहयाजका रा अपमान करणे री हिम्मत तुजो किहां हुई? ⁵ पौलुसे जबाब दितेया, मुंजो ता पता ई नी कि ये माहयाजका आ; क्यूंकि ये लिखीरा, कि आपणी प्रजा रे सासका रे कठे बुरा नी बोलणा चहिए।⁶ तेबे पौलुसा जो ये पता चलेया कि तिन्हा मंझा ले आधे सदुकी ऐ, होर आधे फरीसी ऐ, ता माहसभा मन्झ तिने जोरा किन्हें बोल्या, हे भाईयो, हांऊ फरीसी आ होर फरीसी रे बंसा रा आ, मरणे ले बाद दबारा जीउंदे हुणे री मेरी मान्यता री वजहा ले मेरे पर मुकद्दमा चल्या करहा।⁷ जेबे तिने ये गल बोली ता फरिसिया होर सदुकिया मन्झ झगड़ा हुन्दा लग्या; होर सभा मन्झ फूट पई गयी।⁸ क्यूंकि सदुकी ता ये बोल्हा ऐ, कि ना ता पुनरुत्थान आ, ना स्वर्गदूत होर ना आत्मा ई; पर फरीसीया जो इन्हारे अस्तित्वा मन्झ विस्वास आ।⁹ तेथी बौहत हल्ला गुल्ला पया, फरीसीया रे दला मंझा ले कुछ धर्म सास्त्री उठे होर तीखी बैहस करदे हुए बोल्दे लगे, एस आदमी मन्झ आस्से कोई खोट नी पांदे, अगर केसी आत्मे या केसी स्वर्गदूते एस किन्हें गल्ला किती ता फेरी क्या हुएया? ¹⁰ जेबे बौहत झगड़ा हुई गया, ता पलटना रे मुखिए एस डरा ले कि केते स्यों पौलुसा रे टुकड़े टुकड़े नी करी दे, इधी कठे स्पाहिया जो हुकम दितेया, कियों हेठ जाई किन्हें पौलुसा जो तिन्हा ले लग करी किन्हें मैहला मन्झ लई जाऊआ।¹¹ तेस ई रात प्रभुए तेस वाले आई किन्हें बोल्या, हे पौलुस, हिम्मत कर; क्यूंकि जिहां तैं यरुस्लेमा मन्झ मेरी गुआही दिती, तिहां ई तुजो रोमा मन्झ भी गुआही देणी पऊणी।¹² होर जेबे हल्ली ध्याड़ा ई था, ता यहूदिये एका कितेया, होर कसम खाहदी, कि जेबे तक आस्से पौलुसा जो मारी नी दे, तेबे तक आस्सा ना ता कुछ खाणा ना ता पीणा।¹³ जिन्हें जे आपु मन्झ ये कसम खाधही थी, स्यों चाळी ले भी ज्यादा थे।¹⁴ तिन्हे माहयाजका

होर पुरनिए वाले आई किन्हें बोल्या, आस्से ये कसम खाधही री कि जेबे तक पौलुसा जो नी मारी दे, तेबे तक आस्सा ना ता कुछ खाणा ना ता पीणा।¹⁵ इधी कठे एबे माहसभा समेत पलटना रे सरदारा जो समझाऊआ, कि तेस जो तुस्सा वाले लई आए, ये भाना मारेया कि तुस्से तेसरे बारे मन्झ ठीक ढन्गा किन्हें छानबीन करणा चाहें, एता ले पैहले कि से एथी पूजे, आस्से तेस जो मारणे रे कठे त्यार ऐ।¹⁶ पर पौलुसा रे भानजे जो एस षडयंत्रा री भनक लगी गई, इधी कठे से मैहला मन्झ जाई पुजेया होर पौलुसा जो सभ कुछ दसी दितेया।¹⁷ पौलुसे सूबेदारा मंझा ले एकी जो आपणे वाले सादी किन्हें बोल्या; एस जुआना जो पलटना रे मुखिए वाले लई जाऊआ, ये तेस किन्हें कुछ बोलणा चाहां।¹⁸ इधी कठे तिने तेस जो पलटना रे मुखिए वाले लई जाई किन्हें बोल्या; पौलुस कैदी ऐ मुंजो सादी किन्हें ये अरज किती, कि ये जुआन पलटना रे मुखिया किन्हें कुछ बोलणा चाहां; एस जो तेस वाले लई जा।¹⁹ पलटना रे मुखिए तेसरा हाथ पकड़ी किन्हें, होर लग जे लई जाई किन्हें पूछेया; मेरे किन्हें क्या बोलणा चाहां? ²⁰ होर तिने बोल्या, यहुदिए एका करी लईरा, कि तेरे ले अरज करे, कि काला पौलुसा जो माहसभा मन्झ ल्याए, एहड़ा लगे कि तुस्से तेसरे बारे मन्झ ठीक ढन्गा किन्हें छानबीन करणा चाहें।²¹ पर तिन्हा री मत सुणना, क्यूंकि चाळी ले भी ज्यादा लोक तेस जो मारणे रे इंतजारा मन्झ ऐ, होर तिन्हे ये कसम खाधही री कि जेबे तक स्यों पौलुसा जो नी मारी दे, तिन्हा ना ता कुछ खाणा होर ना पीणा; बस एबे तिन्हा जो तुस्सा री अनुमति रा इन्तजार आ।²² फेरी पलटना रे मुखिए से जुआन भेजी दितेया, कि केसी किन्हें देख्या बोल्दा कि तैं ये गल मुंजो दसी दितेरी।²³ होर तिने दो सूबेदारा जो सादी किन्हें बोल्या; दो सौ स्पाही, सत्तर घुडसवार, होर दो सौ भाले वाळेया जो कैसरीया जो जाणे रे कठे त्यार रखा, रातके वीजे पैहर जाणे रे कठे त्यार रैहणा।²⁴ पौलुसा री सवारी रे कठे घोड़े रा भी इन्तजाम रखणा होर तेस जो बचाई किन्हें फेलिक्स हाकमा वाले लई जा।²⁵ तिने एक चिठी भी लिखी; ²⁶ माहप्रतापी फेलिक्सा जो क्लौदियुस लुसियासा रा नमस्कार; ²⁷ एस आदमी जो यहुदिये पकड़ी किन्हें मारी देणा चाहेया, पर जेबे हांऊ जाणी गया कि ये रोमी नागरिक आ, ता मैं आपणे स्पाहिया साउगी जाई किन्हें ये बचाई लया।²⁸ हांऊ तेस कारण जो जाणना चाहां था जेस वजहा ले तेस पर दोष लगाया करहा ऐ थे, तेस जो माह धर्म-सभा मन्झ लई गये, ²⁹ तेबे मैं जाणी गया, कि स्यों आपणी व्यवस्था रे बैहसा रे बारे मन्झ तेस पर इल्जाम लाहें, पर मारे जाणे लायक या बंदी बणाए जाणे रे लायक तेस मन्झ कोई दोष नी आ।³⁰ होर जेबे मुंजो खबर मिली, कि तिन्हे एस जो मारणे री योजना बणाई री, ता मैं एस जो झटपट तेरे वाले भेजी दितेया, होर

तेस पर इल्जाम लगाणे वाळे जो भी हुक्म दितेया, कि स्यों एसरे खिलाफ लगाई रे इल्जामा जो तेरे साम्हणे रखे।³¹ इधी कठे स्पाहिए इन्हा हुक्मा जो पूरा कितेया होर स्यों रातो रात ई पौलुसा जो अन्तपतरिसा मन्झ लई आए।³² फेरी अगले ध्याड़े घुडसवारा जो तेस साउगी अगे जाणे रे कठे छाडी दितेया होर आपु मैहला जो वाप्स चली गया।³³ तिन्हे कैसरिया मन्झ पौहुंची किन्हें हाकमा जो चिठी दिती; होर पौलुसा जो भी तेसरे साम्हणे हाजिर कितेया।³⁴ तिने पढी किन्हें पुछेया कि ये केस देसा रा आ? ³⁵ होर जेबे से ये जाणी गया कि से किलकिया रा आ; ता तेस किन्हें बोल्या; जेबे तेरे खलाफ इल्जाम लगाणे वाळे आऊणा, ता मां तेरे मुकद्दमे री सुणवाई करणी, तिने हुक्म दितेया कि पौलुसा जो निगरानी मन्झ हेरोदेसा रे मैहला मन्झ रख्या जाए।

24¹ पांज ध्याड़े ले बाद हनन्याह माहयाजक कुछ प्राचीना होर तिरतुल्लुस नांऊआं रे एक वकीला जो साउगी लई किन्हें कैसरिया आया; होर तिन्हे राज्यपाला रे साम्हणे पौलुसा रे खलाफ इल्जाम लगाये।² जेबे तेस जो बुलाया गया ता तिरतुल्लुस तिन्हा पर इल्जाम लगाई किन्हें बोल्दा लग्या, कि हे माहप्रतापी फेलिक्स, तुस्सा री वजहा ले आस्से बडी सांति किन्हें रैहया करहा ऐ होर तुस्सा री दूर दृष्टी ले देसा मन्झ कई सुधार हुईरे।³ एता जो आस्से हर जगहा होर हर तरहा ले धन्यावादा समेत मन्हां ऐं।⁴ पर इधी कठे कि आस्से तुस्सा जो होर दुःख नी देणा चाहंदे, हांऊ तुस्सा ले अरज करहा, कि किरपा करी किन्हें आस्सा री दो गल्ला सुणी लऊआ।⁵ क्यूंकि आस्से एस आदमी जो उत्पात होर संसारा रे सारे यहूदिया मन्झ दंगा करणे वाळा होर नासरिया रे कुपन्था रा नेता आ।⁶ इने मंदरा जो भ्रष्ट करणे रा जतन कितेया, होर आस्से एस जो इधी कठे पकड़ेया; आस्से एसरा न्याय आपणी व्यवस्था रे मुताबक करणा चाहें थे।⁷ पर सेनापति लिसियासे जबरदस्ती एस जो आस्सा ले छुड़ाई लया।⁸ होर आपणे लोका जो हुक्म दितेया कि एस पर इल्जाम लगाणे वाळेया जो तेरे साम्हणे आऊणे रा हुक्म दितेया। जिन्हा गल्ला रे बारे मन्झ आस्से तेस पर इल्जाम लगाया करहा ऐ, अगर तुस्से आपु ई तेस ले पूछताछ करघे ता तुस्सा जो इन्हा सभ गल्ला रा विस्वास हुई जाणा।⁹ यहूदिए भी एसरा साथ देई किन्हें बोल्या, कि यूँ गल्ला बिल्कुल ठीक ई।¹⁰ जेबे राज्यपाले पौलुसा जो बोलणे रे कठे इसारा कितेया ता तिने जबाब देई किन्हें बोल्या, हांऊ ऐ जाणी किन्हें कि तू बौहत साला ले एस जाति रा फैसला करहा, हांऊ चाऊआ किन्हें आपणा बचाव पेस करहा।¹¹ तू आपु जाणहां, कि हल्ली दुआ बंदगी रे कठे मुंजो यरुस्लेमा गई रे बस बारा ई ध्याड़े हुईरे।¹² तेथी इन्हें मुंजो ना तामंदरा मन्झ, ना ता आराधनालया मन्झ होर ना ई केसी नगरा मन्झ केसी किन्हें

बैहस करदे या दंगा करवांदे देख्या।¹³ होर एबे तेरे साम्हणे जो इल्जाम ये मुंजो पर लगाया करहा ऐ तिन्हा जो साबित नी करी सकदे।¹⁴ पर हांऊ तेरे साम्हणे मन्हां, कि हांऊ आपणे सियाणे रे परमेसरा री आराधना आपणे पन्था रे मुताबक करहा, जेस जो ये एक पंथ बोल्हा यें, हांऊ हरेक तेस गल्ला मन्झ विस्वास करहा जो व्यवस्था दस्हा ई, होर जो नबिया रे ग्रन्था मन्झ लिखी री ई।¹⁵ होर हांऊ परमेसरा मन्झ तेहडा ई भरोसा करहा, जिहां आपु ऐ लोक रख्हा ऐ कि धर्मिया होर पापिया, दुहीं रा ई पुनरुत्थान हुणा।¹⁶ इधी कठे हांऊ भी परमेसर होर लोका रे साम्हणे हमेसा आपणी अंतरआत्मा जो सुद्ध रखणे री कोसिस करहा।¹⁷ बौहत साला ले बाद हांऊ आपणे लोका जो दान पौहुन्चाणे, होर भेंट चढाणे आईरा था।¹⁸ जेबे हांऊ ये करेया ई करहा था तिन्हा जो हांऊ मन्द्रा मन्झ मिलेया, तेबे हांऊ विधि पूर्वक सुद्ध था; ना तेथी कोई भीड थी होर ना कोई असांति, पर तेथी आसिया रे कुछ यहूदी थे।¹⁹ अगर मेरे खलाफ तिन्हा वाले कुछ बोलणे जो आ, ता तिन्हा जो तेरे साम्हणे हाज़र हुई किन्हें मुंजो पर इल्जाम लगाणे चाहिए।²⁰ या ये लोक जो एथी ऐ स्यों ई दसे कि जेबे हांऊ यहूदी माहसभा रे साम्हणे खहड़ी रा था, तेबे तिन्हे मेरे मन्झ क्या खोट पाया? ²¹ सिर्फ एस गल्ला जो छाडी किन्हें कि जेबे हांऊ तिन्हारे बीचा मन्झ खहड़ी रा था ता मैं चिल्लाई किन्हें बोल्या था; कि मरीरे मंझा ले जीऊन्दे हुणे रे बारे मन्झ आज तुस्सा रे साम्हणे मेरा फैसला हुएया करहा।²² फेलिक्से, जो एस पन्था जो भली भांति जाणहां था, तिने तिन्हा जो ये बोली किन्हें टाळी दितेया, कि जेबे पलटना रे मुखिया लुसियासा आऊणा, ता तेबे ई मां एस मुकद्दमे रा फैसला देणा।²³ होर तिने सूबेदारा जो हुक्म दितेया, कि थोहड़ी छूट देई किन्हें पौलुसा जो निगरानी मन्झ रख्या, होर तेसरे दोस्ता मंझा ले केसी जो भी तेसरी सेउआ करणे ले नी रोकणा।²⁴ होर कुछ ध्याड़े ले बाद फेलिक्स आपणी लाडी दुसिल्ला साउगी तेथी आया; से एक यहूदी जनाने थी, फेलिक्से पौलुसा जो सादी किन्हें तेस विस्वासा रे बारे मन्झ जो यीसू मसीह पर आ, तेस ले सुणेया।²⁵ पर जेबे पौलुस नेकी, आत्म संयम होर आऊणे वाळे फैसले रे बारे मन्झ बोल्या करहा था, ता फेलिक्स डरी गया होर बोल्या, एस टैम तू चली जा, मौका मिल्या ता मां तू दबारा सादणा।²⁶ तेस जो पौलुसा ले पैसे मिलणे री आस थी; इधी कठे से तेस जो बार बार सादी किन्हें तेस किन्हें गल्ला करदा रैहयां ऐं था।²⁷ पर जेबे दो साल बीती गये, ता पुरकियुस फेस्तुस फेलिक्सा री जगहा आया, क्यूंकि फेलिक्स यहूदिया जो खुस करणा चाहं था इधी कठे तिने पौलुसा जो जेहल खाने मन्झ ई रैहणे दितेया।

25¹ फेरी फेस्तुस तेस प्रदेसा मन्झ पूजणे ले तीन ध्याड़े ले बाद कैसरिया ले यरुस्लेमा जो रवाना हुएया।² तेबे

माहयाजके, होर यहूदिया रे बडे लोके, तेस पर इल्जाम लगाए होर तेस ले अरज किती।³ होर ये छूट मांगी कि से पौलुसा जो यरुस्लेमा जो भेजी दे, क्यूंकि स्यों तेस जो रस्ते मन्झ ई मारणे वाळे थे।⁴ तेबे फेस्तुसे जबाब दितेया, कि पौलुस ता कैसरिया मन्झ कैद आ होर हांऊ आपु तेथी जाणे वाळा आ।⁵ फेरी तिने बोल्या, तुस्सा मंझा ले जो खास खास आदमी ऐ, स्यों मेरे साउगी चली पऊआ; होर अगर इने आदमिए कोई आपराध कितिरा ता तेथी तेस पर इल्जाम लगाए।⁶ तिन्हा साउगी कोई आठ दस ध्याडे तेथी बिताई किन्हें फेस्तुस कैसरिया जो वाप्स चली गया; दूजे ध्याडे तिने राजगद्दी पर बैठी किन्हें हुक्म दितेया, कि पौलुसा जो हाज़र कितेया जाए।⁷ जेबे से पेस हुएया ता यरुस्लेमा ले आईरे यहूदी तेस जो घेरी किन्हें खहड़ी गये, तिन्हे तेस पर बौहत सारे इल्जाम लगाये पर तिन्हा वाले कोई सबूत नी थे।⁸ पौलुसे आपणा बचाव करदे हुए बोल्या, मैं ना ता यहूदिया री व्यवस्था, ना मंदर होर ना कैसरा रे खलाफ कोई पाप कितेया।⁹ पर फेस्तुसे यहूदिया जो खुस करणे रे कठे पौलुसा जो जबाब दितेया, क्या तू चाहां कि हांऊ इन्हा इल्जामा रा फैसला यरुस्लेमा मन्झ करूं? ¹⁰ पर पौलुसे बोल्या, एस टैम हांऊ कैसरा री अदालता मन्झ खहड़ी रा, मेरा फैसला एथी ई हुणा चाहिए; मैं यहूदिया रा कुछ नी बिगाड़ी रा।¹¹ अगर हांऊ अपराधी आ, होर मौता री सजा रे लायक कोई काम कितिरा, ता हांऊ मरणे ले नी डरदा। पर अगर तिन्हा रे लगाईरे इल्जामा मंझा ले कोई गल सच्ची नी हुई, ता कोई मुंजो तिन्हारे हाथा मन्झ सौंपी नी सकदा, ये ई कैसरा ले मेरी प्रार्थना ई।¹² तेबे फेस्तुसे मन्त्रिया किन्हें सलाह करणे ले बाद जबाब दितेया, तें कैसरा री दुहाई दिती, इधी कठे एबे तुध कैसरा रे साम्हणे पेस हुणा।¹³ कुछ ध्याडे ले बाद राजा अग्रिप्पा होर बिरनिके फेस्तुसा किन्हें मिलणे रे कठे कैसरिया मन्झ आए।¹⁴ जेबे स्यों तेथी कई ध्याडे बिताई चुके ता फेस्तुसे राजे रे साम्हणे पौलुसा रे मुकद्दमे जो इस तरह समझाया, एथी एहडा आदमी आ जेस जो फेलिक्स कैदी रे रूपा मंझा एथी छाडी गईरा था।¹⁵ जेबे हांऊ यरुस्लेमा मन्झ था माहयाजके होर यहूदिया रे प्राचीने तेस पर इल्जाम लगाए होर अरज किती कि एस जो सजा मिले।¹⁶ तेबे मैं जबाब दितेया कि रोमिया रा ये रवाज नी आ कि केसी आदमी जो, जेबे तक कि इल्जाम लगाणे वाळे रे साम्हणे खडे हुई किन्हें आपणे बचाऊआ मन्झ जबाब देणे रा मौका ना मिले; तेस जो सजा रे कठे सौंपेया जाए।¹⁷ इधी कठे स्यों लोक जेबे मेरे एथी आए ता मैं बगैर देर किते दूजे ध्याडे ई राजगद्दी पर बैठी किन्हें तेस आदमी जो ल्याऊणे रा हुक्म दितेया।¹⁸ जेबे इल्जाम लगाणे वाळे बोलणे रे कठे खहड़ी गये ता तिन्हे तेस पर एहडा कोई इल्जाम नी लगाया जेहडा कि हांऊ सोचेया करहा था।¹⁹ बल्कि तिन्हा रे आपणे धर्मा री कुछ गल्ला पर होर

यीसू नांऊआं रे एक माहणु पर जो मरी गईरा, तिन्हा मन्झ कुछ मतभेद था, जेव्की पौलुसा रा दाऊआ था कि से जीऊन्दा आ।²⁰ हांऊ समझी नी पाया करदा था कि इन्हा गल्ला री छान बीन कीहां करूं, इधी कठे मैं तेसले पुछेया कि क्या तू यरुस्लेमा जो जाणे जो त्यार आ, ताकि तेथी इन्हा गल्ला रे बारे मन्झ तेरा फैसला हुई सके।²¹ पर जेबे पौलुसे अरज किती कि मेरे मुकद्दमे रा फैसला माहअधिराज करे; ता मैं हुक्म दितेया, कि जेबे तक तेस जो कैसरा वाले नी भेजी देंऊ, तेसरी रखवाली किती जाए।²² तेबे अग्रिप्पे फेस्तुसा किन्हें बोल्या, हांऊ भी तेस आदमी री सुणना चाहां; तिने बोल्या, तू तेसरी काला सुणी लया।²³ दूजे ध्याडे अग्रिप्पा होर बिरनिके बड़ी धूम धामा किन्हें आए होर पलटना रे मुखिए होर नगरा रे खास खास लोक भी दरबारा मन्झ आए, ता फेस्तुसे हुक्म दितेया, कि स्यों पौलुसा जो लई आए।²⁴ फेस्तुसे बोल्या, हे माहराज अग्रिप्पा, होर एथी मौजूद सभ लोको! तुस्से एस आदमी जो देख्या करहा ऐ जेसरे बारे मन्झ सारा यहूदी समाजा रे लोके, यरुस्लेमा मन्झ होर एथी भी चिल्लाई चिल्लाई किन्हें मेरे किन्हें अरज किती कि एसरा जीऊन्दा रहणा ठीक नी आ।²⁵ पर मैं जाणी लया कि इने मौता री सजा रे लायक कोई एहडा काम नी कितिरा था, होर इधी कठे कि इने आपुए ई माहअधिराजा ले अरज किती, मैं एस जो भेजी देणे रा फैसला कितेया।²⁶ फेरी भी मेरे वाले एसरे बारे मन्झ आपणे माहराजा जो लिखणे रे कठे कोई पक्की गल नी ई; इधी कठे मैं तुस्सा सभी रे साम्हणे खास कर, हे राजा अग्रिप्पा, तेरे साम्हणे ल्यान्दिरा, ताकि छानबीन करणे ले बाद मुंजो कुछ लिखणे जो मिली जाए।²⁷ कुछ भी हो मुंजो केसी कैदी जो तेसरा दोष-पत्र बगैर त्यार किते तेथी भेजी देणा कुछ ठीक नी लग्या।

26 ¹ राजे अग्रिप्पे पौलुसा किन्हें बोल्या; तुजो आपणे बारे मन्झ बोलणे रा हुक्म आ, तेबे पौलुस हाथ बढाई किन्हें आपणे बचाऊआ मन्झ बोल्दा लग्या।² हे राजा अग्रिप्पा, जितनी गल्ला रा यहूदी मुंजो पर इल्जाम ल्वाहें, आज तेरे साम्हणे तिन्हा रा जबाब देणे रे कठे हांऊ आपणे आपा जो धन्य सम्झहा।³ खास करी किन्हें, क्यूंकि तू यहूदिया रे सभ रीति रवाजा होर तिन्हारे विवादा जो जाणहां ऐं, इधी कठे हांऊ अरज करहा, कि तू सब्रा रखी किन्हें मेरी सुणी ले।⁴ सभी यहूदी जाणहां ऐं कि सुरहु ले ई आपुए आपणे देसा मन्झ होर यरुस्लेमा मन्झ भी बचपना ले ई मैं केहड़ी जिन्दगी जी।⁵ स्यों मुजो बौहत टैमा ले जाणहां ऐं होर अगर स्यों चाहें ता एस गल्ला री गुआही देई सकहा ऐ, कि मैं एक फरीसी हुई किन्हें आपणे धर्मा रे सभी ले खरे पन्था रे मुताबक चलेया।⁶ होर एबे तेस्सा प्रतिज्ञा री आसा री वजहा ले जो परमेसरे आस्सा रे बाबदादा किन्हें कितीरी थी, मेरे पर मुकद्दमा चलेय करहा।⁷ तेस्सा प्रतिज्ञा रे पुरे हुणे

री आस लगाए हुए, आस्सा रे बारा गोत्र आपणे सारे मना ले राती ध्याड़ी परमेसरा री सेउआ करदे आईरे; हे राजा, एस ई उम्मीदा रे बारे मन्झ यहूदी मुंजो पर इल्जाम लाहें।⁸ जेबकी परमेसर मरीरे जो जीउंदा करहा, ता तुस्सा रे कठे एथी ये गल विस्वासा रे लायक कि नी समझी जांदी? ⁹ मैं भी समझी रा था कि यीसू नासरी रे नांऊआं रे ब्रोधा मन्झ मुंजो बौहत कुछ करना चाहिए। ¹⁰ होर मैं यरुस्लेमा मन्झ एहड़ा ई कितेया; होर माहयाजका ले अधिकार पाई किन्हें बौहत सारे पवित्र लोका जो जेहला मन्झ पाए, होर जेबे तिन्हा जो मारेया जाहां था, ता हांऊ भी तिन्हा रे ब्रोधा मन्झ बराबर सैह्यत था। ¹¹ होर हरेक आराधनालया मन्झ हांऊ तिन्हा जो ताड़ना दुआई दुआई किन्हें यीसू री बेइजती करवाहां था, एथी तक कि गुस्से रे मारे एहड़ा पागल हुई गया, कि बाहर दूजे नगरा मन्झ भी जाई किन्हें तिन्हा जो स्ताहां था। ¹² एहड़ी धुना मन्झ जेबे हांऊ माहयाजका ले अधिकार होर हुकम पाई किन्हें दमिस्का जो जाया करहा था। ¹³ ता हे राजा, पैंडे मन्झ दोपैहरा रे टैमा मैं सर्गा ले सुरजा रे तेजा ले बढी किन्हें एक जोत आपणे ऊपर होर आपणे साउगी चलणे वाळे रे चारो तरफ चमकदी देखी। ¹⁴ होर जेबे आस्से सभ जमीना पर पई गये, ता मैं इब्रानी भाषा मन्झ, मेरे किन्हें ये बोल्दे हुए अवाज सुणी, कि हे साउल, हे साउल, तू मुंजो किधियो स्ताया करहा? पैने पर लात मारणा तेरे कठे मुस्किल आ। ¹⁵ होर मैं पुछेया, हे प्रभु तू कुणहां? प्रभुए जबाब दितेया, हांऊ यीसू आ जेस जो तू यातना देआ करहा। ¹⁶ पर एबे तू उठ होर आपणे पैरा पर खड़ा हुई जा। हांऊ तेरे साम्हणे इधी कठे प्रगत हुएया कि तुजो एक सेवका रे रूपा मन्झ नियुक्त करूँ होर जो कुछ तें मेरे बारे मन्झ देख्या होर जो कुछ मां तुजो दसणा, तेता रा तुध गुआह रैहया। ¹⁷ होर मां तू तेरे लोका ले होर दूजी जातिया ले बचाता रैहणा; जिन्हा वाले हांऊ एबे तुजो इधी कठे भेज्हा। ¹⁸ कि तू तिन्हा री हाखिया खोल्हे, कि स्यों न्ह्यारे ले रोशनी वखा जो, होर सैताना रे अधिकारा ले परमेसरा वखा जो फिरे; कि पापा री माफ़ी, होर तिन्हा लोका साउगी उत्तराधिकर पाए, जो मुंजो पर विस्वास करणे ले पवित्र हुई चुकिरे। ¹⁹ इधी कठे हे राजा अग्रिप्पा, मैं तेस स्वर्गीय दर्सना री गल नी टाळी। ²⁰ पर पैहले दमिस्का रे, फेरी यरुस्लेमा रे रैहणे वाळैयाजो, तेबे यहूदिया रे सारे देसा मन्झ होर दूजी जातिया जो समझांदा रैहया, कि मन फिराऊआ होर परमेसरा वखा जो फिरि किन्हें मन फिराणे रे लायक काम करा। ²¹ इन्हा गल्ला री वजहा ले यहूदी मुंजो मंदरा मन्झ पकड़ी किन्हें मारणे री कोसिस करहा ऐ थे। ²² पर आज तक मुंजो परमेसरा री मदद मिल्दी रही, होर इधी कठे हांऊ छोट्टे होर बडे सभी लोका रे साम्हणे गुआही देआ करहा; होर जो गल्ला नबिए होर मुस्से बोलिरी, कि स्यों हुणे वाळी ई; हांऊ बस तिन्हा गल्ला जो छाडी किन्हें होर कुछ

नी बोल्दा। ²³ कि मसीहा जो दुःख उठाणा पऊणा, होर तेस ई सभी ले पैहले मरीरे मंझा ले जी उठी किन्हें, आस्सा रे लोका मन्झ होर दूजी जातिया मन्झ ज्योति रा प्रचार करणा। ²⁴ से आपणे बचाऊआ मन्झ जेबे इन्हा गल्ला जो करेया करहा था कि फेस्तुसे चिल्लाई किन्हें बोल्या, पौलुस तेरा दमाग खराब हुई गईरा! तेरी ज्यादा पढाई ऐ तू पागल बणाई दितिरा। ²⁵ पर तिने बोल्या; हे माहप्रतापी फेस्तुस, हांऊ पागल नी आ, पर सच्चाई होर बुद्धि री गल्ला बोल्हा। ²⁶ राजा भी जेस रे साम्हणे हांऊ निडर हुई किन्हें बोल्या करहा, ये गल्ला जाणहां, होर मुंजो विस्वास आ, कि इन्हा गल्ला मंझा ले कोई तेस ले नी छिपिरी, क्युंकि से घटना केसी एक कोणे मन्झ नी हुई री। ²⁷ हे राजन अग्रिप्पा! नबिए जो लिखीरा, क्या तू तेता मन्झ विस्वास करहा? हांऊ जाणहां कि तू विस्वास करहा। ²⁸ होर अग्रिप्पे पौलुसा किन्हें बोल्या, क्या तू इतनी असानी किन्हें मुंजो मसीह बणाणा चाहां? ²⁹ पौलुसे जबाब दितेया, थोहडे टैमा मन्झ, या ज्यादा टैमा मन्झ, परमेसरा ले मेरी प्रार्थना ई कि ना सिर्फ तू बल्कि स्यों सभ भी, जो आज मुंजो सुणेया करहा ऐ, इन्हा बेडीया जो छाडी किन्हें, स्यों मेरे साहीं हुई जाए। ³⁰ तेबे राजा होर हाकम होर बिरनिके होर तिन्हा साउगी बैठणे वाळे उठी गये। ³¹ होर लग जे जाई किन्हें आपु मन्झ बोल्दे लगे, ये आदमी एहड़ा ता कुछ नी करदा, जो मौता री सजा या जेहला मन्झ पाणे रे लायक हो। ³² अग्रिप्पे फेस्तुसा किन्हें बोल्या, अगर ये आदमी कैसरा री दुहाई नी देंदा, ता एस जो छाडी दितेया जाणा था।

27 ¹ जेबे ये पक्का हुई गया, कि आस्से जहाजा पर इतालिया जो चली जाए, ता तिन्हे पौलुस होर दूजे कैदीया जो भी यूलियुस नांऊआं रे औगुस्तुसा री पलटना रे एकी सूबेदारा रे हाथा मन्झ सौंपी दितेया। ² होर अद्रमुत्तियुमा रे एकी जहाजा पर जो आसिया रे बाहडेरी जगहा ले हुई किन्हें जाणे वाळा था, तेस पर चढी किन्हें आस्से समुद्री सफरा रे कठे निकळी गये; होर अरिस्तर्खुस नांऊआं रा थिस्सलुनिके रा एक मकिदुनी भी आस्सा साउगी था। ³ दूजे ध्याडे आस्से सैदा मन्झ उतरे होर यूलियुसे दया करी किन्हें पौलुसा जो तेसरे दोस्ता वाले जाणे दितेया कि से तिन्हा री स्यों सेउआ सत्कार स्वीकार करे। ⁴ तेथी ले आस्से दबारा समुद्रा रे रस्ते ले हुई किन्हें चली पये, आस्से साईप्रसा री आडा मन्झ हुई किन्हें चले क्युंकि हवा आस्सा रे खलाफ चलेया करहा ई थी। ⁵ फेरी आस्से किलकिया होर पंफुलिया रे सागर जो पार करदे हुए लुकिया होर मीरा पौहुंचे। ⁶ तेथी सूबेदारा जो सिकंदरिया रा एक जहाज इतालिया जांदे हुए मिलेया, होर तिने आस्सा जो तेस पर चढाई दितेया। ⁷ होर जेबे आस्से बौहत ध्याडे तक मजे मजे चली किन्हें बडी मुस्किला किन्हें कनिदुसा रे साम्हणे पौहुंचे,

ता इधी कठे कि हवा आस्सा जो अगे नी जाणे देआ करहा ई थी; सलमोने रे साम्हणे ले हुई किन्हें क्रेते री आडा मन्झ हुई किन्हें चले ।⁸ होर क्रेता रे बाहडे बाहडे बौहत मुस्किला किन्हें जहाजा जो अगे बढे, होर मनोहर लंगरबारी नाऊआं री जगहा पूजे, जेथी ले लस्या नगर नेडे था ।⁹ जेबे बौहत ध्याडे बीती गये, होर जहाजा जो अगे बढाणा भी खतरे रा काम था; क्यूंकि उपवासा रा ध्याडा भी खत्म हुई चुकिया था इधी कथी पौलुसे खबर दार करदे हुए तिन्हा किन्हें बोल्या ।¹⁰ हे भाईयो, आस्सा जो लघ्हा कि आस्सा रा ये सुमुद्री सफर नासकारी हुणा, ना सिर्फ समाना री होर जहाजा री बल्कि आस्सा रे प्राणा रा भी नुक्सान हुणे वाळा आ ।¹¹ पर पौलुसे जो बोल्या था, तेता पर ध्यान देणे रे बजाय तिने सुबेदारे माझी होर जहाजा रे माल्का री गल्ला रा विस्वास कितेया ।¹² होर से बंदरगाहा री जगहा ठंडी रे ध्याडे काटणे रे कठे ठीक नी थी, इधी कठे तिन्हे सभीए विचार कितेया, कि तेथी ले जहाजा ले हुई किन्हें किहां नी किहां फिनिक्सा मन्झ पूजी किन्हें सर्दी काटे; फिनिक्स क्रेता रा एक एहडा बंदरगाह आ जेसरा मुंह दक्षिण-पश्चिम होर उतर-पश्चिम दुहीं रे साम्हणे आ ।¹³ जेबे दक्षिणी हवा मजे मजे चलदी लगी ता तिन्हे सोचेया कि जेहडा तिन्हे चाहेया था, से तिन्हा जो मिली गया; इधी कठे तिन्हे लंगर चकेया होर क्रेते रे बाहडे बाहडे जहाज लई जांदे लगे ।¹⁴ पर थोहडी देरा मन्झ तेथी ले एक बडी आंधी उठी, जेस जो यूरकुलीन मतलब उतर-पूर्वी आंधी बोल्ला ऐ ।¹⁵ जेबे जहाज तूफाना मन्झ फसी गया होर तूफान रा साम्हणा नी करी सक्या ता आस्से तेस जहाजा जो हवा रे रुखा रे मुताबक जाणे दितेया, होर आस्से भी तेस जहाजा साउगी बैहन्दे हुए चली गये ।¹⁶ तेबे कौदा नाऊआं रे एक छोटे टापू री आडा मन्झ बैहन्दे बैहन्दे आस्से बौहत मुस्किला किन्हें जहाजा री डोंगी मतलब बचाव करणे वाळी किस्ती जो आस्से पकडी सके ।¹⁷ फेरी डोंगीया मतलब बचाव करणे वाळी किस्तिया जो उठाणे ले बाद जहाजा जो च्लाणे वाळे, जहाजा जो रस्सी किन्हें बान्ही दितेया होर सिरतिसा रे चोरबालू पर फसणे रे डरा ले, पाल होर समान तुआरी किन्हें, बैहन्दे चली गये ।¹⁸ दूजे ध्याडे जेबे आस्से तूफाना री वजहा ले हिचकोले होर धक्के खाधे, ता स्यों जहाजा रा समान सटदे लगे ।¹⁹ होर व्रीजे ध्याडे तिन्हे आपणे हाथा ले जहाजा रा समान सटी दितेया ।²⁰ फेरी बौहत ध्याडे तक जेबे सूरज होर तारे नी सुज्हे होर बडी आंधी चलेया करहा ई थी, होर आस्सा जो बचणे री आस नी रही ।²¹ जेबे स्योंबगैर खाणे कई ध्याडे काटी चुके, ता पौलुस तिन्हारे बीचा मन्झ खडा हुई किन्हें बोल्ला लग्या, हे भाईयो, अगर तुस्से मेरी सलाह मनी हुन्दी होर क्रेता ले रवाना नी हुंदे ता ठीक था, तेबे ना ता ये विपत्ति आऊणी थी होर ना नुक्सान हुणा था ।²² पर हांऊ एबे भी तुस्सा किन्हें

अरज करहा कि आपणी हिम्मत बणाई रखा, क्यूंकि तुस्सा मंझा ले केसी रे प्राणा री हानि नी हुणी, पर एस जहाजा नास हुई जाणा ।²³ क्यूंकि परमेसर जेसरा हांऊ आ, होर जेसरी सेउआ हांऊ करहा, तेसरे स्वर्गदूते राती मेरे वाले आई किन्हें बोल्या ।²⁴ हे पौलुस, मत डर; तुजो कैसरा रे साम्हणे खडे हुणा जरुरी आ; होर देख, परमेसरे सभी जो, जो तेरे साउगी सफर करेया करहा ऐ, तुजो देई दितीरा ।²⁵ इधी कठे, हे भाईयो, हिम्मत रखा; क्यूंकि हांऊ परमेसरा रा विस्वास करहा, कि जेहडा मेरे किन्हें बोलिरा, तेहडा ई हुणा ।²⁶ पर केसी टापू पर आस्सा रा जहाज जरुर लगी जाणा ।²⁷ फेरी जेबे चौदहवीं रात आई, होर आस्से अद्रिया सागरा मन्झ भटकेया करहा ऐ थे, ता आधी राती रे लगभग जहाजा रे च्लाणे वाळेया जो लग्या कि आस्से केसी देसा रे नेडे ऐ ।²⁸ तिन्हे सागरा री गैहराई नापी ता पता चलेया कि तेथी लगभग अस्सी हाथ डुघी गैहराई थी, थोहडी देरा बाद तिन्हे पाणी री गैहराई नापी होर पता चलेया कि हली भी गैहराई लगभग साठ हाथ रही गईरी ।²⁹ तेबे एस डरा ले कि जहाज केते पत्थरीली चटाना मन्झ नी फसी जाए, तिन्हे जहाजा रे पिछले हिस्से रे चार लंगर पाए, होर प्रार्थना करदे लगे कि किहां नी किहां भ्याग हुई जाए ।³⁰ होर जेबे जहाज च्लाणे वाळे जहाजा ले उतरी किन्हें भगणा चाहें थे, होर अगले हिस्से मन्झ लंगर पाणे रे भाने, स्यों डोंगी जो समुद्रा मन्झ तुआरी चुकीरे थे ।³¹ तेबे पौलुसे सूबेदारा होर स्पाहिया किन्हें बोल्या, अगर ये जहाजा पर नी रैहे ता तुस्सा भी नी बचणा ।³² तेबे स्पाहिए रस्सी काटी किन्हें डोंगीया मतलब बचाव करणे वाळी किस्तिया ड्याई दिती ।³³ भ्याग हुणे ले थोहडे पैहले पौलुसे सभी ले अरज किती कि स्यों खाणा खाई ले, क्यूंकि आज चौदा ध्याडे हुई चुकिरे होर तुस्से लगातार चिंता री वजहा ले भूखे रैहया करहा ऐ, होर कुछ नी खाधेया ।³⁴ इधी कठे हांऊ तुस्सा जो समझाया करहा; कि कुछ खाई लऊआ, जेस ले तुस्से बची सको; क्यूंकि तुस्सा मंझा ले केसी रे मुंडा रा एक भी बाळ नी पऊणा ।³⁵ होर ये बोली किन्हें तिने रोटी लई होर सभी रे साम्हणे परमेसरा रा धन्यवाद कितेया; होर तोडी किन्हें खांदा लग्या ।³⁶ तेबे स्यों सभ भी हिम्मत करी किन्हें खाणा खांदे लगे ।³⁷ होर जहाजा पर आस्सा सभी जो मिली किन्हें दो सौ छेहत्र माहुणु थे ।³⁸ जेबे स्यों खाणा खाई किन्हें रजी गये, ता कणका जो समुद्रा मन्झ सटी किन्हें जहाजा जो हल्का करदे लगे ।³⁹ जेबे भ्याग हुई, ता स्यों तेस देसा जो नी पैहचाणी सके, तिन्हा जो से जगहा एक खाडी लगी जेसरा किनारा चौरस था, होर तिन्हे ये फैसला कितेया, कि अगर हुई सके, ता एस जहाजा जो एस किनारे पर ई खडा करी दे ।⁴⁰ तेबे तिन्हे लंगरा जो खोल्ही किन्हें समुद्रा मन्झ छाडी दितेया, होर तेस ई टैम पतवारा रे बाहन खोल्ही दिते, होर फेरी जहाजा रे अगले पतवार चढाई

किन्हें किनारे बखा जो चली पये । 41 पर दो पाणी री धारा रे बीचा मन्झ पई किन्हें जहाज रेता मन्झ जाई फस्सेया होर तेसरा अगला हिस्सा एहडा धस्सेया कि हिली नी सक्या; होर पिछला हिस्सा लैहरा री मारा किन्हें टूटदा लग्या । 42 तेबे स्पाहिए सलाह किती, कि कैदिया जो मारी दे; एहडा नी हो कि कोई भी कैदी तैरी किन्हें बची जाए । 43 पर सूबेदार पौलुसा जो बचाणा चाहां था, इधी कठे तिने तिन्हा जो हुक्म दितेया कि जो तैरी सकहा ऐं, स्यों पैहले छलांग लगाई किन्हें बाहडे पर निकळी जाए । 44 होर बाकी लोक फट्टे होर जहाजा री दूजी चीजा या टुकड़े रे सहारे निकळी जाए, इहां सभ के सभ सही सलामत सुकी ज्मीना पर पूजी गये ।

28 ¹ होर जेबे आस्से बची निकळे, ता पता चल्या कि एस टापू जो माल्टा बोल्ला ऐ । ² होर तिन्हे जंगली लोके आस्सा पर नौखी किरपा किती; क्युंकि ठंडी रे ध्याडे थे होर वरखा भी हुएया करहा ई थी, इधी कठे तिन्हे आग भ्खाई किन्हें आस्सा रा स्वागत कितेया । ³ जेबे पौलुसे लकड़ी रा भारा कठे करी किन्हें आगा पर रख्या, ता एक कीड़ा सेक लगणे री वजहा ले बाहर निकळेया होर पौलुसा रे हाथा किन्हें लिप्टी गया । ⁴ जेबे तेथी रे लोके तेस कीड़े जो तेसरे हाथा मन्झ लिप्टी रे देख्या, होर सोचेया कि तिने कीड़े से डसी लईरा, ता स्यों आपु मन्झ बोल्दे लगे, पक्का ई ये आदमी एक हत्यारा आ, अगर ये समुद्रा ले बची सही सलामत निकळी गया, पर न्याय री वजहा ले एस जो जीऊन्दा नी जाणे दितेया । ⁵ तेबे तिने कीड़े जो आगा मन्झ झटकी दितेया, होर तेस जो कुछ नुक्सान नी हुएया । ⁶ पर स्यों ध्याग्या करहा ऐ थे, कि या ता तेस सूजी जाणा या ता अचानक धरती पर पई किन्हें मरी जाणा; पर बौहत देरा तक न्ह्याळदे रैहे होर ये देखी किन्हें कि तेसरा कुछ नी बिगडेया, ता तिन्हे आपणी सोच बदली दिती, होर बोल्दे लगे, कि ये ता कोई देवता आ । ⁷ तेस जगहा रे नेडे ई तेस टापू रे प्रधान अधिकारी पुबलियुसा री ज्मीन थी, तिने आस्सा जो आपणे घरा लई जाई किन्हें तीन ध्याडे तक आस्सा रे आदर खातर किते । ⁸ होर पुबलियुसा रा बाब बिस्तरे मन्झ बीमार था, तेस जो बुखार होर पेचीस हुई री थी; पौलुस तेस किन्हें मिलणे रे कठे अन्दर गया, फेरी प्रार्थना ले बाद तिने तेस पर हाथ रखे होर से ठीक हुई गया । ⁹ एस घटना ले बाद टापू रे बाकि सभी मरीज भी तेथी आए होर ठीक हुई गये । ¹⁰ होर तिन्हे आस्सा रा कई तरीके किन्हें आदर खातर किती, जेबे आस्से तेस जगहा ले जाणे वाळे थे ता तिन्हे आस्सा री सारी चीजा जहाजा पर लादी दिती । ¹¹ तीन म्हीने ले बाद आस्से सिकंदरिया रे एक जहाजा पर रवाना हुए, जो तेस टापू पर भर सर्दी मन्झ था; होर जेसरा नसाण दियुसकूरी था । ¹² सुरकुसा मन्झ लंगर पाई किन्हें आस्से होर तीन ध्याडे तक रुकी गये । ¹³ तेथी ले आस्से

धूमी किन्हें रेगियुसा मन्झ आए; होर एक ध्याडे ले बाद दक्षिणी हवा चली; इधी कठे आस्से दूजे ध्याडे पुतियुली मन्झ आए । ¹⁴ तेथी आस्सा जो भाई मिले, होर तिन्हा रे बोलणे ले आस्से तिन्हा रे घरा सात ध्याडे तक रैहे; होर इहां आस्से रोम पूजे । ¹⁵ होर जेबे भाईये आस्सा रे बारे मन्झ सुणेया, ता अप्पियुसा रे चौका होर तीन सराय तक स्यों आस्सा किन्हें मिल्दे आए जिन्हा जो देखी किन्हें पौलुसे परमेसरा रा धन्यवाद कितेया, होर तेस जो हिम्मत मिली । ¹⁶ जेबे आस्से रोमा मन्झ पूजे, ता पौलुसा जो एकी स्पाही साउगी जो तेसरी देख भाल करहा था; कल्हे रैहणे रा हुक्म हुएया । ¹⁷ तीन ध्याडे ले बाद तिने यहूदिया रे बडे लोका जो सादेया, होर जेबे स्यों कठे हुई गये ता तिन्हा किन्हें बोल्या; हे भाईयो, मैं आपणे लोका रे या बाबदादा रे व्यवहारा रे खलाफ कुछ नी कितेया, तेबे बी कैदी हुई किन्हें यरुस्लेमा ले रोमिया रे हाथा सौम्पेया गया । ¹⁸ तिन्हे मेरी जांच पडताल करी किन्हें हांऊ छाडी दितेया, क्युंकि मौता री सजा रे लायक मेरे मन्झ कोई दोष नी था । ¹⁹ पर जेबे यहूदीये ब्रोध कितेया, ता मुंजो कैसरा री दुहाई देनी पडी; पर इधी कठे नी कि हांऊ आपणे ई लोका पर कोई इल्जाम लगाणा चाहां था । ²⁰ ये ई कारण आ कि हांऊ तुस्सा किन्हें मिलूं होर गलबात करूं क्युंकि इस्नाएला री उम्मीदा रे कठे हांऊ एस जंजीरा ले बंधिरा । ²¹ तिन्हे तेस किन्हें बोल्या; ना आस्से तेरे बारे मन्झ यहूदिया ले कोई चिठिया पाई, होर ना भाईया मन्झा ले केसीए आई किन्हें तेरे बारे मन्झ कुछ दस्या, होर ना बुरा बोल्या । ²² पर तेरा विचार क्या आ? से ई आस्से तुध ले सुणना चाहें, क्युंकि आस्से जाणहां ऐं, कि हर जगहा एस मता रे ब्रोधा मन्झ लोक गल्ला करहा ऐ । ²³ तेबे तिन्हे तेसरे कठे एक ध्याडा नियुक्त कितेया, होर बौहत लोक बडी संख्या मन्झ आई किन्हें कठे हुए; मुस्सा री व्यवस्था होर नबिया रे ग्रन्था ले यीसू रे बारे मन्झ तिन्हा जो समझाणे रा जतन करदे हुए तिने परमेसरा रे राजा रे बारे मन्झ आपणी गुआही दिती होर समझाया; से भ्यागा ले साहन्जा तक एता मन्झ ई लगी रैह्या । ²⁴ तिने जो कुछ बोलीरा था, तेता ले कुछ ता सैहमत हुई गये पर कुछ लोके विस्वास नी कितेया । ²⁵ फेरी जेबे स्यों आपु मन्झ एक दूजे किन्हें एक मत नी हुए; ता पौलुसा री एस एकी गल्ला रे बोलणे ले स्यों चली गये; कि पवित्र आत्मे यशायाहा नबी रे ज्जीए तुस्सा रे बाब दादे किन्हें ठीक ई बोलिरा, कि जाई किन्हें इन्हा लोका किन्हें बोल । ²⁶ कि तिन्हा सुणदे ता रैहणा, पर नी समझणा, होर तिन्हा देख्दे ता रैहणा, पर नी समझणा । ²⁷ क्युंकि इन्हा लोका रा मन मोटा, होर तिन्हारे कान भारी हुई गईरे, होर तिन्हे आपणी हाखिया बंद करी दितिरी, एहडा नी हो कि स्यों कधी हाखिया ले देखे, होर काना ले सुणे, होर मना ले समझे होर फिरे, होर हांऊ तिन्हा जो ठीक करूं । ²⁸ इधी कठे तुस्से जाणी लो कि परमेसरा

रा उद्धार दूजी जातिया वाले भेजी जाई चुकिरा, होर तिन्हा ऐ जरुर सुणना । ²⁹जेबे तिने ये बोल्या ता यहूदी आपु मन्झ बैहस करदे लगे होर तेथी ले चली गये । ³⁰होर से दो साल तक आपणे भाडे रे घरा मन्झ रह्या । ³¹होर जो तेस वाले आहूँआ ऐं,

तिन्हा सभी किन्हें मिलदा रह्या होर बिना रोक टोक न्डरे हुई किन्हें परमेसरा रे राजा रा प्रचार करदा होर प्रभु यीसू मसीह री गल्ला सिखांदा रह्या ।

रोमियो

1¹ पौलुसा री तरफा ले जो यीसू मसीहा रा दास आ, होर प्रेरित हुणे रे कठे सादेया गईरा था, होर परमेसरे तेस जो सुसमाचारा रे कठे अलग कितरा था।² जेसरी तिने पैहले ले ई आपणे नबिया रे ज़ीए पवित्रसास्त्रा मन्झ।³ आपणे पुत्र आस्सा रे प्रभु यीसू मसीह रे बारे मन्झ प्रतिज्ञा कितिरी थी, जो सरीरा रे मुताबक ता दाऊदा रे बंसा ले जम्मेया।⁴ होर से पवित्रता री आत्मा रे मुताबक मरिरे मंझा ले जी उठणे री वजहा ले सामर्था साउगी परमेसरा रा पुत्र ठैहरया।⁵ जेस रे ज़ीए आस्सा जो अनुग्रह होर प्रेरिताई मिली; कि तेसरे नाऊआं री वजहा ले सारे जातिया रे लोक विस्वास करी किन्हें तेस री मन्जे।⁶ जिन्हा मन्झ तुस्से भी यीसू मसीह रे हूणे रे कठे सादे गईरे।⁷ तिन्हा सभी रे नाऊ जो रोमा मन्झ परमेसरा रे प्यारे ऐ होर पवित्र हूणे रे कठे सादे गईरे। आस्सा रे पिता परमेसर होर प्रभु यीसू मसीह री तरफा ले तुस्सा जो अनुग्रह तरफा ले सांति मिल्दी रहे।⁸ पैहले हांऊ तुस्सा सभी रे आ कठे यीसू मसीहा रे ज़ीए आपणे परमेसरा रा धन्यवाद करहा, कि तुस्सा रे विस्वासा री चर्चा सारे संसारा मन्झ हुएया करहा ई।⁹ परमेसर जेस री सेऊआ हांऊ आपणी आत्मा ले तेसरे पुत्रा रे सुसमाचारा रे बारे मंझे करहा, से ई आस्सा रा गवाह आ; कि हांऊ तुस्सा जो किहां लगातार याद करदा रेंहयां।¹⁰ होर हमेसा हांऊ आपणी प्रार्थना मन्झ अरज करहा, कि किहां नी किहां एबे भी तुस्सा वाले आऊणे री मेरी यात्रा परमेसरा री इच्छा ले सफल हो।¹¹ क्यूंकि हांऊ तुस्सा किन्हें मिलणे री इच्छा करहा कि हांऊ तुस्सा जो कोई आत्मिक वरदान देंऊ जेस ले तुस्से मजबूत हुई जाओ।¹² यानि - ये, कि हांऊ तुस्सा रे बिचा मन्झ हुई किन्हें तुस्सा साउगी तेस विस्वासा रे ज़ीए जो मेरे मन्झ आ, होर तुस्सा मन्झ आ, सांति पांऊ।¹³ होर हे भाइयो, हांऊ नी चाहन्दा, कि तुस्से एस गल्ला ले अनजाण रहा, कि मैं बार बार तुस्सा वाले आऊणा चाहेया, कि जिहां मुंजो होर अन्यजातिया मन्झ फल मिलेया, तिहां ई तुस्सा मन्झ भी मिले, पर हली तक रुकावट आउंदी रही।¹⁴ हांऊ युनानिया होर अन्यभाषा रा होर बुद्धिमाना रा होर मूर्खा रा कर्जदार आ।¹⁵ इधी कठे, हांऊ तुस्सा जो भी जो रोमा मन्झ रेंहयां ऐं, सुसमाचारा सुनाणे रे कठे त्यार आ।¹⁶ क्यूंकि हांऊ सुसमाचारा सुनाणे ले नी सरमान्दा, इधी कठे कि से हर एक विस्वास करणे वाळे रे कठे, पैहले ता यहूदी, फेरी यूनानी रे उद्धारा रे कठे परमेसरा री सामर्थ ई।¹⁷ क्यूंकि तेता मन्झ परमेसरा री धार्मिकता विस्वासा ले होर विस्वासा रे कठे जाहिर हुहां ई; जिहां लिख्ही रा, कि विस्वासा ले धर्मी माहणुआं

जीउंदे रैहणा।¹⁸ परमेसरा रा गुस्सा ता तिन्हा लोका री सब अभक्ति होर अधर्मा पर स्वर्गा ले जाहिर हुहां; जो सच्चाई जो अधर्मा किन्हें दबाई रख्हा ऐ।¹⁹ इधी कठे कि परमेसरा रे बारे मन्झ स्यों पूरी तरह जाणहां ऐं, क्यूंकि परमेसरे ये तिन्हा पर जाहिर कितेया।²⁰ जेबे ले संसारा री रचना हुई तेसरे अणदेखे गुण, यानि - तेस री सनातन सामर्थ, होर परमेसरत्व साफ साफ सुद्धा क्यूंकि तिन्हा चीजा ले तिन्हा जो पूरी तरह जाणी जाई सकहा, जो परमेसरे रची, इधी कठे लोका वाले एबे कोई भाना नी आ।²¹ एस वजहा ले कि परमेसरा जो जाणने पर भी तिन्हे परमेसरा रे लायक बडाई होर धन्यवाद नी कितेया, पर बेकार विचार करदे लगे, एथी तक कि तिन्हा रा निर्बुद्धि मन काळा हुई गया।²² स्यों आपणे आपा जो बुद्धिमान जताई किन्हें मुर्ख बणी गये।²³ होर अविनासी परमेसरा री महिमा जो नास्मान माहणु, होर चिडूआ, होर चौपायों होर रघडी किन्हें चलणे फिरणे वाळे जीव जन्तु री मूर्ति समानता मन्झ बदली दितेया।²⁴ एस वजहा ले परमेसरे स्यों तिन्हा रे मना री इच्छा रे मुताबक असुद्धता रे कठे छाडी दिते, कि स्यों आपु मन्झ आपणे सरीरा रा अनादर करे।²⁵ क्यूंकि तिन्हे परमेसरा री सच्चाई झूठा मन्झ बदली दिती, होर सृष्टि री उपासना होर सेऊआ किती, ना कि तेस सृजनहारा री जो हमेसा धन्य आ। आमीन।²⁶ इधी कठे परमेसरे स्यों नीच कामना रे बसा मन्झ छाडी दिते; एथी तक कि तिन्हा री जनानिया भी स्वभाविक यौन रिस्ते रे बजाय अस्वभाविक यौन रिस्ते रखदी लगी।²⁷ तिहां ई मर्ध भी जनानिया साउगी स्वाभाविक व्यवहार छाडी किन्हें आपु मन्झ कामूक हुई किन्हें जल्दे लगे, होर माहणु ये माहणु साउगी निर्लज्ज काम करी किन्हें आपणी बुराई रा ठीक ठीक फल पाया।²⁸ होर जेबे तिन्हे परमेसरा जो पछ्याणने ले नाह करी दिती, इधी कठे परमेसरे भी स्यों तिन्हा रे बेकार मना पर छाडी दिते; ताकि स्यों बुरे काम करे।²⁹ होर स्यों सभ किस्मा रे अधर्म, होर दुष्टता, होर लोभ, होर बैरभावा किन्हें, भहरी गये; होर डाह, होर हत्या, होर झगडे, होर धोखा, होर हिर्खा किन्हें भरपुर हुई गये, होर चुगलखोर।³⁰ बदनाम करणेवाळे, परमेसरा किन्हें बैर करणे वाळे, दूजे री बेज्जती करणे वाळे, घमंडी, डींगमार, बुरी बुरी गल्ला बनाणे वाळे, माऊ बाबा रा हुक्म नी मनणे वाळे।³¹ निर्बुद्धि, विस्वासघाती, दया रहित होर निर्दयी हुई गईरे।³² स्यों ता परमेसरा री ये विधि जाणहां ऐं, कि ऐहडे ऐहडे काम करणे वाळे मौता री सजा रे लायक ऐ, तेबे भी ना

सिर्फ तुम्हें आपु ऐहड़े काम करहा ऐ, पर करणे वाले किन्हें भी खुस हुहां ऐं।

2 ¹ता हे दोष लगाणे वाले, तू कोई भी कि नी हो, तेरे वाले कोई बहाना नी आ। क्यूंकि जेस गल्ला मन्झ तू दुजे पर दोष ल्याहां, तेस ई गल्ला मन्झ आपणे आपा जो भी दोषी बणाहां, इधी कठे कि जो तू दोष ल्याहां, आपु भी से ई काम करहा। ²होर आस्से जाणहां ऐं, कि एहड़े एहड़े काम करणे वाले पर परमेसरा री तरफा ले ठीक ठीक सजा रा हुक्म हुहां। ³होर हे माहणुआ, तू जो एहड़े एहड़े काम करणे वाले पर दोष ल्याहां, होर आपु भी तेहड़ा ई काम करहा; क्या तू ये समझहा, कि तुध परमेसरा री सजा रे हुक्मा ले बची जाणा? ⁴क्या तू तेस री कृपा, होर सैहनसीलता, होर सब्रा जो तुच्छ जाणहां? होर क्या ये नी समझदा, कि परमेसरा री कृपा तुजो मन फिराणा स्वाहीं? ⁵पर आपणी कठोरता होर हठीले मना रे मुताबक तेसरे गुस्से रे ध्याड़े रे कठे, जेस मन्झ परमेसरा रा सच्चा न्याय जाहिर हुणा, आपणे कठे गुस्सा कमान्दा लगिरा। ⁶तेस हर एकी जो तेसरे कामा रे मुताबक बदला देणा। ⁷जो खरे कामा मन्झ मजबूत रही किन्हें म्हीमा, आदर होर अमरता री तलासा मन्झ ऐ, तिन्हा जो तेस बदले मन्झ अनंत जिन्दगी देणी। ⁸पर जो विवादी ऐ होर सच्चाई जो नी मन्नदे, पर अधर्मा जो मन्हा ऐ, तिन्हा जो बदले मन्झ गुस्सा होर प्रकोप मिलणा। ⁹होर एक तेस माहणु पर दुःख होर संकट आऊणा जो बुरा करहा, पैहले ता यहूदी पर फेरी यूनानी पर। ¹⁰होर जो अच्छाई पर चल्हा तेस जो महिमा होर आदरा होर सांति मिलणी, जो खरा करहा पैहले यहूदी जो फेरी यूनानी जो। ¹¹क्यूंकि परमेसर केसी साउगी भेदभाव नी करदा। ¹²इधी कठे कि जिन्हें बगैर व्यवस्था पाये पाप कितेया, तिन्हा बगैर व्यवस्था रे खत्म भी हुई जाणा, होर जिन्हें व्यवस्था पाई किन्हें पाप कितेया, तिन्हा री सजा व्यवस्था रे मुताबक हुणी। ¹³(क्यूंकि जो सिर्फ परमेसरा री व्यवस्था सुणने वाले ऐ, स्यों परमेसरा री नजरा मन्झ धर्मी नी ऐ, पर जो व्यवस्था पर चल्हा ऐ, तिन्हा ई धर्मी बणना। ¹⁴फेरी जेबे अन्यजाती लोक जिन्हा वाले व्यवस्था नी हाई; स्यों स्वभावा ले ई व्यवस्था री गल्ला पर चल्हा ऐ, ता चाहे तिन्हा वाले व्यवस्था नी हाई तेबे भी स्यों आपणी व्यवस्था आपणे आप ऐ। ¹⁵स्यों व्यवस्था री गल्ला आपणे आपणे दिला मन्झ लिखिरी दस्हा ऐ होर तिन्हा रे विवेक भी गवाही देहां ऐं, होर तिन्हा री सोच लगातार दोष ल्याहीं, या तिन्हा जो निर्दोष बणाहीं। ¹⁶जेस ध्याड़े परमेसरा मेरे सुसमाचारा रे मुताबक यीसू मसीहा रे ज़ीए माहणुआं री गुप्त गल्ला रा न्याय करणा। ¹⁷पर अगर तू आपणे आपा जो यहूदी बोल्हा, होर व्यवस्था मन्झ तेरा विस्वास आ, होर परमेसरा रे बारे मन्झ घमण्ड करहा। ¹⁸होर तेस री इच्छा जाणहां होर व्यवस्था

री शिक्षा पाई किन्हें खरी गल्ला जो प्यारा जाणाहां। ¹⁹होर आपणे ऊपर भरोसा रख्हा, कि हांऊ काणेआ रा अगुवा, होर जो न्ह्यारे मन्झ भटक्या करहा ऐ तिन्हा रे कठे तू प्रयासा आ। ²⁰होर मूर्खा रा सिखाणेवाळा, होर बालका रा उपदेसक आ, होर ज्ञान, होर सच्चाई रा नमूना आ, जो व्यवस्था मन्झ आ, मुंजो मिलिरा। ²¹ता क्या तू जो होरी जो स्वाहां, होर आपणे आपा जो नी स्वान्दा? क्या तू चोरी नी करणे रा उपदेस देहां, होर आपु ई चोरी करहा? ²²तू जो बोल्हा, कि व्यभिचार नी करणा, क्या आपु ई व्यभिचार करहा? तू जो मूर्ति ले नफरत करहा, क्या आपु ई मन्दा जो लुट्हा। ²³तू जो व्यवस्था रे बारे मन्झ घमण्ड करहा, क्या व्यवस्था नी मनी किन्हें, परमेसरा री बेज्जती करहा? ²⁴क्यूंकि तुस्सा री वजहा ले अन्यजातिया मन्झ परमेसरा रे नांऊआं री बेज्जती किती जाहीं जिहां लिखिहरा भी आ। ²⁵अगर तू व्यवस्था पर चले, ता खतने ले फायदा ता हाया, पर अगर तू व्यवस्था जो नी मन्ने, ता तेरा खतना बगैर खतना री दसा साहीं ठैहरया। ²⁶अगर केसी रा खतना नी हुआ हो होर से व्यवस्था रे नियमा रा चल्हा, ता क्या तेसरे खतनारहित हुणे री दसा खतने रे बराबर नी गिणी जाणी? ²⁷होर जो माहणु जाति री वजहा ले बगैर खतने रैहया अगर से व्यवस्था जो पूरा करे, अगर से लिखत व्यवस्था पाणे होर खतना किते जाणे पर भी व्यवस्था जो नी मन्ने, ता क्या से दोषी नी ठैहरया जाणा? ²⁸जो बाहरा ले यहूदी ऐ, स्यों प्रगट रूपा मन्झ यहूदी नी ऐ, सरीरा रा खतना हकीकता मन्झ खतना नी आ। ²⁹पर यहूदी से ई आ, जो मना मन्झ आ; होर खतना से ई आ, जो दिला रा होर आत्मा मन्झ आ; ना कि लिखत व्यवस्था रा: एहड़े री बड़ाई माहणु री तरफा ले नी, पर परमेसरा री तरफा ले हुहां ई।

3 ¹ता यहूदी री केहड़ी बड़ाई, या खतने रा क्या फायदा? ²हर तरहा ले बौहत कुछ: पैहले ता ये कि परमेसरा रे वचन तिन्हा जो सौंपे गए। ³अगर तिन्हा मंझा ले कुछ विस्वास घाती भी निकळे ता क्या हुआ। क्या तिन्हा रे विस्वास घाती हुणे ले परमेसरा री सच्चाई बेकार हुई जाणी? ⁴कधी नी, पर परमेसर सच्चा होर हर एक माहणु झूठा ठैहरे, जिहां सास्त्रा मन्झ लिखिहरा कि जेस मन्झ तू आपणी गल्ला मन्झ धर्मी ठैहरे होर फैसला करदे टैम तू जय पाये। ⁵अगर आस्सा रा अधर्म परमेसरा री धार्मिकता सिद्ध करे, ता आस्से क्या बोलिए? क्या ये कि परमेसर जो गुस्सा करहा अन्यायी आ? (ये ता हांऊ माहणु हुणे रे नाते बोल्या करहा.)। ⁶कधी नी, नी ता परमेसरा किहां संसारा रा न्याय करणा? ⁷अगर मेरे झूठा री वजहा ले परमेसरा री सच्चाई तेस री महिमा रे कठे ज्यादा जाहिर हुई, ता फेरी किधियो मुंजो पापी साहीं सजा रे लायक ठैहरया जाहां? ⁸होर आस्से बुराई कि नी करिए, कि भलाई निकळे? जिहां जे आस्सा रे बारे मन्झ निंदा करदे हुए कुछ लोक आस्सा पर दोष

ल्लाहें कि आस्से एहड़ा ई बोल्हा ऐ: पर एहड़े जो दोषी बोलणा ठीक आ।⁹ ता फेरी क्या हुआ? क्या आस्से यहूदी गैर यहूदिया ले केसी भी तरीके ले खरे ऐ? कधी नी; क्यूंकि आस्से यहूदी होर युनानी दुहीं पर दोष लगाई चुकिरे कि स्यों सभ पापा रे कब्जे मन्झ ऐ।¹⁰ जिहां सास्त्रा मन्झ लिख्हीरा कि कोई धर्मी नी आ, एक भी नी आ।¹¹ कोई समझदार नी आ, कोई परमेसरा जो तोपणेवाळा नी आ।¹² सारे भटकी गई रे, सभ के सभ निकम्मे बणी गई रे, कोई भलाई करणे वाळा नी आ, एक भी नी आ।¹³ तिन्हा रा गळा खुल्ही हुई कब्र ई: तिन्हे आपणी जीभा किन्हें धोखा कितेया: तिन्हारे ओठा मन्झ सांपा रा जैहर आ।¹⁴ होर तिन्हारा रा मुंह श्राप होर कड़वाहटा किन्हें भहरी गया।¹⁵ तिन्हा रे पैर खून बहाणे रे कठे तेज ऐ।¹⁶ तिन्हा रे रस्ते मन्झ नास होर दुःख आ।¹⁷ तिन्हें सांति रा पैंडा नी जाणेया।¹⁸ तिन्हा री हाखिया रे साम्हणे परमेसरा रा डर नी आ।¹⁹ आस्से जाणहां ऐं, कि व्यवस्था जो कुछ बोल्हा ई तिन्हा किन्हें बोल्हा ई, जो व्यवस्था रे आधीन आ: इधी कठे कि हर एक मुंह बन्द कितेया जाणा होर सारा संसार परमेसरा री सजा रे लायक ठैहरणा।²⁰ क्यूंकि व्यवस्था रे कामा ले कोई भी प्राणी तेसरे साम्हणे धर्मी नी ठैहरणा इधी कठे कि व्यवस्था रे ज़ीए पापा री पैहचाण हुहां ई।²¹ पर एबे बगैर व्यवस्था परमेसरा री धार्मिकता जाहिर हुईरी, जेस री गवाही व्यवस्था होर नबी देहां ऐं।²² यानि - परमेसरा री से धार्मिकता, जो यीसू मसीह पर विस्वास करणे ले सभ विस्वास करणे वाळे रे कठे ई; क्यूंकि कुछ भी भेदभाव नी आ।²³ इधी कठे कि सभिए पाप कितेया होर परमेसरा री महिमा रे बगैर ऐ।²⁴ पर तेसरे अनुग्रहा ले तेस छुटकारे रे ज़ीए जो मसीह यीसू मन्झ आ, मुफता मन्झ धर्मी ठैहराए जाहें।²⁵ तेस जो परमेसरे तेसरे खूना री वजहा ले एक एहड़ा प्रायश्चित ठैहराया जो विस्वास करणे ले काम करहा, कि जो पाप पैहले किते गए, होर जिन्हा री परमेसरे आपणी सैहनसीलता ले आनाकानी किती। कि तिन्हा रे बारे से आपणी धार्मिकता जाहिर करे।²⁶ पर एस टैम तेस री धार्मिकता जाहिर हो; कि जेस ले से आपु ई धर्मी ठैहरे, होर जो यीसू पर विस्वास करे, ता तेसरा भी धर्मी ठैहराणे वाळा हो।²⁷ ता घमण्ड करणा केथी रैहया? से ता मुकी गया: कुण जे व्यवस्था री वजहा ले? क्या कर्मा री व्यवस्था ले? नी, पर विस्वासा री व्यवस्था री वजहा ले।²⁸ इधी कठे आस्से एस नतीजे पर पुज्हा ऐ कि माहणु व्यवस्था रे कामा रे बगैर विस्वासा रे ज़ीए धर्मी ठैहरा आ।²⁹ क्या परमेसर केवल यहूदिया रा आ? क्या अन्यजातिया रा नी आ? हां, अन्यजातिया रा भी आ।³⁰ क्यूंकि परमेसर एक ई आ, जेस खतनावाळे विस्वासा किन्हें होर बगैर खतना वाळे भी विशवसा रे ज़ीए धर्मी ठैहराणे।³¹ ता क्या आस्से व्यवस्था

जो विस्वासा रे ज़ीए बेकार करहा ऐ? कधी नी, पर व्यवस्था जो मजबूत करहा ऐ।

4¹ ता आस्से क्या बोलीए, कि आस्सा रे सारीरिक बाप ले धर्मी ठहराया जान्दा, ता तेस जो घमण्ड करणे री जगहा हुन्दी, पर परमेसरा रे नेडे नी।³ पवित्र शास्त्र क्या बोल्हा आ? ये कि अब्राहमे परमेसरा पर विस्वास कितेया, होर ये तेसरे कठे धार्मिकता गिणी गई।⁴ काम करणे वाळे री मजदूरी देणा दान नी ई, पर हक्क समझ्या जाहां।⁵ पर जो काम नी करदा बल्कि भक्तिहीना रे धर्मी ठहराणे वाळे पर विस्वास करहा, तेसरा विस्वास तेसरे कठे धार्मिकता गिणेया जाहां।⁶ जेस जो परमेसर बगैर कामा रे धर्मी ठैहराहां, तेस जो दाऊद भी धन्य बोल्हा।⁷ कि भागा वाळे ऐ स्यों, जिन्हा रे पाप माफ हुए, होर जिन्हा रे पाप लकोए गये।⁸ भागा वाळा आ से माहणु जेस जो परमेसरे पापी नी ठैहराया।⁹ भागा वाळा बोलणा, क्या ये खतनावाळे रे कठे आ, या बगैर खतना वाळे रे कठे भी आ? आस्से ये बोल्हा ऐ, कि अब्राहमा रे कठे तेसरा विस्वास धार्मिकता गिणी गई।¹⁰ तेबे से किधियो गिणेया गया? खतने रे दसा मन्झ या बगैर खतने री दसा मन्झ? खतने री दसा मन्झ नी पर बगैर खतने री दसा मन्झ।¹¹ होर तिने खतने रा चिन्ह पाया, कि तेस विस्वासा री धार्मिकता पर छाप हुई जाए, जो तिने बगैर खतने री दसा मन्झ रखिरा था: जेस ले से तिन्हा सभी रा बाप ठैहरे, जो बगैर खतने री दसा मन्झ विस्वास करहा ऐ, ताकि स्यों भी धर्मी ठैहरा ऐ।¹² होर तिन्हा रा खतना कितिरे लोका रा बाप हो, जिन्हारा ना सिर्फ खतना कितेया गईरा; पर आस्सा रे पिता अब्राहमा रे तेस विस्वासा रे मुताबक भी चल्हा ऐ जो तिने बगैर खतने री दसा मन्झ कितेया था।¹³ क्यूंकि ये प्रतिज्ञा किती कि तेस संसारा रे वारिस हुणा, ना अब्राहमा जो, ना तेसरे बंसा जो व्यवस्था रे ज़ीए दिती गई थी, पर विस्वासा री धार्मिकता रे ज़ीए मिली।¹⁴ क्यूंकि अगर व्यवस्था वाळे वारिस ऐ, ता विस्वास बेकार होर प्रतिज्ञा बेकार ठैहरी।¹⁵ व्यवस्था ता गुस्सा उपजाहीं होर जेथी व्यवस्था नी ई तेथी तेता री टाळ मटोळ भी नी हाई।¹⁶ एस वजहा ले ई से विस्वासा रे ज़ीए मिल्हा ई, कि ये अनुग्रह री रीती रे मुताबक हो, कि प्रतिज्ञा सारे बंसा रे कठे मजबूत हो, ना कि सिर्फ तेसरे कठे जो व्यवस्थावाळा आ, बल्कि तिन्हा रे कठे भी जो अब्राहमा साहीं विस्वासा वाळे ऐ: से ई ता आस्सा सभी रा बाप आ।¹⁷ (जिहां सास्त्रा मन्झ लिख्हीरा कि मैं तू बौहत जातिया रा बाप नियुक्त कितिरे) तेस परमेसरा रे साम्हणे जेस पर तिने विस्वास कितेया होर जो मुर्देया जो जिउंदा करहा, होर जो गल्ला बिलकुल नी हाई; तिन्हा रा नाऊ एहड़ा लैहां, जिहां जे हाई हो।¹⁸ तिन्हें निरासा मन्झ भी आस रखी किन्हें विस्वास

कितेया, इधी कठे कि तेस बोले गईरे वचना रे मुताबक तेरा बंस एहड़ा हुणा कि तेस कई जातिया रा बाप हुणा।¹⁹ होर से एक सौ साला रा था, होर ये जाणदे हुए कि तेसरा सरीर सौ साला री बूढा मरियल हुई चुकिरा होर सारा बाँझ ई, से आपणे विस्वासा मन्झ कमजोर नी हुआ।²⁰ होर ना तिने अविस्वासी हुई किन्हें परमेसरा री प्रतिज्ञा पर संदेह कितेया, पर विस्वासा मन्झ मजबूत हुई किन्हें परमेसरा री महिमा किती।²¹ होर पक्का जाणी लऊआ, कि जेस गल्ला री तिने प्रतिज्ञा कितीरी, से तेस जो पूरा करणे रे कठे सामर्थी आ।²² एस वजहा ले, ये तेसरे कठे धार्मिकता गिणी गई।²³ होर ये वचन, कि विस्वास तेसरे कठे धार्मिकता गिणी गई, ये सिर्फ तेसरे कठे नी लिखीरा।²⁴ पर आस्सा रे कठे भी जिन्हा रे कठे विस्वास धार्मिकता गिणी गई, यानि-आस्सा रे कठे जो तेस पर विस्वास करहा ऐ जिने आस्सा रे प्रभु यीसू जो मरिरे मन्झा ले जिउंदा कितेया।²⁵ से आस्सा रे पापा रे कठे पकड़वाया गया, होर आस्सा रे धर्मी ठैहरणे रे कठे जिउंदा भी कितेया गया।

5¹ जेबे आस्से विस्वासा ले धर्मी ठैहरे, ता आपणे प्रभु यीसू मसीहा रे ज़ीए परमेसरा साउगी मेल रखा।² जेस रे ज़ीए विस्वासा रे वजहा तेस अनुग्रहा तक, जेस मन्झ आस्से बणी रही रे, आस्सा री पहुंच भी हुई, होर परमेसरा री महिमा री उम्मीदा पर घमण्ड करा।³ सिर्फ ये ई नी, पर आस्से दुःखा मन्झ भी घमण्ड करे, एहड़ा जाणी किन्हें कि दुःखा मन्झ धीरज।⁴ होर धीरजा ले खरा निकलणा, होर खरे निकलणे ले आस पैदा हुहां ई।⁵ होर उम्मीदा ले सर्म नी हुन्दी, क्यूंकि पवित्र आत्मा जो आस्सा जो दितिरी तेता रे ज़ीए परमेसरा रा प्यार आस्सा रे मना मन्झ पाई दितिरा।⁶ क्यूंकि जेबे आस्से निर्बल ई थे, ता मसीह ठीक टैमा पर भक्तिहिना रे कठे मरी गया।⁷ केसी धर्मी माहणु रे कठे कोई मरे, ये ता दुर्लभ आ, पर क्या जाणे केसी खरे माहणु रे कठे कोई मरणे री भी हिम्मत करे।⁸ पर परमेसर आस्सा पर आपणे प्यारा री भलाई इस तरह जाहिर करहा, कि जेबे आस्से पापी ही थे ता मसीह आस्सा रे कठे मरेया।⁹ जेबे कि आस्से, एबे तेसरे खुना री वजहा ले धर्मी ठैहरे, ता तेसर ज़ीए गुस्से ले कि नी बचणा? ¹⁰ क्यूंकि बैरी हुणे री दसा मन्झ ता तेसरे पुत्रा री मौता रे ज़ीए आस्सा रा मेल परमेसरा साउगी हुआ फेरी मेल हुई जाणे पर तेसरी जिंदगी री वजहा ले आस्सा उद्धार कि नी पाणा? ¹¹ होर सिर्फ ये ई नी, पर आस्से आपणे प्रभु यीसू मसीह रे ज़ीए जेस रे ज़ीए आस्सा रा मेल हुआ, परमेसरा रे बारे मन्झ घमण्ड भी करहा ऐ।¹² इधी कठे जिहां एक माहणु री वजहा ले पाप एस संसारा मन्झ आया, होर पापा री वजहा ले मौत आई, होर इहां करी किन्हें मौत सभ माहणुआं मन्झ फैलही गई, इधी कठे कि सभिए पाप कितिरा।¹³ क्यूंकि व्यवस्था रे दिये जाणे तक पाप संसारा मन्झ ता था, पर जेथी

व्यवस्था नी हाई; तेथी पापा री गिणती नी हुन्दी।¹⁴ तेबे भी आदमा ले लई किन्हें मुसा तक मौत तिन्हा लोका पर भी राज्य कितेया, जिन्हें तेस आदमा रे पापा साहीं तेस आऊणे वाळे रा चिन्ह आ, पाप नी कितेया।¹⁵ पर जिहां पापा री दसा ई, तिहां ई अनुग्रह रे वरदाना री नी ई, क्यूंकि जेबे एक माहणु रे पापा ले बौहत लोक मरे, ता परमेसरा रा अनुग्रह होर तेसरा जो दान एक माहणु रे, यानि - यीसू मसीहा रे अनुग्रहा ले हुआ बौहत लोका पर जरूर ज्यादा ई हुआ।¹⁶ होर जिहां एक माहणु रे पाप करणे रा फल हुआ, तिहां ई दाना री दसा नी ई, क्यूंकि एकी री वजहा ले सजा रे हुक्मा रा फैसला हुआ, पर बौहत पापा ले एहड़ा बरदान उत्पन्न हुआ, कि लोक धर्मी ठैहरे।¹⁷ क्यूंकि जेबे एक माहणु रे पापा री वजहा ले मौते तेस एक ई रे ज़ीए राज्य कितेया, ता जो लोक अनुग्रह होर धर्मरूमी बरदान बहुतायता ले पाहें स्यों एक माहणु रे, यानि - यीसू मसीह रे ज़ीए जरूर ई अनन्त जिन्दगी मन्झ राज्य करणा।¹⁸ इधी कठे जिहां एक पाप सभ माहणु रे कठे सजा रे हुक्मा रे वजहा ले हुआ, तिहां ई एक धर्मा रा काम भी सभ माहणु री जिंदगी रे कठे धर्मी ठैहराए जाणे री वजहा हुई।¹⁹ क्यूंकि जिहां एक माहणु रे हुक्म नी मनणे ले बौहत लोक पापी ठैहरे तिहां ही एक माहणु रे हुक्म मनणे ले बौहत लोका धर्मी ठैहरणा।²⁰ होर व्यवस्था बीचा मन्झ आई गई, कि पाप बौहत हो, पर जेथी पाप बौहत ज्यादा हुआ, तेथी अनुग्रह तेता ले भी बढी किन्हें ज्यादा हुआ।²¹ कि जिहां पापे मौत फैलहान्दे हुये राज कितेया, तिहां ई आस्सा रे प्रभु यीसू मसीह रे ज़ीए अनुग्रह भी अनन्त जिंदगी रे कठे धर्मी ठैहरान्दे हुये राज करे।

6¹ ता आस्से क्या बोलिए? क्या आस्सा पाप करदे रहिए, कि अनुग्रह बौहत हो? ² कधी भी नी, जेबे आस्से पापा रे कठे मरी गये ता फेरी अगे जो तेता मन्झ जिन्दगी किधियो बिताणी? ³ क्या तुस्से नी जाणेदे, कि आस्से जितने मसीह यीसू रा बपतिस्मा लया ता तेस री मौता रा बपतिस्मा लया? ⁴ इधी कठे तेसरी मौता रा बपतिस्मा पाणे ले आस्से तेस साउगी दबाए गए, ताकि जिहां मसीह पिता री महिमा रे ज़ीए मरिरे मंझा ले जिउंदा कितेया गया, तिहां ई आस्से भी नौई जीन्दगी री चाल चले।⁵ क्यूंकि अगर आस्से तेस री मौता री समानता मन्झ तेस साउगी जुटी गईरे, ता पक्का तेसरे जी उठणे री समानता मन्झ भी जुटी जाणा।⁶ क्यूंकि आस्से जाणहां ऐ कि आस्सा रा पुराणा माहणुपन तेस साउगी कूसा पर चढाया गया, ताकि पापा रा सरीर बेकार हुई जाए, ताकि आस्से अगे जो पापा रे गुलाम नी रहे।⁷ क्यूंकि जो मरी गया, से पापा ले छुटी किन्हें धर्मी ठैहरया।⁸ होर अगर आस्से मसीह साउगी मरी गए, ता आस्सा रा विस्वास ये आ, कि आस्सा तेस साउगी जीणा भी आ।⁹ क्यूंकि ये जाणहां ऐ, कि मसीह मरिरे मंझा ले जिउंदा हुई

किन्हें दबारा मरणे वाळा नी आ, तेस पर दबारा मौता रा राज नी हुणा।¹⁰ क्यूंकि से जो मरी गया से पापा रे कठे एक ई बार मरी गया; पर जो जिन्दगी से जिया करहा, से परमेसरा रे कठे जिया करहा।¹¹ एहडा ही तुस्सा भी आपणे आपा जो पापा रे कठे ता मरिरा, पर परमेसरा रे कठे मसीह यीसू मन्झ जिउंदा समझा।¹² इधी कठे पाप तुस्सा रे मरणहार सरीरा मन्झ राज नी करे, कि तुस्से तेस री इच्छा रे अधीन रहो।¹³ होर ना आपणे सरीरा रे अंगा जो पापा रे हथियार हूणे रे कठे पापा जो सौंपा, पर आपणे आपा जो मरिरे मंझा ले जिउंदा हुई रा जाणी किन्हें परमेसरा जो सौंपा, होर आपणे अंगा जो धर्मा रे हथियारा हूणे रे कठे परमेसरा जो सौंपा।¹⁴ होर तुस्सा पर पापा रा राज नी हुणा, क्यूंकि तुस्से व्यवस्था रे अधीन नी हाए पर अनुग्रहा रे अधीन ऐ।¹⁵ तेबे क्या हुआ? क्या आस्से इधी कठे पाप करे, कि आस्से व्यवस्था रे अधीन नी हाए पर अनुग्रहा रे अधीन ऐ? कधी भी नी।¹⁶ क्या तुस्से नी जाणदे, कि जेस रा हुक्म मनणे रे कठे तुस्से आपणे आपा जो दासा साहीं सौंपी देहां ऐं, तेस रे ई दास ऐ: होर जेस जो मन्हा ऐ, चाहे पापा रे, जेस रा अन्त मौत ई, चाहे हुक्म मनणे रे, जेस रा अन्त धार्मिकता ई? ¹⁷ पर परमेसरा रा धन्यवाद हो, कि तुस्से जो पापा रे दास थे तेबे भी मना ले तेस उपदेसा रे मनणे वाळे हुई गये, जेस रे सांचे मन्झ ढाळे गइरे थे।¹⁸ होर पापा ले छुडाये जाई किन्हें धर्मा रे दास हुई गये।¹⁹ हांऊ तुस्सा री सारिरिक कम्जोरी री वजहा ले माहणु री रीती रे मुताबक बोल्हा, जिहां तुस्से आपणे अंगा जो कुकर्मा रे कठे असुद्धता होर कुकर्मा रे दास करी किन्हें सौंपिरा था, तिहां ई एबे आपणे अंगा जो पवित्रता रे कठे धर्मा रे दास करी किन्हें सौंपी देआ।²⁰ जेबे तुस्से पापा रे दास थे, ता धर्मा री तरफा ले अजाद थे।²¹ जिन्हा गल्ला ले एबे तुस्से सर्मिन्दा हुहां ऐं, तिन्हा ले तेस टैम तुस्से क्या फल पाहें थे? ²² क्यूंकि तिन्हा रा अन्त ता मौत ई पर एबे पापा ले अजाद हुई किन्हें होर परमेसरा रे दास बणी किन्हें तुस्सा जो फल मिल्या जेस ले पवित्रता मिल्हा ई, होर तेसरा अन्त अनन्त जिन्दगी आ।²³ क्यूंकि पापा री मजदूरी ता मौत ई, पर परमेसरा रा बरदान आस्सा रे प्रभु यीसू मसीह मन्झ अनन्त जिन्दगी ई।

7¹ हे भाइयो, क्या तुस्से नी जाणदे (हांऊ व्यवस्था रे जाणने वाळे किन्हें बोल्हा), कि जेबे तक माहणु जिउंदा रैंहयाँ रेह आ, तेब तक तेस पर व्यवस्था रा राज रैंहयाँ? ² क्यूंकि ब्याही री जनानी व्यवस्था रे मुताबक आपणे लाड़े रे जिन्दे जी तेस किन्हें बन्धी री, पर अगर लाड़ा मरी जाए, ता से लाड़े री व्यवस्था ले छुटी गई।³ होर अगर लाड़े रे जिन्दे जी से केसी दूजे माहणु री हुई जाए ता व्यभिचारणी कैहलाई जाणी, पर अगर लाड़ा मरी जाए, ता से व्यवस्था ले छुटी गई, एथी तक कि अगर से केसी दूजे माहणु री हुई भी जाए, तेबे भी तेस्सा व्यभिचारणी

नी बणना।⁴ ता हे मेरे भाइयो, तुस्से भी मसीह रे सरीरा रे ज़ीए व्यवस्था रे कठे मरीरे बणी गए, कि तेस दूजे रे हुई जाओ, जो मरीरे मंझा ले जिउंदा हुई गईरा: ताकि आस्से परमेसरा रे कठे फल जाए।⁵ क्यूंकि जेबे आस्से सारिरिक थे, ता पापा री इच्छा जो व्यवस्था रे ज़ीए थी, मौता रा फल पैदा करणे रे कठे आस्सा रे अंगा मन्झ काम करहा ई थी।⁶ पर जेस रे बन्धना मन्झ आस्से थे तेसरे कठे मरी किन्हें, एबे व्यवस्था ले एहडे छुटी गए, कि आस्से लेखा री पुराणी रीती पर नी पर आत्मा री नौई रीती पर सेऊआ करहा ऐ।⁷ ता आस्से क्या बोलिए? क्या व्यवस्था पाप ई? कधी नी। पर बगैर व्यवस्था रे हांऊ पापा जो नी पछ्याणदा: व्यवस्था अगर ना बोल्दी, कि लालच मत कर ता हांऊ लालचा जो नी जाणदा।⁸ पर पापे मौका पाई किन्हें हुक्मा रे ज़ीए मेरे मन्झ सभ किस्मा रा लालच पैदा कितेया, क्यूंकि बगैर व्यवस्था रे पाप मुर्दा आ।⁹ हांऊ ता व्यवस्था बगैर पैहले जिउंदा था, पर जेबे हुक्म आया, ता पाप जिउंदा हुई गया, होर हांऊ मरी गया।¹⁰ होर से ई हुक्म जो जिन्दगी रे कठे था; मेरे कठे मौत रा वजहा ठैहरी।¹¹ क्यूंकि पापे मौका पाई किन्हें हुक्मा रे ज़ीए हांऊ भडकाया, होर तेता रे ज़ीए हांऊ मारी भी दितेया।¹² इधी कठे व्यवस्था पवित्र ई, होर हुक्म भी ठीक होर खरा आ।¹³ ता क्या से जो खरा था, मेरे कठे मौत ठैहरी? कधी भी नी। पर पाप तेस खरी चीजा रे ज़ीए मेरे कठे मौत जो पैदा करणे वाळा हुआ कि तेसरा पाप हूणा जाहिर हो, होर हुक्मा रे ज़ीए पाप बौहत ज्यादा पापमय ठैहरे।¹⁴ क्यूंकि आस्से जाणहां ऐं कि व्यवस्था ता आत्मिक ई, पर हांऊ सारिरिक होर पापा रे हाथा ले बिकिरा आ।¹⁵ होर जो हांऊ करहा, तेस जो हांऊ नी जाणदा, क्यूंकि जो हांऊ चाहां, से हांऊ नी करदा, पर जेस ले मुंजो नफरत हुहां ई, तेहडा ई करहा।¹⁶ होर यदि, जो हांऊ नी चाहन्दा तेहडा ई करहा, ता हांऊ मनी लैहां, कि व्यवस्था खरी ई।¹⁷ ता एहडी दसा मन्झ तेसरा करणेवाळा हांऊ नी पर पाप आ, जो मेरे मन्झ बस्सिरा।¹⁸ क्यूंकि हांऊ जाणहां, कि मुंजो मन्झ यानि - मेरे सरीरा मन्झ कोई खरी चीज नी रैहन्दी, इच्छा ता मेरे मन्झ हाई, पर खरे काम मेरे ले बणदे।¹⁹ क्यूंकि जेस खरे कामा री इच्छा हांऊ करहा, से ता हांऊ नी करदा, पर जेस बुराई री इच्छा हांऊ नी करदा से ई हांऊ करदा रैंहयाँ।²⁰ पर अगर हांऊ तेहडा ई करहा जेस री इच्छा हांऊ नी करदा, ता तेता रा करणेवाळा हांऊ नी हाया, पर पाप जो मेरे मन्झ बस्सिरा।²¹ होर हांऊ ये व्यवस्था पाहां, कि जेबे हांऊ भलाई करणे री इच्छा करहा, ता बुराई मेरे वाले आहूँआं ई।²² क्यूंकि हांऊ अंदरले माहणुपना ले ता परमेसरा री इच्छा ले बौहत खुस रैंहयाँ।²³ पर मुंजो आपणे अंगा मन्झ दूजे किस्मा री व्यवस्था सुझा ई, जो मेरी बुद्धि री व्यवस्था किन्हें लड़हा ई, होर मुंजो पापा री व्यवस्था रे बन्धना

मन्झ पाई देहां ई जो मेरे अंगा मन्झ ई।²⁴ हांऊ केहड़ा अभागा माहणु आं। हांऊ एस मौता रे सरीरा ले केस बचाणा? ²⁵ हांऊ आपणे प्रभु यीसू मसीह रे ज़ीए परमेसरा रा धन्यवाद करहा: इधी कठे हांऊ आपु ता बुद्धि ले परमेसरा री व्यवस्था रा, पर सरीरा ले पापा री व्यवस्था रा सेवन करहा।

8¹ इधी कठे एबे जो मसीह यीसू मन्झ ऐ, तिन्हा पर सजा रा हुक्म नी आ: क्यूंकि स्यों सरीरा रे मुताबक नी पर आत्मा रे मुताबक चल्हा ऐ।² क्यूंकि जिन्दगी री आत्मा री व्यवस्थे मसीह यीसू मन्झ मुंजो पापा री, होर मौता री व्यवस्था ले अजाद करी दितेया।³ क्यूंकि जो काम व्यवस्था सरीरा री वजहा ले कमजोर हुई किन्हे नी करी सकी, से परमेसरे करी दितेया, यानि - आपणे ही पुत्रा जो पापमय सरीरा री समानता मन्झ, होर पापा रे बलिदान हूणे रे कठे भेजी किन्हे, सरीरा मन्झ पापा पर सजा रा हुक्म दितेया।⁴ इधी कठे कि व्यवस्था रा नियम आस्सा मन्झ जो सरीरा रे मुताबक नी आ पर आत्मा रे मुताबक चल्हा ऐ, पूरा कितेया जाए।⁵ क्यूंकि सारिरिक माहणु सरीरा री गल्ला पर मन लगाहें; पर आत्मिक आत्मा री गल्ला पर मन लगाहें।⁶ सरीरा पर मन लगाणा ता मौत ई, पर आत्मा पर मन लगाणा जीन्दगी होर सान्ति ई।⁷ क्यूंकि सरीरा पर मन लगाणा ता परमेसरा किन्हे बैर रखणा आ, क्यूंकि से (सरीर)ना ता परमेसर री व्यवस्था रे अधीन आ, होर ना हुई सकहा।⁸ होर जो सारिरिक दसा मन्झ ऐ, आ, स्यों परमेसरा जो खुस नी करी सकदे।⁹ पर जेबकी परमेसरा रा आत्मा तुस्सा मन्झ बस्हा, ता तुस्से सारिरिक दसा मन्झ नी ऐ पर आत्मिक दसा मन्झ ऐ। अगर केसी मन्झ मसीहा रा आत्मा नी आ ता से तेसरा बन्दा नी आ।¹⁰ होर अगर मसीह तुस्सा मन्झ आ, ता सरीर पापा री वजहा ले मरिरा; पर आत्मा धर्मा री वजहा ले जिउंदी ई।¹¹ होर अगर तेसरी आत्मा जिने यीसू जो मरीरे मंझा ले जिउन्दा कितेया तुस्सा मन्झ बस्सिरा; ता जिने मसीहा जो मरीरे मन्झा ले जिउन्दा कितेया, तेस तुस्सा रे मरणहार सरीरा जो भी आपणी आत्मा रे ज़ीए जो तुस्सा मन्झ बस्सिरा जिउंदा करणा।¹² इधी कठे हे भाइयो, आस्से सरीरा रे कर्जदान नी ऐ, कि आस्से सरीरा रे मुताबक ध्याड़े काटे।¹³ क्यूंकि अगर तुस्से सरीरा रे मुताबक ध्याड़े काट्घे, ता मरणा, अगर आत्मा ले सरीरा रे कामा जो मारघे, ता जिउंदा रहणा।¹⁴ इधी कठे जितने लोक परमेसरा रे आत्मा रे चलाए चल्हा ऐ, स्यों ई परमेसरा रे पुत्र ऐ।¹⁵ क्यूंकि तुस्सा जो गुलामी री आत्मा नी मिलिरि, कि दबारा डरी जाओ पर लेपालकपना री आत्मा मिलिरी, जेस ले आस्से हे अब्बा, हे पिता पुकारी किन्हे बोल्ला ऐ।¹⁶ आत्मा आपु ई आस्सा री आत्मा साउगी गवाही देहां, कि आस्से परमेसरा री सन्तान ऐं।¹⁷ होर अगर आस्से सन्तान ऐं, ता वारिस भी ऐ, पर परमेसरा रे वारिस होर मसीह रे संगी

वारिस ऐ, अगर आस्से तेस साउगी दुःख उठाहें ता तेस साउगी आस्सा म्हीमा भी पाणी।¹⁸ क्यूंकि हांऊ समझ्हा, कि एस टैमा रे दुःख होर क्लेस तेस महिमा रे साम्हणे, जो आस्सा पर जाहिर हूणे वाळी ई, कुछ भी नी ई।¹⁹ क्यूंकि सृष्टि बडी आस भरी नजरा ले परमेसरा रे पुत्रा रे जाहिर हूणे रा इंतजार करेया करहा ई।²⁰ क्यूंकि ये सृष्टि निसार थी आपणी इच्छा ले नी पर तेस री इच्छा ले जिने जे ये उम्मीदा रे आधीन अधीन किती।²¹ कि सृष्टिया आपु ई विनासा री गुलामी ले छुटकारा पाई किन्हे, परमेसरा री सन्ताना री म्हीमा री अजादी पाई लैणी।²² क्यूंकि आस्से जाणहां ऐं, कि सारी सृष्टि एभे तक किन्हे पीडा मन्झ करलाया होर तड़फया करहा ई।²³ होर सिर्फ से ई नी पर आस्से भी जिन्हा वाले आत्मा रा पैहला फल आ, आपु ई आपणे आपा मन्झ करलाहें; होर लेपालक हूणे री, यानि - आपणे सरीरा रे छुटकारे रा इंतजार करहा ऐ।²⁴ उम्मीदा रे ज़ीए ता आस्सा रा उद्धार हुइरा पर जेस चीजा री आस किती जाहीं जेबे से देखणे मन्झ आए, तेबे फेरी आस केथी रही? क्यूंकि जेस चीजा जो कोई देख्या करहा तेस री आस क्या करणी? ²⁵ पर जेस चीजा जो आस्से नी देख्दे, अगर तेता री आस रख्हा ऐ, ता धीरज धरी किन्हे तेस रा इंतजार भी करहा ऐ।²⁶ होर इहां ई आत्मा भी आस्सा री कम्जोरी मन्झ मदद करहा, क्यूंकि आस्से नी जाणदे, कि प्रार्थना किहां करणी चाहिए; पर आत्मा आपु ई एहड़ी आंहे भरी भरी किन्हे जो बोलणे ले बहार ई, आस्सा रे कठे बिनती करहा।²⁷ होर मना रा जांचणेवाळा जाणहां, कि आत्मा री इच्छा क्या ई? क्यूंकि से पवित्र लोका रे कठे परमेसरा री इच्छा रे मुताबक बिनती करहा।²⁸ होर आस्से जाणहां ऐं, कि जो लोक परमेसरा किन्हे प्यार रख्हा ऐ, तिन्हा रे कठे सब गल्ला मिली किन्हे भलाई ई पैदा करहा ई; यानि - तिन्हा रे कठे जो तेस री इच्छा रे मुताबक सादे गइरे।²⁹ क्यूंकि जिन्हा जो तिने पैहले ले जाणी लईरा स्यों पैहले ले ठैहराईरे भी ऐ कि स्यों तेसरे पुत्रा रे स्वरूपा मन्झ हो ताकि से बौहत भाइया मन्झ पैहलौठा ठैहरे।³⁰ फेरी जिन्हा जो तिने पैहले ले ठैहराया, तिने स्यों सादे भी, होर जो तिने सादे, स्यों तिने धर्मी भी ठैहराए, होर जो तिने धर्मी ठैहराए, तिन्हा जो तिने म्हीमा भी दिती।³¹ ता आस्से इन्हा गाला रे बारे मन्झ क्या बोलिए? अगर परमेसर आस्सा वखा जो आ, ता आस्सा रा विरोधी कुण हुई सकहा? ³² जिने आपणे निज पुत्र भी नी रखी छाडेया, पर तेस जो आस्से सभी रे कठे देई दितेया: ता तेस साउगी तेस आस्सा जो होर सभ कुछ कि नी देणा।³³ परमेसरा रे चुणीरे पर दोष केस लगाणा? परमेसरा से आ जो तिन्हा जो धर्मी ठैहराणे वाळा आ।³⁴ फेरी कुणहां जेस सजा रा हुक्म देणा? मसीहा से आ जो मरी गया बल्कि मुर्दे मन्झा ले भी जिउंदा हुई गया, होर परमेसरा रे दाई तरफ ऐ, होर आस्सा रे कठे प्रार्थना

भी करहा ऐ।³⁵ केस आस्से मसीहा रे प्यारा ले लग करणे? क्या क्लेसा, या संकटा, या उपद्रवा, या अकाला, या नंगाईया, या जोखमा, या तलवारा? ³⁶ जिहां सास्त्रा मन्झ लिख्हीरा, कि तुस्सा रे कठे आस्से सारे ध्याडे भर घात किते जाहें; आस्से काटी जाणी वाळी भेडा साहीं गिणे गइरे। ³⁷ पर इन्हा सभी गल्ला ले आस्से तेसरे ज्रीए जीने जे आस्सा किन्हें प्यार कितेया, जयवन्ता ले भी बढी किन्हें आ। ³⁸ क्यूंकि हांऊ पक्का जाणहां, कि ना मौत, ना जीन्दगी, ना स्वर्गदूत, ना प्रधानतायें, ना वर्तमान, ना भविष्य, ना सामर्थ, ना ऊंचाई, ³⁹ ना गैहराई होर ना कोई होर सृष्टि, आस्सा जो परमेसरा रे प्यारा ले, जो आस्सा रे प्रभु मसीह यीसू मन्झ ऐ, लग करी सकहा ऐ।

9 ¹ हांऊ मसीहा मन्झ सच बोल्हा, हांऊ झूठ नी बोल्दा होर मेरा विवेक भी पवित्र आत्मा मन्झ गवाही देहां। ² कि मुंजो बौहत दुःख आ, होर मेरा मन हमेसा दुखदा रैहयां। ³ क्यूंकि हांऊ एथी तक चाहां था, कि आपणे भाइया, रे कठे जो सरीरा रे मुताबक मेरे रिस्तेदार ऐ, आपु ई मसीहा ले श्रापित हुई जांदा। ⁴ स्यों इस्त्राएली ऐ; होर लेपालकपना रा हक्क होर महिमा होर वायदे होर व्यवस्था होर उपासना होर प्रतिज्ञा तिन्हा री ई। ⁵ पुरखे भी तिन्हा रे ऐ, होर मसीह भी सरीरा रे मुताबक तिन्हा मन्झा ले हुआ, जो सभी ले ऊपर परम परमेसर जुग जुग धन्य आ। आमीन। ⁶ पर ये नी कि परमेसरा रा वचन टळी गया, इधी कठे कि जो इस्त्राएला रे वंस ऐ, स्यों सभ इस्त्राएली नी ऐ। ⁷ होर ना अब्राहमा रे वंस हूणे री वजहा ले सभ तेस री सन्तान ठैहरे, पर (लिखीरा) कि इसहाका ई तेरा वंस कैहलाणा। ⁸ यानि - सरीरा री सन्तान परमेसरा री सन्तान नी ई, पर प्रतिज्ञा रे सन्तान वंस गिणे जाहें। ⁹ क्यूंकि प्रतिज्ञा रा वचन ये आ, कि मां एस टैमा रे मुताबक आऊणा, होर सारा रा म्हठा हुणा। ¹⁰ होर सिर्फ ये ई नी पर जेबे रिबका भी एकी ले यानि - आस्सा रे पिता इसहाका ले गर्भवती थी। ¹¹ होर हल्ली तक ना ता बच्चे जम्मिरे थे, होर ना तिन्हे कुछ भला या बुरा कितिरा था कि तिने बोल्या, कि बडा म्हठा छोटे रा नौकर हुणा। ¹² इधी कठे कि परमेसरा री इच्छा जो तेसरे चुणे जाणे री मुताबक ई, कर्मों रे वजहा ले नी, पर तेसरी वजहा ले ई जो सादहा। ¹³ जिहां सास्त्रा मन्झ लिख्हीरा आ, कि मैं याकुबा किन्हें प्यार कितेया, पर एसावा किन्हें नफरत किती। ¹⁴ ता आस्से क्या बोलिए? क्या परमेसरा वाले अन्याय आ? कधी नी! ¹⁵ क्यूंकि से मुसा किन्हें बोल्हा आ, हांऊ जेस केसी पर दया करणा चाहूँ, मां तेस पर दया करणी, होर जेस केसी पर किरपा करणा चाहूँ तेस पर कृपा करणी। ¹⁶ ये ना ता चाहणेवाळे री, ना दौड़नेवाळे री पर दया करणेवाळे परमेसरा री गल ई। ¹⁷ क्यूंकि पवित्र शास्त्रा मन्झ फिरौना किन्हें बोल्या गईरा था, कि मैं तू इधी कठे खडा कितिरा, कि तेरे मन्झ हांऊ आपणी सामर्थ दसुं, होर मेरे नांऊआं रा प्रचार सारी धरती

पर हो। ¹⁸ होर से जेस पर चाहां, तेस पर दया करहा होर जेस जो चाहां, तेस जो कठोर करहा। ¹⁹ तेबे तुध मेरे किन्हें बोलणा, से फेरी किधियो दोष ल्याहां? केस तेस री इच्छा रा ब्रोध करणा? ²⁰ ओ माहणुआ, भला तू कुणहां, जो परमेसरा रा ब्रोध करहा? क्या घडीरी चीज घड़नेवाळे किन्हें बोली सकहा ई कि तैं हांऊ एहडा किधियो बणाईरा? ²¹ क्या कुम्हारा जो माटे पर हक नी हाया कि एक ई ढेले मंझा ले, एक भांडा आदरा रे कठे, होर दूजा अनादरा रे कठे बणाये? ता एता मन्झ हरानी री केहडी गल ई? ²² कि परमेसरे आपणा गुस्सा दसणे होर आपणी सामर्थ जाहिर करणे री इच्छा ले गुस्से रे भांडे री, जो विनास करणे रे कठे त्यार किते गईरे थे बडे धीरज रखी किन्हें सही। ²³ होर दया रे भांडे पर जिन्हा जो तिने महिमा रे कठे पैहले ले त्यार कितेया, आपणे महिमा री दौलता जाहिर करणे री इच्छा किती? ²⁴ यानि - आस्सा पर जिन्हा जो तिने ना सिर्फ यहूदिया मन्झा ले पर अन्यजातिया मन्झा ले भी सादेया। ²⁵ जिहां से होशे री क्ताबा मन्झ भी बोल्हा, कि जो मेरी प्रजा नी थी, तिन्हा जो मां आपणी प्रजा बोलणा, होर जो प्रजा प्यारी नी थी, तेस्सा जो प्यारी बोलणा। ²⁶ होर एहडा हुणा कि जेस जगहा मन्झ तिन्हा किन्हें ये बोल्या गईरा था, कि तू आस्सा री प्रजा नी हाई, तेस ई जगहा मन्झ तिन्हा जिउंदे परमेसरा री सन्तान कैहलाणा। ²⁷ होर यसायाह इस्त्राएला रे बारे मन्झ हाका पाई किन्हें बोल्हा, कि चाहे इस्त्राएला री सन्ताना री गिणती समुद्रा रे रते रे बराबर हो, तेबे भी तिन्हा मन्झा ले कम ही बचणे। ²⁸ क्यूंकि प्रभुआ आपणा न्याय धरती पर पूरी तरहा ले होर जल्दी ई पूरा करणा। ²⁹ जिहां यसायाहे पैहले भी बोलिरा था, कि अगर सेना रा प्रभु आस्सा रे कठे कुछ वंस ना छाडदा, ता आस्से सदोमा साहीं नास हुई जान्दे, होर अमोरा साहीं बणदे। ³⁰ ता आस्से क्या बोलिए? ये कि आन्यजाति जो धार्मिकता री खोज नी करदे थे, धार्मिकता प्राप्त किती यानि - से धार्मिकता जो विस्वास ले ई। ³¹ पर इस्त्राएली; जो धर्मा री व्यवस्था री खोज करदे हुए तेस्सा व्यवस्था तक नी पूजे। ³² केस कठे? इधी कठे कि स्यों विस्वासा ले नी पर मानों कर्मा ले तेस री खोज करहा ऐ थे: तिन्हें तेस ठोकरा रे पात्थरा पर ठोकर खाधी। ³³ जिहां सास्त्रा मन्झ लिख्हीरा; देखा हांऊ सिय्योना मन्झ एक ठेस लगाणे रा पात्थर, होर ठोकर खाणे री चटान रख्हा; होर जो तेस पर विस्वास करघा, तेस सर्मिन्दा नी हुणा।

10 ¹ हे भाइयो, आस्सा री मना री इच्छा होर तिन्हा रे कठे परमेसरा ले मेरी प्रार्थना ई, कि स्यों उद्धार पाये। ² क्यूंकि हांऊ तिन्हा री गवाही देहां, कि तिन्हा जो परमेसरा रे कठे धुन रैहयां ई, पर बुद्धिमानी साउगी नी। ³ क्यूंकि स्यों परमेसरा री धार्मिकता ले अनजान हुई किन्हें, होर आपणी धार्मिकता री स्थापना करणे रा यत्न करी किन्हें, परमेसरा री

धार्मिकता रे आधीन नी हुए।⁴ क्यूंकि हर एक विस्वास करणे वाळे रे कठे धार्मिकता रे वास्ते मसीह व्यवस्था रा अन्त आ।⁵ क्यूंकि मूसे ये लिखीरा, कि जो माहणु तेस धार्मिकता पर जो व्यवस्था ले ई, चल्हा, तेस एस वजहा ले ई जिउंद रहणा।⁶ पर जो धार्मिकता विस्वासा ले ई, से एहडा बोल्हा ई, कि तू आपणे मना मन्झ ये देख्या बोल्हा कि मसीहा जो हेठ लयाऊणे रे कठे स्वर्गा जो केस जाणा? ⁷ या मसीह जो मरिरे मंझा ले ऊपर लयाऊणे रे कठे केस गैहराई मन्झ उतरणा? ⁸ पर साख्र क्या बोल्हा? ये, कि वचन तेरे नेडे आ, तेरे मुंहा मन्झ होर तेरे मना मन्झ आ; ये से ई विस्वासा रा वचन आ, जो आस्से प्रचार करहा ऐ। ⁹ कि अगर तू आपणे मुंहा ले यीसू जो प्रभु जाणी किन्हें मन्ने होर आपणे मना ले विस्वास करे, कि परमेसरे से मरीरे मन्झा ले जिउन्दा कितेया, ता तुध पक्का उद्धार पाणा। ¹⁰ क्यूंकि धार्मिकता रे कठे मना ले विस्वास कितेया जाहां, होर उद्धार पाणे रे कठे मुंहा ले अंगीकार कितेया जाहां। ¹¹ क्यूंकि पवित्र शाख्र ये बोल्हा आ कि जो कोई तेस पर विस्वास करघा, तेस सर्मिन्दा नी हुणा। ¹² यहूदिया होर युनानिया मन्झ कुछ फर्क नी हाया, इधी कठे कि से सभी रा प्रभु आ; होर आपणे सभ नांऊ लेणे वाळे रे कठे उद्धार आ। ¹³ क्यूंकि जो कोई प्रभु रा नांऊ लैहन्ना, तेस उद्धार पाणा। ¹⁴ फेरी जेस पर तिन्हें विस्वास नी कितेया, तिन्हा तेसरा नांऊ किहां लैणा? होर जेस रे बारे मन्झ नी सुणीरा तेस पर विस्वास किहां करणा? ¹⁵ होर प्रचारका तेबे तक प्रचार किहां करणा? जेबे तक तिन्हा जो नी भेज्या गईरा हो,? जिहां साख्रा मन्झ लिखीरा कि तिन्हा रे पैर कितने सुहावने ऐ, जो खरी गल्ला रा सुसमाचार सुणाहें। ¹⁶ पर सभीए तेस सुसमाचारा पर कान नी ल्याया: यसायाह बोल्हा, कि हे प्रभु जी, कुने आस्सा रे समाचारा रा विस्वास कितेया? ¹⁷ ता विस्वास सुणने ले, होर सुणना मसीहा रे वचना ले हुहां। ¹⁸ पर हांऊ बोल्हा, क्या तिन्हें आस्सा रा उपदेस नी सुणेया? हां, बिल्कुल सुणेया क्यूंकि साख्रा मन्झ लिखीरा कि तिन्हा रे स्वर सारी धरती पर, होर तिन्हा रे वचन संसारा रे एक कोणे ले लई किन्हें दूजे छोरा तक पूजी गए। ¹⁹ फेरी हांऊ बोल्हा; क्या इस्राएली नी जाणदे थे? पैहले ता मुसा बोल्हा, कि मां तिन्हा लोका रे ज्रीए जो हकिकता मन्झ जाति नी ई डाह पैदा करणी, मां विस्वासहीन जाति रे ज्रीए तुस्से उक्साणे। ²⁰ फेरी यसायाह बडी हिम्मता साउगी बोल्हा, कि जो मुंजो टोळदे नी थे, तिन्हें हांऊ तोपी लया: होर जो मुंजो पुछदे भी नी थे, तिन्हा पर हांऊ जाहिर हुई गया। ²¹ पर इस्राएला रे बारे मन्झ से ये बोल्हा कि हांऊ सारा ध्याडा आपणे हाथ एक हुक्म नी मनणे वाळी होर विवाद करणेवाळी प्रजा री तरफ हाथ पसारे रह्या।

11 ¹ इधी कठे हांऊ बोल्हा, क्या परमेसरे आपणी प्रजा जो छाडी दितेया? कधी नी; हांऊ भी ता इस्राएली आ: अब्राहमा रे वंस होर बिन्यामिना रे गोत्रा मन्झा ले आ। ² परमेसरे आपणी से प्रजा नी छाडी, जेस जो तिने पैहले ले ई जाणी लया: क्या तुस्से नी जाणदे, कि पवित्र साख्र एलियाहा री कथा मन्झ क्या बोल्हा; कि से इस्राएला रे ब्रोधा मन्झ परमेसरा ले बिनती करहा। ³ कि हे प्रभु, तिन्हें तेरे नबी घात किते, होर तुस्सा री वेदिया ढाई दिती; होर हांऊ कल्हा ई रही गईरा, होर स्यों मेरे प्राणा रे भी खोजी ऐ। ⁴ पर तेबे परमेसरे तेस जो जबाब दितेया मैं आपणे कठे सात हजार माहणु रखी छाडीरे जिन्हें बाल देऊआ अगे घुटने नी टेकेया आ। ⁵ होर तिहां ई आज कल भी, एहडे लोक बची रे जो तेसरे अनुग्रहा रे वजहा ले चुणे गईरे। ⁶ होर अगर ये अनुग्रहा ले हुईरा, ता फेरी ये कर्मो ले नी हुआ नई ता अनुग्रह फेरी अनुग्रह नी रह्या। ⁷ ता नतीजा क्या हुआ? ये कि इस्राएली जेस री तलासा मन्झ थे, से तिन्हा जो नी मिलेया; पर चूणे गईरे लोका जो मिलेया होर बाकि लोक कठोर बणी किन्हें रही गए। ⁸ जेहडा लिखीरा, कि परमेसरे स्यों आज तक भारी निन्द्रा मन्झ पाई रखी रे होर एहडी हाखिया दिती जो ना देखे होर एहडे कान दिते जो ना सुणें। ⁹ होर दाऊद बोल्हा; तिन्हा रा खाणा तिन्हा रे कठे जाल, होर फन्दा, होर ठोकर, होर सजा री वजहा हुई जाये। ¹⁰ तिन्हा री हाखिया पर न्हारा छाई जाये ताकि स्यों ना देखे, होर तू हमेसा तिन्हा री पीठ झुकाई किन्हें रख्या। ¹¹ हांऊ बोल्हा, क्या तिन्हे इधी कठे ठोकर खाधी, कि स्यों पई जाए? कधी नी: पर तिन्हा रे पौणे री वजहा ले अन्यजातिया जो उद्धार मिल्या, कि तिन्हा जो जलन हो। ¹² तेबे अगर तिन्हा रा पौणा संसारा रे कठे धन होर तिन्हा री कमी अन्यजातिया रे कठे धन दौलता री वजहा हुई, ता तिन्हा री भरपूरी ले कितना ज्यादा नी हुणा। ¹³ हांऊ तुस्सा अन्यजातिया किन्हें ये गल्ला बोल्हा: जेबकी हांऊ अन्यजातिया रे कठे प्रेरित आ, ता हांऊ आपणी सेऊआ री बडाई करहा। ¹⁴ ताकि किहां नी किहां हांऊ आपणे रिस्तेदारा साउगी जलन करवाई किन्हें तिन्हा मन्झा ले कईया रा उद्धार कराऊं। ¹⁵ क्यूंकि अगर तिन्हा जो छाडणे ले संसारा किन्हें मेल मिलाप हुहां, ता क्या तिन्हा रा ग्रहण कितेया जाणा मरीरे मंझा ले जिउंदा हुणे रे बराबर नी हुणा? ¹⁶ होर जेबे भेंटा रा पैहला पेडा पवित्र ठैहरया, ता पूरा गुन्धी रा आटा भी पवित्र आ: होर जेबे जड़ पवित्र ठैहरी, ता पांगे भी एहडे ई हूणें। ¹⁷ होर अगर कई एक पांगे तोडी दिते जाए, होर तू जो एक जंगली जैतुना रा पांगा आ तेता पर कलम करी दिती जाए, होर जैतूना रे जड़ा री चिकनाई रा भागी हुईरा हो। ¹⁸ ता पांगे पर घमण्ड देख्या करदे: होर अगर तू घमण्ड करे, ता याद रख्या, कि तू जड़ा जो नी पर जड़ तुजो सम्भाळहा ई। ¹⁹ फेरी तुध बोलणा पांगे इधी

कठे तोड़ी गई, कि मुंजो कलम करी दिती जाए।²⁰ भला, स्यों ता अविस्वासा री वजहा ले तोड़ी गई, पर तू आपणे विस्वासा री वजहा ले बणी रेंहयां इधी कठे घमंडी मत बण, पर डरा।²¹ क्यूंकि जेबे परमेसरे स्वाभाविक पांगे नी छाडी, तेबे तुस्से भी ना छाडणे।²² इधी कठे परमेसरा री किरपा होर कड़ाई देखा! जो पई गए, तिन्हा पर कड़ाई, पर तुजो पर किरपा, अगर तू तेस री भलाई मन्झ बणी रहे, नी ता, तू भी काटी दितेया जाणा।²³ होर अगर स्यों भी अविस्वासा मन्झ बणी नी रहे, ता तिन्हा जो दबारा डाळा किन्हें जोड़ी दितेया जाणा क्यूंकि परमेसर तिन्हा जो दबारा जोड़ी सकहा।²⁴ क्यूंकि अगर तू तेस जैतूना ले, जो स्वभावा ले जंगली आ काटेया गईरा हो होर स्वभावा रे खिलाफ एक खरे जैतूना रे डाळा किन्हें जोड़ी दितेया गईरा हो, ता ये जो स्वभाविक पांगे ऐ, आपणे ई जैतूना रे डाळा किन्हें दबारा जोड़ी कि नी दिती जाणी।²⁵ हे भाइयो, केते एहड़ा नी हो, कि तुस्से आपणे आपा जो बुद्धि मान समझे; इधी कठे हांऊ नी चाहन्दा कि तुस्से एस भेदा ले अनजाण रहा, कि जेबे तक अन्यजातिया ठीक ढंगा किन्हें प्रवेस नी करी ले, तेबे तक इस्राएला रा एक हिस्सा एहड़ा ई कठोर रैहणा।²⁶ होर इहां करी किन्हें सारे इस्राएला उद्धार पाणा; जिहां सास्त्रा मन्झ लिखीरा कि छुड़ाणेवाळा सिन्योना ले आऊणा, होर याकुबा ले अभक्ति दूर करणी।²⁷ होर तिन्हा साउगी मेरी ये ई वाचा हुणी, जेबे कि मां तिन्हा रे पाप दूर करी देणे।²⁸ स्यों सुसमाचारा रे मुताबक ता तुस्सा रे बैरी ऐ, पर चूणे जाणे रे मुताबक स्यों बापदादे रे प्यारे ऐ।²⁹ क्यूंकि परमेसर आपणे बरदाना ले, होर बुलाहटा ले कधी पीछे नी हटदा।³⁰ क्यूंकि जिहां तुस्से पैहले परमेसरा रा हुक्म नी मन्या पर एभे तिन्हा रे हुक्म नी मनणे ले तुस्सा पर दया हुई।³¹ तिहां ई तिन्हें भी एबे हुक्म नी मन्या कि तुस्सा पर जो दया हुहां ई एता ले तिन्हा पर भी दया हो।³² क्यूंकि परमेसरे सभी जो हुक्म नी मनणे री वजहा ले बन्द करी रखी रा ताकि से सभी पर दया करें।³³ वाह! परमेसरा रा धन होर बुद्धि होर ज्ञान क्या ई अपरम्पार ऐ! तेसरे विचार केहड़े अथाह ऐ, होर तेसरे रस्ते केहड़े अगम ऐ।³⁴ प्रभु री बुद्धि कुण जाणी पाया? या तेसरा मंत्री कुण बणेया?³⁵ या कुने पैहले तेस जो कुछ दितेया जेस रा बदला तेस जो दितेया जाए।³⁶ क्यूंकि तेस री तरफा ले, होर तेसरे ई ज्रीए, होर तेसरे ई कठे सभ कुछ आ: तेस री महिमा जुग जुग हुन्दी रहे: आमीन।

12 इधी कठे हे भाइयो, हांऊ तुस्सा किन्हें परमेसरा री दया याद दिलाई किन्हें बिनती करहा कि आपणे सरीरा जो जिउंदे होर पवित्र, होर परमेसरा जो प्रसन्न करदे हुए बलिदान चढाऊआ: ये ई तुस्सा री आत्मिक सेवा ई।² होर एस संसारा साहीं नी बणा; पर तुस्सा री बुद्धि नौई हुई जाणे ले

तुस्सा रा चाल-चलन भी बधली जाए, जेस ले तुस्से परमेसरा री खरी, होर खुस करणे वाळी, होर सिद्ध इच्छा अनुभव किन्हें पता करदे रहूआ।³ क्यूंकि हांऊ तेस अनुग्रहा री वजहा ले जो मुंजो मिलीरा, तुस्सा मन्झा ले हर एकी किन्हें बोल्हा, कि जेहड़ा समझणा चाहिए, तेस ले बढी किन्हें कोई भी आपणे आपा जो नी समझे पर जिहां परमेसरे हर एकी जो नापी किन्हें बांडी दितिरा, तिहां ई सादगी किन्हें आपणे आपा जो समझा।⁴ क्यूंकि जिहां आस्सा री एक देहा मन्झ बौहत सारे अंग ऐ, होर सभ अंगा रा एकी साहीं काम नी आ।⁵ तिहां ई आस्से जो बौहत ऐ, मसीह मन्झ एक देह हुई किन्हें आपु मन्झ एक दूजे रे अंग ऐ।⁶ होर जेबकी तेस अनुग्रहा रे मुताबक जो आस्सा जो दितरा, आस्सा जो लग लग बरदान मिलिरे, ता जेस जो भविष्यवाणी रा दान मिलिरा, से विस्वासा रे नापा रे मुताबक भविष्यवाणी करे।⁷ अगर सेऊआ करणे रा दान मिलिरा हो, ता सेऊआ मन्झ लगिरे रहो, अगर कोई सिखाणेवाळा हो, ता सिखाणे मन्झ लगिरे रहो।⁸ जो उपदेसक हो, से उपदेस देणे मन्झ लगिरा रहे; दान देणेवाळा उदारता किन्हें दे, जो अगुवाई करे, से उत्साहा किन्हें करें, जो दया करे, से खुशी किन्हें करे।⁹ प्यारा मन्झ कपट नी हो; बुराई ले घृणा करा; भलाई मन्झ लगे रहूआ।¹⁰ भाईचारे रे प्यारा मन्झ एक दूजे रे प्रति प्यार रखा; लगातार आदर करणे मन्झ एक दूजे ले बढी चला।¹¹ कोसिस करणे मन्झ आलसी नी हुआ; आत्मिक जोसा मन्झ भहरी रे रहूआ; प्रभु री सेऊआ करदे रहूआ।¹² उम्मीदा मन्झ खुस रहूआ; दुःखा मन्झ पक्के बणी रहूआ; प्रार्थना मन्झ लगातार लगी रहूआ।¹³ पवित्र लोका जो जो कुछ जरूरी हो, तेता मन्झ तिन्हा री मदद करा; आदर खातर करणे मन्झ लगी रहूआ।¹⁴ आपणे सताणेवाळे जो आशीर्वाद देआ; आशीर्वाद देआ पर श्राप नी देआ।¹⁵ खुसी मनाणेवाळे साउगी खुसी मनाऊआ होर रोणेवाळे साउगी रोआ।¹⁶ आपु मन्झ एक साहीं मन रखा; घमंडी नी बणा; पर नम्र दीन लोका साउगी संगति रखा; आपणी नजरा मन्झ बुद्धिमान मत बणा।¹⁷ बुराई रे बदले केसी किन्हें बुराई नी करा; जो गल्ला सभी लोका रे साम्हणे खरी ई, तिन्हा री फिकर किया करा।¹⁸ जेथी तक हुई सको, सभ माहणु साउगी तुस्से मेल मिलाप रखा।¹⁹ हे प्यारेओ आपणा बदला आपणे आप नी लैणा; पर परमेसरा रे गुस्से जो मौका देआ, क्यूंकि ये लिखीरा, बदला लैणा मेरा काम आ, प्रभु बोल्हा मां बदला चुकाणा।²⁰ पर अगर तेरा बैरी भूखा हो ता तेस जो खाणा खुआऊआ; होर अगर प्यासा हो, ता तेस जो पाणी पियाऊआ; क्यूंकि एहड़ा करणे ले तुध तेसरे मुंडा पर आगा रे अंगारेया रा ढेर लगाणा।²¹ बुराई ले मत हारा पर भलाई किन्हें बुराई जो जीती लऊआ।

13 ¹हर एक माहणु प्रधान अधिकारिया रे अधीन रहे; क्यूंकि कोई अधिकार एहड़ा नी आ, जो परमेसरा री तरफा ले नी हो; होर जो अधिकार ऐ, स्यों परमेसरा रे ज्रीए नियुक्त किते गईरे। ²इधी कठे जो कोई अधिकारा रा विरोध करहा, से परमेसरा रे नियमा रा विरोध करहा, होर विरोध करणेवाळे सजा पाणी। ³क्यूंकि हाकम खरे कामा रे नी, पर बुरे कामा रे कठे डरा री वजहा ई; होर अगर तू हाकमा हाकिमा ले बेखौफ रैहणा चाहां, ता खरा काम कर होर तेस री तरफा ले तेरी बड़ाई हूणी; ⁴क्यूंकि से तेरी भलाई रे कठे परमेसरा रा दास आ। पर अगर तू बुराई करे; ता डर; क्यूंकि तेसरी तलवार बेकार नी ई होर से परमेसरा रा दास आ; जो बुरे काम करणेवाळे पर परमेसरा रा गुस्सा ल्याहूँआं। ⁵इधी कठे अधीन रैहणा जरूरी आ ना सिर्फ डरा री वजहा ले, पर तुस्सा रा आपणा विवेक भी ये ई गवाही देहां। ⁶इधी कठे तुस्से भी कर देऊआ, क्यूंकि स्यों परमेसरा रे दास ऐ, होर हमेसा एस कामा मन्झ लगिरे रैंहें। ⁷इधी कठे हर एकी रा हक्क चुकाया करा जेस जो कर चाहिए, तेस जो कर देआ; जेस जो चुंगी चाहिए तेस जो चुंगी देआ; जेस ले डरणा चाहिए, तेस ले डरा; जेस रा आदर करणा चाहिए तेसरा आदर करा। ⁸आपु मंझा रे प्यारा जो छाडी किन्हें होर केसी गल्ला मन्झ केसी रे कर्जदार नी हुआ, क्यूंकि जो आपणे पड़ोसी किन्हें प्यार रख्हा, तिने ई व्यवस्था पूरी किती। ⁹क्यूंकि ये कि व्यभिचार नी करणा, हत्या नी करणा; चोरी नी करणा; लालच नी करणा; होर इन्हा जो छाडी किन्हें होर कोई भी हुक्म हो ता सभी रा न्वोड एस गल्ला मन्झ पाया जाहां, कि आपणे पड़ोसी साऊगी आपणे साहीं प्यार रखा। ¹⁰प्यार पड़ोसी री कुछ बुराई नी करदा, इधी कठे प्यार रखणा व्यवस्था री पूर्ति करणे वाळा आ। ¹¹ये सभ कुछ तुस्से टैमा री पछ्याण करी किन्हें एहड़ा ही करा, इधी कठे कि एबे तुस्सा रे कठे निंद्रा ले जागणे री घड़ी आई गईरी, क्यूंकि जेस टैम आस्से विस्वास कितेया था, तेस टैमा रे मुताबक एबे आस्सा रा उद्धार नेडे आ। ¹²रात बौहत बीती गई, होर ध्याड़ा निकळणे वाळा आ; इधी कठे आस्से न्ह्यारे रे कामा जो छाडी किन्हें प्रयासे रे हथियार बान्ही लऊआ। ¹³जिहां ध्याड़ी जो खरा लछ्हा, तिहां ई आस्सा जो सीधी चाल चलणी चाहिए; ना कि लीला क्रीडा मन्झ, होर ना पियक्कड़पना मन्झ, ना व्यभिचारा मन्झ, होर ना लुचपना मन्झ, होर ना झगड़े होर हिरखा मन्झ चला। ¹⁴हालांकि प्रभु यीसू मसीह जो पैहनी लऊआ, होर सरीरा री इच्छा जो पूरा करणे रा उपाय ना करा।

14 ¹पर जो विस्वासा मन्झ कमजोर आ, तेस जो आपणी संगति मन्झ लई लऊआ; पर मतभेदा पर बैहस करणे रे कठे नी। ²क्यूंकि एकी जो विस्वास आ, कि सभ कुछ खाणा ठीक आ, पर जो विस्वासा मन्झ कमजोर आ, से साग सब्जी ई

खाहां। ³होर खाणेवाळा ना- खाणेवाळे जो तुच्छ समझ्हा, होर ना- खाणेवाळा खाणेवाळे पर दोष लगाए; क्यूंकि परमेसरे से ग्रैहण करी लईरा। ⁴तू कुणहां जो दूजे रे दासा पर दोष ल्याहां? तेसरा मजबूत रैहणा या पई जाणा तेसरे स्वामी पर निर्भर करहा, हालांकि से सीधा करी दितेया जाणा; क्यूंकि प्रभु तेस जो मजबूत करी सक्हा। ⁵कोई ता एक ध्याड़े जो दूजे ले बड़ी किन्हें जाणहां, होर कोई सभ ध्याड़े जो एकी साहीं जाणहां: हर एक आपणे ई मना मन्झ सोची ले। ⁶जो कोई ध्याड़े जो मन्हा, से प्रभु रे कठे मन्हा: जो खाहां, से प्रभु रे कठे खाहां, क्यूंकि से परमेसरा रा धन्यवाद करहा होर जा नी खांदा, से प्रभु रे कठे नी खांदा होर से भी परमेसरा रा धन्यवाद करहा। ⁷क्यूंकि आस्सा मन्झा ले ना ता कोई आपणे कठे जीहां, होर ना कोई आपणे कठे मरहा। ⁸क्यूंकि अगर आस्से जिन्दा ऐ, ता प्रभु रे कठे जिउंदे; होर अगर मरहा ऐ, ता प्रभु रे कठे मरहा ऐ; चाहे आस्से जिये या मरे, आस्से प्रभु रे ऐ। ⁹क्यूंकि मसीह इधी कठे मरेया होर जिउंदा भी हुई गया कि मरिरे होर जिउंदे, दुहीं रा प्रभु हो। ¹⁰तू आपणे भाई पर किधियो दोष ल्याहां? या तू फेरी किधियो आपणे भाई जो तुच्छ जाणहां? आस्सा सभिया परमेसरा री राजगद्दी रे साम्हणे खड़े हूणा। ¹¹क्यूंकि लिखीरा, कि प्रभु बोल्हा, मेरी जिन्दगी री सौगन्ध कि हर एक घुटना मेरे साम्हणे टिकणा, होर हर एक जीभा परमेसरा रा अंगीकार करणा। ¹²ता आस्सा मन्झा ले हर एकीया परमेसरा जो आपणा आपणा लेखा देणा। ¹³ता अगे जो आस्से एक दूजे पर दोष नी लगाए पर तुस्से ये ई ठानी लऊआ कि कोई आपणे भाई रे साम्हणे ठेस या ठोकर खाणे री वजहा नी रखे। ¹⁴हांऊ जाणहां, होर प्रभु यीसू री तरफा ले मुंजो निश्चय हुईरा, कि कोई चीज आपणे आपा ले असुद्ध नी ई, पर जो केसी चीजा जो असुद्ध समझ्हा, तेसरे कठे से चीज असुद्ध ई। ¹⁵अगर तेरा भाई तुस्सा रे खाणे रे वजहा ले दुःखी हुहां, ता फेरी तू प्यारा रे मुताबक नी चल्दा: जेस रे कठे मसीह मरेया तू आपणे खाणे रे कठे तेसरा नास नी कर। ¹⁶एबे तुस्सा री भलाई री निन्दा नी हूणे पाये। ¹⁷क्यूंकि परमेसरा रा राज खाणा पीणा नी आ; पर धर्म होर मेल मिलाप होर से खुसी ई; ¹⁸जो पवित्र आत्मा ले हुहां ई होर जो कोई इहां मसीह री सेऊआ करहा से परमेसरा जो खरा लछ्हा होर माहणु मन्झ मन्त्रणे लायक बणहां। ¹⁹इधी कठे आस्से तिन्हा गल्ला री कोसिस करे जिन्हा ले मेल मिलाप होर एक दूजे रा सुधार हो। ²⁰खाणे रे कठे परमेसरा रा काम ना बिगाड़: सब कुछ सुद्ध ता हाया, पर तेस माहणु रे कठे बुरा आ, जेस जो तेसरे खाणे ले ठोकर लछ्हा ई। ²¹खरा ता ये आ, कि तू ना मास खाए, होर ना दाख रस पिये, ना होर कुछ एहड़ा करे, जेस ले तेरा भाई ठोकर खाये। ²²तेरा जो विस्वास हो, तेस जो परमेसरा रे साम्हणे आपणे ई मना मन्झ रख: भागा

वाळा आ से, जो तेस गल्ला मन्झ, जेस जो से खरा समझ्हा, आपणे आपा जो दोषी नी ठैहरान्दा।²³ पर जो सक करी किन्हें खाहां, से सजा रे लायक ठैहरी चुकेया, क्यूंकि से पक्का विस्वासरखी किन्हें नी खांदा, होर जो कुछ विस्वासा ले नी आ, से पाप आ।

15 ¹ एबे आस्सा जो, जो मजबूत ऐ आस्सा जो चहिए, कि कम्जोरा री कम्जोरीया सही ले; ना कि आपणे आपा जो खुस करे।² आस्सा मन्झा ले हर एक आपणे पड़ोसी जो तेस री भलाई रे सुधारा रे कठे खुस करे।³ क्यूंकि मसीहे आपणे आपा जो खुस नी कितेया, पर जिहां सास्त्रा मन्झ लिख्हीरा कि तेरे निंदा करणे वाळे री निंदा मेरे ऊपर आई गई।⁴ जितनी गल्ला पैहले ले लिखी गई, स्यों आस्सा री शिक्षा रे कठे ई लिखी गईरी कि आस्से धीरज होर पवित्र शास्त्रा री सान्ति रे ज्रीए आस रखे।⁵ होर धीरज, होर सान्ति रा दाता परमेसर तुस्सा जो ये वरदान दे, कि मसीह यीसू रे मुताबक आपु मन्झ एक मन रहा।⁶ ताकि तुस्से एक मन होर एक मुंह हुई किन्हें आस्सा रे प्रभु यीसू मसीह रे पिता परमेसरा री बड़ाई करा।⁷ इधी कठे, जिहां मसीहे भी परमेसरा री महिमा रे कठे तुस्सा जो ग्रैहण कितेया, तिहां ई तुस्से भी एक दूजे जो ग्रैहण करा।⁸ हांऊ बोल्हा आ, कि जो प्रतिज्ञा बापदादेया जो दितीरी थी, तिन्हा जो पक्का करणे रे कठे मसीह, परमेसरा री सच्चाई रा सबूत देणे रे कठे खतना कितेरे लोका रा दास बणेया।⁹ होर अन्यजाति भी तेसरी दया री वजहा ले परमेसरा री बड़ाई करे, जिहां सास्त्रा मन्झ लिख्हीरा, इधी कठे मां जाति जाति मन्झ तुस्सा रा धन्यवाद करणा, होर तुस्सा रे नांऊआं रा भजन गाणा।¹⁰ फेरी तिने बोल्या, हे जाति जाति रे सब लोको, तेस री प्रजा साउगी खुसी मनाऊआ।¹¹ होर हे जाति जाति रे सब लोको, प्रभु री स्तुति करा, होर हे राज्य राज्य रे सब लोको; तेस रा गुणगान करा।¹² होर फेरी यसायाह बोल्हा, कि यिसै री एक जड़ जाहिर हुणी, होर अन्यजातिया रा हाकम हूणे रे कठे एकिया उठणा, तेस पर अन्यजातिया आस रखणी।¹³ ता परमेसर जो उम्मीदा रा दाता आ तुस्सा जो विस्वास करणे मन्झ सब किस्मा री खुसी होर सांति किन्हें परिपूर्ण करे, कि पवित्र आत्मा री सामर्था ले तुस्सा री आस बढ़दी जाये।¹⁴ हे मेरे भाइयो; हांऊ आपु भी तुस्सा रे बारे मन्झ पक्का जाणहां, कि तुस्से भी आपु ई भलाई किन्हें भहरी रे होर ईश्वरीय ज्ञाना ले भरपूर ऐ होर एक दूजे जो चिताई सकहा ऐ।¹⁵ तेबे भी मैं केते केते याद दिलाणे रे कठे तुस्सा जो बौहत हिम्मत करी किन्हें लिख्या, ये तेस अनुग्रह री वजहा ले हुआ, जो परमेसरे मुंजो दितिरा।¹⁶ कि हांऊ अन्यजातिया रे कठे मसीह यीसू रा दास हुई किन्हें परमेसरा रे सुसामाचरा री सेऊआ याजका साहीं करूं; जेस ले अन्यजाति परमेसरा रे साम्हणे ग्रैहण करणे लायक भेंट बणी

सको, होर पवित्र आत्मा रे ज्रीए परमेसरा रे कठे पूरी तरह ले पवित्र बणी जाए।¹⁷ इधी कठे तिन्हा गल्ला रे बारे मन्झ जो परमेसरा किन्हें जुडीरी, हांऊ मसीह यीसू मन्झ बड़ाई करी सकहा।¹⁸ क्यूंकि हांऊ बस तिन्हा गल्ला जो बोलणे री हिम्मत रख्हा, जिन्हा जो यीसू मसीहे अन्यजातिया जो परमेसरा रा हुक्मा रा रस्ता दसणे रा काम मेरे वचना, होर कर्मा।¹⁹ होर चिन्हा होर आश्चर्य कामा री सक्ति किन्हें, होर पवित्र आत्मा री सक्ति किन्हें मेरे ई ज्रीए किते: एथी तक कि मैं यरुक्षेमा ले लई किन्हें चारो तरफ इल्लुरिकुस तक मसीह रे सुसामाचारा रा पूरा पूरा प्रचार कितेया।²⁰ पर आस्सा रे मना री उमंग ये ई, कि जेथी जेथी मसीहा रा नांऊ नी लया गईरा, तेथी ई सुसामाचारा सुणाऊं; एहडा नी हो, कि हांऊ दूजे री नींऊआं पर घर बणाऊं।²¹ पर जिहां लिख्हीरा, तेहडा ई हो, कि जिन्हा जो तेसरा सुसामाचारा नी पुजेया, तिन्हा ई देखणा होर जिन्हें नी सुणेया तिन्हा ई समझणा।²² इधी कठे हांऊ तुस्सा वाले आऊणे रे कठे बार बार रुक्या।²³ पर एबे मुंजो इन्हा देसा मन्झ होर जगहा नी रही, होर बहुत साला ले मुंजो तुस्सा वाले आऊणे री इच्छा ई।²⁴ इधी कठे जेबे मां इस्पानिया जो जाणा ता मुंजो आस ई कि स्पेन जांदे हुए मेरी मुलाकात तुस्सा किन्हें हुणी, होर तुस्सा री संगति मन्झ कुछ ध्याडे रही किन्हें, तुस्से मुंजो कुछ दूर अगे तक छाडी देआ।²⁵ पर एबे ता हांऊ पवित्र लोका री सेऊआ करणे रे कठे यरुक्षेमा जो जाया करहा।²⁶ क्यूंकि मकिदुनिया होर अखाया रे लोका जो ये खरा लग्या, कि यरुक्षेमा रे पवित्र लोका रे गरीबा रे कठे कुछ चन्दा दान करे।²⁷ खरा ता लग्या, पर स्यों तिन्हा रे कर्जदार भी ऐ, क्यूंकि अगर अन्यजाति तिन्हा री आत्मिक गल्ला मन्झ भागीदार हुए, ता तिन्हा रे कठे ये ठीक आ, कि स्यों सारिरिक गल्ला मन्झ भी तिन्हा री सेऊआ करे।²⁸ ता हांऊ ये काम पूरा करी किन्हें होर तिन्हा जो ये चन्दा सौंपी किन्हें तुस्सा साउगी मुलाकात करी किन्हें मां स्पेना जो चली जाणा।²⁹ होर हांऊ जाणहां, कि जेबे मां तुस्सा वाले आऊणा, ता मसीहा री पूरी आशीषा साउगी आऊणा।³⁰ होर हे भाइयो; हांऊ यीसू मसीह रा जो आस्सा रा प्रभु आ होर पवित्र आत्मा रे प्यारा री याद दिलाई किन्हें, हांऊ तुस्सा ले बिनती करहा कि तुस्से मेरे कठे परमेसरा ले प्रार्थना करणे मन्झ मेरे साउगी मिली किन्हें मेरा साथ देआ।³¹ ताकि हांऊ यहूदिया रे अविश्वासिया ले बची रा रहूं, होर मेरी से सेऊआ जो यरुक्षेमा रे कठे ई, पवित्र लोका जो खरी लगी सके।³² होर हांऊ परमेसरा री इच्छा ले तुस्सा वाले खुसी साउगी आई किन्हें तुस्सा साउगी अराम पांऊं।³³ सांति रा परमेसर तुस्सा सभी साउगी रहे। आमीन।

16 ¹ हांऊ तुस्सा किन्हें फीबे री, जो आस्सा री बैहण होर किखिया री कलीसिया री दासी ई, अर्ज करहा

। 2 कि तुस्से जिहां कि पवित्र लोका जो चाहिए, तेस जो प्रभु मन्झ ग्रैहण करा; होर जेस केसी गल्ला मन्झ तेस जो तुस्सा किन्हें काम हो, तेस री मदद करा; क्यूंकि से मेरे साउगी साउगी कईया री मददगार रही री। 3 प्रसिका होर अक्विला जो भी जो यीसू मन्झ मेरे सहकर्मी ऐ, तिन्हा जो मेरा नमस्कार। 4 तिन्हें मेरे प्राणा रे कठे आपणी जिन्दगी दाऊआ पर लाई रखीरी थी होर सिर्फ हांऊ नी, पर अन्यजातिया री सारी कलीसिया भी तिन्हा रा धन्यवाद करहा ई। 5 होर तेस्सा कलीसिया जो भी नमस्कार जो तिन्हा रे घरा मन्झ ई। प्यारे इपैनिनुस्सा जो जो मसीह रे कठे आसिया रा पैहला फल आ, नमस्कार। 6 मरियमा जो जेस्से जे तुस्सा रे कठे बौहत ज्यादा मैहनत किती, नमस्कार। 7 अन्दुनिकुस होर युनियासा जो मेरे रिस्तेदार ऐ, होर मेरे साउगी कैद हुई रे थे, होर जो प्रेरिता मन्झ नामी प्रचारक ऐ, होर जो मेरे लेर भी पैहले मसीह मन्झ थे, मेरा नमस्कार। 8 अम्पलियातुस्सा जो, जो प्रभु मन्झ मेरा प्यारा आ, नमस्कार। 9 उरवानुसा जो, जो मसीह मन्झ आस्सा रा सहकर्मी आ, होर मेरे प्यारे इस्तखुसा जो नमस्कार। 10 अपिल्लेसा जो, जो मसीह मन्झ खरा निकळया, नमस्कार। अरिस्तुबुलुसा रे घराने जो नमस्कार। 11 मेरी रिस्तेदारन हेरोदियोना जो नमस्कार। नरकियुसा रे घराने रे जो लोक प्रभु मन्झ ऐ, तिन्हा जो नमस्कार। 12 व्रूफैना होर व्रूफोसा जो प्रभु मन्झ मैहनत करहा ऐ, नमस्कार। प्यारा परसिसा जो जिने प्रभु मन्झ बौहत ज्यादा मैहनत किती, नमस्कार। 13 रुफसा जो जेस जो प्रभु मन्झ चुणेया गईरा, होर तेस री माऊआ जो जो मेरी भी माऊ रही री, दुहीं जो नमस्कार। 14 असुंक्रितुस होर फिलगोन होर हिर्मेस होर पत्रुबास होर हिर्मोसा होर तिन्हा साउगी रे भाइया बैहणिया जो नमस्कार। 15 फिलुलुगुस होर युलिया होर नेर्युस होर तेसरी बैहण, होर उलुम्पास होर तिन्हा साउगी रे सभ जण

पवित्र चुम्बना किन्हें नमस्कार करा: तुस्सा जो मसीह री सारी कलीसिया री तरफा ले नमस्कार। 16 आपु मन्झ पवित्र चुम्बन देई किन्हें नमस्कार करा: तुस्सा जो मसीह री सारी कलीसिया री तरफा ले नमस्कार। 17 एबे हे भाइयो, हांऊ तुस्सा किन्हें बिनती करहा कि जो लोक तेस सिक्षा रे उल्टे जो तुस्से पाई री, फूट पाहें, होर ठोकर खाणे री वजहा हुहां ऐं, तिन्हा जो पछ्छाणी लया करा: होर तिन्हा ले दूर रैहया करा। 18 क्यूंकि एहडे लोक आस्सा रे प्रभु मसीह री नी, पर आपणे पेटा री सेऊआ करहा ऐ होर चिकनी चुपड़ी गल्ला किन्हें सीधे सादे लोका रे मना जो भरमाहें। 19 तुस्सा रे हुक्म मनणे री चर्चा सभ लोका मन्झ फैल्ही गई; इधी कठे हांऊ तुस्सा रे बारे मन्झ खुसी झाहां; पर हांऊ ये चाहां, कि तुस्से भलाई रे कठे बुद्धिमान, पर बुराई रे कठे भोळे बणी किन्हें रहो। 20 सांति रे परमेसरा सैतान तुस्सा रे पैरा हेठ कुचलवाई देणा। आस्सा रे प्रभु यीसू मसीह रा अनुग्रह तुस्सा पर हुन्दा रहे। 21 तीमुथियुस मेरे सहकर्मी रा, होर लुकियुसा रा होर यासोना रा होर सोसिपत्रुसा रा मेरे रिस्तेदारा रा, तुस्सा जो नमस्कार। 22 ये पत्री लिखणेवाळे तिरतियुसा रा प्रभु मन्झ तुस्सा जो नमस्कार। 23 गयुस जो मेरा होर कलीसिया रा आदर खातर करणेवाळा आ तेसरा तुस्सा जो नमस्कार: 24 इरास्तुस जो नगरा रा भण्डारी आ, होर भाई क्वारतुसा रा, तुस्सा जो नमस्कार। 25 एबे जो तुस्सा जो मेरे सुसमाचारा रे यानि - यीसू मसीह रे विषया रे प्रचारा रे मुताबक मजबूत खड़ा करी सकहा, तेस भेदा रे प्रयासे रे मुताबक जो सदिया ले लुख्ही रा रैहया। 26 पर एबे जाहिर हुई किन्हें सनातन परमेसरा रे हुक्मा ले नबिया री किताबा रे ज्रीए सभ जातिया जो दस्सी दितिरा, कि स्यों विस्वासा ले हुक्म मनणे वाळे हुई जाए। 27 तेस ई ज्ञानी बुद्धिमान परमेसरा री यीसू मसीह रे ज्रीए जुग जुग हुन्दी रहे।

1 कुरिन्थियों

1 ¹ आस्सा रे भाई सोस्थिनिस होर पौलुसा री तरफा ले जो परमेसरा री इच्छा ले यीसू मसीहा रा प्रेरित हुणे रे कठे सादिरा। ² परमेसरा री तेस्सा कलीसिया रे नांऊ जो कुरिन्थुसा मन्झ ई, यानि तिन्हा रे नांऊ जो यीसू मसीहा मन्झ पवित्र किते गईरे, होर पवित्र हुणे रे वास्ते सादे गई रे; होर तिन्हा सभरी रे नांऊ भी, जो हर जगहा आस्सा रे होर आपणे प्रभु यीसू मसीह रे नांऊआं री प्रार्थना करहा ऐ। ³ आस्सा रे पिता परमेसर होर प्रभु यीसू मसीहा री तरफा ले तुस्सा जो कृपा होर सांति मिल्दी रहे। ⁴ हांऊ तुस्सा रे बारे मन्झ आपणे परमेसरा रा धन्यावाद हमेसा करहा, इधी कठे कि परमेसरा री ये दया तुस्सा पर मसीह यीसू मन्झ हुई। ⁵ ताकि तेस मन्झ हुई किन्हें तुस्से हर गल यानी सारे वचन होर सारे ज्ञाना मन्झ धनी किते जाओ। ⁶ होर एथी तक कि मसीह री गवाही तुस्सा मन्झ पक्की निकळी। ⁷ एथी तक कि केसी बरदाना मन्झ तुस्सा जो कमी नी ई, होर तुस्से आस्सा रे प्रभु यीसू मसीह रे जाहिर हुणे रा इन्तजार करदे रैंहें। ⁸ तेस तुस्से आखरी तक मजबूत भी करणे, ताकि तुस्से आस्सा रे प्रभु यीसू मसीह रे ध्याडे मन्झ निर्दोष ठैहरी सको। ⁹ परमेसर सच्चा आ; जिने तुस्से आपणे पुत्र आस्सा रे प्रभु यीसू मसीह री संगति मन्झ सादिरे। ¹⁰ हे भाईयो, हांऊ तुस्सा ले आस्सा रे प्रभु यीसू मसीह रे नांऊआं ले अरज करहा, कि तुस्से सभ एक ई गल बोला; होर तुस्सा मन्झ झगडा नी हो, पर एक ई मन होर विचारा मन्झ पुरी एकता हो। ¹¹ क्यूंकि हे मेरे भाईयो, खलोए रे घराने रे लोके मुंजो तुस्सा रे बारे मन्झ दस्सेया, कि तुस्सा मन्झ झगडे हुएया करहा ऐ। ¹² मेरा बोलणा ये आ, कि तुस्सा मंझा ले कोई ता आपणे आपा जो पौलुसा रा, ता कोई अपुल्लोसा रा, होर कोई कैफा रा, ता कोई मसीहा रा बोल्हा। ¹³ क्या मसीह बंढही गया? क्या पौलुस तुस्सा रे कठे कूस पर चढेया? या तुस्सा जो पौलुसा रे नांऊआं रा बसिस्मा मिल्या? ¹⁴ हांऊ परमेसरा रा धन्यावाद करहा, कि क्रिस्पुस होर ग्युसा जो छाडी किन्हें, मैं तुस्सा मंझा ले केसी जो भी बसिस्मा नी दितेया। ¹⁵ कैथी एहडा नी हो, कि कोई बोले, कि तुस्सा जो मेरे नांऊआं ले बसिस्मा मिल्या। ¹⁶ होर मैं स्तिफनासा रे घराने जो भी बसिस्मा दितेया; इन्हा जो छाडी किन्हें, हांऊ नी जाणदा कि मैं होर केसी जो बसिस्मा दितेया हो। ¹⁷ क्यूंकि मसीहे हांऊ, बसिस्मा देणे रे कठे नी, पर सुसमाचार सुनाणे रे कठे भेजिरा, होर से भी सब्दा रे ज्ञाना रे मुताबक नी, एहडा नी हो कि मसीहा रा कूस बेकार हुई जाए। ¹⁸ क्यूंकि कूस री कथा नास हुणे वाळे रे कठे मुर्खता ई, पर उद्धार पाणे

वाळे रे कठे परमेसरा री सामर्थ ई। ¹⁹ क्यूंकि लिखीरा, कि मां ज्ञानिया रा ज्ञान नास करणा, होर समझदारा री समझ बेकार करी देणी। ²⁰ कैथी रैहया ज्ञानी? कैथी रैहया साखी? कैथी आ एस संसारा रा विवादी? क्या परमेसरे संसारा रा ज्ञान मुर्खता साबित नी कितेया। ²¹ क्यूंकि जेबे परमेसरा रे ज्ञाना रे मुताबक संसारे ज्ञाना रे ज़ीए परमेसर नी जाणेया ता परमेसरा जो ये ठीक लग्या, कि एस तरह रा मुर्खता रे ज़ीए विस्वास करणे वाळे रा उद्धार हो। ²² यहूदी ता चिन्ह चाहें, होर यूनानी ज्ञाना री टोळा मन्झ रैंहें। ²³ पर आस्से ता तेस कूस पर चढाई रे मसीहा रा प्रचार करहा ऐ जो यहूदिया रे कठे ठोकरा रा कारण आ, होर दूजी जातिया रे कठे मुर्खता ई। ²⁴ पर स्यों जो बुलाए गईरे, क्या यहूदी, क्या यूनानी, तिन्हा रे कठे मसीह परमेसरा री सामर्थ, होर परमेसरा रा ज्ञान आ। ²⁵ क्यूंकि परमेसरा री मुर्खता माहणुंआं रे ज्ञाना ले ज्ञानवान ई; होर परमेसरा री कमजोरी माहणुंआं री ताकता ले बौहत बलवान ई। ²⁶ हे भाईयो, तुस्से आपणी बुलाहटा रे बारे मन्झ ता सोचा, कि तुस्से ना ता सरीरा रे मुताबक बौहत ज्ञानी, होर ना ता बौहत सामर्थी, होर ना ई बौहत इज्जतदार ऐ। ²⁷ पर परमेसरे संसारा रे मूर्ख चुणी लये, ताकि स्यों ज्ञानवाना जो सर्मिन्दा करे; होर परमेसरे संसारा रे कमजोर चुणी लये, ताकि स्यों बलवाना जो सर्मिन्दा करे। ²⁸ होर परमेसरे संसारा रे नीच होर तुच्छ बल्कि जो कुछ है भी नी ऐ स्यों चुणी लये, ताकि स्यों तिन्हा जो, स्यों जे हाए, तिन्हा जो बेकार ठैहराए। ²⁹ ताकि कोई प्राणी परमेसरा रे साम्हणे घमण्ड नी करणे पाए। ³⁰ पर तेसरे ई वजहा ले तुस्से मसीह यीसू मन्झ ऐ, जो परमेसरा री तरफा ले आस्सा रे कठे ज्ञान ठैहरया यानि धर्म, होर पवित्रता होर छुटकारा। ³¹ ताकि जेहडा लिखीरा, तेहडा ई हो, कि जो घमण्ड करे से प्रभु मन्झ घमण्ड करे।

2 ¹ होर हे भाईयो, जेबे हांऊ परमेसरा रा भेद सुणान्दा हुआ तुस्सा वाले आया, ता हांऊ वचन या ज्ञाना री चतुराई साउगी नी आया। ² क्यूंकि मैं ये ठाणी लईरा था, कि तुस्सा रे बीचा मन्झ यीसू मसीह, बल्कि कूस पर चढाए गईरे मसीह जो छाडी किन्हें होर केसी गल्ला जो नी जाणुं। ³ होर हांऊ कमजोरी होर डरा साउगी, होर बौहत काम्दा हुएया तुस्सा साउगी रैहया। ⁴ होर हांऊ कमजोरी होर डरा साउगी, होर बौहत काम्दा हुएया तुस्सा साउगी रैहया। ⁵ ताकि तुस्सा रा विस्वास माहणुंआं रे ज्ञाना पर नी, पर परमेसरा री सामर्थी पर निर्भर हो। ⁶ फेरी भी आस्से समझदारा लोका मन्झ ज्ञाना

री गल्ला सुणाहें; पर ये ज्ञान ना ता संसारा रा होर ना ई एस संसारा रे नास हुणे वाळे हाक्मा रा ज्ञान आ । 7 पर आस्से परमेसरा रा से ज्ञाना रा रहस्य दस्हा ऐ, यानि से गुप्त ज्ञान जो परमेसरे अनादिकाला ले आस्सा री महिमा रे कठे ठैहराया । 8 जेस जो एस संसारा रे हाकमा मंझा ले केसीए नी जाणेया, क्यूंकि अगर स्यों जाणदे, ता स्यों तेस महिमामय प्रभु जो कूसरा पर नी चढान्दे । 9 पर सास्त्रा मन्झ लिखीरा; जिन्हें हाखिये नी देख्या होर काने नी सुणेया, होर जो गल्ला माहणुं रे दिला मन्झ नी स्माई, एहडी गल्ला परमेसरे आपणे प्यार रखणे वाळे रे कठे त्यार कितरी । 10 पर परमेसरे स्यों गल्ला आपणी आत्मा रे ज्रीए आस्सा पर जाहिर कितरी; क्यूंकि आत्मा सभ गल्ला, बल्कि परमेसरा री गुप्त गल्ला जो भी तोप्ला । 11 माहणुंआं मंझा ले कुण केसी माहणुंआं री गल्ला जो जाणहां, माहणुं री गल्ला भी कोई नी जाणदा, सिर्फ परमेसरा री आत्मा । 12 पर आस्से संसारा री आत्मा नी, पर से आत्मा पाईरा, जो परमेसरा री तरफा ले आ, ताकि आस्से तिन्हा गल्ला जो जाणें, जो परमेसरे आस्सा जो मुफ्त दितिरी । 13 तिन्हा गल्ला जो आस्से माहणुंआं रे ज्ञाना री स्वाईरी गल्ला मन्झ नी, पर आत्मा री स्वाई री गल्ला मन्झ आत्मिक गल्ला जो मिली मिली किन्हें सुणाहें । 14 पर सांसारिक माहणुं परमेसरा री आत्मा री गल्ला नी मन्नदा, क्यूंकि स्यों गल्ला तेसरी नजरा मन्झ मुर्खता री गल्ला ई, होर न से तिन्हा जो जाणी सकहा क्यूंकि तिन्हा री परख आत्मिक रूपा ले हुहां ई । 15 आत्मिक आदमी सभ गल्ला री परख करहा, पर आपु तेसरी परख केसी ले नी हुन्दी । 16 क्यूंकि प्रभु रे मना जो कुण जाणी सकहा? ताकि कोई तेस जो स्वाए? पर आस्सा मन्झ मसीहा रा मन आ ।

3 ¹ हे भाईयो, हांऊ तुस्सा साउगी एस तरीके किन्हें गल्ला नी करी सक्या, जिहां आत्मिक लोका किन्हें करहा, पर मुंजो तुस्सा लोका किन्हें तिहां गल्ला करणी पई जिहां सांसारिक लोका किन्हें करणी पहुंआं ई, यानि तिन्हा किन्हें जो हली मसीह मन्झ बच्चे ऐ । ² मैं तुस्सा जो दूध प्याया, नाज नी खुआया; क्यूंकि तुस्से तेता जो नी खाई सकदे थे; बल्कि हली तक नी खाई सकदे । ³ क्यूंकि हली तक तुस्से सांसारिक ऐ, इधी कठे, कि जेबे तुस्सा मन्झ हीर्ख होर झगडा आ, ता क्या तुस्से सांसारिक नी ऐ? होर क्या तुस्से सांसारिक माहणुंआं साहीं व्यवहार नी करदे? ⁴ इधी कठे कि जेबे एक बोल्हा, कि हांऊ पौलुसा रा आ, होर दूजा बोल्हा कि हांऊ अपुल्लोसा रा आ, ता क्या तुस्से सांसारिक माहणुं नी ऐ? ⁵ अपुल्लोस क्या आ? होर पौलुस क्या आ? सिर्फ दास, जिन्हारे ज्रीए तुस्से विस्वास कितेया, जेहडा हर एकी जो प्रभुए दितेया । ⁶ मैं लगाया, अपुल्लोसे सिंचेया, पर परमेसरे बढाया । ⁷ इधी कठे ना ता लगाणे वाळा कुछ हाया, होर ना ता सिंचणे वाळा, पर बडा ता परमेसर आ जिने जे से बढाया

। ⁸ लगाणे वाळा होर संचाई करणे वाळा दुहें एक ई बराबर ऐ, पर हर एक आदमीया आपणे ई मैहनता रे मुताबक मजदूरी पाणी । ⁹ क्यूंकि आस्से परमेसरा रे सैहकर्मि ऐ, तुस्से परमेसरा री खेती होर परमेसरा री रचना ई । ¹⁰ परमेसरा री तेस दया रे मुताबक, जो मुंजो दितिरी, मैं बुद्धि मान राजमिस्त्री साहीं नींव पाई, होर दूजा तेस पर रद्दा रख्हा; पर हर एक माहणुं सावधान रहे कि से तेस पर केहडा रद्दा रख्या करहा । ¹¹ क्यूंकि तेस नींऊआं जो छाडी किन्हें जो पई चुकिरी, होर से नींव यीसू मसीह आ, कोई दूजी नींव नी पाई सकदा । ¹² होर अगर कोई एस नींऊआं पर सोना या चांदी या कीमती पात्थर या लकड़ी या घाहा रा रद्दा रख्हा । ¹³ ता हर एकी रा काम जाहिर हुई जाणा; क्यूंकि तेस ध्याडेया तेस जो जाहिर करणा, इधी कठे कि ये ध्याडा आगी साउगी जाहिर हुणा; होर तेस्सा आगिया हर एकी रे काम परखणे कि स्यों केहडे काम ऐ? ¹⁴ अगर केसी आदमी रा काम जो तिने कितिरा हो बणी रैहन्गा ता तेस जो ईनाम मिलणा । ¹⁵ अगर केसी आदमी रा काम फुछ्ही जान्छ्हा ता तेसरा नुकसान हुणा, पर तेस आपु बची जाणा, पर फुछ्दे फुछ्दे । ¹⁶ क्या तुस्से नी जाणदे, कि तुस्से परमेसरा रे मंदर ऐ, होर परमेसरा रा आत्मा तुस्सा मन्झ रैह्यां । ¹⁷ अगर कोई परमेसरा रे मंदरा जो नास करघा, ता परमेसरा से नास करी देणा; क्यूंकि परमेसरा रा मंदर पवित्र आ, होर से मंदर तुस्से ऐ । ¹⁸ कोई आपणे आपा जो धोखे मन्झ नी रखे; अगर तुस्सा मंझा ले कोई एस संसारा मन्झ आपणे आपा जो ज्ञानी सम्झहा, ता से मुर्ख बणे; ताकि से ज्ञानी हुई जाए । ¹⁹ क्यूंकि एस संसारा रा ज्ञान परमेसरा रे साम्हणे मुर्खता ई, जेहडा लिखीरा; कि से ज्ञानीया जो तिन्हा री चतुराई मन्झ उलझाई देहां । ²⁰ होर फेरी प्रभु ज्ञानीया रे विचारा जो जाणहां कि स्यों सभ बेकार ऐ । ²¹ इधी कठे माहणुं पर कोई घमण्ड नी करे, क्यूंकि सभ कुछ तुस्सा रा आ । ²² क्या पौलुस, क्या अपुल्लोस, क्या कैफा, क्या संसार, क्या जिन्दगी, क्या मरण, क्या वर्तमान, क्या भविष्य, सभ कुछ तुस्सा रा आ । ²³ होर तुस्से मसीहा रे ऐ, होर मसीह परमेसरा रा आ ।

4 ¹ माहणुं आस्सा जो मसीहा रे दास होर परमेसरा रे भेदा रे भण्डारी समझे । ² एता ले बढी किन्हें, एता रे बारे मन्झ भण्डारी रे कठे ये जरूरी आ कि से भरोसे रे लायक निकळे । ³ पर मेरे कठे ये बौहत छोटी गल ई, कि तुस्से लोक या माहणुंआं रा होर कोई न्यायी मेरा फैसला करे, सच ता ऐ आ कि हांऊ आपणे आपा जो नी पख्ददा । ⁴ क्यूंकि मेरा मन मुंजो केसी गल्ला मन्झ दोषी नी बणान्दा, फेरी भी एता ले हांऊ निर्दोष नी बणदा, पर मेरा फैसला करणे वाळा प्रभु आ । ⁵ इधी कठे टैमा ले पैहले केसी गल्ला रा फैसला नी करा; बल्कि जेबी तक प्रभु नी आए तेबे तक रुके रहुआ, क्यूंकि तेस तिन्हा गल्ला जो, जो न्हारे

मन्त्र छुपी री, प्रयासे मन्त्र ल्याऊणी, होर माहणुं आं रे मना री भावना जाहिर करणी, तेबे हर एक माहणुं री बडाई परमेसरा री तरफा ले हुणीं।⁶ हे भाईयो, मैं इन्हा गल्ला जो अपुल्लोसा पर होर आपणे आपा पर तुस्सा लोका रे कठे लागू कितिरी, ताकि तुस्से आस्सा रा उधारण देखी किन्हें ये सीखी लऊआ कि इन्हा लिखिरी गल्ला ले अगे मत बढ़ा, ताकि तुस्सा मंझा ले कोई एकी रा समर्थन होर दूजे रे खलाफ घमण्ड नी करे।⁷ कुण बोल्ला कि तू केसी दूजे ले खरा आ? होर तेरे वाले क्या आ जो तैं दूजे ले नी पाया; होर जेबे तुजो सभ कुछ दूजे ले मिलीरा, ता तू एहड़ा घमण्ड किधियो करहा, कि जिहां जे तुजो कुछ मिल्या ई नी।⁸ तुस्से ता पैहले ई रजी गये; तुस्से पैहले ई अमीर हुई गये, तुस्से आस्सा बगैर राज कितेया, खरा हुंदा कि तुस्से सच्चे राज करदे, ताकि आस्से भी तुस्सा साउगी राज करदे।⁹ क्यूंकि मेरा विचार आ कि परमेसरे आस्सा प्रेरिता जो तिन्हा लोका साहीं सभी ले बादा मन्त्र जगहा दिती जिन्हा जो मौता री सजा हुई चुकिरी; क्यूंकि आस्से संसार होर स्वर्गदूता होर माहणुंआं रे कठे तमासा बणी गये।¹⁰ आस्से मसीहा रे कठे मुख्र ऐ; पर तुस्से मसीह मन्त्र बुद्धिमान ऐ, आस्से कमजोर ऐ पर तुस्से ताकतवर ऐ; तुस्से आदर पाहें, पर आस्से बेज्जत हुहां ऐं।¹¹ आज आस्से भूखे-सोखे होर नांगे ऐ, होर चीथड़े मन्त्र ऐ, आस्सा साउगी बुरा व्यवहार कितेया जाहां, होर आस्से मारे मारे फिरहा ऐ।¹² होर आस्से आपणे हाथा ले काम करी किन्हें मैहनत करहा ऐ। जेबे लोक आस्सा जो बुरा बोल्ला ऐ, ता आस्से आशीर्वाद देहां ऐं; जेबे आस्से सताए जाहें, ता आस्से सैहन करहा ऐ।¹³ स्यों आस्सा जो बदनाम करहा ऐ, आस्से तेबे भी अरज करहा ऐ, आस्से आज तक संसारा रा मैल होर सभ चीजा रा कूड़ा करकट बणी गए।¹⁴ हांऊ तुस्सा जो सर्मिन्दा करणे रे कठे ये गल्ला नी लिखदा, पर आपणे प्यारे बच्चे समझी किन्हें तिन्हा जो सावधान करहा।¹⁵ क्यूंकि अगर मसीहा मन्त्र तुस्सा रे स्वाणे वाळे दस हज़ार भी हुंदे, तेबे बी तुस्सा रे बौहत सारे पिता नी ऐ, इधी कठे कि मसीह यीसू मन्त्र सुसमाचारा रे ज़ीए हांऊ तुस्सा रा पिता हुआ।¹⁶ इधी कठे हांऊ तुस्सा ले अरज करहा, कि तुस्से मेरी साहीं चाल चला।¹⁷ इधी कठे मैं तिमिथिऊसा जो, जो प्रभु मन्त्र मेरा प्यारा होर भरोसे रे लायक पुत्र आ, तुस्सा वाले भेजिरा, होर तेस तुस्सा जो मसीहा मन्त्र मेरे आचरणा री याद दिलाणी, जिन्हारा हांऊ हर जगहा होर हर कलीसिया मन्त्र उपदेस देहां।¹⁸ कुछ लोक ता घमंडा किन्हें एहड़े फूली गईरे, जिहां कि मां एबे तुस्सा वाले आऊणा नी आ।¹⁹ पर प्रभू चाहे ता मां तुस्सा वाले जल्दी जे आई जाणा, होर मां घमण्डिया री गल्ला रा नी पर तिन्हा री सामर्था रा पता ल्वाई लैणा।²⁰ क्यूंकि परमेसरा रा राज गल्ला मन्त्र नी आ, पर सामर्था

मंझा आ।²¹ तुस्से क्या चाहें? क्या हांऊ डंडा लई किन्हें आऊं? या फेरी हांऊ प्यार होर नम्र आत्मा साउगी आऊं?

5¹ एथी तक सुणने मन्त्र आहूँआं, कि तुस्सा मन्त्र व्यभिचार हुहां, बल्कि एहड़ा व्यभिचार जो दूजी जातिया मन्त्र भी नी हुंदा, कि एक माहणुं आपणे बाबा री लाडी जो रख्हा।² होर तुस्से घमंडा किन्हें फूली गईरे, होर तुस्से एता रे बदले दुःखी नी हुंदे, ताकि एहड़ा काम करणे वाळा तुस्सा रे बीचा मन्त्रा ले काढेया जांदा,³ हांऊ अगर सरीरा रे मुताबक तुस्सा रे बीचा मन्त्र नी आ पर आत्मा रे मुताबक हांऊ तुस्सा मन्त्र मौजूद आ, होर हाजर हुई किन्हें हांऊ एहड़े बुरे काम करणे वाळे रे बारे मन्त्र ये हुकम देई चुकिरा।⁴ ताकि जेबे तुस्से मेरे, होर मेरी आत्मा, आस्सा रे प्रभु यीसू री सक्ति साउगी कठे हो।⁵ ता एहड़ा आदमी, आस्सा रे प्रभु यीसू रे नांऊआं ले, सरीरा रा नास करणे रे कठे सैताना जो सौम्पया जाए, ताकि प्रभु रे ध्याड़े तेसरी आत्मा रा उद्धार हुई सके।⁶ तुस्सा रा घमण्ड करणा खरा नी आ; क्या तुस्से नी जाणदे, कि थोहड़ा जे खमीर पुरे आटे जो खमीरा करी देहां।⁷ पुराणा खमीर काढी किन्हें, आपणे आपा जो सुद्ध करा; कि नंऊआं गुन्धही रा आटा बणी सको; जेव्की तुस्से अखमीरी ऐ, क्यूंकि आस्सा रा फसहा रा मेन्ना जो मसीह आ, बलिदान हुई गईरा।⁸ इधी कठे आऊआ आस्से आपणे फसहा रा साजा ना ता पुराणे खमीरा ले, होर ना ता बुराई या दुष्टता रे खमीरा ले, पर सीधाई होर सच्चाई री अखमीरी रोटी साउगी मनाएं।⁹ मैं आपणी चिट्ठी मन्त्र तुस्सा जो लिखीरा, कि व्यभिचारिया री संगत नी करणी।¹⁰ मेरा ये बिल्कुल मतलब नी था कि तुस्से इस दुनिया रे व्यभिचारिया, लोभिया, ठगा या मूर्ति पूजणे वाळे किन्हें कोई रिस्ता नी रखा; तेबे ता तुस्सा जो एस संसारा ले निकळी जाणा पऊणा।¹¹ पर मेरा बोलणा ये आ; कि एहड़े आदमी साउगी कोई नाता नी रखा जो आपणे आपा जो मसीह भाई बन्धु हुई किन्हें भी व्यभिचारी, लोभी, मूर्ति पूजा करणे वाळा, गाळी देणे वाळा, सराबी या ठग हो, एहड़े आदमी साउगी खाणा भी नी खाणा।¹² क्यूंकि बाहरले लोका रा फैसला करणा, ये मेरा काम नी आ? क्या तुस्सा जो तिन्हा रा फैसला नी करणा चाहिए जो कलीसिया मन्त्र ऐ?¹³ कलीसिया रे बाहरले लोका रा फैसला ता परमेसरा करणा, पर तुस्से तेस एहड़े दुष्टा जो आपणे मंझा ले बाहर काढी देआ।

6¹ जेबे तुस्सा मन्त्र झगडा हुहां, ता क्या तुस्सा मंझा ले कोई एहड़ा आ; जो संता वाले जाणे रे बदले अधर्मी लोका री अदालत मन्त्र जाणे री हिम्मत करहा।² क्या तुस्से नी जाणदे, कि पवित्र लोका संसारा रा फैसला करणा? इधी कठे जेबे तुस्सा संसारा रा फैसला करणा, ता क्या तुस्से छोटे ले छोटे झगड़े रा फैसला करणे रे लायक नी ऐ?³ क्या तुस्से नी जाणदे, कि आस्सा स्वर्गदूता रा फैसला करणा? ता क्या आस्से इन्हा

संसारा री गल्ला रा फैसला करणे रे लायक नी हाए? 4 क्या तुस्से नी जाणदे, कि आस्सा स्वर्गदूता रा फैसला करणा? ता क्या आस्से इन्हा संसारा री गल्ला रा फैसला करणे रे लायक नी हाए? 5 हांऊ तुस्सा जो सर्मिन्दा करणे रे कठे ये बोल्हा; क्या सच्चे तुस्सा मंझा ले एक भी समझदार नी आ, जो आपणे भाईया रा फैसला करी सके? 6 बल्कि भाई भाई मन्झ मुकद्दमे चल्हा ऐ, होर से भी अविस्वासिया रे साम्हणे । 7 पर सच गल ता ऐ ई कि तुस्सा री हार ता एता मन्झ ई हुई चुकिरी, कि तुस्सा रे बीचा मन्झ कानूनी मुकद्दमे चली रे, एता रे बदले तुस्से आपु मन्झ अन्याय सैहन कि नी करी लेंदे, आपणा नुक्सान सैहन कि नी करदे? 8 पर तुस्से ता आपु अन्याय होर नुक्सान करहा ऐ, होर आपणे ई मसीह भाईया जो लुट्हा ऐ । 9 क्या तुस्से नी जाणदे, कि अन्याय करणे वाळे लोक परमेसरा रे राजा रे वारस नी हुणे? आपणे आपा जो धोखा मत देआ, ना वेस्यागामी, ना मूर्तिपूजक, ना व्यभिचारी, ना लुच्चे ल्फंगे होर ना पुरुषगामी 10 ना चोर, ना लोभी, ना सराबी, ना गाळी देणे वाळे, ना अंधेर करणे वाळे परमेसरा रे राजा रे वारस हुणे । 11 होर तुस्सा मंझा ले कितने एहडे ई थे, पर तुस्से प्रभु यीसू रे नांऊआं ले होर आस्सा रे परमेसरा री आत्मा ले धोए गइरे, होर पवित्र हुए होर धर्मी बणे । 12 सभ चीजा मेरे कठे ठीक ता हाई, पर सभ चीजा फायदे री नी ई, सभ चीजा मेरे कठे ठीक ता हाई, पर मां केसी भी गल्ला मन्झ केसी जो आपणे ऊपर हावी नी हुणे देणा । 13 खाणा पेटा रे कठे, होर पेट खाणे रे कठे आ, पर परमेसरा यूँ दुहें नास करी देणे; होर आस्सा रे सरीर भी व्यभिचारा रे कठे नी ऐ पर प्रभु री सेउआ रे कठे ऐ, होर प्रभु आस्सा रे सरीरा री भलाई रे कठे आ । 14 होर परमेसरे सिर्फ प्रभु यीसू ई जीउंदा नी कितेया, पर आपणी सक्ति किन्हें तेस आस्से भी मौता ले जीउंदा करी देणे । 15 क्या तुस्से नी जाणदे कि तुस्सा रे सरीर मसीहा रे अंग ऐ? ता क्या हांऊ मसीहा रे अंगा जो वेस्या रे अंग बणाऊं? कधी भी नी । 16 क्या तुस्से नी जाणदे, कि जो कोई वेस्या किन्हें जुडी जाहां, से तेस्सा साउगी एक तन हुई जाहां; क्यूंकि सास्त्रा मन्झ ये बोल्या गईरा, कि तिन्हा एक तन बणी जाणा । 17 होर जो प्रभु री संगता मन्झ रेंहयां, से तेस साउगी एक आत्मा हुई जाहां । 18 व्यभिचारा ले बची किन्हें रहा; जितने होर पाप माहणुं करहा, स्यों सरीरा ले बाहर ऐ, पर व्यभिचार करणे वाळा आपणे ई सरीरा रे खलाफ पाप करहा । 19 क्या तुस्से नी जाणदे, कि तुस्सा रा सरीर पवित्र आत्मा रा मंदर आ; जो तुस्सा मन्झ बस्सी रा होर तुस्सा जो परमेसरा री तरफा ले मिलिरा, होर तुस्से आपु आपणे नी ऐ । 20 क्यूंकि परमेसरे तुस्से कीमत देई किन्हें खरीदी लईरे इधी कठे आपणे सरीरा ले परमेसरा री महिमा करा ।

7 ¹ तिन्हा गल्ला रे बारे मन्झ जो तैं लिखिरी, ये ठीक आ, कि कोई मर्ध जनाने जो ना छुहे । ² पर व्यभिचारा रे कारण हर एक मर्धा री आपणी लाडी हो, होर हर एक जनाने रा आपणा लाडा हो । ³ लाडा आपणी लाडी रा हक पूरा करे; होर तिहां ई लाडी भी आपणे लाडे रा हक पूरा करे । ⁴ लाडी जो आपणे सरीरा पर हक नी आ पर तेस्सा रे लाडे जो आ; तिहां ई लाडे जो भी आपणे सरीरा पर हक नी आ, पर लाडी जो आ । ⁵ तुस्से एक दूजे ले लग नी रहुआ; पर सिर्फ कुछ टैमा तक आपु मन्झ रजामंदी करी किन्हें लग रहुआ ताकि प्रार्थना रे कठे मौका मिले, होर फेरी दबारा एक हुई जाऊआ, एहडा नी हो, कि तुस्सा री बेसबरी री वजहा ले सैतान तुस्सा जो परखे । ⁶ पर हांऊ ये अनुमति रे तौरा पर बोल्हा, ना कि हुकमा रे तौरा पर । ⁷ हांऊ ये चाहां, कि जेहडा हांऊ आं, तेहडे ई सभ माहणुं हो; पर हर एकी जो परमेसरा री तरफा ले खास वरदान मिलिरा, केसी जो केसी किस्मा रा, होर केसी जो केसी होर किस्मा रा । ⁸ पर हांऊ कुआरे होर विधवा रे बारे मन्झ बोल्हा, कि तिन्हा रे कठे एहडा ई रैहणा खरा आ, जेहडा हांऊ आं । ⁹ पर अगर स्यों सबर नी करी सको, ता स्यों ब्याह करे; क्यूंकि कामुक हुणे ले ता ब्याह करणा खरा आ । ¹⁰ जिन्हा रा जे ब्याह हुई गईरा, तिन्हा जो हांऊ नी, पर प्रभु हुकम देहां, कि लाडी आपणे लाडे ले लग नी हो । ¹¹ होर अगर लग भी हुई जाए, ता से दूजा ब्याह ना करे; या आपणे लाडे किन्हें दबारा मेल करी ले, होर ना लाडा आपणी लाडी जो छाडे । ¹² एबे बाकी लोका किन्हें मेरा बोलणा आ; ये हांऊ बोल्या करहा, ना कि प्रभु, अगर केसी मसीह भाई री लाडी विस्वास नी करदी हो होर अगर से तेस साउगी रैहणा चाहीं, ता से आपणी लाडी जो नी छाडे । ¹³ होर जेस्सा जनाने रा लाडा विस्वास नी रखदा हो, होर से तेस्सा साउगी रैहणे ले खुस हो; ता से आपणे लाडेजो नी छाडे । ¹⁴ क्यूंकि अविस्वासी लाडा आपणी विश्वासी लाडी री वजहा ले पवित्र बणहां, होर अविस्वासी लाडी आपणे विश्वासी लाडे री वजहा ले पवित्र बणहां ई; नई ता तुस्सा रे बाल बच्चे असुद्ध हुणे थे, पर एबे ता स्यों पवित्र ऐ । ¹⁵ अगर कोई अविस्वासी आदमी लग हुणा चाहे ता से लग हुई सकहा, एहडी हालता मन्झ भाई या बैहण बंधना मन्झ नी ऐ; पर परमेसरे आस्सा जो मेल मिलापा रे कठे सादिरा । ¹⁶ हे लाडियो क्या तूस्से जाणहां ई कि तूस्से आपणे लाडे रा उद्धार करी सकहा ई? या हे लाडेयो क्या तूस्से आपणी लाडीया रा उद्धार करी सकहा ऐ? ¹⁷ पर जेहडा प्रभुए हर एकी जो बांडीरा, होर परमेसरे हर एकी जो सादिरा; से तेहडा ई चले, होर हांऊ सभ कलीसिया मन्झ ऐहडा ई हुकम देहां । ¹⁸ जेस केसी आदमी जो परमेसरे खतना हुई चुकिरी दसा मन्झ सदिरा हो, ता से बगैर खतना वाळा ना बणे; होर जेस जो बगैर खतना कितिरी दसा मन्झ सादिरा हो, ता से खतना ना कराए । ¹⁹ ना

खतना कुछ हाया, होर ना बगैर खतना, पर परमेसरा रा हुक्म मनणा ई सभ कुछ आ।²⁰ हर एक माहणुं जेस दसा मन्झ सदिरा हो, से तेस दसा मन्झ ई रहे।²¹ अगर तू दासा री दसा मन्झ सदिरा हो, ता तू एता रे बारे मन्झ फिकर नी कर; पर अगर तू अजाद हुई सके, ता एहड़ा ई कर।²² क्यूंकि जो दासा री दसा मन्झ प्रभु मन्झ सादेया गईरा हो, तेस जो प्रभुए अजादी देई दिती, होर तिहां ई, जेस जो अजादी री दसा मन्झ सादिरा, से मसीहा रा दास आ।²³ परमेसरे कीमत चुकाई किन्हें तुस्से मुले लईरे; इधी कठे माहणुं रे दास नी बणा।²⁴ हे भाईयो, जो कोई जेस दसा मन्झ सादिरा हो, परमेसरा रे साम्हणे से तेस ई दसा मन्झ बणा रहे।²⁵ कुआरिया रे बारे मन्झ प्रभु रा कोई हुक्म मुंजो नी मिलिरा, पर प्रभु री दया ले भरोसे रे लायक हुणे री वजहा ले हांऊ आपणी राय देहां।²⁶ वर्तमान स्थिति देखी किन्हें ता हांऊ सोच्छा कि तुस्से मेरे साहीं कल्हा रहूआ।²⁷ अगर तेरे वाले लाडी ई, ता तेस्सा ले लग हुणे री कोसिस नी कर; होर अगर तेरे वाले लाडी नी ई, ता तू लाडी री तलास नी कर।²⁸ पर अगर तू ब्याह भी करे, ता पाप नी आ; होर अगर कुआरी रा ब्याह हुई जाए ता कोई पाप नी आ; पर एहडे लोका जो सारीरिक कष्ट हुणां, जिन्हा ले हांऊ तुस्सा जो बचाणा चाहं।²⁹ हे भाईयो, हांऊ ये बोल्हा, कि टैम बौहत थोहड़ा आ, इधी कठे एभे ले, जिन्हा वाले लाडीया ई, स्यों एहडे रहो, जिहां जे, तिन्हा वाले लाडीया नी हाई।³⁰ होर रोणे वाळे एहडे हो, जिहां जे, स्यों कधी नी रोए; खुसी मनाणे वाळे एहडे रहे, जिहां जे स्यों कधी खुस नी हुईरे हो; होर खरीदारी करणे वाळे एहडे हो, जिहां जे, तिन्हा वाले कुछ नी आ।³¹ होर जो एस संसारा रे सुख-विलासा जो भोग्या करहा ऐ, स्यों एहडे रहो, जिहां जे, तिन्हा रे कठे इन्हा चीजा री कोई कीमत नी ई, क्यूंकि एस संसारा री रीति होर व्यवहार बदल्दे जाहें।³² पर हांऊ ये चाहं कि तुस्से चिंता मुक्त रहो, कुआरा आदमी प्रभु री गल्ला रे बारे मन्झ सोच्छा रेंहयां कि से प्रभु जो किहां खुस करे।³³ पर सादीसुदा आदमी संसारा री गल्ला रे बारे मन्झ सोच्छा रेंहयां, कि से आपणी लाडी जो किहां खुस करे।³⁴ ब्याही री होर कुआरी मन्झ भी फर्क आ: कुआरी प्रभु रे बारे मन्झ सोच्छी रेंहयां ई, ताकि से सरीरा होर आत्मा दुहीं मन्झ पवित्र बणें; पर सादी सुदा जनाने, संसारा री गल्ला सोच्छी रेंहयां ई, कि से आपणे लाड़े जो किहां खुस रखे।³⁵ हांऊ ऐ गल्ला तुस्सा रे फायदे रे कठे बोल्हा, तुस्सा जो रोकणे रे कठे नी, पर इधी कठे कि जेहड़ा खरा लगहा, तेहड़ा ई कितेया जाए; ताकि तुस्से एक मन हुई किन्हें प्रभु री सेउआ मन्झ लगी रहो।³⁶ होर अगर कोई ये समझे, कि से तेस्सा कुआरी रा हक मारेया करहा, होर तेस्सा कुआरिया री जुआनी ढळी चलिरी हो, होर एहड़ा मैहसूस हो कि तिन्हारा ब्याह हुणा चाहिए, ता जेहड़ा से चाहं, तेहड़ा ई

करे, तिन्हा रा ब्याह करी दितेया जाए, एता मन्झ कोई पाप नी आ।³⁷ पर जो आपणे मना रा पक्का आ होर जेस जो केसी रा दबाब नी हो, होर जेसरा आपणी इच्छा पर पूरा बस हो, होर जिने आपणे मना मन्झ पक्का फैसला करी लईरा हो, कि मां आपणी कुआरी म्ठी बिन ब्याही रखणी, से खरा करहा।³⁸ इधी कठे जो आपणी कुआरी म्ठी रा ब्याह करहा, से खरा करहा, पर जो ब्याह नी करदा से होर भी खरा करहा।³⁹ जेबे तक केसी जनाने रा लाड़ा जीउंदा आ तेबे तक से तेस साउगी ब्याहा रे बंधना मन्झ ई, पर अगर तेस्सा रा लाड़ा मरी जाए ता से अजाद ई, होर जेस साउगी से चाहे ब्याह करी सकहा ई, पर सिर्फ प्रभु मन्झ।⁴⁰ पर मेरे विचारा ले, जेहड़ी दसा मन्झ से ई, से तेस ई दसा मन्झ रहे; क्यूंकि मेरे विचारा मन्झ से होर भी ज्यादा भागा वाळी ई, होर हांऊ समझहा, कि परमेसरा री आत्मा मेरे मन्झ भी हाई।

8 ¹ मूर्ति रे साम्हणे बलि कीतिरी चीजा रे बारे मन्झ आस्से जाणहां ऐं, कि आस्से सभ ज्ञानी ऐ; ज्ञान लोका जो घमंडी बणाई देहां, पर प्यार बढौतरी करहा।² अगर कोई आदमी समझहा, कि हांऊ कुछ जाणहां, ता जेहड़ा तेस जो जाणना चाहिए तेहड़ा हली तक से नी जाणी पाया।³ पर अगर कोई परमेसरा किन्हें प्यार रखहा, ता तेस जो परमेसर पछ्याणहां।⁴ इधी कठे मूर्ति रे साम्हणे बलि कीतिरी चीजा जो खाणे रे बारे मन्झ आस्से जाणहां ऐं, कि संसारा मन्झ मूर्ति रा कोई वजूद नी आ, होर एकी जो छाडी किन्हें कोई परमेसरा नी आ।⁵ क्यूंकि सर्गा होर धरती मन्झ बौहत सारे ऐ, जिन्हा जो ईश्वर बोल्या जाहां, जिहां जे बौहत सारे ईश्वर होर बौहत सारे प्रभु ऐ।⁶ तेबे बी आस्सा रे कठे ता एक ई परमेसर आ; यानी पिता जेसरी तरफा ले सभ चीजा ई, होर आस्से तेसरे ई कठे ऐ, होर एक ई प्रभु आ, यानि यीसू मसीह जेसरे ज़ीए सभ चीजा हुई, होर तेसरे ज़ीए ई आस्सा री जिन्दगी ई।⁷ पर ये ज्ञान सभी वाले नी आ; कुछ लोक जो हली तक बलि कितिरी चीजा जो एहडे खाहें, जिहां जे सच्चे मूर्ति रे साम्हणे बलि कितिरी हो, होर तिन्हारा विवेक कमजोर हुई किन्हें असुद्ध हुई जाहां।⁸ पर खाणा आस्सा जो परमेसरा रे नेडे नी पुजान्दा, अगर आस्से नी खाए, ता आस्सा रा कुछ नुकसान नी आ, होर अगर खाए, तेबे बी कुछ फायदा नी आ।⁹ पर सावधान रहूआ, एहड़ा नी हो, कि तुस्सा री ये अजादी कमजोरा रे कठे केते ठोकरा री वजहा नी हुई जाए।¹⁰ क्यूंकि कमजोर मना वाळा कोई आदमी अगर कोई तुध साहीं ज्ञानी जो मंदरा मन्झ खाणा खांदे देखी ले, ता तेसरा कमजोर मन केस हदा तक भटकी जाणा, ता क्या तेस जो मूर्ति रे साम्हणे बलि कितिरी चीजा जो खाणे री हिम्मत नी हुई जाणी? ¹¹ तेरे ज्ञाना री वजहा ले तेस कमजोर मना रे आदमीया नास हुई जाणा, यानि जेस रे कठे जे मसीहे आपणी

जान दिती।¹² इस तरह भाईया रे खलाफ पाप करदे हुए होर तिन्हारे कमजोर मना जो ठेस पुजांदे हुए तुस्से लोक मसीहा रे खलाफ पाप करेया करहा ऐ।¹³ इधी कठे अगर खाणा, मेरे भाई रे कठे ठोकरा री वजहा बणहां, ता मां कधी मास नी खाणा चाहे कुछ भी हो, एहड़ा नी हो कि हांऊ आपणे भाई रे कठे ठोकरा री वजहा बणुं।

9 ¹क्या हांऊ अजाद नी आ? क्या हांऊ प्रेरित नी आ? क्या मैं यीसू जो, जो आस्सा रा प्रभु आ, नी देख्या, क्या तुस्से प्रभु मन्झ मेरे बणाईरे नी ऐ? ²अगर हांऊ होरी रे कठे प्रेरित नी आ, तेबे बी तुस्सा रे कठे ता हांऊ प्रेरित आ, क्यूंकि तुस्से एक एहड़ी मोहरा साहीं ऐं, जो प्रभु मन्झ मेरे प्रेरित हुणे रे सबूत ऐ। ³मेरे परखणे वाळे रे कठे मेरा ये ई जबाब आ। ⁴क्या आस्सा जो खाने पीणे रा हक नी आ? ⁵क्या आस्सा जो ये हक नी आ, कि हांऊ आपणी विस्वासी लाडी जो आपणे साउगी लई किन्हें फिरे, जेहड़े कि दूजे प्रेरित, प्रभु रे भाई होर कैफा करहा ऐ। ⁶या सिर्फ मुंजो होर बरनबासा जो हक नी आ कि कमाई करणा छाडी दे। ⁷एहड़ा कुणहां जो आपणे खर्चे पर स्पाही रे रूपा मन्झ काम करहा; कुण दाखा रा बगीचा लगाई किन्हें तेसरा फल नी खांदा? या एहड़ा कुणहां जो भेडा री रखवाळी करी किन्हें तिन्हा रा दूध नी पींदा? ⁸क्या हांऊ ये गल्ला माहणुं री सोचा रे मुताबक नी बोल्दा? ⁹क्या व्यवस्था भी ये नी बोल्दी? क्यूंकि मुसा री व्यवस्था मन्झ लिखीरा, दांवनी करणे रे टैमा बोल्हदा रा मुंह नी बान्हणा; क्या परमेसरा जो सिर्फ बोल्हदा री फिकर ई? ¹⁰या से सभ कुछ आस्सा रे कठे बोल्हा? हां, आस्सा रे कठे ई ये लिखीरा, क्यूंकि ये ठीक आ, कि हळ चलाणे वाळा आस रखी किन्हें डोहरिया हळे, होर गाहणे वाळा फसल पाणे री आस रखी किन्हें फसला जो गाहे। ¹¹जेबकी आस्से तुस्सा मन्झ आत्मिक फसल बीजी, होर अगर आस्से तुस्सा ले सारीरिक चीजा री फसल तुस्सा ले काटणा चाहे, ता क्या ये कोई बडी गल ई? ¹²अगर दूजे लोक तुस्सा पर हक ज्ताहें, ता क्या आस्सा रा तुस्सा पर होर भी ज्यादा हक नी आ? फेरी भी आस्से एस हका रा इस्तेमाल नी कितेया, पर आस्से सभ कुछ सैहन करहा ऐ, ताकि आस्से मसीह रे सुसमाचारा रे रस्ते मन्झ कोई रुकावट नी खडी करे। ¹³क्या तुस्से नी जाणदे कि जो लोक मंदरा मन्झ सेउआ करहा ऐ, तिन्हा जो खाणा मंदरा ले ई मिल्ला, होर जो हमेसा वेदी री सेउआ मन्झ लगी रैहें, वेदी रे चढावे मन्झ तिन्हा रा हिस्सा हुहां? ¹⁴इस तरह प्रभुए नियम बणाया कि सुसमाचार करणे वाळे प्रचारका रा जीण गुजारा सुसमाचारा ले ई हो। ¹⁵पर इन्हा हका मंझा ले मैं एकी रा भी कधी इस्तेमाल नी कितेया, होर ये गल्ला मैं इधी कठे नी लिखी, कि मेरे कठे एहड़ा कितेया जाए, क्यूंकि एता ले ता मेरा मरणा ई ठीक आ; कि कोई मेरा घमण्ड या महिमा बेकार करी

दे। ¹⁶इधी कठे अगर हांऊ सुसमाचारा रा प्रचार करहा ता मेरा कुछ घमण्ड नी आ; क्यूंकि ये ता मेरे कठे जरूरी आ, होर अगर हांऊ सुसमाचार नी सुणाऊं ता मुंजो पर हाय। ¹⁷क्यूंकि अगर हांऊ आपणी इच्छा ले ये करहा, ता मुंजो मजदूरी मिल्ला ई, होर अगर आपणी इच्छा ले नी करूं, तेबे भी भंडारीपन मुंजो सौम्पेया गईरा। ¹⁸ता मेरी मजदूरी क्या ई? कि जेबे हांऊ सुसमाचार प्रचार करूं, ता तेस जो मुफ्त करूं, होर सुसमाचारा मन्झ जो मेरा हक आ, तेता रा पूरी तरह ले उपयोग नी करूं। ¹⁹क्यूंकि हांऊ केसी भी आदमी रे बंधना मन्झ नी आ बल्कि अजाद आ, फेरी भी मैं आपणे आपा जो सभी रा दास बणाई लईरा, ताकि होर भी ज्यादा लोका जो जीती सकूं। ²⁰यहूदिया रे कठे हांऊ यहूदी साहीं बणेयां ताकि हांऊ यहूदिया जो जीती सकूं; जो व्यवस्था रे अधीन ऐ, तिन्हा रे कठे हांऊ आपु व्यवस्था रे अधीन नी हुणे पर भी व्यवस्था रे अधीन बणेयां, ताकि जो व्यवस्था रे अधीन ऐ तिन्हा जो हांऊ जीती सकूं। ²¹हांऊ एक एहड़ा आदमी भी बणेयां जो व्यवस्था रे विधाना जो नी मन्झदा, जेबकी हांऊ परमेसरा री व्यवस्था रे बगैर नी आ, पर मसीह री व्यवस्था रे अधीन आ, हांऊ व्यवस्था हिना साहीं बणी गया; ताकि जो व्यवस्था हीन ऐ, तिन्हा जो हांऊ जीती सकूं। ²²हांऊ कमजोरा रे कठे कमजोर बणेया; ताकि हांऊ कमजोरा जो जीती सकूं, हांऊ सभ माहणुंआं रे कठे सभ कुछ बणेया, ताकि किहां नी किहां हांऊ तिन्हा रा उद्धार कराई सकूं। ²³होर हांऊ सभ कुछ सुसमाचारा रे कठे करहा ताकि हांऊ भी होरी साउगी तेसरा भागिदार बणी जाऊं। ²⁴क्या तुस्से नी जाणदे, कि दौड़ा मन्झ ता सभ दौड़हा ऐ, पर ईनाम एक ई लई जाहां? तुस्से एहड़े ई दौड़ा, कि जीती सको। ²⁵होर हर एक पैहलवान हर तरह रा सबर करहा, स्यों ता मुरझाणे वाळे मुक्टा रे कठे ये सभ करहा ऐ, पर आस्से ता तेस मुक्टा रे कठे करहा ऐ; जो कधी मुरझाणे वाळा नी आ। ²⁶इधी कठे हांऊ बेठिकाने नी दौड़दा, होर ना हांऊ हवा मन्झ मुक्के मारहा। ²⁷पर हांऊ आपणे सरीरा जो मारहा कूटहा, होर काबू करी किन्हें रख्हा, केते एहड़ा नी हो कि हांऊ होरी जो प्रचार करी किन्हें, आपु ई निकम्मा बणुं।

10 ¹हे भाईयो, हांऊ नी चाहन्दा कि तुस्से एस गल्ला ले अनजान रहो कि आस्सा रे बाबदादे बादला री अगुवाई मन्झ चले होर सब के सब लाल सागरा ले पार हुई गये। ²होर सभीए बादला मन्झ, होर समुद्रा मन्झ, मूसा रा बप्तिस्मा लया। ³होर सभीए एक ई आत्मिक खाणा खाधेया। ⁴होर सभीए एक ई आत्मिक पाणी पितेया, क्यूंकि स्यों तेस आत्मिक चट्टाना ले पिहां थे जो तिन्हा साउगी साउगी चल्हा ई थी; होर से चट्टान मसीह था। ⁵पर फेरी भी तिन्हा मन्झा ले ज्यादातर लोका ले परमेसर खुस नी था, इधी कठे स्यों जंगला मन्झ मरी किन्हें ढेर हुई गये। ⁶ये गल्ला आस्सा रे कठे उधारण

बणी गई, ताकि आस्से भी बुरी गल्ला रा लाहल्व नी करे, जेहड़ा तिन्हे लाहल्व कितेया था।⁷ होर ना ता तुस्से मूर्तिपूजा करणे वाळे बणा, जेहड़े कि तिन्हा मंझा ले कितने बणी गईरे थे, जेहड़ा लिखीरा, कि लोक खांदे पींदे बैठे, होर खेह्लणे कूदणे लगे।⁸ होर ना आस्से व्यभिचार करे; जेहड़ा कि तिन्हा मंझा ले कई जणे कितेया; होर एक ई ध्याड़े त्रेई हजार लोक मरी गये।⁹ होर ना आस्से प्रभु री परखणी करे; जेहड़ा तिन्हा मंझा ले कईए कितेया, होर कीडे स्यों डसी किन्हें मुकाई दिते।¹⁰ होर ना तुस्सा जो कूडकूडाणा चाहिए, जेहड़ा कि तिन्हा मंझा ले कईए कितेया, होर नास करणे वाळे स्यों मुकाई दिते।¹¹ पर ये सभ गल्ला, तिन्हा साउगी एहड़ी घटी कि सभी रे कठे उधारण बणी गई, होर ये गल्ला आस्सा री सावधानी रे कठे लिखी गईरी, जो संसारा रे आखरी टैमा मन्झ रैहया करहा ऐ।¹² इधी कठे जो ये सोच्हा कि से मजबूत खडीरा, से सावधान रहे केते पई नी जाए।¹³ तुस्से केसी एहड़ी परीक्षा मन्झ नी पये, जो माहणुं रे सैहणे ले बाहर हो, परमेसर सच्चा आ; तेस तुस्सा जो सामर्था ले बाहर परीक्षा मन्झ नी पऊणे देणा, बल्कि परीक्षा रे साउगी साउगी न्वाऊ भी करणा, ताकि तुस्से एता जो सैहन करी सको।¹⁴ इधी कठे, हे मेरे प्यारेओ, मूर्तिपूजा ले आपणे आपा जो बचाई किन्हें रखा।¹⁵ हांऊ तुस्सा जो बुद्धिमान समझी किन्हें बोल्ला, जो कुछ हांऊ तुस्सा किन्हें बोल्ला, तेता जो परखा।¹⁶ धन्याबादा रा से कटोरा, जेसरे कठे आस्से धन्यावाद देहां ऐं, क्या ये मसीह रे खुना साउगी भागीदारी नी ई? से रोटी जेस जो आस्से तोड़हा ऐ, क्या ये मसीह रे सरीरा साउगी भागीदारी नी ई? ¹⁷ इधी कठे, कि एक ई रोटी ई, होर आस्से जो बौहत सारे ऐ, एक सरीर ऐ; क्यूंकि आस्से सभ तेस्सा एक रोटी मन्झ साझीदार ऐ।¹⁸ तिन्हा इस्त्राएलिया रे बारे मन्झ सोचा, जो बलि कितिरी चीजा खाहें, क्या स्यों तेस्सा वेदी रे साझीदार नी ऐ? ¹⁹ मेरे बोलणे रा मतलब क्या आ? क्या मूर्ति रे अगे बलि कितिरी चीजा रा कुछ वजूद आ, या मूर्ति कुछ हाई? ²⁰ बिल्कुल नी, पर हांऊ ये बोल्ला कि गैर यहूदी जिन्हा चीजा री बलि चढाहें, तिन्हा जो परमेसरा रे कठे नी पर दुष्टात्मा रे कठे चढाहें, हांऊ ये नी चाहन्दा कि तुस्से दुष्टात्मा रे भागीदार बणा।²¹ तुस्से प्रभु रे कटोरे होर दुष्टात्मा रे कटोरे दुहीं मन्झा ले नी पी सकदे, तुस्से प्रभु रे मेज होर दुष्टात्मा री मेज दुहीं मन्झ भागिदार नी हुई सकदे।²² क्या आस्से प्रभु रे गुस्से जो भडकाहें? क्या आस्से तेस ले ज्यादा सक्तिमान ऐ? ²³ सभ चीजा मेरे कठे ता हाई, पर सभ चीजा फायदे रे नी ई; सभ चीजा मेरे कठे ठीक ता हाई पर सभ चीजा ले बढ़ौतरी नी हुई सकदी।²⁴ केसी जो सिर्फ आपणे बारे मन्झ ई नी सोचणा चाहिए बल्कि दूजे री भलाई रे कठे भी सोचणा चाहिए।²⁵ बजारा मन्झ जो कुछ बिकहा, होर आपणे विवेका रे मुताबक सभ कुछ खाऊआ, एता रे बारे मन्झ कुछ नी

पूछा।²⁶ क्यूंकि धरती होर जो कुछ एता मन्झ आ; से सभ प्रभु रा आ।²⁷ होर अगर कोई अविस्वासी तुस्सा जो सादा दे, होर अगर तुस्से जाणा चाहो विवेका री वजहा ले बगैर सुआल पूछे से सभ खाऊआ जो तुस्सा रे साम्हणे रखिरा।²⁸ पर अगर कोई तुस्सा लोका जो ये बोले, ये मूर्ति पर चढाईरा प्रसाद आ, ता तुस्से तेस दसणे वाळे होर विवेका री वजहा ले मत खाऊआ।²⁹ मेरा मतलब, तेरा विवेक नी, पर तेस दूजे रा विवेक, भला मेरी अजादी दूजे आदमी रे विवेका किन्हें कि परखी जाए? ³⁰ अगर हांऊ धन्यावाद देई किन्हें, खाणा खाहां, ता जेसरे कठे हांऊ धन्यावाद देहां, तेसरे बारे मन्झ मेरी बदनामी कि हुहां ई? ³¹ इधी कठे चाहे तुस्से खाऊआ या पिऊआ, या चाहे जो कुछ करा, पर सभ कुछ परमेसरा री महीमा रे कठे करा।³² तुस्से ना यहूदिया, ना युनानिया, होर ना परमेसरा री कलीसिया रे कठे ठोकरा री वजहा बणा।³³ जेहड़ा हांऊ भी सभ गल्ला मन्झ सभी जो खुस रख्हा, होर आपणा नी, पर कईया रा फायदा सोच्हा, ताकि स्यों उद्धार पाए।

11 ¹ तुस्से मेरी साहीं चाल चला जेहड़ा हांऊ मसीह साहीं चाल चल्हा। ² हे भाईयो, हांऊ तुस्सा जो सराहां, कि सभ गल्ला मन्झ तुस्से मुंजो याद करहा ऐ; होर जो शिक्षा मैं तुस्सा जो दिती, तिन्हा रा पालण बडी सावधानी किन्हें करेया करहा ऐ।³ पर हांऊ ये चाहें कि तुस्से ये जाणी लो कि जनाने रा सिर मर्ध आ, होर मर्धा रा सिर मसीह आ, होर मसीह रा सिर परमेसर आ।⁴ जो मर्ध मूंड ढख्ही किन्हें प्रार्थना या भविष्यवाणी करहा, से आपणे मुंडा री बेज्जती करहा।⁵ पर जो जनाने बगैर मूंड ढख्ही किन्हें प्रार्थना या भविष्यवाणी करहा ई, से आपणे मुंडा री बेज्जती करहा ई, क्यूंकि से गंजी हुणे रे बराबर ई।⁶ अगर जनाने आपणा मूंड नी ढख्हे ता से आपणे बाळ भी काटी ले; पर अगर जनाने रे कठे बाळ कटाणा या मुंडाणां सरमा री गल ई, ता से आपणा मूंड ढके।⁷ मर्धा रे कठे आपणा मूंड ढक्णा ठीक नी आ, क्यूंकि से परमेसरा रा रूप होर महिमा आ, पर जनाने मर्धा री महिमा ई।⁸ क्यूंकि मर्ध जनाने ले नी हुईरा, पर जनाने मर्धा ले हुईरी।⁹ क्यूंकि मर्ध जनाने रे कठे नी बणाईरा, पर जनाने मर्धा रे कठे बणाईरी।¹⁰ इधी कठे स्वर्गदूता रे कारण, जनाने जो ये करणा ठीक आ, कि से हका रे एस चिन्हा जो आपणे मुंडा पर रखे।¹¹ तेबे बी प्रभु मन्झ, ना ता जनाने बगैर मर्धा रे, होर ना ता मर्ध बगैर जनाने रे आ।¹² क्यूंकि जिहां मर्धा ले जनाने हुई, तिहां ई जनाने मर्धा जो जन्म दितेया; पर सभ कुछ परमेसरा ले आ।¹³ तुस्से आपुए फैसला करा, क्या जनाने जो बगैर मूंड ढके परमेसरा ले प्रार्थना करणी चाहिए? ¹⁴ क्या प्रकृति आपुए तुस्सा जो नी सिखांदी कि अगर कोई मर्ध आपणे बाळ लम्बे रखे, ता तेसरे कठे ये सरमा री गल ई।¹⁵ पर अगर जनाने लम्बे बाळ रखे; ता तेस्सा रे

कठे शान ई क्यूंकि बाळ तेस्सा जो ओढने रे कठे दितिरे।¹⁶ पर अगर कोई बैहस करणा चाहे, ता से ये जाणी ले कि ना आस्से रे एथी कोई एहडी प्रथा ई, होर ना ई परमेसरा री कलीसिया मन्झ ई।¹⁷ पर एबे ये हुक्म देंदे हुए, हांऊ तुस्सा री बडाई नी करदा, क्यूंकि तुस्सा रे कठे हुणे ले भलाई नी पर नुक्सान हुहां।¹⁸ क्यूंकि पैहले ता हांऊ ये सुणहां, कि जेबे तुस्से कलीसिया मन्झ कठे हुहां ऐं, ता तुस्सा मन्झ फूट हुहां ई, होर हांऊ एस गल्ला रा कुछ कुछ विस्वास भी करहा।¹⁹ क्यूंकि तुस्सा रे बीचा मन्झ दलबंदी भी जरुर हुणी; ईधी कठे कि जो लोक तुस्सा मंझा ले खरे ऐ, स्यों जाहिर हुई जाए।²⁰ इधी कठे कि जेबे तुस्से एक जगहा कठे हुहां ऐं, ता प्रभु भोज खाणे रे कठे नी।²¹ क्यूंकि खाणे रे टैमा एक दूजे ले पैहले आपणा खाणा खाई लैहां, इधी कठे कोई ता भूखा रही जाहां, होर कोई मतवाळा हुई जाहां।²² क्या खाणे रे कठे तुस्सा रे घर बार नी हाए? या तुस्से परमेसरा री कलीसिया रा अनादर करहा ऐ, होर जिन्हा वाले जे कुछ नी आ, तिन्हा जो सर्मिन्दा करहा ऐ, क्या एस गल्ला मन्झ हांऊ तुस्सा री बडाई करूं? हांऊ एस गल्ला मन्झ तुस्सा री बडाई नी करदा।²³ क्यूंकि ये गल मुंजो प्रभु ले पूजी, होर में ये गल तुस्सा जो पुजाई दिती; कि प्रभु यीसूए जेस राती से पकड़वाया गया था तिने रोटी लई।²⁴ होर तिने धन्यावाद करी किन्हें से तोड़ी, होर बोल्या; कि ये मेरा सरीर आ, जो तुस्सा रे कठे आ, मेरी यादा रे कठे एहडा ई करदे रहैया।²⁵ इहां ई तिने बियारी ले बाद कटोरा भी लया, होर बोल्या; ये कटोरा मेरे खुना मन्झ नौई वाचा ई, जेबे केभे पीओ, ता मेरी यादा मन्झ एहडा ई करदे रहैया।²⁶ क्यूंकि जेबे केभे तुस्से ये रोटी खाहें, होर एस कटोरे मंझा ले पीहां ऐं, ता प्रभु री मौता जो जेबे तक से नी आए, प्रचार करहा ऐ।²⁷ इधी कठे जो कोई अनुचित रीति ले प्रभु री रोटी खाए, या तेसरे कटोरे मंझा ले पीए, ता तेस प्रभु रे सरीर होर खुना रा अपराधी हुणां।²⁸ इधी कठे माहणुं आपणे आपा जो परखी ले होर इस तरह रोटी मन्झा ले खाए, होर एस कटोरे मंझा ले पीए।²⁹ क्यूंकि जो खांदे पींदे प्रभु रे सरीरा जो नी पैहचाणदा, से इस तरह खाई पी किन्हें आपणे ऊपर सजा जो बुलावा देहां।³⁰ एस वजहा ले तुस्सा मंझा ले बौहत सारे कमजोर होर बमार ऐ, होर कई ता मरी भी गए।³¹ अगर आस्से आपणे आपा जो परखी लैदे, ता सजा नी पांदे।³² पर प्रभु आस्सा जो सजा देई किन्हें आस्सा री ताड़ना करहा, ताकि आस्से संसारा साउगी दोसी नी बणे।³³ इधी कठे, हे मेरे भाईयो, जेबे तुस्से खाणे रे कठे, कठे हुहां ऐं, ता एक दूजे रे कठे रुकेया करा।³⁴ अगर कोई भूखा हो, ता से आपणे घरा ई खाई ले, ताकि तुस्सा रा कठे हुणा सजा रा कारण नी हो, होर बाकी गल्ला मां आई किन्हें ठीक करी देणी।

12¹ हे भाईयो, हांऊ नी चाहन्दा कि तुस्से आत्मिक बरदाना रे बारे मन्झ अनजाण बणां।² तुस्से जाणहां ऐं, कि जेबे तुस्से अन्य जाति थे, ता गूंगी मूर्ति रे पीछे जिहां चलाए जाहें थे, तिहां ई चल्हा ऐ थे।³ इधी कठे हांऊ तुस्सा जो जताई देहां कि परमेसरा री आत्मा रे ज़ीए कोई भी माहणुं एहडा नी बोल्दा, कि यीसू स्थापित आ, होर ना पवित्र आत्मा रे बगैर कोई ये बोली सकहा कि यीसू प्रभु आ।⁴ बरदान ता कई किस्मा रे ऐ, पर आत्मा एक ई आ।⁵ होर सेउआ भी कई किस्मा री ई, पर प्रभु एक ई आ।⁶ होर प्रभावसाली काम भी कई किस्मा रे ऐ, पर परमेसर एक ई आ, जो सभी मन्झ हर किस्मा रा प्रभाव पैदा करहा।⁷ पर हर एकी जो सभी री भलाई रे कठे आत्मिक बरदान दितेया जाहां।⁸ क्यूंकि एकी जो आत्मा रे ज़ीए बुद्धि री गल्ला; होर दुजे जो तेस ई आत्मा रे मुताबक ज्ञाना री गल्ला दीती जाहीं।⁹ होर केसी जो तेस ई आत्मा ले विस्वास, होर केसी जो तेस ई एक आत्मा ले चंगा करणे रा बरदान दितेया जाहां।¹⁰ फेरी केसी जो सामर्था रे काम करणे री सक्ति; होर केसी जो भविष्यवाणी रा, होर केसी जो कई किस्मा री भाषा; होर केसी जो भाषा रा मतलब दसणे रा बरदान दितेया जाहां।¹¹ पर ये सभ प्रभावसाली काम से ई एक आत्मा करवाहां, होर से जेस जो चाहां से आपणी इच्छा रे मुताबक हर एकी जो बांडी देहां।¹² क्यूंकि जिहां सरीर ता एक आ पर अंग बौहत सारे ऐ, होर बौहत अंग हुणे पर भी सभ मिली किन्हें एक ई सरीर ऐ, तिहां ई मसीह भी आ।¹³ क्यूंकि आस्से सभीए क्या यहूदी, क्या यूनानी, क्या दास, क्या अजाद एक ई आत्मा रे ज़ीए एक सरीर हुणे रे कठे बसिस्मा लया, होर आस्सा सभी जो एक ई आत्मा पिलाया गया।¹⁴ इधी कठे कि सरीरा मन्झ एक ई अंग नी आ, पर बौहत सारे अंग ऐ।¹⁵ अगर पैर बोले कि हांऊ हाथ नी आ, इधी कठे हांऊ सरीरा रा अंग नी आ; ता क्या से इस वजहा ले सरीरा रा अंग नी आ? ¹⁶ होर अगर कान बोले; कि हांऊ हाथी रा अंग नी आ, इधी कठे हांऊ सरीरा रा अंग नी आ, ता क्या से इस वजहा ले सरीरा रा अंग नी आ? ¹⁷ अगर सारा सरीर सिर्फ हाथ ई हुन्दी ता केथी ले सुणना था? अगर सारा सरीर कान ई हुंदा ता सूंघणा केथी ले हुणा था? ¹⁸ पर परमेसरे सभ अंग आपणी इच्छा रे मुताबक एक एक करी किन्हें सरीरा मन्झ रखे।¹⁹ अगर सरीरा रे सारे अंग एकी अंगा साहीं हुई जांदे, ता सरीर ई केथी हुन्दा? ²⁰ पर अंग ता बोहत सारे ऐ, पर सरीर एक आ।²¹ हाथी हाथा किन्हें नी बोली सकदी, कि मुंजो तेरी जरुरत नी हाई, होर ना मूंड पैरा किन्हें बोली सकहा, कि मुंजो तुस्सा री जरुरत नी हाई।²² एता रे बिल्कुल परे, सरीरा रे जिन्हा अंगा जो आस्से कमजोर समझा ऐ, स्यों बौहत जरुरी ऐ।²³ होर सरीरा रे जिन्हा अंगा जो आस्से इज्जता रे लायक नी समझ्दे, तिन्हा जो आस्से ज्यादा

इज्जत देहां ऐं, होर आस्सा रे सोभा हीन अंग होर ज्यादा सोभा मान हुई जाहें।²⁴ फेरी भी सोभा मान अंगा जो एता री जरूरत नी ई, पर परमेसरे सरीरा जो एहड़ा बणाई दितिरा, ताकि जो अंग कम सुन्दर ऐं, स्यों होर भी ज्यादा इज्जता रे लायक हो।²⁵ ताकि सरीरा मन्झ फूट नी पई जाए, पर अंग एक दूजे री बराबर फिकर करे।²⁶ इधी कठे एक अंग दुःखी हुहां, ता सभ अंग तेस तेस साउगी दुखी हुहां ऐं, होर अगर एकी अंगा री बड़ाई हुहां ई, ता तेसरी खुसी मन्झ सभ अंग खुस हुहां ऐं।²⁷ इस तरहा तुस्से सभ लोक मसीह रे सरीर ऐं, होर लग लग तेसरे अंग ऐं।²⁸ होर परमेसरे कलीसिया मन्झ लग लग लोक नियुक्त कितिरे; पैहले प्रेरित, दूजे नबी, त्रीजे सिखाणे वाळे, फेरी सामर्था रे काम करणे वाळे, होर चंगा करणे वाळे, होर भलाई करणे वाळे, होर प्रधान, कई किस्मा री भाषा बोलणे वाळे।²⁹ क्या सभ प्रेरित ऐं? क्या सभ नबी ऐं? क्या सभ उपदेशक ऐं? क्या सभ सामर्था रे काम करणे वाळे ऐं?³⁰ क्या सभ जो चंगा करणे रा बरदान मिलिरा? क्या सभ अन्य भाषा बोल्ला ऐं?³¹ क्या सभ अनुवाद करहा ऐं? तुस्से बडे ले बडे बरदाना री धुना मन्झ रहा ! पर हांऊ तुस्सा जो होर भी सभ ले खरा पैंडा दस्हा।

13¹ अगर हांऊ माहणुंआं, होर स्वर्गदूता री बोलिया बोलूं, होर प्यार नी रखूं, ता हांऊ एक ठनठन करदा, पीतल, होर झनझन करदी झांझ ई।² होर अगर हांऊ भविष्यवाणी करी सकूं, होर सभ भेदा होर सभ किस्मा रे ज्ञाना जो समझी सकूं, होर मुंजो एथी तक पूरा विस्वास हो, कि हांऊ पाहड़ा जो हटाई दूं, पर प्यार नी रखूं, ता हांऊ कुछ भी नी आ।³ होर अगर हांऊ आपणी सारी जायदाद गरीबा जो खुआई दूं, या आपणा सरीर फुकणे रे कठे देई दूं, होर प्यार नी रखूं, ता एता ले मुंजो कोई फायदा नी आ।⁴ प्यार धीरजवन्त आ, होर दयालु आ, प्यार ईर्ष्या नी करदा; प्यार आपणी बड़ाई नी करदा, होर घमण्ड नी करदा।⁵ से गलत व्यवहार नी करदा, से आपणी भलाई नी चाहन्दा, झुन्जलान्दा नी, बुरा नी मन्नदा।⁶ बुरे कामा ले खुस नी हुंदा, पर सच्चाई किन्हें खुस हुहां।⁷ से सभ गल्ला सही लैहां, सभ गल्ला रा विस्वास करहा, सभ गल्ला री आस रख्हा, सभ गल्ला मन्झ सबर करहा।⁸ प्यार कधी टळदा नी आ, भविष्यवाणीया हो ता स्यों खत्म हुई जाणी, भाषा हो ता तिन्हा गायब हुई जाणा; ज्ञान हो ता, तेस मिटी जाणा।⁹ क्यूंकि आस्सा रा ज्ञान आधा आ, होर आस्सा री भविष्यवाणी अधूरी।¹⁰ पर जेबे सर्वसिद्धा आई जाणा, ता अधुरापन मिटी जाणा।¹¹ जेबे हांऊ बच्चा था, ता हांऊ बालका साहीं बोल्ला था, बालका साहीं मन था, बालका साहीं समझ थी; पर जेबे हांऊ स्याणा हुई गया, ता मैं बालका री गल्ला छाडी दिती।¹² एबे आस्सा जो सीसे मन्झ धुंधला धुंधला सुइहा; पर तेस टैम आस्सा

साम्हणे साम्हणे देखणा, एस टैम मेरा ज्ञान अधूरा आ; पर तेस टैम मां पूरी तरहा ले पैहचाणना, तेहड़ा ई, जेहड़ा परमेसर मुंजो पूरी तरहा ले जाणहां।¹³ पर एबे विस्वास, उम्मीद, प्यार ये तिन्हो स्थाई ऐं, पर इन्हा मन्झ सभ ले बडा प्यार आ।

14¹ प्यारा रे पीछे चला, होर आत्मिक बरदाना री भी धुना मन्झ रहा, खास करी किन्हें ये, कि तुस्से भविष्यवाणी करा।² क्यूंकि जो अन्य भाषा मन्झ गल्ला करहा; से माहणुंआं किन्हें नी, पर परमेसरा किन्हें गल करहा; इधी कठे तेसरी कोई नी सम्झदा; क्यूंकि से भेदा री गल्ला आत्मा मन्झ हुई किन्हें बोल्ला।³ पर जो भविष्यवाणी करहा, से माहणुंआं किन्हें बढौतरी, होर उपदेस, होर सांति री गल्ला बोल्ला।⁴ जो अन्य भाषा मन्झ बोल्ला, से आपणी ई बढौतरी करहा, पर जो भविष्यवाणी करहा से कलीसिया री बढौतरी करहा।⁵ हांऊ चाहां, कि तुस्से सभ अन्य भाषा मन्झ गल्ला करा, पर ज्यादातर हांऊ ये चाहां, कि तुस्से भविष्यवाणी करा; क्यूंकि अगर अन्य अन्य भाषा मन्झ बोलणे वाळा कलीसिया री बढौतरी रे कठे अनुवाद नी करे ता भविष्यवाणी करणे वाळा तेस ले बढी किन्हें आ।⁶ इधी कठे हे भाईयो, अगर हांऊ तुस्सा वाले आई किन्हें अन्य अन्य भाषा मन्झ गल्ला करूं, होर प्रकासन, या ज्ञान, या भविष्यवाणी, या उपदेसा री गल्ला तुस्सा किन्हें नी बोलूं, ता मेरे ले तुस्सा जो क्या फायदा हुणा।⁷ इस तरहा अगर बेजान चीजा भी जिन्हा ले अवाज निकळहा ई – चाहे बौंसरी या सारंगी, अगर इन्हा री अवाजा मन्झ फर्क नी हो, ता ये किहां पता चलणा कि बौंसरी या सारंगी पर केहड़ी जे धुन बजेया करहा ई? ⁸ होर अगर तुरही ले साफ अवाज नी आए ता कोस लड़ाई रे कठे तयारी करणी? ⁹ इहाँ ई तुस्से भी, अगर जीभा ले साफ साफ गल्ला नी करा, ता जो कुछ बोल्ला जाहां; ता से किहां समझ आऊणां? तुस्सा ता हवा किन्हें गल्ला करणे वाळे बणना।¹⁰ संसारा मन्झ ना जाणे कितने किस्मा री भाषा ई, पर तिन्हा मंझा ले कोई भी भाषा बगैर मतलबा री नी हुणी।¹¹ इधी कठे अगर हांऊ केसी भाषा रा मतलब नी समझूं, ता बोलणे वाळे री नजरा मन्झ मां परदेसी बणना; होर बोळणे वाळा मेरी नजरा मन्झ परदेसी बणना।¹² इधी कठे तुस्से भी जेबे आत्मिक बरदाना री धुना मन्झ हो, ता एहड़ी कोसिस करा, कि तुस्सा रे बरदाना री बढौतरी ले कलीसिया री बढौतरी हो।¹³ इधी कठे जो अन्य भाषा बोळणे वाळा हो, से प्रार्थना करे, कि से तेता रा अनुवाद भी करे।¹⁴ इधी कठे अगर हांऊ अन्य भाषा मन्झ प्रार्थना करूं; ता मेरी आत्मा प्रार्थना करहा ई, पर मेरी बुद्धि काम नी करदी।¹⁵ तेबे क्या करणा चहिए? मां आत्मा किन्हें प्रार्थना करणी होर बुद्धी किन्हें भी प्रार्थना करणी; मां आत्मा किन्हें गाणा, होर बुद्धि किन्हें भी गाणा।¹⁶ होर अगर तू आत्मा ले ई धन्यवाद करघा, ता फेरी अनजाण आदमिया तेरे

धन्याबादा पर आमीन किहां बोलणी? इधी कठे कि से ता नी जाणदा, कि तू क्या बोल्ला? ¹⁷ तू ता ठीक ढन्ना किन्हें धन्यबाद देहां, पर दूजे री बढौतरी नी हुन्दी। ¹⁸ हांऊ आपणे परमेसरा रा धन्यबाद करहा, कि हांऊ तुस्सा सभी किन्हें ज्यादा ज्यादा अन्य अन्य भाषा मन्झ बोलूं। ¹⁹ पर कलीसिया मन्झ, अन्य अन्य भाषा मन्झ दस हजार गल्ला बोलणे ले, मुंजो ये होर भी खरा लघ्हा, कि होरी जो सखाणे रे कठे हांऊ बुद्धि री पांज गल्ला ई बोलूं। ²⁰ हे भाईयो, तुस्से समझा मन्झ बच्चे नी बणा; तेबे बी बुराई मन्झ ता बच्चे साहीं बणा; पर समझा मन्झ स्याणे बणां। ²¹ व्यवस्था मन्झ लिखीरा, कि प्रभु बोल्ला, मां अन्य भाषा मन्झ बोलणे वाळे होर परदेसी लोका रे मुंहा ले एस जाति किन्हें गल्ला करणी, तेबे बी तिन्हा मेरी नी सुणनी। ²² इधी कठे अन्य अन्य भाषा विस्वासिया रे कठे नी ई, पर अविस्वासिया रे कठे एक चिन्ह आ, होर भविष्यवाणी अविश्वासिया रे कठे नी ई पर विस्वासिया रे कठे एक चिन्ह आ। ²³ इधी कठे अगर कलीसिया एक जगहा कठी हो, होर सभ के सभ अन्य भाषा बोले, होर न्पह्द या अविस्वासी लोक अन्दर आई जाए ता क्या तिन्हा तुस्सा जो बाहळी रे नी बोलणा? ²⁴ पर अगर सभ भविष्यवाणी करणे लगे, होर कोई अविस्वासी या न्पह्द आदमी अन्दर आई जाए, ता क्या सभी रे ज्रीए तेस कायल नी हुई जाणा, कि से पापी आ, होर सभी आ से परखी लैणा। ²⁵ होर तेसरे मना रे भेद खुल्ही जाणे, होर तेबे तेस मुंहा रे भारे पई किन्हें परमेसरा री जै जै कार करणी, होर मनी लैणा, कि सच्चे परमेसर तुस्सा रे बीचा मन्झ आ। ²⁶ इधी कठे हे भाईयो क्या करणा चाहिए? जेबे तुस्से कठे हुहां ऐं, ता हर एकी रे दिला मन्झ भजन, या उपदेस, या अन्य भाषा रा मतलब दसणा हुहां; सभ कुछ आत्मा री बढौतरी रे कठे हुणा चाहिए। ²⁷ अगर अन्य भाषा मन्झ गल्ला करणी हो, ता दो दो, या बौहत हो ता तीन तीन जण बारी बारी बोले, होर एक आदमी अनुवाद करे। ²⁸ पर अगर अनुवाद करणे वाळा नी हो, ता अन्यभाषा बोळणे वाळा कलीसिया मन्झ चुप रहे, होर आपणे मना किन्हें, होर परमेसरा किन्हें गल्ला करे। ²⁹ नबी मंझा ले दो या तीन बोले, होर बाकी बचिरे लोक तिन्हा रे वचना जो परखे। ³⁰ पर अगर दूजे आदमी पर जो तेथी बैठीरा हो, तेस पर कुछ दिव्य प्रकासन हो, ता पैहले वाळा चुप हुई जाए। ³¹ क्यूंकि तुस्से सभ एक एक करी किन्हें भविष्यवाणी करी सकहा ऐं ताकि सभ सीखे, होर सभ सांति पाए। ³² होर नबिया री आत्मा नबिया रे बसा मन्झ हुहां ई। ³³ क्यूंकि परमेसर गडबडी रा परमेसर नी आ, पर सांति रा परमेसर आ; जेहडा पवित्र लोका या संता री सभ कलीसिया मन्झ हुहां। ³⁴ जनाने कलीसिया मन्झ चुप रहे, क्यूंकि तिन्हा जो ज्यादा गल्ला करणे री इज्जाजत नी ई। ³⁵ होर अगर स्यों कुछ सीखणा चाहे, ता घरा मन्झ आपणे आपणे लाड़े ले पूछे, क्यूंकि

जनाने रा कलीसिया मन्झ ज्यादा बोळणा सरमा री गल ई। ³⁶ क्या परमेसरा रा वचन तुस्सा मंझा ले निकळीरा? या सिर्फ तुस्सा तक ई पुजेया? ³⁷ अगर कोई आदमी आपणे आपा जो नबी या आत्मिक आदमी सम्झहा, ता ये जाणी ले, कि जो गल्ला हांऊ तुस्सा जो लिख्हा, स्यों प्रभु रे हुक्म ऐं। ³⁸ पर अगर कोई नी जाणे, ता ना जाणे। ³⁹ इधी कठे हे भाईयो, भविष्यवाणी करणे री धुना मन्झ रहुआ होर अन्य भाषा बोलणे ले नाह नी करा। ⁴⁰ पर सारी गल्ला सही ढंगा किन्हें होर क्रमा रे मुताबक हुणी चाहिए।

15 ¹ हे भाईयो, हांऊ तुस्सा जो से ई सुसमाचार दस्हा, जो हांऊ पैहले सुणाई चुकिरा, जो तुस्से मनी भी लईरा था होर जेस मन्झ तुस्से मजबूत भी हो। ² होर तेस सुसमाचारा रे ज्रीए ई तुस्सा रा उद्धार भी हुईरा, से सुसमाचार, जो मैं तुस्सा जो सुणाया, तेस जो याद रखा; नई ता तुस्सा रा विस्वास करणा बेकार हुई जाणा। ³ इस वजहा ले मैं सभी ले पैहले तुस्सा जो से ई गल पुजाई दिती, जो मुंजो पौहुंची री थी, कि पवित्र सास्त्रा रे मुताबक यीसू मसीह आस्सा रे पापा रे कठे मरी गया। ⁴ होर दफनाया गया; होर पवित्र सास्त्रा रे मुताबक से त्रीजे ध्याड़े जीऊन्दा हुई गया। ⁵ होर फेरी से कैफा रे साम्हणे जाहिर हुएया होर तेता ले बाद से तिन्हा बारा प्रेरिता जो सुद्धेया। ⁶ फेरी से तेस ई टैम, पांज सौ ले भी ज्यादा भाईया जो सुद्धेया, जिन्हा मंझा ले बौहत आज तक जीऊन्दे ऐं, जेव्की कुछ लोका री मौत हुई चुकिरी। ⁷ फेरी से याकूबा जो सुद्धेया, तेबे से सभ प्रेरिता जो सुद्धेया। ⁸ होर सभी ले बाद मुंजो भी सुद्धेया, हांऊ तेस अधूरे टैमा रे जम्मिरे बच्चे साहीं आं जेसरा जन्म टैमा ले पैहले हुईरा हो। ⁹ क्यूंकि हांऊ प्रेरिता मन्झ सभी ले छोटा आ, बल्कि प्रेरित बणने रे लायक भी नी आ, क्यूंकि मैं परमेसरा री कलीसिया सताई थी। ¹⁰ पर हांऊ जो कुछ भी आ, परमेसरा री दया ले आ, होर तेसरी दया जो मेरे पर हुई, से बेकार नी हुई, पर मैं तिन्हा सभी ले बढी किन्हें मैहनत कित्ती; तेबे बी ये मेरी तरफा ले नी हुएया पर परमेसरा री दया जो मेरे पर थी। ¹¹ चाहे हांऊ हो, या स्यों हो, आस्से ये ई प्रचार करहा ऐं, होर एता पर ई तुस्से विस्वास कितेया। ¹² एबे अगर मसीहा रा ये प्रचार कितेया जाहां, कि से मरीरे मंझा ले जीऊन्दा हुई गईरा, ता तुस्सा मंझा ले कितने बोल्ला ऐं, कि मरणे ले बाद पुनरुत्थान नी हुन्दा। ¹³ अगर मरणे ले बाद पुनरुत्थान नी हुन्दा, ता फेरी मसीह भी जीउंदा नी हुएया। ¹⁴ होर अगर मसीह जीउंदा नी हुएया, ता आस्सा रा प्रचार करणा भी बेकार आ, होर तुस्सा रा विस्वास भी बेकार आ। ¹⁵ फेरी ता आस्से भी परमेसरा रे झूठे गुआह बणे; क्यूंकि आस्से परमेसरा रे बारे मन्झ ये गवाही दिती कि तिने मसीहा जो जीउंदा करी दितेया, पर अगर तिन्हा रे बोलणे रे मुताबक

मरीरे आदमी रा पुनरुत्थान नी हुंदा, ता फेरी परमेसरे मसीह भी जीउंदा नी कितेया । ¹⁶ क्यूंकि अगर मरीरे जीउंदे नी किते जांदे, ता मसीहा भी जीउंदा नी कितेया गया । ¹⁷ होर अगर मसीह जीउंदा नी हुएया, ता तुस्सा रा विस्वास करणा बेकार आ; होर तुस्से हली तक पापा मन्झ फस्सी रे । ¹⁸ बल्कि जो मसीह मन्झ मरी गईरे, तिन्हा रा भी नास हुई गया । ¹⁹ अगर आस्से सिर्फ एस जिन्दगी मन्झ मसीहा ले आस रख्हा ऐ, ता आस्से सभ माहणुंआं ले ज्यादा अभागे ऐ । ²⁰ पर एबे सच्चाई ये ई कि मसीह मरीरे मंझा ले जीउंदा हुई गईरा; होर जो मरी गईरे तिन्हा मन्झ से पैहला फल आ । ²¹ क्यूंकि जेबे एक आदमी ले मौत आई ता एक माहणुं ले ई मुरदे रा पुनरुत्थान भी आया । ²² होर जिहां आदमा मन्झ सभ मरहा ऐ, तिहां ई मसीहा मन्झ सभ जीउंदे किते जाणे । ²³ पर हर एक आपणी आपणी बारी रे मुताबक; पैहला फल मसीह; फेरी मसीह रे आऊणे पर तेसरे लोक । ²⁴ एता ले बाद जेबे मसीहा सभ राज करणे बाळे अधिकारी, होर हर किस्मा री सक्तिया रा अंत करी किन्हें राज पाट परमेसर पिता रे हाथा मन्झ सौंपी देणा; तेबे अंत हुई जाणा । ²⁵ पर जेबे तक से आपणे सभ दुस्मणा जो आपणे पैरा हेठ नी करी दे, तेबे तक तेसरा राजकरणा जरूरी आ । ²⁶ सभी ले आखरी दुसमन मौत ई, जेस्सा रा अंत करी दितेया जाणा । ²⁷ क्यूंकि परमेसरे सभ कुछ तेसरे पैरा हेठ करी दितेया; पर जेबे से बोल्हा कि सभ कुछ तेसरे अधीन करी दितेया, ता ये सबूत आ, कि जिने जे सभ कुछ तेसरे अधीन करी दितेया, से आपु लग रहैया । ²⁸ होर जेबे सभ कुछ तेसरे अधीन हुई जाणा, ता पुत्रा भी आपणे आप तेसरे अधीन हुई जाणा, जिने जे सभ कुछ तेसरे अधीन करी दितेया; ताकि सभी मन्झ परमेसर ई सभ कुछ हो । ²⁹ नई ता, जो लोक मरीरे रे कठे बसिस्मा लैहां ऐं, तिन्हा क्या करणा? अगर मरीरे जीउंदे नी हुंदे? ता फेरी तिन्हा रे कठे बसिस्मा किधियो लैहां ऐं? ³⁰ होर आस्से भी हर टैम खतरे मन्झ किधियो पई रहैयां ऐं । ³¹ हे भाईयो, मुंजो तेस घमंडा री कसम जो आस्सा रे मसीह यीसू मन्झ हांऊ तुस्सा रे बारे मन्झ करहा, कि हांऊ हर रोज मरहा । ³² अगर हांऊ माहणुं रे स्हाभे इफिसुसा मन्झ जंगली जानवरा किन्हें लडेया, ता मुंजो क्या फायदा हुएया? अगर मेरीरे जीउंदे नी किते जाणे, ता आऊआ, खाऊआ पिऊआ होर मौज मणाऊआ, क्यूंकि काला ता मां मरी ई जाणा । ³³ धोखा देख्या खांदे, बुरी संगत खरे चरित्रा जो बिगाड़ी देहां ई । ³⁴ भलाई रे कठे जागी जाऊआ होर पाप नी करा; क्यूंकि कितने एहडे ऐ जो परमेसरा जो नी जाणदे, हांऊ तुस्सा जो सर्मिन्दा करणे रे कठे ये बोल्हा । ³⁵ एबे केसिया ये बोलणा, कि मरीरे किहां जीउंदे हुई जाहें, होर फेरी स्यों केहड़ा सरीर धारण करहा ऐ? ³⁶ तुस्से कितने मुख् ऐ, जो कुछ तू बाहां, जेबे तक से मरी नी जाए तेबे तक से नी उगदा ।

³⁷ होर जो तू बाहां, से ये सरीर नी आ, जो उग्णे बाळा हो, से सिर्फ बेजा हुहां, चाहे से कणका रा दाणा हो, चाहे कुछ होर हो । ³⁸ पर परमेसर तेस जो आपणी इच्छा रे मुताबक तेस जो सरीर देहां; होर हर एक बेजे जो तेसरा खास सरीर । ³⁹ सभ सरीर एकी साहीं नी हुन्दे, पर माहणुंआं रा सरीर लग आ, जानवरा रा सरीर लग आ; चीडू पंखेरू रा सरीर लग आ; मछिया रा सरीर लग आ । ⁴⁰ कुछ सरीर स्वर्गीया हुहां ऐं, होर सारीरिक सरीर भी हुहां ऐं । पर स्वर्गीया सरीरा रा तेज लग आ, होर सारीरिक सरीरा रा तेज लग आ । ⁴¹ सुरजा रा तेज लग आ, होर चांदा रा तेज लग आ, होर तारे रा तेज लग आ, क्यूंकि एक तारे रे तेजा ले दूजे तारे रे तेजा मन्झ फर्क आ । ⁴² इधी कठे जेबे मुरदे जीउंदे हुई जाणे तेबे बी एहड़ा ई हुणां, सरीर नास्मान दसा मन्झ बोया जाहां, होर अमर सरीर बणी किन्हें जीऊन्दा हुई जाहां । ⁴³ बेज्जती री दसा मन्झ बोया जाहां, होर महिमा री दसा मन्झ जी उठ्हा; एस जो कमजोरी री दसा मन्झ बोया जाहां; होर सामर्था साउगी जी उठ्हा । ⁴⁴ सारीरिक सरीर बोया जाहां, होर आत्मिक सरीर जी उठ्हा; जेबकी सारीरिक सरीर हुहां, ता आत्मिक सरीर भी हुहां । ⁴⁵ एहड़ा भी लिखीरा आ, कि पैहले माहणुं, यानि आदम, जीऊन्दा प्राणी बणेया होर आखरी आदम, जींदगी देणे बाळा आत्मा बणेया । ⁴⁶ पर पैहले से आत्मिक नी था, पर सारीरिक था, एता ले बाद से आत्मिक हुएया । ⁴⁷ पैहला माहणुं धरती रा यानि माटे रे था; दूजा माहणुं स्वर्गा रा आ । ⁴⁸ जेहड़ी तेस माहणुं री रचना हुई, तिहां ई सभ लोक माटे रे बणे; होर जेहड़ा से स्वर्गीय आ, तिहां ई स्यों भी स्वर्गीय ऐ । ⁴⁹ होर जिहां आस्से तेसरा सांसारिक रूप जो माटे रे था धारण कितेया, तिहां ई आस्सा से स्वर्गीय रूपा धारण करणा । ⁵⁰ हे भाईयो, हांऊ ये बोल्हा कि मास होर खून परमेसरा रे राजा रे अधिकारी नी हुई सकदे, होर ना नासमान अविनासी रा अधिकारी हुई सकहा । ⁵¹ देखा, हांऊ तुस्सा किन्हें भेदा री गल बोल्हा; कि आस्सा सभिया नई मरणा, पर सभिया बदली जाणा । ⁵² होर ये एक पला मन्झ, पलक झपकदे आखरी तुरही ब्जांदे ई हुणां; क्यूंकि तुरही बजणी होर मुरदे अविनासी दसा मन्झ उठाए जाणे, होर आस्सा बदली जाणा । ⁵³ क्यूंकि एस नास्मान सरीरा रा अविनासी चोले जो धारण करणा जरूरी आ, होर एस मरणहार सरीरा रा अविनासी चोले जो धारण करणा जरूरी आ । ⁵⁴ इधी कठे जेबे एस नास्मान सरीरा अविनासी चोले जो धारण करी लैणा, होर मरणहारा अमरता जो पैहनी लैणा, तेबे ये लिखीरा वचन पूरा हुई जाणा, कि विजये मौत निगळी लई । ⁵⁵ हे मौत तेरी जीत केथी ई? हे मौत तेरा डंक केथी आ? ⁵⁶ मौता रा डंक ता पाप आ, होर पापा री ताकत व्यवस्था ई । ⁵⁷ पर परमेसरा रा धन्यावाद हो, जो आस्सा रे प्रभु मसीह रे जीए आस्सा जो जीत दिलवाहां । ⁵⁸ इधी कठे हे मेरे प्यारे

भाईयो, पक्के होर अटल रहुआ, होर प्रभु रे कामा मन्झ हमेसा बढदे जाऊआ, क्यूंकि ये जाणहां ऐं, कि प्रभु मन्झ तुस्सा री मैहनत बेकार नी ई ।

16 ¹ एबे तेस दाना रे बारे मन्झ जो पवित्र लोका रे कठे कितेया जाहां, जेहड़ा हुक्म मैं ग्लातिया री कलीसिया जो दितेया, तेहड़ा ई तुस्से भी करा । ² हते रे पैहले ध्याडे तुस्सा मंझा ले हर एक आपणी आमदानी रे मुताबक कुछ आपणे वाले रखेया करा, ताकि मेरे आऊणे पर तुस्सा जो दान कठा ना करणा पई जाए । ³ होर जेबे मां आऊणा, ता जिन्हा जो तुस्सा चाहो, तिन्हा जो मां चिठिया देई किन्हें से दान भेजी देणा, ताकि तुस्सा रा दान यरुस्लेमा मन्झ पुजाई दे । ⁴ होर अगर मेरा जाणा भी ठीक हुएया, ता तिन्हा मेरे साउगी ई चली जाणा । ⁵ जेबे मां मकिदुनिया ले हुई किन्हें जाणा ता मां तुस्सा वाले भी आऊणा, क्यूंकि मैं ता मकिदुनिया ले हुई किन्हें जाणे रा फैसला करी लईरा । ⁶ हुई सकहा कि हांऊ कुछ टैमा तक तुस्सा साउगी रुकू या सरदी तुस्सा वाले काटूं, ताकि जेथी केथी मुंजो जाणा हो, तुस्से मुंजो विदा करी सको । ⁷ क्यूंकि हांऊ एबे रस्ते मन्झ मिलणा नी चाहन्दा; पर मुंजो आस ई, कि अगर प्रभु चाहे ता कुछ टैमा तक मां तुस्सा साउगी रहैणा । ⁸ पर मां पिन्तेकुस्ता रे साजे तक इफिसुसा मन्झ ई रहैणा । ⁹ क्यूंकि मेरे कठे एक बड़ा होर खरे कामा रा रस्ता खुलीरा, होर तेथी मेरे बौहत सारे वरोधी ऐ । ¹⁰ अगर तिमिथियुस आई जाए, ता देखणा, कि से तुस्सा साउगी बेखौफ रहे; क्यूंकि से मेरे साहीं प्रभु रा काम करहा । ¹¹ इधी कठे कोई तेस जो तुच्छ नी जाणे, पर तेस जो सांति किन्हें विदा करणा ताकि से मेरे वाले आई जाए, क्यूंकि हांऊ

दूजे भाईया साउगी तेस जो न्ह्याळेया करहा । ¹² होर जेथी तक आस्सा रे भाई अपुल्लोसा रा सुआल आ, मैं तेस जो प्रोत्साहन दितेया कि से भाईया साउगी तुस्सा वाले आए, पर एस टैम तेस री बिल्कुल इच्छा नी थी कि से आए, फेरी भी मौक्का मिलदे ई तेस आई जाणा । ¹³ जागदे रहुआ, विस्वासा मन्झ अटल रहुआ, साहसी बणा ताकतवर बणा । ¹⁴ जो कुछ तुस्से करहा ऐ, से प्यारा किन्हें करा । ¹⁵ हे भाईयो, तुस्से स्तिफनासा रे घराने जो जाणहां ऐं, कि स्यों अखाया रे पैहले फल ऐ, होर पवित्र लोका री सेउआ रे कठे त्यार रहैयां ऐं । ¹⁶ इधी कठे हांऊ तुस्सा ले अरज करहा कि एहडे लोका रे अधीन रहुआ, बल्कि हर एकी रे अधीन जो एस कामा मन्झ मददगार होर मैहनती ऐ । ¹⁷ होर हांऊ स्तिफनासा होर फूरतूनातुसा होर अखइकुसा रे आऊणे ले खुस आ, क्यूंकि जो तुस्से नी करी सके, से तिन्हे पूरा कितेया । ¹⁸ होर तिन्हे मेरी होर तुस्सा री आत्मा खुस करी दिती, इधी कठे एहडे लोका री इज्जत करा । ¹⁹ आसिया री कलीसिया री तरफा ले तुस्सा जो नमस्कार; अक्विला होर प्रिसका रा होर तिन्हा रे घरा री कलीसिया रा भी तुस्सा जो प्रभु मन्झ बौहत बौहत नमस्कार । ²⁰ सभ भाईया रा तुस्सा जो नमस्कार; पवित्र चुम्बन देई किन्हें एक दूजे किन्हें नमस्कार करा । ²¹ हांऊ पौलुस तुस्सा जो आपणे हाथा ले नमस्कार लिख्या करहा । ²² अगर कोई प्रभु किन्हें प्यार नी रखे ता से श्रापित आ, आस्सा रा प्रभु आऊणे वाळा आ ²³ प्रभु यीसू मसीह री दया तुस्सा पर हुन्दी रहे । ²⁴ मेरा प्यार मसीह यीसू मन्झ तुस्सा सभौ साउगी बणा रहे, आमीन

2 कुरिन्थियों

1 ¹ पौलुसा री तरफा ले जो परमेसरा री इच्छा ले मसीह यीसू रा प्रेरित आ, होर भाई तिमुथियुसा री तरफा ले परमेसरा री तेस्सा कलीसिया रे नांऊ जो कुरंथियो मन्झ ई; होर सारे अखमा रे सब पवित्र लोका रे नांऊ। ² आस्सा रे पिता परमेसर होर प्रभु यीसू मसीह री तरफा ले अनुग्रह होर सांति मिल्दी रहे। ³ आस्सा रे प्रभु यीसू मसीह रे परमेसर, होर पिता रा धन्यवाद हो, जो दया रा पिता, होर सब किस्मा री सांति रा परमेसर आ। ⁴ से आस्सा रे सब दुःखा मन्झ आस्सा जो सांति देहां; ताकि आस्से तेस्सा सांति री वजहा जो परमेसर आस्सा जो देहां, तिन्हा जो भी सांति देई सके, जो केसी नी केसी वजहा ले दुःखा मन्झ हो। ⁵ क्यूंकि जिहां आस्से मसीह रे दुःखा मन्झ सहभागी हुहां ऐं, तिहां ई आस्सा जो मसीह रे ज्रीए तुस्सा रे कठे खुसी हुएआ करहा ई। ⁶ अगर आस्से दुःख पाहें, ता ये तुस्सा री सांति होर उद्दारा रे कठे आ होर अगर सांति पाहें, ता ये तुस्सा री सांति रे कठे आ; जेस वजहा ले तुस्से बड़े सबर रखी किन्हें तिन्हा दुःखा जो सही लैंहां ऐं, जिन्हा जो आस्से भी सैहया करहा ऐ। ⁷ होर आस्सा री आस तुस्सा रे बारे मन्झ बिल्कुल पक्की ई; क्यूंकि आस्से जाणहां ऐं, कि जिहां तुस्से दुःखा मन्झ सहभागी हुहां ऐं, तिहां ई सांति रे भी सहभागी हो। ⁸ हे भाईयो, आस्से नी चाहन्दे कि तुस्से आस्सा रे तेस दुःखा ले अणजान रहो, जो आसिया मन्झ आस्सा पर पया, होर आस्से ऐहडे भारी बोझा ले दभी गईरे थे, जो आस्सा री समर्था ले बाहर था, एथी तक कि आस्से जीवना ले भी हाथ धोई बेठिरे थे। ⁹ हालांकि आस्से आपणे मना मन्झ समझी लईरा था, कि आस्सा पर मौता रा हुक्म हुई चुकीरा होर आस्से आपणा आपा पर ज्यादा भरोसा ना रखे, बल्कि तेस परमेसरा पर भरोसा रखे जो मुर्दे जो जिउंदा करहा। ¹⁰ तिने ई आस्से ऐहडी बडी मौता ले बचाए, होर तेस बचाणें भी; होर तेस ले आस्सा री ये आस ई, कि तेस आस्से अगे भी बचान्दे रैहणा। ¹¹ होर तुस्से भी मिली जुली किन्हें प्रार्थना रे ज्रीए आस्सा री मदद करा, ताकि जो बरदान कईया रे ज्रीए आस्सा जो मिलेया, तेसरी वजहा ले कई सारे लोक आस्सा री तरफा ले धन्यावाद करे। ¹² क्यूंकि आस्से आपणे विवेका (मना) री एहडी गवाही पर घमण्ड करहा ऐ, ताकि संसारा मन्झ होर खास करी किन्हें तुस्सा रे बीचा मन्झ आस्सा रा चरित्र परमेसरा रे लायक एहडी पवित्रता होर सच्चाई साउगी था, जो सारीरिक ज्ञाना ले नी, बल्कि परमेसरा रे अनुग्रहा समेत था। ¹³ आस्से तुस्सा जो होर कुछ नी लिखदे, सिर्फ से जो तुस्से पढ़हा ऐ या मन्हां ऐं, होर मुंजो आस ई, कि

आखरी तक तुस्सा मन्झे भी रैहणां ¹⁴ जिहां तुस्सा मन्झा ले कई लोके मनी लया, कि आस्से तुस्सा रे घमण्डा रे कारण ऐ; तिहां ई तुस्सा भी प्रभु यीसू रे ध्याडे आस्सा रे कठे घमण्डा रा कारण बणना। ¹⁵ होर ऐस भरोसे ले हांऊ चाहां था कि पैहले हांऊ तुस्सा वाले आऊं; ताकि तुस्सा जो एक होर दान मिले। ¹⁶ होर तुस्सा वाले ले हुई किन्हें हांऊ मकिदुनिया जो जाऊं, होर तुस्से मुंजो आपणे आप यहूदिया तक पहुचाओं। ¹⁷ इधी कठे मैं जो ये इच्छा किती थी ता क्या मैं चंचलता दसी? या जो हांऊ करणा चाहां क्या सरीरा रे मुताबक करणा चाहां, कि हांऊ गल्ला मन्झ हां, हां भी करूं; होर नां नां करूं। ¹⁸ परमेसर सच्चा गवाह आ, कि आस्सा रे से वचन जो तुस्सा किन्हें बोल्या हां होर नांह दुंहें पाई जाहीं। ¹⁹ क्यूंकि परमेसरा रा पुत्र प्रभु यीसू जेसरा आस्सा रे यानि मेरे होर सिलवानुसा होर तिमुथियुसा रे ज्रीए तुस्सा रे बीचा मन्झ प्रचार हुआ, तेता मन्झ हाँ होर नांह दुंहें नी थी, पर तेता मन्झ हां ई हां हुई। ²⁰ क्यूंकि परमेसरा री जितनी प्रतिज्ञा ई, स्यों सभ तेस मन्झ हां समेत ई: इधी कठे तेसरे ज्रीए आमीन भी हुई, ताकि आस्सा रे ज्रीए परमेसरा री महिमा हो। ²¹ होर जो आस्सा जो तुस्सा साउगी मसीह मन्झ मजबूत करहा, होर जिने आस्सा रा अभिषेक कितेया से ई परमेसर आ। ²² जिने आस्सा पर छाप भी करी दिती होर बयाने मन्झ आपणी आत्मा भी आस्सा रे मना मन्झ देई दिती। ²³ हांऊ परमेसरा जो गवाह करी किन्हें, कि हांऊ ऐबे तक कुरंथियों मन्झ इधी कठे नी आया, कि मुंजो तुस्सा पर तरस आहूँआं था। ²⁴ ये नी, कि आस्से विस्वासा रे बारे मन्झ तुस्सा पर प्रभुता जताणा चाहें; बल्कि तुस्सा री खुसी मन्झ मददगार ऐ क्यूंकि तुस्से विस्वासा ले ई मजबूत रैहयां ऐं।

2 ¹ मैं आपणे मना मन्झ ये ई ठाणी लया था कि मां फेरी दबारा तुस्सा वाले उदास हुई किन्हें नी आऊणा। ² क्यूंकि अगर हांऊ तुस्सा जो उदास करूं, ता मुंजो खुसी देणेवाळा कुण हूणां, सिर्फ से ई जो मेरे ज्रीए उदास हुआ? ³ होर मैं ये ई गल तुस्सा जो इधी कठे लिखी, कि केते एहडा नी हो, कि मेरे आऊणे पर जिन्हा ले मुंजो खुसी मिलणी चाहिए, हांऊ तिन्हा ले उदास होऊं; क्यूंकि मुंजो तुस्सा सभी पर ऐस गल्ला रा भरोसा आ, कि जो मेरी खुसी ई, से ई तुस्सा सभी री भी खुसी ई। ⁴ बड़े दुःख, होर मना रे कष्टा ले, मैं बौहत आसू बहाई बहाई किन्हें तुस्सा जो लिख्या, इधी कठे नी, कि तुस्से उदास हुई जाओ, बल्कि इधी कठे कि तुस्से तेस बड़े प्यारा जो जाणी लो, जो मुंजो तुस्सा साउगी आ। ⁵ होर अगर केसीऐ दुःख पहुंचाईरा हो, ता तिने सिर्फ मुंजो

नी पहुंचाईरा बल्कि (ताकि हांऊ तुस्सा साउगी बौहत सख्ती नी करूं) कुछ कुछ तुस्सा सभी जो भी पहुंचाईरा।⁶ ऐहडे आदमी जो तुस्सा रे समाजा रे लोके जो सजा दिती, से ई तिन्हारे कठे भतेरी ई।⁷ इधी कठे ऐता ले ये खरा आ कि तेसरा पाप माफ करा; होर सांति देआ, एहडा नी हो कि एहडा आदमी उदासी मन्झ डूबी जाए।⁸ इधी कठे हांऊ तुस्सा ले बिनती करहा, कि तेस जो आपणे प्यारा रा सबूत देआ।⁹ क्यूंकि मैं इधी कठे भी लिखीरा था, कि हांऊ तुस्सा जो परखी लूं, कि सब गल्ला मनणे रे कठे तुस्से त्यार ऐ, कि नी।¹⁰ जेसरा तुस्से कुछ माफ करहा ऐ तेता जो हांऊ भी माफ करहा, क्यूंकि मैं जो कुछ भी माफ कितेया, अगर कुछ भी माफ कितिरा हो, ता तुस्सा रे कारण मसीह री जगह मन्झ हुई किन्हें माफ कितेया।¹¹ ताकि सैताना री आस्सा पर कोई चाल न चले, क्यूंकि आस्से तेस री चाला ले अनजाण नी ऐ।¹² होर जेबे हांऊ मसीह रा सुसमाचार सुनाणे रे कठे त्रोआसा मन्झ आया, ता प्रभुऐ मेरे कठे एक द्वार खोली दितेया।¹³ होर मेरे मना जो चैन नी मिल्या, इधी कठे कि मुंजो आपणा भाई तितुस नी मिल्या; इधी कठे हांऊ तिन्हा ले विदा हुई किन्हें मकिदुनिया जो चली गया।¹⁴ बल्कि परमेसरा रा धन्यवाद हो, जो मसीह मन्झ हमेसा आस्सा जो विजयोत्सवा मन्झ लई चल्हा, होर आस्सा रे ज्रीए आपणे ज्ञाना री मीठी खुसबू हर जगहा फैलाहां।¹⁵ क्यूंकि आस्से परमेसरा रे साम्हणें उद्धार पाणे वाळे, होर नास हूणे वाळे, दुहीं रे कठे मसीह री मीठी खुसबू ऐ।¹⁶ कईया रे कठे ता मरणे रे निमित्त मौता री गन्ध, होर कईया रे कठे जीवना रे निमित्त जिन्दगी री खुसबू, होर इन्हा गल्ला रे लायक कुणहां? ¹⁷ क्यूंकि आस्से तिन्हा साहीं नी ऐ, जो परमेसरा रे वचना मन्झ मिलावट करहा ऐ; बल्कि मना री सच्चाई मन्झ हुई किन्हें, होर परमेसरा री तरफा ले परमेसरा जो हाजिर जाणी किन्हें आस्से मसीह मन्झ बोल्हा ऐ।

3 ¹ क्या आस्से फेरी आपणी बड़ाई करदे लगीरे? या आस्सा जो कईया साहीं सिफारिस पत्रिया तुस्सा वाले ल्याऊणी या तुस्सा ले लेणे री जरूरत ई? ² तुस्से आस्सा री पत्रीया ई, जो आस्सा रे दिला पर लिखी गईरी, होर तिन्हा जो सब आदमी पछयाणहां ऐं होर पढ़हा ऐ। ³ ये ता सुइदी गल ई, कि तुस्से मसीह री पत्रीया ई, जो आस्से सेवका साहीं लिखी; होर जो स्याही किन्हें नी, बल्कि जिन्दे परमेसरा री आत्मा किन्हें पात्थरा री पटिया पर नी, बल्कि दिला री मांस रूपी पटिया पर लिखीरी। ⁴ आस्से मसीह रे ज्रीए परमेसरा पर एहडा ई भरोसा रखहा ऐ। ⁵ ये नी, कि आस्से आपणे आप ऐस लायक ऐ, कि आपणी तरफा ले केसी गल्ला रा विचार करी सकहा ऐ; पर आस्सा री योग्यता परमेसरा री तरफा ले ई। ⁶ जिने आस्से नौई वाचा रे सेवक हूणे रे लायक भी किते, सब्दा रे सेवक नी बल्कि

आत्मा रे; क्यूंकि सब्द मारहा, पर आत्मा जिन्दगी देहां। ⁷ पर मौता री ये वाचा जेस रे अक्षर पत्थरा पर गोदे गईरे थे, एथी तक तेजोमय हुई, कि मुसा रे मुंहा री चमका रे कारण जो घटदा भी जाहां था, इस्राएली तेसरे मुंहा पर नजर नी करी सकदे थे। ⁸ ता आत्मा री वाचा होर भी तेजोमय कि नी हुणीं? ⁹ क्यूंकि जेबे दोषी ठैहराणे वाळी वाचा तेजोमय थी, ता धर्मी ठैहराणे वाळी वाचा होर भी तेजोमय कि नी हुणीं? ¹⁰ क्यूंकि जो पैहले महिमामय तेजा किन्हें परिपूर्ण था, ऐबे से तेस महिमामय तेजा रे साम्हणें जो तेस ले भी ज्यादा बढी किन्हें तेजस्वी आ, से तेजरहित हुई गया। ¹¹ क्यूंकि जेबे से महिमामय तेज जो घटदा जाहां था, से इतना तेजोमय था, ता से महिमामय तेज जो स्थिर आ, तेस कितना तेजोमय हुणां? ¹² इधी कठे ऐहडी आस रखी किन्हें आस्से बडी हिम्मत साउगी बोल्हा ऐ। ¹³ होर मूसा साहीं नीं, जिने आपणे मुंहा पर परदा पाइरा था ताकि इस्राएली तेस घटणे वाळी चीजा रे अन्ता जो नी देखी सको। ¹⁴ क्यूंकि स्यों मतिमन्द हुई गईरे थे, क्यूंकि आज तक पुराणे नियम पढ़ने रे टैमा तिन्हा रे दिला पर से ई परदा पइरा रेंहयां; पर से परदा मसीह मन्झ उठी जाहां। ¹⁵ होर आज तक जेबे केबे मुसा री किताब पढी जाहीं, ता तिन्हारे दिला पर परदा पइरा रेंहयां। ¹⁶ बल्कि जेबे केबे तिन्हा रा दिल प्रभु वखा जो फिर्घा, तेबे से परदा उठी जाणा। ¹⁷ प्रभु ता आत्मा आ: होर जेथी केथी प्रभु रा आत्मा आ तेथी अजादी ई। ¹⁸ बल्कि जेबे आस्सा सभी रे उघाड़े चेहरे ले प्रभु रा प्रताप इहाँ जाहिर हुहां, जिहां सीसे मन्झ, ता प्रभु रे ज्रीए जो आत्मा आ, आस्से तेस ई तेजस्वी रूपा मन्झ अंस अंस करी किन्हें बदल्दे जाहें।

4 ¹ इधी कठे जेबे आस्सा पर एहडी दया हुई, कि आस्सा जो ये सेऊआ मिली, ता आस्से हिम्मत नी हारदे। ² बल्कि आस्से ता लज्जा रे गुप्त काम छाडी दिते, होर ना आस्से च्लाकी करहा ऐ, होर ना आस्से परमेसरा रे वचना मन्झ मिलावट करहा ऐ, बल्कि सच्चाई जो प्रकट करी किन्हें, परमेसरा रे साम्हणें हर एक आदमी रे विवेका (मना) मन्झ आपणी भलाई बैठाहें। ³ बल्कि अगर आस्सा रे सुसामचारा पर परदा पईरा, ता ये नास हूणे वाळे रे कठे ई पईरा। ⁴ होर तिन्हा अविश्वासियों रे कठे, जिन्हा री बुद्धि ऐस संसारा रे ईस्वरे काणी करी दितीरी, ताकि स्यों मसीह जो परमेसरा रा प्रतिरूप आ, तेसरे तेजोमय सुसामचारा रा प्रयासा तिन्हा पर नी चमके। ⁵ क्यूंकि आस्से आपणे आपा जो नी, बल्कि मसीह यीसू जो प्रचार करहा ऐ, कि से प्रभु आ; होर तेसरे बारे मन्झ ये बोल्हा ऐ, कि आस्से यीसू री वजहा ले तुस्सा रे दास ऐ। ⁶ इधी कठे कि परमेसर ई आ, जिने बोल्या, कि न्ह्यारे मंझा ले प्रयासा चमके; होर से ई आस्सा रे दिला मन्झ चमक्या, ताकि परमेसरा री महिमा रे ज्ञाना री ज्योति यीसू मसीह रे चेहरे ले प्रकासमान हो। ⁷ बल्कि आस्सा

वाले ये धन मिटटी रे भांडे मन्झ रखिरा आ, कि ये असीम सामर्थ आस्सा री तरफा ले नी, बल्कि परमेसरा री तरफा ले ठैहरे ।⁸ आस्से चहुँ वखा ले दुःख ता काट्हा ऐ, पर संकटा मन्झ नी पऊन्दे; आस्से घबराई गईरे, पर आस्से निरास नी हुन्दे ।⁹ सताये ता जाहें; पर त्यागे नी जान्दे; गिराये ता जाहें, पर खत्म नी हुन्दे ।¹⁰ आस्से यीसू री मौता जो आपणी सरीरा मन्झ हर टैम लई किन्हें फिरहा ऐ; ताकि यीसू री जिन्दगी भी आस्सा रे सरीरा मन्झ जाहिर हो ।¹¹ क्यूंकि आस्से जिन्दे जी हमेसा यीसू री वजहा ले मौता रे हाथा मन्झ सौंपे जाहें ताकि यीसू री जिन्दगी भी आस्सा रे मरणहार सरीरा मन्झ जाहिर हो ।¹² इधी कठे कि मौत आस्सा पर असर करहा ई होर जिन्दगी तुस्सा पर ।¹³ होर इधी कठे कि आस्सा मन्झ से ई विस्वासा री आत्मा आ, (जेस रे बारे मन्झ लिखीरा, कि मैं विस्वास कितेया, इधी कठे मैं ग्लाय) इधी कठे आस्से भी विस्वास करहा ऐ, इधी कठे आस्से भी बोल्ला ऐ ।¹⁴ क्यूंकि आस्से जाणहां ऐं, जिने प्रभु यीसू जिउंदा कितेया, तेस ई आस्से भी यीसू मन्झ भागी जाणी किन्हें जिउंदे करणे, होर तुस्से आपणे साम्हणें हाजर करणे ।¹⁵ क्यूंकि सब चीजा तुस्सा रे कठे ई, ताकि अनुग्रह कईया रे ज़ीए ज्यादा हुई किन्हें परमेसरा री महिमा रे कठे धन्यवाद भी बढाई सके ।¹⁶ इधी कठे आस्से हिम्मत नी हारदे; हालांकि आस्सा रा बाहरी माहणुपन खत्म भी हुन्दा जाहां, तेबे भी आस्सा रा अंदरला माहणुपन रोज रोज नंऊआं हुन्दा जाहां ।¹⁷ क्यूंकि आस्सा रा पल भरा रा हल्का दुःख आस्सा रे कठे बौहत ई खास होर अनन्त अतुलनीय महिमा पैदा करेया करहा ।¹⁸ होर आस्से ता देखिरी चीजा जो नी बल्कि अनदेखी चीजा जो देखदे रैंहें, क्यूंकि देखिरी चीजा थोड़े ई ध्याड़े री ई, पर अनदेखी चीजा सदा बर्णी रहीं ।

5¹ क्यूंकि आस्से जाणहां ऐं, कि जेबे आस्सा रा धरती रा डेरा सरीखा घर लुप्त हुई जाणा ता आस्सा जो परमेसरा री तरफा ले स्वर्गा मन्झ एक एहड़ा घर मिलणा, जो हाथा ले बणीरा घर नी बल्कि चिरस्थाई आ ।² एस सरीरा मन्झ ता आस्से रोहां धोहां ऐं, होर बडी इच्छा रख्हा ऐ; ताकि आपणे स्वर्गीय घरा जो पैहनी ले ।³ ताकि कपड़े पैहनणे ले आस्से नागें नी पाए जाए ।⁴ होर आस्से एस डेरे मन्झ रैहन्दे हुये बोझा हेठ दभि किन्हें रोहां पिटाहे; क्यूंकि आस्से उतारणा नी, बल्कि होर भी पैहनणा चाहें, ताकि से जो मरणहार आ से जीवना मन्झ डूबी जाये ।⁵ होर जिने आस्से एसी गल्ला रे कठे तयार किते से परमेसरा आ, जिने आस्सा जो बयाने मन्झ आत्मा भी दितरा ।⁶ इधी कठे आस्से हमेसा हिम्मत रख्हा ऐ होर ये जाणहां ऐं; कि जेबे तक आस्से सरीरा मन्झ रैंहयां ऐं, तेबे तक आस्से प्रभु ले लग ऐ ।⁷ क्यूंकि आस्से रूप देखी के नी, पर विस्वास रखी किन्हें चल्हा ऐ ।⁸ इधी कठे आस्से हिम्मत रख्हा ऐ, होर सरीरा ले लग हुई किन्हें प्रभु साउगी रैहणा होर भी खरा समझ्हा ऐ ।⁹ एस

वजहा ले आस्सा रे मना री इच्छा ये ई, कि चाहे साउगी रहे, चाहे लग रहे पर आस्से तेस जो खरे लगदे रहे ।¹⁰ क्यूंकि ये जरूरी आ, कि आस्सा सभी रा हाल मसीह रे न्याय आसना रे साम्हणें खुली जाए, ताकि हर एक आदमी आपणे आपणे भले बुरे कामा रा बदला जो तिने सरीरा रे ज़ीए कितिरे हो पाए ।¹¹ प्रभु रा डर मनी किन्हें आस्से लोका जो सम्झाहें होर परमेसरा पर आस्सा रा हाल जाहिर आ; होर मेरी आस ये ई, कि तुस्सा रे विवेका (मना) पर भी ये जाहिर हुएआ हूणां ।¹² आस्से फेरी भी आपणी बडाई तुस्सा रे साम्हणें नी करदे बल्कि आस्से आपणे बारे मन्झ तुस्सा जो घमण्ड करणे रा मौका देहां ऐं, ताकि तुस्से तिन्हा जो जबाब देई सको, जो मना पर नी, बल्कि दिखावटी गल्ला पर घमण्ड करहा ऐ ।¹³ अगर आस्से बेसुध ऐ, ता परमेसरा रे कठे ऐ; होर अगर स्याणें ऐं, ता तुस्सा रे कठे ऐ ।¹⁴ क्यूंकि मसीह रा प्यार आस्सा जो मजबूर करहा; इधी कठे कि आस्से ये समझ्हा ऐ, कि जेबे एक सभी रे कठे मरी गया ता सभ मरी गए ।¹⁵ होर से इधी कठे सभी रे कठे मरी गया, ताकि जो जिउन्दे ऐ, स्यों अगे जो आपणे कठे नी जीए बल्कि तेसरे कठे जो तिन्हा रे कठे मरेया होर दबारा जी उठेया ।¹⁶ ऐभे ले आस्सा कोई सरीरा रे मुताबक नी समझणां, होर अगर आस्से मसीह भी सरीरा रे मुताबक जाणेयां था, तेबे बी ऐभे ले आस्सा से एहड़ा नी समझणां ।¹⁷ इधी कठे अगर कोई मसीह मन्झ आ ता से नौई सृष्टि ई: पुराणी गल्ला बीती गई; देखा, स्यों सभ नौई हुई गई ।¹⁸ होर सब गल्ला परमेसरा री तरफा ले ई, जिने मसीह रे ज़ीए आस्सा जो आपणे साउगी मिलाई किन्हें, आस्सा जो मेल मिलापा री सेऊआ सौंपी दिती ।¹⁹ यानि परमेसरे मसीह मन्झ हुई किन्हें आपणे साउगी संसारा रा मेल मिलाप करी लया, होर तिन्हा रे पापा रा दोष तिन्हा पर नी लगाया होर तिने मेल मिलापा रा वचन आस्सा जो सौंपी दितेया ।²⁰ आस्से मसीह रे राजदूत ऐ; मानो परमेसर आस्सा रे ज़ीए सम्झाहां: आस्से मसीह री तरफा ले हुई किन्हें अरज करहा ऐ, कि परमेसरा साउगी मेल मिलाप करी लऊआ ।²¹ जो पापा ले अनजाण था, तेस जो ही तिने आस्सा रे कठे पाप ठैहराया, ताकि आस्से तेस मन्झ हुई किन्हें परमेसरा री धार्मिकता बर्णी जाए ।

6¹ होर आस्से जो तेसरे सैहकर्मिं ये आस्से ये अरज करहा ऐ, कि परमेसरा रा अनुग्रह जो तुस्सा पर हुईरा, तेस जो तुस्से बेकार नी जाणे देऊआ ।² क्यूंकि से ता बोल्ला, कि आपणी खुसी रे टैमा मन्झ मैं तुस्सा री मदद किती: देखा, ऐभे उद्धारा रा ध्याड़ा आ ।³ आस्से केसी गल्ला मन्झ ठोकर खाणे रा कोई भी मौका नी देन्दे, ताकि आस्सा री सेऊआ पर कोई दोष नी आए ।⁴ बल्कि हर गल्ला मन्झ परमेसरा रे सेवका साहीं आपणे खरे-गुणा जो जाहिर करहा ऐ, बडे सबर रखी किन्हें, दुःखा

मन्झ, गरीबी मन्झ, संकटा मन्झ । ⁵ कोड़े खाणे मन्झ, कैद हूणे मन्झ, दंगे फसादा मन्झ, मैहनत करणे मन्झ, जागदे रैहणे मन्झ, उपवास करणे मन्झ । ⁶ पवित्रता मन्झ, ज्ञाना मन्झ, धीरजा मन्झ, दया मन्झ, पवित्र आत्मा मन्झ । ⁷ सत्या रे वचना मन्झ, परमेसरा री सामर्था मन्झ; धार्मिकता रे हथियार दाएं बाएं लई किन्हें । ⁸ आदर होर निरादरा मन्झ, बेइज्जती होर ईज्जता मन्झ, अगर भरमाणे वाळे साहीं लघ्हा ऐ तेबे बी सच्चे ऐ । ⁹ गुमनाम समझे जाहें फेरी भी जाणे जाहें; मरीरे साहीं ऐं होर देखा जिऊन्दे ऐ; मारखाणे वाळे साहीं ऐं पर जानी ले नी मारे नी जांदे । ¹⁰ दुःख मनाणेवाळे साहीं ऐं, पर हमेसा खुसी झाहें, कंगाला साहीं ऐं, पर कईया जो अमीर बणाई देहां ऐं; होर एहडे ऐ जिहां जे आस्सा वाले कुछ नी हाया तेबे बी सब कुछ रख्हा ऐ । ¹¹ हे कुरिन्थियों, आस्से खुल्ही किन्हें तुस्सा साउगी गल्ला किती, आस्सा रा दिल तुस्सा वखा जो खुल्ही रा । ¹² तुस्सा रे कठे आस्सा रे मना मन्झ कुछ सकेती नी, पर तुस्सा रे ही मना मन्झ सकेती ई । ¹³ पर आपणे बाल बच्चे जाणी किन्हें हांऊ तुस्सा किन्हें बोल्हा, कि तुस्से भी तेता रे बदले आपणा दिल खोल्ही देआ । ¹⁴ अविश्वासिया साउगी विश्वासीया रा क्या नाता? क्यूंकि बुराई होर नेकी री क्या बराबरी? या प्रयासे होर न्ह्यारे री क्या संगति? ¹⁵ होर मसीह रा सैताना साउगी क्या रिस्ता? या विस्वासी साउगी अविस्वासी रा क्या मेल? ¹⁶ होर मूर्ति साउगी परमेसरा रे मंदरा रा क्या नाता? क्यूंकि आस्से ता जिन्दे परमेसरा रे मंदर ऐ, जेहड़ा परमेसरे बोल्या कि मां तिन्हा मन्झ मन्झ बसणा होर तिन्हा मन्झ चल्या फिरया करणा; होर मां तिन्हा रा परमेसर हूणां, होर तिन्हा मेरे लोक हूणां । ¹⁷ इधी कठे प्रभु बोल्हा, कि तिन्हा रे मंझा ले निकळा होर लग रहूआ; होर असुद्ध चीजा जो मत छुआ, तेबे मां तुस्से ग्रैहण करणे । ¹⁸ होर मां तुस्सा रा पिता हूणां, होर तुस्सा मेरे म्हटे होर म्हठिया हूणां: ये सर्वशक्तिमान प्रभु परमेसरा रा वचना आ ।

7 ¹ इधी कठे हे प्यारेयो जेबे कि ये प्रतिज्ञा आस्सा जो मिली चुकिरी, ता आऊआ, आस्से आपणे आप सरीर होर आत्मा री सब मलिनता सुद्ध करे; होर परमेसरा रा डर भय रखदे हुऐ पवित्रता जो सिद्ध करे । ² आस्सा जो आपणे दिला मन्झ जगहा देऊआ: आस्से ना ता केसी किन्हें अन्याय कितेया, ना कोई बिगाडेया, होर ना कोई ठगेया । ³ हांऊ तुस्सा जो दोषी ठेहराणे रे कठे ये नी बोल्दा: क्यूंकि हांऊ पैहले ई बोली चुकिरा, कि तुस्से आस्सा रे दिला मन्झ ऐहडे बसी गईरे कि आस्से तुस्सा साउगी मरणे होर जीणे रे कठे त्यार ऐ । ⁴ हांऊ तुस्सा किन्हें बडी हिम्मत रखी किन्हें बोल्या करहा; मुंजो तुस्सा पर बौहत घमण्ड आ: हांऊ सांति किन्हें भहरी गईरा; आपणे सारे दुःखा मन्झ हांऊ खुसी किन्हें भरपूर रैहयां । ⁵ क्यूंकि जेबे आस्से मकिदुनिया मन्झ

आए, तेबे भी आस्सा रे सरीरा जो चैन नी मिलेया, बल्कि आस्से चहुँ तरफा ले दुःख पाहें थे; बाहर लड़ाईया थी, होर मना अंदर डर था । ⁶ तेबे बी दुहीं जो सांति देणेवाळे परमेसरे तितुसा रे आऊणे पर आस्सा जो सांति दिती । ⁷ होर ना सिर्फ तेसरे आऊणे ले पर तेसरी तेस्सा सांति ले भी, जो तेस जो तुस्सा री तरफा ले मिली थी; होर तिने तुस्सा री लालसा, होर तुस्सा रे दुःख होर मेरे कठे तुस्सा री लगना रा सुसमाचार आस्सा जो सुणाया, जेस ले मुंजो होर भी खुसी हुई । ⁸ क्यूंकि अगर मैं आपणी पत्री ले तुस्से दुःखी किते, पर तेता ले हांऊ पछताया नी, जेहड़ा कि पैहले हांऊ पछताहां था क्यूंकि हांऊ देख्हा, कि तेस्सा चिठी ले तुस्सा जो दुःख ता हुआ पर से थोड़ी देरा रे कठे था । ⁹ ऐबे हांऊ खुसी झाहां पर इधी कठे नी कि तुस्सा जो दुःख पुजेया बल्कि इधी कठे कि तुस्से तेस दुःखा री वजहा ले मन फिराया, क्यूंकि तुस्सा रा दुःख परमेसरा री इच्छा रे मुताबक था, ताकि आस्सा री तरफा ले तुस्सा जो केसी गल्ला मन्झ नुक्सान ना पूजे । ¹⁰ क्यूंकि से दुःख जो परमेसरा देहां एक एहड़ा पश्चाताप पैदा करहा जेसरा नतीजा उद्धार हूहां होर जेस रे कठे पछताणा नी पउन्दा: बल्कि संसारिक दुःख मौत पैदा करहा । ¹¹ क्यूंकि देखा, ऐ दुःख जो परमेसरे दितेया, तेता ले तुस्सा जो कितना उत्साह, भोलेपना री कितनी प्रतिरक्षा होर रिस, होर, डर होर लालसा, होर धुन होर बदला लैणे रा विचार पैदा हुआ? तुस्से हर तरहा ले ये सिद्ध करी दितेया, ताकि तुस्से एस गल्ला मन्झ निर्दोष हो । ¹² फेरी भी मैं अगर तुस्सा जो लिखीरा था, से ना ता तेसरी वजहा ले लिख्या, जिने अन्याय कितेया, होर ना तेसरी वजहा ले जेस पर अन्याय कितेया गया, बल्कि इधी कठे कि तुस्सा रा उत्साह जो आस्सा रे कठे आ, से परमेसरा रे साम्हणें तुस्सा पर जाहिर हुई जाए । ¹³ एता ले आस्सा जो सांति मिली; होर आस्से तितुसा री खुसी साउगी होर भी ज्यादा खुस हुए क्यूंकि तुस्सा सभी री वजहा ले तेसरी आत्मा जो चैन मिल्या । ¹⁴ क्यूंकि अगर मैं तेसरे साम्हणें तुस्सा रे बारे मन्झ कुछ घमण्ड कितेया हो, ता हांऊ शर्मिंदा नी हुआ, बल्कि जिहां आस्से तुस्सा साउगी सब गल्ला सच सच बोली दिती थी, तिहां ई आस्सा रा घमण्ड जाहिर करणा तितुसा रे साम्हणें भी सच निखल्या । ¹⁵ होर जेबे तेस जो तुस्सा सभी रे आज्ञाकारी हूणे री याद आहूँआं ई, कि किहाँ तुस्से डरदे होर काम्दे हुए तेस किन्हें मुलाकात किती; ता तेसरा प्यार तुस्सा री तरफ होर भी ज्यादा बढ़दा जाहां । ¹⁶ मुंजो खुसी हूहां ई, कि तुस्सा री तरफा ले मुंजो हर गल्ला मन्झ हिम्मत हूहां ई ।

8 ¹ ऐबे हे भाईयो, आस्से तुस्सा जो परमेसरा रे तेस अनुग्रहा रा समाचार देहां ऐं, जो मकिदुनिया री कलीसिया पर हुईरा । ² कि दुःखा री बडी परीक्षा मन्झ तिन्हा री बडी खुसी होर बौहत गरीबी हूणे री वजहा ले तिन्हा री उदारता बौहत

बढ़ी गई।³ होर तिन्हा रे बारे मन्झ मेरी ये गवाही ई, कि तिन्हें आपणी सामर्थ भर बल्कि सामर्था ले भी बढ़ी किन्हें दितेया।⁴ तिन्हें बौहत आग्रह करी किन्हें पवित्र लोका री सेऊआ करणे मन्झ आस्सा रा सहयोग देणे रे कठे बार बार बौहत बिनती किती।⁵ तिन्हें, जेहडी आस्सा जो आस थी, तेहडी नी, बल्कि तिन्हें पैहले आपणे आपा जो प्रभु जो समर्पित करी दितेया, होर फेरी तिन्हें परमेसरा री इच्छा रे मुताबक आपणे आपा जो आस्सा जो देई दितेया।⁶ इधी कठे आस्से तितुसा ले अरज किती, कि जिहां तिने आपणे कामा री सुरुआत किती, तिहां ई एस अनुग्रहा रे कामा जो से पूरा करे।⁷ ता जिहां हर गल्ला मन्झ यानि- विश्वास, वचन, ज्ञान होर सब किस्मा रे यत्ना मन्झ, होर तेस प्यारा मन्झ, जो आस्सा किन्हें रख्हा ऐ, बढ़दे जाहें, तिहां ई एस दाना रे कामा मन्झ भी बढ़दे जाऊआ।⁸ ये हांऊ आज्ञा रे रूपा मन्झ नी बोल्या करदा, बल्कि दूजे लोका रे मना मन्झ तुस्सा रे कठे जो उत्साह आ तेस प्यारा री सच्चाई जो साबित करणे रे कठे हांऊ एहड़ा बोल्या करहा।⁹ तुस्से आस्सा रे प्रभु यीसू मसीह रा अनुग्रह जाणहां ऐं, कि से अमीर हुई किन्हें भी तुस्सा रे कठे कंगाल बणी गया ताकि तेसरे कंगाल हुई जाणे ले तुस्से अमीर हुई जाओ।¹⁰ होर ऐस गल्ला मन्झ मेरा विचार ये ई आ, क्यूंकि ये तुस्सा रे कठे खरा आ; पिछले साल तुस्से ना सिर्फ दान देणे री इच्छा मन्झ सभी ले अगे थे, बल्कि दान देणे मन्झ भी सभी ले अगे रहे।¹¹ इधी कठे ऐबे दान करणे री तेस्सा इच्छा जो पूरा करा; जो तुस्से करणे री ठानी थी तुस्से तेस्सा इच्छा जो तितनी ई लगना किन्हें पूरी करा जितनी लगना किन्हें तुस्से एता जो करणे री इच्छा किती थी।¹² क्यूंकि अगर दान देणे री लगन हो ता आदमी वाले जो कुछ हो तेता रे मुताबक ई तेसरा दान ग्रैहण भी हूं ना कि तेता रे मुताबक जो तेस वाले नी आ।¹³ ये नी, कि होरी जो चैन होर तुस्सा जो दुःख मिले।¹⁴ पर आस्सा री इच्छा ऐ ई कि तिन्हारे कमी घटी रे टैमा मन्झ तुस्सा री बढ़ती तिन्हा री जरूरते पूरी करे ताकि जरूरत पऊणे पर अगे चली किन्हें तिन्हा री बढ़ती भी तुस्सा री कमी घटी दूर करी सके ताकि बराबरी हुई जाए।¹⁵ जिहां लिखीरा, कि जिने बौहत बटोरेया तेस वाले कुछ ज्यादा नी रह्या होर जिने कम बटोरेया तेस वाले कुछ कम नी रह्या।¹⁶ होर परमेसरा रा धन्यावाद हो, जिने तुस्सा रे कठे तेहड़ा ई जोस तितुसा रे दिला मन्झ पाई दितेया।¹⁷ होर तिने आस्सा रा उपदेस मनी लया बल्कि होर भी ज्यादा उत्साही हुई किन्हें से आपणी इच्छा ले तुस्सा वाले गया।¹⁸ होर आस्से तेस साउगी से भाई भेज्या जेसरा नांऊ सुसमाचारा रे बारे मन्झ सब कलीसिया मन्झ फैलही गईरा।¹⁹ होर सिर्फ इतना ई नी, बल्कि तेस जो कलीसिया रे ज़ीए नियुक्त भी कितेया गया ताकि ऐस दाना रे कामा रे कठे से आस्सा साउगी चले होर आस्से ये सेऊआ

इधी कठे करहा ऐ, ताकि प्रभु री महिमा होर आस्सा रे मना री त्यारी जाहिर हुई जाए।²⁰ आस्से ऐस गल्ला मन्झ सावधान रह्यां ऐं, ताकि ऐस उदारता रे कामा रे बारे मन्झ जेस री सेऊआ आस्से करहा ऐ, कोई आस्सा पर दोष नी लगाणे पाये।²¹ क्यूंकि आस्सा जो आपणी इज्जत बणाए रखणे री फिकर ई ना सिर्फ प्रभु रे साम्हणें बल्कि माहणु रे साम्हणें भी।²² होर आस्से तेस साउगी आपणा भाई भेजीरा, जेस जो आस्से घड़ी घड़ी परखी किन्हें बौहत उत्साही पाया; बल्कि ऐबे तुस्सा पर तेस जो बड़ा भरोसा आ, ऐस वजहा ले से होर भी ज्यादा उत्साही आ।²³ अगर कोई तितुसा रे बारे मन्झ पुछे, ता से मेरा साथी, होर तुस्सा रे कठे मेरा सैहकर्मी आ, होर अगर आस्सा रे भाईया रे बारे मन्झ पूछे, ता स्यों कलीसिया रे भेजिरे होर मसीह री महिमा ऐ।²⁴ इधी कठे तुस्से आपणा प्यारा होर आस्सा रा से घमंड जो तुस्सा रे बारे मन्झ आ कलीसिया रे साम्हणें तिन्हा जो सिद्ध करी किन्हें दसा।

9¹ ऐबे तेस सेऊआ रे बारे मन्झ जो पवित्र लोका रे कठे किती जाहीं, मुंजो तुस्सा जो लिखणा जरूरी नी आ।² क्यूंकि हांऊ तुस्सा रे मना री त्यारी जो जाणहां; जेस री वजहा ले हांऊ तुस्सा रे बारे मन्झ मकिदुनिया रे साम्हणें घमण्ड दस्हा, कि अखाया रे लोक ता पिछले एक साला ले त्यार ऐ, होर तुस्सा रे उत्साहा री वजहा ले कई होर भी उत्तेजित हुए।³ बल्कि मैं भाई इधी कठे भेजे, कि आस्से जो घमण्ड तुस्सा रे बारे मन्झ दस्या, से एस गल्ला मन्झ बेकार ना ठैहरे; बल्कि जेहड़ा मैं बोल्या; तिहां ई तुस्से भी त्यार रहो।⁴ एहड़ा नी हो, कि अगर कोई मकिदुनी मेरे साउगी आए, होर तुस्सा जो त्यार नी पाए, ता क्या जाणे, एस भरोसे री वजहा आस्से (ये नी बोल्दे कि तुस्से) सर्मिन्दा हो।⁵ इधी कठे मैं भाईया साउगी बिनती करणा ठीक समझ्या ताकि स्यों आस्सा ले पैहले तुस्सा वाले जाए, होर तुस्सा री उदारता रा फल जेस रे बारे मन्झ पैहले ले ई वचन दितिरा था, त्यार करी रखे, ताकि ये जोर जबरदस्ती ले नी बल्कि उदारता रे फला साहीं त्यार हो।⁶ बल्कि गल ता ये ई, कि जो कम बोहां तेस कम ई काटणा; होर जो ज्यादा बोहां, तेस ज्यादा ई काटणा।⁷ हर एक जन बगैर कुड़कुड़ाए या बगैर केसी मजबूरी रे उतना ई दे जितना तिने मना मन्झ सोचिरा, क्यूंकि परमेसर खुसी किन्हें देणेवाळे साउगी प्यार रख्हा।⁸ होर परमेसर तुस्सा पर हर किस्मा रा अनुग्रह भरपूरी किन्हें देई सकहा जेस ले हर गल्ला मन्झ होर हर टैम, सब कुछ, जो तुस्सा रे कठे जरूरी हो, तुस्सा वाले रहे, होर हर एक खरे कामा रे कठे तुस्सा वाले बौहत कुछ हो।⁹ जिहां कि सास्त्रा मन्झ लिखीरा, जिने जे मुफ्ता मन्झ बांडेया, तिने कंगाला जो दान दितेया, तेसरा धर्म हमेसा बणी रह्या।¹⁰ से परमेसर ई आ जो बोणे वाळे जो बीज, होर खाणे वाळे जो रोटी देहां तेस ई तुस्सा जो बीज देणा, होर तेस ई से

बढ़ाणा; होर तेस ले ई तुस्सा रे धर्मा री खेती फलणी फुलणी ।
 11 ताकि तुस्से हर गल्ला मन्झ सब किस्मा री उदारता रे कठे जो आस्सा रे ज्रीए परमेसरा रा धन्यवाद करवाहीं, धन्यवाद करदे जाओ । 12 क्यूंकि ऐस सेऊआ जो पूरा करणे ले, ना सिर्फ पवित्र लोका री घटी पूरी हूहां ई, बल्कि लोका री तरफा ले परमेसरा रा बौहत ज्यादा धन्यवाद हूहां । 13 क्यूंकि तुस्सा री ऐस सेऊआ ले जो सबूत जाहिर हूहां, तेता ले पवित्र लोका परमेसरा री स्तुति करणी, क्यूंकि तुस्से मसीह रे सुसमाचारा जो मनी किन्हें तेसरे अधीन रह्यां ऐं, होर तिन्हा री, होर सभी री मदद करणे मन्झ उदारता जाहिर करदे रह्यां ऐं । 14 होर तिन्हा तुस्सा रे कठे प्रार्थना करदे हुए; होर तुस्सा पर परमेसरा रा बौहत ज्यादा अनुग्रह हूणे री वजहा ले, तिन्हा तुस्सा किन्हें मिलणे री बौहत इच्छा जाहिर करणी । 15 परमेसरा रा तेसरे तेस वरदाना रे कठे जेसरा बखान नी हुई सकदा, धन्यवाद हो ।

10 ¹ हांऊ से ई पौलुस आ जो तुस्सा रे साम्हणें दीन आ, पर पीठ पीछे तुस्सा रे बारे मन्झ हिम्मत करहा; तुस्सा जो मसीह री नम्रता, होर कोमलता री वजहा ले सम्झाहां । ² हांऊ ये अरज करहा, की तुस्सा रे साम्हणें मुंजो बगैर डरे हिम्मत नी करणी पई जाए; जिहां मैं कईया पर जो आस्सा जो सरीरा रे मुताबक चलणेवाळे सम्झहा ऐ, बहादुरी दसणे रा विचार करहा । ³ क्यूंकि अगर आस्से सरीरा मन्झ चल्हा ऐ फिरहा ऐ, तेबे भी सरीरा रे मुताबक नी लडदे । ⁴ क्यूंकि आस्सा री लडाई रे हथियार सारीरिक नी ऐ, पर गढा जो ढाई देणे रे कठे परमेसरा रे ज्रीए सामर्थी बणाए गईरे । ⁵ इधी कठे आस्से कल्पना जो, होर हर एक ऊंची गल्ला जो, जो परमेसरा री पैहचाणा रे विरोधा मन्झ उठ्हा ई, खंडन करहा ऐ; होर हर एक भावना जो कैद करी किन्हें मसीह रा हुक्म मनणे वाळा बणाई देहां ऐं । ⁶ होर जेबे तुस्सा री आज्ञाकारिता पूरा हुई जाए, ता आस्से भी हर एक किस्मा री अनाज्ञाकारिता जो सजा देणे रे कठे त्यार ऐ । ⁷ तुस्से इन्हा गल्ला जो देख्हा ऐ, जो हाखिया रे साम्हणें हो, अगर केसी रा आपणे ऊपर ये भरोसा हो, कि हांऊ मसीह रा आ, ता से ये भी जाणी ले, कि जिहां से मसीह रा आ, तिहां ई आस्से भी ऐ । ⁸ क्यूंकि अगर हांऊ तेस अधिकारा रे बारे मन्झ होर भी घमण्ड दस्सुं, जो प्रभुए तुस्सा रे बिगाडने रे कठे नी पर बनाणे रे कठे आस्सा जो दितारा, ता ऐहडा करणे ले मां सर्मिन्दा नी हूणां । ⁹ ये सभ हांऊ इधी कठे बोल्हा, ताकि हांऊ चिठिया रे ज्रीए तुस्सा जो डराणेवाळा नी लगूं । ¹⁰ क्यूंकि मेरे वरोधी बोल्हा ऐ, कि पौलुसा री चिठिया ता गम्भीर होर प्रभावशाली ई; पर से सरीरा रा कमजोर होर ग्लाणे बोलणे मन्झ बौहत हल्का आ । ¹¹ पर एहडा बोलणे वाळे जो ये समझणा चाहिए, कि जिहां पीठ पीछे चिठिया मन्झ आस्सा रे वचन ऐ, तिहां ई तुस्सा रे साम्हणें आस्सा रे काम भी

हुणे । ¹² क्यूंकि आस्से तिन्हा कुछ लोका साउगी हिम्मत नी करदे जो आपणे आपा जो बौहत खास मन्हां ऐं, पर जेबे स्यों आपणे जो दूजे किन्हें नाप्हा ऐ, जो आपु मन्झ आपणी तुलणा करहा ऐ ये सभ करी किन्हें स्यों ये साबित करहा ऐ कि स्यों कितने वेवकूफ ऐ । ¹³ जो भी हो आस्सा आपणी हदा ले बाहर कधी घमण्ड नी करणा, बल्कि आस्सा तेस हदा तक घमण्ड करणा जो परमेसरे आस्सा रे कठे तय कितिरी, होर तेस हदा मन्झ तुस्से भी आई गईरे । ¹⁴ क्यूंकि आस्से आपणी हदा ले बाहर आपणे आपा जो बढ़ाणा नी चाहन्दे, जिहां कि तुस्सा तक नी पूजणे री दसा मन्झ हुंदा, बल्कि तुस्सा तक आस्से मसीह रा सुसमाचार सुणांदे हुए सभी ले पैहले पौहन्वे । ¹⁵ होर आस्से हदा ले बाहर होरी री मैहनता पर घमण्ड नी करदे; बल्कि आस्सा जो आस ई, कि जिहां जिहां तुस्सा रा विस्वास बढ़दा जाणा तिहां तिहां आस्सा आपणी सीमा रे मुताबक तुस्सा री वजहा ले होर भी बढ़दे जाणा । ¹⁶ ताकि आस्से तुस्सा री हदा ले अगे बढ़ी किन्हें सुसमाचार सुणाई सके, होर ये नी, कि आस्से होरी री हदा रे अंदर बणे बणाईरे कामा पर घमण्ड करे । ¹⁷ बल्कि जो घमण्ड करे, से प्रभु पर घमण्ड करे । ¹⁸ क्यूंकि जो आपणी बडाई करहा, से नी, बल्कि जेस री बडाई प्रभु करहा, तेस जो ई ग्रैहण कितेया जाहां ।

11 ¹ अगर तुस्से मेरी थोहड़ी मुर्खता सही लैंदे ता क्या ई खरा हुन्दा; पर हां, तुस्से मेरी सही भी लैहां ऐं । ² क्यूंकि हांऊ तुस्सा रे बारे मन्झ ईश्वरीय धुन लगाई रख्हा; इधी कठे कि मैं एक ई आदमी साउगी तुस्सा री गल लगाईरी, ताकि तुस्सा जो पवित्र कुंवारी साहीं मसीह जो सौंपी दूं । ³ बल्कि हांऊ डरहा कि जिहां सांपे आपणी च्लाकी किन्हें हवा बैहकाई, तिहां ई तुस्सा रे मन तेस्सा सिधाई होर पवित्रता किन्हें जो मसीह साउगी हुणी चाहिए केते भ्रष्ट नी किते जाए । ⁴ अगर कोई तुस्सा वाले आई किन्हें, केसी दुजे यीसू रा प्रचार करे, जेस रा प्रचार आस्से नी कितेया: या कोई होर आत्मा तुस्सा जो मिले; जो पैहले नी मिलिरा हो; या होर कोई सुसमाचार जो तुस्से पैहले नी मन्निरा था, ता तुस्सा रा सैहणा ठीक हुन्दा । ⁵ हांऊ ता समझ्हा, कि हांऊ केसी गल्ला मन्झ बड़े ले बड़े प्रेरिता ले कम नी आ । ⁶ अगर हांऊ बोलणे ग्लाणे मन्झ अनाडी आ, ताभी ज्ञाना मन्झ नी; एस गल्ला जो आस्से सब गल्ला मन्झ तुस्सा जो जाहिर करी दितेया । ⁷ क्या ऐता मन्झ मैं कुछ पाप कितेया; कि मैं तुस्सा जो परमेसरा रा सुसमाचार मुफ्त सुणाया; होर मैं आपणे आपा जो निउंआं करी दितेया, ताकि तुस्से ऊंचे किते जाओ? ⁸ मैं होर कलीसिया लुटी; यानि मैं तिन्हा ले मजदूरी लई, ताकि तुस्सा री सेऊआ करूं । ⁹ होर जेबे हांऊ तुस्सा साउगी था, होर मुंजो कुछ कमी हुई, ता मैं केसी पर भार नी पाया, क्यूंकि भाईये, मकिदुनिया ले आई किन्हें मेरी कमी घटी पूरी

किती: होर मैं हर गल्ला मन्झ आपणे आपा जो तुस्सा पर बोझ नी बणने दितेया, होर ना बणने देणा।¹⁰ अगर मसीह री सञ्चाई मेरे मन्झ ई, ता अखाया देसा मन्झ कोई मुंजो ऐस घमण्डा ले नी रोकी सक्दा।¹¹ किधियो? क्या इधी कठे कि हांऊ तुस्सा किन्हें प्यार नी रखदा? परमेसर ये जाणहां।¹² बल्कि जो हांऊ करेया करहा, मां तेहडा ई करदे रैहणां; ताकि जो लोक दाव तोप्ला ऐ, तिन्हा जो हांऊ दाव पाणे दूं, ताकि जेस गल्ला मन्झ स्यों घमण्ड करहा ऐ, तेता मन्झ स्यों आस्सा रे बराबर ठैहरे।¹³ क्युंकि ऐहडे लोक झूठे प्रेरित, होर धोखा धडी करणेवाळे, होर मसीह रे प्रेरिता रा रूप धरणेवाळे ऐ।¹⁴ होर ये कुछ हैरानी री गल नी ई क्युंकि सैतान आपु भी ज्योतिमर्य स्वर्गदुता रा रूप धारण करहा।¹⁵ होर अगर तेसरे सेवक भी धर्मा रे सेवका रा रूप धरे, ता कुछ बडी गल नी ई बल्कि तिन्हा रा अन्त तिन्हा रे कामो रे मुताबक हूणां।¹⁶ हांऊ दबारा बोल्ला, कोई मुंजो मुख नी समझे; नी ता मुख ई समझी किन्हें मेरी सही लऊआ, ताकि थोहडा सा हांऊ भी घमण्ड करूं।¹⁷ ऐबे हांऊ जो बोल्ला करहा, से प्रभु रे मुताबक नी पर मानो मुखता री वजहा ले बोल्ला करहा।¹⁸ जेबे कि कई लोक सरीरा रे मुताबक घमण्ड करहा ऐ, ता मां भी घमण्ड करणा।¹⁹ तुस्से ता समझदार हुई किन्हें खुसी किन्हें मूर्खा री सही लैहां ऐं।²⁰ क्युंकि जेबे तुस्सा जो कोई दास बणाई लैहां, या तुस्सा रा सोसण करहा, या तुस्सा जो केसी जाला मन्झ फसाई लैहां, या आपणे आपा जो तुस्सा ले बडा बणाहां, या तुस्सा रे मुंहा पर थप्पड मारहा, ता तुस्से तेसरी सही लैहां ऐं।²¹ हांऊ सर्मिन्दा हुई किन्हें बोल्ला करहा, एहडा लग्हा जिहां कि आस्से बौहत कमजोर ऐ; बल्कि जेस केसी गल्ला मन्झ कोई हिम्मत करहा (हांऊ मुखता मन्झ बोल्ला करहा) ता हांऊ भी हिम्मत करहा।²² क्या स्यों ई इब्रानी ऐ? हांऊ भी इब्रानी आ: क्या स्यों ई अब्राहमा रे वंसा रे ऐ? हांऊ भी अब्राहमा रे वंसा रा आ: क्या स्यों ई मसीह रे सेवक ऐ?²³ (हांऊ पागल हुई किन्हें बोल्ला) हांऊ तिन्हा ले बडी किन्हें आ! ज्यादा मैहनत करणे मन्झ; बार बार कैद हूणे मन्झ; कोडे खाणे मन्झ; बार बार मौता रा साम्हणा करणे मन्झ।²⁴ पांच बारी मैं यहूदियों रे हाथा ले उन्ताळी उन्ताळी कोडे खाधे।²⁵ तीन बार मैं बैता री मार खाधे; एक बार पत्थरवाह हुआ; तीन बार मेरा जहाज डुबेया; एक ध्याडा होर एक रात मैं समुद्रा मन्झ काटी।²⁶ मैं भयानक नदिया मन्झ, खूंखार डाकुआ मन्झ, आपणे लोका मन्झ; अन्यजातिया मन्झ; नगरा मन्झ; जंगला मन्झ; समुद्रा मन्झ; झूठे भाईया रे बीचा मन्झ कई यात्रा किती।²⁷ मैहनत होर कष्टा मन्झ; बार बार जागदे रैहणे मन्झ; भूख-प्यासा मन्झ; बार बार उपवास करणे मन्झ; ठंडा मन्झ होर नांगे रैहणे मन्झ।²⁸ होर ऐबे हांऊ एता ले ज्यादा क्या बोलूं; सब कलीसिया री चिन्ता हर रोज मुंजो दबाहीं।²⁹ केसी री

कमजोरी मुंजो कमजोर नी करी सकदी? केसी रे ठोकर खाणे ले मेरा जी नी दुखदा?³⁰ अगर घमण्ड करणा जरूरी आ, ता मां आपणी कमजोरी री गल्ला पर करणा।³¹ प्रभु यीसू रा परमेसरा होर पिता जो हमेसा धन्य आ, से जाणहां, कि हांऊ झूठ नी बोल्दा।³² दमिस्का मन्झ अरितास राजे री तरफा ले जो हाकम था, तिने मुंजो पकड़णे रे कठे दमिस्का रे नगरा पर पैहरा बैठाई रखिरा था।³³ होर मुंजो नगरा री चार दिवारी री ताकि ले टोकरी मन्झ बठ्याळी किन्हें हेठ तुआरी दितेया गया, होर हांऊ तेसरे हाथा ले बची निखल्या।

12 ¹हालांकि घमण्ड करणा ता मेरे कठे खरा नी आ तेबे बी करणा पहुँआं; पर मां प्रभु रे दितिरे दर्सन होर प्रकासना री चर्चा करदे रैहणां।² हांऊ मसीह मन्झ एक आदमी जो जाणहां, चौदह साल हुए कि ना जाणे देहसहित, ना जाणे देहरहित, परमेसर जाणहां, एहडा आदमी त्रीजे स्वर्गा तक उठाया गया।³ हांऊ ऐहडे आदमी जो जाणहां ना जाणे देहसहित, ना जाणे देहरहित परमेसर ई जाणहां।⁴ कि तेस जो स्वर्ग लोका मन्झ उठाया गया था, होर एहडी गल्ला सुणी जो बोलणे री नी ई; होर जिन्हा रा मुंह मन्झ ल्याऊणा आदमी जो ठीक नी आ।⁵ ऐहडे आदमी पर ता मां घमण्ड करणा, पर आपणे आपा पर आपणी कमजोरिया जो छाडी किन्हें, आपणे बारे मन्झ घमण्ड नी करणा।⁶ क्युंकि अगर हांऊ घमण्ड करणा चाहूँ भी ता मां मुख नी बणना, क्युंकि तेबे बी हांऊ सच बोल्ला करहा; तेबे बी हांऊ रुकी जाहां, एहडा नी हो, कि जिहां कोई मुंजो देख्हा, या मेरे ले सुणहां, मुंजो तेस ले बडी किन्हें समझे।⁷ होर इधी कठे ताकि हांऊ बौहत प्रकासना ले फूली नी जांऊ, मेरे सरीरा मन्झ एक कांडा चुभाया गईरा हालांकि सैताना रा एक दूत मुंजो दुःख देहां ताकि हांऊ घमण्ड नी करूं।⁸ ऐता रे बारे मन्झ मैं प्रभु ले तीन बारी बिनती किती, कि मेरे वाले ले ये कांडा दूर हुई जाए।⁹ होर तिने मेरे किन्हें बोल्ला, मेरा अनुग्रह तेरे कठे काफी आ; क्युंकि मेरी सामर्थ कमजोरी मन्झ सिद्ध हूहां ई; इधी कठे मां बडी खुसी किन्हें आपणी कमजोरी पर घमण्ड करणा, ताकि मसीह री सामर्थ मेरे पर छाया करदी रहे।¹⁰ ऐस वजहा ले हांऊ मसीह रे कठे कमजोरिया मन्झ, होर बेज्जती मन्झ, होर गरीबी मन्झ, होर उपद्रवा मन्झ, होर दुःखा मन्झ, खुस हूहां; क्युंकि जेबे हांऊ कमजोरी मन्झ हूहां, तेबे ई हांऊ बलबंत हूहां।¹¹ हांऊ मुख बणी गया, बल्कि तुस्से ई हांऊ मजबूर करी कितेया: तुस्सा जो ता मेरी तारीफ करणी चाहिए थी, क्युंकि अगर हांऊ कुछ भी नी आ, तेबे बी हांऊ तिन्हा बडे ले बडे प्रेरिता ले केसी गल्ला मन्झ कम नी आ।¹² केसी जो प्रेरित सिद्ध करणे वाळे आस्चर्य पूर्ण लक्षण नौखे काम, होर सामर्था रे काम भी तुस्सा रे बीचा मन्झ सब रखी किन्हें जाहिर किते गए।¹³ तुस्से केहडी गल्ला मन्झ होर कलिसिया ले कम

थे, सिर्फ एता मन्झ कि मैं तुस्सा पर आपणा बोझ नी पाया: मेरा ये अन्याय माफ करा।¹⁴ देखा, हांऊ त्रीजी बारी तुस्सा वाले आऊणे जो त्यार आ, होर मां तुस्सा पर कोई बोझ नी पाणा; क्यूंकि हांऊ तुस्सा री जायदाद नी, बल्कि हांऊ तुस्सा जो चाहां: क्यूंकि बाल बच्चेया जो मांऊ-बाबा रे कठे धन दौलत कठा नी करणा चाहिए, पर मांऊ-बाबा जो बाल बच्चेया रे कठे धन दौलत जोड़नी चाहिए।¹⁵ मां तुस्सा री आत्मा रे कठे बौहत खुसी किन्हें खर्च हुई जाणा, बल्कि आपु भी खर्च हुई जाणा: अगर हांऊ तुस्सा साउगी बौहत प्यार रख्हा, ता भला तुस्सा मेरे किन्हें कम प्यार रखणा? ¹⁶ एहड़ा हुई सक्हा, कि मैं तुस्सा पर कोई बोझ नी पाया हो, पर तुस्सा रा ये बोलणा कि हांऊ कपटी आ मैं च्लाकी करी किन्हें तुस्से फसाई लए। ¹⁷ जो लोक मैं तुस्सा वाले भेजे थे, क्या तिन्हा रे ज्रीए मैं छल करी किन्हें तुस्सा ले कोई फायदा उठाया? ¹⁸ तितुसा साउगी आस्सा रा एक भाई मैं तुस्सा वाले भेज्या, ता क्या तिने तुस्सा जो कोई धोखा दितेया? नीं क्या आस्से तेस ई निष्कपट आत्मा रे चलाए नी चल्दे रहे? क्या आस्से तिन्हा पद चिन्हा पर नी चल्दे रहे? ¹⁹ एबे तुस्से क्या ये सोचेया करहा ऐ कि एक लम्बे टैमा ले आस्से तुस्सा रे साम्हणें आपणा पक्ष रखेया करहा ऐ, पर आस्से ता परमेसरा रे साम्हणें मसीह रे अनुयायी रे रूपा मन्झ बोल्या करहा ऐ, होर हे प्यारे दोस्तो, जो कुछ आस्से बोल्या करहा ऐ तुस्सा री उन्नति रे कठे ई बोल्या करहा ऐ। ²⁰ क्यूंकि मुंजो डर आ, केते एहड़ा नी हो, कि हांऊ आई किन्हें जेहड़ा चाहां, तेहड़ा तुस्सा जो नी पाऊं; होर तुस्से भी मुंजो तेहड़ी स्थिति मन्झ नी पाओ, जेहड़ी स्थिति मन्झ तुस्से मुंजो देखणा चाहें, मुंजो डर आ कि तुस्सा मन्झ झगडा, जळणी, गुस्सा, विरोध, हिर्ख, चुगली, घमंड, होर बखेडे नी हो। ²¹ मुंजो डर आ कि जेबे हांऊ दबारा तुस्सा किन्हें मिलणे आऊँ ता तुस्सा रे साम्हणें मेरा परमेसर केते मुंजो सर्मिन्दा नी करे; होर मुंजो तिन्हा कईया रे कठे रोणा नी पई जाए, जिन्हें पैहले पाप किते, होर अपवित्रता, होर व्यभिचारा, होर भोगविलासा ले मन नी फिराया।

13¹ हांऊ त्रीजी बारी तुस्सा वाले आया करहा: साख्ख बोल्हा कि हर एक गल्ला री पुष्टि दो या तीन

गवाहिया पर किती जाणी। ² जेबे दूजी बारी हांऊ तुस्सा साउगी था, मैं तुस्सा जो चेतावनी दितिरी थी होर एबे जेबे हांऊ तुस्सा ले दूर आ; हांऊ तुस्सा जो दबारा चेतावनी देहां कि अगर हांऊ दबारा तुस्सा वाले आया ता जिन्हें पाप किते होर जो पाप करेया करहा ऐ स्यों होर बाकि लोक मां नी छाडणे। ³ तुस्से ता एता रा सबूत चाहें, कि मसीह मेरे मन्झ बोल्हा, जो तुस्सा रे कठे कमजोर नी आ; बल्कि तुस्सा मन्झ सामर्थी आ। ⁴ कमजोरी री स्थिति मन्झ तेस जो कूसी पर चढाया गया, तेबे बी परमेसरा री सामर्थी ले से जिउन्दा आ, ये भी सच्ची गल ई कि मसीह मन्झ आस्से कमजोर ऐ; पर परमेसरा री सामर्थी ले जो तुस्सा रे कठे ई, आस्सा तेस्सा सामर्थी साउगी जीणा। ⁵ आपणे प्राणा जो परखा, कि विस्वासा मन्झ तुस्से हाए कि नी हाए; आपणे आपा री जांच पड़ताळ करा, क्या तुस्से आपणे बारे मन्झ ये नी जाणदे, कि यीसू मसीह तुस्सा मन्झ आ? अगर ऐहड़ा नी आ ता तुस्से परीक्षा मन्झ निकम्मे निकळे। ⁶ पर मुंजो आस ई, कि तुस्सा जाणी लैणां, कि आस्से निकम्मे नी ऐ। ⁷ होर आस्से आपणे परमेसरा ले प्रार्थना करहा ऐ, कि तुस्से कोई बुराई देख्या करदे; इधी कठे नी, कि आस्से खरे लगे, पर इधी कठे ताकि तुस्से भलाई करी सको, चाहे आस्से निकम्मे ई ठैहरे। ⁸ क्यूंकि आस्से सच्चाई रे खिलाफ कुछ नी करी सकदे, पर सच्चाई रे कठे करी सक्हा ऐ। ⁹ जेबे आस्से कमजोर हूंां ऐं, होर तुस्से ताकतवर, ता आस्से खुस हूंां ऐं, होर ये प्रार्थना भी करहा ऐ, ताकि तुस्से सिद्ध हुई जाओ। ¹⁰ इधी कठे हांऊ तुस्सा रे पीठ पीछे ये गल्ला लिख्हा, ताकि हाजर हुई किन्हें मुंजो तेस अधिकारा रे मुताबक जो प्रभुए बिगाडने रे कठे नी पर बनाणे रे कठे मुंजो दितिरी, सख्ती किन्हें कुछ करणा नी पई जाए। ¹¹ सभी ले बादा मन्झ हांऊ बोल्हा, हे भाईयो, खुस रहुआ; सिद्ध बणदे जाऊआ; हिम्मत रखा; एक ही मन रखा; मिली जुली किन्हें रहुआ, होर प्यार होर सांति रे दाता परमेसरा तुस्सा साउगी हूंां। ¹² एक दूजे जो पवित्र चुम्बन देई किन्हें नमस्कार करा। ¹³ सब पवित्र लोक तुस्सा जो नमस्ते करहा ऐ। ¹⁴ प्रभु यीसू मसीह रा अनुग्रह होर परमेसरा रा प्यार होर पवित्र आत्मा री सहभागिता तुस्सा सभी रे साउगी हुन्दी रहे।

गलातियों

1 ¹ पौलुस प्रेरित जो ना माहणुआं री तरफा ले, ना माहणुआं रे ज्रीए नियुक्त हुएआ, पर यीसू मसीह होर परमेसर पिता रे ज्रीए नियुक्त हुएआ, जिने जे यीसू जो मरीरे मंझा ले जीऊन्दा कितेया था। ² होर सभ भाईया री तरफा ले जो मेरे साउगी ऐ, गलातिया री कलीसिया जो: ³ आस्सा रे पिता परमेसर होर प्रभु यीसू मसीह री तरफा ले दया होर सांति मिले, ⁴ जिने जे आस्सा रे पापा रे कठे आपणे आपा जो देई दितेया; कि आस्सा रे परमेसर होर पिता री इच्छा रे मुताबक, आस्सा जो एस आजके बुरे युगा ले छुड़ाई ले। ⁵ तेसरी महीमा हमेसा हमेसा हुन्दी रहे। ⁶ मुंजो हैरानी हुहां ई कि परमेसर जिने जे तुस्सा जो मसीहा री दया ले सादेया, होर तुस्से तेस जो इतने जल्दी केसी होर ई सुसमाचारा रे कठे छाडेया करहा ऐ। ⁷ पर दूजा सुसमाचार ता कोई हाया नी आ; पर गल ऐ ई, कि कितने एहडे ऐ, जो तुस्सा जो डराई देहां ऐं, होर मसीह रे सुसमाचारा जो बिगाड़ना चाहें। ⁸ पर अगर आस्से या स्वर्गा ले कोई दूत भी आई किन्हें तेस सुसमाचारा जो छाडी किन्हें जो आस्से तुस्सा जो सुणाया, कोई होर जे सुसमाचार तुस्सा जो सुणाये, ता से श्रापित हो। ⁹ जेहडा आस्से पैहले बोली चुकिरे, तेहडा ई आस्से एबे द्वारा बोल्हा ऐ, कि तेस सुसमाचारा जो छाडी किन्हें जेस जो तुस्से ग्रहण कितेया, अगर कोई लग जे सुसमाचार सुणाये, ता से श्रापित हो, एबे हांऊ माहणुआं जो मन्हा या परमेसरा जो? क्या हांऊ माहणुआं जो खुस करणा चाहं? ¹⁰ क्या हांऊ एबे माहणु री दया पाणा चाहं या परमेसरा री? या माहणुआं जो खुस करणे री कोसिस करेया करहा? अगर हांऊ एबे तक माहणुआं जो खुस करणे री कोसिस करदा रहेन्दा ता हांऊ परमेसरा रा दास नी हुन्दा। ¹¹ हे भाईयो, हांऊ चाहं कि तुस्से ये जाणी लो कि जो सुसमाचार मैं तुस्सा जो सुणाया था से माहणुआं री इच्छा ले नी था। ¹² क्यूंकि से मुंजो माहणुआं वखा ले नी मिलेया, होर ना मुंजो स्वाया पर यीसू मसीह गया, पर यीसू मसीह रे प्रकासना ले मिलेया। ¹³ यहूदी धर्मा मन्झ मेरे पैहलके चाल चलना रे बारे मन्झ तुस्से सुणी चुकिरे कि हांऊ परमेसरा री कलीसिया जो बौहत तंग करहा था होर नास करणे री कोसिस करहा था। ¹⁴ होर यहूदी धर्मा रा पालण करणे मन्झ हांऊ आपणे युगा रे यहूदीया ले अगे था; क्यूंकि मेरे पूर्वजा ले जो परम्परा मुंजो मिलिरी थी, होर तिन्हा रा पालण करणे मन्झ हांऊ बौहत उत्साही था। ¹⁵ पर परमेसरे, जिने जे मेरी माऊआ रे गर्भा ले ई मुंजो नियुक्त करी दितेया होर आपणी दया ले मुंजो सादी लया। ¹⁶ ताकि से मुंजो पर आपणे पुत्रा जो प्रगट

करे ताकि हांऊ अन्य जातिया रे बीचा मन्झ सुसमाचारा रा प्रचार करूं, तेस टैम मैं केसी माहणु री सलाह नी लई। ¹⁷ होर ना मैं तिन्हा वाले गया जो मेरे ले पैहले यरुश्लेमा मन्झ प्रेरित बणी रे थे, पर हांऊ झटपट अरबा जो चली गया; होर फेरी तेथी ले दमिश्का जो वाप्स चली गया। ¹⁸ फेरी तीन साला ले बाद हांऊ कैफा किन्हें मिलणे रे कठे यरुश्लेमा जो चली गया, होर तेस वाले हांऊ पन्द्रा ध्याडे तक रहैया। ¹⁹ पर प्रभु रे भाई याकुबा जो छाडी किन्हें हांऊ प्रेरिता मन्झा ले केसी होरी किन्हें नी मिलेया। ²⁰ परमेसर मेरा गुआह आ, कि जो गल्ला हांऊ तुस्सा जो लिख्हा, देखा, तेता मन्झ कोई झूठ नी आ। ²¹ एता ले बाद हांऊ सीरिया होर किलकिया रे प्रदेसा मंझ गया। ²² पर यहूदिया री कलीसिया जो मसीह मन्झ थी, तिन्हे मेरा मुंह कधी नी देखिरा था। ²³ स्यों मुंजो नी जाणदे थे। पर तिन्हे लोका जो बोल्दे सुणीरा था, कि जो पैहले आस्सा पर अत्याचार करहा था, से एबे तेस धर्मा रा सुसमाचार सुणाहां, जेस जो पैहले नास करहा था। ²⁴ होर मेरे बारे मन्झ स्यों परमेसरा री जै जै कार करहा ऐ थे।

2 ¹ चौदा साला ले बाद हांऊ बरनबासा साउगी यरुस्लेमा जो गया होर तितुसा जो साउगी लई गया। ² होर हांऊ दिव्य प्रकाशना री वजहा ले तेथी गईरा था, होर जो सुसमाचारा रा प्रचार हांऊ गैर यहूदिया रे बिचा मन्झ करहा; से ई प्रचार मैं एक निजी सभा रे बीचा मन्झ कलीसिया रे मुखिया जो सुणाया, हांऊ तेथी इधी कठे गया था कि परमेसरे मुंजो दस्सेया था कि मुंजो तेथी जाणा चाहिए, ताकि जो काम मैं पिछले टैमा मन्झ कितिरा था, या जो एबे करेया करहा, से बेकार नी हुई जाए। ³ पर केसीए तितुसा जो, जो मेरे साउगी था, जेव्की से यूनानी हुणे पर भी तेस जो खतना करणे रे कठे मजबूर नी कितेया था। ⁴ होर ये तिन्हा झूठे भाईया री वजहा ले हुएया, जो लुकी छुपी किन्हें बड़ी गईरे थे, ताकि स्यों आस्सा री तेस अजादी रा जो मसीह यीसू मन्झ आस्सा जो मिलिरी, भेद लई किन्हें आस्सा जो दास बणाएं। ⁵ आस्से एक घडी रे कठे भी तिन्हा री गुलामी नी मन्नी, इधी कठे कि सुसमाचारा री सच्चाई तुस्सा मन्झ बणी रहे। ⁶ पर जो लोक इज्जतदार समझे जाहें थे, तिन्हा ले मुंजो कुछ नी मिलेया; स्यों केहडे थे एता ले मुंजो कोई फर्क नी पऊन्दा, परमेसर केसी रा भेदभाव नी करदा। ⁷ पर एता ले उल्टा जेबे तिन्हे देख्या, कि जीहां खतना कितिरे लोका रे कठे सुसमाचारा रा काम पतरसा जो दितिरा, तिहां ई बगैर खतना कितिरे लोका रे कठे सुसमाचारा काम मुंजो दितीरा।

8 क्यूंकि जिने जे पतरसा रे ज्रीए खतना कितिरे लोका मन्झ प्रेरिताई रा काम बड़े प्रभावसाली ढंगा किन्हें करवाया, तिने ई मुंजो भी अन्य जातिया मन्झ प्रभावसाली काम करवाया । 9 होर जेबे तिन्हे तेस दया जो, जो मुंजो मिलिरी थी जाणी लया, ता याकुब होर कैफा, होर यहूजे जो कलीसिया रे खम्भे समझे जाहें थे, मुंजो होर बरनबासा जो दायँ हाथ देई किन्हें आपु किन्हें म्लाई लया, कि आस्से अन्य जातिया वाले जाए, होर स्यों खतना कितिरे लोका वाले । 10 सिर्फ ये बोल्या, कि आस्से कंगाला री देख भाल करे, होर एस ई काम करणे रे कठे हांऊ आपु भी कोसिस करेया करहा था । 11 पर जेबे कैफा अन्ताकिया मन्झ आया ता मैं तेसरे साम्हणे तेसरा बरोध कितेया, क्यूंकि से दोषी था । 12 क्यूंकि याकुबा रे एथी कुछ लोका रे आऊणे ले पैहले से अन्य जातिया साउगी खाहां पिहां था, पर जेबे स्यों आए, ता खतना कितिरे लोका रे डरा रे मारे से पीछे हटदा लगेया होर किनारा करदा लगेया । 13 होर तेस साउगी बाकी यहूदिये भी धोखा कितेया, एथी तक कि बरनबास भी तिन्हारे धोखे मन्झ पई गया । 14 पर जेबे मैं देख्या, कि स्यों सुसमाचारा री सच्चाई पर सीधी चाल नी चल्दे, ता मैं सभी रे साम्हणे कैफा किन्हें बोल्या; कि जेबे तू यहूदी हुई किन्हें अन्य जातिया साहीं चाल चल्हा आ, होर यहूदिया साहीं नी; ता तू अन्य जातिया जो यहूदिया साहीं चाल चलणे रे कठे कि बोल्ला? 15 आस्से जो जन्मजात यहूदी ऐ, होर पापी अन्य जातिया मन्झा ले नी ऐ । 16 तेबे भी ये जाणी किन्हें कि माहणु व्यवस्था रे कामा ले नी, पर सिर्फ यीसू मसीह पर विस्वास करणे ले धर्मी बणहां, आस्से आपु भी मसीह यीसू पर विस्वास कितेया, कि आस्से व्यवस्था रे कामा ले नी पर मसीह पर विस्वास करणे ले धर्मी बणे; इधी कठे कि व्यवस्था रे कामा ले केसी प्राणीया धर्मी नी बणना । 17 आस्से जो मसीह मन्झ धर्मी बणना चाहें, अगर आपु ई पापी निकळे ता क्या मसीह पापा रा दास आ? कधी नी । 18 क्यूंकि जो कुछ मैं ढाळी दितेया, अगर तेता जो दबारा बणाहां, ता आपणे आपा जो अपराधी बणाहां । 19 क्यूंकि हांऊ व्यवस्था रे ज्रीए व्यवस्था रे कठे मरी गया, ताकि परमेसरा रे कठे जी सकूं । 20 मुंजो मसीह साउगी क्रूसा पर चढाई दितिरा, होर एबे हांऊ जीऊन्दा नी रह्या, पर मसीह मेरे मन्झ जीऊन्दा आ; होर एबे हांऊ सरीरा मन्झ जो जीऊन्दा आ, ता सिर्फ तेस विस्वासा ले जीऊन्दा आ, जो परमेसरा रे पुत्रा पर आ, जिने मेरे किन्हें प्यार कितेया, होर मेरे कठे आपणे आपा जो देई दितेया । 21 हांऊ परमेसरा री दया जो बेकार नी ठेहरांदा, क्यूंकि अगर व्यवस्था रे ज्रीए धार्मिकता हुन्दी ता मसीह रा मरणा बेकार हुन्दा ।

3 हे वेवकूफ गलातियो, तुस्सा पर कुणे जादू करी दितेया? तुस्सा री हाखिया रे साम्हणे ता यीसू मसीह जो क्रूसा पर चढाया था । 2 हांऊ तुस्सा ले सिर्फ ये जाणना चाहें, कि

तुस्से आत्मा जो, क्या व्यवस्था रे कामा ले, या सुसमाचारा पर विस्वास करणे ले पाया? 3 तुस्से इतने वेवकूफ ऐ कि आत्मा ले सुहुरू करी किन्हें एबे सरीरा रे मुताबक अंत करणा? 4 क्या तुस्से इतना दुःख इहां ई भोग्या? उम्मीद हाई कि स्यों बेकार नी थे । 5 इधी कठे जो तुस्सा जो आत्मा दान करहा होर तुस्सा मन्झ सामार्था रे काम करहा, से क्या व्यवस्था रे कामा ले या विस्वासा रे सुसमाचारा ले एहड़ा करहा । 6 अब्राहमे ता परमेसरा पर विस्वास कितेया होर ये तेसरे कठे धार्मिकता गिणी गई । 7 ता ये जाणी लऊआ, कि जो विस्वास करणे वाळे ऐ, स्यों ई अब्राहमा री सन्तान ऐ । 8 साख्रा मन्झ पैहले ई दस्सी दितिरा था, कि परमेसरा अन्य जातिया जो भी तिन्हारे विस्वासा रे कारण धर्मी ठेहराणा, पैहले ले ई अब्राहमा जो ये सुसमाचार सुणाई दितिरी था, कि तुध मन्झ सभ जातिया आसीष पाणी । 9 इधी कठे जो लोक विस्वास करहा ऐ, स्यों अब्राहमा साउगी आशीर्वाद पाहें । 10 इधी कठे जितने लोक व्यवस्था रे कामा पर भरोसा रख्हा ऐ, स्यों सभ श्रापा रे अधीन ऐ, क्यूंकि लिखिहारा, कि जो कोई व्यवस्था री ताबा मन्झ लिखी री सभ गल्ला जो करणे मन्झ अटल नी रहन्दा, से श्रापित आ । 11 एबे ये गल बिल्कुल साफ हुई गई कि व्यवस्था रे विधाना रा पालन करणे ले परमेसरा रे साम्हणे कोई भी धर्मी नी बणदा । 12 पर व्यवस्था रे विधाना रा विस्वासा साउगी कुछ लैणा देणा नी आ; पर जो तेसरी गल्ला रा पालन करघा, तेस तिन्हा री वजहा ले जिऊन्दे रहणा । 13 मसीह जो आस्सा रे कठे श्राप बणेया, आस्सा जो मुले लई किन्हें व्यवस्था रे श्रापा ले छुड़ाया, क्यूंकि लिखीरा, जो कोई लकड़ी प्र्याहले लटकाया जाहां से श्रापित आ । 14 ये इधी कठे हुएया, कि अब्राहमा री आसीष मसीह यीसू मन्झ अन्य जातिया तक पूजे, होर आस्से विस्वासा रे ज्रीए तेस आत्मा जो पाई ले, जेसरी प्रतिज्ञा की गईरी । 15 हे भाईयो, हांऊ माहणुआं रे रीति रे मुताबक बोल्ला, कि जेबे केसी माहणु रा करार पक्का हुई जाहां, ता ना तेस जो कोई टाळहा होर ना तेस मन्झ कुछ बढ़ाहां । 16 तिहां ई प्रतिज्ञा अब्राहम होर तेसरे वंसा किन्हें की गईरी थी, साख्र ये नी बोल्दा, होर तेसरे वंसजा जो; अगर एहड़ा हुन्दा ता बौहता रे कठे चिन्ह हुंदा, पर साख्रा मन्झ एक वचना रा इस्तेमाल हुईरा; साख्र बोल्हा, “तेरे वंसजा जो” जो मसीह आ । 17 मेरा मतलब ये आ कि जेस करारा जो परमेसरे पैहले ले ई पक्का करी दितिरा था, तेता जो चार सौ तीह साल बाद आऊणा वाळा विधान नी बदली सकदा होर ना ही तेसरी प्रतिज्ञा जो बेकार करी सकहा । 18 क्यूंकि अगर उत्तराधिकार व्यवस्था रे विधाना ले मिलिरा ता तेस फेरी प्रतिज्ञा पर नी टिकणा, पर परमेसरे अब्राहमा जो ये उत्तराधिकार प्रतिज्ञा रे रूपा मन्झ दितेया । 19 ता फेरी व्यवस्था री क्या जरूरत ई? व्यवस्था ता पापा री वजहा ले बादा मन्झ

दी गई, कि ते बंसा रे आऊणे तक रहे, जेसरी प्रतिज्ञा की गईरी थी; होर व्यवस्था रा विधान ता एक एक विचौले रे रूपा मन्झ मूसा री सहायता ले स्वर्गदूता रे ज़ीए दी गई।²⁰ विचौला ता कम से कम दोआ रे बीच हुंहां, पर परमेसर ता एक ई आ।²¹ ता क्या व्यवस्था रा विधान परमेसरा री प्रतिज्ञा रे ब्रोधा मंझ आ? कधी नी, क्यूंकि अगर एहड़ी व्यवस्था रा विधान दितीरा हुन्दा जो लोका मन्झ जीन्दगी देई सकदा, ता व्यवस्था रा विधान ई परमेसरा रे साम्हणे धार्मिकता जो सिद्ध करणे रा साधन बणी जांदी।²² पर पवित्र साख्रे सभी जो पापा रे अधीन करी दितिरा, ताकि से प्रतिज्ञा जेसरा आधार यीसू मसीह पर विस्वास करणा आ, विस्वास करणे वाळे रे कठे पूरी हुई जाए।²³ पर एस विस्वासा रे आऊणे ले पैहले, आस्सा जो व्यवस्था रे विधाना री देखरेखा मन्झ, एस आऊणे वाळे विस्वासा रे प्रगट हुणे तक, बंदी रे रूपा मन्झ रखी गईरा।²⁴ इधी कठे मसीह तक पहुन्चाणे रे कठे व्यवस्था आस्सा री शिक्षक हुई, कि आस्से विस्वासा ले धर्मी बणे।²⁵ पर जेबे विस्वास आई चुकेया, ता आस्से एबे शिक्षका रे अधीन नी रहे।²⁶ क्यूंकि तुस्से सभ तेस विस्वास करणे रे ज़ीए जो मसीह यीसू पर आ, परमेसरा री संतान ऐ।²⁷ होर तुस्सा मंझा ले जितने लोके मसीह मन्झ बसिस्मा लईरा तिन्हे मसीह जो पैहनी लईरा।²⁸ एबे ना कोई यहूदी रैहया होर ना यूनानी; ना कोई दास, ना अजाद; ना कोई मर्ध, ना जनाने; क्यूंकि तुस्से सभ मसीह मन्झ एक ऐ।²⁹ होर अगर तुस्से मसीह रे ऐ, ता अब्राहमा रे वंस होर प्रतिज्ञा रे मुताबक वारिस भी ऐ।

4¹ हांऊ ये बोल्हा, कि वारस जेबे तक बच्चा आ, जेबकी से सभ चीजा रा मालक आ, तेबे बी तेस मन्झ होर दासा मन्झ कुछ फर्क नी आ।² पर पिता रे तय कितिरे टैमा तक से रक्षा करणे वाळे होर देखभाल करणे वाळे रे बसा मन्झ रैहयां³ तिहां ई आस्से भी, जेबे बच्चे थे, ता संसारा री आदि शिक्षा रे बसा मन्झ हुई किन्हे दास बणी रे थे।⁴ पर जेबे टैम पूरा हुएया, ता परमेसरे आपणे पुत्रा जो भेज्या, जो जनाने ले जम्मेया, होर व्यवस्था रे अधीन जम्मेया।⁵ ताकि से व्यवस्था रे अधीन माहणुआं जो अजाद करी सके, होर आस्से परमेसरा रे गोद लईरे बच्चे बणी सके।⁶ होर फेरी तुस्से ता परमेसरा रे म्हठे ऐ, इधी कठे परमेसरे आपणे पुत्रा री आत्मा जो, जो हे अब्बा, हे पिता बोली किन्हे पुकार्हा, आस्सा रे दिला मन्झ भेजिरा।⁷ इधी कठे तू एबे दास नी आ, पर पुत्र आ; होर जेबकी तू पुत्र आ, ता परमेसरे तू आपणा वारस भी बणाया।⁸ पैहले तुस्से लोक जेबे परमेसरा जो नी जाणदे थे ता तुस्से लोक देऊआ रे दास थे, जो स्वभाव से ई परमेसर नी ऐ।⁹ पर ऐबे तुस्से परमेसरा जो पैहचाणी लया बल्कि परमेसरे तुस्से पैहचाणी लये, ता तिन्हा बगैर मतलबा री होर बेकार आदि शिक्षा वखा जो किधियो फिरया करहा ऐ, क्या

तुस्से द्वारा तिन्हारे दास हुणे चाहें? ¹⁰ तुस्से खास ध्याडे होर म्हीने होर मौसमा होर साला जो म्नान्दे लगी गईरे। ¹¹ हांऊ तुस्सा रे बारे मन्झ डरहा, केते एहडा नी हो, कि जो मैहनत मैं तुस्सा रे कठे कितिरी से बेकार हुई जाए। ¹² हे भाईयो, हांऊ तुस्सा ले अरज करहा, कि तुस्से मेरे साहीं हुई जाओ; क्यूंकि हांऊ भी तुस्सा साहीं आं, तुस्से मेरा कुछ नी बिगाडी रा। ¹³ पर तुस्से जाणहां ऐं, कि मैं पैहली बार तुस्सा जो आपणे सरीरा री कमजोरी री वजहा ले सुसमाचार सुणाया। ¹⁴ होर तुस्से मेरे सरीरा री दसा जो, जो तुस्सा री परीक्षा री वजहा थी, तुच्छ नी जाणेया; ना तिने नफरत किति; होर परमेसरा रे दूता साहीं बल्कि मसीहा साहीं मुंजो ग्रैहण कितेया। ¹⁵ ता से तुस्सा री खुसी रा क्या हुआ? हांऊ तुस्सा रे कठे आपु ई एस गल्ला रा गुआह आ कि अगर हुई सकदा, ता तुस्से आपणी हाखिया काठी किन्हे मुंजो देई देंदे। ¹⁶ ता क्या तुस्सा किन्हे सच बोलणे री वजहा ले हांऊ तुस्सा रा बैरी हुई गईरा। ¹⁷ स्यों तुस्सा जो दोस्त ता बनाणा ता चाहें, पर खरी इच्छा ले नी; पर तुस्सा जो लग करणा चाहें, कि तुस्से तिन्हा जो दोस्त बणाई लो। ¹⁸ पर ये भी खरा आ, कि खरी गल्ला मन्झ हर टैम दोस्त बणाणे री कोसिस किति जाए, ना सिर्फ तेस टैम, जेबकी हांऊ तुस्सा साउगी रैहयां। ¹⁹ हे मेरे बच्चेयो, जेबे तक तुस्सा मन्झ मसीहा रा रूप नी बणी जाए, तेबे तक हांऊ तुस्सा रे कठे बच्चा जणने री साहीं पीडा सैहां। ²⁰ इच्छा ता ये हुहां ई कि हांऊ एबे तुस्सा वाले आई किन्हे लग तरहा ले गल्ला करूँ, क्यूंकि हांऊ तुस्सा रे कठे दुविधा मंझ आ। ²¹ तुस्से जो व्यवस्था रे अधीन हुणा चाहें, मेरे किन्हे बोला, क्या तुस्से व्यवस्था री नी सुणदे? ²² ये लिखीरा, कि अब्राहमा रे दो म्हठे हुए; एक दासी ले, होर एक अजाद जनाने ले। ²³ पर जो दासी ले हुआ, से सरीरा री रीति रे मुताबक हुएया, होर जो अजाद जनाने ले हुएया, से प्रतिज्ञा रे मुताबक जम्मेया। ²⁴ इन्हा गल्ला मन्झ एक अर्थ आ, ये जनाने दो वाचा री प्रतीक ई; एक वाचा ता सिनै पहाडा ले मिली थी जेस्सा ले गुलाम ई जम्मे, होर से हाजिरा ई। ²⁵ होर हाजिरा एबे अरब मन्झ सिनै पहाडा रा प्रतीक आ, क्यूंकि से आपणे बच्चेया साउगी गुलामी मन्झ ई। ²⁶ पर ऊपरला यरुस्लेम अजाद आ, होर से आस्सा री माऊ ई। ²⁷ क्यूंकि ये लिखीरा, कि हे बाँझ, तू नन्द कर, क्यूंकि तैं कोई नी जणेया; तू जो बच्चे जणने री पीडा नी जाणदी, खुसी रे मारे जै जै कार कर, क्यूंकि सुहागना री सन्ताना ले जो छाडी गईरी तेस्सा री संताना बौहत ज्यादा ई। ²⁸ हे भाईयो, आस्से इसहाका साहीं प्रतिज्ञा री संतान ई। ²⁹ पर तेस टैम से जेहडा सारीरिक दसा रे अधीन जम्मेया, से आत्मा रे मुताबक जम्मिरे जो स्ताहां था, तेहडा ई एबे बी हुहां। ³⁰ पर पवित्र साख्र क्या बोल्हा? दासी होर तेस्सा रे पुत्रा जो काठी दे, क्यूंकि दासी रा

पुत्र अजाद जनाने रे पुत्रा साउगी वारस नी हुणा ।³¹ इधी कठे हे भाईयो, आस्से दासी रे नी पर अजाद जनाने री संतान ऐ ।

5¹ मसीहे अजादी रे कठे आस्सा जो अजाद कितिरा; इधी कठे एता मन्झ मजबूत रहया, होर व्यवस्था रे विधाना रे बन्धना मन्झ द्वारा देख्या जोश्रदे ।² देखा, हांऊ पौलुस तुस्सा किन्हें बोल्हा, कि अगर खतना करान्धे, ता मसीहा ले तुस्सा जो कुछ फायदा नी हुणा ।³ फेरी भी हांऊ खतना कराने वाळे जो जताई देहां, कि तेस जो सारी व्यवस्था मनणी पऊणी ।⁴ तुस्से जो व्यवस्था रे ज्रीए धर्मी बणना चाहें, स्यों सभ मसीह ले दूर हुई गईरे होर परमेसरा री दया ले बाहर ऐ ।⁵ पर आस्से विस्वासा रे ज्रीए परमेसरा रे साम्हणे धर्मी स्वीकार किते जाणे री आस करहा ऐ ।⁶ होर मसीह यीसू मन्झ ना खतना कराने रा कोई महत्व आ, होर ना खतना नी कराने रा कुछ महत्व आ, पर सिर्फ विस्वासा रा महत्व आ जो प्यारा रे ज्रीए हुहां ।⁷ तुस्से ता भली भांति दोडेया करहा ऐ थे, एवे कुने तुस्से रोकी दिते, कि सच्चाई रा पालन ना करो ।⁸ एहड़ी सीख तुस्सा रे सादणे वाळे री तरफा ले नी ई ।⁹ थोहड़ा जे सीजणा ले गुन्धी रा पुरा आटा सीजी जाहां ।¹⁰ हांऊ प्रभु पर तुस्सा रे बारे मन्झ पूरा भरोसा रख्या, कि तुस्सा केसी दूजी विचारधारा जो नी मन्नणा; पर तुस्सा जो विचलित करणे वाळा चाहे कोई भी हो, तेस सजा पाणी ।¹¹ पर हे भाईयो, अगर हांऊ हल्ली तक खतने रा प्रचार करहा, ता मुंजो हल्ली तक किधीयो स्ताया जाहां? ता क्या कूसा री ठोकर जांदी रही? ¹² खरा हुन्दा, कि जो तुस्सा जो भटकाहें, खतना कराने रे साउगी साउगी स्यों आपणे आपा जो काटी दिते जांदे ।¹³ हे भाईयो, तुस्से अजाद हुणे रे कठे सादी गईरे पर एहड़ा नी हो, कि एसा अजादी जो सरीरा री इच्छा पूरी करणे रे साधन नी बणाऊआ; बल्कि प्यारा ले एक दूजे रे दास बणा ।¹⁴ क्यूंकि सारी व्यवस्था एस एक ई गल्ला मन्झ पूरी हुई जाहीं, कि तू आपणे पड़ोसी किन्हें आपणे साहीं प्यार कर ।¹⁵ पर अगर तुस्से एक दूजे जो दांदा किन्हें काट्हा ऐ होर चिरहा ऐ, ता सावधान रहुआ, कि एक दूजे रा सत्यनास नी करी दो ।¹⁶ पर हांऊ बोल्हा, कि आत्मा रे मुताबक चला, ता कधी तुस्सा सरीरा री लालसा या इच्छा पूरी नी करणी ।¹⁷ क्यूंकि सरीर आत्मा रे ब्रोधा मन्झ इच्छा करहा, होर ये एक दूजे रे वरोधी ऐ; ताकि जो तुस्से करणा चाहें से नी करणे पाओ ।¹⁸ होर अगर तुस्से आत्मा रे चलाये चल्हा ऐ, ता तुस्से व्यवस्था रे अधीन नी रहे ।¹⁹ सरीरा रे काम ता सुद्धे ऐ, यानि व्यभिचार, गंदे काम, लुचपन ।²⁰ मूर्ति पूजा, जादू टोणा, बैर भाव, झगडा, हीर्ख, जळनी, वरोध, फूट, दलबंदी या विधर्म ।²¹ डाह, मतवाळापन, रंगरलिया, होर इन्हा रे एहडे एहडे काम ऐ, इन्हा रे बारे मन्झ हांऊ तुस्सा जो पैहले ले बोली देहां जेहड़ा पैहले भी बोली चुकिरा, कि एहडे एहडे काम करणे वाळे

परमेसरा रे राजा रे वारस नी हुणे ।²² पर आत्मा रा फल प्यार, खुसी, सांति, धीरज, ²³ होर किरपा, भ्लाई, विस्वास, नम्रता, होर सबर आ; एहडे एहडे कामा रे खलाफ कोई नियम नी आ ।²⁴ होर जो मसीह यीसू रे ऐ, तिन्हे आपणे सरीरा जो लालसा होर अभिलाषा समेत कूसा पर चढाई दितिरा ।²⁵ अगर आस्से आत्मा रे ज्रीए जीऊन्दे आ, ता आत्मा रे मुताबक चले भी ।²⁶ आस्से घमंडी हुई किन्हें एक दूजे जो नी छेडे, होर ना एक दूजे किन्हें हिरख रखे ।

6¹ हे भाईयो, अगर कोई माहणु केसी पापा मन्झ पखड़ी जाए, ता तुस्से जो आत्मिक ऐ, बड़ी नम्रता साउगी एहडे लोका री सम्भाळ करे, होर आपणी भी चौकसी करे, कि तुस्से भी परीक्षा मन्झ नी पई जाए ।² तुस्से एक दूजे रा भार उठाऊआ, होर इहां करी किन्हें मसीह री व्यवस्था जो पूरी करा ।³ क्यूंकि अगर कोई कुछ नी हुणे पर भी आपणे आपा जो कुछ सम्झहा, ता आपणे आपा जो धोख्हा देहां ।⁴ पर हर एक आपणे ई कामा जो परखी ले, होर एक दूजे रे बारे मन्झ नी पर आपणे ई बारे मन्झ तेस जो घमंड करणे रा मौका मिलणा ।⁵ क्यूंकि हर एक माहणुआं आपणा ई बोझ उठाणा ।⁶ जो वचना री शिक्षा पाहां, से सभ खरी चीजा मन्झ स्वाणे वाळे साझी करे ।⁷ धोखा देख्या खांदे, परमेसरा रा मजाक नी उड़ाया जांदा, क्यूंकि माहणु जो कुछ बाहां, से तेस सरीरा रे ज्रीए विनासा री कटणी काटणी ।⁸ क्यूंकि जो आपणे सरीरा रे कठे बिज्हा, तेस सरीरा रे ज्रीए विनासा री कटणी काटणी; होर जो आत्मा रे ज्रीए बिज्हां, तेस आत्मा रे ज्रीए अनंत जिन्दगी री कटणी काटणी ।⁹ आस्से खरे काम करणे रे कठे हिम्मत नी छाडे; क्यूंकि अगर आस्से सुस्त नी पई जाए, ता आस्सा ठीक टैमा पर फसल काटणी ।¹⁰ इधी कठे जेथी तक मौका मिले आस्से सभी साउगी भलाई करे; खास करी किन्हें विस्वासी भाईया साउगी ।¹¹ देखा, मैं केहडे बडे बडे अक्षरा मन्झ तुस्सा जो आपणे हाथा ले लिखीरा ।¹² जितने लोक सारीरिक दिखाउआ करणा चाहें, स्यों तुस्सा रे खतना करवाने रे कठे दबाव पाहें, सिर्फ इधी कठे कि स्यों मसीह रे कूसा री वजहा ले नी सताए जाए ।¹³ क्यूंकि खतना कराने वाळे आपु ता व्यवस्था पर नी चल्दे, पर तुस्सा रा खतना इधी कठे कराना चाहें, कि तुस्सा री सारीरिक दसा पर घमण्ड करे ।¹⁴ पर एहड़ा नी हो, कि हांऊ केसी होर गल्ला रा घमंड करूं, सिर्फ आस्सा रे प्रभु यीसू मसीह रे कूसा रा जेस रे ज्रीए संसार मेरी नजरा मन्झ होर हांऊ संसारा री नजरा मन्झ कूसा पर चढाई गईरा ।¹⁵ क्यूंकि ना ता खतने रा कोई महत्व आ, होर ना बगैर खतने रा, अगर कोई महत्व हाया ता से नौई सृष्टी रा आ ।¹⁶ होर जितने लोक एस नियमा पर चल्हगे, तिन्हा पर, होर परमेसरा रे इस्राएला पर, सांति होर दया हुन्दी रहै ।¹⁷ अगे मुंजो कोई दुःख नी दे, क्यूंकि हांऊ यीसू रे दागा जो

आपणे सरीरा मन्झ लई किन्हें फिरहा । 18 हे भाईयो, आस्सा रे
प्रभु यीसू मसीह री दया तुस्सा री आत्मा साउगी रहै, आमीन ।

इफिसियों

1 ¹ पौलुसा री तरफा ले, जो परमेसरा री इच्छा ले यीसू मसीह रा भेजिरा एक प्रेरित आ, इफिसुसा रे रहणे वाले संत होर मसीह यीसू मन्झ विस्वास रखणे वाले लोका रे नांऊ । ² आस्सा रे पिता परमेसर होर प्रभु यीसू मसीह री तरफा ले तुस्सा जो अनुग्रह होर सांति मिल्दी रहे । ³ आस्सा रे प्रभु यीसू मसीह रे परमेसर होर पिता री जै जै कार हो, कि तिने आस्सा जो मसीह मन्झ स्वर्गा री हर तरहा री आशीष दीतिरी । ⁴ संसारा री सुरुआता ले पैहले ई परमेसरे आस्सा जो मसीह मन्झ चुणी लया, कि आस्से तेसरे नजर मन्झ पवित्र होर निर्दोष हो । ⁵ तिने आपणी इच्छा रे खरे इरादे रे मुताबक पैहले ले ई आस्सा जो आपणे कठे ठैहराया, ताकि यीसू मसीह रे ज़ीए आस्से तेसरे लेपालक (गोद लईरे) पुत्र हो । ⁶ कि तेसरी तेस दया री म्हीमा री जै जै कार हो, जेस जो तिने आस्सा जो तेस प्यारे मन्झ मुफ्ता मन्झ देई दितेया । ⁷ आस्सा जो तेस मन्झ तेसरे खूना रे ज़ीए छुटकारा, यानि पापा री माफी, तेसरे तेस दया रे धना रे मुताबक मिलीरी । ⁸ जेस जो तिने सारे ज्ञान होर समझा ले आस्सा जो बहुतायता ले देई दितेया । ⁹ कि तिने आपणी इच्छा रा रहस्य तेस खरे इरादे रे मुताबक आस्सा जो दस्या जेस जो तिने आपणे आपा मन्झ ठानी लईरा था । ¹⁰ परमेसरा री ये योजना थी कि ठीक टैम आऊणे रा एहड़ा इंतजाम हो कि जो कुछ स्वर्गा मन्झ आ, होर जो कुछ धरती पर आ, सभ कुछ से मसीह मन्झ कठा करे । ¹¹ तेस मन्झ ई, जो आपणी इच्छा रे खरे ईरादे रे मुताबक ई सभ कुछ करहा, आस्से भी तेसरे मतलबा रे मुताबक, पैहले ले ई उत्तराधिकार पाई लया । ¹² कि आस्से, जिन्हें जे पैहले ले मसीह पर आस रखी री थी, तेसरी म्हीमा री जै जै कार करणे री वजहा बणी सके । ¹³ जेबे तुस्से तेस सच्चाई रा वचन सुणेया जो तुस्सारे कठे मुक्ति रा सुसमाचार था, होर जेस यीसू मसीह पर तुस्से विस्वास कितेया था, प्रतिज्ञा कितिरे पवित्र आत्मा री छाप लगी । ¹⁴ से आत्मा आस्सा रे उत्तराधिकारा रे हिस्से री जमानता रे रूपा मन्झ तेस टैमा तक आस्सा जो दितिरा, जेबे तक कि से आस्सा जो, जो तिने मुल्ले लईरे, पूरी तरहा छुटकारा नी देई देंदा; एता री वजहा ले लोका तेसरी म्हीमा री जै जै कार करणी । ¹⁵ एता रे कठे, हांऊ भी तेस विस्वासा रा समाचार सुणी किन्हें जो तुस्सा लोका मन्झ प्रभु यीसू पर आ, होर सभ पवित्र लोका पर प्रगट आ । ¹⁶ तुस्सा रे कठे हांऊ धन्याबाद करणा नी छाडदा, होर आपणी प्राथना मन्झ तुस्सा जो याद करदा रह्यां । ¹⁷ कि आस्सा रे प्रभु यीसू मसीह रा परमेसर, जो म्हीमा रा पिता आ, तुस्सा जो आपणा

ज्ञान, होर प्रयासे री आत्मा दे । ¹⁸ होर तुस्सा रे मना री हाखिया चमकदार हुई जाए कि तुस्से जाणी लो कि तेसरे सादणे ले केहड़ी आस हुहां ई, होर पवित्र लोका मन्झ तेसरे उत्तराधिकारा रा धन केहड़ा आ । ¹⁹ होर तेसरी सामर्थ आस्सा विस्वास करणे वाले रे प्रति कितनी म्हान ई, ये सभ तेसरी तेस सक्ति रे कामा रे मुताबक ई । ²⁰ जेस जो तिने मसीह मन्झ पूरा कितेया, ताकि तेस जो मरीरे मंझा ले जीऊन्दा करी किन्हें आपणी तरफ स्वर्गा री जगहा मन्झ यानि ²¹ हर किस्मा रा सासन, होर हक, होर सामर्थ, होर प्रभुता रे, होर हरेक नांऊआ ले ऊपर, जो ना सिर्फ एस लोका मन्झ, पर आऊणे वाले लोका मन्झ भी लया जाणा, बछ्याळया । ²² होर सभ कुछ तेसरे पैर हेठ करी दितेया; होर तेस जो सभ चीजा पर सिरोमणि बणाई किन्हें कलीसिया जो देई दितेया । ²³ ये कलीसिया मसीह रा सरीर आ, होर जो तेसरी परिपूर्णता ई, जो सभ मन्झ सभ कुछ पूरा करहा ई ।

2 ¹ होर तिने तुस्सा जो भी जीऊन्दा कितेया, जो आपणे अपराधा होर पापा री वजहा ले मरीरे थे । ² जिन्हा मन्झ तुस्से पैहले एस संसारा रे बुरे रस्ते पर होर सर्गा मन्झ सासन करणे वाले अधिकारी यानी तेस आत्मा रे मुताबक चल्हा ऐ थे, जो एबे भी हुकम नी मनणे वाले मन्झ काम करहा । ³ इन्हा मन्झ आस्से भी सभ के सभ पैहले आपणे सरीरा री इच्छा मन्झ ध्याडे काहड़ा ऐ थे, होर सरीरा री, होर मना री इच्छा पूरी करहा ऐ थे, होर दूजे लोका साहीं स्वभावा ले ई गुस्से री सन्तान थे । ⁴ पर परमेसरे जो दया रा धनी आ; तिने आपणे तेस बडे प्यारा रे कारण आस्सा किन्हें प्यार कितेया । ⁵ जेबे आस्से आपणे अपराधा री वजहा ले मरीरे थे, तिने आस्सा जो मसीह साउगी जीऊन्दा कितेया । ⁶ होर मसीह यीसू मन्झ तेस साउगी दुःख उठाया, होर स्वर्गा री जगहा मन्झ तेस साउगी बैठाया । ⁷ कि से आपणी तेस किरपा ले जो मसीह यीसू मन्झ आस्सा पर आ, आऊणे वाले टैमा मन्झ आपणी दया रा असीम धन दसे । ⁸ क्यूंकि विस्वासा रे ज़ीए दया ले ई तुस्सा रा उद्धार हुई रा, होर ये तुस्सा री तरफा ले नी हुआ, पर परमेसरा रा दान आ । ⁹ होर ना कर्मा रे कारण, एहड़ा नी हो कि कोई घमण्ड करे । ¹⁰ क्यूंकि आस्से तेसरे हाथा री कारीगरी ई; होर मसीह यीसू मन्झ तिन्हा खरे कामा रे कठे बणाये गईरे, जिन्हा जो परमेसरे पैहले ले ई त्यार कितिरा था, कि आस्से स्यों खरे काम करे । ¹¹ इधी कठे याद करा, कि तुस्से जो सारीरिक रीति ले अन्यजाति ऐ, होर जिन्हा लोका जो सरीरा मन्झ हाथा ले कितिरे खतने ले खतना वाले बोल्या जाहां, स्यों तुस्सा जो बगैर खतना वाले बोल्यां ऐं ।

12 याद करा कि तुस्से लोक तेस टैम मसीह ले लग होर इस्राएला री प्रजा ले बाहर थे; प्रतिज्ञा की गईरी वाचा रे भागिदार नी थे, होर आशा हीन होर संसारा मन्झ बगैर परमेसरे रे थे। 13 पर एबे ता मसीह यीसू मन्झ तुस्से जो पैहले दूर थे, मसीह रे खुना रे ज़ीए नेडे हुई गईरे थे। 14 क्यूंकि से ई आस्सा री सांति ई, जिने जे दुहीं जो एक करी दितेया; होर लग करणे वाळी कान्धा जो, जो मन्झ भर थी, ढाळी दिती। 15 होर आपणे सरीरा मन्झ बैर यानी तेस व्यवस्था जो जेसरे हुक्म नियमा री रीति मुताबक थे, मिटाई दितेया, कि दुहीं मंझा ले आपणे मन्झ एक नंऊए माहणु जो रची किन्हें मेल मिलाप कराई दे। 16 होर कूसी पर आपणी मौता रे ज़ीए बैर भावा जो नास करी किन्हें एक ई सरीरा मन्झ तिन्हा दुहीं जो कठा करी किन्हें परमेसरा किन्हें मिलाई दे। 17 इधी कठे तिने आई किन्हें जो दूर थे होर जो नेडे थे, मेल मिलापा रा सुसमाचार सुणाया। 18 क्यूंकि तेसरे ज़ीए ई आस्सा दुहीं री, एक आत्मा मन्झ पिता वाले पौहंच हुहां ई। 19 इधी कठे तुस्से एबे परदेसी होर मुसाफर नी रहे, पर पवित्र लोका रे स्वदेसी संगी साथी होर परमेसरा रे घराने रे हुई गईरे। 20 होर प्रेरिता होर नबिया री निंऊआं रे अधारा पर बणाये गईरे, जेसरे कुणे रा पात्थर यीसू मसीह आपणे आप आ। 21 जेस मन्झ सारी रचना एक साथ मिली किन्हें प्रभु मन्झ एक पवित्र मंदर बणदी जाहीं। 22 जेस मन्झ तुस्से भी आत्मा रे ज़ीए परमेसरा रा निवासस्थान हुणे रे कठे एक साथ बणाए जाहें।

3 1 एस वजहा ले हांऊ पौलुसा जो तुस्सा अन्यजातिया रे कठे मसीह यीसू मन्झ कैदी आ। 2 तुस्सा री भलाई रे कठे परमेसरे बड़ी दया करी किन्हें जो काम मुंजो सोम्पिरा, तेता रे बारे मन्झ तुस्से जरूर सुणी रा हुन्धा। 3 यानि से भेद जो मुंजो पर प्रकाशना रे रूपा मन्झ प्रगट हुआ, जेहड़ा मैं पैहले थोड़ा बौहत लिखी चुकिरा। 4 जेस जो पढी किन्हें तुस्से जाणी सकहा ऐं, कि हांऊ मसीहा रा से भेद केथी तक समझहा। 5 ये भेद पिछली पीढी रे लोका जो तेहड़ा नी दस्सीरा था, जेहड़ा एबे तेसरे आपणे पवित्र प्रेरिता होर नबिया जो आत्मा रे ज़ीए दसी दितिरा। 6 यानि यीसू मसीह रे ज़ीए एबे अन्यजाति भी एक ई सरीरा रे अंग होर एक साथ उत्तराधिकारी होर प्रतिज्ञा रे भागिदार हो। 7 होर हांऊ परमेसरा री दया रे तेस दाना रे मुताबक, जो सामर्था रे प्रभावा रे मुताबक मुंजो दितिरा, तेस सुसमाचारा रा दास बणेया। 8 मुंजो पर जो सभ पवित्र लोका मंझा ले छोटे ले भी छोटा आ, ये दया हुई, कि हांऊ अन्यजातिया जो मसीह रे अथाह धना रा सुसमाचार सुणाऊं। 9 होर सभी पर ये गल जाहिर करूं, कि तेस भेदा रा इंतजाम क्या आ, जो सभ चीजा रे सिरजनहार परमेसरा मन्झ सुरहु ले गुप्त था। 10 ताकि एबे कलीसिया रे ज़ीए, परमेसरा रा कई किस्मा रा ज्ञान, तिन्हा

प्रधाना होर अधिकारिया पर, जो सर्गा मन्झ ऐ प्रगट कितेया जाए। 11 तेस सनातन इच्छा रे मुताबक, जो तिने आस्सा रे प्रभु मसीह यीसू मन्झ कीतीरी थी। 12 जेस मन्झ आस्सा जो तेस पर विस्वास करणे ले हिम्मत होर भरोसे ले नेडे आऊणे रा हक आ। 13 इधी कठे हांऊ अरज करहा कि जो क्लेश तुस्सा रे कठे मुंजो हुएया करहा, तिन्हारी वजहा ले हिम्मत नी छाडा, क्यूंकि तिन्हा मन्झ तुस्सा री म्हीमा ई। 14 हांऊ एस वजहा ले तेस पिता रे साम्हणें घुटने टेक्हा, 15 जेस ले स्वर्ग होर धरती पर, हर एक घराने रा नांऊ रख्या जाहां। 16 कि से आपणी म्हीमा रे धना रे मुताबक तुस्सा जो ये दान दे, कि तुस्से तेसरी आत्मा ले आपणे अंदरले माहणु मन्झ सक्ति पाई किन्हें मजबूत हुंदे जाऊआ। 17 होर विस्वासा रे ज़ीए मसीह तुस्सा रे दिला मन्झ बसी जाए ताकि तुस्से प्यारा मन्झ जड़ पकड़ी किन्हें होर नींव पाई किन्हें 18 सभ पवित्र लोका साउगी भली भांति समझणे री सक्ति पाओ; कि तेसरी चौड़ाई, होर लम्बाई, होर ऊंचाई, होर गैहराई कितनी ई। 19 होर मसीह रे तेस प्यारा जो जाणी सको जो ज्ञाना ले परे आ, ताकि तुस्से परमेसरा री सारी भरपूरी तक भहरी जाओ। 20 एबे जो एहड़ा सामर्था आ, कि आस्सा री अरज होर समझा ले बड़ी किन्हें ज्यादा काम करी सकहा, तेस सक्ति रे मुताबक जो आस्सा मन्झ काम करहा। 21 कलीसिया मन्झ, होर मसीह यीसू मन्झ, तेसरी म्हीमा पीढी ले पीढी तक जुग जुग हुन्दी रहे। आमीन।

4 1 इधी कठे हांऊ, जो प्रभु मन्झ कैदी आ, तुस्सा ले अरज करहा, कि जेस बुलाहटा ले तुस्से सादी गईरे थे, तेसरे लायक चाल चला। 2 यानि सारी दीनता होर नम्रता साउगी, होर सबर रखी किन्हें प्यारा किन्हें एक दूजे री सही लो। 3 होर सांति रे बंधना मन्झ आत्मा री एकता रखणे री कोसिस करा। 4 एक ई सरीर आ, होर एक ई आत्मा; ठीक तिहां ई आपणी बुलाहटा री एक आसा मन्झ सादे गईरे थे। 5 एक ई प्रभु आ, एक ई विस्वास, एक ई बप्तिस्मा। 6 होर सभी रा एक ई परमेसर होर पिता आ, जो सभी ले ऊपर होर सभी रे बीचा मन्झ, होर सभी मन्झ आ। 7 पर आस्सा मंझा ले हर एकी जो मसीह रे दाना रे मुताबक अनुग्रह दितिरा। 8 इधी कठे से बोल्हा, कि जेबे से ऊपर गया, ता बंधुवाई जो बान्ही किन्हें लई गया, होर माहणुआं जो दान दिते। 9 एबे देखा, जेबे से बोल्हा "ऊपर गया" ता एता रा मतलब एता रे अलावा क्या आ? कि से धरती रे हेठळी जगहा मन्झ भी उतरेया था। 10 होर जो हेठळी जगहा मन्झ उतरेया था, से से ई आ, जो सारे सर्गा ले ऊपर गया था, कि सभ कुछ पूरा करे। 11 होर तिने कितने जो प्रेरित; होर कितने जो नबी, होर कितने जो सुसमाचार प्रचारक, होर कितने जो पास्टर होर कितने जो उपदेशक नियुक्त करी किन्हें देई दितेया। 12 जेस ले पवित्र लोक सेउआ रे कामा रे लायक बणे होर मसीह

रा सरीर तेबे तक बढ़ौतरी पाए।¹³ जेबे तक कि आस्से सभ के सभ विस्वास, होर परमेसरा रे पुत्रा री पैहचाना मन्झ एक नी हुई जाए, होर एक सिद्ध माहणु नी बणी जाए होर मसीह री पूरी कद काठी तक नी बढ़ी जाए।¹⁴ ताकि आस्से अगे जो बच्चे बणी किन्हें नी रहे, जो माहणुआं री ठग-कला होर चतुराई ले होर तिन्हारे भ्रमा री योजना री, होर उपदेसा री, होर हर एक झोंके ले उछाले, होर ओरे परे घुमाए जाहें।¹⁵ पर प्यारा मन्झ सच्चाई किन्हें चल्दे हुए, सभ गल्ला मन्झ तेस मन्झ जो सिर आ, यानि मसीह मन्झ बढ़दे जाऊआ।¹⁶ जेस ले सारा सरीर हर एक जोडा साउगी मिली किन्हें, होर एक जुट जुडी किन्हें तेस असरा रे मुताबक जो हर एक अंगा रे ठीक ठीक काम करणे रे ज़ीए बढ़दा जाहां, होर इहां करी किन्हें से प्यारा मन्झ बढ़ौतरी करदा जाए।¹⁷ इधी कठे हांऊ ये बोल्हा, होर प्रभु मन्झ तुस्सा जो चिताई देहां कि जिहां अन्यजाति लोक आपणे मना रे बेकार विचार रे मुताबक चल्हा ऐ, तुस्से अगे जो तेहड़ी जिन्दगी मत जिआ।¹⁸ आपणी नासमझी री वजहा ले होर तिन्हारे मना रे कठोरता री वजहा ले, तिन्हारी बुद्धि न्ह्यारी हुई गईरी होर स्यों परमेसरा ले मिलणे वाळी जिन्दगी ले दूर ऐ,¹⁹ होर स्यों सुन हुई किन्हें, लुचपना मन्झ लगी गईरे, कि सभ किस्मा रे गंदे कामा मन्झ जुटी गईरे।²⁰ पर मसीह रे बारे मन्झ तुस्से एहड़ी सीख नी पाईरी।²¹ मुंजो कोई सक नी आ कि तुस्से तेसरे बारे मन्झ सुणीरा, होर से सच जेहड़ा यीसू मन्झ रहयां, तेता रे मुताबक तुस्से चले रे रूपा मन्झ स्वाये भी गईरे।²² कि तुस्से अगले चाल चलना रे पुराणे अंदरले माहणु जो, जो भरमाणे वाळी इच्छा रे मुताबक भ्रष्ट हुन्दा जाहां, तुआरी देआ।²³ होर आपणे मना रे आत्मिक स्वभावा मन्झ नंऊऐ बणदे जाऊआ।²⁴ होर नंऊऐ माहणु जो पैहनी लो, जो परमेसरा रे मुताबक सच्चाई री धार्मिकता होर पवित्रता मन्झ बणाया गईरा।²⁵ एता रे कठे झूठ बोलणा छाडी किन्हें, हर एक आपणे पडोसी किन्हें सच बोले, क्यूंकि आस्से आपु मन्झ एक दूजे रे अंग ऐ।²⁶ गुस्सा ता करा, पर पाप मत करा; सूरज ढळने तक तुस्सा रा गुस्सा नी रहे।²⁷ होर सैताना जो मौक़ा देख्या देंदे।²⁸ चोरी करणे वाळा दबारा चोरी नी करे; पर खरे काम करणे रे कठे आपणे हाथा ले मैहनत करे; इधी कठे कि जेस जो जरूरत हो, तेस जो देणे रे कठे तेस वाले कुछ हो।²⁹ कोई गंदी गल तुस्सा रे मुहां ले नी निकळे, पर जरूरत रे मुताबक से ई जो बढ़ौतरी रे कठे खरा हो, ताकि तेस ले सुणने वाळे पर दया हो।³⁰ होर परमेसरा रे पवित्र आत्मा जो दुःखी मत करो, जेस ले तुस्सा पर छुटकारे रे ध्याड़े रे कठे छाप दितिरी।³¹ सभ किस्मा री कड़वाहट होर प्रकोप होर जळनी, होर क्लह, होर बेज्जती, सभ किस्मा रा बैर भाव तुस्सा ले दूर कितेया जाए।³² होर एक दूजे पर दयालु, होर करुणावान बणा। होर जिहां परमेसरे मसीह मन्झ तुस्सा

रे पाप माफ किते, तिहां ई तुस्से भी आपु मन्झ एक दूजे रे पापा जो माफ करा।

5¹ इधी कठे प्यारे बच्चे साहीं परमेसरा रा अनुकरण करणे वाळे बणा।² होर प्यारा मन्झ चला; जेहड़ा मसीहे भी तुस्सा किन्हें प्यार कितेया; होर आस्सा रे कठे आपणे आपा जो मीठी खुसबू बणी किन्हें परमेसरा रे साम्हणें बलिदान करी दितेया।³ होर जेहड़ा पवित्र लोका रे खरा आ, तुस्सा मन्झ ना ता व्यभिचार, ना केसी किस्मा रे असुद्ध काम, या लालचा री गल तक नी हो।⁴ होर ना गंदे काम, ना वेवकुफी री गल्ला, ना भदे मजाक क्यूंकि ये गल्ला खरी नी लगदी, बल्कि धन्याबाद ही कितेया जाए।⁵ क्यूंकि तुस्से ये जाणहा ऐं, कि केसी व्यभिचारी, या असुद्ध आदमी, या लोभी माहणु री, जो मूर्ति पूजणे वाळे रे बराबर ऐ, मसीह होर परमेसरा रे राजा मन्झ उत्तराधिकारी नी हुई सकदे।⁶ कोई तुस्सा जो बेकार गल्ला बोली किन्हें धोखा नी दे, क्यूंकि इन्हा गल्ला री वजहा ले हुकम नी मनणे वाळे पर परमेसरा रा कोप भड़क्हा।⁷ इधी कठे तुस्से तिन्हा रे भागिदार नी बणा।⁸ क्यूंकि तुस्से ता पैहले न्ह्यारे मन्झ थे पर एबे प्रभु मन्झ ज्योति ऐ, इधी कठे प्रयासे री सन्ताना साहीं चला।⁹ क्यूंकि प्रयासे रा फल सभ किस्मा री भलाई, होर धार्मिकता, होर सच्चाई ई।¹⁰ होर ये परखा, कि प्रभु जो क्या खरा लग्हा? ¹¹ होर न्ह्यारे रे बेकार कामा मन्झ भागिदार मत बणा, बल्कि तिन्हा कामा रा भांडा फोड़ करा।¹² क्यूंकि एहड़े काम जो स्यों गुपचुप करहा ऐ, तिन्हा रे बारे मन्झ कितरी चर्चा भी सरमा री गल ई।¹³ पर जितेने काम प्रगट किते जाहें स्यों सभ प्रयासे किन्हें प्रगट हुहां ऐं, क्यूंकि जो सभ कुछ प्रगट करहा से प्रयासा आ।¹⁴ एता री वजहा ले से बोल्हा, हे सोणे वाळे जागी जा, होर मुरदे मंझा ले उठी जा; ता मसीह रा प्रयासा तुध पर चमकणा।¹⁵ इधी कठे ध्याना किन्हें देखा, कि केहड़ी चाल चल्हा ऐ; वेवकुफा साहीं नी पर बुद्धिमाना साहीं चला।¹⁶ होर मौके जो कीमती समझा, क्यूंकि दिन बुरे ऐ।¹⁷ इधी कठे वेवकुफ मत बणा, पर ध्याना किन्हें समझा, कि प्रभु री इच्छा क्या ई? ¹⁸ होर दाखरसा किन्हें मत्वाळे नी बणा, क्यूंकि एता ले लुचपन हुहां, पर आत्मा ले भहरदे जाऊआ।¹⁹ होर आपु मन्झ भजन होर स्तुतिगान होर आत्मिक गीत गाया करा, होर आपणे आपणे मना मन्झ प्रभु रे साम्हणें गान्दे होर कीर्तन करदे रहा।²⁰ होर हमेसा सभ गल्ला रे कठे आस्सा रे प्रभु यीसू मसीह रे नांऊआं ले परमेसर पिता रा धन्याबाद करदे रहा।²¹ होर मसीह रे डरा ले एक दूजे रे अधीन रहा।²² हे लाड़ीयो, आपणे आपणे लाड़े रे एहड़े अधीन रहुआ, जेहड़े प्रभु रे।²³ क्यूंकि लाड़ा लाड़ी रा सिर आ जेहड़ा कि मसीह कलीसिया रा सिर आ; होर आपु ई सरीरा रा उद्धारकर्ता आ।²⁴ पर जिहां कलीसिया मसीह रे अधीन ई, तिहां लाड़ीया भी हर गल्ला

मन्झ आपणे आपणे लाडे रे अधीन रहे ।²⁵ हे लाडेयो, आपणी आपणी लाडी किन्हें प्यार रखा, जेहडा मसीहे भी कलीसिया किन्हें प्यार करी किन्हें आपणे आपा जो कलीसिया रे कठे देई दितेया ।²⁶ कि तेस जो वचना रे ज्रीए पाणी किन्हें न्हाई किन्हें शुद्ध करी किन्हें पवित्र बनाए ।²⁷ होर तेस्सा कलीसिया जो एक एहडी चमचमाती कलीसिया बणाई किन्हें खडी करे, जेस मन्झ ना ता कलंक, ना ता झुरी, ना ता कोई एहडी चीज हो, बल्कि से पवित्र होर निर्दोष हो ।²⁸ ठीक इस तरहा लाडे भी आपणी आपणी लाडीया किन्हें आपणे सरीरा रे बराबर प्यार रखे, जो आपणी लाडी किन्हें प्यार रख्हा, से आपु आपणे आपा किन्हें प्यार करहा ।²⁹ क्यूंकि केसीये कधी आपणे सरीरा ले बैर नी रखेया, बल्कि तेसरा पालन पोषण करहा, जेहडा मसीह भी कलीसिया साउगी करहा ।³⁰ इधी कठे कि आस्से तेसरे सरीरा रे अंग ऐ ।³¹ इस वजहा ले माहणु माऊ बाबा जो छाडी किन्हें आपणी लाडी साउगी मिली किन्हें रेंहणां, होर तिन्हा दुहींया एक सरीर हुणा ।³² ये भेद ता बौहत बडा आ; पर हांऊ मसीह होर कलीसिया रे बारे मन्झ बोल्हा ।³³ पर तुस्सा मंझा ले हर एक आपणी लाडी किन्हें आपणे साहीं प्यार रखे, होर लाडी भी आपणे लाडे रा डर मने ।

6¹ हे बच्चेयो, प्रभु मन्झ आपणे माऊ बाबा रे आज्ञा मनणे वाळे बना, क्यूंकि ये ठीक आ ।² आपणे माऊ होर बाबा इज्जत करा, ये पैहला हुक्म आ, जेस साउगी प्रतिज्ञा भी हाई ।³ कि तेरा भला हुई जाए, होर तू धरती पर बौहत ध्याडे तक जीऊन्दा रहे ।⁴ होर हे बच्चे वाळेयो आपणे बच्चेया जो ज्लेरा मत पर प्रभु री शिक्षा, होर न्यारी किन्हें तिन्हारा पालन पोषण करा ।⁵ हे दासो, जो लोक सरीरा रे मुताबक तुस्सा रे माल्क ऐ, डरदे होर काम्मदे हुए तिन्हारा हुक्म मना जिहां तुस्से मसीह रा हुक्म मन्हा ऐं ।⁶ होर माहणुआं जो खुस करणे वाळे साहीं दिखाऊआ करणे रे कठे सेउआ नी करा, पर मसीह रे दासा साहीं पुरे मना ले परमेसरा री इच्छा पर चला ।⁷ होर तेस सेउआ जो माहणु री नी, पर प्रभु री सेउआ जाणी किन्हें खरी इच्छा ले करा ।⁸ क्यूंकि तुस्से जाणहां ऐं, कि जो कोई खरा काम करघा, से चाहे दास हो, या चाहे अजाद हो; प्रभु ले तेस

तेहडा ई फल पाणा ।⁹ होर हे माल्को, तुस्से भी धमिकया देणा छाडी किन्हें तिन्हा साउगी तेहडा ई व्यवहार करा, क्यूंकि तुस्से जाणहा ऐं, कि तिन्हा रा होर तुस्सा दुहीं रा माल्क स्वर्गा मन्झ आ, होर से केसी साउगी भेदभाव नी करदा ।¹⁰ इधी कठे, प्रभु मन्झ होर तेसरी सक्ति मन्झ बलवान बना ।¹¹ परमेसरा रे सारे हथियार बान्ही लऊआ, कि तुस्से सैताना री चाला रे साम्हणें खडे रही सको ।¹² क्यूंकि आस्सा रा कुशती, खूना होर मासा किन्हें नी ई, पर सासका किन्हें होर अधिकारीया किन्हें होर एस संसार रे न्ह्यारे रे हाक्मा किन्हें होर तेस दुष्टा री आत्मिक सेना किन्हे आ, जो सर्गा मन्झ ऐ ।¹³ इधी कठे परमेसरा रे सारे हथियार बान्ही लऊआ, कि तुस्से बुरे ध्याडे मन्झ साहम्णा करी सको, होर सभ कुछ पूरा करी किन्हें मजबूत खडे रही सको ।¹⁴ एता कठे सच्चाई किन्हें आपणी कमर कसी किन्हें, होर धार्मिकता री झिलम पैहनी किन्हें ।¹⁵ होर पैरा मन्झ सांति रे सुसमाचारा री त्यारी रे बूट पैहनी किन्हें ।¹⁶ होर तिन्हा सभी साउगी विस्वासा री ढाल लई किन्हें मजबूत खडे रहुआ जेस ले तुस्से तेस दुष्टा रे सभ जल्दे हुए तीरा जो बुझाई सको ।¹⁷ होर उद्दारा रा टोप, होर आत्मा री तलवार जो परमेसरा रा वचन आ, लई लऊआ ।¹⁸ होर हर टैम होर हर तरहा ले आत्मा मन्झ प्रार्थना, होर अरज करदे रहुआ, होर इधी कठे जागदे रहुआ, कि सभ पवित्र लोका रे कठे लगातार अरज करदे रहुआ ।¹⁹ होर मेरे कठे भी, कि मुंजो बोलणे रे टैम एहडा प्रबल वचन दितेया जाए, कि हांऊ हिम्मता किन्हें सुसमाचारा रा भेद दसी सकूं जेसरे कठे हांऊ जंजीरा किन्हें जकडीरा राजदूत आ ।²⁰ होर ये भी कि हांऊ तेसरे बारे मन्झ जेहडा मुंजो चहिए हिम्मता किन्हें बोलूं ।²¹ होर तुखिकुस जो प्यारा भाई होर प्रभु मन्झ भरोसे रे लायक दास आ, तुस्सा जो सभ गल्ला दसे, कि तुस्से भी मेरी दसा जाणा कि हांऊ केहडा रैहयां ।²² तेस जो में तुस्सा वाले इधी कठे भेजिरा, कि तुस्से आस्सा री हालत जाणी सको, होर से तुस्सा रे मना जो सांति दे ।²³ परमेसर पिता होर प्रभु यीसू मसीह री तरफा ले भाईया जो सांति होर विस्वासा समेत प्यार मिले ।²⁴ जो आस्सा रे प्रभु यीसू मसीह किन्हें सच्चा प्यार करहा ऐ, तिन्हा सभी पर दया हुन्दी रहे ।

फिलिप्पियों

1 ¹ मसीह यीसू रे दास पौलुस होर तिमिथिउसा री तरफा ले, जो मसीह यीसू मन्झ तिन्हा सभ पवित्र लोका रे नांऊ, जो बिशप होर दासा समेत फिलिप्पी मन्झ रैहयां ऐं, ² आस्सा रे पिता परमेसर होर प्रभु यीसू मसीह री तरफा ले तुस्सा जो दया होर सांति मिल्दी रहे। ³ हांऊ जेबे जेबे तुस्से याद करहा, तेबे तेबे आपणे परमेसर रा धन्याबाद करहा। ⁴ होर जेबे केबे तुस्सा सभी रे कठे अरज करहा, ता हमेसा खुसी साउगी अरज करहा। ⁵ इधी कठे, कि तुस्से पैहले ध्याडे ले लई किन्हें आज तक सुसमाचार रे फल्हाणे मन्झ मेरे भागीदार रही रे। ⁶ होर मुंजो एस गल्ला रा भरोसा आ, कि जिने तुस्सा मन्झ खरा काम सुहरू कितिरा, तेस ई से काम यीसू मसीह रे ध्याडे तक पूरा करणा। ⁷ तुस्सा सभी रे बारे मन्झ मेरा एहड़ा सोचना ठीक ई हाया; क्यूंकि तुस्से सभ मेरे मना मन्झ बस्सी रे, होर ना सिर्फ तेबे ई जेबे जे हांऊ जेहला मन्झ आ, बल्कि तेबे भी जेबे हांऊ सुसमाचारा री सच्चाई री रक्षा करदे हुए, होर तेता रा प्रमाण देणे मन्झ तुस्से सभ दया मन्झ मेरे साउगी भागिदार ऐ। ⁸ क्यूंकि परमेसर मेरा गुआह आ; कि हांऊ मसीह यीसू रे प्यारा साहीं तुस्सा सभी जो कितना चाहं। ⁹ होर हांऊ ये प्रार्थना करहा, कि तुस्सा रा प्यार, ज्ञान होर सभ किस्मा रे विवेका समेत होर ज्यादा भी बढ़दे जाए। ¹⁰ एथी तक कि तुस्से खरी ले खरी गल्ला जो, अपनाई लऊआ होर मसीह रे ध्याडे तक सच्चे; होर निर्दोष बणी किन्हें रैहया। ¹¹ होर तेस धार्मिकता रे फला ले जो यीसू मसीह रे ज़ीए मिल्हा; भरपूर हुंदे जाऊआ जेस ले परमेसरा री म्हीमा होर स्तुति हुन्दी रहे। ¹² हे भाईयो, हांऊ चाहं, कि तुस्से ये जाणी लो, कि जो कुछ मेरे पर बीतिरा, तेस ले सुसमाचारा री बढ़ौतरी हुई। ¹³ एथी तक कि कैसरा रे राजभवना री सारी पलटन होर बाकी लोका मन्झ ये प्रगट हुई गया, कि हांऊ मसीह रे कठे कैदा मन्झ आ। ¹⁴ होर प्रभु मन्झ जो भाई ऐ, तिन्हा मंझा ले बौहत मेरे कैद हुणे री वजहा ले, हिम्मत बान्ही किन्हें, परमेसरा रा वचन निधडक सुनाणे रा होर भी ज्यादा हिम्मत करहा ऐ। ¹⁵ कितने ता हीर्ख होर झगडे री वजहा ले मसीह रा प्रचार करहा ऐ होर कुछ खरी इच्छा ले करहा ऐ। ¹⁶ स्यों जे प्यारा किन्हें प्रचार करहा ऐ, जाणहां ऐं कि मुंजो सुसमाचारा रा बचाव करणे रे कठे नियुक्त कितिरा। ¹⁷ होर कई लोक ता खरे इरादे ले नी, पर आपणे मतलबा रे कठे मसीह रा प्रचार करहा ऐ, कि कैदखाने मन्झ मेरे कठे संकट पैदा हो। ¹⁸ तेबे क्या हुआ? सिर्फ ये हुआ, कि हर तरहा ले चाहे भाने किन्हें, चाहे सच्चाई किन्हें, मसीह रा प्रचार हुआं, होर एता

ले मुंजो खुसी मिल्हा ई, होर खुसी मिल्दी ई रैहणी। ¹⁹ क्यूंकि हांऊ ये जाणहा, कि तुस्सा री प्रार्थना होर यीसू मसीह री आत्मा री सहायता ले एस कैदखाने रा फल मेरी रिहाई हुणी। ²⁰ मेरे दिला री आस होर इच्छा ता ये ई, कि केसी गल्ला मन्झ हांऊ समिन्दा नी होऊं, पर मेरी पुरी हिम्मता री वजहा ले मसीह री म्हीमा मेरे सरीरा मन्झ हमेसा हुन्दी रैहे, तिहां ई एबे भी हो, चाहें हांऊ जीऊन्दा रहूं या मरी जाऊं। ²¹ क्यूंकि मेरे कठे जीऊन्दा रैहणा मसीह आ, होर मरी जाणा फायदा आ। ²² पर अगर सरीरा मन्झ जीऊन्दा रैहणा ई मेरे कामा रे कठे फायदा आ, होर हांऊ नी जाणदा, कि क्या चुणाव करूं। ²³ क्यूंकि हांऊ दुहीं रे बीचा मन्झ लटकीरा; इच्छा ता ये करहा ई कि हांऊ निकळी किन्हें मसीह वाले चली जाऊं, क्यूंकि ये खरा हुणा। ²⁴ पर तुस्सा रे कठे एस सरीरा मन्झ रैहणा होर भी ज्यादा जरूरी आ। ²⁵ होर इधी कठे कि मुंजो एस गल्ला रा भरोसा आ, हांऊ जाणहा कि मां जीऊन्दा रैहणा, बल्कि तुस्सा सभी साउगी रैहणा, ताकि तुस्से प्रभु मन्झ मजबूत हुंदे जाओ होर तेस मन्झ खुस रहो। ²⁶ होर जो घमण्ड तुस्से मरे बारे मन्झ करहा ऐ, से मेरे तुस्सा वाले दबारा वाप्स आऊणे ले मसीह मन्झ होर ज्यादा बढ़ी जाए। ²⁷ बस इतना करेया कि तुस्सा रा चाल चलन मसीह रे सुसमाचारा रे लायक हुई सके, कि चाहे हांऊ आई किन्हें तुस्सा जो देखूं, चाहे नी भी आऊं, तुस्सा रे बारे मन्झ ये सुणूं, कि तुस्से एक ई आत्मा मन्झ पक्के हो, होर एक मन हुई किन्हें सुसमाचारा रे विस्वासा रे कठे बडी मैहनत करहा ऐ। ²⁸ होर केसी गल्ला मन्झ वरोधीया ले नी डरदे; ये तिन्हा रे कठे ता विनासा रा होर तुस्सा रे कठे उद्दारा रा बिल्कुल साफ चिन्ह आ; होर ये परमेसरा री तरफा ले आ। ²⁹ क्यूंकि मसीह री वजहा ले तुस्सा पर ये दया हुई कि ना सिर्फ तेस पर विस्वास करा पर तेसरे कठे दुःख भी उठाऊआ। ³⁰ होर तुस्से भी तेहड़ी ई मैहनत करदे रहूआ, जिहां तुस्से मुंजो करदे देखिरा, होर एबे भी सुणहा ऐं, कि तेहड़ा हल्ली भी करेया करहा।

2 ¹ फेरी तुस्सा लोका मन्झ, अगर मन्झ मसीह मन्झ कुछ प्रोत्साहन आ, होर कुछ प्यारा री सांत्वना ई, होर कुछ आत्मा री भागीदारी ई, होर कुछ करुणा होर दया ई। ² तुस्से मेरी ये खुसी पूरी करा ताकि तुस्से एक मन बणी किन्हें रहो; होर एक ई प्यार, एक ई भावना, होर एक ई नजरिया रखा। ³ आपणे मतलबा रे कठे या झूठी साना रे कठे कुछ नी करा पर दीन हुई किन्हें, एक दूजे जो आपणे ले खरा समझा। ⁴ तुस्सा मंझा ले हर एकी जो चाहिए कि से सिर्फ आपणी भलाई रे कठे नी, पर दूजे

री भलाई रा भी ख्याल रखे ।⁵ जेहड़ा मसीह यीसू रा स्वभाव था, तेहड़ा ई तुस्सा रा स्वभाव भी हो ।⁶ जिने जे परमेसरा रे रूपा मन्झ हुई किन्हें भी साक्षात परमेसरा री समानता जो आपणे बसा मन्झ रखणे री चीज नी समझी ।⁷ बल्कि आपणे आपा जो एहड़ा खाली करी दितेया, होर दासा रा रूप धारण कितेया, होर माहणु री समानता मन्झ हुई गया ।⁸ होर माहणु रे रूपा मन्झ प्रगट हुई किन्हें आपणे आपा जो दीन कितेया, होर एथी तक हुक्म मन्नेया, कि मौत, हां, क्रूसा री मौत भी सही ली ।⁹ एस वजहा ले परमेसरे तेस जो बौहत म्हान भी कितेया, होर तेस जो से नांऊ दितेया जो सभ नांऊआं ले ऊपर आ ।¹⁰ कि जो स्वर्गा मन्झ होर धरती पर होर जो धरती रे हेठ ऐ; स्यों सभ यीसू रे नांऊआं पर घुटना टेके ।¹¹ होर परमेसर पिता री म्हीमा रे कठे हर एक जीभ मनी ले कि यीसू मसीह ई प्रभु आ ।¹² इधी कठे हे मेरे प्यारेओ, जिहां तुस्से हमेसा ले हुक्म मन्नेदे आईरे, तिहां ई एबे भी ना सिर्फ मेरे साउगी रहन्दे हुए, पर खास करी किन्हें एबे मेरे दूर रहणे पर भी डरदे होर काम्दे हुए आपणे आपणे उद्धारा रा काम पूरा करदे जाऊआ ।¹³ क्यूंकि ये परमेसर आ, जो तिन्हा कामा री इच्छा होर तिन्हा जो पूरा करणे रा कर्म, जो परमेसरा जो खरे लग्हा, तुस्सा मन्झ पैदा करहा ।¹⁴ सब काम बगैर कुडकुडाए होर बगैर बैहसा ले करा ।¹⁵ ताकि तुस्से निर्दोष होर भोले हुई किन्हें टेढे होर ढीठ लोका रे बीचा मन्झ परमेसरा रे निष्कलंक बणी किन्हें रहूआ, जिन्हा रे बीचा मन्झ तुस्से जिन्दगी रा वचन लई किन्हें संसारा मन्झ भच्छिरे दीये साहीं सुझहा ऐ ।¹⁶ जिन्दगी रे वचना जो मजबूती किन्हें पकड़ी रखा ताकि मसीह रे ध्याडे मुंजो एस गल्ला रा घमण्ड हो, कि मेरी जिन्दगी री भाग दोड होर मेरी मैहनत बेकार नी हुई ।¹⁷ होर अगर मुंजो तुस्सा रे विस्वासा रे बलिदान होर सेउआ रे साउगी खून बहाणा पये, तेबे भी हांऊ खुस आ, होर तुस्सा सभ साउगी खुसी मणाहां ।¹⁸ तिहां ई तुस्से भी खुस हो, होर मेरे साउगी खुसी मणाऊआ ।¹⁹ मुंजो प्रभु यीसू मन्झ आस ई, कि मां तिमिथिउसा जो झटपट तुस्सा वाले भेजी देणा, ताकि तुस्सा रा हाल सुणी किन्हें मुंजो चैन मिली सके ।²⁰ क्यूंकि मेरे वाले एहडे स्वभावा रा कोई आदमी नी हाया, जो खरे मना ले तुस्सा री फिकर करे ।²¹ क्यूंकि सभ आपणे मतलबा री टोळा मन्झ रहें ना कि यीसू मसीह री ।²² पर तेस जो ता तुस्से परखी लया होर जाणी भी लया, कि जेहड़ा म्हठा बाबा साउगी करहा, तिहां ई तिने सुस्माचारा रे फ्लहणे मन्झ मेरे साउगी मैहनत क्तिती ।²³ इधी कठे मुंजो आस ई, कि जीहां ई मुंजो पता चलणा कि मेरी क्या हालत हुणी, तिहां ई मां से जल्दी भेजी देणा ।²⁴ होर मुंजो प्रभु मन्झ भरोसा आ, कि मां आपु भी जल्दी आई जाणा ।²⁵ पर मैं इफ्रदीतुसा जो, जो मेरा भाई, होर साउगी काम करणे वाळा, होर संगी योद्धा

होर तुस्सा रा दूत, होर जरूरी गल्ला मन्झ मेरी सेउआ टैहल करणे वाळा आ, तुस्सा वाले भेजणा जरूरी समझ्या ।²⁶ क्यूंकि तेसरा मन तुस्सा सभ किन्हें लगी गईरा था, एता री वजहा ले से बेचैन रहयां था, क्यूंकि तुस्से तेसरी बमारी रा हाल सुणेया था ।²⁷ होर ये गल ता पक्की थी कि से बमार हुई गईरा था, एथी तक कि से मरणे वाळा ई था, पर परमेसरे तेस पर दया क्तिती; होर सिर्फ तेस पर ई नई पर मुंजो पर भी, कि मेरे ऊपर दुःखा पर दुःख नी हो ।²⁸ इधी कठे मैं तेस जो भेजणे रा होर भी जतन कितेया, कि तुस्से तेस ले द्वारा मुलाकात करी किन्हें खुस हुई जाओ होर मेरा दुःख घटी जाए ।²⁹ इधी कठे तुस्से प्रभु मन्झ तेस ले बौहत खुसी साउगी मिलणा, होर एहडे री इज्जत करदे रहणा ।³⁰ क्यूंकि से ई मसीह रे कामा रे कठे आपणे प्राणा जो खतरे मन्झ पाई किन्हें मौता रे नेडे पूजी गईरा था, ताकि जो घटी कमी तुस्सा री तरफा ले मेरी सेउआ मन्झ हुई, तेस जो से पूरी करी दे ।

3¹ इधी कठे मेरे भाईयो, प्रभु मन्झ खुस रहूआ; तुस्सा जो बार बार स्यों गल्ला लिखदे रहणे ले मुंजो कोई कष्ट नी हुंदा, क्यूंकि एता मन्झ तुस्सा री सुरक्षा ई ।² कुत्ते ले सावधान रहा, तिन्हा बुरे काम करणे वाळे ले सावधान रहूआ, होर झूठे खतना वाळे ले सावधान रहूआ ।³ क्यूंकि खतना वाळे ता आस्से ई हाए, जो परमेसरा री अगुवाई ले आराधना करहा ऐ, होर मसीह यीसू पर घमण्ड करहा ऐ, होर सरीरा पर भरोसा नी रखदे ।⁴ पर हांऊ ता सरीरा पर भरोसा रखी सकहा, अगर केसी होरी जो सरीरा पर भरोसा रखणे रा विचार हाया, ता हांऊ तेस ले भी बढी किन्हें रखी सकहा ।⁵ आठुए ध्याडे मेरा खतना हुआ, इस्राएला रे बंस, होर बिन्यामिना रे गोत्रा रा आ; इब्रानिया रा इब्रानी आ; व्यवस्था रे बारे मन्झ अगर बोल्या जाए ता हांऊ फरीसी आ ।⁶ जेथी तक मेरी निष्ठा रा सुआल आ, ता हांऊ कलीसिया जो सताणे वाळा; होर व्यवस्था री धार्मिकता रे बारे मन्झ अगर बोल्या जाए, ता हांऊ निर्दोष आ ।⁷ पर जो जो गल्ला मेरे फायदे री थी, तिन्हा चीजा जो मैं मसीह री वजहा ले नुकसान समझहा ।⁸ बल्कि हांऊ आपणे प्रभु मसीह यीसू री पैहचाणा री खरेपना री वजहा ले सभ चीजा जो नुकसान समझहा; जेसरी वजहा ले सभ चीजा रा नुकसान उठाया, होर तिन्हा चीजा जो हांऊ कूडा समझहा, जेस ले हांऊ मसीह जो पाई सकूं ।⁹ होर तेस मन्झ पाया जाऊं; ना कि आपणी तेस धार्मिकता री वजहा ले नी, जो व्यवस्था रे विधाना पर टिकिरी थी, बल्कि तेस धार्मिकता री वजहा ले जो मसीह पर विस्वास करणे री वजहा ले, होर परमेसरा री तरफा ले विस्वास करणे पर मिलहा ई ।¹⁰ होर हांऊ तेस जो होर तेसरे मौता पर जीत पाणे री सामर्था जो, होर तेस साउगी दुःखा मन्झ भागी दार हुणे रे भेदा जो जाणु, होर तेस री मौता

री समानता जो पाई लूँ । ¹¹ ताकि हांऊ केसी भी तरीके ले मरीरे मंझा ले जी उठी किन्हें पुनरुत्थाना जो पाई सकूँ । ¹² ये मतलब नी आ, कि हांऊ पाई चुकिरा; या सिद्ध हुई चुकिरा, पर तेस चीजा जो पकड़ने रे कठे दोड़ लगाया करहा, जेसरे कठे मसीह यीसूए हांऊ पकड़ी रा था । ¹³ हे भाईयो, मेरी इच्छा ये नी हाई कि हांऊ पकड़ी चुकिरा; पर सिर्फ एक काम करहा जो कि जो चीजा पीछे रही गईरी, तिन्हा जो भूली किन्हें, अगे बखा जो बढ़दा जाऊँ । ¹⁴ हांऊ निशाने री तरफ दोड़ेया करहा , ताकि से इनाम पाऊँ, जेसरे कठे परमेसरे मुंजो मसीह यीसू मन्झ ऊपर सादिरा । ¹⁵ इधी कठे आस्से जितने पक्के हुई गईरे, ये सोच रखा, होर अगर केसी गल्ला मन्झ तुस्सा री लग जे सोच ई, ता परमेसरा से भी तुस्सा पर जाहिर करी देणी । ¹⁶ इधी कठे जेथी तक आस्से पूजी गईरे, तेता रे मुताबक चला । ¹⁷ हे भाईयो, तुस्से सभ मिली किन्हें मेरे साहीं चाल चला, होर तिन्हा जो पैहचाणी रखा, जो एस तरीके पर चल्हा ऐ, जेसरा उद्धारण तुस्से आस्सा मन्झ पाहें । ¹⁸ क्यूंकि बौहत लोक एहड़ी चाल चल्हा ऐ, जिन्हा रे बारे मन्झ मैं तुस्सा जो बार बार बोलिरा होर एबे भी रोई रोई किन्हें बोल्ला, कि स्यों आपणे चाल चलना ले मसीह रे क्रूसा रे बैरी ऐ । ¹⁹ तिन्हा रा अंत विनास कारी आ, तिन्हा रा ईश्वर पेट आ, स्यों आपणी सरमा री गल्ला पर घमण्ड करहा ऐ, होर धरती री चीजा पर मन ल्गाहें । ²⁰ पर आस्सा रा आपणा देस स्वर्गा मन्झा आ; होर तेथी ले आस्से आपणे उद्धारकर्ता प्रभु यीसू मसीह रे आऊणे रा इंतजार करेया करहा ऐ । ²¹ से आपणी सक्ति रे तेस असरा रे मुताबक जेसरे ज्रीए से सभ चीजा जो आपणे बसा मन्झ करी सकहा, होर तेस आस्सा रे कमजोर सरीरा जो बदली किन्हें, आपणे दिव्या सरीरा साहीं बणाई देणा ।

4 ¹ इधी कठे हे मेरे प्यारे भाईयो, तुस्से, जो मेरी खुसी होर मेरे ताज ऐ, तुस्सा जो देखणे रा मेरा जी करहा, हे प्यारे भाईयो, प्रभु मन्झ इसी तरहा मजबूत रहा । ² हांऊ युआदिया होर संतुखे दुहीं ले अरज करहा कि स्यों प्रभु मन्झ एक मन रहे । ³ होर हे सच्चे, सहकर्मि हांऊ तेरे ले ये अरज करहा , कि तू तिन्हा जनानिया री मदद कर, क्यूंकि तिन्हे मेरे साउगी सुसमाचार बढ़ाणे मन्झ, क्लेमेन्स होर मेरे दूजे तिन्हा सहकर्मि समेत मैहनत कीती, जिन्हा रे नांऊ जिन्दगी री क्ताबा मन्झ लिखिरे । ⁴ प्रभु मन्झ हमेसा खुस रहुआ; हांऊ द्वारा बोल्ला, खुस रहुआ । ⁵ तुस्सा री कोमलता सभ माहणुआ पर प्रगट हो; प्रभु नेडे आ । ⁶ केसी भी गल्ला री फिकर नी करा; पर हर एक गल्ला मन्झ आपणी विनती, अरज होर याचना रे ज्रीए धन्यावादा समेत परमेसरा

रे साम्हणें रखे जाऊआ । ⁷ तेबे परमेसरा री सांति, जो समझा ले बाहर ई, तुस्सा रे दिल होर तुस्सा रे विचारा जो मसीह यीसू मन्झ सुरक्षित रखणी । ⁸ इधी कठे हे भाईयो, जो जो गल्ला सच्ची ई, जो जो गल्ला आदरा रे लायक, होर जो जो गल्ला ठीक ई, होर जो जो गल्ला पवित्र ई, होर जो जो गल्ला सुहावनी ई, होर जो जो गल्ला मनभावनी ई, इधी कठे, जो जो सद्गुण होर स्तुति री गल्ला ई, तिन्हा पर ध्यान ल्गाया करा । ⁹ जो गल्ला तुस्से मेरे ले सीखी, होर मन्नी, होर सुणी, होर मेरे मन्झ देखी, तिन्हा रा पालन करा, तेबे परमेसरा जो सांति रा सोता आ, तुस्सा साउगी रहैणा । ¹⁰ हांऊ प्रभु मन्झ बौहत खुस आ, कि एबे इतने ध्याडे ले बाद तुस्सा रा विचार मेरे बारे मन्झ द्वारा जागी गईरा; पक्का तुस्सा जो सुहरू मन्झ भी एता रा विचार था, पर तुस्सा जो मौका नी मिलेया । ¹¹ ये हांऊ आपणी कमी घटी री वजहा ले नी बोल्या करदा; क्यूंकि मैं ये सिखिरा कि जेस हालता मन्झ हांऊ हाया, तेता मन्झ ई हांऊ संतोष करूँ । ¹² हांऊ कमी घटी मन्झ रहैणां भी जाणहां होर बढ़ती मन्झ रहैणा भी जाणहा; मैं हर एक गल्ला मन्झ होर हर दसा मन्झ रजणा होर भूखा रहैणा, होर बढ़ना घटना सीखी लईरा । ¹³ जो मुंजो सक्ति देहां तेता मन्झ हांऊ सभ कुछ करी सकहा । ¹⁴ तेबे भी तैं भला कितेया, कि तुस्से मेरे दुःखा मन्झ मेरे भागीदार बणे । ¹⁵ होर हे फिलिप्पयो, तुस्से आपु भी जाणहा ऐं, कि सुसमाचारा रे सुरुआता मन्झ जेबे हांऊ मकीदुनिया ले चली गया, ता तेबे तुस्सा जो छाडी किन्हें केसी होरी मण्डलिये लैण देणा रे बारे मन्झ मेरी मदद नी कीती । ¹⁶ जेबे हांऊ थिस्सलुनिके मन्झ था, तेबे भी तुस्से मेरी जरूरत पूरी करणे रे कठे एक बार बल्कि बार बार दान भेजे । ¹⁷ ये गल नी ई कि हांऊ दान चाहां, पर हांऊ एहड़ा फल चाहां, जो तुस्सा रे फायदे रे कठे बढ़दा जाए । ¹⁸ मेरे वाले सभ कुछ हाया, बल्कि जरूरता ले भी ज्यादा आ; जो चीजा तुस्से इपफ्रुदितुसा रे हाथा ले भेजिरी थी, तिन्हा जो पाई किन्हें हांऊ रजी गईरा, से ता मना जो मोहणे वाळी खुसबू होर ग्रैहण करणे लायक बलिदान आ, जो परमेसरा जो खरा लच्छा । ¹⁹ होर मेरे परमेसरा भी आपणे तेस धना रे मुताबक जो महिमा समेत मसीह यीसू मन्झ ई, तुस्सा री हर एक कमी घटी पूरी करी देणी । ²⁰ आस्सा रे परमेसर होर पिता री जै जै कार जुग जुग हुन्दी रहे । आमीन । ²¹ हर एक संत जो यीसू मसीह मन्झ ऐ, नमस्कार । जो भाई मेरे साउगी ऐ, तुस्सा जो नमस्कार बोल्ला ऐ । ²² सभ संत लोक, खास करी किन्हें जो कैसरा रे घराने रे ऐ, तुस्सा जो नमस्कार बोल्ला ऐ । ²³ आस्सा रे प्रभु यीसू मसीह री दया तुस्सा री आत्मा साउगी रहे ।

कुलुस्सियों

1 पौलुसा री तरफा ले, जो परमेसरा री इच्छा ले मसीह यीसू रा प्रेरित आ, होर भाई तिमिथिउसा री तरफा ले । 2 मसीह मन्झ तिन्हा पवित्र होर विश्वासी भाईया रे नांऊ जो कुलुस्से मन्झ रँहयाँ, आस्सा रे पिता परमेसरा री तरफा ले तुस्सा जो अनुग्रह होर सांति मिले । 3 आस्से तुस्सा रे कठे हमेसा प्रार्थना करी किन्हें आपणे प्रभु यीसू मसीह रे पिता यानि परमेसरा रा धन्यवाद करहा ऐ । 4 क्यूंकि आस्से सुणीरा, कि मसीह यीसू पर तुस्सा रा विस्वास आ, होर सभ पवित्र लोका किन्हें प्यार रख्या ऐ । 5 ये तेस उम्मीदा री वजहा ले हुआ, जो तुस्सा रे कठे स्वर्गा मन्झ सम्भाळी किन्हें रखिरा, जेसरी चर्चा तुस्से तेस सुसमाचारा रे सच्चे बचना मन्झ सुणी चुकिरे । 6 सुसमाचार सारे संसारा मन्झ सफलता पाया करहा, ये तिहां ई सफल हुएआ करहा, जिहां तुस्से रे बिचा मन्झ तेस टैम सफल हुएआ करहा था जेबे तुस्से परमेसरा रे अनुग्रह रे बारे मन्झ सुणेया था होर सम्झेया था । 7 तेसरी शिक्षा तुस्से आस्सा रे प्यारे भाई सहकर्मि इपफ्रासा ले पाई, जो आस्सा रे कठे मसीह रा भरोसे रे लायक दास आ । 8 तिने ई तुस्सा रे प्यारा जो, जो आत्मा मन्झ आ आस्सा पर जाहिर कितेया । 9 इधी कठे जेस ध्याड़े ले आस्से ये सुणीरा आ, आस्से भी तुस्सा रे कठे प्रार्थना करणे होर विनती करणे ले नी रुके, ताकि तुस्से सारे आत्मिक ज्ञान होर समझा साउगी परमेसरा री इच्छा री पैहचाना मन्झ पुरे हुई जाओ । 10 ताकि तुस्सा रा चाल चलन प्रभु रे लायक हो, होर हर तरहा ले प्रभु जो खुस करा; होर तुस्सा मन्झ हर किस्मा रे भले कामा रे फल लगे, होर परमेसरा पैहचाना मन्झ बढ़दे जाओ । 11 होर तेसरी म्हीमा री सक्ति रे मुताबक सभ किस्मा री सामर्था ले मजबूत हुंदे जाओ, एथी तक तक कि खुसी किन्हें हर तरहा ले धीरज होर सैहनसिलता दसी सको । 12 होर पिता रा धन्यवाद करदे रहा, जिने तुस्से एस लायक बणाए, कि ज्योति मन्झ पवित्र लोका साउगी उत्तराधिकरा मन्झ भागीदार हो । 13 तिने ई आस्सा जो न्ह्यारे रे राजा ले छुडाई किन्हें आपणे प्यारे पुत्रा रे राजा मन्झ प्रवेस करवाया । 14 जेस मन्झ आस्सा जो छुटकारा यानि पापा री माफी मिली । 15 से ता अनदेखे परमेसरा रा प्रतिरूप होर सारी सृष्टि मन्झ पैहलौठा आ । 16 क्यूंकि तेस मन्झ ई सारी चीजा री रचना हुई, स्वर्गा री हो या धरती री, देखी या अनदेखी, क्या राजगद्दी, क्या प्रभुता, क्या प्रधानता, क्या हक, सारी चीजा तेसरे ज़ीए होर तेसरे कठे रची गई री । 17 होर से ई सभ चीजा मन्झ पैहला आ, होर सभ चीजा तेस मन्झ मजबूत रँहयाँ ई । 18 होर से ई

सरीर, यानि कलीसिया रा सिर आ; से ई आरम्भ होर मरिरे मंझा ले जिउन्दा हुणे बाळे मन्झ पैहलौठा आ ताकि हर गल्ला मन्झ पैहली जगहा तेस जो ई मिले । 19 क्यूंकि पिता री खुसी एता मन्झ ई हाई कि तेस मन्झ सारी परिपूर्णता वास करे । 20 होर तेसरे क्रूसा पर बहे गए खूना रे ज़ीए मेल मिलाप करी किन्हें, सभ चीजा जो तेसरे ज़ीए सारी चीजा रा आपणे साउगी मेल करी ले, चाहे स्यों धरती री हो, चाहे स्वर्गा री । 21 एक टैम था जेबे तुस्से आपणे विचारा होर बुरे कामा री वजहा ले परमेसरा रे कठे पराये होर तेसरे ब्रोधी थे । 22 फेरी भी तिने आपणे साम्हणे पवित्र होर निष्कलंक होर निर्दोष बणाई किन्हें हाजर करे । 23 अगर तुस्से विस्वासा री नीऊंआ पर मजबूत बणी किन्हें रहो, होर से सुसमाचारा री आस, जो तुसे सुणी, मत छाडा, जेसरा प्रचार सर्गा हेठ सारी सृष्टि मन्झ कितेया गया; होर जेसरा हांऊ पौलुस दास बणेया । 24 एबे हांऊ तिन्हा दुःखा री वजहा ले आनंद करहा, जो तुस्सा रे कठे उठाहां, होर मसीह रा सरीर यानि कलीसिया रे कठे मसीह री यातना मन्झ जो कुछ कमी रही गईरी थी, तेता जो आपण सरीरा मन्झ पूरी करहा । 25 परमेसरे तुस्सा रे फायदे रे कठे मुंजो हुक्म दितेया था, तेता रे मुताबक मुंजो तेसरे एक दासा रे रूपा मन्झ नियुक्त कितेया, ताकि हांऊ परमेसरा रे वचना रा पूरी तरहा ले प्रचार करूँ । 26 यानि से रहस्य जो यूग होर पीढिया ले गुप्त रँहया, पर एबे तेसरे तिन्हा पवित्र लोका पर जाहिर हुआ । 27 परमेसरे तिन्हा पर ये जाहिर करणा चाहेया कि अन्यजातिया मन्झ तेस रहस्या री म्हीमा रा धन क्या आ; होर से धन ये आ कि मसीह जो म्हीमा री आसा ई तुस्सा मन्झ रँहयाँ । 28 जेसरा प्रचार करी किन्हें आस्से हर एक माहणु जो जाहिर करी देहां ऐं, होर सारे ज्ञाना ले हर एक माहणु जो स्वाहें, कि आस्से हर एक माहणु जो मसीह मन्झ सिद्ध करी किन्हें हाजर करे । 29 होर एता रे कठे हांऊ तेसरी तेस्सा सक्ति रे मुताबक जो मेरे मन्झ सामर्था साउगी असर करहा ई, तन मन ल्वाई किन्हें मैहनत भी करहा ।

2 हांऊ चाहां की तुस्से जाणी लो, कि तुस्सा रे होर तिन्हारे जो लौदिकिया मन्झ ऐ, होर तिन्हा सभी रे कठे जो निजी तौरा पर मेरे किन्हें कधी नी मिले, कितनी कड़ी मैहनत करेया करहा । 2 ताकि तिन्हारे मना मन्झ सांति हो होर स्यों प्यारा किन्हें आपु मन्झ मिले रहें, होर विस्वासा रा से सारा धन जो सच्चे ज्ञाना ले मिल्ला, तिन्हा जो मिली जाए, होर परमेसर पिता रे भेदा जो यानि मसीह जो पैहचाणी ले । 3 जेस मन्झ बुद्धि होर

ज्ञाना रे सारे भण्डार छिपी रे । 4 हांऊ ये इधी कठे बोल्हा, कि कोई माहणु तुस्सा जो ललचाणे वाळी मीठी मीठी गल्ला बोली किन्हें धोखा नी दे । 5 क्यूंकि हांऊ अगर सरीरा रे स्हाभे तुस्सा ले दूर आ, तेबे बी आत्मिक तौरा पर हांऊ तुस्सा रे नेडे आ, होर तुस्सा रे अनुसासित होर मसीह मन्झ विस्वासा री मजबूती देखी किन्हें खुस हुहाँ । 6 इधी कठे जिहां तुस्से मसीह यीसू जो प्रभु जाणी किन्हें मनी लईरा, तिहां ई तेस मन्झ चल्दे रहो । 7 होर तेस मन्झ ई जड पकड़दे होर बढदे जाऊआ, होर जिहां तुस्से स्वाए गईरे तिहां ई विस्वासा मन्झ मजबूत हुंदे जाऊआ, होर बौहत ज्यादा धन्यवाद करदे रहूआ । 8 सावधान रहूआ कि तुस्सा जो कोई तेस तत्व ज्ञान होर बेकार खोखले प्रपंचा किन्हें ना भरमाई दे, जो माहणुआं री परम्परा होर संसारा री आदि सिखा रे मुताबक ई, पर मसीह रे मुताबक नी ई । 9 क्यूंकि परमेसर आपणी परिपूर्णता साउगी हमेसा तेस मन्झ वास करहा । 10 होर तुस्से तेस मन्झ भरपूर किते गईरे जो सारी प्रधानता होर अधिकारा रा मुखिया आ । 11 तेस मन्झ ई तुस्सा रा भी एहडा खतना हुआ, जो हाथा ले नी पर मसीह रे मुताबक खतना आ, जेस ले संसारिक सरीर तुआरी दितेया जाहां । 12 होर ये इधी कठे हुआ कि जेबे तुस्से जो बपतिस्मे मन्झ तेस साउगी दफनाए गए होर तेस साउगी जिउंदे भी किते गए ये तेस विस्वासा रे मुताबक हुआ जो परमेसरा री सामर्था पर निर्भर आ, जिने जे मसीह जो मरीरे मंझा ले जिउंदा कितेया । 13 होर तिने तुस्सा जो भी, जो आपणे पापा होर आपणे बगैर खतना वाळे सरीरा री दसा मन्झ मुर्दे थे, तेबे तिने मसीह साउगी तुस्सा जो जिउंदा करी दितेया; होर तिने आस्सा रे सभ पाप माफ करी दिते । 14 होर नियमा रा से लेख जो आस्सा रे नांऊआं पर होर आस्सा रे खलाफ था, मिटाई दितेया; होर तेस जो क्रुसा पर मेखा किन्हें जडी किन्हें आस्सा रे साम्हणे ले हटाई दितेया । 15 होर जेबे तिने प्रधानता होर अधिकारा जो आपणे ऊपरा ले तुआरी दितेया, तेबे तिन्हा पर जय पाई किन्हें तिन्हारा खुल्लम खुल्ला तमासा बणाया । 16 इधी कठे खाणे पीणे या पर्व या नंऊआं चाँद या सब्ता रे बारे मन्झ तुस्सा रा कोई फैसला ना करे । 17 क्यूंकि ये सभ हुणे वाळी गल्ला री छाया ई, पर एस छाया रा सच्चा मूल तत्व ता मसीहा रा आ । 18 कोई माहणु झूठी दीनता होर स्वर्गदूता री पूजा करी किन्हें तुस्सा जो दौडा रे फला ले दूर ना करे । एहडा आदमी देखीरी गल्ला मन्झ लगी रैहयाँ होर आपणी संसारिक समझा पर बेकार फुल्हा । 19 होर से तेस सिरोमणि किन्हें जुडी किन्हें नी रैहन्दा, जेस ले सारा सरीर जोडा होर स्राऊ रे ज्रीए पालन पोषण पाई किन्हें होर एक साथ गठी किन्हें, परमेसरा री तरफा ले बढदी जाहीं । 20 अगर तुस्से मसीह साउगी संसारा री आदि सिखा रे कठे मरी चुकिरे, ता फेरी संसारा मन्झ तिन्हा साहीं किधियो

जिंदगी बिताहें, होर एहडे नियमा रा पालन करहा ऐ, जिहां जे । 21 कि एता जो हाथ मत लगाऊआ, एता जो मत स्वादा, एता जो मत छुआ । 22 क्यूंकि ये नियम माहणुआ रे हुक्मा होर सिखा रे मुताबक ऐ, ये नियम तिन्हा सभ चिजा रे बारे मन्झ ऐ, जो इस्तेमाला मन्झ आऊन्दे आऊन्दे नास हुई जाहें । 23 ये एहडे नियम ऐ यानि धार्मिक दिखाऊआ, आत्मत्याग, होर सख्त सारीरिक पीडा जिन्हा मन्झ ज्ञाना रा नांऊ ता पक्का आ, पर इन्हा नियमा ले सारीरिक इच्छा जो रोकणे मन्झ कुछ फायदा नी हुंदा ।

3 1 इधी कठे जेबे तुस्से मसीह साउगी जिउंदे किते गए, ता स्वर्गा री चीजा री टोळा मन्झ रहूआ, जेथी मसीह आ होर परमेसरा रे दाई तरफ बैठीरा । 2 आपणा मन धरती री चीजा पर नी पर स्वर्गा री चीजा पर लगाऊआ । 3 क्यूंकि तुस्से ता मरी गए, होर तुस्सा री जिंदगी मसीह साउगी परमेसरा मन्झ छिपिरी । 4 जेबे मसीह जो आस्सा री जिंदगी ई, जाहिर हुणा, तेबे तुस्से भी तेस साउगी म्हीमा साउगी प्रगट किते जाणे । 5 इधी कठे आपणे तिन्हा अंगा जो मारी देआ, जो धरती पर ऐ, यानि व्यभिचार, अशुद्धता, बुरी इच्छा, बुरी लालसा होर लोभा जो, जो मूर्ति पूजा रे बराबर आ । 6 इन्हा री वजहा ले परमेसरा रा कोप हुक्म नी मनणे वाळेया पर पहुँआं । 7 होर तुस्से भी, जेबे इन्हा बुराईया मन्झ जिंदगी बिताहें थे, ता इन्हा रे मुताबक चल्हा ऐ थे । 8 पर एबे तुस्से भी इन्हा सभ जो यानि गुस्सा, रोष, बैरभाव निंदा होर मुंहा ले गाळीया बकणा छाडी देऊआ । 9 एक दूजे किन्हें झूठ मत बोला क्यूंकि तुस्से पुराणे मनुष्यत्व जो तेसरे कामा समेत छाडी दितेया । 10 होर नंऊए मनुष्यत्व जो पैहनी लईरा जो आपणे सिरजनहारा रे स्वरूपा रे मुताबक ज्ञान पाणे रे कठे नंऊआं बणदा जाहां । 11 तेस मन्झ ना ता यूनानी रैहया, ना यहूदी, ना खतना वाळे ना बगैर खतना वाळे, ना जंगली, ना स्कूती, ना दास होर ना अजाद, सिर्फ मसीह सभ कुछ होर सभ मन्झ आ । 12 क्यूंकि तुस्से परमेसरा रे चुणीरे होर पवित्र होर प्यारे जन ऐ इधी कठे आपणे दिला मन्झ सहानुभूति, करुणा, दीनता, नम्रता होर सैहनसिलता धारण करा । 13 होर अगर केसी जो केसी पर दोष लगाणे री कोई वजह हो, ता एक दूजे री सही लो, होर एक दूजे रे पाप माफ करो; जिहां प्रभुए तुस्सा रे पाप माफ किते, तिहां ई तुस्से भी करा । 14 इन्हा सभ ले ऊपर प्यार, जो एकता रा सिद्ध बंधन आ, धारण करी लऊआ । 15 होर मसीह री सांति जेसरे कठे तुस्से एक सरीर हुई किन्हें सादे गईरे, तुस्सा रे दिला मन्झ राज करे, होर तुस्से धन्यवादी बणे रहो । 16 मसीह रे वचना जो आपणे दिला मन्झ ज्यादा ले ज्यादा बसणे दो; होर सिद्ध ज्ञाना समेत एक दूजे जो सिखाऊआ, होर चेतावनी देआ, होर आपणे आपणे मना मन्झ अनुग्रहा साउगी परमेसरा रे कठे भजन होर स्तुतिगान

होर आत्मिक गीत गाऊआ । ¹⁷ होर वचना ले या कामा ले जो कुछ तुस्से करो सभ कुछ यीसू रे नांऊआं ले करा; होर तेसरे जीए परमेसरा पिता रा धन्यवाद करा । ¹⁸ हे लाडीयो, जेहड़ा प्रभु मन्झ ठीक आ, तेहड़ा ई आपणे आपणे लाड़े रे अधीन रहूआ । ¹⁹ हे लाड़ेयो, आपणी आपणी लाडी किन्हें प्यार रखा, होर तिन्हा किन्हें सखती ना करा । ²⁰ हे बच्चेयो, सभ गल्ला मन्झ आपणे आपणे माऊ बाबा रा हुक्मा रा पालन करा, क्यूंकि प्रभु एता ले खुस हुंहां । ²¹ हे बच्चे वाळेयो, आपणे बाल बच्चेया जो तंग नी करा, एहड़ा नी हो कि तिन्हा री हिम्मत टूटी जाए । ²² हे दासो, माहणुआं जो खुस करणे वाळेया साहीं सिर्फ दिखावटी रूपा ले नी, बल्कि प्रभु रा डर मन्त्रदे हुए, दिला री सच्चाई किन्हें, तिन्हारी सभ गल्ला मन्झ हुक्म मना जो सरीरा रे मुताबक तुस्सा रे स्वामी ऐ । ²³ होर जो कुछ तुस्से करहा ऐ, तन मना ले करा, ये समझी किन्हें कि माहणुआं रे कठे नी, पर प्रभु रे कठे करहा ऐ । ²⁴ क्यूंकि तुस्से जाणहां ऐ कि तुस्सा जो एता रे बदले प्रभु ले उत्तराधिकार मिलणा; तुस्से प्रभु मसीह री सेउआ करहा ऐ । ²⁵ क्यूंकि जो बुरा करहा, तेस आपणी बुराई री फल पाणा, होर तेथी कोई भेदभाव नी हुंदा ।

4 ¹ हे स्वामियो, आपणे आपणे दासा साउगी न्याय होर ठीक ठीक व्यवहार करा, ये समझी किन्हें कि स्वर्गा मन्झ तुस्सा रा भी एक मालक आ । ² प्रार्थना मन्झ लगे रहो, होर धन्यवादपूर्वक प्रार्थना मन्झ जागदे रहूआ । ³ होर एता साउगी साउगी आस्सा रे कठे भी प्रार्थना करदे रहया, कि परमेसर आस्सा रे कठे वचन सुनाणे रा एहड़ा रस्ता खोल्ले, कि आस्से मसीह रे तेस भेदा रा बखान करी सके जेसरे कठे हांऊ कैदा मन्झ आ । ⁴ होर तेस जो हांऊ एहड़ा जाहिर करूँ, जेहड़ा मुंजो करणा भी चहिए । ⁵ टैमा जो कीमती जाणी किन्हें बाहर वाळेया साउगी बुद्धिमानी किन्हें व्यवहार करा । ⁶ तुस्सा री बोल चाल हमेसा अनुग्रहमयी होर सलोनी हो ताकि तुस्सा जो हर एक माहणु जो ठीक ढंगा किन्हें जबाब देणा आई जाए । ⁷ आस्सा रा

प्यारा भाई होर भरोसे रे लायक दास, तुखिकुस जो प्रभु मन्झ मेरा सहकर्मी आ, तेस मेरी सभ गल्ला तुस्सा जो दसी देणी । ⁸ में से इधी कठे तुस्सा वाले भेजिरा, कि तुस्सा जो आस्सा री दसा पता चली जाए होर से तुस्सारे दिला जो तसल्ली देई सके । ⁹ होर हांऊ तेस साउगी भरोसे रे लायक होर प्यारे भाई उनेसिमुसा जो भी भेज्या करहा, जो तुस्सा मंझा ले एक आ, तिन्हा तुस्सा जो एथी री सारी गल्ला होर हाल चाल दसी देणे । ¹⁰ अरिस्तर्खुस जो मेरे साउगी कैदी आ, होर मरकुस जो बरनबासा रा भाई आ, जेसरे बारे मन्झ तुस्सा जो हुक्म दितिरा था कि जेबे से तुस्सा वाले आए, ता तेस किन्हें ठीक ढंगा किन्हें व्यवहार करणा । ¹¹ होर यीसू जेस जो युस्तुस भी बोल्ला ऐ, तेसरा भी तुस्सा जो नमस्कार, खतना वाळे यहूदिया मन्झा ले सिर्फ ये ई परमेसरा रे राजा रे कठे मेरे साउगी काम करेया करहा ऐ । ¹² इपफ्रासा रा भी तुस्सा जो नमस्कार पूजे, से तुस्सा मंझा ले ई एक आ, होर मसीह यीसू रा दास आ, से हमेसा बड़ी लग्ना किन्हें प्रार्थना करदा रहैयाँ, कि तुस्से पक्के हुई किन्हें पुरे विस्वासा साउगी परमेसरा री सारी इच्छा पर मजबूत रहो । ¹³ हांऊ तेसरा गुआह आ, कि से तुस्सा रे कठे होर लौदिकिया होर हियरापोलिसा रे बसिंदे रे कठे हमेसा कड़ी मैहनत करदा रहया । ¹⁴ प्यारा डाक्टर लुका होर देमासा रा तुस्सा जो नमस्कार । ¹⁵ लौदिकिया रे भाईया जो होर नमुफास होर तिन्हारे घरा री कलीसिया जो नमस्कार । ¹⁶ होर जेबे ये चिठी तुस्सा रे साम्हणे पढी जाए, ता एस गल्ला रा ख्याल रखणा कि से चिठी लौदिकिया री कलीसिया मन्झ भी पढी जाए, होर लौदिकिया ले जो चिठी तुस्सा जो मिले, तेता जो तुस्से भी पढी लया । ¹⁷ फेरी अर्खिप्पुसा किन्हें बोल्या, कि जो सेउआ प्रभु मन्झ तुजो सौंपी गईरी, तेता जो सावधानी किन्हें पूरी करेया । ¹⁸ हांऊ पौलुस आपणे हाथा ले नमस्कार लिख्या करहा, ये याद रखणा कि हांऊ जेहला मन्झ आ; तुस्सा पर दया हुंदी रहे । आमीन ।

1 थिस्सलुनीकियों

1 ¹ पौलुस होर सिल्वानुस होर तिमिथिउसा री तरफा ले थिस्सलुनकियो री कलीसिया रे नांऊ जो परमेसर पिता होर प्रभु यीसू मसीह मन्झ ऐ, अनुग्रह होर सांति तुस्सा जो मिल्दी रहे । ² आस्से आपणी प्रार्थना मन्झ तुस्सा जो याद करहा ऐ होर हमेसा तुस्सा सभी रे बारे मन्झ परमेसरा रा धन्यबाद करहा ऐ । ³ होर आपणे परमेसर होर पिता रे साम्हणे तुस्सा रे विस्वासा रे काम, होर प्रेमपूर्ण मैहनत, होर आस्सा रे प्रभु यीसू मसीह मन्झ उम्मीदा ले उत्पन तुस्सा री धीरज पूर्ण सैहनसीलता रा आस्सा जो हमेसा ख्याल रेंहयां । ⁴ होर ये भाईयो, परमेसरा रे प्यारे लोको आस्से जाणहां ऐं, कि तुस्से चुणीरे ऐ । ⁵ क्यूंकि आस्सा रा सुसमाचार तुस्सा वाले ना सिर्फ वचना मन्झ बल्कि सामर्थ होर पवित्र आत्मा, होर बडे निश्चय किन्हें पुजीरा; जेहडा तुस्से जाणहां ऐं, कि आस्से तुस्सा रे कठे तुस्सा रे बीचा मन्झ केहडे लोक बणी गईरे थे । ⁶ होर तुस्से बडे दुःखा रे बीचा मन्झ पवित्र आत्मा रे ज़ीए मिलणे वाळी खुसी साउगी सुसमाचार ग्रैहण कितेया होर आस्सा रा होर प्रभु रा अनुसरण करदे लगे । ⁷ होर एथी तक कि मकिदुनिया होर अखाया रे सभ विस्वासिया रे कठे तुस्से आदर्स बणे । ⁸ क्यूंकि तुस्सा रे एथी ना सिर्फ मकिदुनिया होर अखाया मन्झ प्रभु रा वचन सुणाया गया, पर तुस्सा रे विस्वासा री जो परमेसरा पर आ, हर जगहा एहडी चर्चा फैलही गई, कि आस्सा जो बोलणे री जरूरत नी ई । ⁹ क्यूंकि तुस्सा रे एथी ना सिर्फ मकिदुनिया होर अखाया मन्झ प्रभु रा वचन सुणाया गया, पर तुस्सा रे विस्वासा री जो परमेसरा पर आ, हर जगहा एहडी चर्चा फैलही गई, कि आस्सा जो बोलणे री जरूरत नी ई । ¹⁰ होर तेसरे पुत्रा रा स्वर्गा परा ले आऊणे रा इंतजार करदे रहुआ, जेस जो तिने मरिरे मन्झा ले जिउंदा कितेया, यानि यीसू रा, जो आस्सा जो आऊणे वाळे कोपा ले बचाहां ।

2 ¹ हे भाईयो, तुस्से आपु ई जाणहां ऐं कि आस्सा रा तुस्सा वाले आऊणा बेकार नी हुआ । ² बल्कि तुस्से आपु ई जाणहां ऐं, कि फिलिप्पी मन्झ दुःख उठाणे होर उपद्रव सैहणे ले बाद भी आस्सा जो आपणे परमेसरा मन्झ एहडी हिम्मत हुई कि घोर ब्रोध हुणे पर भी आस्से तुस्सा जो परमेसरा रा सुसमाचार सुणाई सके । ³ क्यूंकि आस्सा रा उपदेस ना भ्रमा ले, होर ना असुद्धता ले, होर ना छल कप्टा साउगी आ । ⁴ पर जिहां परमेसरे आस्सा जो लायक समझी किन्हें आपणा सुसमाचार सौम्पेया, इधी कठे आस्से माहणुआं जो नी पर दिला जो जांचने वाळे परमेसरा जो खुस करणे रे कठे प्रचार करहा ऐ । ⁵ क्यूंकि तुस्से

जाणहां ऐं, कि आस्से ना ता कधी चापलूसी री गल्ला करहा ऐ थे, होर ना लोभ लाळचा रा कोई बहाना करहा ऐ थे, परमेसर गुआह आ । ⁶ होर जेबकी आस्से मसीह रे प्रेरित हुणे रे नाते तुस्सा पर बोझ पाई सकहा ऐ थे, तेबे भी आस्से माहणुआं ले आदर नी चाहंदे थे, होर ना तुस्सा ले, होर ना केसी होरी ले । ⁷ पर तुस्सा रे बीचा मन्झ आस्से एहडी नम्रता दसी जिहां एक दूध पियाणे वाळी माऊ आपणे बच्चेया रा पालन पोषण करहा ई । ⁸ तिहां ई आस्सा जो तुस्सा रे प्रति ममता हुणे री वजहा ले आस्सा जो खुसी हुई कि ना सिर्फ परमेसरा रा सुसमाचार सुणाए, बल्कि तुस्सा रे कठे आपणी जान भी देई दे, क्यूंकि तुस्से आस्सा रे कठे बौहत प्यारे हुई गईरे थे । ⁹ क्यूंकि हे भाईयो, तुस्से आस्सा री मैहनता होर दुःखा जो याद करहा ऐ, कि आस्से रात ध्याइ काम धंधा करी किन्हें तुस्सा मन्झ परमेसरा रा सुसमाचार प्रचार कितेया, ताकि आस्से तुस्सा मंझा ले केसी पर बोझ नी बणे । ¹⁰ तुस्से आपु ई गुआह ऐ, होर तिहां ई परमेसर भी गुआह आ, कि आस्से तुस्सा विस्वासिया साउगी पवित्रता, धार्मिकता, होर निर्दोषता रा व्यवहार कितेया । ¹¹ तुस्से जाणहां ऐं कि जिहां एक बाप आपणे बच्चे साउगी व्यवहार करहा, तिहां ई आस्से भी तुस्सा मन्झा ले हर एकी जो उपदेस देहां ऐं, होर सांति देहां ऐं, होर सम्झाहें थे । ¹² कि तुस्सा रा चाल चलन परमेसरा रे लायक हो, जो तुस्सा जो आपणे राज होर म्हीमा मन्झ साद्हा । ¹³ इधी कठे आस्से भी परमेसरा रा धन्यबाद लगातार करहा ऐ; ताकि जेबे आस्सा रे ज़ीए परमेसरा रा वचन तुस्सा वाले पौहन्चेया, ता तुस्से से माहणुआं रा नी, पर परमेसरा रा वचन समझी किन्हें ग्रैहण कितेया, होर सच्चे ये परमेसरा रा वचन आ, जो तुस्सा विस्वासिया मन्झ काम करहा । ¹⁴ हे भाईयो, इधी कठे कि तुस्से, मसीह यीसू मन्झ परमेसरा री तिन्हा कलीसिया साहीं चाल चल्दे लगे, जो यहूदिया मन्झ ऐ, क्यूंकि तुस्से भी आपणे लोका ले तेहडा ई दुःख पाया, जेहडा तिन्हे यहूदिया ले पाईरा था । ¹⁵ जिन्हें जे प्रभु यीसू होर नबी भी मारी दिते होर तिन्हें आस्से भी सताये, होर परमेसर तिन्हा किन्हें खुस नी आ, होर स्यों सभ माहणुआं रा ब्रोध करहा ऐ । ¹⁶ होर स्यों आस्सा जो अन्यजातिया मन्झ उद्दारा रा सुसमाचार प्रचार करणे ले रोकहा ऐ, ताकि स्यों हमेसा आपणे पापा रा घडा भरदे रहे । पर एबे ता परमेसरा रा कोप तिन्हा पर पूरी तरहा ले पई गया । ¹⁷ हे भाईयो, आस्से तुस्सा ले थोहडी देरा रे कठे दूर हुई गईरे थे, आत्मा मन्झ नी, पर सरीरा मन्झ, ता आस्से तुस्सा किन्हें मिलणे रे कठे होर तुस्सा रा मुंह देखणे रे कठे होर भी जतन

कितेया । ¹⁸ इधी कठे कि आस्से तुस्सा वाले आऊणे री इच्छा रख्हा ऐ थे, आपु, हांऊ पौलुस, कई बार आऊणा चाहां था, पर सैतान बिघ्न पांदा रहैया । ¹⁹ भला आस्सा री आस, या खुसी या म्हीमा रा ताज क्या आ? आस्सा रे प्रभु यीसू रे आगमना रे टैमा तेसरे साम्हणे क्या आस्सा नी हुणां? ²⁰ आस्सा री म्हीमा होर खुसी तुस्से ई ऐ ।

3 ¹ इधी कठे जेबे आस्से होर इंतजार नी करी सके, ता आस्से ये तय कितेया कि एथेंसा मन्झ हांऊ कल्हा रही जांऊं । ² होर आस्से तिमिथिउस जो मसीह रे सुसमाचारा मन्झ आस्सा रा भाई, होर परमेसरा रा दास आ, से मैं तुस्सा वाले इधी कठे भेज्या, ताकि से तुस्सा जो मजबूत करे; होर तुस्सा रे विस्वासा रे बारे मन्झ तुस्सा जो समझाए । ³ ताकि कोई इन्हा दुःखा री वजहा ले डगमगाई नी जाए; क्यूंकि तुस्से आपु जाणहां ऐं कि आस्से इन्हा यातना रे कठे नियुक्त किते गईरे । ⁴ क्यूंकि पैहले भी, जेबे आस्से तुस्सा साउगी थे, ता तुस्से बोल्या करहा ऐ थे, कि आस्सा जो दुःख उठाणे पऊणे, होर एहड़ा ई हुआ, होर तुस्से ता ये जाणहां ऐं । ⁵ एता री वजहा ले जेबे मेरे ले होर इंतजार नी हुआ, ता तुस्सा रे विस्वासा रा हाल जाणने रे कठे मैं तिमिथिउस भेजी दितेया, ताकि केते एहड़ा नी हो, कि परीक्षा करणे वाळे तुस्सा री परखणी कितिरी हो, होर आस्सा री मैहनत बेकार हुई गईरी हो । ⁶ पर एबे जेव्की तिमिथिउस तुस्सा रे विस्वास होर प्यारा रा सुभ समाचार लई किन्हें आस्सा वाले वाप्स आई गया, होर तिने ये भी दस्सेया कि तुस्से आस्सा जो प्यार पूर्वक याद रख्हा ऐ, होर जिहां आस्से तुस्सा जो तिहां ई तुस्से भी आस्सा जो देखणे रे कठे तरस्या करहा ऐ । ⁷ इधी कठे हे भाईयो, आस्से आपणे सारे दुःख होर पीडा मन्झ तुस्सा रे विस्वासा री वजहा ले आस्से तुस्सा रे बारे मन्झ सांति पाई । ⁸ क्यूंकि एबे अगर तुस्से प्रभु मन्झ मजबूती किन्हें टिके रहो ता आस्से सच्चे जिउंदे ऐ । ⁹ होर जो खुसी आस्सा जो तुस्सा रे बारे मन्झ, तुस्सा री वजहा ले मिल्हा ई, तेता रे कठे आस्से आपणे परमेसरा रा धन्यवाद किहां करिए? ¹⁰ आस्से राती ध्याडी बडी लग्ना किन्हें प्रार्थना करहा ऐ, ताकि आस्से तुस्सा रा मुंह देखे, होर तुस्सा रे विस्वासा री कमी पूरी करे । ¹¹ एबे आस्सा रा परमेसर होर पिता आपु ई, होर आस्सा रा प्रभु यीसू, तुस्सा वाले आऊणे रे कठे आस्सा री अगुवाई करे । ¹² होर प्रभु एहड़ा करे, कि जेहड़ा आस्से तुस्सा किन्हें प्यार रख्हा ऐ; तेहड़ा ई तुस्सा रा प्यार भी आपु मन्झ, होर सभ माहणुंआं साउगी बढे, होर तरक्की करदा जाए । ¹³ ताकि से तुस्सा रे मना जो एहड़ा मजबूत करे, कि जेबे आस्सा रे प्रभु यीसू आपणे सभ लोका साउगी आए, ता स्यों आस्सा रे परमेसर होर पिता रे साम्हणे पवित्रता मन्झ निर्दोष बणें ।

4 ¹ हे भाईयो, आस्से तुस्सा ले अरज करहा ऐ, होर तुस्सा जो प्रभु यीसू मन्झ सम्झाहें, कि जिहां तुस्से आस्सा ले ठीक चाल चलणा, होर परमेसरा जो खुस करणा सिख्या, होर तुस्से ठीक चाल चल्हा भी ऐ, तिहां ई होर बी ज्यादा बढे जाऊआ । ² क्यूंकि तुस्से जाणहां ऐं, कि आस्से प्रभु यीसू री तरफा ले तुस्सा जो कुण कुण जे हुक्म दिते । ³ क्यूंकि परमेसरा री इच्छा ये ई, कि तुस्से पवित्र बणां; यानि व्यभिचारा ले बची किन्हें रहा । ⁴ होर तुस्सा मंझा ले हर एक आदमी आपणी लाडी जो पवित्रता होर इज्जता किन्हें हासल करणा जाणे । ⁵ होर अन्यजातिया साहीं कामुक हुई किन्हें नी, जो परमेसरा जो नी जाणदे । ⁶ ये भी परमेसरा री इच्छा ई कि एस गल्ला मन्झ कोई भी आपणे भाई रे प्रति पाप नी करे होर ना ई ठगे, क्यूंकि प्रभु इन्हा सभ गल्ला रा बदला लेणे वाळा आ; जेहड़ा कि आस्से पैहले तुस्सा किन्हें बोल्या, होर चिताया भी था । ⁷ क्यूंकि परमेसरे आस्से असुद्ध हुणे रे कठे नी, पर पवित्र हुणे रे कठे सादिरे । ⁸ इधी कठे जो तुच्छ जाणहां, से माहणु जो नी, पर परमेसरा जो तुच्छ जाणहां, जो आपणा पवित्र आत्मा तुस्सा जो देहां । ⁹ पर भाई चारे रा प्यारा रे बारे मन्झ ये जरूरी नी आ कि कोई तुस्सा जो लिखे; क्यूंकि आपु मन्झ प्यार रखणा तुस्से आप्पुए परमेसरा ले सिख्या । ¹⁰ होर सारे मकिदुनिया रे सभ भाईया साउगी एहड़ा करहा ऐ, पर हे भाईयो, आस्से तुस्सा जो सम्झाहें, कि होर भी ज्यादा बढे जाऊआ । ¹¹ होर जेहड़ा आस्से तुस्सा जो हुक्म दितेया, तिहां ई चुपचाप रहणे होर आपणा आपणा काम काज करणे, होर आपणे आपणे हाथा ले कमाणे री कोसिस करा । ¹² ताकि बाहर वाले साउगी सभ्यता किन्हें व्यवहार करा, होर तुस्सा जो केसी चीजा री कमी नी हो । ¹³ हे भाईयो, आस्से नी चाहंदे, कि तुस्से तिन्हारे बारे मन्झ अनजाण रहो जो मरी जाहें, एहड़ा नी हो, कि तुस्से होरिया साहीं दुःखी हो, जिन्हा जो कोई आस नी ई । ¹⁴ क्यूंकि अगर आस्से विस्वास करहा ऐ, कि यीसू मरेया, होर जिउंदा भी हुई गया, ता तिहां ई परमेसरा भी स्यों जो मसीह यीसू मन्झ मरी गये, तेस स्यों सभ आपु साउगी लई आऊणे । ¹⁵ क्यूंकि आस्से प्रभु रे बचना रे मुताबक तुस्सा किन्हें ये बोल्हा ऐ, कि आस्से जो जिउंदे ऐ, होर प्रभु रे आऊणे तक बची रहेंगे, ता आस्सा तिन्हा ले अगे नी निकळणा जो मरी चुकिरे । ¹⁶ क्यूंकि प्रभुआ आपणे आप स्वर्गा ले उतरणा; तेस टैम ललकार, होर प्रधान दूता रा अवाज सुणाई देणी, होर परमेसरा री तुरही बजाई जाणी, होर जो मसीह मन्झ मरी गईरे, तिन्हा पैहले जी उठणा । ¹⁷ तेता ले बाद आस्से, जो जिउंदे ऐ, तिन्हा साउगी हवा मन्झ प्रभु किन्हें मिलणे रे कठे बदला पर उठाए जाणे, होर इस तरहा आस्सा हमेसा हमेसा आपणे प्रभु साउगी रहणा । ¹⁸ इधी कठे इन्हा गल्ला ले एक दूजे जो सांति देआ करा ।

5¹ पर एबे हे भाईयो, एता री तुस्सा जो जरूरत नी ई, कि टैम होर काला रे बारे मन्झ तुस्सा जो कुछ लिख्या जाए।² क्यूंकि तुस्से ठीक ढन्गा किन्हें आप्पुए जाणहां ऐं, कि जिहां जे राती चोर आहूंआं, तिहां ई प्रभु रा ध्याडा आऊणे वाळा आ।³ जेबे लोका ये बोलणा, कि सभ कुछ सांत होर सुरक्षित आ, तेबे जिहां एक गर्भवती जनाने जो अचानक पीडा सुरहु हुई जाहीं, तिहां ई तिन्हा पर भी विनास आई जाणा, होर तिन्हा नी बचणा।⁴ पर हे भाईयो, तुस्से ता न्ह्यारे मन्झ नी ऐ, कि से ध्याडा तुस्सा पर चोरा साहीं आई जाए।⁵ क्यूंकि तुस्से सभ ज्योति री संतान होर दिना रे संतान ऐ, आस्से ना ता रातके ऐ, होर ना न्ह्यारे रे ऐ,⁶ इधी कठे आस्से होरी साहीं सौंदे नी रही जाए, पर जाग्दे होर सावधान रहुआ।⁷ क्यूंकि जो सौंदे रेंहे, स्यों राती ई सौंहा ऐं, होर जो मतवाळे हुहां ऐं, स्यों राती ई हुहां ऐं।⁸ पर आस्से ता दिना रे ऐ, विस्वास होर प्यारा री झिलम पैहनी किन्हें होर उद्दारा रा टोप पैहनी किन्हें सावधान रहुआ।⁹ क्यूंकि परमेसरे आस्सा जो गुस्से रे कठे नी, पर इधी कठे नियुक्त कितेया, ताकि आस्से आपणे प्रभु यीसू मसीह रे ज्रीए उद्धार पाए।¹⁰ से आस्सा रे कठे इधी कठे मरेया, कि चाहे आस्से जिउंदे हो, या चाहे मरी जाए; आस्से सभ मिली किन्हें तेस साउगी जिन्दगी जीएं।¹¹ इधी कठे एक दूजे जो सांती दो, होर एक दूजे री तरक्की री वजहा बणां, होर एहडा तुस्से करहा भी ऐ।¹² होर हे भाईयो, आस्से तुस्सा ले अरज करहा ऐ, कि तिन्हारी इज्जत करा जो तुस्सा रे बीचा मन्झ

बौहत मैहनत करहा ऐ, होर जो प्रभु मन्झ तुस्सा रे अगुवे ऐ, होर तुस्सा जो स्वाहें, तिन्हा री मना।¹³ होर तिन्हारे कामा रे वजहा ले बडे प्यारा किन्हें तिन्हा जो बौहत ई आदरा रे लायक समझा; आपु मन्झ मेल मिलापा किन्हें रहुआ।¹⁴ होर हे भाईयो, आस्से तुस्सा जो सम्झाहें, कि जो ठीक चाल नी चल्दे, तिन्हा जो समझाऊआ, डरपोका जो हिम्मत देआ, कम्जोरा जो संभाळा, सभ जो सैहनशीलता दसा।¹⁵ सावधान! कोई केसी किन्हें बुराई रे बदले बुराई नी करे, पर हमेसा भलाई करणे रा जतन करे।¹⁶ हमेसा खुस रहुआ।¹⁷ लगातार प्रार्थना मन्झ लगे रहुआ।¹⁸ हर एक गल्ला मन्झ धन्याबाद देआ, क्यूंकि तुस्सा रे कठे मसीह यीसू मन्झ परमेसरा री येही इच्छा ई।¹⁹ आत्मा जो नी बुझाऊआ।²⁰ भविष्यवाणीया जो बेकार मत समझा।²¹ सभ गल्ला जो परखा; जो खरी गल्ला ई तिन्हा जो पकड़े रहुआ।²² सभ किस्मा री बुराई ले बची किन्हें रहुआ।²³ सांति रा परमेसर आपु ई तुस्सा जो पूरी तरहा ले पवित्र करे; होर तुस्सा री आत्मा होर प्राण होर सरीर आस्सा रे प्रभु यीसू मसीह रे आऊणे तक पुरे पुरे होर निर्दोष होर सुरक्षित रहे।²⁴ तुस्सा रा सादणे वाळा सच्चा आ, होर तेस एहडा ई करणा।²⁵ हे भाईयो, आस्सा रे कठे प्रार्थना करा।²⁶ सभ भाईया जो पवित्र चुम्बन देई किन्हें नमस्कार करा।²⁷ हांऊ तुस्सा जो प्रभु री कसम देहां, कि ये चिठी सभ भाईया जो पढी किन्हें सुणाई जाए।²⁸ आस्सा रे प्रभु यीसू री दया तुस्सा पर हुन्दी रहे।

2 थिस्सलुनीकियों

1 ¹ पौलुस होर सिलवानुसा होर तिमिथिउसा री तरफा ले थिस्सलुनकियो री कलीसिया रे नांऊ, जो आस्सा रे पिता परमेसर होर प्रभु यीसू मसीह मन्झ ऐ। ² आस्सा रे पिता परमेसर होर प्रभु यीसू मसीह तुस्सा जो अनुग्रह होर सांति मिल्दी रहे। ³ हे भाईयो, तुस्सा रे बारे मन्झ आस्सा जो हर टैम परमेसरा रा धन्यवाद करणा चाहिए, होर ये ठीक भी आ, इधी कठे कि तुस्सा रा विस्वास बौहत बढ़ी गईरा, होर तुस्सा मंझा ले हर एकी रा प्यार आपु मन्झ बौहत बढ़दा जाहां। ⁴ एथी तक कि आस्से परमेसरा री कलीसिया मन्झ तुस्सा रे बारे मन्झ घमंड करहा ऐ, कि जितने उपद्रव होर दुःख तुस्से सैहन करहा ऐ, तिन्हा सभी मन्झ तुस्सा रा धीरज होर विस्वास जाहिर हुहां। ⁵ ये परमेसरा रे सच्चे न्याया रा साफ सबूत आ; कि तुस्से परमेसरा रे राजा रे लायक बणा, जेस रे कठे तुस्से दुःख भी उठाहें। ⁶ क्यूंकि परमेसरा री नजरा मन्झ ये फैसला ठीक आ, कि जो तुस्सा जो दुःख देहां ऐं, तिन्हा जो बदले मन्झ दुःख दितेया जाए। ⁷ होर तुस्से दुःख उठाणे वाळेया जो आस्सा साउगी तेस टैम अराम दितेया जाए; जेबे प्रभु यीसू आपणे सामर्थी दूता साउगी स्वर्गा ले धधकती हुई आगा मन्झ जाहिर हुणा। ⁸ होर जो परमेसरा जो नी जाणदे, होर आस्सा रे प्रभु यीसू रे सुसमाचारा जो नी मन्नदे तिन्हा ले बदला लैणा। ⁹ तिन्हा प्रभु रे साम्हणे ले होर तेसरी सक्ति रे तेजा ले दूर हुई किन्हें अनन्त विनासा री सजा पाणी। ¹⁰ ये तेस ध्याड़े हुणा, जेबे तेस आपणे पवित्र लोका मन्झ म्हीमा पाणे, होर सभ विस्वास करणे वाळे मन्झ चमत्कारा री वजहा बणने रे कठे आऊणा, क्यूंकि तुस्से आस्सा री गुआही रा विस्वास कितेया। ¹¹ इधी कठे आस्से हमेसा तुस्सा रे कठे त्यार प्रार्थना भी करहा ऐं, कि आस्सा रा परमेसर तुस्सा जो एस बुलाहटा रे लायक समझे, होर भलाई री हर एक इच्छा, होर विस्वासा रे हर एक कामा जो सामर्था साउगी पूरा करे। ¹² कि आस्सा रे परमेसर होर प्रभु यीसू मसीह रे अनुग्रहा रे मुताबक आस्सा रे प्रभु यीसू रा नांऊ तुस्सा मन्झ म्हीमा पाए, होर तुस्से तेस मन्झ।

2 ¹ हे भाईयो, एबे आस्से तुस्सा ले आपणे प्रभु यीसू मसीह रे आगमन, होर तेस साउगी आपु मन्झ कठे हुणे रे बारे मन्झ अरज करहा ऐ। ² कि तुस्से केसी आत्मा, या वचन, या चिठी रे ज्रीए जो मानो आस्सा री तरफा ले ये जाहिर करदा हो, कि प्रभु रा ध्याड़ा आई पौहुंची रा, तुस्सा रा मन अचानक बिचलित नी हो; होर ना डरे। ³ किहां भी केसी रे धोखे मन्झ देख्या आउंदे, क्यूंकि से ध्याड़ा तेबे तक नी आऊणा जेबे तक परमेसरा

रे धर्मा रा त्याग नी हो, होर से पापा रा मर्ध यानि विनासा रा पुत्र जाहिर नी हो। ⁴ होर तेस ईश्वरा री या पूजनीय समझी जाणे वाळी हर एक चीजा रा ब्रोध करणा होर आपणे आपा जो तिन्हा सभी ले ऊचा बणाहां, एथी तक कि तेस परमेसरा रे मंदरा मन्झ बैठी किन्हें ये दावा करणा कि से ई परमेसर आ। ⁵ क्या तुस्सा जो ये याद नी आ कि जेबे हांऊ तुस्सा साउगी था, तेबे हांऊ ये गल्ला तुस्सा जो दस्हा था। ⁶ होर एबे तुस्से तेस चीजा जो जाणहां ऐं, जो तेस जो रोक्या करहा ई, कि से आपणे ई टैमा मन्झ जाहिर हो। ⁷ क्यूंकि अधर्मा रा भेद एबे भी काम करदा जाहां, पर हली एक रोकणे वाळा आ, होर जेबे तक से दूर नी हुई जाए, तेबे तक तेस एता जो रोकदे रैहणा। ⁸ तेबे तेस अधर्मीया जाहिर हुणा, जेस जो प्रभु यीसूआ आपणी फुका ले मारी देणा, होर आपणे आगमना रे तेजा किन्हें भष्म करी देणा। ⁹ तेस अधर्मी रा आऊणा नास हुणे वाळे रे कठे, सैताना री गतिविधिया या कामा रे मुताबक सारी सामर्थ, चिन्ह, होर झूठे चमत्कार। ¹⁰ होर अधर्मा रे सभ किस्मा रे धोखे साउगी हुणा; क्यूंकि तिन्हे सच्चाई रे प्यारा जो ग्रहण नी कितेया, जेस ले तिन्हारा उद्धार हो। ¹¹ होर एस वजहा ले परमेसरा तिन्हा मन्झ एक भटकाणे वाळी सामर्थ भेजणी ताकि स्यों झूठा रा विस्वास करे। ¹² होर जितने लोक सच्चाई रा विस्वास नी करदे, बल्कि अधर्मा ले खुस हुहां ऐं, तिन्हा सभी आ सजा पाणी। ¹³ पर हे भाईयो, प्रभु रे प्यारेओ, आस्सा जो तुस्सा रे कठे हमेसा धन्यवाद करणा चाहिए, क्यूंकि परमेसरे सुहरु ले ई तुस्सा जो चुणी लया; कि आत्मा रे ज्रीए पवित्र बणी किन्हें होर सच्चाई पर विस्वास करी किन्हें उद्धार पाओ। ¹⁴ जेसरे कठे तिने तुस्सा जो आस्सा रे सुसमाचारा रे ज्रीए सादेया, कि तुस्से आस्सा रे प्रभु यीसू मसीह री म्हीमा जो पाई सको। ¹⁵ इधी कठे, हे भाईयो, मजबूत बणी रहुआ होर जो उपदेस तुस्से आस्स रे मुंहा रे वचना ले होर चिठी रे ज्रीए आस्सा ले सीखे, तिन्हा जो सम्भाळी किन्हें रखा। ¹⁶ आस्सा रा प्रभु यीसू मसीह आपु ई, होर आस्सा रा परमेसर जिने आस्सा किन्हें प्यार रखेया, होर दया किन्हें अनंत सांति होर खरी आस प्रदान कीती। ¹⁷ तुस्सा रे मना मन्झ सांति दे, होर तुस्सा जो हर एक भले कामा, होर वचना मन्झ मजबूत बणाये।

3 ¹ इधी कठे हे भाईयो, आस्सा रे कठे प्रार्थना करदे रहुआ, कि प्रभु रा वचन इतना जल्दी बढ़े, होर म्हीमा पाए, जेहडा कि तुस्सा लोका मन्झ हुआ। ² होर आस्से टेडे होर दुष्ट माहणुआं ले बची किन्हें रहे क्यूंकि हर एकी मन्झ विस्वास नी

आ।³ पर प्रभु सच्चा आ; तेस तुस्से मजबूत करणे; होर तेस दुष्टा ले बचाणे।⁴ होर आस्सा जो प्रभु मन्झ तुस्सा पर भरोसा आ, कि जो जो हुक्म आस्से तुस्सा जो देहां ऐं, तिन्हा जो तुस्से मन्झा ऐ, होर मन्झदे भी रैहणा।⁵ होर प्रभु तुस्सा रे दिला जो परमेसरा रे प्यार होर मसीह रे सबरा री तरफ बढाए।⁶ हे भाईयो, आस्से तुस्सा जो आपणे प्रभु यीसू मसीह रे नांऊआ ले हुक्म देहां ऐं; कि हर एक एहडे भाई ले लग रहे, जो ठीक चाल नी चल्दा, होर जो शिक्षा तिने आस्सा ले पाई तेता रे मुताबक नी करदा।⁷ क्यूंकि तुस्से आपु ई जाणहां ऐं, कि किहां आस्सा साहीं चाल चलणी चहिए; क्यूंकि तुस्सा रे बीचा मन्झ आस्से अनुचित चाल नी चले।⁸ होर केसी री रोटी मुफ्त नी खाई; पर मैहनत होर दुःख उठाई किन्हें रात ध्याड काम धन्धा करहा ऐ थे, कि तुस्सा मंझा ले केसी पर बोझ नी हो।⁹ ये नी, कि आस्सा जो हक नी आ; पर इधी कठे कि आपणे आपा जो तुस्सा रे कठे आदर्श बणाए, कि तुस्से आस्सा साहीं चाल चले।¹⁰ होर जेबे आस्से तुस्सा साउगी थे, तेबे भी आस्से ये हुक्म तुस्सा जो देहां ऐं थे,

कि अगर कोई काम करणा नी चाहे, ता से खाणा भी नी खाए।¹¹ क्यूंकि आस्सा जो सुणने मन्झ आया करहा, कि कितने लोक तुस्सा रे बीचा मन्झ अनुचित चाल चल्हा ऐ; होर कुछ काम नी करदे, पर होरी रे कामा मन्झ टांग अडाहें।¹² एहडे आदमीया जो आस्से प्रभु यीसू रे नांऊआ ले हुक्म देहां ऐं, होर सम्झाहें; कि चुपचाप काम धन्धा करी किन्हें आपणी रोटी खाया करे।¹³ होर तुस्से, हे भाईयो भलाई करणे मन्झ हिम्मत नी छाडा।¹⁴ अगर कोई आस्सा री एस्सा चिठी री गल्ला नी मन्ने, ता तेस पर नजर रखा; होर तेसरी संगता ले दूर रहा, ताकि से सर्मिन्दा हो।¹⁵ तेबे भी तेस जो दुस्मन नी समझा पर भाई जाणी किन्हें तेस जो चेतावनी देया।¹⁶ एबे सांति रा प्रभु आपु ई तुस्सा जो हर एक परिस्थिति मन्झ सांति देंदा रहे; प्रभु तुस्सा सभी साउगी रहे।¹⁷ हांऊ पौलुस आपणे हाथा ले नमस्कार लिख्हा, हर चिठी मन्झ मेरा ये ई चिन्ह या नसाण आ; हांऊ इहां ई लिख्हा।¹⁸ आस्सा रे प्रभु यीसू रा अनुग्रह तुस्सा सभी पर हुंदा रहे।

1 तीमुथियुस

1 ¹ पौलुसा री तरफा ले, जो आस्सा रे उद्धारकर्ता परमेसर, होर आस्सा री आस मसीह यीसू रे हुक्मा ले, मसीह यीसू रा प्रेरित बणेया। ² तिमिथियुसा रे नांऊ जो विस्वासा मन्झ मेरा सच्चा पुत्र आ, परम पिता परमेसर, होर आस्सा रे प्रभु मसीह यीसू री तरफा ले, तुजो अनुग्रह होर दया, होर सांति मिले। ³ मकिदुनिया जो जाणे रे टैमा में तू समझाया था, कि इफिसुसा मन्झ रही किन्हें कुछ लोका जो हुक्म दे ताकि स्यों होरी किस्मा री शिक्षा नी दे। ⁴ होर एहड़ी काहणीया होर अनन्त बन्सावलीया पर मन नी लगाए, जिन्हा ले विवाद हुहां ऐं; होर परमेसरा री तेस योजना जो पूरी नी करदे, जो विस्वासा पर आधारित ई। ⁵ पर हुक्मा रा निचोड़ ये आ, कि सुद्ध मन होर खरे विवेक, होर कपटरहित विस्वासा ले प्यार पैदा हो। ⁶ इन्हा जो छाडी किन्हें कितने लोक भटकी किन्हे बेकार वाद विवादा मन्झ फसी गईरे। ⁷ होर स्यों व्यवस्थापक ता बणना चाहें, पर जो कुछ स्यों बोल्हा ऐ होर जिन्हा गल्ला पर स्यों इतना जोर देहां ऐं, तिन्हा गल्ला जो स्यों समझदे तक नी। ⁸ पर एबे आस्से जाणहां ऐं, कि अगर कोई व्यवस्था रे विधाना रा ठीक ठीक इस्तेमाल करे, ता व्यवस्था खरी ई। ⁹ ये जाणी किन्हें कि व्यवस्था धर्मी माहणु रे कठे नी, पर अधर्मी, निरंकुस, भक्तिहीन, पापिया, अपवित्र, होर असुद्ध, माऊ बाबा जो मारणे वाळे, हत्यारे। ¹⁰ व्यभिचारीया, पुरुषगामिया, माहणु रा अपहरण करणे वाळे, झूठे होर झूठी कसम खाणे वाळे, होर ये नियम बाकि एहड़े सभी लोका रे कठे बणाए गए जो खरी शिक्षा रे खिलाफ ऐं। ¹¹ ये ई शिक्षा परमधन्य परमेसरा री म्हीमा रे तेस सुसमाचारा रे मुताबक ई, जो मुंजो सौंपी गईरी। ¹² होर हांऊ, आपणे प्रभु यीसू मसीह रा, जिने मुंजो सामर्थ दीती, धन्यवाद करहा; कि तिने मुंजो भरोसे लायक समझी किन्हें आपणी सेउआ रे कठे नियुक्त कितेया। ¹³ हांऊ ता पैहले निंदा करणे वाळा, होर स्ताणे वाळा, होर अँधेरे करणे वाळा था; तेबे बी मुंजो पर दया हुई, क्यूंकि मैं अविस्वासा री दसा मन्झ बगैर समझे बुझे, ये काम किते थे। ¹⁴ होर प्रभु रा अनुग्रह मेरे पर बौहत ज्यादा हुआ होर साउगी से विस्वास होर प्यार भी जो मसीह यीसू मन्झ आ। ¹⁵ ये गल सच्ची होर हर तरहा ले मनणे रे लायक ई, कि मसीह यीसू पापिया रे कठे संसारा मन्झ आया, जिन्हा मन्झ सभी ले बडा हांऊ आं। ¹⁶ पर मेरे ऊपर इधी कठे दया हुई, कि मांह साहीं सभी ले बडे पापी जो यीसू मसीह आपणी पुरी सैहनसीलता दसे, ताकि जिन्हा लोका तेस पर अनंत जिंदगी रे कठे विस्वास करणा, तिन्हा रे कठे

हांऊ एक आदर्स बणूं। ¹⁷ एबे सनातन राजा यानि अविनासी, अनदेखे, एक मात्र परमेसरा रा आदर होर म्हीमा जुग जुग हुन्दी रहे। आमीन। ¹⁸ हे पुत्र तिमिथियुस, तिन्हा भविष्यवाणीया रे मुताबक जो पैहले तेरे बारे मन्झ कितिरी थी, हांऊ ये हुक्म देहां, कि तू तिन्हा रे मुताबक खरी लड़ाई लड़दा रह। ¹⁹ होर विस्वास होर तेस खरे विवेका जो पकड़ी किन्हें रख जेस जो दूर करणे री वजहा ले कितने लोका रा विस्वास रूपी जहाज डूबी गया। ²⁰ तिन्हा मंझा ले हुमिनियुस होर सिकंदर ऐ जिन्हा जो मैं सैताना जो सौंपी दितेया, ताकि स्यों निंदा करणा ना सीखे।

2 ¹ एबे हांऊ सभी ले पैहले ये उपदेस देहां, कि अरज होर प्रार्थना होर निवेदन होर धन्यवाद सभ माहणुआं रे कठे किते जाए। ² राजे माहराजे होर सभ ऊचे पदवाळे रे कठे धन्यवाद दितेया जाए, ताकि आस्से सुख चैना किन्हें सारी भक्ति होर गंभीर हुई किन्हें जिंदगी बिताई सके। ³ ये आस्सा रे उद्धारकर्ता परमेसरा री नजरा मन्झ खरा होर ग्रहणयोग्य आ। ⁴ से ये चाहं, कि सभ माहणुआं रा उद्धार हो, होर स्यों सच्चाई जो भली भाँती जाणी सको। ⁵ क्यूंकि परमेसर एक ई आ; होर परमेसर होर माहणुआं रे बिचा मन्झ भी एक ई मध्यस्थ आ, यानि मसीह यीसू जो माहणु आं। ⁶ जिने आपणे आपा जो सभी रे छुटकारे रे रूपा मन्झ देई दितेया; ताकि तेसरी गुआही ठीक टैमा पर दिती जाए। ⁷ हांऊ सच बोल्हा, झूठ नी बोल्दा, कि मुंजो एस ई मकस्दा किन्हें प्रचारक होर प्रेरित होर अन्त्यजातिया रे कठे विस्वास होर सच्चाई रा उपदेस्क नियुक्त कितेया। ⁸ इधी कठे हांऊ चाहं, कि हर जगहा आदमी बगैर गुस्से होर विवादा रे, पवित्र हाथा जो उठाई किन्हें प्रार्थना करे। ⁹ तिहां ई हांऊ जनाने ले भी ये चाहं, कि स्यों सीधी साधी वेस भूषा मन्झ सालीनता होर सबर रखी किन्हें आपण आपा जो सवारें; ना कि आपणे आपा जो स्जाणे संवारणे रे कठे स्यों बाळा री चोटिया नी सजाए होर ना सोने होर मोतिया होर कीमती कपड़े किन्हें, पर खरे कामा ले आपणे आपा जो सवारें। ¹⁰ बल्कि एहड़ी जनानिया जो, जो आपणे आपा जो परमेसरा री भक्तण मन्हा ई, तिन्हारे कठे ये ठीक आ कि स्यों आपणे आपा जो खरे कामा किन्हें सजाए। ¹¹ होर जनाने जो सांत स्वभावा किन्हें पूरी अधीनता मन्झ सीखणा चाहिए। ¹² होर हांऊ बोल्हा, कि जनाने उपदेस नी दे, होर ना मर्धा पर हुक्म चलाए, पर चुपचाप रहे। ¹³ क्यूंकि पैहले आदम बणाया गया, फेरी हव्वा बणाई। ¹⁴ होर आदमा जो बहकाया नी गया, पर जनाने बहकावे मन्झ आई किन्हें पापण

बणी।¹⁵ अगर जनानिया सबर रखी किन्हें विस्वास, प्यार होर पवित्रता मन्झ बणी रहे ता तिन्हा बच्चे जणने ले उद्धार पाणा।

3¹ ये गल सच्ची ई, कि जो अध्यक्ष हुणा चाहां, से भले कामा री इच्छा करहा।² इधी कठे अध्यक्ष जो निर्दोष होर एक ई लाडी रा लाडा, सयमी, सुसील, सभ्य, आदर खातर करणे वाळा, होर शिक्षा देणे मन्झ होसियार हो।³ दारुबाज या मारपीट करणे वाळा ना हो; बल्कि कोमल हो, होर ना झगडालू होर ना लोभी हो।⁴ आपण घरा रा खरा प्रबंधक हो, होर आपणे बाल बच्चे जो एहडे अनुसासना मन्झ रखदा हो, कि स्यों तेसरी इज्जत करे।⁵ जेबे कोई आपणे घर परिवारा रा प्रबंध करणा नी जाणदा हो, ता तेस परमेसरा री कलीसिया री रखवाली किहाँ करणी? ⁶ से कोई नंऊआ चेला नी हो, केते एहडा नी हो कि से घमंड करी किन्हें फूली जाए, होर सैताना साहीं सजा पाए।⁷ होर बाहरवाळे मन्झ भी से सुनाम हो एहडा नी हो कि से बेज्जत हुई किन्हें सैताना रे फंदे मन्झ फसी जाए।⁸ तिहां ई कलीसिया रे दासा जो भी इज्जतदार होर गम्भीर हुणा चाहिए, दो रंगी, सराबी होर नीच कमाई रे लोभी नी हो।⁹ पर तिन्हा जो ता विस्वासा रे भेदा जो सुद्ध विवेका ले सम्भाळी किन्हें रखणा चाहिए।¹⁰ होर ये भी कि स्यों पैहले परखे जाए, फेरी अगर स्यों निर्दोष हो, तेबे ई तिन्हा जो कलीसिया रे दासा रे रूपा मन्झ सेउआ रा काम करणे देआ।¹¹ इस तरहा जनानिया जो भी इज्जतदार होर गम्भीर हुणा चाहिए, दोष ल्गाणे वाळी नी हो, पर सचेत होर सभ गल्ला मन्झ भरोसे रे लायक हो।¹² कलीसिया रे दास एक ई लाडी रे लाडे हो, होर स्यों आपणे बाल बच्चे होर आपण घराने रा प्रबंध ठीक ढंगा किन्हें करणे वाळे हो।¹³ क्योँक जिन्हें दासा रा काम ठीक ढंगा किन्हें पूरा कितेया, स्यों आपणे कठे ता एक उची खरी जगहा या पद होर तेस विस्वासा मन्झ जो मसीह यीसू मन्झ आ, बडी हिम्मत पाहें।¹⁴ ये उम्मीद रखी किन्हें हांऊ तुस्सा जो लिख्या करहा कि माँ जल्दी ई तुस्सा वाले आऊणा।¹⁵ अगर मुंजो आऊणे मन्झ टैम लगी जाए ता तुस्से जाणी लया, कि परमेसरा रा घर, जो जिउन्दे परमेसरा री कलीसिया ई, होर जो सच्चाई रा खम्बा, होर नींव ई; तेस्सा कलीसिया मन्झ केसी जो केहडा व्यवहार करणा चाहिए।¹⁶ होर एता मन्झ कोई सक नी आ, कि भक्ति रा भेद निश्चय म्हान आ, से जो सरीरा मन्झ प्रगट हुआ, आत्मा मन्झ धर्मी ठेहरया, स्वर्गदूता जो सुइया, अन्यजातिया मन्झ तेसरा प्रचार हुआ, संसारा मन्झ तेस पर विस्वास कितेया गया, होर से म्हीमा मन्झ ऊपर उठाया गया।

4¹ पर आत्मा साफ साफ बोल्हा, कि आऊणे वाळे टैमा मन्झ कितने लोक भरमाणे वाळी आत्मा होर दुष्टात्मा री शिक्षा पर मन ल्गाई किन्हें विस्वासा ले भटकी जाणा।² ये तिन्हा झूठे माहणुआं रे पाखंडा री वजहा ले हुणां, जिन्हा

री अंतरात्मा या विवेक मानों ताते लोहे किन्हें दागीरा हो।³ जिन्हा तुस्से ब्याह करणे ले रोकणे, होर तुस्सा जो खाणे पीणे री कुछ चीजा ले दूर रहणे रा हुक्म देणा, परमेसरे स्यों चीजा इधी कठे बणाई ताकि विस्वासी, होर सच्चाई जो जाणने वाळे तिन्हा चीजा जो धन्यावाद करी किन्हें खाए।⁴ क्योँकि परमेसरा री बणाई री हर एक चीज खरी ई; होर कोई भी चीज छाडणे लायक नी ई, पर सिर्फ ये हो कि स्यों चीजा धन्यवाद करी किन्हें खाई जाए।⁵ क्योँकि स्यों चीजा परमेसरा रे वचन होर प्रार्थना ले सुद्ध किती जाहीं।⁶ अगर तू भाईया जो इन्हा गल्ला री याद करान्दा रहन्ना, ता तुध मसीह यीसू रा खरा दास बणना; होर विस्वास होर तेस खरे उपदेसा री गल्ला ले, जो तू मन्नदा आईरा, तेरा पालन पोषण हुंदा रहणां।⁷ पर अभक्ति री एहडी कथा काहणीया ले आपण आपा जो दूर रख जो सिर्फ स्याणी खपरिया रे लायक ई, पर भक्ति रे कठे आपण आपा जो अनुसासित कर।⁸ क्योँकि सारीरिक साधना ले सिर्फ थोहडा ई फायदा हुंदा, पर भक्ति सभ गल्ला रे कठे फायदेमंद ई, क्योँकि एस टैम होर आऊणे वाळे जिंदगी री भी प्रतिज्ञा एता रे कठे ई।⁹ होर ये गल सच्ची होर हर तरहा ले मन्नणे रे लायक ई।¹⁰ क्योँकि आस्से मैहनत होर कोसिस इधी कठे करहा ऐ, ताकि आस्सा री आस तेस जिउन्दे परमेसरा पर ई, जो सभ माहणुआं रा, होर खास करी किन्हें विस्वासिया रा उद्धारकर्ता आ।¹¹ इन्हा गल्ला रा हुक्म देआ कर, होर स्वाया कर।¹² कोई तेरी जुआनी जो बेकार नी समझणे पाए; पर वचन होर चाल चलन होर प्यार होर विस्वास होर पवित्रता मन्झ विस्वासिया रे कठे आदर्स बणी जा।¹³ जेबे तक हांऊ नी आऊं, तेबे तक पढने होर उपदेस देणे होर स्वाणे री धुना मन्झ लगी रहया।¹⁴ तेस वरदाना ले जो तेरे अंदर आ, होर भविष्यवाणी रे ज़ीए प्राचीना रे हाथ रख्दे टैमा तुजो मिलिरा था, लापरवाह मत बण।¹⁵ तिन्हा गल्ला जो सोच्दा रह, ताकि तेरी बढौतरी सभी पर जाहिर हो; आपणी होर आपणे उपदेसा री चौक्सी रख।¹⁶ इन्हा गल्ला पर मजबूत बणी रह, क्योँकि अगर तू एहडा करदा रहन्ना, ता तुध आपणे, होर आपणे सुणने वाळैया रे कठे उद्दारा री वजहा बणना।

5¹ केसी खपरे जो मत डांट; पर तेस जो आपणे बाब समझी किन्हें समझाई दे, होर जुआना जो आपणा भाई समझी किन्हें; होर खपरी जनानिया जो आपणी माऊ जाणी किन्हें।² होर जुआन जनानिया जो पूरी पवित्रता किन्हें बैहण समझी किन्हें, समझाई दे।³ जो सच्चे विधवा ई, तिन्हा विधवा रा आदर कर।⁴ होर अगर केसी विधवा रे बच्चे होर नाती पोते हो, ता स्यों पैहले आपणे ई टब्बरा या घराने साउगी भक्ति रा बर्ताव करे, होर आपणे माऊ बाबा जो तिन्हा रा हक देणा सीखे, क्योँकि ये परमेसरा जो खरा लघ्हा।⁵ जो सच्चे विधवा हो, होर तेस्सा रा

कोई नी हो; से परमेसरा पर आस रख्हा ई, होर राती ध्याड़ी विनती होर प्रार्थना मन्झ लगी रैंहीं।⁶ पर जो भोगविलासा मन्झ पई गईरी, से जिन्दे जी मरी गई।⁷ इन्हा गल्ला रा भी हुक्म देआ कर, ताकि स्यों निर्दोष रहे।⁸ पर अगर कोई आपणे री खास करी किन्हें आपणे टब्बरा या घराने री फिकर नी करे, ता से विस्वासा ले मुखरी गया, होर अविस्वासी ले भी बुरा बणी गईरा।⁹ सिर्फ तेस्सा विधवा रा ई नांऊ लिख्या जाए, जो साठ साला ले कम नी हो, होर एक ई लाड़े री लाड़ी रही हो।¹⁰ होर भले कामा मन्झ सुनाम रही हो, जेस्से बच्चे रा पालन पोषण कितिरा हो; प्रौहणे री सेउआ कितिरी हो, पवित्र लोका रे पैर धोई रे हो, दीन दुखिया री मदद कितिरी हो, होर हर एक भले कामा मन्झ मन ल्गाई रा हो।¹¹ पर जुआन विधवा रे नांऊ मत लिखणा, क्यूंकि जेबे स्यों मसीह रा वरोध करी किन्हें सुख विलासा मन्झ पई जाहीं, ता ब्याह करणा चाहीं।¹² होर दोषी बणी जाहीं, क्यूंकि तिन्हे आपणा पैह्लका विस्वास छाड़ी दितेया।¹³ होर एता साउगी साउगी स्यों घर घर फिरि किन्हें आलसी हुणां सीखी जाहीं, होर सिफ आलसी ई नी, पर बक बक करदी रहीं होर होरी रे कामा मन्झ हाथ भी पाहीं होर एहड़ी गल्ला बोल्हा ई जो तिन्हा जो नी बोलणी चहिए।¹⁴ इधी कठे हांऊ चाहां, कि जुआन विधवा ब्याह करी ले; होर बच्चे जणे होर घर बार संभाळे, होर केसी ब्रोधी जो बदनाम करणे रा मौका ना दे।¹⁵ क्यूंकि कई ता भटकी किन्हें सैताना रे पीछे हुई चुकिरी।¹⁶ अगर केसी विस्वासण जनाने रे घरा मन्झ विधवा हो, ता से ई तिन्हा री मदद करे, ताकि कलीसिया पर भार नी हो, ताकि से तिन्हा री मदद करी सके, जो सच्चे विधवा ई।¹⁷ जो प्राचीन खरा प्रबंध करहा ऐ, खास करी किन्हें जो वचन सुनाणे होर स्वाणे मन्झ मैहनत करहा ऐ, स्यों दो गुणा आदरा रे लायक समझे जाएं।¹⁸ क्यूंकि पवित्र शास्त्र बोल्हा, कि दांवनी करणे वाळे बोल्हदा रा मुंह देख्या बान्हदा, क्यूंकि मजदूर आपणी मजदूरी रा हकदार आ।¹⁹ अगर केसी प्राचीना पर दोष ल्गाया जाए ता बगैर दो या तीन गुआहा रे तेस जो मत सुण।²⁰ पाप करणे वाळे जो सभी रे साम्हणे समझाई दे, ताकि बाकी लोक भी डरे।²¹ परमेसर, होर मसीह यीसू, होर चुणीरे स्वर्गदूता रे साम्हणे हांऊ तूजो चेतावनी देहां कि तू मन खोल्ही किन्हें इन्हा गल्ला जो मन्या कर, होर भेदभाव रखी किन्हें कोई काम मत कर।²² केसी पर जल्दबाजी करी किन्हें हाथ मत पा होर दूजे रे पापा मन्झ भागी मत बण; आपणे आपा जो पवित्र बणाए रख।²³ भविष्य मन्झ सिर्फ पाणी पीणे वाळा ई मत बण, पर आपणे पेटा रे होर आपणे बार बार बमार हुणे री वजहा ले थोहडा थोहडा दाखरस भी इस्तेमाल करेया कर।²⁴ कितने माहणुआं रे पाप जाहिर हुई जाहें, होर न्याय रे कठे पैहले ले पौहंची जाहें, पर दूजे लोका रे पाप ता बादा मन्झ

जाहिर हुहां ऐं।²⁵ तिहां ई कई भले काम जाहिर हुहां ऐं, होर जो जाहिर नी हुंदे, स्यों गुप्त भी नी रही सकदे।

6¹ जितने दास जुड़े रे हेठ ऐ, स्यों आपणे आपणे मालका जो बड़े आदरा रे लायक जाणे, ताकि परमेसरा रे नांऊ होर उपदेसा री निंदा नी हो² होर जिन्हा रे मालक विस्वासी ऐ, स्यों इन्हा जो भाई हुणे रे नाते तुच्छ नी जाणे; बल्कि तिन्हा री होर भी ज्यादा सेउआ करे, क्यूंकि एता ले फायदा उठाणे वाळे विस्वासी होर प्रेमी ऐ; इन्हा गल्ला जो स्वान्दा होर प्रचार करदा रह।³ अगर कोई होर ई किस्मा रा उपदेस देहां; होर खरी गल्ला जो, यानि आस्सा रे प्रभु यीसू मसीह री गल्ला जो होर तेस उपदेसा जो नी मन्नदा, जो भक्ति रे मुताबक आ।⁴ ता से घमण्डी हुई गईरा, होर कुछ नी जाणदा, बल्कि तेस जो विवाद होर सब्दा पर तर्क करणे री बमारी ई, जिन्हा ले हिर्ख, होर झगड़े, होर निंदा री गल्ला, होर बुरे बुरे सक।⁵ होर तिन्हा माहणुआं मन्झ बेकार रगड़े झगड़े पैदा हुहां ऐं, जिन्हा री बुद्धि खराब हुई गईरी होर स्यों सच्चाई ले दूर हुई गईरे, जो समझ्हा ऐ कि भक्ति कमाई रा रस्ता आ।⁶ पर संतुष्टि साउगी भक्ति सभी ले बडी कमाई ई।⁷ क्यूंकि ना आस्से संसारा मन्झ कुछ ल्यान्दिरा होर ना कुछ लई जाई सक्हा ऐ।⁸ होर अगर आस्सा वाले खाणे होर पैहनणे जो हो, ता एता पर ई संतुष्टि रखणी चहिए।⁹ पर जो धनवान हुणा चाहें, स्यों एहड़ी परीक्षा, होर फंदे होर बौहत बेकार होर नुक्सानदायक इच्छा मन्झ फस्हा ऐ, जो माहणुआं जो बिगाड़ी देहां ई होर विनासा रे समुद्रा मन्झ डबोई देहां ई।¹⁰ क्यूंकि पैसे रा लाह्ल्व सभ किस्मा री बुराईया री जड ई, जेस जो पाणे री कोसिस करदे करदे कितने लोके विस्वासा ले भटकी किन्हें आपणे आपा जो कई किस्मा रे दुःखा किन्हें छलनी करी दितिरा।¹¹ पर हे परमेसरा रे बंदे, तू इन्हा गल्ला ले दूर रह, होर धर्म, भक्ति, होर विस्वास, प्यार, धीरज, होर नम्रता रा पीछा कर।¹² विस्वासा री खरी कुशती लड, होर तेस अनंत जिंदगी जो पकड़ी ले, जेसरे कठे तू साद्या गईरा था, होर जेसरी खरी गुआही तैं बौहत गुआहा रे साम्हणे दिती थी।¹³ हांऊ परमेसरा जो, जो सभी जो जीन्दगी देहां, होर मसीह यीसू री हाजरी मन्झ जिने पुन्तियुस पिलातुसा रे साम्हणे बौहत खरी गुआही दिती थी, हांऊ तुजो ये हुक्म देहां।¹⁴ ताकि तू आस्सा रे प्रभु यीसू मसीह रे प्रगट हुणे तक एस हुक्मा जो, जो निष्कलंक होर निर्दोष रख।¹⁵ जेस से ठीक टैमा पर जाहिर करणा, जो परमधन्य होर एकमात्र सम्राट आ, राजेया रा राजा, प्रभुआ रा प्रभु आ,¹⁶ होर अमरता सिर्फ तेसरी ई, होर जो अगम्य प्रयासे मन्झ रैंहयां, जेस जो केसी माहणुए ना ता देख्या, होर ना ता देखी सकदा, तेसरी मान प्रतिष्ठा होर राज जुग जुग रहे। आमीन।¹⁷ एस संसार रे धनवाना जो हुक्म दे, ताकि स्यों घमण्डी नी हो होर स्यों चंचल धना पर आस नी रखे, पर परमेसरा पर ई

आस रखे जो आस्सा रे सुखा रे कठे सभ कुछ भरपूरी किन्हें देहां । ¹⁸ होर स्यों भलाई करे, होर भले कामा मन्झ धनवान बणें, होर उद्धार होर मदद देणे मन्झ तत्पर हो । ¹⁹ ताकि स्यों आपणे कठे एहड़ा धन कठा करे जो भविष्य रे कठे एक खरी नींव बणी जाए, ताकि स्यों सत्य जीवना जो पाई ले । ²⁰ हे तिमिथिउस

जो धरोहर तुजो सोंपी गईरी, तेता री रखवाळी कर होर जेस ज्ञाना जो ज्ञान बोलणा ई भूल ई, तेस झूठे ज्ञाना ले होर ब्रोधारी गल्ला ले दूर रह । ²¹ कितने एस ज्ञाना रा अंगीकार करी किन्हें, विस्वासा ले भटकी गईरे, तुस्सा पर अनुग्रह हुंदा रहे ।

2 तीमुथियुस

1 ¹ पौलुसा री तरफा ले जो परमेसरा री इच्छा ले यीसू मसीह रा प्रेरित आ होर जेस जो यीसू मसीह मन्झ जिंदगी पाणे री प्रतिज्ञा रा प्रचार करणे रे कठे भेजिरा । ² प्यारे पुत्र तिमिथिउसा रे नांऊ, परमेसर पिता री इच्छा होर आस्सा रे प्रभु मसीह यीसू री तरफा ले तुजो अनुग्रह होर दया होर सांति मिल्दी रहे । ³ राती ध्याड़ी आपणी प्रार्थना मन्झ लगातार तुस्सा री याद करदे हुए, हांऊ तेस परमेसरा रा धन्यवाद करहा, होर तेसरी सेउआ आपणे बाब दादे रे रीति रिवाजा रे मुताबक करहा । ⁴ मेरे कठे जो तैं आपणे आंसू ब्हाईरे तिन्हा जो याद करी किन्हें हांऊ तुजो मिलणे रे कठे तरस्या करहा, ताकि खुसी किन्हें भ्हरी जाऊं । ⁵ मुंजो तेरा से सच्चा विस्वास भी याद आ जो पैहले तेरी नानी लोईस होर तेरी माऊ युनिके मन्झ था । मुंजो भरोसा आ कि से ई विस्वास तेरे मन्झ भी हाया । ⁶ एता रे कठे हांऊ तुजो याद दिलाहां, कि तू परमेसरा रे तेस वरदाना जो, जो मेरे हाथ रखणे ले तुजो मिलिरा तेस जो चम्काई दे । ⁷ क्यूंकि परमेसरे आस्सा जो डरणे री नी पर सबर रखणे री आत्मा दितिरी । ⁸ इधी कठे आस्सा रे प्रभु री गुआही ले, होर मेरे ले जो तेसरा कैदी आ, शर्मिन्दा नी हो, पर तेस विस्वासा री सामर्था रे मुताबक सुसमाचारा रे कठे मेरे साउगी दुःख उठा । ⁹ जिने आस्सा रा उद्धार कितेया, होर पवित्र बुलाहटा ले सादे, होर ये सभ आस्सा रे कामा रे मुताबक नी, पर आपणी इच्छा होर तेस अनुग्रहा रे मुताबक आ, जो मसीह यीसू मन्झ अनादिकाला ले आस्सा पर हुआ । ¹⁰ पर एबे आस्सा रे उद्धार कर्ता मसीह यीसू रे जाहिर हुणे रे ज़ीए प्रकासमान करी दितेया, जिने मौता रा नास कितेया, होर जिंदगी होर अमरता जो तेस सुसमाचारा रे ज़ीए प्रकाशमान करी दितेया । ¹¹ जेसरे कठे हांऊ प्रचारक, होर प्रेरित, होर उपदेशक भी बणेया । ¹² इधी कठे हांऊ इन्हा दुःखा जो भी उठाहां, पर सर्मिन्दा नी हुंदा, क्यूंकि हांऊ तेस जो जेसरी मैं स्तुति किती, जाणहां; होर मुंजो भरोसा आ, कि से मेरी अमानता री तेस ध्याडे तक रखवाळी करी सकहा । ¹³ जो खरी गल्ला तैं मेरे ले सुणी, तिन्हा जो तेस विस्वास होर प्यारा साउगी जो मसीह यीसू मन्झ आ, आपणा आदर्श बणाई किन्हें रख । ¹⁴ होर पवित्र आत्मा रे ज़ीए जो आस्सा मन्झ बस्सिरा, एस अमानता री रखवाळी कर । ¹⁵ तू जाणहां, कि आसिया वाळे सभ मेरे ले फिरि गईरे, जिन्हा मन्झ फुगिलुस होर हिरमुग्नेस ऐ । ¹⁶ उनेसिफुरुसा रे टब्बरा पर प्रभु दया करे, क्यूंकि तिने बौहत बार मेरे जीउआ जो ठण्डा कितेया, होर मेरी जंजीरा ले सर्मिन्दा नी हुआ । ¹⁷ पर जेबे से रोमा मन्झ

आया, ता बड़ी कोसिस करी किन्हें मेरे किन्हें मुलाक्रात किती । ¹⁸ प्रभु करे, कि तेस ध्याडे तेस पर प्रभु री दया हो, होर जो जो सेउआ तिने इफिसुसा मन्झ किती, तिन्हा जो भी तू भली भांति जाणहां ।

2 ¹ इधी कठे हे मेरे बच्चे, तू तेस अनुग्रहा ले जो मसीह यीसू मन्झ आ, मजबूत हुई जा । ² होर जो गल्ला तैं बौहत गुआहा रे साम्हणे मेरे ले सुणी, तिन्हा जो विश्वासी माहणुआ जो सौंपी दे; जो होरिया जो भी स्वाणे रे लायक हो । ³ मसीह यीसू रे खरे स्पाही साहीं मेरे साउगी दुःख उठा । ⁴ जेबे कोई स्पाही लड़ाई पर जाहां, इधी कठे कि से आपणे भर्ती करणे वाळे जो खुस करे, से आपणे आपा जो एस संसारा रे झंझटा मन्झ नी फसान्दा । ⁵ होर इस तरह जेबे अखाडे मन्झ जाणे वाळा पैहलवान अगर नियमा रे मुताबक नी लडे ता से ईनाम नी पांदा । ⁶ जो किसान मैहनत करहा, तेस्जो ही सभ ले पैहले फसला रा हिस्सा मिलणा चाहिए । ⁷ जो हांऊ बोल्हा, तेता पर ध्यान दे होर प्रभुआ तुजो सभ गल्ला री समझ देणी । ⁸ यीसू मसीह जो याद रख, जो दाऊदा रे बंसा ले हुआ, होर मरीरे मन्झा ले जिउन्दा हुई गया, होर ये मेरे सुसमाचारा रे मुताबक आ । ⁹ जेसरे कठे हांऊ एक अपराधी साहीं दुःख उठाहां, एथी तक कि हांऊ कैदा मन्झ आ, पर परमेसरा रा वचन कैदा मन्झ नी आ । ¹⁰ इधी कठे हांऊ चुणी रे लोका रे कठे सभ कुछ सैहन करहा, कि स्यों भी उद्दारा जो, जो मसीह यीसू मन्झ आ, अनंत म्हीमा साउगी पाए । ¹¹ ये गल सच ई, कि अगर आस्से तेस साउगी मरी गईरे, ता तेस साउगी जीणा भी । ¹² अगर आस्से सबर रखी किन्हें सैहन्दे रैहन्गे, ता आस्सा तेस साउगी राज भी करणा; अगर आस्से तेसरा इनकार करवे, ता तेस भी आस्सा रा इनकार करणा । ¹³ अगर आस्से अविश्वासी भी हो, तेबे भी से भरोसे रे लायक बणी रैहयाँ, क्यूंकि से आपणे आपा रा इनकार नी करी सकदा । ¹⁴ इन्हा गल्ला री याद तिन्हा जो दिलाया कर, होर प्रभु रे साम्हणे तिन्हा जो चेतावनी दे, कि शब्दा पर बैहस नी करे, जिन्हा ले कुछ फायदा नी हुंदा; बल्कि सुणने वाळे नास हुई जाहें । ¹⁵ आपणे आपा जो परमेसरा रे लायक होर एहड़ा काम करणे वाळा बणने री कोसिस कर, जेस ले सर्मिन्दा नी हो, होर जो सच्चाई रे वचना जो ठीक तरह ले इस्तेमाल करदा हो । ¹⁶ पर अशुद्ध बक्कासा ले बची किन्हें रह, क्यूंकि एहड़े लोका होर भी ज्यादा अभक्ति मन्झ बढ़दे जाणा । ¹⁷ होर तिन्हा रा वचन सड़ी रे जखमा साहीं फैहल्दे जाणा; हुमिनियुस होर फिलेतुस तिन्हा मंझा ले ऐ । ¹⁸ जो ये बोली किन्हें कि पुनरुत्थान हुई

चुकिरा, सच्चाई ले भटकी गईरे, होर कितने लोका रे विस्वासा जो उल्ट पुल्ट करी देहां ऐं।¹⁹ तेबे भी परमेसरा री पक्की नींव बणी रैहीं, होर तेस पर ये छाप लगी री, कि प्रभु आपणेया जो पछ्याणा आ; होर जो कोई प्रभु रा नांऊ लैहां, से दुष्टता ले बचा रेंहयाँ।²⁰ बड़े घरा मन्झ ना सिर्फ सोने चांदी रे, पर लकड़ी होर माटे रे भांडे भी हुहां ऐं; कोई कोई आदरा रे कठे होर कोई अनादरा रे कठे।²¹ अगर कोई आपणे आपा जो इन्हा गल्ला ले शुद्ध रखे, ता तेस आदरा रा भांडा, होर पवित्र ठैहरणा; होर स्वामी रे काम आऊणा, होर हर भले कामा रे कठे त्यार हुणा।²² जुआनी री इच्छा ले भाग; होर जो शुद्ध मना ले प्रभु रा नांऊ लैहां ऐं, तिन्हा साउगी धर्म, होर विस्वास, होर प्यार, होर मेल मिलापा रा पीछा कर।²³ पर मुर्खता, होर बेकारा री बैहसा ले बची किन्हे रहूआ। क्यूंकि तुस्से जाणहां ऐं कि इन्हा ले लडाई झगड़े पैदा हुहां ऐं।²⁴ होर प्रभु रे दासा जो झगडालू नी हुणा चहिए, पर सभी साउगी कोमल होर शिक्षा मन्झ होसियार होर सैहनसील हो।²⁵ होर ब्रोधिया जो नम्रता किन्हे समझाए, क्या जाणे परमेसर तिन्हा जो मन फिराणे रा मन दे, कि स्यों भी सच्चाई जो पछ्याणी ले।²⁶ होर सचेत हुई किन्हे सैताना रे फंदे ले छुटी गए, जिने तिन्हा जो आपणी इच्छा पूरी करणे रे कठे कैदी बणाई रखिरा।

3¹ पर ये जाणी ले, कि आखरी ध्याड़े मन्झ आस्सा पर बौहत दुःखा रा टैम आऊणा।² लोका स्वार्थी, लाह्लची, घमण्डी, उद्दण्ड परमेसरा री निंदा करणे वाळे, माऊ बाबा रा हुक्म नी मनणे वाळे, कृतघ्न अपवित्र।³ बगैर प्यार, बगैर माफ़ी, दोष ल्याणे वाळे, असंयमी, कठोर, भले रे बैरी।⁴ विस्वासघाती, ठीठ, घमण्डी होर परमेसरा रे नी पर सुख विलासा रे चाहणे वाळे हुणे।⁵ तिन्हा भक्ति रा भेष ता धरणा, पर तेसरी सक्ति जो नी मनणा; एहडे लोका ले दूर रैहणा।⁶ इन्हा मन्झ ई स्यों लोक ऐ, जो घरा मन्झ दबे पैर बड़ी जाहें, होर तिन्हा छिछोरी जनानिया जो आपणे बसा मन्झ करी लैहां ऐं, जो पापा किन्हे द्विरी होर हर किस्मा री इच्छा रे बसा मन्झ ई।⁷ होर स्यों हमेसा सिख्दी ता रेंहयाँ ई पर सच्चाई री पैहचाणा तक कधी नी पुज्दी।⁸ होर जिहां यन्त्रेसे होर यन्त्रेसे मूसा रा ब्रोध कितेया था। तिहां ई ये लोक भी सच्चाई रा ब्रोध करहा ऐ; ये ता एहडे माहणु ऐ, जिन्हा री बुद्धि खराब हुई गईरी, होर स्यों विस्वासा रे बारे मन्झ बेकार हुई गईरे।⁹ पर स्यों एता ले अगे नी बढी सकदे, क्यूंकि जीहाँ यन्त्रेसा होर यन्त्रेसा तिन्हा दुहीं री मुर्खता जाहिर हुई गई थी, तिहां ई इन्हारी मुर्खता भी सभी रे साम्हणे उजागर हुई जाणी।¹⁰ पर तैं मेरी शिक्षा, चाल चलन, मक्सद, विस्वास, सैहनसीलता, प्यार, धीरज।¹¹ होर सताए जाणे, होर दुःख उठाणे मन्झ मेरा साथ दितेया; जो अन्ताकिया होर इकुनियुमा होर लुम्बा मन्झ मेरे पर आई गए होर केहड़े केहड़े दुःख में

सही लये, पर प्रभुए हांऊ तिन्हा सभी यातना ले छुड़ाई लया।¹² पर जितने मसीह यीसू मन्झ भक्ति किन्हे जिंदगी बिताणा चाहें, स्यों सभ सताए जाणे।¹³ होर दुष्ट, होर धोखेबाज धोखा देंदे हुए, होर धोखा खांदे हुए बिगडदे चले जाणा।¹⁴ पर तू इन्हा गल्ला पर जो तैं सिखिरी, होर विस्वास कितिरा, ये जाणी किन्हे मजबूत बणी किन्हे रह, कि तैं स्यों गल्ला किन्हा लोका ले सिखिरी थी? ¹⁵ होर बचपना ले ई तू पवित्र सास्त्रा रा जाणकार आ, जो तुजो मसीह यीसू पर विस्वास करणे ले उद्धार पाणे रे कठे बुद्धिमान बणाई सकहा।¹⁶ हर एक पवित्र सास्त्र परमेसरा री प्रेरणा ले रची गईरा; से लोका जो सच्चाई री शिक्षा देणे, तिन्हा जो सुधारणे होर तिन्हा री बुराईया जाहिर करणे होर धार्मिक शिक्षा रे कठे फायदेमंद ई।¹⁷ ताकि परमेसरा रा जन सिद्ध बणे, होर हर एक खरे कामा रे कठे तत्पर हुई जाए।

4¹ परमेसर होर मसीह यीसू जो गुआह जाणी किन्हे, जेस जिउन्देया रा होर मुर्देया रा न्याय करणा, तेस जो होर तेसरे जाहिर हुणे, होर राज्या री सुधि दिलाई किन्हे हांऊ तुजो चेतावनी देहां।² कि तू वचना रा प्रचार कर; वक्त होर बेवक्त त्यार रह, सभ किस्मा री सैहनसीलता, होर शिक्षा साउगी ताडना दे, होर डांट होर समझाई दे।³ हांऊ ये इधी कठे बोल्या करहा, कि एक टैम एहडा आऊणा; कि लोका खरा उपदेस सैहन नी करी पाणा, पर काना री खुजली री वजहा ले आपणी इच्छा रे मुताबक आपणे कठे बौहत सारे गुरु कठे करी लैणे।⁴ होर तिन्हा आपणे कान सच्चाई ले फेरी किन्हे कथा काहणीया पर ल्याणे।⁵ पर तू सभ गल्ला मन्झ सावधान रह, दुःख उठा, सुसमाचारा प्रचारा रा काम कर होर आपणी सेउआ पूरी कर।⁶ क्यूंकि एबे हांऊ अर्घा साहीं उंडेल्या जाहाँ, होर मेरे जाणे रा टैम आई पूजीरा।⁷ हांऊ खरी कुशती लडी बैठीरा, मैं आपणी दौड पूरी करी लईरी, मैं विस्वासा री रखवाली कितिरी।⁸ भविष्य मन्झ मेरे कठे धर्मा रा से ताज रखिरा, जेस जो प्रभु, जो धर्मी होर न्यायी आ, मुंजो तेस ध्याड़े देणा, होर सिर्फ मुंजो ई नी, बल्कि तिन्हा सभी जो भी, जो तेसरे जाहिर हुणे जो खरा जाणहां ऐं।⁹ मेरे वाले जल्दी आऊणे री कोसिस कर।¹⁰ क्यूंकि देमासे एस संसारा जो प्यारा जाणी किन्हे हांऊ छाडी दितेया; होर थिस्सलुनिके जो चली गईरा, होर क्रेसक्रेस ग्लातिया जो होर तीतुस दलमातिया जो चली गया।¹¹ सिर्फ लुका मेरे साउगी मेरे साउगी आ; मरकुसा जो लई किन्हे चली आऊ; क्यूंकि सेउआ रे कठे से मेरे बौहत कामा रा आ।¹² तुखिकुसा जो मैं इफिसुसा जो भेजी दितिरा।¹³ जो चोगा हांऊ त्रोआसा मन्झ करपुसा रे तेथी छाडी आईरा, जेबे तू आए, ता तेस जो होर क्ताबा जो खास करी किन्हे चर्म पत्रा जो आपणे साउगी लई किन्हे आई जाया।¹⁴ सिकंदर ठठेरे मेरे किन्हे बौहत बुराईया कित्ती, प्रभुआ तेस जो तेसरे कामा

रे मुताबक फल देणा । ¹⁵ तू भी तेस ले सावधान रहैया, क्यूंकि तिने आस्सा री गल्ला रा घोर ब्रोध कितेया । ¹⁶ पैहली बार जेबे हांऊ आपणा बचाऊ करदा लग्या ता मेरे पक्षा मन्झ केसीए भी मेरा साथ नी दितेया, बल्कि सभीए हांऊ छाडी दितेया; कास, तिन्हा जो एता रा लेखा नी देणा पये । ¹⁷ पर प्रभु मेरा मददगार रहैया, होर मुंजो सामर्थ्य दिती; ताकि मेरे ज्रीए पूरा पूरा प्रचार हो, होर सभ अन्यजातिया सुणी ले, होर मुंजो ता सेरा रे मुंहा ले छुड़ाया गया । ¹⁸ होर प्रभुआ हांऊ हर एक बुरे कामा ले

छुड़ाणा, होर आपणे स्वर्गा रे राजा मन्झ सम्भाळी किन्हें लई जाणा; तेसरी म्हीमा जुग जुग हुन्दी रहे । आमीन । ¹⁹ प्रिसका होर अक्विला जो, होर उनेसिफुरुसा रे टब्बरा जो नमस्कार । ²⁰ इरास्तुस कुरिन्थुसा मन्झ रही गया, होर त्रुफिमुसा जो हांऊ मिलेतुसा मन्झ ब्मारा री दसा मन्झ छाडी आईरा । ²¹ ठण्डा ले पैहले आऊणे री कोसिस कर; यूबूलुस, होर पुन्देस, होर लिनुस, होर क्लौदिया, होर सभ भाईया रा तुजो नमस्कार । ²² प्रभु तेरी आत्मा साउगी रहे; तुस्सा पर अनुग्रह हुंदा रहे ।

तीतुस

1 ¹ पौलुसा री तरफा ले जो परमेसरा रा दास होर यीसू मसीह रा प्रेरित आ, परमेसरा रे चुणीरे लोका रा विस्वास, होर भक्ति रे मुताबक आ। ² तेस अनंत जिन्दगी री आस, जेसरी प्रतिज्ञा परमेसरे जो झूठ नी बोल्दा अनादिकाला ले कितिरी। ³ पर ठीक टैमा पर आपणे वचना जो तेस प्रचारा रे ज़ीए जाहिर कितेया, जो आस्सा रे उद्धारकर्ता परमेसरा रे हुक्मा रे मुताबक मुंजो सौम्पेया गया। ⁴ आस्सा साहीं विस्वासा मन्झ मेरे सच्चे पुत्र तितुसा जो, आस्सा रे परम पिता परमेसर होर उद्धारकर्ता मसीह यीसू री तरफा ले अनुग्रह होर सांति मिले। ⁵ मैं तुजो क्रेते मन्झ इधी कठे छाडी आईरा था, कि तू तेथी रही किन्हें बाकि गल्ला रा सुधार करे; होर मेरे हुक्मा रे मुताबक नगरा नगरा मन्झ प्राचीना जो नियुक्त करे। ⁶ जो निर्दोष होर एक ई लाडी रे लाडे हो, जिन्हारे बाल बच्चे विश्वासी हो, जो दुराचारी होर निरंकुस ना हो। ⁷ क्यूंकि अध्यक्षा जो परमेसरा रा भंडारी हुणे री वजहा ले निर्दोष हुणा चाहिए; ना हठी, ना गुस्सा करणे वाळा, ना दारुबाज, ना मारपीट करणे वाळा, होर ना नीच कमाई रा लोभी हो। ⁸ पर अतिथि सत्कार करणे वाळा, भलाई चाहणे वाळा, सबर रखणे वाळा, न्यायी, पवित्र होर आत्म सयंमी हो। ⁹ होर विस्वास योग्य वचना जो मजबूती किन्हें पकड़ी रखा जो धर्मशिक्षा रे मुताबक ऐ, कि खरी शिक्षा ले उपदेस देई सके; होर विवादिया रा मुंह भी बंद करी सके। ¹⁰ क्यूंकि बौहत सारे लोक निरंकुस, वकवास करणे वाळे होर धोखेबाज ऐ; खास करी किन्हें खतना वाळे। ¹¹ इन्हा रा मुंह बन्द करणा चाहिए; ये लोक नीच कमाई रे कठे गलत गल्ला खाई किन्हें घरा रे घर बिगाडेया करहा ऐ। ¹² तिन्हा मन्झा ले एकी जणे यानि तिन्हारे एकी नबिये बोल्या, कि क्रेतेवासी हमेसा झूठ बोल्हा ऐं, स्यों दुष्ट जानवर होर आलसी पेटू ऐ। ¹³ ये गुआही सच्ची ई, इधी कठे तिन्हा जो कड़ी चेतावनी देया कर, कि स्यों विस्वासा मन्झ पक्के हुई जाए। ¹⁴ होर स्यों यहूदिया री कथा कहणीया पर होर तिन्हा माहणुआं रे हुक्मा पर मन ना लगाएं, जो सच्चाई ले भटकी जाहें। ¹⁵ सुद्ध लोका रे कठे सभ चीजा सुद्ध ई, पर असुद्ध होर अविस्वासिया रे कठे कुद्ध भी सुद्ध नी ई; बल्कि तिन्हारी बुद्धि होर विवेक दोन्हो रे दोन्हो असुद्ध ऐ। ¹⁶ स्यों बोल्हा ऐं, कि आस्से परमेसरा जो जाणहां ऐं; पर आपणे कामा ले तेसरा इनकार करहा ऐ, क्यूंकि स्यों घृणित होर हुक्म नी मनणे वाळे ऐ; होर केसी खरे काम रे लायक नी हाए।

2 ¹ पर तू एहडी गल्ला बोल्या कर, जो खरे उपदेसा रे मुताबक ई। ² यानि बूढे आदमी, सचेत होर गम्भीर होर सयंमी हो, होर तिन्हारा विस्वास होर प्यार होर धीरज पक्का हो। ³ इस तरह बूढी जनानिया रा चाल चलन भी पवित्र लोका साहीं हो, दोष लगाणे वाळी होर दारुबाज नी हो; पर खरी गल्ला खाणे वाळी हो। ⁴ ताकि स्यों जुआन जनानिया जो चेतावनी देया करे, कि आपणे लाडे होर बच्चे किन्हें प्यार रखे। ⁵ होर सयंमी, पतिव्रता, आपणे आपणे घरा री देखभाल करणे वाळी, भली होर आपणे आपणे लाडे रे अधीन रहणे वाळी हो, ताकि परमेसरा रे वचना री निंदा नी हो। ⁶ होर एहडा ई नौजुआनो जो भी समझाया कर, कि सयंमी हो। ⁷ भले काम कर होर तुस्से आपणे आपा जो सभ गल्ला मन्झ आदर्श बणी किन्हें दसा, तेरा उपदेस सुद्ध, होर गम्भीर हुणा चाहिए। ⁸ होर एहडी खरी वाणी रा इस्तेमाल कर, जेस जो कोई बुरा नी बोली सके; जेस ले आलोचना करणे वाळे जो आस्सा रे बारे मन्झ कुद्ध भी बुरा बोलणे रा मौका ना मिले होर स्यों सर्मिन्दे हो। ⁹ दासा जो समझाया कर, कि आपणे आपणे स्वामी रे अधीन रहे; होर सभ गल्ला मन्झ तिन्हा जो खुस रखे, होर पलटी किन्हें जबाब ना दे। ¹⁰ चोरी चकारी ना करे; पर सभ तरह ले पुरे विश्वासी निकळे, कि स्यों सभ गल्ला मन्झ आस्सा रे उद्धारकर्ता परमेसरा रे उपदेसा री म्हीमा बढ़ाए। ¹¹ क्यूंकि परमेसरा री दया जाहिर ई, जो सभ माहणुआं रे उद्दारा री वजहा ई। ¹² होर आस्सा जो चेतावनी देहां, कि आस्से अभक्ति होर संसारिक इच्छा ले मन फिराई किन्हें एस युगा मन्झ सयंम होर धर्म होर भक्ति किन्हें जिंदगी बिताए। ¹³ होर तेस धन्य उम्मीदा री यानि आपणे म्हान परमेसर होर उद्धारकर्ता यीसू मसीह री म्हीमा रे जाहिर हुणे रा इंतजार करदे रह्या। ¹⁴ जिने आपणे आपा जो आस्सा रे कठे देई दितेया, कि आस्सा जो हर किस्मा रे पापा ले छुड़ाई ले; होर सुद्ध करी किन्हें आपणे कठे एक एहडी जाति बणाई ले जो भले भले काम करणे रे कठे ललायित हो। ¹⁵ इन्हा गल्ला जो पुरे हका किन्हें बोल्या कर होर समझाया कर होर खाए करे; कोई तुजो तुच्छ ना जाणने पाए।

3 ¹ लोका जो सुधि दिलाया कर, कि हाक्मा होर अधिकारिया रे अधीन रहे, होर तिन्हा रे हुक्म मने, होर हर एक खरे काम करणे रे कठे त्यार हो। ² केसी जो बदनाम नी करे; झगडालू नी हो; पर नर्म स्वभावा रे हो, होर सभ माहणुआं किन्हें बड़ी नम्रता साउगी रहे। ³ क्यूंकि आस्से भी पैहले, निर्बुद्धि होर हुक्म नी मनणे वाळे होर भ्रमा मन्झ पईरे

थे, होर कई किस्मा री वासना होर सुख विलासा रे दास थे, होर आपणी आपणी जिंदगी डाह होर हिर्खा मन्झ बिताहें थे, होर घृणित थे, होर एक दूजे किन्हें बैर रख्हा ऐ थे।⁴ पर जेबे आस्सा रे उद्धारकर्ता परमेसरा री किरपा, होर माहणुआं पर तेसरा प्यार जाहिर हुआ।⁵ ता तिने आस्सा रा उद्धार कितेया; होर ये उद्धार धर्मा रे कामा री वजहा ले नी आ, पर तिने आपणी दया रे मुताबक यानि पवित्र आत्मा रे ज़ीए नंऊए जन्मा, होर नंऊए बणाए जाणे रे स्नाना किन्हें कितेया।⁶ जेस पवित्र आत्मा जो तिने आस्सा रे उद्धारकर्ता यीसू मसीह रे ज़ीए आस्सा पर भरपूरी किन्हें दलेया।⁷ ताकि आस्से तेसरी दया ले धर्मी बणी किन्हें, अनंत जिंदगी री उम्मीदा रे मुताबक वारस बणी सके।⁸ ये गल सच ई, होर हांऊ चाहां, कि तू इन्हा गल्ला रे बारे मन्झ मजबूती किन्हें बोले इधी कठे कि जिन्हें जे परमेसरा पर विस्वास कितेया, स्यों भले भले कामा करणे रे टैमा मन्झ ध्यान रखे कि ये गल्ला लोका रे कठे खरी होर फायदेमंद हो।⁹ बन्सावली किन्हें जुडी रे विवाद, व्यवस्था किन्हें जुडी रे रगड़े

झगड़े होर मूर्खतापूर्ण मतभेदा ले बची किन्हें रह; क्यूंकि इन्हा विवादा ले कोई फायदा नी आ, ये सभ बेकार ऐ।¹⁰ जो आदमी फूट पाहां, तेस ले एक दो बार चेतावनी देई किन्हें लग हुई जाऊआ।¹¹ क्यूंकि तुस्से जाणहां ऐं कि एहड़ा आदमी सच्चाई रे रस्ते ले भटकी गईरा, होर पाप करेया करहा; होर आपणे आपा जो दोषी बणाई किन्हें पाप करदा रेंहयां।¹² जेबे हांऊ तेरे वाले अरतिमास या तुखिकुसा जो भेजूं, ता मेरे वाले निकुपुलिस आऊणे री कोसिस करेया; क्यूंकि मैं तेथी ई सर्दी काटणे रा फैसला करी लईरा।¹³ जेनास वकील होर अप्पुलोस रे सफरा मन्झ तू जरूर तिन्हारी मदद करणा, कि तिन्हा जो केसी गल्ला री कोई कमी नी हो।¹⁴ होर आस्सा रे लोक भी जरूरता जो पूरा करणे रे कठे खरे कामा मन्झ लगे रहणा सीखी जाए, ताकि स्यों निष्फल ना रहे।¹⁵ मेरे सभ साथिया रा तुजो नमस्कार होर जो विस्वासा री वजहा ले आस्सा किन्हें प्यार रख्हा ऐ, तिन्हा जो भी नमस्कार; तुस्सा सभी पर दया हुंदी रहे।

फिलेमोन

1 ¹ पौलुसा री तरफा ले जो यीसू मसीहा रा बंदी आ, होर भाई तीमुथियुसा री वखा ले आस्सा रा प्यारा दोस्त होर साउगी सेउआ करणे वाळा फिलेमोन । ² होर आस्सा री बैहण अफ्रिया, आस्सा साउगी स्पाही रा काम करणे वाळे अखिप्पुस होर तेस झुण्डा जो जेहड़ा मण्डली रे रूपा मन्झ तुस्से रे घरा कठा हुहां आ । ³ आस्सा रे पिता परमेसर होर प्रभु यीसू मसीह री तरफा ले दया होर सांति तुस्सा जो मिल्दी रैहे । ⁴ आपणी प्रार्थना मन्झ तुस्सा जो याद करी किन्हें हांऊ परमेसरा रा धन्यावाद करहा । ⁵ तेरे तेस प्यार होर विस्वासा री चर्चा सुणहां ऐं, जो सभ पवित्र लोका साउगी होर प्रभु यीसू पर ई । ⁶ मेरी अरज ये ई कि तुस्सा रे विस्वासा ले जम्मी री उदार सैहभागिता किन्हें लोका रा अगुवाई करे । जेस ले तिन्हा जो तिन्हा सभी खरी गल्ला री समझ हुई जाए जो मसीहा रे मकस्दा जो अगे बढ़ाणे मन्झ जेहड़ी आस्सा मन्झ हुएया करहा ई । ⁷ क्यूंकि हे भाई, मुंजो तेरे प्यारा ले बौहत खुसी होर तसल्ली मिली गई । इधी कठे, कि तेरे जरिये पवित्र लोका रे मन हरे भरे हुई गये । ⁸ एस वजहा ले हांऊ मसीह मन्झ इतनी हिम्मत मैहसूस करहा, कि जो गल ठीक ई, तेता रा हुकम हांऊ तुजो देई सकूं । ⁹ तेवे भी मुंजो बुढे पौलुसा जो, जो एबे मसीह यीसू रे कठे बंदी आ, ये होर भी खरा लगेया कि हांऊ प्यारा किन्हें अरज करूं । ¹⁰ हांऊ आपणे म्हठे उनेसिमुसा री स्पर्स करहा जो जेहला मन्झ मेरे ले जम्मेया तुध ले अरज करहा । ¹¹ पैहले ता से तेरे कोई कामा रा नी था, पर एभे से तेरे कठे होर मेरे कठे बड़े कामा रा आ । ¹² तेस जो मतलब जो मेरे दिला रा टुकड़ा आ, तेस जो हांऊ तेरे वाले वाप्स भेजेया करहा । ¹³ असली मन्झ हांऊ तेस जो आपणे नेडे

रखणा चाहं था ताकि एस जेहला मन्झ से तेरी तरफा ले मेरी सेऊआ करे । ¹⁴ पर मैं तेरी मरजी बगैर कुछ करणा नी चाहेया ताकि तेरी ये किरपा दबाबा ले नी पर खुसी री वजहा ले हो । ¹⁵ क्यूंकि क्या जाणे से तेरे ले कुछ ध्याड़े इधी कठे तुध ले लग हुएया ताकि से हमेसा रे कठे तेरे वाले रही सके । ¹⁶ पर एभे से दासा आ साहीं नी आ, बल्कि दासा ले भी खरा आ, मतलब भाई साहीं रहे, जो मेरे कठे ता खास प्यारा आ, पर एभे सरीरा मन्झ होर खास करी किन्हें प्रभु मन्झ तेरा भी प्यारा आ । ¹⁷ अगर तू मुंजो आपणा साथी स्मझहा ता तेस जोमेरे साहीं मनी ले । ¹⁸ होर अगर से तेरा कुछ नुकसान करी बैठिरा या से तेरा लेणदार हुई गईरा, ता से सभ कुछ मेरे नांऊआं पर लिखी दे । ¹⁹ हांऊ पौलुस आपणे ई हाथ ले एस गल्ला जो लिख्हा, कि मां तेसरा कर्जा आपु ऐ भरी देणा; होर ये बोलण री जरूरत नी हाई कि तू आपु मेरा जिन्दगी भरा रे कठे लेणदार आ । ²⁰ हे भाई ये खुसी मुंजो प्रभु मन्झ तेरी तरफा ले मिली जाए: मसीह मन्झ मेरी जिन्दगी जो ताजा करी दे । ²¹ हांऊ तेरी मानदारी पर तबार करी किन्हें, तुजो ये लिखेया करहा होर ये जाणहां, कि जो कुछ हांऊ बोल्हा, तुध तेता ले बढी किन्हें करणा । ²² होर तेरे ले एक अरज करहा कि, मेरे कठे एक कमरा त्यार करी के रक्खेया, क्यूंकि मुंजो आस ई, कि तुस्सा री प्रार्थना रे जबाबा मन्झ हांऊ तुस्सा जो वाप्स मिली जाणा । ²³ इपफ्रास जेहड़ा मसीह यीसू मन्झ मेरे साउगी कैदी आ तुस्सा जो नमस्ते बोल्हा । ²⁴ होर मरकुस, अरिस्तर्खुस, देमास होर लूका जो मेरे साउगी काम करहा ऐ इन्हा रा तुजो नमस्कार । ²⁵ आस्सा रे प्रभु यीसू मसीहा री दया तुस्सा री आत्मा पर हुन्दी रहे ।

इब्रानियों

1 परमेसरे बौहत पैहले पूर्व युगा मन्झ नबिया रे ज्रीए कई मौके पर कई तरीके किन्हें आस्सा रे पूर्वजा साउगी गलबात किती । ² पर इन्हा आखरी ध्याड़े मन्झ तिने आस्सा साउगी आपणे म्हठे रे ज्रीए गल्ला किती, जेस जो तिने सारी चीजा रा वारिस ठैहराया होर तेसरे ज्रीए ई तिने सारे ब्रम्हांडा री रचना कितिरी । ³ से पुत्र परमेसरा री महिमा रा तेज मंडल आ, होर तेसरे रूपा री हूबहू छाप ई, होर सभ चीजा जो आपणी सक्ति रे वचना ले संभाल्हा: से सभ्नी रे पाप धोई किन्हें स्वर्ग मन्झ तेस प्रतापी परमेसरा रे दाई वखा जो बैठी गया । ⁴ से स्वर्गदूता ले तितना ई खरा साबित हुआ, जितना कि तिन्हारे नांऊआं ले से नाऊ खरा आ जो तिने उत्तराधिकारा मन्झ पाईरा । ⁵ क्यूंकि परमेसरे केसी भी स्वर्गदूता किन्हें कधी ऐहड़ा नी बोल्या, कि तू मेरा म्हठा आ, आज तू मेरे ले पैदा हुआ? होर दूजी जगहा मन्झ से दबारा बोल्ला, मां तेसरा बाप हूणा, होर तेस मेरा म्हठा हुणा? ⁶ होर जेबे से आपणे पैहलौठे जो संसारा मन्झ दबारा ल्यांहूआं; ता से बोल्ला, कि परमेसरा रे सभ स्वर्गदूतो तेसरी आराधना करा । ⁷ होर स्वर्गदूता रे बारे मन्झ से ये बोल्ला, कि से आपणे दूता जो हवा, होर आपणे सेवका जो धधक्ती आग बणाहां । ⁸ पर पुत्रा रे बारे मन्झ से ये बोल्ला, कि हे परमेसर तुस्सा री राजगद्दी जुग जुग बणी रैहणीं: तुस्सा रे राज्या रा राजदण्ड न्याय रा राजदण्ड आ । ⁹ तैं धर्मा किन्हें प्यार होर अधर्मा किन्हें बैर रख्या; इधी कठे परमेसरे तेरे परमेसरे तेरे साथिया ले बढी किन्हें खुसी देणे वाळे तेला किन्हें तेरा अभिषेक कितेया । ¹⁰ होर, हे प्रभु, सुहुरू मन्झ तुस्से धरती री नींव पाई, होर स्वर्ग तुस्सा रे हाथा री कारीगरी ई । ¹¹ तिन्हा ता खत्म हुई जाणा; पर तूध बणी रैहणा: होर तिन्हा सभ्नीया कपड़े साहीं पूराणे हुई जाणा । ¹² होर तूध स्यों चादरा साहीं लपेटणे, होर तिन्हा कपड़े साहीं बधली जाणां: पर तूध तेहड़े ई रैहणा होर तेरे साला रा अन्त नी हुणा । ¹³ परमेसरे कधी केसी स्वर्गदूता किन्हें ऐहड़ा नी बोल्या, कि तू मेरे दाई वखा जो बैठ, जेबे कि हांऊ तेरे दुस्मना जो तेरे पैरा री चौकी नी बणाई देऊं? ¹⁴ क्या सभ स्वर्गदूत सेऊआ टैहल करणेवाळी आत्मा नी ई; जो उद्धार पाणेवाळे री सेऊआ करणे रे कठे भेजी जाहीं?

2 इधी कठे, आस्सा जो तिन्हा गल्ला पर होर भी ज्यादा मन ल्याणा चाहिए जो आस्से सुणीरी, ऐहड़ा नी हो कि आस्से बैहकी किन्हें तिन्हा गल्ला ले दूर चली जाए । ² क्यूंकि जो वचन स्वर्गदूता रे ज्रीए बोल्या गईरा था जेबे से बणी रह्या होर हर एक अपराध होर हुक्म नी मनणे रा ठीक ठीक फल मिल्या ।

³ ता फेरी आस्से लोक ऐहड़े बड़े उद्दारा ले बेफिकर रही किन्हें किहाँ बची सकहा ऐ? जिन्हा री चर्चा पैहले ई प्रभु रे ज्रीए हुई, होर सुणने वाळे रे ज्रीए आस्सा जो निश्चय हुआ । ⁴ होर साउगी साउगी परमेसरे भी आपणी इच्छा रे मुताबक चिन्हा जो, होर नौखे कामा जो, होर कई किस्मा रे सामर्था रे कामा जो, होर पवित्र आत्मा रे वरदान बांटणे रे ज्रीए एता री गवाही देंदा रैह्या । ⁵ तिने तेस आऊणेवाळे संसारा जो जेस री चर्चा आस्से करेया करहा ऐ, स्वर्गदूता रे आधीन नी कितेया । ⁶ पर केसीऐ केते, ये गवाही दिती, कि माहणु क्या आ, कि तू तेस रा ख्याल करहा? या माहणु रा म्हठा क्या आ, कि तू तेस पर नजर करहा? ⁷ तुस्से से स्वर्गदूता ले कुछ ई कम बणाया; तुस्से तेस पर महिमा होर आदरा रा मुकट रख्या होर तेस जो आपणे हाथा रे कामा पर अधिकार दितेया । ⁸ तुस्से सभ कुछ तेसरे पैरा हेठ करी दितेया: इधी कठे जेबे तिने सभ कुछ तेसरे अधीन करी दितेया, ता तिने आपु वाले कुछ भी नी रखी छाडेया, जो तेसरे अधीन नी हो: पर आस्से हल्ली तक सभ कुछ तेसरे अधीन नी देखदे । ⁹ पर आस्से यीसू जो, जेस जो स्वर्गदूता ले कुछ ई कम बणाया गईरा था, तेस जो आस्से मौता रा दुःख उठाणे रे वजहा ले महिमा होर आदरा रा मुकट पैहने हुए देख्हा ऐ; ताकि परमेसरा रे अनुग्रहा ले हर एक माहणु रे कठे मौता रा स्वाद चखे । ¹⁰ क्यूंकि जेस रे कठे सभ चीजा ई, होर जेस रे ज्रीए सभ चीजा ई, तेस जो ये ई खरा लग्या कि जेबे से बौहत पुत्रा जो म्हीमा मन्झ पूजाए, ताकि तिन्हा रे उद्धार कर्ता जो दुःख उठाणे रे ज्रीए सिद्ध करे । ¹¹ क्यूंकि पवित्र करणेवाळा होर जिन्हा जो पवित्र कितेया जाहां, सभ्नी एक ई मूला रे ऐ: एस वजहा ले से तिन्हा जो भाई बोलणे ले नी समान्दा । ¹² तिने बोल्या, मां तेरा नांऊ आपणे भाईया जो सुनाणां, सभा रे बीचा मन्झ मां तेरा भजन गाणा । ¹³ होर दबारा ये लिखीरा, कि मां तेस पर भरोसा रखणा; होर से दबारा ये बोल्ला: कि देखा, हांऊ तिन्हा बच्चेया साउगी आ जो परमेसरे मुंजो दितिरे । ¹⁴ इधी कठे जेबकी बच्चे मांस होर खूना रे भागी ऐ, ता से आपु भी तिन्हा साहीं तिन्हा रा सैहभागी हुई गया; ताकि आपणी मौता रे ज्रीए से तेस जो यानि सैताना जो नास करी सके जेस वाले जे मारणे री सक्ति ई । ¹⁵ होर तिन्हा माहणु जो अजाद करे जिन्हा री सारी जिन्दगी मौता रे डरा री वजहा ले गुलामी मन्झ बितीरी थी । ¹⁶ क्यूंकि से ता स्वर्गदूता जो नी बल्कि अब्राहमे रे वंसा री रखवाळी करहा । ¹⁷ इधी कठे तेस जो चाहिए था, कि सभ गल्ला मन्झ से आपणे भाइया साहीं बणे; ताकि से तिन्हा गल्ला मन्झ जो परमेसरा साउगी

रिस्ता रख्हा ई, एक दयालु होर विस्वासयोग्य माहयाजक बणे ताकि लोका रे पापा रे कठे पस्चाताप करे । ¹⁸ क्यूंकि जेबे तिने परीक्षा री दसा मन्झ दुःख उठाया, ता से तिन्हा री भी मदद करी सक्हा, जिन्हा री परीक्षा हुहां ई ।

3 ¹ इधी कठे हे पवित्र भाइयो तुस्से जो स्वर्गीय बुलाहटा रे भागीदार ऐ, तेस प्रेरित होर माहयाजक यीसू पर जेस जो आस्से अंगीकार करहा ऐ, ध्यान करा । ² जिहां परमेसरा रे सारे घराने मन्झ मूसा विस्वासयोग्य था, तिहां ई यीसू भी जिने जे से नियुक्त कितिरा था तेस परमेसरा रे प्रति विस्वासयोग्य था । ³ क्यूंकि तेस जो मूसा ले ज्यादा बढी किन्हें महिमा रे लायक समझ्या गईरा, जिहां कि घरा रा बनाणे वाळा घरा ले बढी किन्हें आदर रख्हा । ⁴ क्यूंकि हर एक घरा रा कोई ना कोई बनाणे वाळा हुहां, पर जिने जे सभ कुछ बणाया से परमेसर आ । ⁵ मूसा ता तेसरे सारे घरा मन्झ दासा साहीं विस्वासयोग्य रह्या, ताकि जिन्हा गल्ला रा जिक्र हुणेवाळा था, तिन्हा री गवाही दिती जाए । ⁶ पर मसीह पुत्रा साहीं तेसरे घरा रा अधिकारी आ, होर तेसरा घर आस्से ऐ, अगर आस्से आपणी हिम्मता पर, होर आपणी उम्मीदा रे घमण्डा पर आखरी तक मजबूत बणी रह्न्गे । ⁷ ता जिहां पवित्र आत्मा बोल्हा, कि अगर आज तुस्से तेसरी अवाज सुणों । ⁸ ता आपणे मना जो काठा देख्या करदे, जिहां बगावत करणे रे टैमा मन्झ कितेया था जेबे जंगला मन्झ परीक्षा हुएआ करहा ई थी । ⁹ जेथी तुस्सा रे बापदादे हांऊ परख्या होर चाळी साला तक मेरे काम देखे । ¹⁰ एस वजहा ले हांऊ तेस टैमा रे लोका साउगी रुसीरा रह्या, होर बोल्या, कि इन्हा रे मन हमेसा भटकदे रह्यां ऐं, होर तिन्हें मेरे रस्ते नी पछयाणे । ¹¹ तेबे मैं गुस्से मन्झ आई किन्हें कसम खाध्ही, कि तिन्हा मेरे विश्रामा मन्झ दाखल नी करी ना पाणा । ¹² हे भाइयो, चुस्त रहूआ, ताकि तुस्सा मन्झ ऐहडा बुरा होर अविस्वासी मन नी हो, जो जिउन्दे परमेसरा ले दूर हटी जाए । ¹³ बल्कि जेस ध्याडे तक आज का ध्याडा बोल्या जाहां, हर रोज एक दूजे जो समझान्दे रहूआ, ऐहडा नी हो, कि तुस्सा मंझा ले कोई जन पापा रे धोखे मन्झ आई किन्हें कठोर हुई जाए । ¹⁴ क्यूंकि आस्से मसीह रे भागीदार हुई गए, अगर आस्से आपणे पैहले भरोसे पर आखरी तक मजबूत बणी रह्न्गे । ¹⁵ ता जिहां बोल्या जाहां, कि अगर आज तुस्से तेसरी अवाज सुणो, ता आपणे मना जो कठोर ना करा, जिहां बगावत करणे रे टैमा मन्झ कितेया था । ¹⁶ भला स्यों कुण लोक थे जिन्हें सुणी किन्हें बगावत किती? क्या स्यों, स्यों नी थे जिन्हा जो मुसे मिसरा ले बाहर काढेया था? ¹⁷ होर से चाळी साला तक किन्हा लोका किन्हें रुसीरा रह्या? क्या तिन्हा लोका किन्हें नी, जिन्हें पाप कितेया, होर तिन्हारी ल्हासा जंगला मन्झ पईरी रही? ¹⁸ होर तिने किन्हां लोका साउगी कसम खाध्ही, कि तुस्सा मेरे विश्रामा

मंझ दाखल नी करी पाणा: सिर्फ तिन्हा किन्हें जिन्हें जे हुक्म नी मन्या? ¹⁹ इधी कठे आस्से देख्हा ऐ, कि स्यों अविस्वासा री वजहा ले दाखल नी हुई सके ।

4 ¹ इधी कठे जेबकी तेसरे विश्रामा मन्झ दाखल हुणे री प्रतिज्ञा हल्ली तक बणीरी, ता आस्सा जो डरणा चाहिए; ऐहडा नी हो, कि तुस्सा मंझा ले कोई जन विश्रामा मन्झ दाखल हुणे बगैर रही जाए । ² क्यूंकि आस्सा जो तिन्हा साहीं सुसमाचार सुणाया गया, पर सुणाए गए वचना ले तिन्हा जो कुछ फायदा नी हुआ; क्यूंकि सुणने वाळे रे मना मंझ विस्वासा समेत कुछ नी बैठया । ³ होर आस्से जिन्हें विस्वास कितेया, तेस विश्रामा मन्झ दाखल हुहां ऐं; जिहां तिने बोल्या, कि मैं गुस्से मन्झ कसम खाध्ही, कि तिन्हा मेरे विश्रामा मंझ दाखल नी करी पाणा, जेबकी संसारा री उत्पत्ति रे टैमा ले तेसरे काम पुरे हुई चुकिरे थे । ⁴ क्यूंकि सात्वे ध्याडे रे बारे मन्झ तिने केते ऐहडा बोलिरा, कि परमेसरे सात्वे ध्याडे आपणे सभ काम काज निपटाई किन्हें विश्राम कितेया । ⁵ होर एस जगहा दबारा तिने ये बोल्या, कि तिन्हा मेरे विश्रामा मंझ दाखल नी करी पाणा । ⁶ होर जिन्हा जो पैहले तेसरा सुसामाचार सुणाया गया, स्यों हुक्म नी मनणे रे वजहा ले तेस विश्रामा मन्झ दाखल नी हुई पाए थे पर बाकी रे कठे विश्रामा रा द्वार हल्ली तक खुल्हीरा । ⁷ इधी कठे परमेसरे दबारा एक खास ध्याडा नियुक्त कितेया होर तेस जो नांऊ दितेया आज कुछ साला ले बाद दाऊदा रे जीए परमेसरे तेस ध्याडे रे बारे मन्झ सास्त्रा मन्झ दस्सिरा था, जेसरे बारे मन्झ आस्से एभे गल किती, कि अगर आज तुस्से तेसरी अवाज सुणो, ता आपणे मना जो कठोर नी करा । ⁸ होर अगर यहोसु तिन्हा जो विश्रामा मन्झ दाखल करी लैंदा, ता बाद मन्झ परमेसर केसी होरी ध्याडे रे बारे मन्झ नी दस्दा । ⁹ ता जाणी लऊआ कि परमेसरा रे लोका रे कठे सब्ता रा विश्राम बाकी आ । ¹⁰ क्यूंकि जो कोई भी तेसरे विश्रामा मन्झ दाखल हुहां, से भी परमेसरा साहीं आपणे काम पूरा करी किन्हें विश्राम पाहां । ¹¹ ता आऊआ आस्से भी तेस विश्रामा मन्झ दाखल हुणे री कोसिस करिए, ऐहडा नी हो कि कोई जन तिन्हा साहीं हुक्म नी मनी किन्हें पई जाए । ¹² क्यूंकि परमेसरा रा वचन जिउन्दा, प्रबल, होर हर एक दोधारी तलवारा ले भी ज्यादा तेज आ, होर जीव, होर आत्मा जो, होर गांठ गांठ, होर गुदे गुदे जो लग करी किन्हें, आर पार छेदूआ; होर मना री भावना होर विचारा री जांच करहा । ¹³ होर सृष्टि री कोई चीज तेस ले लुख्ही री नी ई बल्कि जेस किन्हें आस्सा जो काम आ, तेस री हाखिया रे साम्हणें सभ चीजा खुल्ही होर बेपरद ऐ । ¹⁴ इधी कठे क्यूंकि परमेसरा रा पुत्र यीसू एक ऐहडा म्हान माहयाजक आ, जो स्वर्गा ले हुई किन्हें गया, ता आओ, आस्से भी आपणे अंगीकारा जो मजबूती किन्हें पकड़ी रखिए । ¹⁵ क्यूंकि आस्सा रा ऐहडा माहयाजक

नी आ, जो आस्सा री कमजोरिया मन्झ आस्सा साउगी दुखी नी हो; बल्कि सभ गल्ला मन्झ तेस जो आस्सा साहीं परख्या गया, तेबे बी से निर्दोष निकल्या।¹⁶ इधी कठे आऊआ, आस्से अनुग्रहा रे सिंहासना रे नेडे हिम्मत करी किन्हें चल्हा ऐ, ताकि आस्सा पर दया हो, होर से अनुग्रह पाए, जो जरूरता रे टैमा आस्सा री मदद करे।

5¹ क्यूंकि हर एक माहयाजक माहणु मन्झा ले ई चुणेया जाहां, होर जो गल्ला परमेसरा किन्हें जुडी री हो तिन्हा गल्ला रे बारे मन्झ माहणु जो ई नियुक्त कितेया जाहां: ताकि से भेंट होर पाप बलि चढाया करे।² क्यूंकि से आपु भी कमजोरी रे अधीन घिरी रा हूहां; इधी कठे से नासमझ, होर भूले भटके साउगी नर्मी किन्हें पेस आई सकहा।³ होर इधी कठे तेस जो आपणे पापा रे कठे होर तिहां ई लोका रे पापा रे कठे बालियाँ चढाणा पहुंआं ई।⁴ होर ये आदरा री जगहा कोई आपणे आप नी लैदा, जेबे तक कि हारूना साहीं परमेसरा री तरफा ले नी ठेहराई जाए।⁵ तिहां ई मसीहे भी माहयाजक बणने री म्हीमा आपणे आप ग्रैहण नी किती, पर परमेसरे तेस किन्हें बोल्या, कि तू मेरा पुत्र आ, आज ई हांऊ तेरा पिता बणेया।⁶ से दूजी जगहा भी बोल्हा, तू मल्किसिदका साहीं (सदा रे कठे) एक सास्वत याजक आ।⁷ तिने आपणे सरीरा मन्झ रैहणे रे टैमा मन्झ जोरा जोरा किन्हें चिल्लाई चिल्लाई किन्हें, होर रोई रोई किन्हें तेस ले जो तेस जो मौता ते बचाई सकहा था, प्रार्थना होर अरज किती होर भक्ति रे वजहा ले तेस री सुणी गई।⁸ होर पुत्र हूणे पर भी, तिने दुःख उठाई उठाई किन्हें हुक्म मनणा सिख्या।⁹ होर सिद्ध बणी किन्हें, से आपणे सभ हुक्म मनणेवाळे रे कठे हमेसा हमेसा रे कठे उद्दारा री वजहा बणी गया।¹⁰ होर तेस जो परमेसरा री तरफा ले मल्किसिदका री परम्परा रे मुताबक माहयाजका रा पद मिल्या।¹¹ एता रे बारे मन्झ आस्सा वाले बोलणे जो बौहत सारी गल्ला ई, जिन्हा रा समझणा भी कठिन आ; क्यूंकि तुस्से ऊंचा सुणदे लगीरे।¹² टैमा रे मुताबक ता तुस्सा जो गुरु हूई जाणा चहिए था, तेबे भी क्या ये जरूरी आ, कि कोई तुस्सा जो परमेसरा रे वचना री सुरुआती शिक्षा दबारा स्वाए? होर ऐहडे बणी गइरे, कि तुस्सा जो अन्नाजा रे बदले हली तक दूध ई चहिए।¹³ क्यूंकि दूध पिणे वाळे बच्चे जो ता धर्मा रे वचना री पछ्याण नी हुन्दी, क्यूंकि से ता बालक आ।¹⁴ पर अन्नाज स्याणेया रे कठे आ, जिन्हें आपणे अनुभवा ले भले बुरे मन्झ फर्क करणा सीखी लईरा।

6¹ इधी कठे आऊआ मसीह री सुरुआती शिक्षा री गल्ला जो छाडी किन्हें, आस्से सिद्धता री तरफ बढ़दे चली जाए, होर मरीरे कामा ले मन फिराणे, होर परमेसरा पर विस्वास करणे।² होर बपतिस्मा होर हाथ रखणे, होर मरीरे मंझा ले जिउन्दे हूणे, होर आखिरी न्याया री शिक्षा रूपी नींव, दबारा नी पाए।

³ होर अगर परमेसर चाहे, ता आस्सा ऐहडा ई करणा।⁴ क्यूंकि जिन्हें एक बारी ज्योति पाई लईरी, जो स्वर्गीया वरदाना रा स्वाद चखी चुकीरे होर पवित्र आत्मा रे भागी हूई गइरे।⁵ होर परमेसरा रे उत्तम वचना रा होर आऊणे वाळे युगा री सामर्थी रा स्वाद चखी चुकिरे।⁶ अगर स्यों भटकी जाए; ता तिन्हा जो मन फिराव रे कठे दबारा नंऊआं बनाणा असम्भव आ; क्यूंकि स्यों परमेसरा रे पुत्रा जो आपणे कठे दबारा कूसा पर चढाहें होर सभी रे साम्हणे तेस पर कलंक ल्याहें।⁷ स्यों लोक ऐहडी धरती साहीं ऐं जो बार बार हूणे वाळी बरखा रे पाणी जो सोखी लैहां ई होर जोतणे बाहणे वाळे रे कठे फायदेमंद फसल प्रदान करहा ई, से परमेसरा री आसीष पाहीं।⁸ पर अगर से झाडी होर ऊंटकटारे उगाहीं, ता निकम्मी होर स्नापित हूणे वाळी ई, होर तेता रा अन्त जलाया जाणा आ।⁹ पर हे प्यारेओ, चाहे आस्से ये गल्ला बोल्हा ऐ पर तुस्सा रे बारे मन्झ आस्सा जो एता ले भी खरी गल्ला रा भरोसा आ-जो उद्दारा रे बारे मन्झ जुडी री।¹⁰ क्यूंकि परमेसर अन्यायी नी आ, कि से तुस्सा रे कामा, होर तेस प्यारा जो भूली जाए, जो तुस्से तिन्हा रे नांऊआं रे कठे इस तरहा दस्या, कि पवित्र लोका री सेऊआ किती, होर करदे भी लगीरे।¹¹ पर आस्से ता ये चाहें, कि तुस्सा मन्झा ले हर एक जण अन्त तक पूरी उम्मीद रखी किन्हें ऐहडी कोसिस करदा रहे।¹² ताकि तुस्से आलसी नी हूई जाओ; बल्कि तिन्हा गल्ला रा अनुकरण करा, जो विस्वास होर धीरजा रे ज्रीए प्रतिज्ञा रे वारिस हूहां ऐं।¹³ होर जेबे परमेसरे अब्राहमा किन्हें वायदा कितेया तेबे तेस जो तेस ले बडा कोई होर नी मिल्या जेस किन्हें जे से कसम खाई सको, तेबे तिने आपणी ही कसम खाई किन्हें बोल्या।¹⁴ कि मां सचमुच तुजो बौहत आसीष देणी, होर तेरा बंस बढ़ाणा।¹⁵ होर इस तरहा तिने धीरज धरी किन्हें से सभ कुछ पाई ल्या जेसरी तेस किन्हें प्रतिज्ञा कितीरी थी।¹⁶ लोक ता तिन्हा री कसम खाहॉं ऐं जो तिन्हा ले बडे हो, होर तिन्हा रे हर एक विवादा रा फैसला कसम खाई किन्हें पक्का हूहां।¹⁷ इधी कठे जेबे परमेसरे प्रतिज्ञा रे वारिसा पर ये बिल्कुल साफ़ करी दितेया कि मेरी इच्छा कधी नी बधली सकदी; ता आपणे वचना साउगी तिने आपणी कसम जोड़ी दिती।¹⁸ ता एथी फेरी दो गल्ला ई – तेसरी प्रतिज्ञा होर तेसरी कसम जो कधी नी बधली सकदी होर जिन्हा रे बारे मन्झ परमेसरा जो झूठा साबित करणा अन्होना आ, इधी कठे आस्से जो परमेसरे वाले सुरक्षा पाणे रे कठे आईरे होर जो उम्मीद तिने आस्सा रे साम्हणे रखिरी तेता जो पाई ले।¹⁹ से उम्मीद आस्सा रे प्राणा रे कठे ऐहडा लंगर आ जो मजबूत होर पक्का आ, होर परदे रे अन्दरा तक पुज्हा।²⁰ जेथी यीसूए आस्सा री तरफा ले प्रवेस कितेया से मल्किसिदका री परम्परा रे मुताबक सदा काला रे कठे माहयाजक बणी गया।

7 ¹ये मल्लिसिदक सालेमा रा राजा, होर परमप्रधान परमेसरा रा याजक था, जेबे अब्राहम राजेया जो मारी किन्हें वाप्स आया करहा था, ता से अब्राहमा साउगी मिल्या होर तिने तेस जो आसीष दिती। ²होर अब्राहमे तेस जो ई सभ चीजा रा दसवा अंस भी दितेया जो तिने युद्धा मन्झ जितिरी थी: तेसरे नांऊआं रा पैहला अर्थ आ “धार्मिकता रा राजा” होर फेरी सालेमा रा राजा यानि सांति रा राजा। ³जेस रा ना बाप, ना माऊ, ना खानदान आ, जेस रे ना जन्मा रा होर ना अंता री कोई जानकारी ई से परमेसरा रे पुत्रा रे साहीं हुई किन्हें हमेसा हमेसा रे कठे याजक बणीरा रेंहयां। ⁴ऐबे एस गल्ला पर ध्यान करा कि से कितना महान था जेस जो कुलपति अब्राहमे आपणी चीजा री लूटा रा दसवां अंस दितिरा था। ⁵ऐबे देखा व्यवस्था रे मुताबक लेवी वंसा जो, जो याजक बणहां एं लोका ले यानि आपणे भाईया ले ई चाहे, स्यों अब्राहमा री देहा ले कि नी जम्मिरे हो दसवां अंस लिया करे। ⁶पर फेरी भी मल्लिसिदक, जो तिन्हा रे खानदाना रा भी नी था तिने अब्राहमा ले दसवां अंस लया होर तेस अब्राहमा जो आसीष दिती जेस वाले जे परमेसरा री प्रतिज्ञा थी। ⁷होर एता मन्झ कोई सक नी आ, कि जो आसीष देहां से आसीष लेणे वाळे ले बडा हूं। ⁸होर एथी ता मरणहार माहणु दसवां अंस लैहूं एं, पर तेथी से ई लैहूं, जेस री गवाही दिती जाहीं, कि से जिऊन्दा आ। ⁹ता फेरी कोई एथी तक बोली सकहा, कि से लेवी जिने दसवां अंस कठा कितेया, तिने अब्राहमा रे ज़ीए दसवां अंश प्रदान करी दितेया। ¹⁰क्यूंकि जेस टैम मल्लिसिदके तेसरे बापू किन्हें मुलाकात किती, तेस टैम से आपणे बापू रे सरीरा मन्झ था। ¹¹अगर लेवीय याजक पदा रे ज़ीए सिद्धता पाई जाई सकहा ई (क्यूंकि एता रे अधारा पर लोका जो व्यवस्था मिली थी) ता फेरी केसी दूजे याजका री क्या जरूरत थी? एक ऐहडे याजका री जो पर मल्लिसिदका री परम्परा रा हो, ना कि हारुना री परम्परा रा हो? ¹²क्यूंकि जेबे याजका रा पद बधली जाहां? ता व्यवस्था रा भी बधलना जरूरी आ। ¹³क्यूंकि जेस रे बारे मन्झ ये गल्ला बोली गईरी से केसी दूजे गोत्रा रा आ, होर तेस गोत्रा रे केसी भी आदमीए वेदी री सेऊआ नी किती। ¹⁴क्यूंकि ये गल ता साफ हुई गई, कि आस्सा रा प्रभु यहूदा रे गोत्रा मन्झा ले उदय हुआ होर मूसे एस गोत्रा रे कठे याजक पदा रे बारे मन्झ कुछ नी बोल्या। ¹⁵होर जेबे मल्लिसिदका साहीं एक होर ऐहडा याजक पैदा हूणे वाळा था। ¹⁶से आपणी वंसावली रे नियमा रे मुताबक नी, पर एक अविनासी जीवना री सामर्था रे मुताबक याजक बणेया। ¹⁷क्यूंकि तेसरे बारे मन्झ ये गवाही दिती गई, कि तू मल्लिसिदका साहीं हमेसा हमेसा रे कठे याजक आ। ¹⁸इधी कठे पैहला हुक्म कमजोर, होर निष्फल हूणे री वजहा ले लोप हुई गया। ¹⁹(क्यूंकि व्यवस्था रे विधाने केसी जो भी सिद्ध नी

बणाया) होर तेता रे बदले एक ऐहडी खरी उम्मीद रखी गई जेस रे ज़ीए आस्से परमेसरा रे नेडे जाई सकहा ऐ। ²⁰परमेसरे यीसू जो कस्मा (शपथा) रे ज़ीए खास याजक बणाया था जेबकी होरी जो बगैर कस्मा (शपथा) रे ई खास याजक बणाया गईरा था। ²¹(क्यूंकि स्यों ता बगैर कस्म (शपथ) खाए याजक बणाए गए पर यीसू कसम (शपथ) खाई किन्हें याजक बणेया; जेबे परमेसरे तेस किन्हें बोल्या,” प्रभुए ये कसम लईरी, होर तेस आपणा विचार कधी नी बदलणा: होर तू हमेसा हमेसा रे कठे याजक आ)। ²²एस कस्मा (शपथा) री वजहा ले यीसू एक खरी वाचा रा जमानतदार बणी गया। ²³ऐबे देखा, ऐहडे बौहत याजक हूंहां एं थे जिन्हा जो मौते याजक पदा पर रैहणे नी दितेया। ²⁴पर यीसू अमर आ इधी कठे तेसरा याजक पद भी जुगजुग अटल आ। ²⁵इधी कठे जो तेसरे ज़ीए परमेसरा तक पुज्हा ऐ, से तिन्हा रा पूरा पूरा उद्धार करी सकहा, क्यूंकि से तिन्हा रे कठे बिनती करणे रे कठे हमेसा जिउंदा आ। ²⁶ता ऐहडा ई माहयाजक आस्सा रे लायक था, जो पवित्र, होर निष्कपट होर निर्मल, होर पापिया ले लग, होर स्वर्गा ले भी ऊंचा कितेया गईरा हो। ²⁷होर तिन्हा माहयाजका साहीं तेस जो ये जरूरी नी था कि से हर ध्याडे पैहले आपणे पापा होर फेरी लोका रे पापा रे कठे बलिदान चढाए; क्यूंकि तिने ता हमेसा हमेसा रे कठे तिन्हारे पापा रे कठे आपणे आपा जो एक ई बारी बलिदान करी दितेया। ²⁸क्यूंकि व्यवस्था ता कमजोर आदमी जो माहयाजक नियुक्त करहा ई; पर तेस कस्मा (शपथा) रा वचन जो व्यवस्था रे बाद खाधही गई, तेस पुत्रा जो नियुक्त करहा जेस जो हमेसा हमेसा रे कठे सिद्ध कितेया गईरा।

8 ¹ऐबे जो गल्ला आस्से बोल्या करहा ऐ, तिन्हा मन्झा ले सभी ले बडी गल्ल ये ई, कि आस्सा रा ऐहडा माहयाजक आ, जो स्वर्गा मन्झ तेस म्हान माहराजे री राजगद्दी री दाई वखा जो जाई बैठ्या। ²होर से पवित्र जगहा होर तेस सच्चे तम्बू रा सेवक बणेया, जेस जो केसी आदमिे नी, बल्कि प्रभुए खडा कितेया था। ³क्यूंकि हर एक माहयाजको इधी कठे नियुक्त कितेया जाहां कि से भेंट होर बलिदान चढाए होर इधी कठे एस माहयाजका रे कठे भी ये जरूरी था, कि तेस वाले भी कुछ चढाणे रे कठे हो। ⁴होर अगर से धरती पर हुन्दा ता से कधी याजक नी हुन्दा, क्यूंकि तेथी पैहले ले ई ऐहडे आदमी ऐ जो व्यवस्था रे मुताबक दान चढाहें। ⁵जो स्वर्गा री चीजा रे प्रतिरूप होर परछाई री सेऊआ करहा ऐ, इधी कठे जेबे मूसा पवित्र तम्बू बनाणे ई वाळा था, तेस ई टैम तेस जो ये चेतावनी मिली, कि ध्यान रहे कि तू हर चीज ठीक तिहां ई बणाया जो तुजो पहाडा पर दस्सिरा था। ⁶पर जो सेऊआ रा काम यीसू जो मिल्या से तिन्हा री सेवकाई ले बढी किन्हें आ, क्यूंकि से होर भी खरी वाचा रा मध्यस्थ बणेया, जो पुराणी वाचा ले भी

खरी ई होर खरी प्रतिज्ञा पर आधारित ई।⁷ क्यूंकि अगर पैहली वाचा मन्झ कोई खोट हुंदा, ता दूजी वाचा रे कठे कोई जगहा नी रही जांदी।⁸ पर परमेसरे तिन्हा पर दोष लगाई किन्हें बोल्या, कि देखा स्यों ध्याड़े आया करहा ऐ, कि मां इस्राएला रे घराने साउगी, होर यहूदा रे घराने साउगी, नौई वाचा बान्हणी।⁹ ये वाचा तेस वाचा साहीं नी हूणी, जो मैं तिन्हा रे पूर्वजा साउगी तेस टैम बान्ही थी, जेबे मैं तिन्हा रा हाथ पकड़ी किन्हें स्यों मिसर देसा ले काढी किन्हें ल्यांदे, क्यूंकि स्यों मेरी वाचा पर स्थिर नी रहे, होर मैं तिन्हा ख्याल नी रख्या; प्रभू ऐहड़ा ई बोल्ला।¹⁰ फेरी प्रभु बोल्ला, कि जो वाचा मां तिन्हा ध्याड़े ले बाद इस्राएला रे घराने साउगी बान्हणी, से ये ई, कि मां आपणी व्यवस्था तिन्हा रे मना मन्झ पाई देणी, होर से व्यवस्था मां तिन्हा रे दिला पर लिखणी, होर मां तिन्हा रा परमेसरा ठैहरणा, होर तिन्हा मेरे लोक ठैहरणा।¹¹ फेरी ता कधी केसी भी आदमिया आपणे देसवाळया जो होर आपणे भाई जो ये नी सिखाणा, कि तुस्से प्रभु जो पछ्याणा क्यूंकि छोटे ले बड़े तक सभिया हांऊ जाणी लैणा।¹² क्यूंकि मां तिन्हा रे अधर्मा रे बारे मन्झ दयावन्त हुणा, होर तिन्हा रे पाप दबारा याद नी करणे।¹³ नौई वाचा री स्थापना करणे री वजहा ले तिने पैहली वाचा पुराणी ठैहराई, होर जो चीज पुराणी होर जीर्ण हुई जाहीं तेता रा लुप्त हुई जाणा जरूरी आ।

9¹ ऐबे देखा पैहली वाचा मन्झ भी सेऊआ रे नियम थे; होर एक माहणु रे हाथा रा बणीरा पवित्रस्थान भी था।² हालांकि- एक तम्बू बणाया गया, पैहले तम्बू मन्झ दीवट, होर मेज, होर दाना री रोटिया थी; होर तेस जो पवित्रस्थान बोल्या जाहां।³ होर दूजे परदे रे पीछे से तम्बू था, जेस जो परम पवित्रस्थान बोल्या जाहां।⁴ तेस मन्झ सोने री धुपदानी, होर चारों तरफ मढीरा वाचा रा संदूक होर एता मन्झ मन्ना किन्हें भूरिरा सोने रा भांडा होर हारुना रा डंडा जेस मन्झ फूल फल लगी गईरे थे होर वाचा री पटिया थी।⁵ होर तेसरे प्र्याहले दो तेजोमय करुब थे, जिन्हें प्रायश्चित करणे री जगहा पर छाया कितिरी थी: पर एस टैम आस्से इन्हा गल्ला रा बखान एक एक करी किन्हें नी करी सकदे।⁶ जेबे यूं चीजा एस तरीके ले त्यार हुई चुकी, ता याजक हर रोज बाहरी तम्बू मन्झ जाई किन्हें आपणी आपणी सेऊआ रा काम करदे लगे।⁷ पर अंदरले तम्बू मन्झ सिर्फ खास माहयाजक ई जाहां था होर से भी साला मन्झ एक बार; होर से बगैर खूना रे अन्दर नी जान्दा था; जेस खूना जो से आपणे कठे होर लोका री भूल चूका रे कठे चढाहां था।⁸ एता ले पवित्र आत्मा यही दस्था, कि जेबे तक पैहला तम्बू ख्हड़ीरा, तेबे तक पवित्रस्थाना रा रस्ता उजागर नी हुंदा।⁹ होर ये तम्बू ता वर्तमान टैमा रे कठे एक दृष्टान्त आ; जेस मन्झ ऐहड़ा दान होर बलिदान चढाए जाहें; जिन्हा ले आराधना करणेवाळे रे मन

सिद्ध नी हुई सकदे।¹⁰ इधी कठे ये ता बस खाणे पीणे री चीजा, होर किस्मा किस्मा री स्नान विधि रे आधारा पर सारीरिक नियम ऐ, जो सुधारा रे टैमा तका रे कठे नियुक्त किते गईरे।¹¹ पर जेबे मसीह आऊणेवाळी खरी खरी चीजा रा माहयाजक हुई किन्हें आया, ता तिने होर भी बडे होर सिद्ध तम्बू ले हुई किन्हें जो हाथा रा बणाया गईरा नी हो, यानि जो संसारिक नी हो।¹² होर बकरे होर छेलू रा खून लई किन्हें से दाखल नी हुआ पर आपणा ई खून लई किन्हें से एक ई बार पवित्र स्थाना मन्झ दाखल हुआ, होर आस्सा रे कठे अनन्त छुटकारा प्राप्त कितेया।¹³ क्यूंकि अगर बकरे होर छेलू रे खून होर क्लोरा री भभूत अपवित्र लोका पर छिड़के जाणे ले सरीरा री असुद्धता दूर हुई जाहीं।¹⁴ तेबे मसीह रा खून जिने जे आपणे आपा जो सनातन आत्मा रे ज्रीए परमेसरा रे साम्हणें निर्दोष चढाया, ता तेस तुस्सा रे मन मरीरे कामा ले कि नी सुद्ध करणे, ताकि तुस्से जिउंदे परमेसरा री सेऊआ करो।¹⁵ होर एस वजहा ले ई मसीह एक नौई वाचा रा मध्यस्थ बणेया, ताकि स्यों जेहड़े बुलाए गईरे उत्तराधिकारा रा अनन्त आसिरवाद पाए जेसरी प्रतिज्ञा परमेसरे किति थी, ऐबे देखा पैहली वाचा रे अधीन किते गईरे पापा ले तिन्हा जो छुटकारा देणे रे कठे फिरौती रे रूपा मन्झ से आपणे प्राण देई चुकिरा।¹⁶ क्यूंकि जेथी तक वाचा रा सुआल आ; तेस्सा वाचा रे कठे जिने जे से लिखिरी तेसरी मौत साबित करणा जरूरी ई।¹⁷ क्यूंकि एहड़ी वाचा मरणे पर पक्की हूहां ई, होर जेबे तक वाचा बान्हणेवाळा जिउंदा रेंहयां, तेबे तक वाचा कामा री नी हुन्दी।¹⁸ इधी कठे पैहली वाचा भी बगैर खूना रे नी बान्ही गई।¹⁹ क्यूंकि जेबे मूसा सभ लोका जो व्यवस्था री हर एक आज्ञा सुणाई चुकेया, ता तिने बकरे रा होर छेलू रा खून लई किन्हें, पाणी होर लाल ऊन, होर जुफा साउगी, तेस किताबा पर होर सभ लोका पर छिड़की दितेया।²⁰ होर बोल्या, कि ये तेस वाचा रा खून आ, जेस रा हुक्म परमेसरे तुस्सा रे कठे दितेया।²¹ होर इस तरहा तिने तम्बू होर सेऊआ रे सारे स्माना पर खून छिड़क्या।²² होर व्यवस्था रे मुताबक हमेसा सभ चीजा खूना रे ज्रीए सुद्ध किति जाहीं; होर बगैर खून बहाए माफी नी हुन्दी।²³ इधी कठे जरूरी आ, कि स्यों चीजा जो स्वर्गा री प्रतिरूप ई स्यों जानवरा रे बलिदाना किन्हें सुद्ध किति जाऐ; पर स्वर्गा री चीजा ता इन्हा ले भी खरे बलिदाना किन्हें सुद्ध किते जाणे री उम्मीद करहा ई।²⁴ क्यूंकि मसीहे तेस हाथा रे बणाईरे पवित्र स्थाना मन्झ, जो सच्चे पवित्र स्थाना रा नमूना आ, दाखल नी कितेया पर स्वर्गा मन्झ ई दाखल कितेया, ताकि से आस्सा री तरफा ले परमेसरा री उपस्थिति मन्झ प्रगट हो।²⁵ होर ना ई से आपणे आपा रा बलिदान बार बार चढाए जाणे रे कठे स्वर्गा मन्झ दाखल हुआ, जिहां जे माहयाजक हर साल दूजे रा खून लई किन्हें पवित्र स्थाना मन्झ दाखल हूहां ऐं

। 26 नी ता संसारा री उत्पत्ति ले लई किन्हें तेस जो बार बार दुःख उठाणा पऊन्दा; पर ऐबे युगा रे आखरी मन्झ से एक बारी ई प्रगट हुआ, ताकि आपणे ई बलिदाना रे ज़ीए से पाप दूर करी दे। 27 होर जिहां माहणुआं रे कठे एक बारी मरणा होर तेता ले बाद न्याय हूणा पक्का आ। 28 तिहां ई मसीह भी कईया रे पाप उठाणे रे कठे एक ई बारी बलिदान हुआ; होर जो लोक तेस जो ध्याघ्हा ऐ तेस तिन्हा रे पाप उठाणे रे कठे नी पर तिन्हा रे उद्धारा रे कठे दूजी बारी प्रगट हूणां।

10 क्यूंकि व्यवस्था रा विधान ता, सिर्फ आऊणेवाळी खरी चीजा री तस्वीर मात्र ई; आपणे आपा मन्झ यूँ चीजा असली नी ई, इधी कठे तिन्हा एक ई किस्मा रे बलिदाना रे ज़ीए, जो हर साल लगातार चढ़ाए जाहें; नेडे आऊणेवाळेया जो कधी भी सिद्ध नी करी सकदी। 2 अगर एहड़ा हूँदा ता क्या तिन्हा बलिदाना रा चढ़ाया जाणा बन्द नी हुई जाणा था? क्यूंकि फेरी ता सेऊआ करणे वाळेया एक ई बारी हमेसा हमेसा रे कठे पवित्र हुई जाणा था, होर आपणे पापा रे कठे तिन्हा आपणे आपा जो दबारा कधी पापी ना समझणा था। 3 पर तिन्हा बलिदाना रे ज़ीए हर साल पापा री याद किती जाहीं। 4 क्यूंकि बकरे होर छेलू रे खूना ले पाप दूर हुई जाए ये सम्भव नी आ। 5 इधी कठे जेबे यीसू दुनिया मन्झ आया ता तिने बोल्या था: "तैं बलिदान होर कोई भेंट नी चाही, पर मेरे कठे एक सरीर त्यार कितेया। 6 तू ना ता होम बलिया ले होर ना पाप बलिया ले खुस हुआ। 7 तेबे मैं बोल्या, होर पवित्र साख्रा मन्झ मेरे बारे मन्झ ये भी लिखीरा, कि देख हांऊ तेरी मर्जी पूरी करणे रे कठे आई गईरा। 8 उपर ता से बोल्ला, कि "तुस्से ना ता कोई बलिदान चाहेया होर ना कोई भेंट चाही होर ना कोई होम-बलिया चाही होर ना पाप बलिया चाही, होर ना तिन्हा ले खुस हुआ, "जेबकी ये बलिदान ता व्यवस्था रे मुताबक चढ़ाए जाहें। 9 फेरी से ये भी बोल्ला, "कि देख, हांऊ आई गईरा, ताकि हांऊ तुस्सा री इच्छा पूरी करूँ, "तेबे से दूजी व्यवस्था जो स्थापित करणे रे कठे पैहली व्यवस्था जो रद्द करी देहां। 10 परमेसरा री इच्छा ले एक ई बारी हमेसा हमेसा रे कठे यीसू मसीह रे सरीरा रे बलिदाना रे ज़ीए आस्से पवित्र करी दिते गए। 11 होर हर एक याजक ता खड़े हुई किन्हें हर रोज सेऊआ करहा, होर से बार बार एक ई किस्मा रे बलिदान चढ़ाहां जो पापा जो कधी दूर नी करी सकदे। 12 पर ये माहणु ता पापा रे बदले एक ई बलिदान हमेसा रे कठे चढ़ाई किन्हें परमेसरा रे दायें पासे जाई बैठ्या। 13 होर तेस्स टेमा ले ई तेस्जो ये इंतजार आ, कि तेस्स रे दुसमण तेस्स रे पैरा थाले री चौकी बणी जाए। 14 क्यूंकि जो पवित्र किते जाया करहा ऐ, तिने स्यों एक ई बलिदाना रे ज़ीए, हमेसा हमेसा रे कठे सिद्ध करी दिते। 15 होर पवित्रा आत्मा भी आस्सा जो ये ई गवाही देहां; क्यूंकि तिने पैहले बोलिरा था, 16 "प्रभु बोल्ला; कि

जो वाचा मां तिन्हा ध्याड़े ले बाद तिन्हा साउगी बान्हणी से ये ई कि मां आपणी व्यवस्था तिन्हारे दिला पर लिखणी होर मां तिन्हारे मना मन्झ पाई देणी।" 17 (फेरी से ये भी बोल्ला): कि "मां तिन्हारे पाप होर तिन्हारे अधर्मा रे काम फेरी कधी दबारा याद नी करणे।" 18 फेरी जेबे इन्हा पापा री माफ़ी हुई गइरी, तेबे फेरी पापा रा बलदान नी रह्या। 19 इधी कठे हे भाईयो, ऐबे आस्सा जो यीसू रे खुना रे ज़ीए तेस पवित्र स्थाना मन्झ दाखल हूणे री हिम्मत हुई गईरी। 20 जो तिने पर्दे रे ज़ीए यानी आपणे सरीरा मंझा ले हुई किन्हें, आस्सा रे कठे अभिषेक कितेया। 21 होर इधी कठे कि आस्सा रा ऐहड़ा म्हान याजक आ, जो परमेसरा रे घरा रा अधिकारी आ; 22 ता आऊआ, आस्से खरे मना होर पुरे विस्वासा साउगी, होर मना रा दोष दूर करणे रे कठे दिला पर छिड़काव करी किन्हें, होर सरीरा जो साफ पाणी साउगी धोई किन्हें परमेसरा रे नेडे जाहें। 23 ता आऊआ आस्से आपणी उम्मीदा रे अंगीकारा जो मजबूती किन्हें पकड़ी लई ऐ क्यूंकि जिने प्रतिज्ञा किती, से सच्चा आ। 24 होर आऊआ, आस्से एस गल्ला रा ध्यान रखे कि आस्से प्यार होर खरे कामा रे प्रति एक दूजे जो किहाँ बढाई सकहा ऐ। 25 होर एक दूजे साउगी कट्टा हुणा (संगति करणा) नी छाडा, जिहां कि कईया जो सभा मन्झ नी आऊणे री आदत पई गईरी, पर एक दुजेया जो समझादें रहुआ; होर जिहां—जिहां तेस ध्याड़े जो नेडे आउंदे देखो तिहां—तिहां होर भी ज्यादा एडडा करदे रहुआ। 26 क्यूंकि सच्चाई री पैहचाण हूणे रे बाद अगर आस्से जाणी बुझी के पाप कर्रहा ऐ, तेबे पापा रे कठे फेरी कोई बलिदान बाकी नी रह्या। 27 हाँ फेरी ता न्याय रा एक भयानक इन्तजार होर आगा री जलन बाकी ई जेस परमेसरा रे त्रोधी भस्म करी देणे। 28 जो कोई मूसा री व्यवस्था रे विधाना रा पालन करणे ले नांह करहा, तेस जो बगैर दया किते दो या तीन जणा री गवाही पर मारी दितेया जाहँ। 29 ता सोची लऊआ कि तेस कितने ज्यादा सजा रे लायक बणना, जिने परमेसरा रे पुत्र पैरा थाले रौंदया, होर वाचा रा खून, जेस रे ज़ीए से पवित्र ठैहराया गया, अपवित्र जाणेया, होर अनुग्रहा री आत्मा री बेज्जती किती। 30 क्यूंकि आस्से तेस जो जाणहँ ऐं, जिने बोल्या, कि बदला लैणा मेरा काम आ, मां ई बदला देणा होर फेरी ये भी कि, प्रभुआ आपणे लोका रा न्याय करणा। 31 जिऊन्दे परमेसरा रे हाथा मन्झ पऊणा बडी खतरनाक गल ई। 32 पर सुरहू रे स्यों ध्याड़े याद करा, जिन्हा मन्झ तुस्से ज्योति पाई थी, होर तेता ले बाद जेबे तुस्से दुःखा रा साम्हणा करदे हुए कड़े संघर्षा मन्झ दृढ बणी किन्हें स्थिर रहे। 33 कधी-कधी तुस्से बेज्जती, दुःख सैहन्दे हुए तमासा बणे, होर कधी कधी तुस्से तिन्हा रे साझीदार बणे जो दुर्दसा मन्झ पईरे थे। 34 क्यूंकि तुस्से कैदिया रे दुःखा मन्झ दुखी हुए, होर आपणा सारा धन भी खुसी किन्हें लुटणे दितेया; ये जाणी किन्हें, कि

तुस्सा वाले एक होर भी खरा होर हमेसा ठैहरणे वाळा धन आ ।³⁵ इधी कठे आपणी हिम्मत नी हारा क्यूंकि तेता रा प्रतिफल बौहत बडा आ ।³⁶ क्यूंकि तुस्सा जो धीरज धरना जरूरी आ, ताकि परमेसरा री इच्छा जो पूरी करी किन्हें तुस्से प्रतिज्ञा रा फल पाओ ।³⁷ “क्यूंकि ऐबे थोहडा ई टैम रही गईरा, जेबे कि आऊणेवाळे आई जाणा, होर देर नी करणी ।³⁸ पर मेरे धर्मी जना विस्वास करणे ले जिऊन्दा रैहणा, होर अगर से पीछे हटी जाए, ता मेरा मन तेस ले खुस नी हुणा ।³⁹ होर आस्से हटणे वाळे नी ऐ, कि नास हुई जाए पर विस्वास करणे वाळे ऐ; ताकि प्राणा जो बचाए ।

11 ¹ ऐबे विस्वास आस कितिरी चीजा रा निस्चय, होर अन देखी चीजा रा सबूत आ ।² क्यूंकि एता रे बारे मन्झ प्राचीना री खरी गवाही दिती गई ।³ विस्वास करणे ले ई आस्से जाणी जाहें, कि सारी सृष्टि री रचना परमेसर रे वचना रे ज़ीए हुई । ये नी, कि जो कुछ देखणे मन्झ आंहुआं, से देखी गईरी चीजा ले बणीरा हो ।⁴ विस्वास करणे ले ई हाबिले कैना ले उत्तम बलिदान परमेसरा रे कठे चढाया; होर तेता रे ज़ीए ई तेसरे धर्मी हूणे री गवाही भी दिती गई: क्यूंकि परमेसरे तेसरे दाना रे बारे मन्झ गवाही दिती; होर तेस ई विस्वासा रे वजहा ले से आज भी बोल्हा जेव्की से मरी चुकिरा ।⁵ विस्वासा री वजहा ले ई हनोक उठाया गया, ताकि से मौत नी देखी सके, होर से नी मिल्या; क्यूंकि परमेसरे से उठाई लईरा था, होर तेसजो उठाए जाणे ले पैहले तेसरी ये गवाही दिती गई थी, कि तिने परमेसर खुस करी दितेया ।⁶ होर विस्वासा रे बगैर तेस जो खुस करणा मुस्किल आ, क्यूंकि परमेसरा वाले आऊणेवाळे जो पक्का विस्वास हुणा चाहिए कि से हाया; होर से आपणे तोपणे दूढणे वाळे जो प्रतिफल देहां ।⁷ विस्वास करणे री वजहा ले ई नूहा जो तिन्हा गल्ला रे बारे मन्झ चेतावनी दिती गई जो तिने देखी तक नी थी, ता तिने पवित्र भक्ति किन्हें आपणे घराने रे बचाऊआ रे कठे जहाज बणाया, होर तेता रे ज़ीए तिने संसार दोषी ठैहराया; होर तेस्स धर्मा रा वारिस बणेया, जो विस्वासा ले आहूँआं ।⁸ विस्वास करणे री वजहा ले ई अब्राहमा जो ऐहडी जगहा जाणे रे कठे बुलाया गया जो जगहा बादा मन्झ तेस जो उतराधिकारा मन्झ मिलणेवाळी थी; होर से ये नी जाणदा था कि हांऊ केथी जाया करहा, तेबे भी से निकळी गया ।⁹ विस्वासा ले ई तिने प्रतिज्ञा कितिरे देसा मन्झ, जिहां पराये देसा मन्झ परदेसी हुई किन्हें इसहाक होर याकूबा समेत, जो तेस साउगी तेस प्रतिज्ञा रे वारिस थे, तम्बुआ मन्झ वास कितेया ।¹⁰ क्यूंकि से तेस पक्की निंऊआं वाळे नगरा रा इंतजार करेया करहा था, जेसरा रचणे वाळा होर बनाणे वाळा परमेसर आ ।¹¹ विस्वास करणे ले ई सारे आपणे आप खपरी हूणे पर भी गर्भ धारण करणे री सामर्थ्य पाई; क्यूंकि

तेस्से प्रतिज्ञा करणेवाळा सच्चा जाणेया ।¹² एस वजहा ले एक ही जणा ले जो मरिरा साहीं था, आसमाना रे तारे होर समुद्रा रे बाहडे रे रते रे कणा साहीं, अनगिणत वंस जम्मेया ।¹³ ये सभ सारे विस्वासा री दसा मन्झ मरे होर तिन्हें प्रतिज्ञा कितिरी चीजा नी पाई; पर तिन्हा जो दुरा ले देखी किन्हें खुस हुए होर मनी लया, कि आस्से धरती पर परदेसी होर बाहर वाळे ऐ ।¹⁴ जो ऐहडी ऐहडी गल्ला बोल्हा ऐ, स्यों से जाहिर करहा ऐ, कि स्यों एक ऐहडे देसा री खोजा मन्झ ऐ जो तिन्हारा आपणा हो ।¹⁵ होर जेस देसा ले स्यों निकळी किन्हें आडरे थे, अगर तेता रा ध्यान करदे ता तिन्हा जो वापस जाणे रा मौका था ।¹⁶ पर स्यों एक खरे यानि स्वर्गीया देसा रे आभिलाषी ई, इधी कठे परमेसर तिन्हा रा परमेसर कैहलाए जाणे मन्झ तिन्हा ले नी सरमान्दा, इधी कठे तिने तिन्हा रे कठे एक नगर तयार करी लया ।¹⁷ विस्वास करणे ले ई अब्राहमे, जेबे तेसरी परीक्षा हुई, इसहाका री बलि चढाई, तिने परमेसरा री प्रतिज्ञा पर विस्वास कितेया होर से आपणे एकलौते म्हठा री भेंट चढाणे रे कठे तयार हुई गया ।¹⁸ हालांकि परमेसरे तेस किन्हें ये बोलिरा था, कि इसहाका ले ई तेरा खानदान बढ़णा ।¹⁹ क्यूंकि तिने ये सोच्या, कि परमेसर मुर्दया जो जीउंदा करणे मन्झ सामर्थी आ, होर अगर आलंकारिक भाषा मन्झ बोल्या जाए ता तेस जो इसहाक मौता ले दबारा वाप्स मिल्या ।²⁰ विस्वास करणे ले ई इसहाके याकूबा होर एसावा जो तिन्हारे भविष्य रे बारे मन्झ आसीष दिती ।²¹ विस्वास करणे ले ई याकूबे मरदे टैम यूसुफा रे दुहें म्हठे जो एक एक करी किन्हें आसीष दिती, होर तिने आपणे सोठू रे ऊपरी सिरे पर झुकी किन्हें मदद लई किन्हें परमेसरा री उपासना किति ।²² विस्वास करणे ले ई यूसूफे, जेबे जे से मरदा लगिरा था, ता तिने इस्राएला री सन्ताना रे नेडे जाणे री गल किति, होर आपणी हड्डीया रे बारे मन्झ हुक्म दितेया ।²³ विस्वास करणे ले ई मुसा रे माऊ बाबे से, पैदा हुणे रे बाद तीन म्हीने तक ल्कोई रख्या; क्यूंकि तिन्हे देख्या, कि बच्चा बांका आ, होर स्यों राजे रे हुक्मा ले नी डरे ।²⁴ विस्वास करणे ले ई मूसे जुआन हुई किन्हें फिरौना री म्हठी रा म्हठा कैहलाए जाणे ले इन्कार कितेया ।²⁵ तिने पापा मन्झ थोहडे ध्याडे रे सुख भोगणे ले परमेसरे लोका रे साउगी दुःख भोगणा होर भी खरा समझ्या ।²⁶ तिने मसीह रे कठे अपमानित हुणा मिस्रा रे धन भण्डारा ले बढी किन्हें समझ्या: क्यूंकि तेसरी हाखिया फल पाणे री तरफ लगीरी थी ।²⁷ विस्वास करणे ले ई, राजे रे गुस्से ले नी डरदे हुए, तिने मिसर छाडी दितेया, से दूढ रैहया, जिहां जे तेस जो परमेसर सुइदा लगिरा हो ।²⁸ विस्वास करणे ले ई, तिने फसह पर्व होर खून छिडकणे री विधि रा पालण कितेया, ताकि पैहलौठे रा नास करणेवाळा इस्राएलीया रे पैहलौठे जो नी छुहे ।²⁹ विस्वास करणे ले ई लोक लाल समुद्रा ले ऐहडे पार

हुई गए, जिहां से कोई सुक्री धरती हो; पर जेबे मिस्रा रे लोके ऐहड़ा करणा चाहेया, ता स्यों डूबी गए।³⁰ विस्वास करणे ले ई यरीहो री सहरपनाह ढल्ही गई, जेबे स्यों सात ध्याड़े तक तेस सहरपनाहा रा चक्कर लगान्दे रहे ता से सहरपनाह ढल्ही गई।³¹ विस्वास करणे ले ई राहाब वेस्या हुक्म नी मनणेवाळेया साउगी नास नी हुई; क्यूंकि तेस्से जासूसा री रखवाळी किती।³² ऐबे होर हांऊ क्या बोलूं? क्यूंकि ऐबे टैम नी रहैया, कि हांऊ गिद्योना रा, होर बाराका रा सिमसोना रा, होर यिफ्तहा रा, होर दाऊदा रा होर समुएला रा, होर नबिया रा बखान करूं।³³ इन्हें विस्वास करणे ले ई राज्य जीते; धर्मा रे काम किते; प्रतिज्ञा कितीरी चीजा पाई, सेरा रे मुहं बन्द किते।³⁴ आगा री ज्वाला ठंडा किती; तलवार री धारा ले बची निकळे, कमजोरी मन्झ ताकतवर बणे; लड़ाई मन्झ वीर निकळे; विदेसी फोज मार भगाई।³⁵ जनानिये आपणे मरीरे बच्चे दबारा जीउंदे पाए; कितने ता मार खांदे खांदे मरी गए।³⁶ कई एक मजाक उड़ाए जाणे; होर कोड़े खाए जाणे; बल्कि बान्धे जाणे; होर कैदखाने मन्झ रखे जाणे रे ज़ीए परखे गए।³⁷ पत्थरवाह किते गए; होर आरे किन्हें चीरे गए; तिन्हारी परीक्षा किती गई; तलवारी किन्हें मारी दिते गए; स्यों कंगाली मन्झ होर क्लेशा मन्झ होर दुःख भोगदे हुए भेड़ होर बकरिया री खाला ओढी किन्हें, ओरे परे मारे मारे फिरे।³⁸ होर जंगला, होर पहाड़ा, होर गुफा मन्झ, होर धरती री दरारा मन्झ भटकदे फिरे।³⁹ संसार तिन्हारे काबिल नी था: होर विस्वासा रे ज़ीए ई इन्हा सभी रे बारे मन्झ खरी गवाही दिती गई, तेबे भी तिन्हा जो प्रतिज्ञा कितीरी चीजा नी मिली।⁴⁰ क्यूंकि परमेसरे आस्सा रे कठे पैहले ले एक खरी गल ठैहराई, ताकि स्यों आस्सा बगैर सिद्धता नी पाए।

12¹ क्यूंकि आस्से गवाहिया रे इतने बड़े बादला किन्हें घिरी गईरे, ता आउआ, आस्से हर एक रोकणे वाळी चीज, होर उलझाणेवाळे पाप दूर करी किन्हें, से दौड़ जेस मन्झ जे आस्सा जो दौड़ना आ, सब्र रखी किन्हें दौड़े।² होर विस्वासा रे कर्ता होर सिद्ध करणेवाळे यीसू री तरफ, आऊआ आस्से नजर करहा ऐ; जिने तेस्सा खुसी रे कठे जो तेसरे अगे रखिरी थी, सरम छाडी किन्हें, क्रूसा रा दुःख सैहन कितेया; होर राजगद्दी पर परमेसरा रे दाई तरफ बैठी गया।³ इधीकठे तेता पर ध्यान करा, जिने आपणे खिलाफ पापिया रा इतना वाद-विवाद सही लया ताकि तुस्से उदास हुई किन्हें हिम्मत नी हारी दो।⁴ तुस्से पापा किन्हें लड़दे हुए तेस किन्हें ऐहड़ी मुठभेड़ नी किती, कि तुस्सा रा खून पया हो।⁵ होर तुस्से से उपदेस जो तुस्सा जो पुत्रा साहीं दितेया जाहां, भूली गइरे, हे मेरे पुत्र, प्रभु री ताड़ना जो हल्की गल नी समझ, होर जेबे से तुजो फटकारे ता हिम्मत देख्या हारदा।⁶ क्यूंकि प्रभु, जेस किन्हें प्यार करहा, तेसरी ताड़ना भी करहा; होर जेस जो पुत्र बणाई

लैहां, तेस जो कोड़े भी मारहा।⁷ तुस्से दुःखा जो ताड़ना समझी किन्हें सैहन करी लऊआ: परमेसर तुस्सा जो पुत्र जाणी किन्हें तुस्सा साउगी बरताव करहा, से कुण जे पुत्र आ, जेसरी ताड़ना बाप नी करदा हो? ⁸ अगर तुस्से तेस ताड़ना रे जेस ताड़ना रे सभ भागीदार हूहां ऐं, तुस्सा री ताड़ना नी हुई, ता तुस्से पुत्र नी ऐ, पर व्यभिचारा री संतान ठैहरे।⁹ फेरी जेबकी आस्सा रे संसारिक बाप भी आस्सा री ताड़ना करहा ऐ थे, ता फेरी आस्सा जो आत्मा रे पिता रे होर भी आधीन रहन्द हुए जीणा चाहिए।¹⁰ आस्सा रे संसारिक पिता ता आपणी सोचा रे मुताबक थोहड़े ध्याड़े रे कठे ताड़ना देहां ऐं थे, पर परमेसर ता आस्सा रे फायदे रे कठे आस्सा री ताड़ना करहा, ताकि आस्से भी तेस री पवित्रता रे भागीदार हो।¹¹ होर वर्तमाना मन्झ हर किस्मा री ताड़ना खुसी री नी, पर दुःखा री ताड़ना मैहसूस हूहां ई, तेबे भी जो ताड़ना जो सैहन्दे सैहन्दे पक्के हुई गईरे, बादला मन्झ तिन्हा जो चैना किन्हें धर्मी रा प्रतिफल मिल्ला।¹² इधी कठे ढीले हाथा होर कम्जोर घुटने जो सीधे करा।¹³ होर आपणे पैरा रे कठे सीधा रस्ते बणाऊआ, ताकि लंगड़ा भटकी नी जाए, पर भला चंगा हुई जाए।¹⁴ सभी साउगी सांति किन्हें रहणे, होर तेस पवित्रता रे खोजणे वाळे बणा जेस रे बगैर कोई प्रभु जो कधी भी नी देखी सकदा।¹⁵ होर ध्याना किन्हें देखदे रहूआ, ऐहड़ा नी हो, कि कोई परमेसरा रे अनुग्रह ले वंचित रही जाए, या एसावा साहीं कोई कौड़ी जड़ फुटी किन्हें कष्ट दे, होर तेता रे ज़ीए कई लोक असुद्ध नी हुई जाए।¹⁶ ऐहड़ा नी हो, कि कोई आदमी व्यभिचारी, या एसावा साहीं अधर्मी हो, जिने एक बार खाणे रे बदले आपणे पैहलौठे हूणे रा हक बेची दितेया।¹⁷ तुस्से ता जाणहां ऐं, कि बादला मन्झ जेबे तिने आसीष पाणी चाही, तेबे से अयोग्य गिणया गया, होर रोई रोई किन्हें तेस जो दबारा तोपणे पर भी मन फिराणे रा मौका नी मिल्या।¹⁸ तुस्से आगी किन्हें जळीरे तेस पहाड़ा वाले नी आए जेस जो छुह्या जाई सकहा था होर ना ई तुस्से काळी घटा, होर न्ह्यारे, होर आन्धी रे नेडे आए।¹⁹ होर ना ई तुस्से तुरही री तेज आवाज, होर ना ऐहड़ी बोलणेवाळी आवाजा रे संपर्का मन्झ आए जो वचना रा उच्चारण करेया करदी हो, जेसरे सुणनेवाळे बिनती किती हो, कि तिन्हारे कठे ऐबे आस्सा साउगी केसी होर वचना रा उच्चारण नी कितेया जाए।²⁰ क्यूंकि जो हुक्म तिन्हा जो दितिरा था स्यों तेता जो सही नी सके, होर से हुक्म ये था, “कि अगर कोई जानवर भी पहाड़ छुहे, ता तेस जो पत्थरवाह कितेया जाए।²¹ होर से दर्सन ऐहड़ा डरावणा था, कि मूसे बोल्या; हांऊ डरा रे मारे थर थर काम्या करहा।²² पर तुस्से ता सि्योना रे पहाड़ा वाले, होर जिऊन्दे परमेसरा री नगरी स्वर्गीया यरुश्लेमा रे नेडे पौहुंची गईरे।²³ होर तुस्से ता लाखो स्वर्गदूत होर तिन्हा पैहलौठे री साधारण सभा होर कलीसिया जिन्हारे नांऊ स्वर्गा मन्झ लिखे

गईरे: तिन्हारी सभा रे नेडे पौहुंची चुकिरे होर तुस्से सारे के सारे न्यायी परमेसरा वाले, होर सिद्ध बणाए गईरे धर्मिया री आत्मा । 24 होर एक नौई वाचा रे बीच यीसू, होर छिडकावा रे तेस खुना रे नेडे आई गईरे, जो हाबिला रे खुना साउगी खरी गल्ला करहा । 25 सावधान रहुआ, होर तुस्से तेस बोलणेवाळे ले आपणा मुंह नी फेरा, क्यूंकि अगर स्यों लोक धरती पर चेतावनी देणेवाळे ले मुंह मोडी किन्हें नी बची सके, ता आस्सा स्वर्गा परा री चेतावनी करणेवाळे ले मुंह मोडी किन्हें किहाँ बचणा? 26 तेस टैम ता तेसरी आवाजे धरती हिलाई दिती पर ऐबे तिते ये प्रतिज्ञा किती, कि एक बारी मां दबारा सिर्फ धरती नी, बल्कि सर्ग भी हिलाई देणा । 27 एक बारी दबारा ये वचन तेस हर गल्ला जो जाहिर करहा, जेसरी जे रचना हुईरी (यानि स्यों चीजा जो स्थिर नी ई) तिन्हा चीजा नष्ट हुई जाणा; सिर्फ स्यों चीजा ई बचणी जो अटल ई । 28 इधी कठे आस्से एस राज्या जो पाई किन्हें जो हिलणे वाळा नी आ, तेस अनुग्रहा जो हाथ ले नी जाणे दे, जेस रे ज्रीए आस्से भक्ति, होर डर समेत, परमेसरा री ऐहडी आराधना करी सकहा ऐ जेस ले से खुस हुहां । 29 क्यूंकि आस्सा रा परमेसर भस्म करणेवाळी आग ई ।

13 1 भाईचारे रा प्यार बणा रहे । 2 आदर खातर करणा नी भूलणा, क्यूंकि ऐहडा करदे हुए कईऐ अनजाणे मन्झ स्वर्गदूता रा आदर खातर कितेया । 3 कैदिया रा ऐहडा ख्याल रखा, कि जिहां जे तिन्हा साउगी तुस्से भी कैद हो; होर जिन्हा साउगी बुरा बरताव कितेया जाहां, तिन्हा रा भी ये समझी किन्हें ख्याल करा, कि आस्सा रा भी तिन्हा साहीं सरीर आ । 4 ब्याह सारे मन्झ आदरा री गल समझी जाए, होर ब्याहा रा बिछौना निष्कलंक रहे; क्यूंकि परमेसरा व्यभिचारिया, होर परस्त्रीगामिया रा न्याय करणा । 5 तुस्सा रा स्वभाव लोभरहित हो, होर जो तुस्सा वाले आ, तेता पर संतोष करा; क्यूंकि तिन्हे आपु ई बोलिरा, कि मां तू कधी नी छाडणा, होर ना कधी तू त्यागणा । 6 इधी कठे आस्से बेधडक हुई किन्हें बोलहा ऐ, कि प्रभु मेरा सहायक आ; मां नी डरणा; माहणु मेरा क्या करी सकहा । 7 जो तुस्सा रे अगुवे थे, होर जिन्हा जो तुस्से परमेसरा रा वचन सुणाया, तिन्हा जो तुस्से याद रखा; होर ध्याना किन्हें तिन्हारे चाल-चलणा रा अन्त देखी किन्हें तिन्हारे विस्वासा रा अनुकरण करा । 8 यीसू मसीह काल होर आज होर जुग जुग एक बराबर आ । 9 कई किस्मा रे विचित्र उपदेसा ले भरमाए मत जाओ, क्यूंकि मना रे कठे ये खरा आ कि स्यों अनुग्रहा रे ज्रीए पक्के बणे, ना कि खाणे पीणे री चीजा रे नियमा रे मनणे ले, जिन्हा ले तिन्हारा कोई भला नी हुआ, जिन्हें भी

स्यों उपदेस मन्ने । 10 आस्सा री एक ऐहडी बेदी ई, जेथी तिन्हा लोका जो खाणे रा हक नी आ, जो तम्बू री सेऊआ करहा ऐ । 11 क्यूंकि महायाजक पवित्र स्थाना मन्झ पाप-बलि रे रूपा मन्झ जानवरा रा खून लई ता जाहां, पर तिन्हारा सरीर छावनी ले बाहर फुकी दिते जाहें । 12 इधी कठे यीसुए लोका जो आपणे ई खूना रे ज्रीए पवित्र करणे रे कठे फाटका रे बाहर दुःख उठाया । 13 ता आऊआ आस्से भी एस अपमाना जो झेल्दे हुए तेस्सरी निन्दा आपणे ऊपर लैंदे हुए छावनी ले बाहर तेस वाले चल्हा ऐ । 14 क्यूंकि एथी आस्सा रा कोई स्थाई नगर नी आ, बल्कि आस्से ता तेस नगरा रा इंतजार करेया करहा ऐ जो आऊणेवाळे आ । 15 इधी कठे आऊआ आस्से यीसू रे ज्रीए परमेसरा जो स्तुतिरूपी बलिदान अर्पण करे, जो तिन्हा ओंठा रा फल आ जो तेसरे नांऊआं रा अंगीकार करहा ऐ । 16 पर भलाई होर उदारता करणा देख्या भुल्दे; क्यूंकि परमेसर ऐहडे बलिदाना ले खुस हुहां । 17 आपणे अगुवे रा हुक्म मना: होर तिन्हा रे अधीन रहुआ, क्यूंकि स्यों तिन्हा साहीं तुस्सा रे प्राणा रे कठे जागदे रैंहयां ऐं, जिन्हा जो लेखा देणा पऊणा, ताकि स्यों ये काम खुसी किन्हें करे, ना कि ठंडी सांस लई किन्हें, क्यूंकि एस दसा मन्झ तुस्सा जो कुछ फायदा नी आ । 18 आस्सा रे कठे प्रार्थना करदे रहुआ, क्यूंकि आस्सा जो विस्वास आ, कि आस्सा रा मन सुद्ध आ; होर आस्से सारी गल्ला मन्झ खरी चाल चलणा चाहें । 19 होर ये करणे रे कठे हांऊ तुस्सा जो होर भी सम्झाहां, कि हांऊ जल्दी तुस्सा वाले दबारा आई सकूं । 20 जिने भेडा रे तेस म्हान रखवाळे आस्सा रे प्रभु यीसू मसीह रे खूना रे ज्रीए तेस सनातन वाचा पर मोहर ल्गाई किन्हें मुर्दे मंझा ले जी उठाई किन्हें, से सान्तिदाता परमेसर । 21 तुस्सा जो सभ हर खरी गल्ला मन्झ सिद्ध करे, ताकि तुस्से तेसरी इच्छा पूरी करी सको, होर जो कुछ तेस जो खरा लगहा, तेस जो यीसू मसीह रे ज्रीए आस्सा मन्झ पैदा करे, जेसरी म्हीमा जुगजुग हुन्दी रहे, आमीन । 22 हे भाइयो, मेरी तुस्सा ले ये बिनती ई, कि तुस्से प्रेरणा देणे वाळे मेरे इन्हा उपदेसा जो सैहन करी लऊआ; क्यूंकि मैं तुस्सा जो ये सब कुछ थोहडे सब्दा मन्झ लिखीरा । 23 तुस्से ये जाणी लऊआ कि तीमुथियुस आस्सा रा भाई छुटी गया होर अगर से जल्दी आई गया, ता मां तेस साउगी तुस्सा किन्हें मिलणे रे कठे आई जाणा । 24 आपणे सारे अगुवों होर सारे पवित्र लोका जो नमस्कार बोलणा । इटली ले आईरे लोक भी तुस्सा जो नमस्कार बोलहा ऐ । 25 परमेसरा रा अनुग्रह तुस्सा सभी पर हुन्दा रहे । आमीन ।

याकूब

1 परमेसरा रे होर प्रभु यीसू मसीह रे दास याकुबा री तरफा ले तिन्हा ग्यारा गोत्रा जो, जो तितर बितर हुई किन्हें रैहयां ऐं नमस्कार मिले। ² हे मेरे भाईयो, जेबे तुस्से कई किस्मा री परीक्षा मन्झ पई जाओ, ³ ता एता जो तुस्से खुसी री गल समझा, ये जाणी किन्हें कि तुस्सा रे विस्वासा रे परखे जाणे ले सबर पैदा हुआ। ⁴ पर सबरा जो आपणा पूरा काम करणे दो, कि तुस्से पुरे होर सिद्ध हुई जाओ होर तुस्सा मन्झ केसी गल्ला री कमी नी रहे, ⁵ पर अगर तुस्सा मंझा ले केसी जो बुद्धि री कमी हो, ता परमेसरा। मांगी ले, जो बगैर उलाहना दिये सभी जो उदारता ले देहां; होर तेस जो दिती जाणी। ⁶ पर पुरे विस्वासा ले मांगे, होर कुछ सक नी करे; क्यूंकि सक करणे वाळा समुद्रा री लैहरा साहीं आ, जो हवा किन्हें बैहन्दी होर उछल्दी रैहीं। ⁷ एहड़ा आदमी ये नी समझे, कि तेस जो प्रभु ले कुछ मिलणा। ⁸ से आदमी दो मना वाळा आ, होर आपणी सारी गल्ला मन्झ चंचल आ। ⁹ बल्कि दीन भाई आपणे ऊचे पद पर घमंड करे। ¹⁰ होर धनवान आपणी नीच दसा पर; क्यूंकि तेस घाह रे फूला साहीं खत्म हुई जाणा। ¹¹ क्यूंकि सूरज निकळदे ई धूपा लघ्हा होर घाहा जो सुकाई देहां, होर तेसरे फूल झडी जाहें, होर तेसरी सान चली जाहीं, तिहां ई धनवान भी आपणे रस्ते पर चल्दे चल्दे माटे मन्झ मिली जाणा। ¹² भागा वाळा आ से आदमी, जो परीक्षा मन्झ मजबूत रैहयां; क्यूंकि तेस खरे निकळी किन्हें जिंदगी रा से मुकट पाणा, जेस जो प्रभुए आपणे प्यार करणे वाळे जो देणे री प्रतिज्ञा कितिरी। ¹³ जेबे केसी री परीक्षा हो, ता से ये नी बोले, कि मेरी परीक्षा परमेसरा री तरफा ले हुआ ई; क्यूंकि ना ता बुरी गल्ला ले परमेसरा री परीक्षा हुई सकहा ई, होर ना से आपु केसी री परीक्षा करहा। ¹⁴ पर हरेक आदमी आपणी ई इच्छा मन्झ खिंजी किन्हें होर फसी किन्हें परीक्षा मन्झ पहुँआ। ¹⁵ फेरी इच्छा गर्भवती हुई किन्हें पापा जो जणहा ई, होर जेबे पाप बढी जाहां, ता से मौता जो जन्म देहां। ¹⁶ हे मेरे प्यारे भाईयो, धोखा नी खाऊआ। ¹⁷ क्यूंकि हर एक खरा वरदान होर हर एक खरा दान ऊपरा ले ई हाया, होर ज्योतिया रे पिता री तरफा ले मिल्हा आ, जो कधी नी बदळदा, होर ना छाऊआ साहीं बदलणे वाळा आ। ¹⁸ तिने आपणी ई इच्छा ले आस्सा जो सच्चाई रे वचना रे ज़ीए पैदा कितेया, ताकि आस्से तेसरी रची री चीजा मंझा ले एक किस्मा रे पैहले फल ऐ। ¹⁹ हे मेरे प्यारे भाईयो, ये गल तुस्से जाणहा ऐं; इधी कठे हर एक माहणु सुणने रे कठे तत्पर होर बोलणे मन्झ धीरजवंत होर गुस्सा करणे मन्झ जल्दबाजी मत करा। ²⁰ क्यूंकि माहणु रा गुस्सा परमेसरा रे धर्मा रा निर्वाह नी

करी सकदा। ²¹ इधी कठे सारी गंदगी होर बैर भाव री बढती जो दूर करी किन्हें, तेस वचना जो बडी नम्रता किन्हें मनी लो, जो दिला मन्झ बोया गया होर जो तुस्सा रे प्राणा रा उद्धार करी सकहा। ²² पर वचन पर चलने वाळे बणा, होर सिर्फ सुणने वाळे ई नी, जो आपणे आपा जो धोखा देहां ऐं। ²³ क्यूंकि जो कोई वचन सुणनेवाळा हो, होर तेस पर चलने वाळा नी हो, ता से तेस माहणु साहीं आ जो आपणा भौतिक मुंह सीसे मन्झ देख्हा। ²⁴ इधी कठे कि से आपणे आपा जो देखी किन्हें चली जाहां, होर जल्दी ई भूली जाहां कि हांऊ केहड़ा था। ²⁵ पर जो माहणु अजादी री सिद्ध व्यवस्था पर ध्यान करदा रैहयां, तेस आपणे कामा मन्झ इधी कठे आशीष पाणी कि से सुणी किन्हें नी भुल्दा पर आपणे व्यवहारा मन्झ लागू करदा रैहयां। ²⁶ अगर कोई आपणे आपा जो भक्त समझे, होर आपणी जीभा पर लगाम नी लगाए, पर आपणे दिला जो धोखा दे, ता तेसरी भक्ति बेकार ई। ²⁷ आस्सा रे परमेसर होर पिता रे साम्हणे सच्ची होर शुद्ध भक्ति ये ई कि अनाथा होर विधवा रे दुःखा मन्झ तिन्हारा खयाल रखे, होर आपणे आपा जो संसारा ले निष्कलंक रखे।

2 हे मेरे भाईयो, आस्सा रे महिमामय प्रभु यीसू मसीह पर तुस्सा रा विस्वास एक दूजे रे प्रति भेदभावा री भावना ले नी हो। ² क्यूंकि अगर एक आदमी सोने रा छला होर बांके कपड़े पैहनी किन्हें तुस्सा री सभा मन्झ आए होर एक गरीब भी मैले कुचैले कपड़े पैहनी किन्हें आए। ³ होर तुस्से तेस बांके कपड़े वाळे रा मुंह देखी किन्हें बोलो कि तुस्से तेथी खरी जगहा मन्झ बैठा; होर तेस गरीबा किन्हें बोले, कि तू एथी खहड़ी रह, या मेरे पैरा वाले बैठी जा। ⁴ ता क्या तुस्से आपु मन्झ भेदभाव नी कितेया होर बुरे मकसदा किन्हें न्याय करणे वाळे नी बणे? ⁵ हे मेरे प्यारे भाईयो, सुणा; क्या परमेसरे एस संसारा रे गरीबा जो नी चुणीरा कि विस्वासा मन्झ धर्मी होर तेस राज्या रे वारस हो, जेसरी प्रतिज्ञा तिने तिन्हा किन्हें किती जो तेस किन्हें प्यार रख्हा ऐ। ⁶ पर तुस्से तेस गरीबा रा अपमान कितेया; क्या धनवान तुस्सा पर अत्यचार नी करदे होर क्या स्यों ई तुस्सा जो अदालता मन्झ रगडी रगडी किन्हें नी लई जांदे? ⁷ क्या स्यों तेस खरे नांऊआ री निंदा नी करदे जेस रे ज़ीए तुस्से सादे गईरे? ⁸ तेबे भी अगर तुस्से पवित्र शास्त्रा रे वचना रे मुताबक, कि तू आपणे पड़ोसी किन्हें आपु साहीं प्यार रख, ता सच्चे तेस राजकीय व्यवस्था जो पूरी करहा, ता खरा करहा ऐ। ⁹ पर अगर तुस्से भेदभाव करहा ऐ, ता पाप करहा; होर व्यवस्था तुस्सा जो दोषी बणाहीं। ¹⁰ क्यूंकि जो कोई पूरी व्यवस्था रा पालन करहा, पर एक ई गल्ला मन्झ चुकी जाए ता से सभ गल्ला मन्झ दोषी

बणी गया।¹¹ इधी कठे कि जिने ये बोल्या, कि तू व्यभिचार नी करणा तिने ई ये भी बोल्या, कि तू हत्या नी करणा, इधी कठे कि तैं अगर व्यभिचार नी कितेया, पर हत्या किती तेबे भी तू व्यवस्था रा उलंघन करणे वाळा बणेया।¹² तुस्से तिन्हा लोका साहीं वचन बोला, होर काम भी करा, जिन्हा रा न्याय अजादी री व्यवस्था रे मुताबक हुणा।¹³ क्युंकि जिने दया नी किती, तेसरा न्याय बगैर दया के हुणा; दया न्याय पर जयवंत हुहां ई।¹⁴ हे मेरे भाईयो, अगर कोई बोल्हा कि मुंजो विश्वास आ पर से कर्म नी करे, ता तेता ले क्या फायदा? क्या एहडा विस्वास कधी केसी रा उद्धार करी सकहा आ? ¹⁵ अगर केसी भाई या बैहणी वाले कपडे नी हो, होर तिन्हा जो खाणे पीणे री कमी हो।¹⁶ होर तुस्सा मन्झा ले कोई तिन्हा किन्हें बोले, सांति किन्हें जाऊआ, तुस्से गर्म रहूआ होर खूब तृप्त रहूआ; पर जो चीजा सरीरा रे कठे जरूरी ई से तिन्हा जो नी दे, ता क्या फायदा? ¹⁷ तिहां ई अगर विस्वासा साउगी कर्म नी करे ता से आपणे आपा मन्झ मरी चुकिरा।¹⁸ पर कोई बोली सकहा, कि तुजो विस्वास आ, होर हांऊ कर्म करहा; तू आपणा विस्वास मुंजो बगैर करमा ले दस; होर मां आपणा विस्वास करमा ले तुजो दसणा।¹⁹ तुजो विस्वास आ कि एक ई परमेसर आ; तू खरा करहा; दुष्टात्मा भी विस्वास करहा ई, होर थर थर काम्हा ई।²⁰ पर हे निकम्मे माहणु क्या तू ये भी नी जाणदा, कि बगैर कर्मा ले विस्वास बेकार आ।²¹ जेबे आस्सा रे पिता अब्राह्मे आपणे म्हेटे इस्हाका जो वेदी पर चढाया, ता क्या से कर्मा ले धर्मी नी बणेया? ²² इधी कठे तैं देखी लया कि विस्वासे तेसरे कामा साउगी मिली किन्हें असर कितेया होर कर्मा ले विस्वास सिद्ध हुआ।²³ होर पवित्र शास्त्रा रा ये वचन पूरा हुआ, कि अब्राह्मे परमेसरा रा विस्वास कितेया, होर ये तेसरे कठे धार्मिकता गिणी गई, होर से परमेसरा रा दोस्त कैहलाया।²⁴ इधी कठे तैं देखी लया कि माहणु सिर्फ विस्वासा ले ई नी, पर कर्मा ले भी धर्मी बणहां।²⁵ तिहां ई वेश्या राहाबे भी जेबे तेस्से दूता जो आपणे घरा मन्झ ठैहराया, होर दूजे रस्ते ले विदा करी दितेया, ता क्या कर्मा ले से धर्मी नी बणी? ²⁶ इधी कठे, जिहां सरीर बगैर आत्मा ले मरीरा आ, तिहां ई विस्वास भी बगैर कर्म मरीरा आ।

3 ¹ हे मेरे भाईयो, तुस्सा मंझा ले बौहत जण उपदेसक देख्या बणदे, क्युंकि तुस्से जाणहा ऐं, कि आस्से उपदेसका होर भी दोषी बणना।² इधी कठे कि आस्से सभ बौहत बारी भूल करी बैठहा ऐं; जो कोई वचना मन्झ भूल नी करदा, से ई सिद्ध माहणु आ, होर सारे सरीरा पर लगाम भी लगाई सकहा।³ जेबे आस्से घोडे जो आपणे कब्जे मन्झ करणे रे कठे तिन्हा रे मुंहा मन्झ लगाम लगाहें, ता आस्से तिन्हा रे सारे सरीरा जो भी आपणे बसा मन्झ करी सकहा ऐं।⁴ देखा, जेबकी जहाज भी ता कितने

बडे हुहां ऐं, होर प्रचण्ड हवा किन्हें चलाए जाहें, तेबे बी एक छोटी जे पत्वारा किन्हें माझी री इच्छा रे मुताबक घुमाए जाहें।⁵ तिहां ई जीभ भी एक छोटा जे अंग आ होर बडी बडी डींग मारहा ई; देखा, थोहडी जे आग कितने बडे जंगला मन्झ आग लाई देहीं।⁶ जीभ भी ता एक आग ई; ये अधर्मा रा एक संसार आ होर ये जीभ आस्सा रे सरीरा रे अंगा मन्झ एक एहडा अंग आ, जो सारे सरीरा जो बर्बाद करी देहां होर आस्सा रे सारे जीवन चक्रा मन्झ आग लाई देहां होर ये नरक कुंडा री आगा किन्हें फुख्दी रैहां ई।⁷ क्युंकि हर किस्मा रे जंगली जानवर, चिडू पंखेरू होर रघडी घसीटी किन्हें चलणे वाळे जीव जन्तु होर समुद्री जीव जन्तु ता आदमिया रे बसा मन्झ हुई सकहा ऐं, होर हुई भी चुकिरे।⁸ पर जीभा जो माहणुआ मंझा ले कोई बसा मन्झ नी करी सकदा, ये एक एहडी बला ई जो कधी नी रुकदी; होर प्राणा जो नास करणे वाळे जैहरा किन्हें भहरी री ई।⁹ एता ले ई आस्से प्रभू री जै जै कार करहा ऐं; होर एता ले ई आस्से माहणुआ जो श्राप देहां ऐं जो परमेसरा रे रूपा मन्झ बणाए गईरे।¹⁰ एक ई मुंहा ले धन्यावाद होर श्राप दोन्हो निकळहा ऐं।¹¹ हे मेरे भाईयो, एहडा नी हुणा चाहिए।¹² क्या सोते रे एक कुंडा ले दो किस्मा रा मीठा होर लुणा पाणी निकळहा? ¹³ तुस्सा मन्झ ज्ञानी होर समझदार कुणहां? जो एहडा हो से आपणे कामा जो खरे चाल चलना किन्हें तेस्सा नम्रता समेत जाहिर करे जो ज्ञाना ले पैदा हुहां ई।¹⁴ पर अगर तुस्सा रे मना मन्झ बौहत भारी हिर्ख होर स्वार्था री भावना हो ता घमण्ड देख्या करदे, होर ना सच्चाई रे खलाफ झूठ बोलणा।¹⁵ ये ज्ञान से ज्ञान नी आ, जो ऊपरा ले आहूँआ बल्कि सांसारिक होर शारीरिक आ होर सैतानी ज्ञान आ।¹⁶ इधी कठे कि जेथी हिर्ख होर वरोध हुहां, तेथी बखेडे होर हर किस्मा रे बुरे कर्म हुहां ऐं।¹⁷ पर जो ज्ञान ऊपरा ले आहूँआ से पैहले ता पवित्र हुहां, फेरी मिलनसार, कोमल होर विचारसील होर करुणामय होर खरे फला किन्हें लदिरे होर मजबूत होर बगैर कपटा रा हुहां।¹⁸ होर मिलाप करणे वाळे रे कठे धार्मिकता रा फल मेल मिलापा साउगी बोया जाहूँ।

4 ¹ तुस्सा मन्झ लड़ाईया होर झगडे केथी ले आई गए? क्या तिन्हा सुख विलासा ले नी आए जो तुस्सा रे अंगा मन्झ लड़हा ऐं? ² तुस्से इच्छा रखहा ऐं, होर तुस्सा जो मिलदा नी; तुस्से हत्या होर हिर्ख करहा ऐं, होर कुछ नी पाई सकदे; तुस्से लड़दे झगडे रैहायां ऐं; तुस्सा जो इधी कठे नी मिलदा, कि मांगदे नी।³ तुस्से मांघहा ऐं होर पांदे नी, इधी कठे बुरी इच्छा ले मान्घहा ऐं, ताकि आपणे भोग विलासा मन्झ उड़ाई दो।⁴ हे व्यभिचारिणीओ, क्या तुस्से नी जाणदी, कि संसारा किन्हें दोस्ती करणी परमेसरा किन्हें बैर रखणा आ? इधी कठे जो कोई संसारा किन्हें दोस्ती रखणा चाहं, से आपणे आपा जो

परमेसरा रा बैरी बणाहां । ⁵या क्या तुस्से ये सोच्चा ऐ, कि पवित्र शास्त्र बेकार ई ये सभ कुछ बोल्हा? जेस आत्मा जो तिने आस्सा रे अंदर बसाईरा, क्या से एहडी इच्छा करहा, जेसरा फल हिर्ष हो? ⁶से परमेसर ता होर ज्यादा अनुग्रह देहां; इधी कठे ये लिखीरा, कि परमेसर घमंडीया रा ता साम्हणा करहा, पर नम्र दीना पर अनुग्रह करहा । ⁷इधी कठे परमेसरा रे अधीन हुई जाओ; होर सैताना रा साहम्णा करा, ता तेस तुस्सा वाले ले भगी जाणा । ⁸परमेसरा रे नजदीक आऊआ; ता तेस भी तुस्सा रे नेडे आऊणा; हे पापियो, आपणे हाथ शुद्ध करा; होर ये दो मन वाळे लोको आपणे दिला जो पवित्र करा । ⁹दुःखी हुई जाऊआ, होर मातम मणाऊआ होर रोआ तुस्सा री हासी मातमा मन्झ होर तुस्सा री खुसी उदासी मन्झ बदली जाए । ¹⁰प्रभु रे साम्हणे नम्र दीन बणा, ता तेस तुस्से सिरोमणि बनावणे । ¹¹हे भाईयो, एक दूजे री बदनामी नी करा, जो आपणे भाई री बदनामी करहा, या भाई पर दोष लगाहां, से व्यवस्था री बदनामी करहा, होर व्यवस्था पर दोष लगाहां, ता तू व्यवस्था पर चलनेवाळा नी, पर तेसरे न्यायी बणे । ¹²व्यवस्था देणे वाळा होर हाकम ता एक ई ऐ, जेस जो बचाणे होर नास करणे री सामर्थ ई; तू कुणहां, जो आपणे पड़ोसी पर दोष लगाहां? ¹³तुस्से जो ये बोल्हा ऐ, कि आज या काल आस्सा केसी होरी नगरा मन्झ जाई किन्हें तेथी एक साल बिताणा, होर काम धंधा करी किन्हें फायदा उठाणा । ¹⁴होर ये नी जाणदे कि काला क्या हुणा; सुणी ता लऊआ, तुस्सा री जिंदगी हाई ई क्या? तुस्से ता धुंए साहीं ऐ, जो थोहडी देर सुद्धा ई, फेरी गायब हुई जाहीं । ¹⁵एता रे बदले तुस्सा जो ये बोलणा चहिए, कि अगर प्रभु चाहे ता आस्सा जिउन्दे रहणा, होर ये या वो काम भी करणा । ¹⁶पर एबे तुस्से आपणी डींगा पर घमंड करहा ऐ; होर एहडी डींग मारणा बुरा हुहां । ¹⁷इधी कठे जो भलाई करणा जाणहां होर नी करदा, तेसरे कठे ये पाप आ ।

5 ¹हे धनवानो सुणी ता लऊआ; तुस्से आपणे आऊणे वाळे दुःखा पर चिल्लाई चिल्लाई किन्हें रोआ । ²तुस्सा रा पैसा सडी चुकिरा होर तुस्सा रे कपडे कीड़े खाई गये । ³तुस्सा रे सोने चांदी मन्झ जंग लगी गईरा; होर तेस जंगा तुस्सारे खलाफ गुआही देणी; होर आगी साहीं तुस्सा रा मास चट करी जाणी; तुस्से आखरी टैमा ढब्बे कठे कितिरे । ⁴देखा, जिन्हें मजदूरे तुस्सा रे डोहरिया मन्झ काम कितेया, तुस्से तिन्हा री मजदूरी धोखे किन्हें रोकी रखिरी; से ई मेहनताना चिल्लाई किन्हें पुकारेया करहा, होर खेता मन्झ काम करणे वाळे री पुकार सर्वसक्तिमान परमेसरा रे काना तक पूजी गईरी । ⁵तुस्से धरती पर भोग

विलासा मन्झ लगी रहे होर बौहत सुख भोगेया, एहडा करी किन्हें तुस्से आपणे आपा जो मारणे रे कठे पाळी पोसी किन्हें तगडा मोटा करी लईरा । ⁶तुस्से धर्मी जो दोषी बणाई किन्हें मारी दितेया; से तुस्सा रा साम्हणा नी करदा । ⁷इधी कठे भाईयो, प्रभु रे आगमना तक धीरज धरा, देखा, किसान भी कीमती फसला रे कठे इंतजार करदा रह्यां, एता रे कठे से सुरुआती बरखा ले लई किन्हें बादा री बरखा तक लगातार सबर रखी किन्हें इंतजार करदा रह्यां । ⁸तुस्से भी सबर धीरज धरा, होर आपणे दिला जो मजबूत करा, क्यूंकि प्रभु रा सुभ आगमन नेडे आ । ⁹हे भाईयो, एक दूजे पर दोष ना लगाओ ताकि तुस्से दोषी नी बणो, देखा, न्यायी दरवाजे वाले आई किन्हें खहडी गईरा । ¹⁰हे भाईयो, दुःख उठाणे होर धीरज धरने रे कठे नबिया जो आदर्श समझा, जिन्हें प्रभु रे नांऊआं ले गल्ला किती । ¹¹देखा, आस्से धीरज धीरज धरने वाळेया जो धन्य बोल्हा ऐं; तुस्से अय्युबा रे सबरा रे बारे मन्झ ता सुणेया हुणा, होर प्रभुए तेस जो तेसरा फल दितेया, तेता जो भी तुस्से जाणहा ऐं, कि प्रभु कितना दयाळू होर करुणामय आ । ¹²पर हे मेरे भाईयो, सभी ले खरी गल ता ये ई, कि कसम देख्या खांदे, ना स्वर्गा री, ना धरती री, ना केसी होरी चीजा री, पर तुस्सा री गलबात हां री हां, होर ना री ना हो, ताकि तुस्से सजा रे लायक ना बणो । ¹³अगर तुस्सा मन्झ कोई दुःखी हो, ता से प्रार्थना करे; अगर खुस हो, ता से स्तुति रे गीत गाए । ¹⁴अगर तुस्सा मन्झ कोई बमार हो, ता कलीसिया रे प्राचीना जो सादे होर स्यों प्रभु रे नांऊआ ले तेल मळी किन्हें तेसरे कठे प्रार्थना करे । ¹⁵होर विस्वासा री प्रार्थना किन्हें तेस रोगिया बची जाणा होर प्रभुआ से ठुआळी किन्हें खडा करी देणा; होर अगर तिने पाप भी कितिरे हो, ता तेस जो तिन्हा री भी माफ़ी मिली जाणी । ¹⁶इधी कठे तुस्से आपु मन्झ एक दूजे रे साम्हणे आपणे आपणे पापा जो मनी लऊआ, होर एक दूजे रे कठे प्रार्थना करा; ताकि तुस्से चंगे भले हुई जाओ, धर्मी माहणुआ री प्रार्थना ले बौहत कुछ हुई सकहा । ¹⁷एलियाह भी ता आस्सा साहीं दुःख सुख भोगी माहणु था; होर तिने गिडगिडाई किन्हें प्रार्थना किती, कि बरखा नी पये; होर साढे तीन साला तक जमीना पर बरखा नी पये । ¹⁸फेरी तिने प्रार्थना किती, होर सर्गा ले बरखा हुई, होर जमीना मन्झ नाज हुआ । ¹⁹हे मेरे भाईयो, अगर तुस्सा मन्झ कोई सच्चाई रे रस्ते ले भटकी जाए, होर कोई तेस भटकीरे माहणु जो वाप्स लई आए । ²⁰ता से ये जाणी ले कि जो कोई केसी भटकीरे पापी जो वाप्स लई आहुंगा, तेस एक प्राण मौता ले बचाणा, होर कई पापा पर पर्दा पाणा ।

1 पतरस

1 पतरसा री बखा ले जो यीसू मसीह रा प्रेरित आ, तिन्हा परदेसिया रे नांऊ, जो पुन्तुस, ग्लातिया, होर कप्पुदुकिया, आसिया होर बिथुनिया मन्झ तितर बितर हुई किन्हें रैहयां ऐं।
2 होर तुस्से परमेसर पिता रे पूर्व ज्ञाना रे मुताबक होर आत्मा रे पवित्र करणे रे ज्रीए हुक्म मनणे, होर यीसू मसीह रे खूना रे छिड़के जाणे रे कठे चुणे गईरे, तुस्सा जो बौहत दया होर सांति मिल्दी रहे।
3 आस्सा रे प्रभु यीसू मसीह रे परमेसर होर पिता रा धन्यवाद करा, जिने यीसु मसीह जो मरीरे मंझा ले जी उठणे रे ज्रीए, आपणी बड़ी दया ले आस्सा जो जिउन्दी उम्मीदा रे कठे आस्सा जो नंऊआं जन्म दितेया।
4 ताकि तुस्से से उत्तराधिकार पाई लो, जो एक अविनासी, निष्कलंक होर अजर-अमर आ, होर से उत्तराधिकार तुस्सा रे कठे स्वर्गा मन्झ सम्भाळी किन्हें रखिरा।
5 जो विस्वासा रे ज्रीए सुरक्षित आ ताकि तिन्हा जो से उद्धार, जो आऊणे वाळे टैमा मन्झ जाहिर हुणे वाळा आ, मिले।
6 होर इस वजहा ले तुस्से मग्न हुहां ऐं, जेव्की एबे तुस्सा जो थोहडे टैमा रे कठे कई किस्मा री परीक्षा मन्झ पई किन्हें दुःख उठाणा जरूरी आ।
7 होर ये इधी कठे हुहां ताकि तुस्सा रा परखी रा विस्वास, जो आगा मन्झ परखे हुए सोने ले भी ज्यादा कीमती आ, यीसू मसीह रे जाहिर हुणे पर स्तुति, होर म्हीमा होर आदरा रा कारण बणें।
8 तेस किन्हें तुस्से बिन देखे प्यार रख्हा ऐ, होर एबे ता तेस पर बिन देखे भी विस्वास करी किन्हें एहडे खुस होर मग्न हुहां ऐं, जो बखान करणे ले बाहर होर म्हीमा किन्हें भरीरा आ।
9 होर आपणे विस्वासा रा फल यानि आत्मा रा उद्धार पाहें।
10 एस उद्दारा रे बारे मन्झ तिन्हे नबिये बौहत पूछ पाछ होर जांच पड़ताल किती, जिन्हें आपणे तेस अनुग्रहा रे बारे मन्झ जो तुस्सा पर हुणे वाळा था, भविष्यवाणी किती थी।
11 तिन्हे नबिए मसीह री आत्मा रे ज्रीए ये जाणी लया कि ये भविष्यवाणी मसीह पर हुणे वाळे दुःखा जो दस्या करहा थी, ये आत्मा तिन्हा जो दस्या करहा ई थी कि ये गल्ला इस दुनियां मन्झ केबे हूणीं होर एस्सा दुनियां रा क्या हूणां।
12 तिन्हा पर ये जाहिर कितेया, कि स्यों आपणी नी पर तुस्सा री सेउआ रे कठे ये गल्ला बोल्या करहा ऐ थे, जिन्हा री खबर एबे तुस्सा जो तिन्हा रे ज्रीए मिली, जो पवित्र आत्मा रे ज्रीए स्वर्गा ले भेजी गई, तुस्सा जो सुसमाचार सुणाया, होर इन्हा गल्ला जो स्वर्गदूत भी बड़े गौरा किन्हें देखणे री इच्छा रख्हा ऐ।
13 एस वजहा ले आपणी आपणी बुद्धि री कमर कसी किन्हें, होर सावधान हुई किन्हें तेस दया री पूरी आस रखा, जो यीसू मसीह रे जाहिर हुणे रे टैम तुस्सा जो मिलणे वाळी

ई।
14 होर हुक्म मनणे वाळे बालका साहीं तेस टैमा री बुरी इच्छा रे मुताबक आपणे आपा जो मत ढाळा जो तुस्सा मन्झ पैहले थी, जेबे तुस्से अज्ञानी थे।
15 पर जेहडा तुस्सा रा बुलाणे वाळा पवित्र आ, तिहां ई तुस्से भी आपणे सारे चाल चलणा मन्झ पवित्र बणां।
16 क्यूंकि लिखीरा, कि पवित्र बणां, क्यूंकि हांऊ पवित्र आ।
17 होर जेव्की तुस्से, हे पिता, बोली किन्हें तेस ले प्रार्थना करहा ऐ, जो बगैर भेदभावा किन्हें हर एकी रे कामा रे मुताबक फैसला करहा, ता तुस्से एस परदेसी धरती पर आपणे रैहणे रा टैम डरी किन्हें बिताऊआ।
18 क्यूंकि तुस्से जाणहां ऐं, कि तुस्सा रा निकम्मा चाल चलन जो बाबदादे रे टैमा ले चल्या आया करहा, तेस ले तुस्सा रा छुटकारा चांदी सोने यानि नास्मान चीजा रे ज्रीए नी हुआ।
19 पर तुस्सा रा छुटकारा निर्दोष होर निष्कलंक मेन्नं यानि मसीह रे कीमती खूना रे ज्रीए हुआ।
20 तेसरा ज्ञान ता संसारा री सृष्टि ले पैहले ले जाणेया गया, पर एबे एस आखरी युगा मन्झ तुस्सा रे कठे ये जाहिर हुआ।
21 तेस मसीह रे कारण ई तुस्से तेस परमेसरा पर विस्वास करदे रहे, जिने जे यीसू जो मरीरे मंझा ले जिउंदा कितेया, होर तेस जो म्हीमा दिती; ताकि तुस्सा रा विस्वास होर आस परमेसरा पर हो।
22 जेव्की तुस्से भाईचारे रे निष्कपट प्यारा रे कठे सच्चाई रा पालन करी किन्हें आपणी आत्मा पवित्र किती, ता तन मन ल्गाई किन्हें तुस्से एक दूजे किन्हें ज्यादा प्यार रखा।
23 क्यूंकि तुस्से नास्मान नी पर अविनासी बीजा ले यानि परमेसरा रे जीउंदे होर अटल वचना ले नंऊआं जन्म पाया।
24 क्यूंकि हर एक प्राणी घाहा साहीं आं, होर तेसरी सारी सोभा घाहा रे फूला साहीं ई, घाह सुकी जाहां, होर फूल झड़ी जाहें।
25 पर प्रभु रे वचना जुग जुग मजबूत रैहणां; होर ये ई सुसमाचार रा वचन आ जो तुस्सा जो सुणाईरा था।

2 इधी कठे सभ किस्मा रा बैरभाव होर धोखा होर कपट होर हिर्ष होर बदनामी दूर करी किन्हें।
2 नंऊऐं जम्मिरे बच्चे साहीं सुद्ध दुधा री इच्छा करा, ताकि तेसरे ज्रीए उद्धार पाणे रे कठे बढ़दे जाऊआ।
3 एबे देखा, तुस्से ता प्रभु री दया रा स्वाद चखी लईरा।
4 यीसू मसीह रे नेडे आऊआ, जेस जो संसारा रे लोके निकम्मा ठैहराया, पर परमेसरा रे नेडे से चुणी रा होर कीमती जिउंदा पात्थर आ।
5 तुस्से आपु भी जिउन्दे पात्थरा साहीं आत्मिक घर बणदे जाहें, जेस ले याजका रा पवित्र समाज बणी किन्हें, एहडे आत्मिक बलिदान चढाऊआ, जो यीसू मसीह रे ज्रीए परमेसरा जो ग्रहण करणे रे लायक हो।
6 एस वजहा ले सास्त्रा मन्झ भी लिखीरा, कि देखा, हांऊ सियोना मन्झ एक

कोणे रा पात्थर रखेया करहा, जो कीमती आ होर चुणीरा आ, एता पर जो विस्वास करघा तेस कधी भी सर्मिन्दा नी हूणां । 7 इधी कठे तुस्सा विस्वासिया रे कठे ये पात्थर कीमती आ, पर अविस्वासिया रे कठे ता से पात्थर जेस जो राज मिस्त्रिये बेकार सम्झिरा था से ई पात्थर कोणे रा पात्थर बणी गया । 8 होर ठेस लगणे होर ठोकर खाणे रा पहाड हुई गया; क्यूंकि स्यों ता वचन नी मनी किन्हें ठोकर खाहें, होर एता रे कठे स्यों नियुक्त भी कितिरे थे । 9 पर तुस्से ता एक चुणे हुए बंस, होर राज पदधारी याजका रा समाज होर पवित्र लोक, होर परमेसरा री आपणी निजी प्रजा ई, इधी कठे कि जिने तुस्सा जो न्ह्यारे मंझा ले आपणे नौखे उजाले मन्झ सादेया, तेसरे गुण जाहिर करा । 10 तुस्से पैहले ता कुछ भी नी थे, पर एबे तुस्से परमेसरा री प्रजा ई, पैहले तुस्सा पर दया नी हुईरी थी, पर एबे तुस्सा पर दया हुई गई री । 11 हे प्यारेओ हांऊ तुस्सा ले अरज करहा, कि तुस्से आपणे आपा जो परदेसी होर यात्री जाणी किन्हें तेस्सा सांसारिक इच्छा ले जो आत्मा साउगी युद्ध करहा ई, बची किन्हें रहूआ । 12 अन्य जातिया मन्झ तुस्सा रा चाल चलन खरा हो; इधी कठे कि जिन्हा जिन्हा गल्ला मन्झ स्यों तुस्सा जो कुकर्मी जाणी किन्हें बदनाम करहा ऐ, स्यों तुस्सा रे भले कामा जो देखी किन्हें, तिन्हा भले कामा री वजहा ले ई स्यों कृपा दृष्टि रे ध्याडे परमेसरा री म्हीमा करे । 13 प्रभु रे कठे, माहणुआं रे तय कितिरे हर एक नियमा रे अधीन रहूआ, राजे रे अधीन इधी कठे रहूआ क्यूंकि से सभी पर प्रधान आ । 14 होर हाक्मा रे अधीन इधी कठे रहूआ, क्यूंकि स्यों बुरे काम करणे वाळे जो सजा देणे होर खरे काम करणे वाळे री स्तुति रे कठे भेजिरे । 15 क्यूंकि परमेसरा री इच्छा ये ई, कि तुस्से खरे काम करी किन्हें अज्ञानता री गल्ला बोलणे वाळे मुख लोका रा मुंह बंद करी दो । 16 होर आपणे आपा जो अजाद समझा, पर आपणी एस्सा अजादी जो बुराई रे कठे आड नी बणाऊआ, पर आपणे आपा जो परमेसरा रे दास समझी किन्हें चला । 17 सभी रा आदर करा, भाईया किन्हें प्यार रखा, परमेसरा ले डरा, राजे री इज्जत करा । 18 हे दासो, हर किस्मा रे डरा साउगी आपणे मालका रे अधीन रहूआ, ना सिर्फ भले होर नम्र दीन लोका किन्हें पर निर्दयी लोका रे भी अधीन रहूआ । 19 क्यूंकि अगर कोई परमेसरा रे प्रति पवित्र विवेका रे कारण दुःख उठान्दे हुए अन्याया जो बडे सबरा किन्हें सैहन करहा, ता ये प्रसंसा री गल ई । 20 क्यूंकि अगर तुस्से पाप करी किन्हें मुक्के खाधे होर सबर भी कितेया, ता तेता मन्झ बडाई री क्या गल ई? पर अगर खरा काम करी किन्हें दुःख उठाहें होर सबर करहा ऐ, ता ये परमेसरा जो खरा लच्छा । 21 होर तुस्से एता रे कठे सादे भी गईरे क्यूंकि मसीहे भी तुस्सा रे कठे दुःख उठाया, होर एहडा करी किन्हें तिने तुस्सा रे कठे एक उदाहरण छाडेया, कि तुस्से भी तेसरे पद चिन्हा पर चली सको । 22 ना

ता तिने कोई पाप कितेया होर ना ई तेसरे मुंहा ले कोई धोखे री गल निकळी । 23 से गाळी सुणी किन्हें गाळी नी देंदा था, होर दुःख उठाई किन्हें केसी जो भी धमकी नी देंदा था, पर से आपणे आपा जो सच्चे न्यायी परमेसरा रे हाथा मन्झ सौंपी देहां था । 24 से आपु ई आस्सा रे पापा जो आपणे सरीरा पर लई किन्हें क्रूसा पर चहडी गया, ताकि आस्से पापा रे कठे मरी किन्हें धार्मिकता रे कठे जिंदगी बिताएं; तेसरे मार खाणे ले तुस्से चंगे किते गए । 25 क्यूंकि तुस्से पैहले भटकी री भेडा साहीं थे, पर एबे तुस्से आपणे प्राणा रे रखवाळे वाले होर अध्यक्षा वाले वाप्स आई गईरे ।

3 1 हे लाडियो, तुस्से भी आपणे आपणे लाडे रे अधीन रहूआ, इधी कठे कि इन्हा मन्झा ले कुछ एहडे ऐ जो वचना जो नी मनदे, 2 ताकि स्यों तुस्सा रे पवित्र होर खरे चाल चलन देखी किन्हें बगैर वचना री सहायता ले आपणी आपणी लाडी रे खरे चाल चलना रे ज़ीए जीते जाएं । 3 होर तुस्सा रा सिंगार, दिखावटी नी हो, यानि बाळा री चोटी ब्राणी, होर सोने रे गैहणे, या किस्मा किस्मा रे कपडे पैहनणे । 4 बल्कि ये तुस्सा रा भितरला मनुष्यत्व हो, जो नम्रता होर सांत मन वाले अविनासी गैहणे किन्हें सजे, क्यूंकि परमेसरा री नजरा मन्झ एता रा बडी कीमत ई । 5 होर पूर्व काला मन्झ पवित्र जनाने भी, जो परमेसरा पर आस रख्हा ई थी, आपणे आपणे लाडे रे अधीन रही किन्हें इस तरहा ई आपणे आपा जो सज्जाहीं होर संवारहा ई थी । 6 जिहां सारा भी अब्राह्मा जो स्वामी बोली किन्हें तेसरे अधीन रहें ई थी, इधी कठे अगर तुस्से भी बगैर डरे तेहडा ई करा जो ठीक आ, ता तुस्सा तेसरी बेटिया ठैहरणी । 7 तिहां ई हे लाडेयो, तुस्से भी बुद्धिमानी किन्हें आपणी आपणी लाडीया साउगी जिंदगी बिताऊआ होर जनाने जो कमजोर समझी किन्हें तिन्हा री इज्जत करा, ये समझी किन्हें कि आस्से दुहें जींदगी रे वरदाना रे वारस ऐ, ताकि तुस्सा री प्रार्थना रुकी नी जाए । 8 इधी कठे, सभ के सभ एक मन होर किरपा करणे वाळे होर भाईचारे रा प्यार रखणे वाळे, दुयालू होर नम्र बणां । 9 बुराई रे बदले बुराई मत करा; होर ना गाळी रे बदले गाळी देआ; पर आशीष ई देया; क्यूंकि तुस्से आशीषा रे वारस हुणे रे कठे सादे गईरे । 10 क्यूंकि जो कोई जिंदगी री इच्छा रख्हा, होर खरे ध्याडे देखणा चाहां, से आपणी जीभा जो बुराई ले, होर आपणे होठा जो धोखे री गल्ला करणे ले रोकी ले । 11 से बुराई रा साथ छाडी दे, होर भलाई ई करे, से मेल मिलापा जो टोळी किन्हें तेता रा अनुसरण करे । 12 क्यूंकि प्रभु री हाखिया धर्मिया पर लगी रहेंहीं, होर तेसरे कान तिन्हारी प्रार्थना वखा जो लगी रहेंहयां ऐं, पर प्रभु बुराई करणे वाळे रे खलाफ रहेंहयां ऐं, 13 होर अगर तुस्से भलाई करणे मन्झ उत्साही रहो ता तुस्सा री बुराई करणे वाळा फेरी केस हूणां? 14 होर अगर तुस्सा जो धर्मा रे

काम करने की वजह से दुःख उठाया जाए, ता तुस्से धन्य ऐ; पर तिन्हारे डराणे ले तुस्से मत डरा, होर ना घबराऊआ । 15 पर मसीह जो प्रभु जाणी किन्हें आपणे आपणे मना मंझ तेस जो पवित्र समझा, होर जो कोई तुस्सा ले तुस्सा री उम्मीदा रे बारे मन्झ कुछ पूछे, ता तेस जो जबाब देणे रे कठे हमेसा त्यार रहूआ, पर नम्रता होर आदरपूर्वक । 16 होर विवेक भी सुद्ध बणाए रखा, इधी कठे कि जिन्हा गल्ला रे बारे मन्झ तुस्सा रा अपमान हुहां, स्यों लोक मसीह मन्झ तुस्सा रे खरे चाल चलना जो तुच्छ जाणहा ऐं, स्यों सर्मीन्दे हो । 17 क्यूंकि अगर परमेसरा री ये ई इच्छा ई, ता खरी गल ये ई कि तुस्से भलाई करणे रे कठे दुःख उठाऊआ, ना कि बुराई करणे रे कठे । 18 इधी कठे कि मसीह भी सभी रे पापा रे कठे एक ई बार मरी गया, यानि अधर्मिया रे कठे धर्मी, ताकि से आस्सा जो परमेसरा रे नेडे लई जाए; सरीरा रे स्हाभे ता से मारेया गया पर आत्मा रे स्हाभे से जिउंदा कितेया गया । 19 तेस मन्झ ई तिने जाई किन्हें कैदी आत्मा जो प्रचार भी कितेया । 20 जिन्हें तेस बीते टैमा मन्झ हुक्म नी मन्नेया, जेबे परमेसरे नूह रे ध्याडे मन्झ सबर करी किन्हें रुकी रहया, होर से जहाज बणाया करहा था, जेस मन्झ बैठी किन्हें थोहडे लोक यानि आठ प्राणी जल प्रलया ले बची गईरे थे । 21 होर तेस ई पाणी रा दृष्टांत, बसिस्मा आ, जेसरा मतलब सरीरा रा मैल दूर करणा नी आ, पर सुद्ध मना ले परमेसरा रे अधीन हूणें रा मतलब आ, एबे ता बसिस्मा तुस्सा जो यीसू मसीह रे ज्रीए बचाहां । 22 से स्वर्गा मन्झ जाई किन्हें परमेसरा री दाई तरफ बैठी गया; होर स्वर्गदूत होर अधिकारी होर सक्तिया तेसरे अधीन करी दिते गए ।

4 1 इधी कठे जेबकी मसीहे सरीरा मन्झ हुई किन्हें दुःख उठाया ता तुस्से भी तेस ई इच्छा जो धारण करी किन्हें हथ्यार बान्ही लऊआ, क्यूंकि तिने जेस सरीरा मन्झ दुःख उठाया, से पापा ले छूटी गया । 2 ताकि भविष्य मन्झ आपणी बाकी सारीरिक जिंदगी माहणुआं री इच्छा रे मुताबक नी, बल्कि परमेसरा री इच्छा रे मुताबक जिंदगी बिताऊआ । 3 क्यूंकि अन्यजातिया री इच्छा रे मुताबक काम करणे, होर लुचपना री बुरी इच्छा, मतवाळापन, रंगरलिया, दारू बाजी, होर घृणित मूर्तिपूजा मन्झ जेथी तक आस्से पैहले ई टैम गुआई दितेया, से ई भतेरा हुआ । 4 एता ले स्यों अचम्भा करहा ऐ, कि एबे तुस्से एहडे भारी लुचपना मन्झ तिन्हा रा साथ नी देंदे, होर इधी कठे स्यों तुस्सा जो बुरा भला बोल्ला ऐ । 5 पर तिन्हा तेस जो, जो जिउन्देया रा होर मरीरे रा न्याय करणे जो त्यार आ, लेखा देणा । 6 क्यूंकि मरीरे जो भी सुसमाचार इधी कठे सुणाया गया, ताकि सरीरा मन्झ ता माहणुआं रे मुताबक तिन्हा रा न्याय हो, पर आत्मा मन्झ स्यों परमेसरा रे मुताबक जिउन्दे रहो । 7 सभ गल्ला रा अंत जल्दी हुणे वाळा आ; इधी कठे

सबर करी किन्हें प्रार्थना रे कठे तत्पर रहा । 8 होर सभी मन्झ खरी गल ये ई कि एक दूजे किन्हें ज्यादा प्यार रखा; क्यूंकि प्यार कई पापा जो ढकी देहां । 9 बगैर कूडकूडाए एक दूजे रा आदर सत्कार करा । 10 जेस केसी जो, परमेसरा री तरफा ले जो भी वरदान मिलिरा हो, तेस जो चाहिए कि से परमेसरा रे कई किस्मा रे अनुग्रहा रे खरे भंडारीया साहीं एक दूजे री सेउआ कठे तिन्हा जो इस्तेमाल करे । 11 अगर कोई बोले, ता एहडा बोले, जिहां जे परमेसरा रा वचन आ; अगर कोई सेउआ करे; ता से भरपूर सक्ति किन्हें करे जो परमेसर देहां; जेस ले सभ गल्ला मन्झ यीसू मसीह रे ज्रीए, परमेसरा री म्हीमा प्रगट हो; म्हीमा होर अधिकार जुग जुग तेसरा ई आ, आमीन । 12 हे प्यारेओ, जो दुःखरूपी आग तुस्सा जो परखणे रे कठे तुस्सा मन्झ भडकीरी, एस ले ये समझी किन्हें हरान मत हो कि कोई नौखी गल तुस्सा पर हुएया करहा ई । 13 पर जिहां जिहां तुस्से मसीह रे दुःखा मन्झ भागीदार हुहां ऐं, खुसी मनाऊआ, ताकि तेसरी म्हीमा रे प्रगट हुणे रे टैम भी तुस्से खुस होर मग्न हो । 14 फेरी अगर मसीह रे नाऊआं रे कठे तुस्सा री निंदा हुहां ई, ता तुस्से भागा वाळे ऐ; क्यूंकि म्हीमा रा आत्मा, जो परमेसरा रा आत्मा आ, तुस्सा पर छाया करहा । 15 तुस्सा मंझा ले कोई आदमी हत्यारा या चोर, या बुरे काम करणे वाळा, या पराए कामा मन्झ हाथ पाणे री वजहा ले दुःख नी पाए । 16 पर अगर मसीही हुणे री वजहा ले दुःख पाए, ता सर्मीन्दे नी हो, पर एस गल्ला रे कठे परमेसरा री म्हीमा करा । 17 क्यूंकि से टैम आई पुजीरा, कि पैहले परमेसरा रे लोका रा न्याय कितेया जाए, होर जेबकी न्याय री सुरुआत आस्सा ले ई हुणी, ता तिन्हा रा क्या अंत हूणां जो परमेसरा जो नी मन्नेदे? 18 होर अगर धर्मी आदमीया ई बौहत मुस्किला किन्हें उद्धार पाणा, ता भक्तिहीन होर पापीया रा क्या हूणां? 19 इधी कठे जो परमेसरा री इच्छा रे मुताबक दुःख उठाहें, स्यों भलाई करदे हुए, आपणे आपा जो भरोसे रे लायक सिरजनहारा रे हाथा मन्झ सौंपी दे ।

5 1 तुस्सा मन्झ जो प्राचीन ऐ, हांऊ तिन्हा साहीं प्राचीन होर मसीह रे दुःखा रा गवाह होर जाहिर हुणे वाळी म्हीमा मन्झ भागीदार हुई किन्हें तिन्हा जो ये सम्झाहां । 2 कि परमेसरा रे तेस झुंडा री, जो तुस्सा रे बीचा मन्झ ऐ रखवाळी करा; होर ये कोई जोर जबरदस्ती किन्हें नी, पर परमेसरा री इच्छा रे मुताबक खुसी किन्हें, होर नीच कमाई रे कठे नी, पर मन लगाई किन्हें । 3 होर जो लोक तुस्सा जो सौंपे गईरे, तिन्हा पर हक नी जताऊआ, बल्कि झुंडा रे कठे आदर्स बणां । 4 होर जेबे प्रधान रखवाळा जाहिर हूणां, ता तुस्सा जो म्हीमा रा ताज दितेया जाणा, जो मुरझाणे वाळा नी आ । 5 हे नौजुआनो, तुस्से भी प्राचीना रे अधीन रहा, बल्कि तुस्से सभ के सभ एक दूजे री सेउआ रे कठे, बडी दीनता किन्हें कमर कस्सी किन्हें रहा,

क्योंकि परमेसर घमंडीया रा ता साहम्णा करहा, पर नम्र दीना पर दया करहा । ⁶इधी कठे परमेसरा रे सामर्थी हाथा रे हेठ दीन बणी किन्हें रहा, ताकि से तुस्सा जो ठीक टैमा पर बढ़ाए । ⁷होर आपणी सारी चिंता तेस पर पाई देआ, क्योंकि तेस जो तुस्सा रा ध्यान आ । ⁸सावधान रहुआ, होर जागदे रहुआ, क्योंकि तुस्सा रा वरोधी सैतान गुराणे वाळे सेरा साहीं एस ताका मन्झ रेंहयां, कि केस जो फाडी किन्हें खाई दे । ⁹विस्वासा मन्झ पक्के हुई किन्हें, होर ये जाणी किन्हें तेसरा साम्हणा करा, कि तुस्सा रे भाई जो संसारा मन्झ ऐ, स्यों एहडे ई दुःख भूगतेया करहा ऐ । ¹⁰एबे परमेसर जो सारे अनुग्रहा रा दाता आ, जिने जे मसीह मन्झ तुस्सा जो आपणी अनन्त म्हीमा रे कठे सादीरा, तुस्सा रे थोहडी देरा तक दुःख उठाणे ले बाद तेस आपु ई तुस्से सिद्ध होर मजबूत होर सामर्थी बणाई देणे । ¹¹तेसरा ई राज जुग

जुग रहे । आमीन । ¹¹मैं सिलवानुसा रे हाथा, जेस जो हांऊ भरोसे रे लायक भाई समझहा, थोहडा जे हवाला देई किन्हें लिखी किन्हें हांऊ तुस्सा जो समझाया करहा, होर ये गुआही दिती कि परमेसर रा सच्चा अनुग्रह ये ई आ, तुस्से एता मन्झ ई मजबूत बणी किन्हें रहा । ¹²मैं सिलवानुसा रे हाथा, जेस जो हांऊ भरोसे रे लायक भाई समझहा, थोहडा जे हवाला देई किन्हें लिखी किन्हें हांऊ तुस्सा जो समझाया करहा, होर ये गुआही दिती कि परमेसर रा सच्चा अनुग्रह ये ई आ, तुस्से एता मन्झ ई मजबूत बणी किन्हें रहा । ¹³जो बाबूला मन्झ तुस्सा साहीं चुणी रे लोक ऐ, से होर मेरा म्ठठा मरकुस तुस्सा जो नमस्कार बोल्हा ऐ । ¹⁴प्यारा किन्हें चुम्बन लई किन्हें एक दूजे जो नमस्कार करा । तुस्सा सभी जो, जो मसीह मन्झ ऐ, सांति मिलदी रहे ।

2 पतरस

1 ¹समौन पतरसा री तरफा ले जो यीसू मसीह रा दास होर प्रेरित आ, तिन्हा लोका रे नांऊ जिन्हे आस्सा रे परमेसर, होर उद्धार कर्ता यीसू मसीह री धार्मिकता रे ज़ीए आस्सा साहीं कीमती विस्वास पाया। ²तुस्से परमेसर होर आस्सा रे प्रभु यीसू मसीह जो जाणी चुकिरे इधी कठे तुस्सा जो परमेसरा री किरपा होर दया ज्यादा ले ज्यादा मिले। ³आपणी जिंदगी रे कठे होर परमेसरा री सेउआ रे कठे जो कुछ आस्सा जो चहिए, आपणी दिव्य सक्ति रे ज़ीए तिने सब कुछ आस्सा जो देई दितेया, क्यूंकि आस्से तेस जो जाणहां ऐं, जिने आपणी धार्मिकता होर म्हीमा री वजहा ले आस्से सादे। ⁴इन्हा रे ज़ीए तिने आस्सा जो स्यों म्हान होर कीमती वरदान दितिरे, जिन्हा जो देणे री प्रतिज्ञा तिने कितिरी थी ताकि तिन्हा रे ज़ीए तुस्से आपु परमेसरा साहीं बणी जाओ होर तेस विनासा ले बची जाओ जो लोका री बुरी इच्छा री वजहा ले एस संसारा मन्झ ई। ⁵होर एस वजहा ले तुस्से सभ तरहा रा यत्न करी किन्हें, आपणे विस्वासा पर सद्गुण, होर सद्गुणा पर समझ। ⁶होर समझा पर संयम होर संयमा पर सबर होर सबरा पर भक्ति। ⁷होर भक्ति पर भाईचारे रे प्यारा पर प्यार बढ़ान्दे जाऊआ। ⁸क्यूंकि अगर ये गुण तुस्सा मन्झ बणी रहे होर बढ़दे जाए ता तिन्हा तुस्से आस्सा रे प्रभु यीसू मसीह रे पुरे ज्ञाना मन्झ निकम्मे होर निष्फल नी हूणे देणे। ⁹होर जेस मन्झ ये गुण नी हाए, से काणा आ, होर धुंधला देख्हा, होर से आपणे पैह्लके पापा ले धोही किन्हें पवित्र हुणे जो भूली बैठिरा। ¹⁰एस वजहा ले हे भाईयो, आपणे सादे जाणे, होर चुणे जाणे जो सिद्ध करणे रे कठे ठीक ठीक जतन करदे जाऊआ, क्यूंकि अगर एहड़ा करघे, ता तुस्सा कधी ठोकर नी खाणी। ¹¹ठीक इस तरहा आस्सा रे प्रभु होर उद्धारकर्ता यीसू मसीह रे अनंत राजा मन्झ तुस्सा जो दाखला दुआई किन्हें परमेसरा आपणी उदारता दस्णी। ¹²जेव्की तुससे ये गल्ला जाणहां ऐं, होर जो सच्चा वचन तुस्सा जो मिलिरा, तेस मन्झ बणी रहें, तेबे भी मां तुस्सा जो इन्हा गल्ला री याद दिलाणे रे कठे हमेसा त्यार रहणां। ¹³होर हांऊ ये आपणे कठे ठीक समझ्हा, कि जेबे तक हांऊ एस डेरे मन्झ आ, तेबे तक मां तुस्सा जो याद दिलाई किन्हें सचेत करदे रहणां। ¹⁴क्यूंकि हांऊ जाणहां, कि मसीह रे वचना रे मुताबक मेरे डेरे रे ढाए जाणे रा टैम जल्दी आऊणे वाळा आ। ¹⁵इधी कठे मां एहड़ी कोसिस करणी, कि मेरे जाणे ले बाद तुस्से इन्हा सभ गल्ला जो हमेसा याद करी सको। ¹⁶क्यूंकि जेबे आस्से तुस्सा जो आपणे प्रभु यीसू री सामर्थ्य रा, होर आगमना रा समाचार दितेया था ता

तिने चुतुराई किन्हें मन घडन्त कहाणीया रा सहारा नी लया; बल्कि आस्से आपु ई तेसरी म्हीमा देखी। ¹⁷जेबे तिने परमेसर पिता ले आदर होर म्हीमा पाई ता तेस दिव्य म्हीमा मंझा ले ये विशिष्ट वाणी हुई, कि ये मेरा प्यारा बेटा आ, जेस ले हांऊ बौहत खुस आ। ¹⁸होर जेबे आस्से तेस साउगी पवित्र पाहड़ा पर थे, ता आस्से स्वर्गा ले ये वाणी आऊन्दे सुणी। ¹⁹होर आस्सा वाले जो नबिया रा वचन आ, से एस घटना ले होर भी ज्यादा खरा साबत हुएया, होर एता पर ध्यान देई किन्हें तुस्से ये खरा करहा ऐं, जिहां जे ये न्ह्यारे मन्झ चम्मकदा हुआ दीया आ, जो तेस टैमा तक चम्मकदा रहयां, जेबे तक भ्याग नी हो होर तुस्सा रे दिला मन्झ भ्यागा रा तारा बणी किन्हें ना उगे। ²⁰पर पैहले ये जाणी लऊआ कि पवित्र शास्त्रा री कोई भी भविष्यवाणी केसी री आपणी ई विचारधारा रे अधारा पर पूरी नी हुंदी। ²¹क्यूंकि कोई भी भविष्यवाणी माहणु री इच्छा ले कधी नी हुई, पर भक्त जण आत्मा रे ज़ीए सचेत हुई किन्हें परमेसरा री तरफा ले बोल्हा ऐं थे।

2 ¹होर जिहां तिन्हा लोका मन्झ झूठे नबी थे, तिहां ई तुस्सा मन्झ भी झूठे उपदेसक हुणें, जिन्हा गुप्त रूपा ले घातक होर विधर्मी शिक्षा रा प्रचार करणा, एथी तक कि तिन्हा तेस स्वामी रा इनकार करणा, जिने जे स्यों मुले लईरे, होर इस तरहा तिन्हा आपणे ऊपर विनास ल्याऊणा। ²होर बौहितया तिन्हा साहीं लुचपन करणा, जिन्हा री वजहा ले सत्या रे रस्ते री निंदा किति जाणी। ³होर तिन्हा आपणे लालचा री वजहा ले आपणी मन घडन्त गल्ला करी किन्हें तुस्सा ले फायदा कमाणा, तिन्हा रा दंड परमेसरा रे ज़ीए बौहत पैहले ले तय करी जाई चुकिरा, तिन्हारा विनास त्यार आ होर तिन्हारा इंतजार करेया करहा। ⁴क्यूंकि जेबे परमेसरे स्यों स्वर्गदूत जिन्हें जे पाप कितेया नी छाडे, पर तिने स्यों नरका मन्झ भेजी किन्हें न्ह्यारे कुंडा मन्झ पाई दिते, ताकि स्यों न्याय रे ध्याडे तक बंदी बणी रहो। ⁵होर तिने पुराणे जुगा रा संसार भी नी छाडेया, पर भक्ति हीन लोका पर जल प्रलय करवाया, फेरी भी धार्मिकता रे प्रचारक नुहा जो तिने आठ आदमिया समेत बचाई लया। ⁶होर सदोम होर अमोरा रे नगरा जो विनासकारी दंड देई किन्हें, तिने भष्म करी दितेया, ताकि स्यों आऊणे वाळे भक्ति हीना रे कठे एक दृष्टान्त बणें। ⁷होर धर्मी लूत जो अधर्मी रे अशुद्ध चाल चलना ले बौहत दुःखी था तेस जो तिने छुटकारा दितेया। ⁸क्यूंकि से धर्मी तिन्हा रे बीचा मन्झ रहन्दे हुए, होर तिन्हारे अधर्म रे कामा जो देखी किन्हें, होर सुणी सुणी किन्हें, हर रोज आपणे सच्चे मना जो

दुःखी करहा था।⁹ प्रभु भक्ता जो परीक्षा मंझा ले काहडणा होर अधर्मिया जो न्याय रे ध्याड़े तक सजा री दसा मन्झ रखणा भी जाणहां।¹⁰ खास करी किन्हें तिन्हा जो, जो आपणे सरीरा री भ्रष्ट इच्छा मन्झ लिप्टे रैह्यां ऐं, प्रभु री प्रभुता जो तुच्छ जाणहां ऐं स्यों ढीठ होर हठी ऐ, होर उच्चे पदाधिकारीया जो बुरा भला बोलणे ले नी डरदे।¹¹ तेबे बी स्वर्गदूत जो सक्ति होर सामर्था मन्झ तिन्हा ले बडे ऐ, प्रभु रे साम्हणे तिन्हा जो बुरा भला बोली किन्हें दोष नी ल्यांदे।¹² पर ये लोक निर्बुद्धि डांगरे साहीं ऐं, जो पकड़े होर मारे जाणे रे कठे जम्मिरे; होर जिन्हा गल्ला जो जाणदे नी, तिन्हा रे बारे मन्झ होरिया जो बुरा भला बोल्हा ऐ, इन्हा रा नास भी डांगरे साहीं हुणा।¹³ होरी जो बुरा बोलणे रे बदले तिन्हा रा ई बुरा हुणा; तिन्हा जो भर दोपहरा सुख विलास करणा खरा ल्याहा; होर ये कलंक होर धब्बे ऐ, जेबे स्यों तुस्सा साउगी खाहें पिहां ऐं, ता धोखा करी किन्हें रंग रलिया मन्नाहें।¹⁴ इन्हा री हाखिया व्यभिचारा किन्हें भहरी री, होर स्यों पाप किते बगैर नी रुकी सकदे; स्यों चंचल मन वाळेया जो फुस्लाई लैहां ऐं इन्हा रे मन पूरी तरहा लालचा रे आदी ऐ, ये श्रापा रे सन्तान ऐ।¹⁵ स्यों सीधे रस्ते जो छाडी किन्हें भटकी गईरे, होर बोअरा रे पुत्र बिलामा रे रस्ते पर चली पईरे; जेस जो पापा री कमाई प्यारी थी।¹⁶ पर तेस जो तेसरे पापा रे कठे ताडना मिली, एक अबोल गधीए माहणु री बोली मन्झ बोली किन्हें तेस नबीरा पागलपन रोकेया।¹⁷ ये लोक पाणी रे सुके कुँए ऐं, होर बगैर पाणी रे बादल ऐ जिन्हा जो तूफान उड़ाई किन्हें लई जाहाँ; इन्हा रे कठे घोर न्ह्यारा रखी गईरा।¹⁸ स्यों बेकार घमंडा री गल्ला करी किन्हें लुचपना रे कामा रे ज्रीए तिन्हा लोका जो फसाई लैहां ऐं, जो एभे एभे भटकीरे मंझा ले निकळेया करहा।¹⁹ स्यों तिन्हा जो अजाद हुणे रा वचन ता देहां ऐं, पर जेबकी आपु भ्रष्टता रे दास ऐ, क्यूंकि जो आदमी जेस ले हारी जाहां, से तेसरा दास बणी जाहां।²⁰ होर जेबे स्यों प्रभु होर उद्धार कर्ता यीसू मसीह री पैहचाना रे ज्रीए संसारा री कई किस्मा री अशुद्धता ले बची निकळे, होर दबारा तिन्हा मन्झ फसी किन्हें हारी गये, ता तिन्हा री पिछली दसा पैहल्की दसा ले भी बुरी हुई गई।²¹ क्यूंकि तिन्हा रे कठे तेस पवित्र हुकमा जो जाणी किन्हें जो तिन्हा जो दितिरा था, फेरी ता तिन्हा रे कठे ये ई ठीक था कि स्यों एस धार्मिकता रे रस्ते जो नी जाणदे।²² तिन्हा पर ये कहावत ठीक बैठ्हा ई, कि कुत्ता आपणी उल्टी आपुए चाट्हा होर धोईरी सुअरनी चिकड़ा मन्झ दबारा वाप्स चली जाहीं।

3¹ हे प्यारेओ, एबे हांऊ तुस्सा जो ये दूजी चिठी लिख्हा, होर इन्हा दुहीं चिठी मन्झ हांऊ तिन्हा गल्ला री याद दिलाई किन्हें तुस्सारे शुद्ध मना जो उभारेया करहा।² कि तुस्से तिन्हा वचना जो, जो पवित्र नबिये पैहले ई बोली दितिरे थे,

होर प्रभु होर उद्धारकर्ता रे तेस हुकमा जो याद करा, जो तुस्सारे प्रेरिता रे ज्रीए दितिरा था।³ पर पैहले ये जाणी लो, कि आखरी ध्याड़े मन्झ ठठा करणे वाळे आऊणे, जिन्हा आपणी ई इच्छा रे मुताबक चलणा।⁴ होर बोलणा, तेसरे आऊणे री प्रतिज्ञा केथी गई, आस्सा रे पूर्वज ता मरी गए, फेरी भी सृष्टि रे सुरुआता ले एबे तक सभ कुछ तेहड़ा ई हुएया करहा।⁵ जेबे स्यों एहड़ा बोल्हा ऐ, ता ये भूली जाहें, कि परमेसरा रे वचना रे ज्रीए ई बौहत टैमा ले सर्गा रा अस्तित्व आ, होर धरती भी पाणी मंझा ले बणी, होर पाणी मन्झ टिकीरी।⁶ होर एता ले तेस टैमा रा संसार पाणी मन्झ डूबी किन्हें नास हुई गया।⁷ पर तेसरे वचना रे ज्रीए आजका सर्ग होर धरती भष्म करणे रे कठे रखिरे होर ये, अधर्मी लोका रे फैसले होर विनासा रे ध्याड़े तक एहड़े रखे जाणे।⁸ हे प्यारेओ, ये गल तुस्सा ले छुपी नी रहे, कि प्रभु री नजरा मन्झ एक ध्याड़ा हजार साला रे बराबर आ, होर हजार साल एक ध्याड़े रे बराबर।⁹ प्रभु आपणी प्रतिज्ञा रे बारे मन्झ देर नी करदा, जेहड़ा कि कुछ लोक सम्ह्हा ऐ; पर तुस्सा रे बारे मन्झ सबर करहा, होर नी चाहन्दा, कि कोई नास हो; बल्कि ये चाहं कि सभी जो मन फिराणे रा मौका मिले।¹⁰ पर प्रभु रा ध्याड़ा चोरा साहीं आई जाणा, तेस ध्याड़े बडी गडगडाहटा री अवाजा किन्हें सर्गा लुप्त हुई जाणा, होर तत्व प्रचंड आगा मन्झ फुछ्ही किन्हें नास हुई जाणे, होर धरती होर तेस पर किते गईरे काम भष्म हुई जाणा।¹¹ जेबकी ये सभ चीजा, इस तरहा नास हुणे वाळी ई; ता तुस्सा जो पवित्र चालचलन होर भक्ति मन्झ केहड़े माहणु हुणा चाहिए।¹² होर तुस्सा जो परमेसरा रे तेस ध्याड़े जो जल्दी ल्याऊणे रे कठे कितनी कोसिस करणी चाहिए, तेस ध्याड़े री वजहा ले सर्गा फुछ्ही किन्हें भष्म हुई जाणा, होर तत्व प्रचंड आगा मन्झ फुछ्ही किन्हें नास हुई जाणे।¹³ पर आस्से तेसरी प्रतिज्ञा रे मुताबक एक नऊए सर्ग होर नौई धरती रा इंतजार करेया करहा, जेस मन्झ धार्मिकता वास करणी।¹⁴ इधी कठे, हे प्यारेओ, जेबकी तुस्से इन्हा गल्ला री रख्हा ऐ ता यत्न करा कि तुस्से सांति किन्हें तेसरे साह्णणे निर्दोष होर बेदाग पाए जाओ।¹⁵ होर आस्सा रे प्रभु रे सबरा जो उद्धार समझा, जिहां आस्सा रे प्यारे भाई पौलुसे परमेसरा रे ज्रीए दितिरे विवेका रे मुताबक तुस्सा जो लिखीरा था।¹⁶ से आपणी सभ चिठीया मन्झ भी इन्हा गल्ला रे बारे मन्झ एहड़ा ई बोल्हा, जिन्हा मन्झ कुछ गल्ला जो समझणा कठण आ, होर न्पहड होर चंचल लोक तिन्हारे मतलबा जो तोडी मरोडी किन्हें जिहां स्यों पवित्र शास्त्रा री बाकि गल्ला रा भी करहा ऐं, एहड़ा करी किन्हें स्यों आपणे ई नासा री वजहा बणहां ऐं।¹⁷ इधी कठे हे प्यारेओ तुस्से लोक पैहले ले ई इन्हा गल्ला जो जाणी किन्हें सावधान रहूआ, ताकि अधर्मी माहणु रे चकरा मन्झ फसी किन्हें होर भटकी किन्हें आपणी मजबूत स्थिति ले पई नी जाओ।¹⁸ पर आस्सा रे

प्रभु, होर उद्धारकर्ता यीसू मसीह री दया होर पैहचाना मन्झ
बढदे जाऊआ, तेसरी म्हीमा एबे भी हो, होर जुगजुग हुन्दी रहे
। आमीन ।

1 यूहन्ना

1 तेस जीवना रे वचना रे बारे मन्झ जो सुरहु ले था, जो आस्से सुणेयां, होर जो आस्से आपणी हाखिया ले देख्या, बल्कि से आस्से ध्याना किन्हें देख्या; होर से आपणे हाथा किन्हें छुहेया। ²(होर से जीवन जाहिर हुआ, होर आस्से से जीवन देख्या, होर आस्से तेसरी गुआही देहां ऐं, होर आस्से तुस्सा जो तेस अनंत जींदगी रा समाचार देहां ऐं, जो पिता साउगी था होर आस्सा पर जाहिर हुआ)। ³जो कुछ आस्से देख्या होर सुणेयां तेता री खबर आस्से तुस्सा जो भी देहां ऐं, इधी कठे कि तुस्से भी आस्सा साउगी सैहभागी ऐ; होर आस्सा रा ये साथ पिता साउगी होर तेसरे पुत्र यीसू मसीह साउगी आ। ⁴होर ये गल्ला आस्से इधी कठे लिख्हा ऐ, कि आस्सा री खुसी पूरी हुई जाए। ⁵जो समाचार आस्से तेस ले सुणेयां, होर तुस्सा जो सुणाया करहा ऐ, से ये आ; कि परमेसर उजाला आ: होर तेता मन्झ कुछ भी न्ह्यारा नी आ। ⁶अगर आस्से बोलिए, कि तेस साउगी आस्सा रा साथ हाया, होर फेरी न्ह्यारे मन्झ चले, ता आस्से झूठे ऐ: होर सच्चाई पर नी चल्दे। ⁷पर अगर जिहां से उजाले मन्झ आ, तिहां ई आस्सा जो भी उजाले मन्झ चलणा चहिए, ता आस्से एक दूजे किन्हें साथ रख्हा ऐ; होर तेसरे पुत्र यीसू मसीहा रा खून आस्सा जो सभ पापा ले पवित्र करहा। ⁸अगर आस्से बोलिए, कि आस्सा मन्झ कुछ भी पाप नी आ, ता आस्से आपणे आपा जो धोखा देहांऐ: होर आस्सा मन्झ सच्चाई नी ई। ⁹अगर आस्से आपणे पापा जो मनी जाए, ता से आस्सा रे पापा जो माफ करणे, होर आस्सा जो सभ पापा ले पवित्र करणे मन्झ सच्चा होर धर्मी आ। ¹⁰अगर आस्से बोलिए कि आस्से पाप नी कितेया, ता आस्से तेस जो झूठा बणाहें, होर तेसरा वचन आस्सा मन्झ नी आ।

2 हे मेरे बच्चेयो, हांऊ तुस्सा जो ऐ गल्ला इधी कठे लिख्हा, ताकि तुस्से पाप नी करो; होर अगर कोई पाप करहा, ता पिता वाले एक साथी आ, यानि धर्मी यीसू मसीह। ²होर से ई आस्सा रे पापा रा प्रायश्चित्त आ: होर सिर्फ आस्सा रा ई नी, पर सारे संसारा रे पापा रा भी। ³अगर आस्से तेसरे हुकमा जो मन्घे, ता तेता ले आस्सा जाणी लैणा कि आस्से तेस जो जाणी गईरे। ⁴जो कोई ये बोल्हा, कि हांऊ तेस जो जाणी गईरा, होर तेसरे हुकमा जो नी मन्घदा, से झूठा आ; होर तेस मन्झ सच्चाई नी ई। ⁵पर जो कोई तेसरे वचना पर चले, तेस अन्दर सचमुच परमेसरा रा प्यार पक्का हुई गईरा: आस्सा जो एता ले पता चल्हा आ, कि आस्से तेस मन्झ ऐ। ⁶जो कोई ये बोल्हा, कि हांऊ तेस मन्झ बणी रेंहयां, तेस जो चहिए कि से आपु भी

तेहडा ई चले जेहडा से चल्हा था। ⁷हे प्यारेयो, हांऊ तुस्सा जो कोई नंऊआं हुकम नी लिखदा, पर से ई पुराणा हुकम जो सुरहु ले तुस्सा जो मिलीरा; ये पुराणा हुकम से वचन आ, जो तुस्से सुणेयां। ⁸फेरी हांऊ तुस्सा जो नंऊआं हुकम लिख्हा; होर ये ता तेस मन्झ होर तुस्सा मन्झ सच्चा बणी जाहां; क्यूंकि न्ह्यारा मिट्दा जाहां होर सच्चा प्रयासा ता चमक्दा रेंहयां। ⁹जो कोई ये बोल्हा, कि हांऊ प्रयासा आ; होर आपणे भाई किन्हें नफरत करहा, से हल्ली तक न्ह्यारे मन्झ आ। ¹⁰जो कोई आपणे भाई किन्हें प्यार करहा, से प्रयासे मन्झ रेंहयां, होर ठोकर नी खाई सकदा। ¹¹पर जो कोई आपणे भाई किन्हें बैर रख्हा, से न्ह्यारे मन्झ आ, होर से न्ह्यारे मन्झ चल्हा; होर से नी जाणदा, कि केथी जाहां, क्यूंकि न्ह्यारे तेसरी हाखिया काणी करी दितिरी। ¹²हे बच्चेयो, हांऊ तुस्सा जो इधी कठे लिख्हा, कि तेसरे नांऊआं ले तुस्सा रे पाप माफ हुई गईरे। ¹³हे पितरो, हांऊ तुस्सा जो इधी कठे लिख्या करहा, कि जो सुरहु ले आ, तुस्से तेस जो जाणहां ऐं; हे जुआनो हांऊ तुस्सा जो इधी कठे लिख्हा, कि तुस्से तेस दुष्टा पर जीत पाई लईरी; हे बच्चेयो, मैं तुस्सा जो इधी कठे लिखी रा, कि तुस्से पिता जो जाणी लईरा। ¹⁴हे पितरो, मैं तुस्सा जो इधी कठे लिखीरा, कि जो सुरहु ले आ, तुस्से तेस जो जाणी लईरा, हे जुआनो, मैं तुस्सा जो इधी कठे लिख्हा, कि ताकतवर हो, होर परमेसरा रा वचन तुस्सा मन्झ बणी रेंहयां, होर तुस्से तेस दुष्टा पर जीत पाई लईरी। ¹⁵तुस्से ना ता संसारा ले होर ना संसारा मंझा री चीजा ले प्यार रखा; अगर कोई संसारा किन्हें प्यार रख्हा, ता तेस मन्झ पिता रा प्यार नी आ। ¹⁶क्यूंकि जो कुछ संसारा मन्झ आ, सरीरा ई इच्छा, होर हाखिया चाहत होर जीविका रा घमण्ड, से पिता री तरफा ले नी आ। ¹⁷होर संसार होर ऐसरी इच्छाएं दुहें मिट्दी जाहीं, पर जो परमेसरा री इच्छा पर चल्हा, से हमेसा बणी रेंहयां। ¹⁸हे बच्चेयो, ये आखरी टैम आ, होर जेहडा तुस्से सुणीरा, कि मसीहा रा वरोधी आऊणे वाळा आ, तेसरे मुताबक एबे भी बौहत सारे मसीह रे वरोधी खडे हुई गईरे; एता ले आस्से जाणहां ऐं, कि ये आखरी टैम आ। ¹⁹स्यों निकळी रे ता आस्सा मन्झा ले ई ये, पर स्यों आस्सा रे नी हाए, क्यूंकि अगर स्यों सच्चे आस्सा रे हुंदे ता स्यों आस्सा साउगी रैहन्दे, पर स्यों आस्सा जो छाडी किन्हें चली गये; ताकि स्यों प्रगट हुई जाए कि स्यों सभ आस्सा रे नी हाए। ²⁰होर तुस्सा रा ता तेस पवित्र आत्मा किन्हें अभिषेक हुईरा, इधी कठे तुस्से सच्चाईया जो जाणहां ऐं। ²¹मैं तुस्सा जो इधी कठे नी लिखीरा कि तुस्से सच्चाईया जो जाणहां ऐं? बल्कि तुस्से

तेस जो जाणहां ऐं, होर इधी कठे कि कोई झूठ, सच्चाई री तरफा ले नी आ।²² झूठा कुणहां? सिर्फ से, जो यीसू रे मसीह हुणे रा इन्कार करहा; होर मसीहा रा वरोधी से ई आ, जो पिता होर पुत्रा रा इन्कार करहा।²³ जो कुछ तुस्से सुरहु ले सुणेयां से ई तुस्सा मन्झ बणा रहे; जो पुत्रा जो मनी लैंहां, तेस वाले पिता भी आ।²⁴ जो कुछ तुस्से सुरहु ले सुणेयां से ई तुस्सा मन्झ बणा रहे; जो तुस्से सुरहु ले सुणेयां, अगर से तुस्सा मन्झ बणा रहे, ता तुस्सा पुत्र होर पिता दुहीं मन्झ बणेयां रैंहणां।²⁵ तिने आस्सा जो अनन्त जींदगी देणे रा वचन दितिरा।²⁶ हांऊ ये गल्ला तिन्हा लोका रे बारे मन्झ लिखेया करहा, जो तुस्सा जो धोखा देणे रा जतन करेया करहा ऐं।²⁷ होर तुस्सा रा से अभिषेक, जो तेसरी तरफा ले तुस्से ग्रैहण कितेया, तुस्सा मन्झ बणेयां रैंहयां; होर तुस्सा जो जरूरत नी हाई कि कोई तुस्सा जो स्वाए, पर जेस जो से अभिषेक जो तेसरी तरफा ले कितेया गईरा, तुस्सा जो सभ गल्ला स्वाहां, होर ये सच्चा आ, होर झूठा नी आ, होर जेहड़ा तिने तुस्सा जो स्वाईरा तिहां ई तुस्से तेस मन्झ बणे रैंहें।²⁸ इधी कठे हे प्यारे बच्चेयो, तेस मन्झ बणे रहो; कि जेबे से प्रगट हो, ता आस्सा जो हिम्मत हो, होर आस्से तेसरे आऊणे पर तेसरे साम्हणे बेजत नी हो।²⁹ अगर तुस्से जाणहां ऐं कि से धर्मी आ, ता ये भी जाणदे हुन्घे, कि जो कोई धर्मा रा काम करहा, से तेस ले जम्मीरा।

3 ¹देखा पिते आस्सा किन्हें केहड़ा प्यार कितेया, ताकि आस्से परमेसरा रे बच्चे कैहलाई सके, होर सच्चाई मन्झ आस्से तेसरी सन्तान हाए भी; एस वजहा ले संसार आस्सा जो नी जाणदा, क्यूंकि संसार तेस मसीह जो भी नी जाणदा।² हे प्यारेयो, एबे आस्से परमेसरा री बच्चे ऐं, होर हल्ली तक ये प्रगट नी हुएया कि आस्सा क्या कुछ हुणां! जो भी हो आस्से ये जाणहां ऐं, कि मसीह रे दबारा प्रगट हुणें पर आस्सा भी तेस साहीं हुणां, क्यूंकि जेहड़ा से आ, आस्सा से तेहड़ा ई देखणा।³ होर जो कोई तेस पर ये आस रख्हा, से आपणे आपा जो तेहड़ा ई पवित्र करहा, जेहड़ा मसीह आपु पवित्र आ।⁴ जो कोई पाप करहा, से व्यवस्था रा वरोध करहा; होर व्यवस्था रा वरोध पाप आ।⁵ होर तुस्से जाणहां ऐं, कि से इधी कठे प्रगट हुएया, कि पापा जो दूर करे; होर तेस मन्झ कोई पाप नी आ।⁶ जो कोई मसीह मन्झ बणी रैंहयां, से पाप नी करदा रैंहन्दा; जो कोई पाप करहा, तिने ना ता से देखिरा, होर ना जाणिरा।⁷ हे बच्चेयो, तुस्से केसी रे धोखे मन्झ देख्या आऊन्दे, जो भलाई रे काम करहा से धर्मी आ, ठीक तिहां जिहां मसीह धर्मी आ।⁸ जो कोई पाप करदा ई रैंहयां, से सैताना रा आ, क्यूंकि सैतान सुरहु ले ई पाप करदा आईरा; परमेसरा रा पुत्र इधी कठे प्रगट हुआ ताकि से सैताने रे कामा रा नास करे।⁹ जो कोई परमेसरा ले जम्मिरा से पाप नी करदा रैंहन्दा; क्यूंकि तेसरा बेजा ता तेस मन्झ ई बणी

रैंहयां, से पाप करी नी सकदा, क्यूंकि से परमेसरा ले जम्मिरा।¹⁰ परमेसरा री संतान कुणहें? होर सैताना री संतान कुणहें? तुस्से तिन्हा जो ईहां जाणी सकहा ऐं; हरेक आदमी जो धर्मा रे काम नी करदा होर आपणे भाई किन्हें प्यार नी रखदा, से परमेसरा रा नी आ।¹¹ क्यूंकि जो उपदेस तुस्से सुरहु ले सुणेयां, से ये आ, कि आस्से एक दूजे किन्हें प्यार करे।¹² होर आस्से कैना साहीं नी बणे, जो तेस दुष्ट सैताना ले था, होर जिने जे आपणे भाई री हत्या किती; होर तिने केस वजहा ले तेस री हत्या किती? एस वजहा ले कि तेसरे काम बुरे थे, होर तेसरे भाई रे काम धर्मा रे थे।¹³ हे भाईयो, अगर संसार तुस्सा किन्हें बैर करहा ता हरान मत हुणां।¹⁴ आस्से जाणहां ऐं, कि आस्से मौता ले पार जींदगी मन्झ आई पौहुंची रे; क्यूंकि आस्से भाईया किन्हें प्यार रख्हा ऐं, जो प्यार नी रख्हे, से मौता री दसा मन्झ रैंहयां ऐं।¹⁵ जो कोई आपणे भाई किन्हें बैर रख्हा, से हत्यारा आ; होर तुस्से जाणहां ऐं कि केसी हत्यारे मन्झ अनन्त जीन्दगी नी रैंहन्दी।¹⁶ आस्से प्यार एता ले जाणेया, कि तिने आस्सा रे कठे आपणे प्राण देई दिते; होर आस्सा जो भी भाईया रे कठे आपणे प्राण देणे चाहिए।¹⁷ पर जेस केसी वाले संसारा री धन दौलत हो, होर से आपणे भाई जो कंगाल देखी किन्हें तरस नी खाणा चाहे, ता तेस मन्झ परमेसरा रा प्यार किहाँ बणी रही सकहा?¹⁸ हे बच्चेयो, आस्सा जो वचन होर जीभा ले ई नी, पर काम होर सच्चाई किन्हें भी प्यार करणा चाहिए।¹⁹ एता ले ई आस्सा जाणी लैणा कि आस्से सच्चाई रे ऐं; होर परमेसरा रे साम्हणे आपणे दिला जो आस्वासन देई सकहा ऐं।²⁰ क्यूंकि अगर बुरे कामा रे कठे आस्सा रा मन आस्सा जो दोषी बणाहां, ता ये इधी कठे हुहां कि परमेसर आस्सा रे मना ले बडा आ होर से सभ कुछ जाणहां।²¹ हे प्यारे बच्चेयो, अगर आस्सा रा दिल आस्सा जो दोषी नी ठैहराए ता परमेसरा रे साम्हणे आस्सा जो हिम्मत हुहां ई।²² होर जो कुछ आस्से मांघ्हा ऐं, से आस्सा जो तेस ले मिल्हा; क्यूंकि आस्से तेसरे हुकमा जो मन्हां ऐं; होर जो तेस जो खरा लघ्हा आस्से तेहड़ा ई करहा ऐं।²³ होर तेसरा हुकम ये आ कि आस्से तेसरे पुत्र यीसू मसीह रे नांऊआं पर विस्वास करे होर जेहड़ा तिने आस्सा जो हुकम दितिरा, तेता रे ई मुताबक आस्से एक दूजे किन्हें प्यार करे।²⁴ होर जो तेसरे हुकमा जो मन्हां, से परमेसरा मन्झ बणी रैंहयां; होर से तेस मन्झ, होर ईहां ई, यानि तेस आत्मा ले जो तिने आस्सा जो दितीरा, आस्से जाणहां ऐं, कि से आस्सा मन्झ बणी रैंहयां।

4 ¹ हे प्यारेयो, हरेक आत्मा रा विस्वास नी करा; पर आत्मा जो परखा, कि स्यों परमेसरा री तरफा ले ई कि नी ई; क्यूंकि बौहत सारे झूठे नबी संसारा मन्झ निकळी गईरि।² परमेसरा रा आत्मा तुस्से इस तरहा पैहचाणी सकहा ऐं, कि जो कोई आत्मा मनी लैंहीं, कि यीसू मसीह माहणु रे रूपा मन्झ

या सरीरा मन्झ हुई किन्हें एस धरती मन्झ आया; से परमेसरा री तरफा ले आ । ³ होर जो कोई आत्मा यीसू जो नी मन्झदा, से परमेसरा री तरफा ले नी आ, होर से ई मसीह रे वरोधी री आत्मा ई; जेसरी चर्चा तुस्से सुणी चुकिरे, कि से आऊणे वाळा आ, होर एबे भी संसारा मन्झ आ । ⁴ हे बञ्चेयो, तुस्से परमेसरा रे ऐ; इधी कठे तुस्से तिन्हा पर जीत पाई लईरी, क्यूंकि जो तुस्सा मन्झ आ से तेस ले जो संसारा मन्झ आ, बडा आ । ⁵ स्यों संसारा रे ऐ, इधी कठे स्यों संसारा री गल्ला करहा ऐ, होर संसार तिन्हा री सुणहां । ⁶ आस्से परमेसरा रे ऐ; जो परमेसरा जो जाणहां, से आस्सा री सुणहां; जो परमेसरा जो नी जाणदा से आस्सा री नी सुणदा, इस तरहा आस्से सत्या री आत्मा होर भटकाणे वाळी आत्मा जो पैहचाणी लैंहां ऐं । ⁷ हे बञ्चेयो, आस्से आपु मन्झ प्यार रखे, क्यूंकि प्यार परमेसरा ले आ; होर जो कोई प्यार करहा, से परमेसरा ले जम्मिरा; होर परमेसरा जो जाणहां । ⁸ जो प्यार नी करदा, से परमेसरा जो नी जाणदा, क्यूंकि परमेसर प्यार आ । ⁹ जो प्यार परमेसर आस्सा किन्हें करहा, से इस तरहा प्रगट हुआ कि परमेसरे आपणा इकलौता पुत्र संसारा मन्झ भेज्या, ताकि आस्से तेसरे ज़ीए जिन्दगी पाए । ¹⁰ प्यार एता मन्झ नी आ कि आस्से परमेसरा किन्हें प्यार कितेया; पर एता मन्झ आ कि तिने आस्सा किन्हें प्यार कितेया; होर आस्सा रे पापा रे प्रायस्चिता रे कठे आपणा पुत्र भेज्या । ¹¹ हे प्यारेयो, जेबे परमेसरे आस्सा किन्हें एहड़ा प्यार कितेया, ता आस्सा जो भी एक दूजे किन्हें प्यार रखणा चाहिए । ¹² परमेसरा जो कधी केसीए नी देख्या; अगर आस्से एक दूजे किन्हें प्यार रखे, ता परमेसर आस्सा मन्झ बणी रैंहयां, होर तेसरा प्यार आस्सा मन्झ सिद्ध हुहां । ¹³ एता ले आस्से जाणहां ऐं, कि आस्से तेस मन्झ बणी रैंहें, होर से आस्सा मन्झ; क्यूंकि तिने आपणी आत्मा मंझा ले आस्सा जो दितेया । ¹⁴ होर आस्से देखी भी लया होर गुआही भी देहां ऐं, कि पिते आपणा पुत्र, संसारा रा मुक्ति दाता रे रूपा मन्झ भेज्या । ¹⁵ जो कोई ये मनी लैंहां, कि यीसू परमेसरा रा पुत्र आ; परमेसर तेस मन्झ बणी रैंहयां, होर से परमेसरा मन्झ । ¹⁶ होर जो प्यार परमेसर आस्सा किन्हें रख्हा, तेस जो आस्से जाणी गये, होर आस्सा जो तेसरा विस्वास आ, परमेसर प्यार आ; जो प्यारा मन्झ बणी रैंहयां, से परमेसरा मन्झ बणी रैंहयां; होर परमेसर तेस मन्झ बणी रैंहयां । ¹⁷ एता ले ई प्यार आस्सा मन्झ सिद्ध हुआ, ताकि आस्सा जो न्याय रे ध्याडे हिम्मत हो; क्यूंकि जेहडा से आ, तेहडा ई संसारा मन्झ आस्से भी ऐ । ¹⁸ प्यारा मन्झ डर नी हुंदा, पर सिद्ध प्यार डरा जो दूर करी देहां, क्यूंकि डरा ले सजा मिल्हा ई, होर जो डरहा, से प्यारा मन्झ सिद्ध नी हुईरा । ¹⁹ आस्से इधी कठे प्यार करहा ऐ, कि पैहले तिने आस्सा किन्हें प्यार कितेया । ²⁰ अगर कोई बोले, कि हांऊ परमेसरा किन्हें प्यार करहा; होर आपणे भाई किन्हें

नफरत रख्हा; ता से झूठा आ, क्यूंकि जो आपणे भाई किन्हें, जो तिने देखीरा, प्यार नी करदा, ता से परमेसरा किन्हें जो तिने कधी नी देखीरा, से तेस किन्हें प्यार नी रखी सकदा । ²¹ होर तेस ले आस्सा जो ये हुक्म मिलीरा, कि जो कोई आपणे परमेसरा किन्हें प्यार रख्हा, से आपणे भाई किन्हें भी प्यार रखे ।

5 ¹ जेसरा ये विस्वास आ कि यीसू ई मसीह ऐ, से परमेसरा ले जम्मिरा होर जो कोई पिता किन्हें प्यार करहा से तेस किन्हें भी प्यार करहा, जो तेस ले जम्मिरा । ² जेबे आस्से परमेसरा किन्हें प्यार रख्हा ऐ, होर तेसरे हुकमा जो मन्हां ऐं, ता एता ले ई आस्से जाणी लैंहां ऐं कि आस्से परमेसरा री सन्ताना किन्हें प्यार करहा ऐ । ³ होर परमेसरा रा प्यार ये आ, कि आस्से तेसरे हुकम मन्त्रें; होर तेसरे हुकम कठण नी ऐ । ⁴ क्यूंकि जो परमेसरा ले जम्मिरा, से संसारा पर जीत हासल करहा, होर जो जीत आस्से संसारा पर पाई ली, से आ, आस्सा रा विस्वास । ⁵ जो ये विस्वास करहा कि यीसू परमेसरा रा पुत्र आ, से ई संसारा पर जीत हासल करहा । ⁶ ये से ई आ, जो पाणी होर खुना साउगी आया था; मतलब यीसू मसीह, से ना ता सिर्फ पाणी साउगी, बल्कि पाणी होर खुना साउगी आया । ⁷ होर जो गुआही देहां, से आत्मा आ; क्यूंकि आत्मा सञ्ची ई । ⁸ गुआही देणे वाळे तीन ऐ; आत्मा, पाणी, होर खून, होर तीन्हो एक ई गला पर राजी ऐ । ⁹ जेबे आस्से माहणुआ री गुआही मनी लैंहां ऐं, ता परमेसरा री गुआही एता ले बढी किन्हें ई; होर परमेसरा री गुआही ये ई, कि तिने आपणे पुत्रा रे बारे मन्झ गुआही दितिरी । ¹⁰ जो परमेसरा रे पुत्रा पर विस्वास करहा; से आपणे मन्झ ई गुआही रख्हा; जिने जे परमेसरा पर विस्वास नी कितेया; तिने से झूठा ठैहराया; क्यूंकि तिने तेस गुआही पर विस्वास नी कितेया, जो परमेसरे आपणे पुत्रा रे बारे मन्झ दिती । ¹¹ होर से गुआही से ई, कि परमेसरे आस्सा जो अनंत जिन्दगी दिती; होर ये जींदगी तेसरे पुत्रा मन्झ ई । ¹² जेस वाले पुत्र आ, तेस वाले जिन्दगी ई; होर जेस वाले परमेसरा रा पुत्र नी आ, तेस वाले जिन्दगी भी नी ई । ¹³ हांऊ तुस्सा जो, जो परमेसरा रे पुत्रा रे नांऊआं पर विस्वास करहा ऐ, यूँ गल्ला इधी कठे लिखीरी; कि तुस्से जाणी सको, कि अनंत जिन्दगी तुस्सा री ई । ¹⁴ होर जो हिम्मत आस्सा जो तेसरे साम्हणे हुहां ई, से ये ई, कि अगर आस्से तेसरी इच्छा रे मुताबक कुछ मांगे ता से आस्सा री सुणहां । ¹⁵ होर जेबे आस्से जाणहां ऐं, कि जो कुछ आस्से मांछ्हा ऐ, से आस्सा री सुणहां, ता ये भी जाणहां ऐं, कि जो कुछ आस्से तेस ले मान्गोया, से पाई लईरा । ¹⁶ अगर कोई आपणे भाई जो एहड़ा पाप करदे देखे, जेसरा फल मौत नी हो, ता से प्रार्थना करे, होर परमेसरा तेसरे कारण तिन्हा जो जिन्हें एहड़ा पाप कितिरा हो जेसरा फल मौत नी हो, जिन्दगी देणी । ¹⁷ सब तरहा रा अधर्म ता पाप आ, पर एहड़ा पाप भी आ, जेसरा फल मौत नी ई ।

18 आसे जाणहां ऐं कि जो कोई परमेसरा ले जम्मिरा, से पाप नी करदा, पर जो परमेसरा ले जम्मिरा, तेसरी से रक्षा करहा होर से दुष्ट सैतान तेसरा कुछ नी बिगाड़दा । 19 आस्से जाणहां ऐं, कि आस्से परमेसरा रे ऐ, होर सारा संसार तेस दुष्टा रे कब्जे मन्झ आ । 20 होर ये भी जाणहां ऐं, कि परमेसरा रा पुत्र आई

गईरा होर तिने आस्सा जो समझ दितिरी, कि आस्से तेस सच्चे परमेसरा जो जाणें, होर आस्से तेस मन्झ जो सच्चा आ, यानि तेसरे पुत्र यीसू मसीह मन्झ रैंहयाँ ऐं, सच्चा परमेसर होर अनंत जिन्दगी ये ई । 21 हे बच्चेयो, आपणे आपा जो मूर्ति ले बचाई रखा ।

2 यूहन्ना

1 मुंजो प्राचीना वखा ले तेस्सा चुणी री श्रीमती होर तेस्सा रे बच्चेया रे नांऊ जिन्हा ले हांऊ तेस सच्चाई रे कारण सच्चा प्यार रखहा, जो आस्सा मन्झ अटल रैहयां ई, होर हमेसा रे कठे आस्सा साउगी अटल रैहणीं। **2** होर सिर्फ हांऊ ई नी, पर स्यों सभ प्यार रखहा ऐ, जो सच्चाईया जो जाणहां ऐं **3** परमेसर पिता, होर पिता रे पुत्र यीसू मसीह री तरफा ले किरपा, होर दया होर सांति, सच्चाई होर प्यार आस्सा साउगी रैहणां। **4** हांऊ बौहत खुस हुएया, कि मैं तेरे कितने बच्चेया जो तेस हुकमा रे मुताबक, जो आस्सा जो पिता री तरफा ले मिलिरे थे सच्चाई पर चलदे हुए पाया। **5** एबे श्रीमती जी, हांऊ तुस्सा जो कोई नौई आज्ञा नी, पर से ई आज्ञा जो सुहरू ले आस्सा वाले ई, लिख्हा; होर एबे हांऊ तुस्सा ले अरज करहा, कि आस्से एक दूजे किन्हें प्यार रखें। **6** होर ये प्यार ये आ कि आस्से तेसरे हुकमा रे मुताबक चले: ये से ई हुकम आ, जो तुस्से सुहरू ले सुणेंयां होर तुस्सा जो एता पर चलणा भी चाहिए। **7** क्योंकि बौहत एहडे भरमाणे वाळे संसारा मन्झ निक्लिरे, जो ये नी मन्त्रदे,

कि यीसू मसीह सरीरा मन्झ हुई किन्हें आया: भरमाणे वाळा होर मसीह वरोधी ये ई आ। **8** आपणे बारे मन्झ च्त्तन जे रहुआ; कि जो मैहनत आस्से कितिरी, तेता जो तुस्से नी बिगाड़ी सको; ताकि तुस्से तेता रा पुरा पूरा फल पाई सको। **9** जो कोई अगे बढहा, होर मसीह री सिक्षा मन्झ बणी किन्हें नी रैहन्दा, तेस वाले परमेसर नी आ: जो कोई तेसरी सिक्षा मन्झ पक्का रैहयां, तेस वाले पिता भी आ होर पुत्र भी आ। **10** अगर कोई तुस्सा वाले आए, होर ये ई सिक्षा नी दे, तेस जो ना ता घरा मन्झ आऊणे देआ, होर ना नमस्कार करा। **11** क्योंकि जो कोई एहडे आदमी जो नमस्कार करहा, से तेसरे बुरे कामा मन्झ साझी हुहां। **12** मैं बौहत सारी गल्ला तुस्सा जो लिखणी चाही, पर हांऊ कागज़ होर स्याही किन्हें नी लिखणा चाहन्दा; पर उम्मीद ई कि मां तुस्सा वाले आऊणां, होर आम्हणे साम्हणें हुई किन्हें गलबात करणी: जेस ले तुस्सा री खुसी पूरी हो। **13** तेरी चुणी री बैहणी रे बाल बच्चे तुजो नमस्कार बोल्हा ऐ।

3 यूहन्ना

1 ¹ प्राचीन यहून्ना री तरफा ले प्यारे दोस्त, गयुसा रे नांऊ जेस जो हांऊ सच्चा प्यार करहा। ² हे प्यारे दोस्त, मेरी ये अरज ई कि जिहां तू आत्मिक बढ़ोतरी करेया करहा, तिहां ई तू सभ गल्ला मन्झ भी बढे, होर भला चंगा रहे। ³ क्यूंकि जेबे भाईये आई किन्हे, तेरे तेस सच्चाई री गुआही दिती, मतलब जेस पर तू सच्चे चल्या करहा, ता हांऊ बौहत खुस हुएया। ⁴ मुंजो एता ले बढी किन्हें होर कोई खुसी नी ई, कि हांऊ सुणु, कि मेरे बच्चे सच्चाई मन्झ चल्या करहा ऐ। ⁵ हे प्यारे दोस्त, जो कुछ तू तिन्हा भाईया री भलाई रे कठे करहा, तेता जो तू बडे विस्वासा किन्हें करेया करहा, जेबकी स्यों लोक तुस्सा रे कठे परदेसी ऐ। ⁶ तिन्हे मंडली रे साम्हणे तेरे प्यारा री गुआही दिती; अगर तू तिन्हा जो तिहां विदा करघा जिहां परमेसरा रे लोका रे कठे ठीक आ, ता खरा हुणा। ⁷ क्यूंकि स्यों तेस नांऊआ रे कठे निकळी रे, होर दूजी जातिया ले कुछ नी लैंदे। ⁸ इधी कठे एहडे लोका रा स्वागत करणा चाहिए, जेस ले आस्से भी सच्चाई रे प्रति सहकर्मि हुई सके। ⁹ मैं मंडली जो कुछ लिखीरा था; पर दियुत्रिफेसा जो, जो तिन्हा मन्झ बडा बणना चाहां, आस्सा री

नी मन्झदा। ¹⁰ इधी कठे जेबे मां आऊणा, ता तेसरे कामा री जो से करेया करहा याद दिलाणी, कि से आस्सा रे बारे मन्झ बुरी बुरी गल्ला बक्हा, होर इन्हा गल्ला ले भी तेस जो तसल्ली नी ई, से आपु ता भाईया जो स्वीकार नी करदा होर जो स्वीकार करणा चाहें, तिन्हा जो नाह करहा; होर मंडली ले काहडी देहां। ¹¹ हे प्यारे दोस्त, बुराई रे कठे नी, पर भलाई रे पीछे चलणे वाळे बणा, जो भलाई करहा, से परमेसरा री तरफा ले आ; पर जो बुराई करहा, तिने परमेसरा जो नी देखीरा। ¹² देमेत्रियुसा रे बारे मन्झ सभी ऐ बल्कि सच्चाईये भी आप्पुए गुआही दिती; होर आस्से भी गुआही देहां ऐ, होर तू जाणहां, कि आस्सा री गुआही सच्ची ई। ¹³ मैं तुजो बौहत कुछ लिखणा चाहां; पर स्याही होर कलमा ले नी लिखणा चाहन्दा। ¹⁴ पर मुंजो आस ई कि तेरे किन्हें जल्दी मुलाकात हुणी; तेबे आस्सा आहमणे साम्हणे गलबात करणी; तुजो सांति मिल्दी रहे। ¹⁵ एथी रे सभ दोस्त तुजो नमस्कार बोल्हा ऐ, तेथी रे दोस्ता जो नांऊ लई लई किन्हें आस्सा रा नमस्कार बोली देआ।

यहूदा

1 यहूदा री तरफा ले जेहड़ा यीसू मसीहा रा दास होर याकुबा रा भाई आ, तिन्हा लोका रे नांऊ जो परमेसर पिता रे प्यारे होर यीसू मसीहा रे कठे सुरक्षित ऐ, होर परमेसरा रे ज़ीये सादिरे। 2 तुस्सा जो दया होर सांति होर प्यार बौहत मिलदा रहे। 3 प्यारेओ, जेबे हांऊ तेस उद्दारा रे बारे मन्झ लिखणे मन्झ बौहत मेहनता किन्हें कोसिस करेया करहा था, तेता मन्झ आस्से सभ सैहभागी ऐ; ता में तुस्सा जो ये समझाणा जरूरी समझेया कि तेस विस्वासा रे कठे पूरा यत्न करा जेहड़ा पवित्र लोका रे कठे एक बारी ही सौम्पिरा हुहां। 4 क्यूंकि कितने ऐहड़े माहणु ऐ जेहड़े चुप छाप आसा मन्झ आई मिलिरे, इन्हा लोका री सजा रे बारे मन्झ साख्रिये ये पुराणे टैमा मन्झ पैहले ले ही भविष्यवाणी लिखी दितिरी थी: ये लोक भक्तिहीन ऐ, होर आस्सा रे परमेसरा रे अनुग्रहा जो लुचपना मन्झ बदली देंहा, होर ये आस्सा रे अद्वैत स्वामी होर प्रभु यीसू मसीहा रा इनकार करहा ऐं। 5 पर अगर तुस्से सभ गल्ला एक बारी जाणी चुकिरे, तेबे बी हांऊ इस गल्ला री सुधि दिलाणा चाहं, कि प्रभुए एक कुला जो मिस्र देसा ले छुड़ाणे ले बाद विस्वास नी करणे वाळेया जो नास करी दितेया। 6 हांऊ तुस्सा जो ये भी याद दिलाणा चाहं कि जो फरिस्ते आपणे प्रभुसत्ता जो बणाई नी रखी सके, पर आपणे निवास स्थाना जो भी, तेस भयंकर ध्याड़े रे न्याय रे कठे न्याहरापन जो हमेसा रे कठे आ, बंधना मंझा रक्खीरे। 7 इहां ई हांऊ ये याद दिलाणा चाहं कि सदोम होर अमोरा होर ओरले परले नगरा वाळे भी इन्हा दूता साहीं पराये सरीरा रे पीछे हुई गयीरे थे होर कधी नी बुझणे वाळी आगा मन्झ इन्हा जो पाई किन्हें सजा दीती। ये आस्सा रे कठे दृष्टान्त बणी गए। 8 ठीक इहां ई ये स्वप्नदर्सी भी आपणे आपणे सरीरा जो अशुद्ध करहा ऐं, होर प्रभुता जो बेकार जाणहां ऐं; होर बड़े अधिकारिया जो बुरा भला बोल्हा ऐ। 9 पर प्रधान स्वर्गदूत मीकाईले, जेबे जे सैताने मूसा री ल्हासा रे बारे मन्झ बैहस किती थी, ता तेस जो बुरा भला बोली किन्हें दोष लगाणे री हिम्मत नी किती; पर ये बोलेया, कि प्रभु तुजो झिडके। 10 पर ये लोक जिन्हा गल्ला जो नी जाणदे, तिन्हा जो बुरा भला बोल्हा ऐ; पर होर ये लोक गुआर डांगरे साहीं जिन्हा गल्ला ले सहज रूपा ले परिचित ऐ, तिन्हा मन्झ आपणे आपा जो नास करहा ऐ। 11 तिन्हा पर हाय! कि जो कैना साहीं चाल

चले, होर मजदूरी रे कठे बिलामा साहीं भृष्ट हुई गयीरे: होर कोरहा साहीं विरोध करी किन्हें नास हुई गये। 12 ये तुस्सा री प्यार-सभा मन्झ तुस्सा साउगी खाहें पीहांऐ, दराऊवा मन्झ लुखिरी चट्टाना साहीं ऐ; होर बेधड़क आपणा ही पेट भरण वाळे रखवाले ऐ; स्यों बगैर पाणी रे बादल ऐ; जिन्हा जो बागर डूआई लई जाहां; पतझड़ा रे ऐहड़े डाळ ऐ जिन्हा मन्झ फल नी लगदे, जो दो बार मरी चुकिरे; होर जड़ा ले पठी गयीरे। 13 ये समुद्रा री भयानक लैहरा ई, जो आपणी लज्जापूर्ण कामा रा झाग उगल्दी रेंही: ये डांवाडोळ तारे ऐ, जिन्हारे कठे अनंत काला तक घोर न्याहरा रक्खीरा। 14 होर हनोके भी जो आदमा ले सातवीं पीढ़ी तक था, इन्हा रे बारे मन्झ ये भविष्यवाणी किती, कि देखा, प्रभु आपणे हज़ारों हज़ार स्वर्गदूता साउगी आया। 15 कि सभी रा न्याय करे, होर सभ भक्तिहीना जो तिन्हारे अभक्ति रे कामा रे बारे मन्झ, जो भक्तिहीन पापिये तेसरे विरोधा मन्झ बोलीरे; दोषी ठैहराये। 16 ये ता असंतुष्ट कुड़कुड़ाने वाळे, होर आपणी अभिलाषा रे मुताबक चलणे वाळे ऐ; होर स्यों फायदे रे कठे मुंह देखी बड़ाई करहा ऐं। 17 पर हे प्यारेओ, तुस्से तिन्हा गल्ला जो याद रक्खा; जो आस्सा रे प्रभु यीसू मसीह रे प्ररित पैहले बोली चुकिरे। 18 स्यों तुस्सा किन्हें बोल्हा ऐ थे, कि आखरी दिना मन्झ ऐहड़े मखौलिये हुणे, जिन्हा आपणी अभक्ति री अभिलाषा रे मुताबक चलणा। 19 ये ता स्यों ऐ, जो फूट पाहें; ये संसारा रे लोक ऐ, जिन्हा मन्झ आत्मा नी ई। 20 पर हे प्यारेओ, तुस्से आपणे पवित्र विस्वासा मन्झ आपणी तरक्की करदे हुए होर पवित्र आत्मा मन्झ करदे हुए। 21 आपणे आपा जो परमेसरा रे प्यारा मन्झ बणाये रक्खा; होर अनंत जिन्दगी रे कठे आस्सा रे प्रभु यीसू मसीह री दया री आशा देखदे रैहया। 22 होर स्यों जे संका मन्झ ऐ तिन्हा पर दया करा। 23 होर बौहत लोका जो झपटी किन्हें आगा मंझा ले काहड़ा, होर बौहत लोका पर डरदे हुए दया करा; बल्कि तेस कपड़े ले भी घृणा करा जो सरीरा री वजहा ले कलंकित हुई गईरा। 24 एबे जो तुस्सा जो ठोकर खाणे ले बचाई सक्कहा, होर आपणी महिमा री भरपूरी रे साम्हणे मगन होर निर्दोष प्रस्तूत करी किन्हें खड़ा करी सकहा। 25 तेस अद्वैत परमेसर आस्सा रे मुक्तिदाता री बड़ाई, होर गौरव, होर पराक्रम होर हक, आस्सा रे प्रभु यीसू मसीह रे ज़ीये जेहड़ा सनातन काला ले आ, एबे भी हो होर जुग जुग रहे। आमीन।

प्रकाशित वाक्य

1¹ यीसू मसीहा रा प्रकाशितवाक्य जो तेस जो परमेसरे इधी कठे दितेया, कि आपणे दासा जो स्यों गल्ला, जिन्हा रा रा जल्दी हुणा जरूरी आ, दस्सी दे, होर तिने आपणे स्वर्गदूता जो भेजी किन्हें तेसरे ज्रीए आपणे दास यहुन्ना जो दस्या।² जिने जे परमेसरा रा वचन होर यीसू मसीह री गुआही, यानि जो कुछ तिने देख्या था तेसरी गुआही दिती।³ भागा वाळा आ से, जो एस भविष्यवाणी रे वचना जो पढहा, होर स्यों जो सुणहां ऐं होर एता मन्झ लिखिरी गल्ला जो मन्हां ऐं, क्युंकि टैम नेडे आई गईरा।⁴ यहुन्ना री तरफा ले आसिया री सात कलीसिया रे नाऊं; तेसरी तरफा ले जो हाया, होर जो था, होर जो आऊणे वाळा आ; होर तिन्हा सात आत्मा री तरफा ले, जो तेसरी राजगद्दी रे साम्हणे ई।⁵ होर यीसू मसीहा री तरफा ले, जो भरोसे रे लायक गुआह, होर मरीरे मंझा ले सभी ले पैहले जीउंदा हुणे वाळा, होर धरती रे राजे रा हाकम आ, तुस्सा जो दया होर सांति मिल्दी रैहे, होर जो आस्सा किन्हें प्यार रख्हा, होर जिने आपणे खुना रे ज्रीए आस्सा जो पापा ले छुडाया।⁶ होर आस्सा जो एक राज होर आपणे पिता परमेसरा रे कठे याजक भी बणाई दितेया; तेसरी महिमा होर सामर्थ जुग जुग हुन्दी रैहे। आमीन।⁷ देखा, से बादला साउगी आऊणे वाळा आ; होर हर एक हाखिया से देखणा, बल्कि जिन्हें जे से मारी रा था, तिन्हा भी से देखणा, होर धरती रे सारे कुला तेसरी वजहा ले छाती पिटणी, हां, आमीन।⁸ प्रभु परमेसर, से जे हाया, होर जो था, होर जो आऊणे वाळा आ; जो सर्वसक्तिमान आ, से ये बोल्हा, कि आदि होर अंत हांऊ आ।⁹ हांऊ यहुन्ना जो तुस्सा रा भाई, होर यीसू रे दुःखा, होर राज होर धीरजा मन्झ तुस्सा रा भागीदार आ, परमेसरा रे वचन, होर यीसू री गुआही री वजहा पतमुस नांऊं रे टापू मन्झ था।¹⁰ कि हांऊ प्रभु रे ध्याडे आत्मा मन्झ आई गया, होर मैं आपणे पीछे तुरही रे बाजे साहीं बड़ी भारी अवाज ये बोल्दे हुए सुणी।¹¹ कि जो कुछ तू देख्हा, तेस जो काबा मन्झ लिखी किन्हें सात कलीसिया वाले भेजी दे, यानि इफिसुस होर स्मुरना, होर पिरगमुन होर थुआतिरा, होर सरदीस, होर फिलेदेलफिया, होर लौदिकिया मन्झ।¹² होर हांऊ तेस जो, जो मेरे किन्हें बोल्या करहा था; देखणे रे कठे आपणा मुंह फेरेया; होर पीछे घूमी किन्हें मैं सोने री सात दीपदान देखी।¹³ होर तिन्हा दीपदाना रे बीचा मन्झ माहणु रे पुत्रा साहीं एक आदमी जो देख्या, जिने जे पैरा तक कपडे पैहनी रे थे, होर छाती पर सोने रा पट्टा बान्हीरे था।¹⁴ तेसरा मूंड होर तेसरे बाळ ऊना साहीं चिटे, होर बर्फा साहीं

चमकदार थे; होर तेसरी हाखिया आगा साहीं भख्या करहा ई थी।¹⁵ होर तेसरे पैर खरे कांसे साहीं थे, स्यों एहडे लग्हा ऐ थे, जिन्हा जो ताजी भठी मन्झ त्पाया गईरा हो, ¹⁶ होर तेसरे दायें हाथा मन्झ सात तारे थे, होर तेसरे मुंहा ले एक तेज दोधारी तलवार बाहर निकळेया करहा ई थी; होर तेसरा मुंह एहडा चमक्या करहा था; जेहडा सूरज भरी धूपा रे टैमा मन्झ चमक्हा।¹⁷ होर जेबे में से देख्या, ता हांऊ तेसरे पैरा पर मुरदे साहीं पई गया होर तिने मुंजो पर आपणा दायौ हाथ रखी किन्हें ये बोल्या, कि डर मत; हांऊ पैहला होर आखरी होर जीउंदा आ।¹⁸ हांऊ मरी गईरा था, होर एबे देख; हांऊ जुग जुग जीउंदा आ, होर मौत होर अधोलोका री चाबीया मेरे वाले ई।¹⁹ इधी कठे जो कुछ तैं देख्या होर जो कुछ घट्टया करहा; होर जो कुछ एता ले बाद हुणे वाळा आ, तिन्हा सभी जो लिखी ले।²⁰ यानि तिन्हा सात तारे रा भेद जिन्हा जो तैं मेरे दायें हाथा मन्झ देख्या था, होर तिन्हा सात सोने रे दीपदाना रा भेद; स्यों सात तारे, सात कलीसिया रे दूत ऐ, होर स्यों सात दीपदान, सात कलीसिया ई।

2¹ इफिसुसा री कलीसिया रे दूता जो ये लिख, कि, जिने जे सात तारे आपणे हाथा मन्झ लईरे होर जो सोने रे सात दीपदाना मन्झ चल्हा फिरहा, से ये बोल्हा कि² हांऊ तेरे कामा, होर मैहनता, होर तेरे सब्रा जो जाणहां; होर ये भी, कि तू बुरे लोका जो ता देखी नी सकदा; होर जो आपणे आपा जो प्रेरित बोल्हा ऐ, होर हाए नी, तिन्हा जो तैं परखी किन्हें झूठा पाया।³ होर तू सबर करहा, होर मेरे नांऊं रे कठे दुःख उठांदे उठांदे नी थके।⁴ पर हांऊ तेरे खलाफ ये बोलणा चाहं, कि तैं आपणा पैहले साहीं प्यार छाडी दितिरा।⁵ इधी कठे याद कर, कि तू केथी ले गिरी चुकिरा, होर मन फेर होर पैहले साहीं काम कर; होर अगर तैं मन नी फेरया, ता मां तेरे वाले आई किन्हें तेरे दीपदान तेस जगहा ले हटाई देणा।⁶ पर हां, तेरे मन्झ ये गल ता जरूर ई, कि तू निकुलइया री सिक्षा ले बैर करहा, जिन्हा ले हांऊ भी बैर करहा।⁷ जेसरे कान हो, से सुणी ले कि आत्मा कलीसिया किन्हें क्या बोल्हा; जो जीत पाई ले, तेस जो मां जीन्दगी रे डाळा मंझा ले जो परमेसरा रे स्वर्ग लोका मंझा आ, फल खाणे जो देणा।⁸ होर स्मुरना री कलीसिया रे दूता जो ये लिख, कि जो आदि होर अंत आ, जो मरी गईरा था होर एबे जीउंदा हुई गईरा, से ये बोल्हा कि।⁹ हांऊ तेरे दुःखा होर कंगाली जो जाणहां; पर तू अमीर आ, होर तिन्हा री ईश निंदा भी जाणहां जो लोक आपणे आपा जो यहूदी बोल्हा ऐ, पर

स्यों नी हाए, पर सैताना री मंडली ई; ¹⁰ जो दुःख तुध सैहणे, तिन्हा ले मत डर; क्यूंकि देखा, सैतान तुस्सा मंझा ले कितने जो जेहला मन्झ पाणे वाळा आ, ताकि तुस्से परखे जाओ; होर तुस्सा जो दस ध्याडे तक दुःख उठाणा पऊणा; प्राण देणे तक विश्वासी रह, तेबे मां तुजो जिन्दगी रा ताज देणा । ¹¹ जेसरे कान हो, से सुणी ले कि आत्मा कलीसिया किन्हें क्या बोल्हा; जो जीत पाए, तेस जो दूजी मौता ले नुकसान नी पूजणा । ¹² होर पिरगमुना री कलीसिया रे दूता जो ये लिख, कि, जेस वाले दोधारी होर तेज तलवार आ, से ये बोल्हा, कि । ¹³ हांऊ ऐ ता जाणहां, कि तू तेथी रेंहया जेथी जे सैताना रा गढ आ, होर मेरे नांऊआं जो थाम्हिरा; होर मेरे पर विस्वास करणे ले तिन्हा ध्याडे भी पीछे नी हटेया, जिन्हा मन्झ मेरे भरोसे रे लायक गुआह अन्तिपासा जो मारी दितेया था, तुस्सा रे तेस नगरा मन्झ जेथी जे सैताना रा वास आ । ¹⁴ पर मुंजो तेरे खलाफ कुछ गल्ला बोलणी, क्यूंकि तेरे एथी कितने एहडे ऐ, जो बिलामा री शिक्षा जो मन्हां ऐ, जिने जे बालाका जो इस्नाएलिया रे अगे ठोकरा रा कारण रखणा सिखाया, कि स्यों मूर्ति रे बलिदान जो खाए, होर व्यभिचार करे । ¹⁵ तिहां ई तेरे एथी कितने ता एहडे ऐ, जो निकुलइया री शिक्षा जो मन्हां ऐं । ¹⁶ इधी कठे मन फेरा, नी ता मां तेरे वाले जल्दी आई किन्हें, आपणे मुंहा री तलवारा किन्हें तिन्हा किन्हें लडना । ¹⁷ जेसरे कान हो, से सुणी ले कि आत्मा कलीसिया किन्हें क्या बोल्हा, जो जीत पाए, तेस जो मां गुप्त मन्ने मंझा ले देणा, होर तेस जो एक चिटा पाथर भी देणा; होर तेस पात्थरा पर एक नांऊ लिखीरा हुणा, जेस जो तेसरे पाणे वाळे रे अलावा होर केसिया नी जाणना । ¹⁸ होर थुआतिरा री कलीसिया रे दूता जो ये लिख, कि परमेसरा रा पुत्र जेस री हाखिया आगी री ज्वाला साहीं ई, होर जेसरे पैर खरे पितला साहीं ऐं, ये बोल्हा, कि । ¹⁹ हांऊ तेरे कामा, होर प्यार, होर विस्वास, होर सेउआ, होर सबरा जो जाणहां, होर ये भी कि तेरे पिछले काम पैहले ले बढी किन्हें ऐ । ²⁰ पर हांऊ तेरे खलाफ ये बोलणा चाहां, कि तू तेस जनाने ईजेबेला जो रैहणे देहां, जो आपणे आपा जो नबण बोल्हा ई, होर मेरे दासा जो व्यभिचार करणे, होर मूर्ति रे अगे बलिदान कितिरे चढावे जो खाणे रे कठे प्रेरित करहा ई । ²¹ मैं तेस्सा जो मन फिराणे रा मौका दितेया, पर से आपणे व्यभिचारा ले मन फिराणा नी चाहन्दी । ²² देखा, हांऊ तेस्सा जो रोगा रे बिद्योने पर रखणे जाया करहा; होर जो तेस्सा साउगी व्यभिचार करहा ऐ, अगर स्यों भी तेस्सा साहीं कामा ले मन नी फेर्हगे ता स्यों भी बडे दुःखा मन्झ पाई देणे । ²³ होर मां तेस्सा रे बच्चे मारी देणे; होर तेबे सभी कलीसिया जाणी लैणा कि दिला होर मना रा परखणे वाळा हांऊ ई हाया; होर मां तुस्सा मंझा ले हर एकी जो तेसरे कामा रे मुताबक फल देणा । ²⁴ पर तुस्से थुआतिरा रे बाकी

लोका किन्हें, जितने एस्सा शिक्षा जो नी मन्ने, होर तिन्हा गल्ला जो, जिन्हा जो सैताना री गैहरी गल्ला बोल्हा ऐ, नी जाणदे, ये बोल्हा, कि मां तुस्सा पर होर ज्यादा बोझ नी पाणा । ²⁵ पर हां, जो तुस्सा वाले हाया तेस जो मेरे आऊणे तक थाम्ही रखा । ²⁶ जो जीत हासल करे, होर मेरे कामा जो आखरी तक करदा रहें, मां तेस जो जाति जाति रे लोका पर हक देणा । ²⁷ होर तेस लोहे रा राजदंड लई किन्हें तिन्हा पर राज करणा, जिहां कुम्हारा रे माटे रे भांडे चूर चूर हुई जाहें, तिहां मैं भी आपणे पिता ले हक पाईरा । ²⁸ होर मां तेस जो तडके रा तारा देणा । ²⁹ जेसरे कान हो, से सुणी ले कि आत्मा कलीसिया किन्हें क्या बोल्हा ।

3 ¹ होर सरदीसा री कलीसिया रे दूता जो लिख, कि, जेस वाले परमेसरा री सात आत्मा ई होर सात तारे ऐ, ये बोल्हा, कि हांऊ तेरे कामा जो जाणहां, लोक बोल्हा ऐं, कि तू जीउंदा आ, पर हाया मरीरा । ² जागदे रहा, होर तिन्हा चीजा जो, जो बाकि रही गईरी, होर जो मिटणे वाळी ई, तिन्हा जो मजबूत करा, क्यूंकि मैं तेरे केसी भी कामा जो आपणे परमेसरा रे नेडे पूरा नी पाया । ³ इधी कठे याद कर, कि तैं किहाँ शिक्षा पाई, होर सुणी, होर तेता मन्झ बणी रेंहया, होर मन फेर, होर अगर तूध सावधान नी रेंहणां, ता मां चोरा साहीं आई जाणा होर तुजो कधी पता नी चलणा, कि मां केस टैम तेरे पर आई जाणा । ⁴ पर हां, सरदीसा मन्झ तेरे एथी कुछ एहडे लोक ऐ, जिन्हें आपणे कपडे गंदे नी किते, तिन्हा चिटे कपडे पैहनी किन्हें मेरे साउगी घूमणा क्यूंकि स्यों एस लायक ऐ । ⁵ जो जीत हासल करे, तेस जो इहां ई चिटे कपडे प्न्ह्याणे, होर मां तेसरा नांऊ जिन्दगी री काबा मन्झा ले कधी भी नी काटणा, पर तेसरा नांऊ आपणे पिता होर तेसरे स्वर्गदूता रे साम्हणे मनी लैणा । ⁶ जेसरे कान हो, से सुणी ले कि आत्मा कलीसिया किन्हें क्या बोल्हा । ⁷ होर फिलेदेलफिया री कलीसिया रे दूता जो ये लिख, कि, जो पवित्र होर सच्चा आ, होर जो दाऊदा री चाबी रख्हा, जेसरे खोलिहरे जो कोई बंद नी करी सकदा होर बंद कितिरे जो कोई खोल्ही नी सकदा, से ये बोल्हा, कि । ⁸ हांऊ तेरे कामा जो जाणहां, देखा, मैं तेरे साम्हणे एक दरवाजा खोल्ही किन्हें रखिरा, जेस जो कोई बंद नी करी सकदा, कि तेरी ⁸ सक्ति थोहड़ी ई, होर तैं मेरे वचना रा पालन कितिरे होर मेरे नांऊआं रा इन्कार नी कितेया । ⁹ देखा, मां सैताना रे तिन्हा सभा वाळे जो तेरे बसा मन्झ करी देणा, जो यहूदी बणी बैठीरे, पर हाये नी ऐ, पर झूठ बोल्हा ऐ, देखा, मां एहडा करणा, कि तिन्हा आई किन्हें तेरे पैरा पई जाणा, होर तिन्हा ये जाणी लैणा, कि मैं तेरे किन्हें प्यार रखिरा । ¹⁰ तैं मेरे सबरा रे वचना जो थिमिहिरा, इधी कठे मां भी तू परीक्षा रे टैमा बचाई रखणा, जो धरती रे रैहणे वाळेया पर तिन्हा जो परखणे रे कठे सारे संसारा पर

आऊणे वाळी ई।¹¹ हांऊ जल्दी आया करहा; जो कुछ तेरे वाले आ, तेता जो पकड़ी रख, कि कोई तेरा ताज नी छिनी ले।¹² जो जीत हासल करे, से मां आपणे परमेसरा रे मंदरा मन्झ एक खम्भा बणाणा; होर तेस फेरी कधी बाहर नी निकळणा; होर मां आपणे परमेसरा रा नांऊ, होर आपणे परमेसरा रे नगर, यानि नंऊए यरुस्लेमा रा नांऊ, जो मेरे परमेसरा री तरफा ले स्वर्गा ले उतरणे वाळा आ, होर तेस पर मां आपणा नंऊआं नांऊ लिखणा।¹³ जेसरे कान हो, से सुणी ले कि आत्मा कलीसिया किन्हें क्या बोल्हा।¹⁴ होर लौदिकिया री कलीसिया रे दूता जो ये लिख, कि जो आमीन होर भरोसे रे लायक, होर सच्चा गुआह आ, होर परमेसरा री रचना री मूल वजहा ई, से ये बोल्हा।¹⁵ कि हांऊ तेरे कामा जो जाणहां कि तू ना ता ठंडा आ होर ना गर्म; खरा हुंदा कि तू ठंडा या गर्म हुंदा।¹⁶ इधी कठे कि तू गुणगुणा आ, होर ना ठंडा आ होर ना गर्म, हांऊ तुजो आपणे मुंहा ले उगळणे वाळा आ।¹⁷ तू जो बोल्हा, कि हांऊ धनवान आ, होर धनवान हुई गईरा, होर मुंजो केसी गल्ला री कमी नी ई, होर ये नी जाणदा, कि तू अभागा होर तूछ होर कंगाल होर काणा, होर नांगा आ।¹⁸ इधी कठे हांऊ तुजो स्वाह देहां, कि आगी मन्झ त्पाईरा सोना मेरे ले मुले लई ले, कि तू धनवान हुई जाए; होर चिटे कपडे लई ले ताकि तू पैहनी किन्हें आपणे नांगेपना ले शर्मिंदा ना हो; होर आपणी हाखी मन्झ लगाणे रे कठे सुरमा लई ले, कि तू देखदा लगे।¹⁹ हांऊ जिन्हा जो प्यार करहा, तिन्हा सभी जो डांटहा होर ताडना देहां, इधी कठे सरगर्म हो, होर पश्चाताप कर।²⁰ देखा, हांऊ दरवाजे वाले खड्डी किन्हें खटखटाया करहा; अगर कोई मेरी अवाज सुणी किन्हें दरवाजा खोलहगा, ता मां तेस वाले अन्दर आई किन्हें खाणा खाणा, होर तेस मेरे साउगी।²¹ जो जीत हासल करे, मां से आपणे साउगी राजगद्दी पर बठ्याळणा, जिहां हांऊ भी जीत हासल करी किन्हें आपणे पिता साउगी तेसरी राजगद्दी पर बैठी गया।²² जेसरे कान ऐ, से सुणी ले कि आत्मा कलीसिया किन्हें क्या बोल्हा।

4¹ इन्हा गल्ला ले बाद जो मैं देख्या, ता क्या देख्या, कि स्वर्गा मन्झ एक दरवाजा खुल्हीरा; होर तुरही रे बाजे साहीं जो पैहली अवाज, मैं पैहले सुणी थी, मेरे किन्हें बोल्या करहा ई थी, कि ऊपर आई जा; होर मां तुजो स्यों गल्ला दसणी, जिन्हा रा इन्हा गल्ला ले बाद पूरा हुणा जरूरी आ।² होर झटपट हांऊ आत्मा मन्झ आई गया; होर क्या देख्हा, कि स्वर्गा मन्झ एक राजगद्दी रखी री थी, होर तेस राजगद्दी पर कोई बैठिरा था।³ होर जो तेस राजगद्दी पर बैठीरा था, से यशव होर माणिका साहीं सुद्धा था, होर तेस राजगद्दी रे चारो तरफ एक धनुष था जो पन्ने साहीं चम्केया करहा था।⁴ होर तेस्सा राजगद्दी रे चारो तरफ होर चौबी राजगद्दीया ई; होर इन्हा

राजगद्दीया पर चौबी प्राचीन चिटे कपडे पैहनी किन्हें बैठिरे थे, होर तिन्हा रे मुंडा पर सोने रा ताज आ।⁵ होर तेस्सा राजगद्दीया मंझा ले बिजलिया री चकाचौंध होर बादला री गडगडाहट हुएया करहा ई थी, होर राजगद्दी रे साम्हणे आगी रे सात दीये भख्या करहा ऐ थे; जो परमेसरा री सात आत्मा ई।⁶ होर तेस्सा राजगद्दी रे साम्हणे बिल्लौरा साहीं सीसे रा समुद्र आ, होर राजगद्दी रे बीचा मन्झ होर राजगद्दी रे चारो पासे चार प्राणी ऐ, जिन्हा रे अगे पीछे हाखिया ई हाखिया ई।⁷ पैहला प्राणी सेरा साहीं था, होर दूजा प्राणी रा मुंह बछु साहीं था, होर त्रिजे प्राणी रा मुंह माहणु साहीं था, होर चौथे प्राणी रा मुंह उडदे हुए उकाबा साहीं था।⁸ होर चारो प्राणिया रे छेह छेह फान्ख थे, होर चारो पासे, होर अन्दर हाखिया ई हाखिया; होर स्यों राती ध्याडी बगैर आराम किते ये बोल्दी रहें, कि पवित्र, पवित्र, पवित्र प्रभु परमेसर, सर्वसक्तिमान, जो था, होर जो हाया, होर जो आऊणे वाळा आ।⁹ होर जेबे जेबे ये प्राणी तेसरी, जो राजगद्दी पर बैठिरा था, होर जो जुग जुग जीऊन्दा आ, म्हीमा होर इज्जत होर धन्यावाद करहा ऐ।¹⁰ तेबे तेबे ये चौबी प्राचीन तेसरे पैरा पर पई किन्हें, होर तेसरी जो जुग जुग जीऊन्दा आ, अराधना करहा ऐ थे, होर स्यों राजगद्दी रे साम्हणे आपणा आपणा ताज रखी देहां ऐं होर बोल्हा ऐ; ¹¹ कि आस्सा रे प्रभु, होर परमेसर, तू ई म्हीमा, होर इज्जत, होर सामर्था रे लायक ऐ; क्यूंकि तुस्से ई सभ चीजा बणाई होर स्यों तेरी ई इच्छा ले थी, होर रची गईरी।

5¹ होर जो राजगद्दी पर बैठिरा था, मैं तेसरे दायें हाथा मन्झ एक काब देखी, जो अंदर बाहर लिखरी थी, होर से सात मोहर लगाई किन्हें बंद करी दितिरा था।² फेरी मैं एक स्वर्गदूता जो देख्या जो ऊची अवाजा मन्झ प्रचार करेया करहा था, कि एस काबा जो खोलहणे होर तेसरी मोहरे तोडने रे कठे कुणहां हा? ³ होर ना स्वर्गा मन्झ, ना धरती पर, होर ना पताळ लोका मन्झ कोई तेस्सा काबा जो खोलहणे, या पढने रे लायक मिलेया।⁴ होर हांऊ फूटी फूटी किन्हें रोंदा लगेया, क्यूंकि तेस्सा काबा जो खोलणे, या तेता पर नजर पाणे रे लायक कोई नी मिलेया।⁵ तेबे तिन्हा प्राचीना मंझा ले एकी जणे मेरे किन्हें बोल्या, मत रो; देखा, यहूदा रे गोत्रा रा से शेर, जो दाऊदा रा मूल आ, तेस्सा काबा जो खोलणे होर तेसरी सात मोहरा जो तोडने रे कठे लायक हुई गईरा।⁶ होर मैं तेस्सा राजगद्दी होर चारो प्राणिया होर तिन्हा प्राचीना रे बीचा मन्झ, एक मेमने जो खहड़ी रे देख्या, से एहडा सुद्धा करहा था, कि जिहां तेसरी बलि चढाई दितरी हो, तेसरे सात सींग होर सात हाखिया थी; ये परमेसरा री सात आत्मा ई, जो सारी धरती पर भेजी गईरी।⁷ तिने आई किन्हें तेसरे दाहिने हाथा ले जो राजगद्दी पर बैठिरा था, से काब लई ली।⁸ होर जेबे तिने काब लई ली, ता स्यों

चारो प्राणी होर चौबीस प्राचीन तेस मेमने रे साम्हणे पई गये; होर हर एकी रे हाथा मन्झ वीणा होर धूपा किन्हें भहरी रे सोने रे कटोरे थे, ये ता पवित्र लोका री प्रार्थना ई।⁹ होर स्यों ये नऊआं गाणा गान्दे लगे, कि तू एस क्ताबा जो लेणे, होर तेसरी मोहरा खोलणे रे लायक आ; क्यूंकि तैं बलि हुई किन्हें आपणे खूना ले हर एक कुल, होर भाषा, होर लोक, होर हर जाति मंझा ले परमेसरा रे कठे लोका जो मुल्ले लई लया।¹⁰ होर तिन्हा जो आस्सा रे परमेसरा रे कठे एक राज होर याजक बनाया; होर स्यों धरती पर राज करहा ऐ।¹¹ होर जेबे में देख्या, ता तेस्सा राजगद्दी होर तिन्हा प्राणिया होर तिन्हा प्राचीना रे चारो तरफ बौहत सारे स्वर्गदूता री अवाज सुणी, जिन्हा री गिणती लाखा करोडा री थी।¹² होर स्यों उच्चै अवाजा मन्झ बोल्हा ऐ थे, कि बलि कितिरा मेमना ई सामर्थ होर धन होर ज्ञान होर सक्ति होर आदर होर म्हीमा होर धन्यवाद रे लायक आ।¹³ फेरी में सभ रची गईरी चीजा जो, जो स्वर्गा मन्झ, होर धरती पर, होर धरती रे हेठ समुद्रा मन्झ ऐ, ये बोल्दे सुणेया, कि जो राजगद्दी पर बैठिरा, तेसरा होर मेमने रा धन्यावाद, होर आदर होर म्हीमा होर राज जुग जुग रहे।¹⁴ होर चारो प्राणिये आमीन बोल्या, होर प्राचीने नत मस्तक हुई किन्हें तेसरी आराधना किति।

6¹ फेरी में देख्या, कि मेमने तिन्हा सात मोहरा मन्झा ले एक मोहर खोल्ही; होर तिन्हा चारो प्राणीया मंझा ले एकी जो बादला री गर्जना साहीं अवाज करदे सुणेया, आ।² होर में देख्या, होर देखा, एक चीटा घोडा आ, होर तेसरे सुआरे धनुष लईरा रखीरा था; होर तेस जो एक ताज दितेया, होर से जै जै कार करदा हुआ निकळेया कि होर भी जीत हासल करे।³ होर जेबे तिने दूजी मोहर खोल्ही, ता मैं दूजे प्राणी जो ये बोल्दे सुणेया, कि आऊ।⁴ फेरी एक होर घोडा निकळेया, जो लाल रंगा रा था; तेसरे सुआरा जो ये हक दितेया, कि धरती प्रयाहले ले मेल मिलापा जो चकी ले, ताकि लोक एक दूजे जो मारी दे; होर तेस जो एक बडी तलवार देई दिती।⁵ होर जेबे तिने त्रीजी मोहर खोल्ही, ता मैं त्रीजे प्राणी जो ये बोल्दे सुणेया, कि आऊ, होर मैं देख्या, होर देखा, एक काला घोडा आ; होर तेसरे सुआरा रे हाथा मन्झ एक त्राक्की थी।⁶ होर मैं तिन्हा चारो प्राणीया रे बीचा मन्झ एक अवाज ये बोल्दे हुए सुणी, कि एक दिनारा रा सेर भर कणक, एक दिनारा रा तीन सेर जौ, पर तेल होर दाखरसा रा नुकसान मत करणा।⁷ होर जेबे तिने चौथी मोहर खोल्ही, ता मैं चौथे प्राणी जो ये बोल्दे सुणेया, कि आऊ।⁸ होर मैं देख्या, होर देखा, एक पिऊळा जे घोडा आ; होर तेसरे सुआरा रा नांऊ मौत ई, होर अधोलोक तेसरे पीछे पीछे ऐ, होर तिन्हा जो धरती री एक चौथाई पर ये हक दितेया, कि तलवार, होर अकाल होर मरी होर धरती रे जंगली जानवरा रे ज़ीए लोका

जो मारी दे।⁹ होर जेबे तिने पाहंज्वी मोहर खोल्ही, ता मैं वेदी रे हेठ तिन्हारे प्राण देखे, जो परमेसरा रे वचना री वजहा ले, होर तेस्सा गुआही री वजहा ले, जो तिन्हे दिती थी, मारी दितेरे थे।¹⁰ होर तिन्हे बड़े जोरा किन्हें चिल्लाई किन्हें बोल्या; हे माल्क, हे पवित्र होर सच्चे, तुध कधी तक फैसला नी करणा? होर धरती रे रैहणे वाळेया ले आस्सा रे खुना रा बदला कधी तक नी लैणा? ¹¹ होर तिन्हा मन्झा ले हर एकी जो चिटे कपड़े दिते, होर तिन्हा किन्हें बोल्या, कि होर थोड़ी देरा तक अराम करा, जेबे तक कि तुस्सा रे संगी दास, होर भाईया री गिणती पूरी नी हुई जाए, जो तुस्सा साहीं मारे जाणे वाळे ऐ, ¹² होर जेबे तिने छठ्ही मोहर खोल्ही, ता मैं देख्या, कि बौहत बडा हिलण हुआ; होर सुरज बाळा रे बणीरे कम्बला साहीं काळा, होर पूरा चांद खुना साहीं लाल हुई गया।¹³ होर सर्गा रे तारे धरती पर एहडे पई गये जिहां बड़ी तेज आंधी ले हिली किन्हें डाळा रे काचे फल पहुंचा ऐं।¹⁴ होर सर्ग एहडा हिली गया, जेहडा पात्र लपेटने ले सरकी जाहां; होर हर एक पाहड, होर टापू, आपणी आपणी जगहा ले हटी गये।¹⁵ होर धरती रे राजा, होर प्रधान होर मुखिए, होर धनवान होर सामर्थी लोक, होर हर एक दास, होर हर एक अजाद, पाहडा री खोहा मन्झ, होर चटाना मन्झ जाई किन्हें लुख्ही गये।¹⁶ होर पाहडा, होर चटाना ले बोल्दे लगे, कि आस्सा प्रयाहले पई जाओ; होर आस्से तेसरे मुंहा ले जो राजगद्दी पर बैठिरा होर मेमने रे गुस्से ले ढख्ही लऊआ।¹⁷ क्यूंकि तिन्हा रे गुस्से रा भयानक ध्याडा आई पुजीरा, एबे कुणहां रुकी सकहा?

7¹ एता ले बाद में धरती रे चारो कुणे पर चार स्वर्गदूत खहड़ीरे देखे, तिन्हे धरती री चारो पासे री हवा जो थाम्ही रखीरा था; ताकि धरती, या समुद्र, या केसी डाळा पर, हवा नी चले।² फेरी में एक होर स्वर्गदूता जो जीऊन्दे परमेसरा री मोहर लईरे पुरवा ले ऊपरा वखा जो आऊन्दे देख्या; तिने तिन्हा चारो स्वर्गदूता किन्हें जिन्हा जो धरती होर समुद्रा रा नुकसान करणे रा हक दितिरा था, उच्चै अवाजा मन्झ चिल्लाई किन्हें बोल्या।³ जेबे तक आस्से आपणे परमेसरा रे दासा रे माथे पर मोहर नी लगाई दे, तेबे तक धरती होर समुद्र होर डाळा रा नुकसान देख्या करदे।⁴ होर जिन्हा पर मोहर लगाईरी थी, मैं तिन्हा री गिणती सुणी, कि इस्राएला री सन्ताना रे सभ गोत्रा मन्झा ले एक लाख चत्वाळी हजार पर मोहर लगाई दिती।⁵ यहूदा रे गोत्रा मंझा ले बारा हजार पर मोहर लगाई दिती; रुबेना रे गोत्रा मंझा ले बारा हजार पर; गादा रे गोत्रा मंझा ले बारा हजार पर।⁶ आशेरा रे गोत्रा मंझा ले बारा हजार पर; मनस्से रे गोत्रा मंझा ले बारा झारा पर।⁷ समौना रे गोत्रा मंझा ले बारा झारा पर; लेवी रे गोत्रा मन्झा ले बारा हजार पर; इस्साकारा रे गोत्रा मंझा ले बारा हजार पर।

8 जबूलूना रे गोत्रा मंझा ले बारा हजारा पर; युसुफा रे गोत्रा मंझा ले बारा हजारा पर; होर बिन्यामिना रे गोत्रा मंझा ले बारा हजारा पर मोहर लाई। 9 एता ले बाद में देख्या कि मेरे साम्हणे एक बडी भीड़ खड़ी थी, जेसरी गिणती कोई नी करी सकदा था, एस भीड़ा मन्झ हर जाति रे, हर बंसा रे, हर कुला रे होर हर भाषा रे लोक थे; स्यों तेस राजगद्दी होर तेस मेमने रे साम्हणे खहड़ी रे थे, तिन्हे चिटे कपड़े पैहनी रे थे होर तिन्हे आपणे हाथा मन्झ खजरे री डाळिया लईरी थी। 10 होर स्यों चिल्लाया करहा ऐ थे, कि आस्सा रे उद्धारा रे कठे राजगद्दी पर बैठिरे आस्सा रे परमेसरा री जै हो, होर मेमने री जै जै कार हो। 11 होर सारे स्वर्गदूत, राजगद्दी, प्राचीना होर चारो प्राणिया रे चारो तरफ खहड़ी रे थे, फेरी स्यों राजगद्दी रे साम्हणे मुंहा रे भारे पई गये; होर परमेसरा जो दंडवत करी किन्हें बोल्या, आमीन। 12 आस्सा रे परमेसरा री स्तुति, होर म्हीमा होर ज्ञान होर धन्यावाद होर आदर होर सामर्थ होर सक्ति जुग जुग बणी रहे। आमीन। 13 एता पर प्राचीना मंझा ले एकीए मेरे किन्हें बोल्या; ये चिटे कपड़े धारण करणे वाळे कुणहें? होर केथी ले आईरे? 14 मैं तेस किन्हें बोल्या, हे स्वामी, तू आपुए जाणहां; तिने मेरे किन्हें बोल्या; ये स्यों ऐ, जो तेस बडे दुःखा मंझा ले निकळी किन्हें आईरे; इन्हें आपणे कपड़े मेमने रे खुना मन्झ धोई किन्हें चिटे कितिरे। 15 एता रे कठे स्यों परमेसरा री राजगद्दी रे साम्हणे ऐ, होर तेसरे मन्झा मन्झ राती ध्याडी तेसरी सेउआ करहा ऐ; होर जो राजगद्दी पर बैठिरा, तेस तिन्हा रे ऊपर आपणा तम्बू बनाणा। 16 तिन्हा फेरी भुख्हे होर सोखे नी हुणा; होर ना तिन्हा पर धूप ना कोई तपन हुणी। 17 क्यूंकि मेमना जो राजगद्दी रे बीचा मन्झ आ, तेस तिन्हा री देखभाळ करणी; होर तेस स्यों जिन्दगी देणे वाळे पाणी रे झरने वाले लई जाणे, होर परमेसरा तिन्हा री हाखिया ले सभ आंसू पौंछी देणे।

8 1 फेरी मेमने सातवी मोहर खोल्ही ता स्वर्गा मन्झ कोई आधा घंटे तक सन्नाटा छाया रह्या। 2 फेरी मैं परमेसरा रे साम्हणे खडे हुणे वाळे सात स्वर्गदूता जो देख्या; होर तिन्हा जो सात तुरहिया दिती गईरी थी। 3 फेरी एक होर स्वर्गदूत सोने रा धूपदान लई किन्हें लई आया, होर वेदी रे नेडे खहड़ी रा था; होर तेस जो संता री प्रार्थना समेत तेस्सा वेदी पर जो राजगद्दी रे साम्हणे थी, चढाणे रे कठे बौहत सारी धूप दिती। 4 होर तेस धूपा रा धुआं पवित्र लोका री प्रार्थना समेत स्वर्गदूता रे हाथा ले परमेसरा रे साम्हणे पूजी गया। 5 होर स्वर्गदूते धूपदान लई किन्हें तेस मन्झ वेदी री आग भरी, होर धरती पर डयाई दिती, होर बादला री गर्जन होर भयानक अवाज होर बिजलिया री चमक होर हिलण हुंदा लगेया। 6 होर स्यों सात स्वर्गदूत जिन्हा वाले सात तुरहिया थी, तिन्हा जो बजाणे रे कठे त्यार हुए। 7 पैहले स्वर्गदूते तुरही बजाई, होर खुना किन्हें मिलिरे सल्वाट

होर आग पैदा हुई, होर धरती पर डयाई दीती। होर धरती री एक तिहाई फुख्ही गई, होर सभ हरी घाह फुख्ही गई। 8 होर दूजे स्वर्गदूते तुरही बजाई, ता जिहां आगी साहीं भख्दा हुआ एक बडा पाहड़ समुद्रा मन्झ डयाई दितेया; होर समुद्रा रा एक तिहाई हिस्सा खून बणी गया। 9 होर समुद्रा रे एक तिहाई प्राणी मरी गये; होर एक तिहाई जहाज नास हुई गये। 10 होर त्रीजे स्वर्गदूते तुरही बजाई, होर एक बडा तारा जो मशाला साहीं भख्हा था, स्वर्गा ले टूटेया, होर नदिया रे एक तिहाई हिस्से पर, होर पाणी रे चश्मे पर पई गया। 11 होर तेस तारे रा नांऊ नागदौना था, होर एक तिहाई पाणी नागदौना साहीं कौड़ा हुई गया, होर बौहत सारे माहणु तेस कौड़े पाणी री वजहा ले मरी गये। 12 होर चौथे स्वर्गदूते तुरही बजाई, होर सुरजा री एक तिहाई, होर चांदा री एक तिहाई होर तारे री एक तिहाई हिस्से पर कैहर बरसेया, एथी तक कि तिन्हा रा एक तिहाई हिस्सा न्ह्यारा हुई गया, होर ध्याडे रे एक तिहाई हिस्से मन्झ प्रयासा नी रह्या, होर तिहां ई राती मन्झ भी। 13 होर जेबे मैं सर्गा रे बिचा मन्झ एक उकाबा जो उडदे देख्या होर उच्चि अवाजा मन्झ ये बोल्दे सुणेया, कि तिन्हा तीन स्वर्गदूता री तुरही री अवाजा री वजहा ले जिन्हा रा बजाणा हली बाकी आ, जो धरती पर रहणे वाळे पर हाय! हाय! हाय!

9 1 होर जेबे पाहन्जुए स्वर्गदूते तुरही बजाई, ता मैं स्वर्गा ले धरती पर एक तारा पऊन्दा हुआ देख्या, होर तेस जो अथाह कुंडा रा चाबी दिती गई। 2 होर तिने तेस अथाह कुंड खोल्या, होर तेस कुंडा रा धूआं बडी भठे रे धूएं साहीं उठेया। होर कुंडा रे धुएं किन्हें सूरज होर हवा न्ह्यारी हुई गई। 3 होर तेस धुएं मंझा ले धरती पर टिड्डिया निकळी, होर तिन्हा जो धरती रे बिचुआ साहीं सक्ति दिती। 4 होर तिन्हा किन्हें बोल्या गया, कि ना धरती री घाहा जो, ना केसी हरयाली जो, ना केसी डाळा जो नुकसान पौहुन्चाणा, सिर्फ तिन्हा माहणुआं जो जिन्हा रे माथे पर परमेसरा री मोहर नी लगीरी। 5 होर तिन्हा जो केसी जो मारी देणे रा नी, पर पांज महीने तक लोका जो पीड़ा देणे रा हक दितेया, होर तिन्हारी पीड़ा एहड़ी थी, जिहां जे बिचु रे काटणे ले माहणुआं जो हुहां ई। 6 तिन्हा ध्याडे मन्झ माहणुआं मौत टोळनी, पर नी मिलणी; होर मरणे री इच्छा करणी, होर मौता तिन्हा ले दूर भगणा। 7 होर देखा, स्यों टिड्डिया युद्धा रे कठे त्यार कितिरी घोड़े साहीं सुझ्या करहा ई थी, तिन्हा रे मुंडा पर जिहां सोने रे ताज थे; होर तिन्हारे मुंह माहणुआं रे मुंहा साहीं थे। 8 होर तिन्हा रे बाळ जनाने रे बाळा साहीं थे होर दान्द सेरा साहीं थे। 9 होर तिन्हा रे क्वच लोहे रे क्वचा साहीं थे, होर तिन्हा रे फान्खा री अवाज एहड़ी थी जेहड़ी रथा होर बौहत सारे घोड़े री जो लड़ाई मन्झ दोड़हा ऐ। 10 होर तिन्हा रे ठिन्ठर बिच्चुआ साहीं थे, होर तिन्हा मन्झ डंक थे,

होर तिन्हा जो पांज महीने तक माहणुआं जो दुःख पौहुन्चाणे री जो सक्ति थी, से तिन्हा रे ठिन्ठरा मन्झ थी। ¹¹ अथाह कुंडा रे अधिकारी दूता जो तिन्हे आपणे राजा रे रूपा मन्झ मनी लईरा था। इब्रानी भाषा मन्झ तेसरा नाऊ अब्दौन, होर यूनानी भाषा मन्झ अपुल्लोन आ। ¹² पैहली विप्पती हुई बैठी, देखा एबे एता ले बाद दो विप्पतिया होर हुणे वाळी ई। ¹³ होर जेबे छठुहे स्वर्गदूते तुरही बजाई ता जो सोने री वेदी परमेसरा रे साम्हणे ई, तेसरे सिंगा मंझा ले मैं एहडी अवाज सुणी। ¹⁴ से छठुहे स्वर्गदूता किन्हें जेस वाले जे तुरही थी, बोल्या करहा था, तिन्हा चार स्वर्गदूता जो फरात माहनदी रे नेडे बझिरे, तिन्हा जो खोल्हा। ¹⁵ होर सयों चारो दूत खोल्ही दिते जो तेस टैम, होर ध्याड़े, होर महीने होर साला रे कठे माहणुआं री एक तिहाई मारणे रे कठे त्यार कितिरे थे। ¹⁶ होर सेना रे सवारा री गिणती बीह करोड़ थी; मैं तिन्हा री गिणती सुणी। ¹⁷ होर मुंजो एस दर्शना मन्झ घोडे होर तिन्हारे सवार सुइहे; जिन्हा रे क्वच आगी, होर धुम्रकांत होर गन्धका साहीं थे; होर तिन्हा घोडे रे मूंड सेरा रे मुंडा साहीं थे; होर तिन्हा रे मुंहा ले आग, होर धूआं, होर गंधक निकळेया करहा ई थी। ¹⁸ इन्हा तीन माहमारिया यानी आग, होर धूआं होर गंधका ले जो तेसरे मुंहा ले निकळहा ई थी, माहणुआं री एक तिहाई मारी दिति गई। ¹⁹ क्यूंकि तिन्हा घोडे री सक्ति तिन्हारे मुंह होर तिन्हारे ठिन्ठरा मन्झ थी; इधी कठे कि तिन्हारे फूहन्ट सर्पा साहीं थे, होर तिन्हारे फूहन्टा रे मूंड भी थे, होर इन्हा ले ई, सयों पीडा पौहुन्चाहें थे। ²⁰ होर बाकी माहणु जो तिन्हा माह मारिया ले नी मरे थे, तिन्हे आपणे हाथा रे कामा ले हली भी मन नी फिराया, होर दुष्टात्मा होर सोने होर चांदी, होर पीतल होर पात्थर होर लकड़ी री मूर्ति री पूजा करदे रहे, जो ना देखी, ना सुणी, ना चली सकहा ई। ²¹ होर ना तिन्हे खुना रे, होर ना जादू टोणे रे, होर ना व्यभिचारा रे, होर ना चोरी रे कामा ले मन फिराया।

10 ¹ फेरी मैं सर्गा ले हेठा जो उतरदे हुए एक होर ताकतवर स्वर्गदूता जो देख्या, तिने बादल ढख्ही रखिरा था, होर तेसरे मुंडा पर एक मेघ धनुष था; होर तेसरा मुंह सुरजा साही होर तेसरे पैर आगी रे खम्बे साहीं थे। ² होर तेसरे हाथा मन्झ एक छोटी जे खुल्हीरी काब थी; तिने आपणा दायँ पैर समुद्रा पर, होर बायँ पैर धरती पर रखेया। ³ होर से बड़े जोरा किन्हें चिल्लाया, जिहां सेर दहाड़ा आ; होर जेबे से चिल्लाया ता गर्जना रे सात शब्द सुणहे। ⁴ होर जेबे सात गर्जना रे शब्द सुणही गये, ता हांऊ लिखणे ई वाळा था, होर मैं स्वर्गा ले ये अवाज सुणी, कि जो गल्ला गर्जना रे तिन्हा सात शब्दा ले सुणीरी, तिन्हा जो ल्कोई किन्हें रख, होर लिखदा देख्या। ⁵ होर जेस स्वर्गदूता जो मैं समुद्र होर धरती पर खहड़ीरे देख्या; तिने

आपणा दायँ हाथ स्वर्गा वखा जो चक्केया। ⁶ होर तेसरी कसम खाई किन्हें जो जुग जुग जीउंदा आ, होर जिने जे स्वर्ग होर तेसरी सभ चिजा, धरती होर तेता री सभ चीजा, होर समुद्रा जो होर जो कुछ तेस मन्झ आ बणाया, बोल्या, एबे कोई देर नी हुणी। ⁷ पर जेबे सातुवे स्वर्गदूता री अवाज सुणने रा टैम आऊणा, जेबे से तुरही बजाणे ई वाळा हुणा, ता परमेसरा रे से भेद पूरा हुई जाणा, जेसरा समाचार तिने आपणे दास नबिया जो दितिरा था। ⁸ तेबे मैं से अवाज जो मैं स्वर्गा ले सुणीरी थी; जा, तेस स्वर्गदूता रे हाथा ले जो समुद्र होर धरती पर खहड़ी रा, तेस्सा खुल्ही काबा जो लई ले। ⁹ होर मैं स्वर्गदूता वाले जाई किन्हें बोल्या, ये छोटी काब मुंजो देई दे; होर तिने मेरे किन्हें बोल्या, ले एता जो खाई ले, होर एता ले तेरा पेट कौडा ता हुणा, पर तेरे मुंहा मन्झ ये म्बीरा साहीं मीठी लगणी। ¹⁰ इधी कठे मां से छोटी काब तेस स्वर्गदूता रे हाथा ले लई किन्हें खाई गया, से मेरे मुंहा मन्झ म्बीरा साहीं मीठी ता लगी, पर जेबे हांऊ तेता जो खाई बैठ्या, ता मेरा पेट कौडा हुई गया। ¹¹ तेबे मेरे किन्हें ये बोल्या गया, कि तुजो बौहत सारे लोका, होर जातिया, होर भाषा होर राजे रे साम्हणे द्वारा भविष्यवाणी करणी पऊणी।

11 ¹ फेरी स्वर्गा मन्झ एक बड़ा चिन्ह सुइया, यानि एक जनाने जो सूरज पैहनी रखिरा था, होर चाँद तेस्सा रे पैरा हेठ था, होर तेस्सा रे मुंडा पर बारा तारे रा ताज था। ² होर से गर्भवती हुई, होर क्यूंकि से बच्चा जणने वाळी थी, इधी कठे से बच्चा जणने री पीडा ले चिल्लाया करहा ई थी; ³ एक होर चिन्ह स्वर्गा मन्झ सुइया, होर देखा, लाल रंगा रा एक बड़ा अजगर था जेसरे सात मूंड होर दस सींग थे, होर तेसरे मुंडा पर सात राज मुकुट थे। ⁴ होर तेसरे पूंछे सर्गा रे तारे रा एक तिहाई हिस्सा खिंजी किन्हें धरती पर डयाई दितेया, होर से जनाने जो बच्चा जणने वाळी थी; अजगर तेस्सा जनाने रे साम्हणे खड़ा हुई गया, ताकि जेबे से बच्चे जो जणे, से तेस्सा रे बच्चे जो निगळी जाए। ⁵ तेस्से एक म्हेठे जो जन्म दितेया, जेस लोहे रे दंड लई किन्हें सभ जातिया पर सासन करणा, होर तेस्सा रा बच्चा अचानक परमेसरा वाले, होर तेसरी राजगद्दी रे साम्हणे उठाई किन्हें पहुँचाई दितेया। ⁶ होर से जनाने तेस जंगला मन्झ भगी गई, जेथी जे परमेसरे तेस्सा रे कठे जगहा त्यार कितिरी थी, कि तेथी से एक झार दो सौ साठ ध्याड़े तक पाळी जाए। ⁷ फेरी स्वर्गा मन्झ युद्ध हुआ, मिकाएल होर तेसरे दूत अजगरा किन्हें लड़े; अजगर होर तेसरे दूत भी लड़े। ⁸ पर जीती नी सके, होर स्वर्गा मन्झ तिन्हा रे कठे फेरी जगहा नी रही। ⁹ होर से बड़ा अजगर यानि से ई पुराणा सांप, जेस जो इब्लीस होर सैतान बोल्हां ऐं, होर सारे संसारा जो भरमाणे वाळा आ, से धरती पर डयाई दितेया; होर तेसरे दूत तेस साउगी बाहर

काहडी दिते । ¹⁰ फेरी मैं स्वर्गा मंझा ले ये बड़ी अवाज आऊन्दे हुई सुणी, कि एबे आस्सा रे परमेसरा रा उद्धार होर सामर्थ होर राज होर तेसरे मसीह रा हक प्रगट हुई गईरा; क्यूंकि आस्सा रे भाईया पर दोष लगाणे वाळा, जो राती ध्याडी आस्सा रे परमेसरा रे साम्हणे तिन्हा पर दोष ल्गाहां था, हेठा जो सट्टी दितेया गया । ¹¹ तिन्हे मेमने रे बलिदाना रा खून होर तिन्हा री दितिरी गुआही ले से हराई दितेया; क्यूंकि तिन्हे आपणे प्राण देणे तक आपणी जिंदगी री परवाह नी किती । ¹² इधी कठे हे स्वर्गो होर स्वर्गा रे निवासियो, मग्न हो; हे धरती, होर समुद्र तुस्सा पर हाय! क्यूंकि सैतान बौहत गुस्से हुई किन्हे तुस्सा वाले आई उतरी रा; क्यूंकि से जाणहां कि एबे तेसरा टैम थोहड़ा ई रही गईरा । ¹³ होर जेबे अजगरे देख्या, कि हांऊ धरती पर डयाई दितिरा, ता तेस्सा जनाने जो जेस्सा रे जे म्ठठा हुईरा था, तेस्सा जो बौहत पीड़ा दिती । ¹⁴ पर तेस्सा जनाने जो बडे ऊकाबा रे दो फान्ख इधी कठे दिते, कि से अजगरा रे साम्हणे ले जंगला मन्झ तेस जगहा उडी जाए जेथी से साढे तीन साला तक पाळी जाए । ¹⁵ होर अजगरे तेस्सा जनाने रे पीछे आपण मुंहा ले नदी साहीं पाणी दलेया, ताकि से तेस नदी रे पाणी मन्झ बही किन्हे डूबी जाए । ¹⁶ पर धरती ऐ तेसरी मदद किती, होर आपणा मुंह खोल्ही किन्हे तेस नदी जो, जो अजगरे आपणे मुंहा ले बहाई थी, पी लया । ¹⁷ होर अजगर तेस्सा जनाने पर गुस्सा हुआ, होर तेस्सा री बाकी संताना किन्हे जो परमेसरा रे हुक्म मन्हां ऐं, होर यीसू री गुआही मन्झ मजबूत रँहयां ऐं, युद्ध करणे जो निकळेया । ¹⁸ होर अन्यजातिया गुस्सा किन्हे भहरी गई, होर तेरा कोप भडकी गया, होर से टैम आई गया, कि मुर्दे रा फैसला कितेया जाए, होर तेरे दास नबिया होर पवित्र लोका जो होर तिन्हा छोटे बडे जो, जो तेरे नांऊआं ले डरहा ऐ, प्रतिफल दितेया जाए, होर धरती रा नास करणे वाळे रा नास कितेया जाए । ¹⁹ होर परमेसरा रा मंदर जो स्वर्गा मन्झ आ, खोल्ही दितेया, होर तेसरे मन्द्रा मन्झ वाचा रा सन्दूक सुझ्या होर बिजली री चम्क होर बादला री गडगडाहट री अवाज होर हिलण हुए, होर भयंकर सल्वाटा री भरमार हुई ।

12 ¹ फेरी स्वर्गा मन्झ एक बड़ा चिन्ह सुझ्या, यानि एक जनाने जो सूरज पैहनी रखिरा था, होर चाँद तेस्सा रे पैरा हेठ था, होर तेस्सा रे मुंडा पर बारा तारे रा ताज था । ² होर से गर्भवती हुई, होर क्यूंकि से बच्चा जणने वाळी थी, इधी कठे से बच्चा जणने री पीड़ा ले चिल्लाया करहा ई थी; ³ एक होर चिन्ह स्वर्गा मन्झ सुझ्या, होर देखा, लाल रंगा रा एक बडा अजगर था जेसरे सात मूंड होर दस सींग थे, होर तेसरे मुंडा पर सात राज मुकुट थे । ⁴ होर तेसरे पूंछे सर्गा रे तारे रा एक तिहाई हिस्सा खिंजी किन्हे धरती पर डयाई दितेया, होर से जनाने जो बच्चा जणने वाळी थी; अजगर तेस्सा जनाने रे

साम्हणे खड़ा हुई गया, ताकि जेबे से बच्चे जो जणे, से तेस्सा रे बच्चे जो निगळी जाए । ⁵ तेस्से एक म्ठे जो जन्म दितेया, जेस लोहे रे दंड लई किन्हे सभ जातिया पर सासन करणा, होर तेस्सा रा बच्चा अचानक परमेसरा वाले, होर तेसरी राजगद्दी रे साम्हणे उठाई किन्हे पहुँचाई दितेया । ⁶ होर से जनाने तेस जंगला मन्झ भगी गई, जेथी जे परमेसरे तेस्सा रे कठे जगहा त्यार कितिरी थी, कि तेथी से एक झार दो सौ साठ ध्याडे तक पाळी जाए । ⁷ फेरी स्वर्गा मन्झ युद्ध हुआ, मिकाएल होर तेसरे दूत अजगरा किन्हे लडे; अजगर होर तेसरे दूत भी लडे । ⁸ पर जीती नी सके, होर स्वर्गा मन्झ तिन्हा रे कठे फेरी जगहा नी रही । ⁹ होर से बडा अजगर यानि से ई पुराणा सांप, जेस जो इब्लीस होर सैतान बोल्हां ऐं, होर सारे संसारा जो भरमाणे वाळा आ, से धरती पर डयाई दितेया; होर तेसरे दूत तेस साउगी बाहर काहडी दिते । ¹⁰ फेरी मैं स्वर्गा मंझा ले ये बड़ी अवाज आऊन्दे हुई सुणी, कि एबे आस्सा रे परमेसरा रा उद्धार होर सामर्थ होर राज होर तेसरे मसीह रा हक प्रगट हुई गईरा; क्यूंकि आस्सा रे भाईया पर दोष लगाणे वाळा, जो राती ध्याडी आस्सा रे परमेसरा रे साम्हणे तिन्हा पर दोष ल्गाहां था, हेठा जो सट्टी दितेया गया । ¹¹ तिन्हे मेमने रे बलिदाना रा खून होर तिन्हा री दितिरी गुआही ले से हराई दितेया; क्यूंकि तिन्हे आपणे प्राण देणे तक आपणी जिंदगी री परवाह नी किती । ¹² इधी कठे हे स्वर्गो होर स्वर्गा रे निवासियो, मग्न हो; हे धरती, होर समुद्र तुस्सा पर हाय! क्यूंकि सैतान बौहत गुस्से हुई किन्हे तुस्सा वाले आई उतरी रा; क्यूंकि से जाणहां कि एबे तेसरा टैम थोहड़ा ई रही गईरा । ¹³ होर जेबे अजगरे देख्या, कि हांऊ धरती पर डयाई दितिरा, ता तेस्सा जनाने जो जेस्सा रे जे म्ठठा हुईरा था, तेस्सा जो बौहत पीड़ा दिती । ¹⁴ पर तेस्सा जनाने जो बडे ऊकाबा रे दो फान्ख इधी कठे दिते, कि से अजगरा रे साम्हणे ले जंगला मन्झ तेस जगहा उडी जाए जेथी से साढे तीन साला तक पाळी जाए । ¹⁵ होर अजगरे तेस्सा जनाने रे पीछे आपण मुंहा ले नदी साहीं पाणी दलेया, ताकि से तेस नदी रे पाणी मन्झ बही किन्हे डूबी जाए । ¹⁶ पर धरती ऐ तेसरी मदद किती, होर आपणा मुंह खोल्ही किन्हे तेस नदी जो, जो अजगरे आपणे मुंहा ले बहाई थी, पी लया । ¹⁷ होर अजगर तेस्सा जनाने पर गुस्सा हुआ, होर तेस्सा री बाकी संताना किन्हे जो परमेसरा रे हुक्म मन्हां ऐं, होर यीसू री गुआही मन्झ मजबूत रँहयां ऐं, युद्ध करणे जो निकळेया । ¹⁸ |

13 ¹ होर से समुद्रा री रेता पर जाई किन्हे खड़ा हुई गया, होर मैं एक पसु जो समुद्रा मंझा ले निकळदे हुए देख्या, जेसरे दस सींग होर सात मूंड थे; होर तेसरे मुंडा पर ईश निंदा रे नांऊ लिखिरे थे । ² होर जो पसु मैं देख्या, से चीते साहीं था; होर तेसरे पैर भालू साहीं थे, होर तेसरा मुंह

सेरा साहीं था; होर तिने अजगरे आपणी सामर्थ होर आपणी राजगद्दी होर बड़ा हक तेस जो देई दितेया।³ होर मैं तेसरे मुंडा मन्झा ले एकी पर एडी भारी चोट लगी री देखी, जीहाँ जे से मरणे वाळा हो, फेरी तेसरी से जान लेवा चोट ठीक हुई गई, होर सारी धरती रे लोक तेस पसु रे पीछे पीछे हरान हुई किन्हें चल्दे लगे।⁴ होर तिन्हे अजगरा री पूजा किती, क्युंकि तिने पसु जो आपणा हक दितेया होर ये बोली किन्हें पसु री पूजा किती, कि एस पसु साहीं कुणहां? ⁵ कुणहां तेस किन्हें लडी सकहा? होर बड़े बोल बोलणे होर निंदा करणे रे कठे तेस जो एक मुंह दितेया, होर तेस जो ब्याळी महीने तक काम करणे रा हक दितेया। ⁶ होर तिने परमेसरा री निंदा करणे रे कठे मुंह खोल्या, कि तेसरे नांऊ होर तेसरे तम्बू यानि स्वर्गा रे बसिंदे री निंदा करे। ⁷ होर तेस जो ये हक दितेया, कि पवित्र लोका किन्हें लड़े, होर तिन्हा पर जीत पाए, होर तेस जो हर कुल होर लोक होर भाषा होर जाति पर हक दितेया। ⁸ होर धरती रे सभ बसिंदे तेस री पूजा करणी यानी हर एक आदमी जिन्हा रे नांऊ तेस मेमने री जिंदगी री काबा मन्झ जो संसारा री उत्पति रे टैमा ले मारा गईरा, नी लिखे गए। ⁹ जेसरे कान ऐ से सुणे। ¹⁰ जेस जो बंदी हुणे रे कठे नियुक्त कितिरा तेस कैदा मन्झ पऊणा, जो तलवारा किन्हें मारहा, तेस तलवारा किन्हें मरणा; पवित्र लोका रा धीरज होर विस्वास भी एता मंझ आ। ¹¹ फेरी मैं एक होर पसु जो धरती मंझा ले निकळदे देख्या, तेसेरे मेमने रे दो सींग थे; होर से अजगरा साहीं बोल्हा था। ¹² होर ये तेस पैहले पसु रा सारा हक तेसरे साम्हणे कामा मन्झ ल्याहुआं था, होर धरती होर तेसरे बसिंदे ले होर तेस पैहले पसु री जेसरी जे जान लेवा चोट ठीक हुई गईरी थी, पुजा करवाहां था। ¹³ होर से बड़े बड़े चिन्ह दस्हा था, एथि तक कि माहणुरे साम्हणे स्वर्गा ले धरती पर आग बरसाहां था। ¹⁴ होर तिन्हा चिन्हा री वजहा ले जिन्हा जो तेस पसु रे साम्हणे दसणे रा हक तेस जो दितिरा था; से धरती रे बसिंदे जो इहां भरमाहां था, कि धरती रे बसिंदे किन्हें बोल्हा था, कि जेस पसु जो तलवार लगी थी, होर जो ठीक हुई गईरा था, तेसरी मूर्ति बणाऊआ। ¹⁵ होर तेस जो तेस पसु री मूर्ति मन्झ प्राण पाणे रा हक दितेया, कि पसु री मूर्ति बोलणे लगे; होर जितने लोक तेस मूर्ति री पूजा नी करे, तिन्हा जो मरवाई दे। ¹⁶ होर तिने छोटे बड़े धनी, कंगाल, अजाद, दास सभी रे दायें हाथा या तिन्हारे माथे पर एक एक छाप करी दिती। ¹⁷ कि तेस जो छाडी किन्हें जेस पर छाप यानी तेस पसु रा नांऊ या तेसरे नांऊआं रा अंक हो, होर कोई लेण देण नी करी सके। ¹⁸ ज्ञान एता मन्झ ई आ, जेस जो बुद्धि हो, से एस पसु रा अंक जोडी ले, क्युंकि ये माहणु रा अंक आ, होर तेसरा अंक छेह सौ छह्याट आ।

14 ¹ फेरी मैं देख्या, होर देखा, से मेमना सियोना रे पहाडा पर खहडी रा, होर तेस साउगी एक लाख चत्वाळी झार लोक ऐ; जिन्हा रे माथे पर तेसरा होर तेसरे बाबा रा नांऊ लिखीरा। ² होर स्वर्गा ले मुंजो एक एहडी अवाज सुणही, होर जो अवाज मैं सुणी; से एहडी थी, जीहाँ जे वीणा बजाणे वाळा वीणा बजाहां ऐं। ³ होर सयों राजगद्दी रे साम्हणे होर चारो प्राणीया होर प्राचीना रे साम्हणे जीहाँ जे स्यों नंऊआं गाणा गाया करहा ऐ थे, होर तिन्हा एक लाख चत्वाळी झार लोका जो छाडी किन्हें जो मुले लईरे थे, कोई ये गाणा नी सीखी सकदा था। ⁴ ये स्यों ऐ, जो जनाने साउगी असुद्ध नी हुए, पर कुआरे ऐ; ये स्यों ई हाए, कि जेथी केथी मेन्ना जाहाँ, स्यों तेस पीछे हुई जाहें यूँ ता परमेसरा रे कठे पैहले फल हुणे रे कठे माहणुआं मंझा ले मुले लई जाई चुकिरे। ⁵ होर तिन्हा रे मुंहा ले कधी झूठ नी निकळेया था, स्यों निर्दोष ऐ। ⁶ फेरी मैं एक होर स्वर्गदूता जो सर्गा रे बीच मन्झ उड़दे हुए देख्या, जेस वाले धरती रे बसिंदे री हर एक जाति, होर कुल, होर भाषा होर लोका जो सुणाणे रे कठे अनन्त सुसमाचार था। ⁷ होर तिने उच्ची अवाजा मन्झ बोल्या; परमेसरा ले डरा; होर तेसरी म्हीमा करा; क्युंकि तेसरे फैसला करणे रा टैम आई गईरा, होर तेसरा भजन करा, जिने जे स्वर्ग होर धरती होर समुद्र होर पाणी रे चश्मे बणाए। ⁸ फेरी एता ले बाद एक होर दूजा स्वर्गदूत ये बोल्दा हुआ आया, कि पई गया, से बडा बाबूल पई गया, तिने सभ जातिया जो आपणे व्यभिचारा री वासना किन्हें भहरी री सराब पियाई। ⁹ फेरी इन्हा स्वर्गदूता ले बाद एक त्रिजा स्वर्गदूत उच्ची अवाज करदा हुआ आया, अगर कोई तेस पसु होर तेसरी मूर्ति री पूजा करे, होर आपणे माथे या आपणे हाथा पर तेसरी छाप ल्याई ले। ¹⁰ ता तेस परमेसरा रे गुस्से री सराब पीणी, एहडी बगैर ढाबी री सराब जो परमेसरा रे गुस्से रे कटोरे मन्झ त्यार कितिरी, तेस आदमी जो पवित्र स्वर्गदूता होर मेमने रे साम्हणे आग होर गन्धका री घोर पीडा सैहणी पऊणी। ¹¹ होर तिन्हा री पीडा रा धुँआ जुग जुग उठ्दा रेंहणां, होर जो तेस पसु होर तेसरी मूर्ति री पूजा करहा ऐ, होर जो तेसरे नांऊआं री छाप लैंहां ऐं, तिन्हा जो राती ध्याडी चैन नी मिलणा। ¹² पवित्र लोका रा सबर एता मन्झ ई हाया, जो परमेसरा रे हुक्मा जो मन्हां ऐ, होर यीसू पर विस्वास रख्हा ऐ। ¹³ होर मैं स्वर्गा ले ये अवाज सुणी, कि लिख; जो मुरदे प्रभु मन्झ मरहा ऐ, स्यों एभे ले भागा वाळे ऐ, आत्मा बोल्हा, हां क्युंकि तिन्हा आपणी मैहनता किन्हें अराम पाणा, होर तिन्हारे काम तिन्हा साउगी जाणे। ¹⁴ होर मैं देख्या, होर देखा, एक साफ बादल आ, होर तेस बादला पर माहणु रे पुत्रा साहीं कोई बैठिरा, जेसरे मुंडा पर सोने रा ताज होर हाथा मन्झ तेज दराटी ई। ¹⁵ फेरी एक होर स्वर्गदूते मन्द्रा मंझा ले निकळी किन्हें, तेस ले जो बादला

पर बैठिरा था, उच्चैः अवाजा मन्त्र बोल्या, कि आपणी दराटी ल्याई किन्हें कटाई करा, क्यूंकि कटाई रा टैम आई गईरा, इधी कठे कि धरती री फसल पक्की चुकिरी । ¹⁶से जो बादला पर बैठीरा था, तिने धरती पर आपणी दराटी ल्याई, होर धरती री फसल काटी गई । ¹⁷फेरी एक होर स्वर्गदूत तेस मन्त्रा मन्त्रा ले निकळेया, जो स्वर्गा मन्त्र आ, होर तेस वाले भी तेज दराटी थी । ¹⁸फेरी एक होर स्वर्गदूत जेस जो आगा पर हक था, वेदी मन्त्रा ले निकळेया, होर जेस वाले तेज दराटी थी, तेस किन्हें उच्चैः अवाजा मन्त्र बोल्या; आपणी तेज दराटी ल्याई किन्हें धरती री दाखलता रे अंगूरा रे गुच्छे काटी ले; क्यूंकि दाखलता रे अंगूर पक्की चुकिरे । ¹⁹होर तिने स्वर्गदूते धरती पर आपणी दराटी चलाई, होर धरती री दाखलता रे फल काटी किन्हें, आपणे परमेसरा रे कोपा रे बडे रसा रे कुंडा मन्त्र पाई दिते । ²⁰होर नगरा रे बाहर तेस रसा रे कुंडा मन्त्रा ले अंगूर रौंदे गए, होर रसा रे कुंडा मन्त्रा ले इतना खून निकळेया कि घोड़े री ल्यामा तक पौहन्चेया, होर तीन सौ किलोमीटर तक बही गया ।

15 ¹फेरी मैं स्वर्गा मन्त्र एक होर बडा होर नौखा चिन्ह देख्या, यानि सात स्वर्गदूता जिन्हा वाले आखरी सात विपत्तिया थी; क्यूंकि ये विपत्तिया पूरी हुणे पर परमेसरा रे गुस्से रा अंत हुई जाणा । ²फेरी मुंजो सीसे रा एक समुद्र सुझ्या जेस मन्त्र जीहाँ आग मिलिरी हो, होर मैं देख्या कि तिन्हे तेस पसु पर, होर तेस्सा मूर्ति पर, होर तेसरे नांऊआं रे अंका पर जीत पाई लई; स्यों भी तेस सीसे रे समुद्रा रे नेडे खहड़ी रे, तिन्हे परमेसरा रे ज्रीए दितिरी वीणा लईरी थी । ³होर स्यों परमेसरा रे दास मुसा रा गीत, होर मेमने रा गाणा गाई गाई किन्हें बोल्हा ऐ थे, कि हे सर्व सक्तिमान प्रभु परमेसर, तेरे काम बडे होर नौखे ऐ, हे जुगा जुगा रे राजा, तेरी चाल ठीक होर सच्ची ई । ⁴हे प्रभु, केस तुध ले नी डरणा? होर तेरे नांऊआं री म्हीमा नी करणी? क्यूंकि सिर्फ तू ई पवित्र आ, होर सारी जातिया आई किन्हें तेरे साम्हणे आराधना करणी, क्यूंकि तेरे फैसले रे काम प्रगट हुई गईरे । ⁵होर एता ले बाद मैं देख्या, कि स्वर्गा मन्त्र गुआही रे तम्बू रा खोल्या गया । ⁶होर स्यों सात स्वर्गदूत जिन्हा वाले जे सात विपत्तिया थी, शुद्ध होर चमकदी हुई मणि पैहनी किन्हें छाती पर सोने रा पट्टा बान्ही किन्हें मन्त्रा ले निकळे । ⁷होर तिन्हा चारो प्राणिया मन्त्रा ले एकी ऐ तिन्हा सात स्वर्गदूता जो सोने रे कटोरे दिते, जो हमेसा हमेसा रे कठे जीउंदे परमेसरा रे गुस्से ले भहरी रे थे । ⁸से मन्त्र परमेसरा री म्हीमा होर तेसरी शक्ति रे धुंए किन्हें भहरी रा था, ताकि जेबे तक तिन्हा सात दूता री सात विपत्तिया पूरी नी हुई जाए, तेबे तक मन्त्रा मन्त्र कोई भी जाई नी सक्या ।

16 ¹फेरी मैं मन्त्रा मन्त्र केसी जो उच्चैः अवाजा मन्त्र जिन्हा सात स्वर्गदूता किन्हें ये बोल्दे हुए सुणेया कि जाऊआ, परमेसरा रे गुस्से रे सात कटोरे जो धरती पर दली देआ । ²होर पैहले वाळे जाई किन्हें आपणा कटोरा धरती पर दली दितेया, होर तिन्हा माहणुआं रे जिन्हा पर पसु री छाप लगी री थी, होर जो तेसरी मूर्ति री पूजा करहा ऐ थे, एक किस्मा रा बुरा होर दुःखदाई फोडा निकळेया । ³होर दूजे आपणा कटोरा समुद्रा पर दलेया होर समुद्रा रा पाणी मरीरे आदमी रे खूना मन्त्र बदली गया, होर समुद्रा रा हर एक जीव मरी गया । ⁴होर त्रीजे आपणा कटोरा नदिया होर पाणी रे चश्मे पर दली दितेया, होर स्यों खूना मन्त्र बधली गये । ⁵होर मैं पाणी रे स्वर्गदूता जो, ये बोल्दे सुणेया, कि हे पवित्र, जो हाया, होर जो था, तू न्याय करणे वाळा आ, क्यूंकि तैं इन्हा गल्ला रा न्याय कितिरा । ⁶क्यूंकि तिन्हे पवित्र लोका, होर नबीया रा खून बहाईरा था, होर तैं तिन्हा जो खून पियाया; क्यूंकि स्यों एता रे लायक ऐ । ⁷फेरी मैं वेदी मन्त्रा ले ये अवाज सुणी, कि हां, हे सर्वसक्तिमान प्रभु परमेसर, तेरे फैसले ठीक होर सच्चे ऐ । ⁸होर चौथे आपणा कटोरा सुरजा पर दली दितेया, होर तेस जो माहणुआं जो आगी किन्हें फुकणे री सक्ति दिती । ⁹होर माहणु बडी तपना किन्हें भुरडी गये, होर परमेसरा रे नांऊआं री जेस जो इन्हा विपत्तिया पर हक आ, निंदा किती होर तेसरी म्हीमा करणे रे कठे मन नी फिराया । ¹⁰होर पाहन्जुए आपणा कटोरा तेस पसु री राजगद्दी पर दली दितेया होर तेसरे राजा मन्त्र न्ह्यारा छाई गया; होर लोक पीडा रे मारे आपणी आपणी जीभ चाबदे लगे । ¹¹होर आपणी पीडा होर फोड़े री वजहा ले स्वर्गा रे परमेसरा री निंदा किती; होर आपणे आपणे कामा ले मन नी फिराया । ¹²होर छठुए आपणा कटोरा बडी नदी फराता पर दली दितेया होर एता ले तेसरा पाणी सुकी गया, ताकि पूर्व दिसा रे राजा रे कठे रस्ता त्यार हुई जाए । ¹³होर मैं तेस अजगरा रे मुंहा ले, होर तेस पसु रे मुंहा ले होर तेस झूठे नबी रे मुंहा ले तीन असुद्ध आत्मा जो मेंढका रे रूपा मन्त्र निकळदे देख्या । ¹⁴ये चिन्ह दसणे वाळी दुष्ट आत्मा ई, जो सारे संसारा रे राजे वाले निकळी किन्हें इधी कठे जाहीं, कि तिन्हा जो सर्वसक्तिमानपरमेसरा रे तेस बडे ध्याडे री लडाई रे कठे कठा करे । ¹⁵देखा, हांऊ चोरा साहीं आहुआ; भागा वाळा आ से, जो जागदा रैंहयां, होर आपणे कपडे री चौकसी करहा, कि नांगा ना फिरे, होर लोक तेसरे नांगेपना जो ना देखे । ¹⁶होर तिन्हे तिन्हा जो कठा कितेया, जेस जो इब्रानी भाषा मन्त्र हर - मगिदोन बोल्या जाहां । ¹⁷होर सातुवे आपणा कटोरा हवा पर दली दितेया, होर मन्त्रा री राजगद्दी ले ये बडी अवाज आई, कि हुई गया । ¹⁸फेरी बिजलिया चमकी होर गडगडाहटा री अवाज हुई होर बादला री गर्जन हुई, होर एक एहडा हिलण

हुआ, कि जेबे ले माहणु री रचना एस धरती पर हुई, तेभे ले एहडा बडा हिलण कधी नी हुएया था।¹⁹ होर तेस बडे नगरा रे तीन टुकडे हुई गये, होर जाति जाति रे नगर धारासाही हुई गए, तेबे परमेसरे माहनगरी बाबुला री याद किती, ताकि से आपणे भयंकर गुस्से री सराब तेस जो पियाये।²⁰ होर हर एक टापू आपणी जगहा ले टळी गया; होर पाहडा जो पता तक नी चलेया।²¹ होर सर्गा ले माहणुआं पर मणा मणा रे बडे बडे सलवाट पये, होर इधी कठे कि ये विपत्ति बौहत ई भारी थी, लोके सलवाटा री विपत्ति री बजहा ले परमेसरा री निंदा किती ।

17¹ होर जिन्हा सात स्वर्गदूता वाले स्यों सात कटोरे थे, तिन्हा मंझा ले एकीए आई किन्हें मुंजो ये बोल्या, कि एथी आऊ, हांऊ तूजो तेस्सा बडी वेस्या री सजा दसुं, जो बौहत पाणीया पर बैठिरी।² जेस्सा साउगी धरती रे राजे व्यभिचार कितेया, होर धरती रे बसिंदे तेस्सा रे व्यभिचारा री सराबा किन्हें मतवाळे हुई गईरे थे।³ तेबे से मुंजो आत्मा मन्झ जंगला मन्झ लई गया, होर मैं किरमिजी रंगा रे पसु पर जो निंदा रे नांऊआं किन्हें ल्हुखी गईरा था, होर जेसरे सात मूंड होर दस सींग थे, एक जनाने जो बैठिरे देख्या।⁴ एसे जनाने बेंजनी, होर किरमिजी कपडे पैहनी रे थे, होर सोने होर कीमती मणिया होर मोतिया किन्हें सजिरी थी, होर तेस्सा रे हाथा मन्झ एक सोने रा कटोरा था जो बुरी गल्ला होर तेस्सा रे व्यभिचारा री असुद्ध चीजा किन्हें भहरी रा था।⁵ होर तेस्सा रे माथे पर एक नाम यानि एक भेद लिखीरा था, बडा बाबूल; वेस्या होर धरती री बुरी चीजा री माऊ।⁶ होर मैं देख्या कि तेस्से जनाने पवित्र लोका होर तिन्हे लोका रा खून पीणे ले मतवाळी हुई, देखी होर तेस्सा जो देखी किन्हें हांऊ हरान हुई गया।⁷ तिने स्वर्गदूते मेरे किन्हें बोल्या; तू कि हरान हुआ? हांऊ एस्सा जनाने, होर तेस पसु रा, जेस पर से सवार आ, होर जेसरे सात मूंड होर दस सींग ऐ, तुजो भेद दस्हा।⁸ जो पसु तैं देख्या, ये पैहले ता था, पर एबे जीउंदा नी आ, फेरी भी से पताळा ले या अथाह कुंडा ले निकळने वाळा आ, होर तेबे ई तेसरा नास हुई जाणा, होर धरती रे बसिंदे जिन्हा रे नांऊ संसारा री उत्पति रे टैमा ले जिन्दगी री क्ताबा मन्झ नी लिखीरे, एस पसु री ये हालत देखी किन्हें, तिन्हा हरान हुणा क्यूंकि एक टैम था जेबे से जिउंदा था, पर एबे जिउंदा नी आ, पर फेरी भी से आऊणे वाळा आ।⁹ बुद्धि रे गल ता ये ई, कि स्यों सात मूंड सात पहाड ऐ, जिन्हा पर से जनाने बैठिरी।¹⁰ होर स्यों सात राजा भी हाए, पांज ता हुई चुकिरे, होर एक एबे भी हाया, होर दूजा हली तक नी आया; होर जेबे तेस आऊणा, ता कुछ टैम तक तेसरा रेंहणां जरूरी आ।¹¹ होर जो पसु पैहले था, होर एबे नी हाया, से आपु आठुआ आ; होर तिन्हा साता मंझा ले निकळेया, होर तेसरा नास पक्का आ।¹² होर जो

दस सींग तैं देखे स्यों दस राजा ऐ, जिन्हें हली तक राजसता नी मिली; पर तिन्हा तेस पसु साउगी घडी भरा रे कठे राजे साहीं हक पाणा।¹³ तिन्हा सभिया एक मन हुणा, होर तिन्हा आपणी आपणी सक्ति होर हक तेस पसु जो देणा।¹⁴ इन्हा मेमने साउगी युद्ध करणा, पर मेमने आपणे सादीरे, चुनिरे होर अनुयायीआ साउगी स्यों हराई देणे; क्यूंकि से राजाओं रा राजा आ; प्रभुओं रा प्रभु आ।¹⁵ फेरी तिने मेरे किन्हें बोल्या, कि जो पाणी तैं देख्या, जिन्हा पर वेस्या बैठिरी, स्यों लोक, होर भीड होर जातिया, होर भाषा ई।¹⁶ होर जो दस सींग होर पसु तैं देखे, तिन्हा तेस्सा वेस्या किन्हें बैर रखणा, होर तेस जो लाचार होर नांगा करी देणा; होर तेस्सा रा मास खाई देणा, होर तेस जो आगी मन्झ फुकी देणा।¹⁷ क्यूंकि परमेसरा तिन्हा रे मना मन्झ ये गल पाई देणी, कि स्यों तेसरी इच्छा पूरी करे; होर जेबे तक परमेसरा रे वचन पुरे नी हुई ले, तेबे तक एक मन हुई किन्हें आपणा आपणा राज पसु जो देई दे।¹⁸ होर से जनाने, जेस जो तैं देख्या से बडा नगर आ, जो धरती रे राजाओं पर राज करहा ।

18¹ एता ले बाद मैं एक स्वर्गदूता जो स्वर्गा ले उतरदे देख्या, जेसरा बडा हक था; होर तेसरी रोशनी किन्हें धरती चम्की गई।² तिने उच्ची अवाजा मन्झ चिल्लाई किन्हें बोल्या, कि पई गई, बडी बाबूल नगरी पई गई; होर से दुष्टात्मा रा बसेरा बणी गई, होर हर एक असुद्ध आत्मा रा आडा, होर हर एक असुद्ध होर गंदे चिडुआ रा आडा बणी गईरी।³ क्यूंकि सभ जातीये तेस्सा रे व्यभिचारा री वासना री सराब पितिरी, होर धरती रे राजे तेस्सा साउगी व्यभिचार कितेया; होर धरती रे व्यापारी तेस्सा रे भोग विलासा रे धना किन्हें धनवान हुई गए।⁴ फेरी मैं स्वर्गा ले केसी होरी री अवाज सुणी, कि हे मेरे लोको, तेस्सा रे चन्गुला ले निकळी किन्हें आई जाऊआ, ताकि तुस्से तेस्सा रे पापा मन्झ भागी नी हुई सको, होर तुस्सा पर तेस्सा री विपत्तिया नी आई जाए।⁵ क्यूंकि तेस्सा रे पाप स्वर्गा तक पूजी गईरे, होर परमेसरे तेस्सा रे अधर्मा रे काम याद किते।⁶ जेहडा तेस्से तुस्सा साउगी कितेया, तेहडा ई तुस्से भी तेस्सा साउगी करा, तेस्सा रे कामा रे मुताबक तेस्सा जो दोगुणा बदला दो, जेस कटोरे मन्झ तेस्से सराब मिलाईरी, तेता मन्झ ई तेस्सा रे कठे दोगुणा मिलाई देआ।⁷ जितना तेस्से आपणा गुणगान कितेया होर भोग विलास कितेया; तितना ई तेस्सा जो पीडा, होर दुःख देआ, क्यूंकि से आपणे मना मन्झ बोल्हा ई, हांऊ रानी हुई किन्हें बैठिरी, होर हांऊ विधवा नी हाई, होर मां कधी दुःखा मन्झ नी पऊणा।⁸ इधी कठे एक ई ध्याडे मन्झ तेस्सा पर विपत्तिया आई जाणी, यानि मौत होर दुःख, होर अकाल होर से आगि मन्झ भष्म करी दिती जाणी, क्यूंकि तेस्सा रा फैसला करणे वाळा प्रभु परमेसर सक्तिमान आ।⁹ होर धरती रे राजा

जिन्हें तेस्सा साउगी व्यभिचार होर भोग विलास कितेया, जेबे तिन्हा तेस्सा रे फुखणे रा धुँआ देखणा, ता तेस्सा रे कठे रोणा, होर छाती पिटणी।¹⁰ होर तेस्सा रे डरा रे मारे दूर खहडी किन्हें बोलणा, हे बडी नगरी बाबूल! हे मजबूत नगरी, हाय! हाय! पल भरा मन्झ ई तुजो सजा मिली गई।¹¹ होर धरती रे व्यापारी तेस्सा रे कठे रोणा होर करलाप करणा क्यूंकि एबे केसीया भी तिन्हा रा माल मुले नी लैणा।¹² यानि सोना, चांदी, रत्न, मोती, होर मलमल होर किरमिजी कपड़े, होर हर किस्मा री खुशबूदार लकड़ी, होर हाथी दान्दा री हर किस्मा री चीजा, होर कीमती लकड़ी, होर पीतल होर लोहे होर संगमरमरा रे सभ किस्मा रे भांडे।¹³ होर दालचीनी, मसाले, धुप, इतर, लोबान, सराब, तेल, मैदा, कणक, गाय, बोह्लद, भेड, बकरिया, घोड़े, रथ, होर दास, होर माहणु रे प्राण।¹⁴ एबे मेरे मनभावने फल तेरे वाले ले हट्टी गये होर जांदे रहे; होर स्वादिष्ट होर भड़कीली चीजा तेरे ले दूर हुई, होर स्यों फेरी कधी भी नी मिलणी।¹⁵ इन्हा चीजा रे व्यापारी जो; जो तेस्सा रे ज्रीए धनवान हुई गईरे थे, तेस्सा री पीडा रे डरा रे मारे तिन्हा दूर खड़े हुणा, होर रोंदे करलान्दे हुए बोलणा।¹⁶ हाय! हाय! ये बडी नगरी जेस्से मलमल, होर बेंजनी, होर किरमिजी कपड़े पैहनी रखिरे थे, होर सोने होर रत्ना होर मोतिया किन्हें सजिरी थी।¹⁷ पल भरा मन्झ ई तेस्सा रा एहडा धन नास हुई गया, होर हर एक माझी, होर जलयात्री होर मल्लाह होर जितने समुद्रा ले क्माहें थे, सभ दूर खहडी गए।¹⁸ होर तेस्सा रे फुखणे रे धुँए जो देखी किन्हें लोका बोलणा, एसा बडी नगरी साहीं होर कुणहां जे नगरी ई? होर तिन्हा आपणे आपणे मुंडा पर धूड पाणी, होर रोंदे, कर्लान्दे हुए होर चिल्लाई चिल्लाई किन्हें बोलणा, कि हाय! हाय! ये बडी नगरी जेसरी सम्पति रे ज्रीए समुद्रा रे सभ जहाजवाळे धनी हुई गईरे थे, होर पल भरा मन्झ ई से उजडी गई।²⁰ हे स्वर्ग, होर हे पवित्र लोका, होर प्रेरितो, होर नबियो, तेस्सा रे प्रति खुसी मनाऊआं, क्यूंकि परमेसरे फैसला करी किन्हें तेस्सा ले तुस्सा रा बदला लई लया।²¹ फेरी एक बलवान स्वर्गदूते बडी चक्की रे पाटा साहीं एक बडे पात्थरा जो चकी किन्हें होर ये बोल्दे हुए समुद्रा मन्झ सट्टी दितेया, कि बडी नगरी बाबूल भी ठीक इहाँ ई जोरा किन्हें सट्टी दिती जाणी, होर फेरी कधी तेस्सा रा पता नी चलणा।²² होर तुध मन्झ वीणा बजाणे वाळे, होर संगीतकार, होर बाँसरी बजाणे वाळे, होर तुरही बजाणे वाळे री अवाज फेरी कधी नी सुणाई देणी, होर केसी कामा रा कोई कारीगर भी तुध मन्झ कधी नी मिलणा; होर चक्की रे चलणे री अवाज फेरी कधी तुध मन्झ नी सुणाई देणी।²³ होर दीये रा प्रयासा फेरी कधी तुध मन्झ नी चमकणा, होर लाड़े होर लाड़ीया री अवाज फेरी कधी तुध मन्झ नी सुणाई देणी, क्यूंकि तेरे व्यापारी धरती रे मुखिया थे, होर तेरे जादू टोणे किन्हें सभ

जातिया भरमाई गईरी थी।²⁴ होर नबिया होर पवित्र लोका, होर धरती पर सभ घात कितिरे लोका रा खून तेस्सा मन्झ पाया गया।

19¹ एता ले बाद में स्वर्ग मन्झ, जीहाँ जे, बडी भीडा जो उच्चै अवाजा मन्झ बोल्दे हुए सुणेया, लोक बोल्या करहा ऐ थे; हालेलुयाह, उद्धार होर म्हीमा होर सामर्थ हमेसा आस्सा रे परमेसरा री ई।² क्यूंकि तेसरे फैसले सच्चे होर ठीक ऐ, इधी कठे तिने तेस्सा बडी वेस्या रा जो आपणे व्यभिचारा किन्हें धरती जो भ्रष्ट करहा ई थी, फैसला कितेया, होर तेस्सा ले आपणे दासा रे खूना रा बदला लया।³ फेरी दूजी बारी तिन्हे हालेलुयाह बोल्या, होर तेस्सा रे फुखणे रा धुँआ जुग जुग उठ्दा रेंहणां।⁴ तेबे चौबीस प्राचीने होर चारो प्राणिये झूकी किन्हें परमेसरा री आराधना किती, जो राजगद्दी पर बैठिरा था, होर बोल्या, आमीन, हालेलुयाह।⁵ होर राजगद्दी मंझा ले एक अवाज आई, कि हे आस्सा रे परमेसरा ले सभ डरणे वाले दासो, क्या छोटे क्या बडे; तुस्से सभ तेसरी जै जै करा।⁶ फेरी मैं बडी भीडा साहीं होर बौहत पाणी री अवाज होर समुद्रा री लैहरा होर बादला री गर्जना जो ये बोल्दे हुए सुणेया, कि हालेलुयाह, इधी कठे कि प्रभु आस्सा रा परमेसर, सर्वसक्तिमान राज करहा।⁷ आऊआ, आस्से खुस होर मग्न हो, होर तेसरी जै जै कार करे, क्यूंकि मेमने रा ब्याह आई पुजीरा; होर तेसरी लाड़ीये आपणे आपा जो त्यार करी लईरा।⁸ होर तेस्सा जो शुद्ध होर चमकदार महीन मलमल पैहनणा रा हक दितेया गया, क्यूंकि तेस महीन मलमला रा मतलब पवित्र लोका रे धर्मा रे काम ऐ।⁹ होर तिने मेरे किन्हें बोल्या; ये लिख, कि भागा वाळे स्यों ऐ, जो मेमने रे ब्याहा रो दावता मन्झ सादे गईरे; फेरी तिने मेरे किन्हें बोल्या, ये वचन परमेसरा रे सच्चे वचन ऐ।¹⁰ होर मैं तेस जो दंडवत करणे रे कठे तेसरे पैरा पर पई गया; तिने मेरे किन्हें बोल्या, देख, एहडा मत कर, हांऊ तेरा होर तेरे भाईया रा संगी दास आ, जो यीसू री गुआही देणे पर मजबूत आ, परमेसरा री ही आराधना कर; क्यूंकि यीसू री गुआही भविष्यवाणी री आत्मा ई।¹¹ फेरी मैं स्वर्ग जो खुल्हिरा देख्या; होर देख्हा कि एक चिटा घोडा आ; होर तेस पर एक सवार आ, जो भरोसे रे लायक, होर सच्चा आ, होर से धर्मा साउगी फैसला होर युद्ध करहा।¹² तेसरी हाखिया आगी री ज्वाला ई; होर तेसरे मुंडा पर बौहत सारे राज मुकट ऐ, होर तेसरा एक नांऊ लिखीरा, जो तेस जो छाडी किन्हें होर कोई नी जाणदा।¹³ होर तिने खूना किन्हें छिडकीरे कपड़े पैहनीरे; होर तेसरा नांऊ परमेसरा रा वचन आ।¹⁴ होर स्वर्ग री सेना चिटे घोड़े पर सवार होर चिटा होर शुद्ध मलमल पैहनी किन्हें तेसरे पीछे पीछे ऐ।¹⁵ होर जाति जाति जो मारणे रे कठे तेसरे मुंहा ले एक तेज तलवार निकळा ई, होर तेस लोहे रा राजदंड लई

किन्हें तिन्हा पर राज करणा, होर तेस सर्वसक्तिमान परमेसरा रे भयानक गुस्से री जलजलाहटा रे सराबा रे कुंडा मन्झ अंगूरा रा रस निचोड़ना । 16 होर तेसरे कपड़े होर जाँघा पर ये नांऊ लिखीरा, राजाओं रा राजा होर प्रभुओं रा प्रभु । 17 फेरी में एक स्वर्गदूता जो सूरजा पर खहड़ी रे देख्या, होर तिने उच्ची अवाजा मन्झ चिल्लाई किन्हें सर्गा रे बीचा मन्झ उड़ने बाळे सभ चिडुआ किन्हें बोल्या, आऊआ परमेसरा री बडी दावता मन्झ कठे हुई जाऊआ । 18 जेस ले तुस्से राजाओं रा मास, होर मुखिया रा मास, होर बलवान आदमी रा मास, होर घोड़े रा होर तिन्हा सवारा रा मास, होर क्या अजाद, क्या दास, क्या छोटे, क्या बडे, सभ लोका रा मास खाओ । 19 फेरी में तेस पसु होर धरती रे राजाओं होर तिन्हारी सेनाओं जो तेस घोड़े रे सवार, होर तेसरी सेना किन्हें लड़ने रे कठे, कठे देख्या । 20 होर से पसु होर तेस साउगी से झूठा नबी पकड़ेया गया, जिने तेसरे साम्हणे ऐहडे चमत्कार दसे, जिन्हा रे ज़ीए तिने स्यों भरमाये जिन्हें जे तेस पसु री छाप लईरी थी, होर जो तेसरी मूर्ति री पूजा करहा ऐ थे, ये दुहें जिन्दे जी तेस आगा री झीला मन्झ जो गंधका कीन्हे भख्दी रैंहा ई, पाए गए । 21 होर बाकी लोक तेस घोड़े रे सवारा री तलवारा किन्हें जो तेसरे मुंहा ले निकळा ई थी, मारी दिते गए, होर सभ चिडु तिन्हा रे मास खाई किन्हें रजी गए ।

20 1 फेरी में एक स्वर्गदूता जो उतरदे देख्या; जेसरे हाथा मन्झ अथाह कुंडा री चाबी, होर एक बडी जंजीर थी । 2 होर तिने तेस अजगरा, यानि पुराणे सांपा जो, जो इब्लीस होर सैतान आ, पकड़ी किन्हें झार साला रे कठे बान्ही दितेया गया । 3 होर तेस जो अथाह कुंडा मन्झ पाई किन्हें बंद करी दितेया होर तेस पर मोहर लगाई दिती, ताकि से झार साल पुरे हुणे तक जाति जाति रे लोका जो द्वारा नी भरमाए; एता ले बाद जरूरी आ कि से थोहड़ी देरा रे कठे खोल्ही दितेया जाए । 4 फेरी में राजगद्दीया देखी, होर तिन्हा पर लोक बैठिरे थे, होर तिन्हा जो फैसला करणे रा हक दितेया गया; होर तिन्हारी आत्मा भी देखी, जिन्हा रे मूंड यीसू री गुआही देणे होर परमेसरा रे वचना री वजहा ले काटे गईरे थे; होर जिन्हें तेस पसु री, होर ना तेस मूर्ति री पूजा कितिरी थी, होर ना तेसरी छाप आपणे माथे होर आपणे हाथा पर लगवाई री थी; स्यों जीउंदे हुई किन्हें झार साला तक राज करदे रहे । 5 होर जेबे तक ये झार साल पुरे नी हुए, तेबे तक बाकी मरीरे नी जी उठे; ये ता पैहला पनुरुथान आ । 6 भागा बाळा होर पवित्र से आ, जो एस पैहले पुनुरुथाना रा भागीदार आ, एहडे पर दूजी मौता रा कोई हक नी आ, पर तिन्हा परमेसरा रे होर मसीह रे याजक हुणा, होर तेस साउगी झार साल तक राज करणा । 7 होर जेबे झार साल पुरे हुई जाणे, ता सैताना जो कैदा ले छाडी दितेया जाणा ।

8 होर तिन्हा जातिया जो, जो धरती रे चारो तरफ हुणी, यानि याजूज होर माजूज, जिन्हारी गिणती समुद्रा रे रेतरे रे बराबर हुणी, भरमाई किन्हें लड़ाई रे कठे, कठा करणे जो निकळणा । 9 होर तिन्हा सारी धरती पर फैहली जाणा; होर पवित्र लोका री छावनी होर प्यारी नगरी घेरी लैणी; होर आगा स्वर्गा ले उतरी किन्हें स्यों भष्म करी देणे । 10 होर तिन्हा रा भरमाणे बाळा सैतान आगा होर गंधका री झीला मन्झ, जेस मन्झ से पसु होर झूठा नबी भी हुणा, पाई दितेया जाणा, होर तिन्हा राती ध्याडी जुग जुग पीडा मन्झ तड़फदे रैंहणां । 11 फेरी में एक बडी चिटी राजगद्दी होर से जो तेस पर बैठिरा आ, देख्या, जेसरे साम्हणे ले धरती होर सर्ग भगी गए, होर तिन्हा रे कठे जगहा नी मिली । 12 फेरी में छोटे बडे सभ मरिरे जो राजगद्दी रे साम्हणे खहड़ी रे देख्या, होर काबा खोल्ही गई; होर फेरी एक होर काब खोल्ही गई; यानि जिंदगी री काब, होर जेहडा तिन्हा काबा मन्झ लिखीरा था, तिन्हा रे कामा रे मुताबक मरीरे रा फैसला कितेया गया । 13 होर समुद्रे तिन्हा मरीरे जो, जो तेस मन्झ थे देई दितेया, होर मौते होर अधोलोके तिन्हा मरिरे जो, जो तिन्हा मंझा ले थे, देई दितेया; होर तिन्हा मंझा ले हर एकी रे कामा रे मुताबक तिन्हा रा फैसला कितेया गया । 14 होर मौत होर अधोलोक भी आगा री झीला मन्झ पाई दिते गए; यूँ आगा री झीला मन्झ पाई दिते गए; ये आगा री झील ता दूजी मौत ई । 15 होर जेस केसी रा नांऊ जिंदगी री काबा मन्झ लिखीरा नी मिलेया, तेस जो आगा रे झीला मन्झ पाई दितेया गया ।

21 1 फेरी में नंऊआं सर्ग होर नौई धरती देखी, क्यूंकि पैहला सर्ग होर पैहली धरती जांदी रही, होर समुद्र भी नी रैहया । 2 फेरी में पवित्र नगर नंऊए यरुस्लेमा जो, जो स्वर्गा ले परमेसरा वाले उतरदे देख्या, होर से तेस दुल्हना साहीं थी, जीहाँ जे से आपणे लाड़े रे कठे सजी री हो । 3 फेरी में राजगद्दी मंझा ले केसी जो उच्ची अवाजा मंझ ये बोल्दे सुणेया, कि देख, परमेसरा रा डेरा माहणुआं रे बीचा मन्झ आ, तेस तिन्हा साउगी रैंहणां, होर स्यों तेसरे लोक हुणे, होर परमेसरा आपु तिन्हा साउगी रैंहणां; होर तिन्हारा परमेसर हुणा । 4 होर तेस तिन्हारी हाखिया ले सभ आंसू पोंछी देणे । होर एता ले बाद मौत नी रैहणी, होर ना दुःख, होर ना रोणा होर ना पीडा रैहणी; पैहली गल्ला जांदी रैहणी । 5 होर जो राजगद्दी पर बैठिरा था, तिने बोल्या, कि देख, हांऊ सभ कुछ नंऊआं करी देहां; फेरी । बोल्या, कि लिखी ले, क्यूंकि ये वचन भरोसे रे लायक होर सच्चे ऐ । 6 फेरी तिने मेरे किन्हें बोल्या, ये गल्ला पूरी हुई गईरी, हांऊ अल्फा होर ओमेगा आ, सुरुआत होर अंत आ, मां सोखे जो जिन्दगी रे पाणी रे सोते मंझा ले मुफ्त पियाणा । 7 जो जीत पाई ले, तेस ई तिन्हा चीजा रा वारस

हुणा, होर मां तेसरा परमेसर हुणा, होर तेस मेरे पुत्र हुणा ।
 8 पर डरपोका, होर अविस्वासिया, होर धिनौनें होर हत्यारे
 होर व्यभिचारीया, होर जादू टोना करणे वाळे, मूर्तिपुजका,
 होर सभ झूठा रा भाग तेस झीला मन्झ मिलणा, जो आग होर
 गन्धका किन्हें भख्दी रैहां ई; ये दूजी मौत ई । 9 फेरी जिन्हा
 सात स्वर्गदूता वाले सात आखरी विपत्तिया किन्हें भहरी रे
 सात कटोरे थे, तिन्हा मंझा ले एक मेरे वाले आया, होर मेरे
 साउगी गल्ला करी किन्हें बोल्या, एथी आऊ, मां तुजो दुल्हन
 यानि मेमने री लाड़ी दस्पी । 10 होर से मुंजो आत्मा मन्झ, एक
 बडे होर उच्चे पाहडा पर लई गया, होर पवित्र नगर यरुस्लेमा
 जो स्वर्गा मंझा ले परमेसरा वाले ले हेठा जो उतरदे देख्दे हुए
 दस्या । 11 परमेसरा री म्हीमा तेस मन्झ थी, होर तेसरी ज्योति
 बौहत कीमती पात्थर यानी बिल्लौरा साहीं यशबा साहीं साफ
 थी । 12 होर तेसरी शहरपनाह बडी होर उची थी, होर तेसरे
 बारा फाटक होर फाटका पर बारा स्वर्गदूत थे; होर तिन्हा पर
 इस्नाएलिया रे बारा गोत्रा रे नांऊ लिखिरे थे । 13 पूर्व दिसा
 वखा जो तीन फाटक, उत्तर दिसा वखा जो तीन फाटक, दक्षिण
 दिसा वखा जो तीन फाटक, होर पश्चिम दिसा वखा जो तीन
 फाटक थे । 14 होर नगरा रे शहरपनाह री बारा नींऊआ थी,
 होर तिन्हा पर मेमने रे बारा प्रेरिता रे बारा नाऊ लिखीरे थे
 । 15 होर जो मेरे साउगी गल्ला करेया करहा था, तेस वाले
 नगर, होर तेसरे फाटका होर तेसरी शहरपनाहा जो नापणे
 रे कठे एक सोने रा एक मापदंड था । 16 होर से नगर वर्गाकार
 आकृति मन्झ बस्सी रा था, तेसरी लम्बाई चौडाई रे बराबर थी,
 होर तिने तेस मापदंडा किन्हें से नगर नापेया, ता से दो हजार
 चार सौ किलोमीटर निकळेया । तेसरी लम्बाई, चौडाई होर
 उच्चाई बराबर थी । 17 होर तिने तेसरी शहरपनाहा जो माहणु
 रे, यानी स्वर्गदूता रे नांऊआं ले नापेया, ता एक सौ चत्वाळी
 हाथ निकळी । 18 होर तेसरी शहरपनाह यशबा री बणी री थी,
 होर नगर एहडे खरे सोने रे थे, जीहाँ जे साफ सीसे साहीं ऐ
 । 19 होर तेस नगरा री नींऊआ हर किस्मा रे कीमती पात्थरा
 किन्हें सजी री थी, पैहली नींऊ यशबा री थी, दूजी नीलमणि
 री, होर त्रीजी लालडी रो, चौथी मरकता री थी । 20 पाहन्वी
 गोमेदा री, छठवीं माणिक्य री, सातवीं पीतमणी री, आठवीं
 पेरोजा री, नौही पुखराजा री, दसवीं लहसनिया री, ग्याहरवीं
 धुम्रकांता री, बाहरवीं याकुता री । 21 होर बारा फाटक, बारा
 मोतिया साहीं थे; एक एक फाटक, एक एक मोती रा बणी रा
 था; होर नगरा री सडका साफ सीसे साहीं खरे सोने री थी ।
 22 होर मैं तेस मन्झ कोई मंदर नी देख्या, क्यूंकि सर्वसक्तिमान
 प्रभु परमेसर, होर मेमना ई मंदर आ । 23 होर तेस नगरा मन्झ
 सूरज होर चाँदनी रे प्रयासे जरूरत नी ई, क्यूंकि परमेसरा
 रे प्रयासे किन्हें तेस मन्झ प्रयासा हुएया करहा, होर मेमना

ई तेस नगरा री जोत ई, 24 होर जाति जाति रे लोका तेसरी
 जोता मन्झ चलणा फिरणा, होर धरती रे राजेया आपणे आपणे
 प्रतापा री चीजा जो एस नगरा मन्झ लई आऊणा । 25 होर तेसरे
 फाटक ध्याडी कधी बंद नी रैहणे, क्यूंकि तेथी कधी रात नी हुणी
 । 26 होर लोका जाति जाति रे प्रतापा री चीजा एस नगरा मन्झ
 लई आऊणी । 27 होर तेस मन्झ कोई अपवित्र चीज या घृणा रे
 काम करणे वाळा, या झूठ गढने वाळा, तेस मन्झ दाखल नी हुई
 पाणा, पर सिर्फ स्यों लोक ई जिन्हा रे नांऊ मेमने री जिंदगी
 री क्ताबा मन्झ लिखिरे ।

22 1 फेरी तिने मुंजो जिन्दगी रे पाणी री नदी सुइही,
 जो बिल्लौरा साहीं साफ थी, होर जो परमेसर होर
 मेमने री राजगद्दी ले निकळी किन्हें, तेस नगरा री सडका रे
 बीचो बीच जाहीं थी । 2 नदी रे दोन्हो कनारे पर जिंदगी रा
 डाळ था, जेस मन्झ बारा किस्मा रे फल लगहां ऐं थे, जो हर
 महीने फल्हा था, होर तेस डाळा रे पातरा किन्हें लोक भले
 चंगे हुहां ऐं थे । 3 होर तेथी कोई श्राप नी हुणा । परमेसर होर
 मेमने री राजगद्दी तेस नगरा मन्झ हुणी, होर तेसरे दासा तेसरी
 सेउआ करणी । 4 होर तिन्हा तेसरा मुंह देखणा, होर तेसरा नांऊ
 तिन्हारे माथे पर लिखीरा हुणा । 5 होर फेरी तेथी कोई रात नी
 हुणी, होर तिन्हा जो दीये होर सुरजा रे प्रयासे री जरूरत नी
 हुणी, क्यूंकि प्रभु परमेसरा तिन्हा जो प्रयासा देणा; होर तिन्हा
 जुग जुग राज करणा । 6 फेरी तिने मेरे किन्हें बोल्या, ये गल्ला
 भरोसे रे लायक, होर सच्ची ई, होर प्रभुए जो नबी री आत्मा
 रा परमेसर आ, होर तिने आपणे स्वर्गदूता जो इधी कठे भेज्या,
 कि आपणे दासा जो स्यों गल्ला जिन्हा रा पूरा हुणा जरूरी आ,
 दसे । 7 देख, हांऊ जल्दी आऊणे वाळा आ; भागा वाळा आ से,
 जो एस क्ताबा री भविष्यवाणी री गल्ला मन्हां । 8 हांऊ से ई
 युहन्ना आ, जो ये गल्ला सुणहां, होर देख्हा था; होर जेबे मैं
 सुणेया होर देख्या, ता जो स्वर्गदूत मुंजो ये गल्ला दस्हा था, मैं
 तेसरे पैरा पर पई किन्हें तेसरी आराधना कीती । 9 होर तिने मेरे
 किन्हें बोल्या, देखा, एहडा मत कर; क्यूंकि हांऊ तेरा होर तेरे
 भाई नबिया होर एस क्ताबा री गल्ला मनणेवाळे रा संगी दास
 आ; सिर्फ परमेसरा री आराधना करा । 10 तिने मेरे किन्हें द्वारा
 बोल्या, एस क्ताबा मन्झ जो भविष्यवाणी री गल्ला जो बंद
 मत कर; क्यूंकि टैम नेडे आ । 11 जो अन्याय करहा, से अन्याय
 ई करदा रहे; होर जो असुद्ध आ, से असुद्ध बणा रहे; होर जो
 धर्मी आ, से धर्मी बणा रहे; होर जो पवित्र आ, से पवित्र बणा
 रहे । 12 देखा, हांऊ जल्दी आऊणे वाळा आ; होर हर एकी रे
 कामा रे मुताबक बदला देणे रे कठे ईनाम मेरे वाले आ । 13 हांऊ
 अल्फा होर ओमेगा, पैहला होर पिछला, आदि होर अंत आ ।
 14 भागा वाळा ऐ स्यों, जो आपणे कपडे धोई लैहां ऐं, क्यूंकि
 तिन्हा जो जिन्दगी रे डाळा वाले आऊणे रा हक मिलणा, होर

तिन्हा फाटका ले हुई किन्हें नगरा मन्झ प्रवेस करणा । ¹⁵ पर कुत्ते, होर जादू टोना करणे वाळे, होर व्यभिचारी होर हत्यारे होर मूर्तिपूजक होर हरेक झूठा रा चाहणे वाळा, होर झूठ गढने वाळा बाहर रेंहणां । ¹⁶ मैं यीसूए आपणे स्वर्गदूता जो इधी कठे भेज्या, कि तुस्सारे अगे कलीसिया रे बारे मन्झ इन्हा गल्ला री गुआही दे; हांऊ दाऊदा रा मूल, होर बंस, होर भ्यागा रा चमक्दा हुआ तारा आ । ¹⁷ होर आत्मा, होर दुल्हन दोन्हो बोल्ला ई, आऊ; होर सुणने वाळा भी बोले, कि आऊ; होर जो सोखा हो, से आए होर जो कोई चाहे से जिंदगी रा पाणी मुफ्त लई ले । ¹⁸ हांऊ हर एकी जो जो एस क्ताबा जो भविष्यवाणी री गल्ला

सुणहां , गुआही देहां, कि अगर कोई माहणु इन्हा गल्ला मन्झ कुछ बढ़ाए, ता परमेसरा स्यों विपत्तिया जो एस क्ताबा मन्झ लिखिरी, तेस पर बढ़ाणी । ¹⁹ होर अगर कोई एस भविष्यवाणी री क्ताबा री गल्ला मंझा ले कुछ काहडी दे, ता परमेसरा तेस जिन्दगी रे डाळा होर पवित्र नगरा मंझा ले जेसरी चर्चा एस क्ताबा मन्झ ई, तेसरा भाग काहडी देणा । ²⁰ जो इन्हा गल्ला री गुआही देहां, से ये बोल्ला, हां, हांऊ जल्दी आऊणे वाळा आ, आमीन, हे प्रभु यीसू आ । ²¹ प्रभु यीसू रा अनुग्रह पवित्र लोका साउगी रहे, आमीन ।

